



New Testament

Bassar Ntcham Language

Bassar Ntcham - Bible - New Testament

Maatiu	3	
Maarki	63	
Luuki	100	
Jaan	163	
Atuun	210	
Room	269	
1 Kɔranti	296	
2 Kɔranti	322	
Gaalaati	338	
Efeesi	347	
Fiiliipi	356	
Kooloosi	363	
1 Teesaalooniiki	369	
2 Teesaalooniiki	375	
1 Tiimootee	378	
2 Tiimootee	385	
Tiiti	390	
Fiileemon	393	
Eebru	395	
Jaaki	415	
1 Piyeer	422	
2 Piyeer	430	
1 Jaan	435	
2 Jaan	442	
3 Jaan	443	
Juudi	444	
Dileedakal	446	

Bassar Ntcham - Bible - New Testament

Maatiu

Maatiu 1

- ¹Doo di sá Yeesu Kriisitoo naanjab yinjji. U nìn sá Dafiidi naantiiu, ní Dafiidi nìn sá Abraam naantiiu.
- ²Abraam màl̄ Isaaki, ní Isaaki màl̄ Jaakɔb, ní Jaakɔb màl̄ Juuda nì u-nabiyaamu.
- ³Ní Juuda màl̄ Fareesi nì Saara, (bi-na di nìn sá Tamaar). Fareesi màl̄ Eesroom, Eesroom màl̄ Aram,
- ⁴Aram màl̄ Aminadab, ní Aminadab màl̄ Naason, Naason mun màl̄ Salmɔn
- ⁵ní Salmɔn màl̄ Boowaasi, (Boowaasi na di nìn sá Raabi), ní Boowaasi mun màl̄ Oobeedi. (Oobeedi na di sá Rutu), ní Oobeedi màl̄ Jeesee,
- ⁶ní Jeesee màl̄ ubɔti Dafiidi. Dafiidi màl̄ Saloomɔn. Saloomɔn na di nìn sá Uurii nimpuu un Dafiidi nìn fɔ̄ ukpiipuee.
- ⁷Saloomɔn màl̄ Roobooaam, Roobooaam màl̄ Abiya, Abiya màl̄ Asaa,
- ⁸Asaa màl̄ Joosafati, Joosafati màl̄ Jooram, Jooram màl̄ Oosiyasi
- ⁹Oosiyasi màl̄ Joowatam, Joowatam màl̄ Akaasi, Akaasi màl̄ Eeseekiyasi,
- ¹⁰Eeseekiyasi màl̄ Manasee, Manasee màl̄ Amɔn, Amɔn màl̄ Joosiyasi.
- ¹¹Joosiyasi màl̄ Jeekooniyasi nì u-nabiyaamu nyunti ñun bi cúú Israyeel yab ki cūnni Babilɔnee.
- ¹²Bi nín cáá Israyeel yab ki cūnni Babilɔnee, boonee ní Jeekooniyasi màl̄ Salatiyeel, ní Salatiyeel màl̄ Sooroobaabeel,
- ¹³ní Sooroobaabeel màl̄ Abiyudi, Abiyudi màl̄ Eeliyakim, Eeliyakim màl̄ Asɔɔr,
- ¹⁴Asɔɔr màl̄ Sadooki, Sadooki màl̄ Akim, Akim màl̄ Eeliyudi
- ¹⁵Eeliyudi màl̄ Eeleyasaar, Eeleyasaar màl̄ Maatan, Maatan màl̄ Jaakɔb,
- ¹⁶ní Jaakɔb màl̄ Jooseefi un cáá Maarii un màl̄ Yeesu un bi yî Kriisitooyee.
- ¹⁷Kí yòon̄ Abraam yuntiñu kí dāá sāa Dafiidi yuntiñuee, anaantitɔntɔkɔ nìn sá diba kpá saalku ní, ní kí tí yòon̄ Dafiidi yuntiñu kí dāá sāa nyunti ñun bi cúú Israyeel yab ki cūnni Babilɔnee muee, anaantitɔntɔkɔ nìn sá diba kpá saalku, ní kí yòon̄ nyunti gbanti muee kí dāá sāa Kriisitoo màaltam muee anaantitɔntɔkɔ mun sá diba kpá saalku.
- ¹⁸Bi nín màl̄ Yeesu Kriisitoo puee sèé: U-na Maarii nìn sá Jooseefi bɔon ní; kí wàatí bí nín cáá tɔbee, Unimbɔti Fām pɔññu yānti Maarii cáá dipool.

¹⁹U-bɔɔn Jooseefi nɪn là kí nɔ́o mara nín lī puee, ama ní kaa là kí bìitī Maarii mun pu, ní ki là kí yàntī-u dibalin.

²⁰U bí dākafī mimmee, ní ti-Dindaan tūuŋŋu dómíin ki sòoñnì-u kudamintiiun yii: “Jooseefi, Dafiidi naantiiu, taa fàŋkì kí cáá Maarii, kun puee Unimbɔti Fām di yānti u cáá kibiki kin u dàá màal nee pool.

²¹U dàá màal kibininjabiki ní á dāá pō-kì diyindi yii Yeesu, kun puee ùn di dàá dāá fī u-niboolii bi-kpitiin.”

²²Tin bí nee kɔkɔ bāañ ki ñá kii ti-Dindaan nín yānti u-bɔnaatiliu sòoñ miŋyee ní yii:

²³“Usapɔɔn un kaa nyí uninjee dàá cáá dipool kí màal kibininjabiki, bi dàá pō-kì diyindi yii Eemanuyeel.” (Eemanuyeel taapu di sá yii: Unimbɔti bí ti-cee).

²⁴Jooseefi fīnti ŋgeem puee, ní ki cūti ki cáá Maarii kii ti-Dindaan tūuŋŋu nín bí yii ú ñá puee.

²⁵Ama waa gbēē-u ali ki dāa sāa ŋyunti ŋun u màl kibininjabikee ní Jooseefi pú kibiki diyindi yii: Yeesu.

Maatiu 2

¹Bi màl Yeesu Beetleem ní, Juudee tiŋki kiban. Ŋyunti gbantee Eeroodi di nín sá ubɔti, ní bin nyí iŋmalbijaa bɔtee biba nyánní ŋwiín nín nyēēn puee ki bāañ Jeerusaleem,

²ní ki bālfī yii: “Juuda yab bɔtiu un bi dáá màl nee, bí la? Ti ká u-ŋmalbijau nyán ŋwiín nín nyēēn puee ní ti dómíin kí gbàañ kí jāam-u.”

³Ubɔti Eeroodi nín gbīl mimmee, ní u-pɔbil bíl, ki kpáañ Jeerusaleem nib kɔkɔ pɔbiling bíl.

⁴Ní u yíin Juuda yab saraaŋakpilib nì bimaradakaliibi ki kpáfi ní ki bālfī-bi yii: “La ní an lī yii bi dàá màal Kriisitoo ní?”

⁵Ní bi kíf-u yii: “Beetleem kitiŋ kin bí Juudeeyee, kun puee Unimbɔti bɔnaatiliu nín ŋmān yii:

⁶Sii Beetleem kitiŋ kin bí Juudeeyee, aa sá kitiŋwaai Juudee tiŋkpaammu kansikin, kun puee sii poon ní ubɔti un dàá kpàà Israyeel yab man diniwulee dàá nyānní.’ “

⁷Niinee ní Eeroodi yíin bin nyí iŋmalbijaa bɔtee dibalin ki bālfī-bi ŋyunti ŋun páaa ní bi ká uŋmalbijee,

⁸ní ki bí yii bí nīn cá Beetleem, kí nyàab mmɔntiimin kí béé laakin kibikee béé, ní ki bí yii: “Ni yaa ká-kee, ní dāañ kí tükù man mun n cù kí gbàañ kí jāam-kì.”

⁹Ubɔti tükū-bi mimmee, ní bi búnti, ní ki ká uŋmalbijee līnti bi-nyɔkɔpu ki bàñ laakin bi màl kibikee, ní ki yúl kutaa pu ki bíti niin.

¹⁰Bi nín ká uŋmalbijee yúlee ní an móokìn-bi tikpil

¹¹ní bi kó kudiin ki ká kibiwaayee nì ki-na Maarii ní ki gbān ki jáam-kì, ní ki pīiti bi-gaajawanti ki lēē sindaariya nì talaalu un bi yīi ansaŋyee nì talaalu un bi yīi miiree mun ki dūu pú-kì.

¹²Boonee ní Unimbōti sòon nì bi kudamintiiu poon yii bí taa fātī dī Eeroodi cee, ní bi páan nsan ŋubo ki nín kùn bi-dumpu.

¹³Bin nyí iŋmalbijaa bōtee nín kùnee, ní Unimbōti tūŋŋu dómín ki tükū Jooseefi kudamintiiun yii: “Yīkì kí yòon kibiki nì ki-na kí sān kí nīn cá Eejipiti tiŋkin kí kāl niin kí nīn cí ŋyunti ŋun m daá tükù-si á fātī gítiíee, kun puee Eeroodi daá nyàab kí kpò kibiki nee.”

¹⁴Ní Jooseefi yīkì ki yōon kibiki nì ki-na kunyeeu ki buntì Eejipiti,

¹⁵ní ki kāl niin ali Eeroodi dāa kpīi. Mimmee an ŋá min ti-Dindaan nīn yānti u-bōnaatiliu sòonee dee yii: “M yīi m-jipoon í nyānní Eejipiti.”

¹⁶Eeroodi nín dāa bēe yii bin nyí iŋmalbijaa bōtee ŋmātiñ-u, kaa ti gítin u-ceeyee, ní u fōō diŋuul tikpil ní ki pú kinyoko yii bí cù Beetleem tiŋkin nì ntimu mun māntii tú-kèe kí kpò mbiniŋabiyaamu mun cáá abin alee nì mun kaa láá bān alee, ki táá nì ŋyunti ŋun bin nyí iŋmalbijaa bōtee nīn tükū-uee.

¹⁷An ŋá mín kí dākà Unimbōti bōnaatiliu Jeereemii nín nīn lī puee dee, yii:

¹⁸“Bi gbīl Raama tiŋkin dituweel, nsiim, nì iyaliŋki tikpil, an sá Raaseel di bí sūn u-biyaamu pu, kaa là bí ŋmēen-u, kun puee mu kpī”

¹⁹Ubōti Eeroodi nín kpīyee, ní ti-Dindaan tūŋŋu dómín Jooseefi cee kudamintiiun Eejipiti,

²⁰ní ki bí-u yii: “Yīkīm kí yòon kibiki nì ki-na ní gítí Israyeel tiŋkin, kun puee bin bàà nīn nyàab kí kpò kibikee kpī, baa ti bí.”

²¹Ní Jooseefi yīkì ki yōon kibiki nì ki-na ki nín gítí Israyeel tiŋkin.

²²Ama u fāŋki kí cùu kāl Juudee tiŋkin kun puee u gbīl yii Arkeelayusi di fōō u-baa Eeroodi beel Juudee. Kudamintiiun ní Unimbōti dākā-u, ní u túl Gaaliilee watil pu,

²³ní ki cūti kāl Gaaliilee tiŋki kin bi yīi Naasaaretee. An ŋá kii Unimbōti bōnaatiliibi nín nīn sòon ki sīn puee dee, yii: “Bi daá dāá nīn yīi-u Unaasaareetija ní.”

Maatiu 3

¹Dyunti gbantee ní Jaan un fūul binib Unimbōti nyimee dómín ki bí báakí Unimbōti bōti Juudee pōkun, yii:

²“Kpántimaan ni-bimbim kun puee Unimbōti beel sūtì ki pilin-ni.”

³Jaan pu ní Unimbōti bōnaatiliu Eesayi nīn sòon ki bí yii: “Ubo báakí kupōun yii: Bóntimaan ti-Dindaan saŋŋu kí tantimaan u-sambiyaamu kí cītí-u.”

⁴Jaan nìn pēēugutaamu kuti bōkutl ní ki gbìñ ḡban dambalau u-caḡin, ní ki ḡmòò inaakitōon nì tisiil ḡmanḡma.

⁵Jeerusaleem yab nì Juudee kōkō, nì bin kòò Jōōdan mōol caḡinee kōkō yab nìn dōōñ Jaan cee

⁶ki biitī bi-kpitii pu ní Jaan fūul-bi Unimbōti nyim Jōōdan mōolin.

⁷Jaan nín ká yii Fariisab nì Sadiusab dōōñ ú fāl-bi Unimbōti nyimee, ní u bí-bi yii: “Nimbi bin tū kii ikoowaatee, ḡma tūkū-ni yii ní sān kí nyā Unimbōti ḡuul din dōōnee ni?”

⁸Níñ ḡáarḡmaan atuun ḡin dākà yii ni fá ni-kpitiiyee

⁹kí taa níñ kā ki dākafi ki gā ni-biḡḡi yii: 'Abraam sá ti-naanja'. Ibaamōn ní m tūkū-ni, Unimbōti ḡñ kí dū atanḡpee nee kí kpántí Abraam naantiibi.

¹⁰Unimbōti bōnti kicōkō ki bíl isufi taapu kí kpikitī-i. Busubu bun kamaa yaa kaa lòōñ abimōntee bi dàá gāa-bu kí tō ḡḡmin ní.

¹¹Man cáá nnyim ní ki fūul-ni ki dākà yii ni bí kpántí ni-bimbim, ama un dàá dāān man boonee dàá dāā fāl-ni nì Unimbōti Fām nì ḡḡmi ní. Ún cáá mḡon ki jitiñ man, maa sàafi kí nīn sá u-yumbuu kí yōōñ u-naatakaḡ gba.

¹²Ún ḡúb u-yubakalkaaku, ní ki dàá bàkal kí gāntī tifiñ nì idi, ní kí dū idi kí ḡa kulōḡun ní kí dū tifiñee kí dū tō ḡḡmi ḡun kaa kúu jaanjaanee ni.”

¹³Ní Yeesu nyānni Gaaliilee ki dōmiñ Jōōdan mōol caḡin Jaan cee ú fāl-u Unimbōti nyim.

¹⁴Ní Jaan yī, ki bí-u yii: “Man di bàà máān kí dāān sii cee sii n fāl man, ní sii giti dōmiñ man n fāl-saaa?”

¹⁵Ní Yeesu bí-u yii: “Kíí tí ḡa mīn kōḡkōnnee kun puee an máān tí ḡa mīn kí nōó min kōkō Unimbōti bālfēe.” Niinee ní Jaan kaa ti kpākañ-u, ní ki fūl-u.

¹⁶ḡyunti ḡun Jaan fūl-u ki dōò, u bí nyēēn nnyiminee, kpalaayee ní kutagbōḡu cúu pīti, ní u wāl Unimbōti Fām kpakatīñ u-pu ki bí kii dibeeñanjilee,

¹⁷ní bi gbīl Unimbōti sōōñi kutaa pu yii: “Un bí nee di sá man Jipōon un m nēēn tikpilee; ún ní m-pōbil fáati.”

Maatiu 4

¹Boonee ní Unimbōti Fām cáá Yeesu ki cūnni kupōon Sitaan n cōḡkì-u.

²Ní u bóob kinyōkō iwiin imuḡku ili, tinyati mun imuḡku ili, ní ḡkum kíñ ki cáá-u.

³Ní Sitaan sūtì ki pīl-u, ní ki bí-u yii: “A yaa lafun sá Unimbōti Jipōon, á yānti atanḡpee nee n kpántí tijin á jī”

⁴Ní Yeesu yī ní ki kí-u yii: “Unimbōti takaldau lī yii: 'An kaa sá tijin dijil ḡmanḡma di yì unil maḡfal, ama, unil n nīn tō Unimbōti bōtee di yì u-maḡfal.' “

⁵Ní Sitaan cáá-u ki cūnni Jeerusaleem ní ki cáá-u ki tókòh Kunimbòtidii yilpu kúntikūnti,

⁶ní ki bí-u yii: “A yaa sá Unimbòti Jipòon, yùkū kí tiiñ taapu tiba kaa làá ñá-si; kun puee an ñmàñ Unimbòti takaldaun yii: “Unimbòti dàá yànti u-tūuni ñ nīn tíkí-si i-ñaanin a-taal ñ taa gbéetí ditaṅkpal.”

⁷Ní Yeesu tí yū ní ki kíi-u yii: “An lī Unimbòti takaldau poon yii: ‘Á taa cōṅkì ti-Dindaan a-Nimbòtiu.’ “

⁸Ní Sitaan tí cáá-u ki jóm dijoofōṅfōkōl diba pu, ní ki yānti u ká abee ñin bí duulnyanee kòkò nì ñi-nyooti,

⁹ní ki bí-u yii: “A yaa gbāaṅ ki jáam-mi, m dàá dū an kòkò kí tī-si.”

¹⁰Niinee Yeesu bí-u yii: “Sitaan, sùtí niin kí wàatī-mi! Kun puee an ñmàñ Unimbòti takaldau poon yii: ‘Ti-Dindaan a-Nimbòtiu baba ní an sá á jáam, kí nīn bí ùn baba tundin.’ “

¹¹Ní Sitaan cānti-u ní Unimbòti tūuni dómiñ u-cee ki tī-u tijin.

¹²Yeesu nín gbīl yii bi cúú Jaan ki pīiñ sarkee ní u yíkì ki nín cá Gaaliilee,

¹³ki bàñee kaa kóò Naasaareeti ní ki kóòh Kapeenaayum Gaaliilee mool cañin, laan sá Sabiilon nì Neeftalii tiṅkinee.

¹⁴An ñá kii Unimbòti bōnaatiliu Eesayi nín nìn sòòh ki síiñ puee dee, yii:

¹⁵“Sabiilon nì Neeftalii timmu yab, tiṅku watil pú, Jòodan buṅbandi lapu, Gaaliilee tiṅki, laakin bin kaa sá Juuda yabee kóòyee,

¹⁶Niin ní inifunaan in kòkò nìn kóò dibòmbòndinee dàá dāá ká ṅwalfikpaan! Bin nìn ká ṅkúm bòmbòndinee ṅwalfi dàá dāá ṅmíntí bi-pu.”

¹⁷Kí yòòh ṅyunti gbantee ní Yeesu kíi ki bíi sòòh Unimbòti bōti, yii: “Kpántímaan ni-bimbim kun puee Unimbòti beel sùtì ki pīlīn-ni.”

¹⁸Yeesu nín bíi kpàkañ Gaaliilee moollee, ní u ká nnabiyaamu muli: an nìn sá Siimōn un bi yū Piyeeree nì u-naal Andree. Bi nìn sá bijōncuuliibi ní ki bíi tòó kulaaṅṅu.

¹⁹Ní Yeesu bí yii: “Dāaṅ kí nīn nóómaan-mi, m dū-ni kí kpántí bin cāabiñ binib m-ceeyee.”

²⁰Dicilpu niin ní bi yānti bi-laanti ki kíi ki táá-u.

²¹U gítí cūti nyòkòpuee, ní ki ká binib bili, bí mun tí sá unil nì u-naal, an sá Jaaki nì Jaan Seebeede jipòmbi, bi nìn ká biṅalimbun bi nì bi-baa ki ṅaṅkí bi-laanti. Ní Yeesu yíiñ-bi,

²²ní bi yānti bi-baa nì bi-ṅalimbu niin, ní ki táá Yeesu.

²³Yeesu nìn yíiñ Gaaliilee timmu kòkòh ki dākà akpafidiinni ki sòòh tibòmòntiil tin sá Unimbòti beel bōtee, ki cāantí bideembi nì bibunliibi kòkò samaa kansikin.

²⁴Siirii yab kɔkɔ nɪn gbɪl̄ tin Yeesu ŋáánee ní bi cáán bin kɔkɔ bũn tigban̄ween̄kpitilee n̄i bin bí iyaliŋkin tikpilee. Bin pu arasiniibi kēe n̄i bibimbidambi n̄i bifaliŋfaambi, ní Yeesu cáán bi-kɔkɔ.

²⁵Ní dinikitikpaandi n̄n kɪn̄ ki n̄ó-u, ki n̄n nyánní Gaaliilee n̄i n̄timu saalaa watil, n̄i Jeerusaleem n̄i Juudee tiŋkin n̄i kitiŋ kin bí Joódan buŋgbandi lapu puee.

Maatiu 5

¹Yeesu n̄n ká dinikitikpaandi gbantee, ní u jóm̄ ki kál̄ dijool pu, ní u-boonnooliibi súti ki pí-l̄-u.

²Ní u kíí ki bí dákà-bi yii:

³“Án n̄n m̄ɔn̄ bin s̄intiñ bi-ba ki t̄i Unimbɔtee kun puee bi sá Unimbɔti beelin yab.

⁴“Án n̄n m̄ɔn̄ bin bí kunimbaaunee kun puee Unimbɔti dàá dāá ŋm̄eeñ-bi.

⁵“Án n̄n m̄ɔn̄ binib bin m̄ɔee, kun puee Unimbɔti dàá dāá t̄i-bi kutindaŋu.

⁶“Án n̄n m̄ɔn̄ bin deedee k̄um̄ n̄i deedee nyinnyooŋu cááyee, kun puee Unimbɔti dàá dāá t̄i-bi an kɔkɔ.

⁷“Án n̄n m̄ɔn̄ bisaasoliibi, kun puee Unimbɔti dàá dāá s̄ɔ bí mun saai.

⁸“Án n̄n m̄ɔn̄ bin p̄obiliŋ bí diba n̄i Unimbɔtee kun puee bi dàá ká Unimbɔti.

⁹“Án n̄n m̄ɔn̄ bin cāab̄iñ ŋgbans̄ɔŋfi bi-jutiibi kansikinee, kun puee Unimbɔti dàá dāá ȳiñ-bi u-biyaamu.

¹⁰“Án n̄n m̄ɔn̄ bin ní bi s̄aantí bi-deedeeu puee, kun puee bi sá Unimbɔti beelin yab.

¹¹“Án n̄n m̄ɔn̄-ni binib yaa bí ki s̄i-ni ki s̄aantí-ni ki m̄ontí inyim̄on̄ ki t̄untí ni-pu ki s̄oñ tikpitiil kamaa ni-pu ni n̄n sá man yabee puee.

¹²“Án n̄n m̄ɔm̄maan-ni ní n̄n f̄aal̄, kun puee tipaakpaandi d̄ɔ yilpu ki cí-ni. M̄iñ mbaantiim ní bi n̄n tí s̄aañ Unimbɔti b̄onaatiliibi bin n̄n péé péé ki kál̄ ní nimbi dāa n̄n páañní boonee.”

¹³Ní Yeesu kút̄i ki l̄i yii: “Nimbi di sá kii ŋyaam ki t̄i duulnya. Ŋyaam yaa kp̄iyyee, mana ní bi ḡit̄i ŋũn̄ kí ŋá ní mí f̄at̄i m̄ɔk̄i? Mimmee maa ti bí tiban dee, see bí d̄u-m̄i kí fá mm̄ɔŋki, ní binib j̄it̄i ki tà.

¹⁴“Ni sá kii ŋwalfee ní ki t̄i duulnya. Kitiŋ kin bi m̄án ki tók̄on̄ kigbantaŋ puee kaa likintí ki-ba pu.

¹⁵Baa tí t̄uut̄i fitila kí d̄u dibool kí cíkiñ u-pu asee bí d̄u tók̄on̄ dik̄ol pu ní án n̄n wāl̄ bin kɔkɔ bí kudiinee.

¹⁶M̄iñ ní ni-walfiŋu n̄ n̄n ŋm̄intí binib, bí ká tiŋan tin ni ŋáánee, kí p̄akà ni-Baa Unimbɔti un bí yilpuee.”

- 17“Ní taa dākafī yīi m dómīn kī kpītī Mooisi marab nì tin Unimbōti bōnaatiliibi nìn sòōnee, maa dómīn kī kpītī, m dómīn kī bóbítí bi-tapu nín sá puee ní.
- 18Ibaamōn ní m tükù-ni, nyunti nyun ní yilpu nì taapu dáá bée, marabee poon tīnmanmabiti báà kubō kpá kī fótáaa, kilōmbiki báà kiba mun kpá kī kpītī kī dāá sāā tiwan kōkō kúntitam.
- 19An pu ní un di yaa kpītī kimarawaai kiba ní ki dākà bin kínee yīi bí nīn ḡáán mimmee, udaan dāa sá kiyaawaai ní Unimbōti beelin. Ama un di yaa ḡúb marab ní ki dākà binib bí nīn ḡáán mimmee, udaan dāa sá ukpaan ní Unimbōti beelin.
- 20Ibaamōn ní m sòòn nì ni, ni yaa kaa bí deedee ki jítìn bimaradakaliibi nì Fariisab, naa ḡūn kī kó Unimbōti beelin.”
- 21“Ni gbīl bi tükū ti-naanjab yīi: 'Á taa kpò unil, un kamaa yaa kūū unilee, see bí cáá udaan ibōsoon kī dāal u-tafal.’
- 22Ama man tükù-ni yīi un kamaa di yaa fōō diḡuul u-nabiki puee, see bí cáá-u ibōsoon kī dāal u-tafal. Un yaa sī u-nabiki yīi 'Kinaatuuyee,' see bí cáá-u bibōsoonkpaambi cee, ní un yaa sī u-nabiki yīi 'Kunifaḡuee,' udaan máan bí cáá-u ditafadaaldi ḡmiḡun ní.
- 23An puee a yaa cáán saraa nsaraafan pu kī tī Unimbōti ní ki tētì yīi a-nabiki díkí a-pu tibe,
- 24yántī a-saraau nsaraafan cee kī cùú ḡāḡkì si nì a-nabikee kansikin, ní kī nín gítín kī ḡá a-saraau kī tī Unimbōti.
- 25“A yaa ḡá ubō tiba ní u cáñ-si ibōsoonee, ḡāḡkì sii nì u kansikin malaa, nyunti nyun ni dáá bí nsanee, an nín dàá ḡá pu ú taa cáá-si kī tī ubōsoonli ní ubōsoonlee mun n dū-si kī tī plisi, ní ùn n cáá-si kī pīn sarkee.
- 26Ibaamōn ní m tükù-si, bi yaa cáá-si ki tó niinee see á pà a-pōndi nyíkínyiki, báà gboo kaa kīntí, ní bí nín líi-si.”
- 27Ní Yeesu bí-bi yīi: “Kee ni gbīl bi sīn yīi: 'Á taa ḡá tilaakpaalaa?’
- 28Ama man tükù-ni yīi un kamaa di yaa kpēēunimpu ki bàà là kī mōnni-uee kpáā ḡá tilaakpaal dee, u-pōbilin.
- 29An puee a nín kpēē kuḡyee yaa kaa fáati Unimbōtee lēēan landōkōi a-ni, kun puee an ḡān ki tī-si á taa ḡá an kpitii kī taa láā kó ḡḡmi nyun kaa kúú jaanjaanee ni, kii an nín ḡān ki tī-si bí lúkutí a-nimil diba kī fá á ḡmátí nì a-nimiliḡ liitil n nīn kā á kpú puee.
- 30A-ḡaḡḡiil di yaa làá tí yántī á lítí ikpitinee, ḡūtī-ḡu kī fá, an só a-wunjandi diba n nīn kpá, ki jítìn a-wunti n nīn bí mmōm kī kó ḡḡmin.”
- 31“An tí lī yīi: 'Sii un yaa làá jà a-nimpuuee n tī-u takalda un dākà kun pu ní a jì-uee ní kī nín jà-u.’

³²Ama man tükù-ni yii: Sii un kamaa nimpuu yaa kaa nyán a-boon ní a yaa jìñ-uee, a dū-u ki siìh tilaakpaal saṅṅu pu dee. Ní un mun yaa cáá unimpu un bi jìñee mun ḡá tilaakpaal.”

³³“Ni gítì tí gbìl bi nín tükū ti-naanjab yii: 'Á taa pùtì Unimbòti yindi fam, a yaa pùtì-u ki bí yii a làá ḡá puee, ḡá mín kí tī-u.’

³⁴Ama man tükū-ni yii ní taa péēpùtì kpataaa. Ní taa pùtì yilpu kun puee niin di sá Unimbòti beejal,

³⁵kí taa pùtì kitiṅ, kun puee kitiṅ sá u-taaji təkənlanḡki ní, kí taa pùtì Jeerusaleem kun puee Ubòtikpaan tiṅki dee.

³⁶Á taa pùtì a-yil, kun puee aa ḡūh kí yàntì kuyikpibambaantiiu n pīlāaa kaa ḡūh kí yàntì kú bòntì.

³⁷An yaa sá á kii iinḡee, kii 'iin', an yaa sá á kii aayeeyee, kii 'aayee', tin a yaa gítì páaḡ ki lī boonee nyánni Sitaan cee ní.”

³⁸“Ni gbìl bi siìh yii: 'Un yaa lēā-nimilee, a mun n lēū-yal kí téeh, ní un yaa lēā-nyindee a mun n lēū-yal kí téeh.’

³⁹Ama man tükù-ni yii, a-juti yaa ḡá-si ikpatee, á taa dū ikpiti kí tò-u ipòntoon. Bi yaa fáá a-ḡaṅgiitanḡpanjil ntampee, fàtì a-ḡaṅgan yal kí tī bí fáá.

⁴⁰Ubo yaa là kí kòh-si tibòtin kí fōō a-bòkutiikee, dū a-bòkutikpaandi kí kùtì kí tī-u.

⁴¹Uyidaan yaa páb-si yii á túh diwanḡul kí còom ditanḡkpal dibee, á túh diwanḡulee kí còom atanḡkee ali.

⁴²Ubo yaa mēē-si tibe, pō-u, kí taa fàtì a-boon kí tī un dómín a-cee kí pinnì tibe.”

⁴³“Ni gbìl bi siìh yii: 'Á nīn néeh a-bōō, kí nīn ná a-nannanliu.’

⁴⁴Ama man tükù-ni yii ní nīn néeh ni-nannanliibi kí nīn mēē Unimbòti ki tì bin sàantì-nee,

⁴⁵mimnee, ni sá ni-Baa un bí yilpuee biyaamu dee, kun puee ún yàntì u-wiiḡḡu nyēēki tì binikpitib nì binimòntiibi ní ki yàntì utaa nì ki tì bin bí deedeeyee nì bin kaa bí deedeeyee.

⁴⁶Ni yaa néeh bin néeh-nee ḡmaniḡmee, ba paatii ní ni gítì kā ki cí kí dāá fōō Unimbòti cee? Kaa sá mín ní bifòtliibi bin ni kpēē yii bi sá bikpitibee mun ḡáánaan.

⁴⁷Ni yaa tí jáám ni-nabiyaamu ḡmaniḡmee, la di nyán u-ba? Bin kaa nyí Unimbòtee mun ḡááh mín mbaantiim naa!

⁴⁸Mín puee ní nīn cáámaan mbimbimòntiim tikòkò poon kii ni-Baa un bí yilpuee nín cáá puee.”

Maatiu 6

- ¹“Ní nīn nyí nì ni-ba kí taa nīn nyāntí ni-deedeebitam ki dākà binib yii bí ká-ni. Ni yaa ḡáán tījan ki dākà binibee, naa tin gītī kāntí ipaati iba ni-Baa un bí yilpuee cee.
- ²“A yaa làá pō uwōfi ubō tibee, taa nīn báakí bí ká yii sii di bī tìi tība, kii ipoonnyoondambi nín báakí adan pu nì akpafidiin ni puee. Bi ḡáán mín binib n̄ nīn pākà-bi ní. Ibaamōn ní m tükù-ni, bi fōō bi-paatii ki dódò.
- ³Ama sii yaa làá pō uwōfi tibee, á tī a-ḡaḡgan n̄ taa nīn nyí a-ḡaḡgiil nín ḡá tīḡyee.
- ⁴“Á ḡá dibalin, ní a-Baa un wāl dibalinee n̄ tēēn-si.”
- ⁵“Ni yaa bī mēyee taa nīn mēēmaan kii ipoonnyoondambi bin nēēn ki yūlfī dicancaal akpafidiin ni n̄ asaḡkaḡkpil ki mēē báà ḡma n̄ nīn wāl-bee. Ibaamōn ní m tükù-ni, bi fōō bi-paatii ki dódò.
- ⁶Ama, a yaa làá mēyee, kó a-diikun, kí dūú piiñ kí mēē, a-Baa bí dibalin niin. A-Baa un wāl tin a bī ḡáán dibalinee dàá pà-si.
- ⁷“Ni yaa bī mēyee, taa nīn būsīmaan anyōobun ḡin kaa cáá taapuee kii bin kaa nyí Unimbōtee nín ḡáán puee, ki dākafī yii bi yaa mēē tikpilee ní Unimbōti dàá pīlfīn-bee.
- ⁸Nimbi n̄ taa fōō bīn nín ḡáán puee, kun puee ni-Baa nyí kun páb-nee ki wāati ní ni dāa nín mēē-u.
- ⁹Nīn mēēmaan yii: 'Ti-Baa un bí yilpuee, yāntī bí bēé yii a sá Unimbōti circirdaan,
- ¹⁰kí yāntī a-beel n̄ dāān, bí ḡá a nín là puee taapu doo kii bi nín ḡáán yilpu puee,
- ¹¹kí pō-ti dīn jikaati.
- ¹²Kí dū ti-kpitii in ti yīntiñ-see kí pō-ti kii ti mun nín cáá bin yīntiñ-tee kpitii ki pūn-bi puee.
- ¹³Kí taa pō mpaan Sitaan n̄ kīl-ti, ama á nyāntí-ti u-ḡaan. [Kun puee sii di yì dibeel n̄ mḡōn n̄ tinyool kí nīn cá jaanjaan. Ameen'.]
- ¹⁴Di sá yii ni yaa cáá tin ni-jutiibi yīntiñ-nee ki pūn-bee, ni-Baa un bí yilpuee dàá dū tin ni mun yīntiñ-uee kí pō-ni.
- ¹⁵Ama ni yaa kaa cáá tin ni-jutiibi yīntiñ-nee ki pūn-bee, ni-Baa un bí yilpuee kaa làá dū ni mun kpitii kí pō-ni.”
- ¹⁶“Ni yaa bóob kinyōkōee ní taa bīl ni-nimiini kii ipoonnyoondambi nín ḡáán puee, bīn bīl bi-nimiini binib n̄ bēé yii bi bóob kinyōkō ní. Ibaamōn ní m tükù-ni, bi fōō bi-paatii ki dódò.
- ¹⁷Ama sii yaa bóob kinyōkōee, fīntí a-nimiin kí càatī a-yikpiti,
- ¹⁸an nín dàá ḡá pu báà ubō n̄ taa bēé yii a bóob kinyōkōee, see a-Baa un bí dibalinee baba n̄ nīn nyí, ní a-Baa un wāl dibalinee n̄ tī-si a-paatii.”
- ¹⁹“Ní taa nīn nyāabmaan tīgaajati ki sīntí ni-ba taapu doo laakin dikōtuul ḡūn kí mó an ḡūn kí tí dāmintī muee, bīnaayub mun ḡūn kí cíl kudii kí kó kí yò tiwane.

²⁰Níń ńáámmaan min fáatì Unimbótee ní ú dū ipaati kí síín-ni yilpu laakin dikótuul kpáaa tiwan kaa dāmintáaa binaayub mun kaa ńūn kí cíl kí kó kí yòee.

²¹Kun puee laakin a-gaajati bée, niin ní a-landókọju mun bí.”

²²“Unil nimiliy di sá u-wunti fitilau. A-nimiliy yaa wálee a-wunti kọkọ bí ńwalfin ní.

²³Ama a-nimiliy yaa kaa wálee a-wunti kọkọ bí dibombóndin ní. Ọwalfi ńun bí a-nee yaa sá dibombóndee, mimmee dibombóndee kaa cáá juti.”

²⁴“Unibaanti kaa ńūn kí nń sá bikpilib bili tóntonliu: see ú nń ná ubọ kí nń neeń un kínee, ú dū u-ba kí tī ubọ ní kí nń kpèe un béeyee fam. Naa ńūn kí nń sá Unimbóti tóntonliibi kí nń sá animil mun tóntonliibi.”

²⁵“An pu ní m tükù-ni yii: Ní taa nń yálinjí kun ni dàá jī ki dàá nyò kí nń bée, nì tin ni dāá pèeńee pu. Di sá yii dimanjfal jítiń tijin, ní tiwun mun jítiń abókuti, àá an kaa sá mìn?

²⁶Kpèemaan nnombiyaamu mun ńàan kutaa puee, muua būulaaa kaa cēēyaaa, kaa cáá cakalaabi ki kpáafí tijikaal, ama ni-Baa un bí yilpuee kpīintí-mu, kin nimbi bin jítiń nnombiyaamu kpataaayee ní ni-Baa un bí yilpuee kaa nín kpèéee?

²⁷Ni-kansikin ńma di ńūn kí nń ká ki niń, kí gbéeń u-manjfal fókọju pu fiii?

²⁸“Kin, ba pu ní ni ká ki yálinjí kun ni dàá pèeńee pu? Kpèemaan, nsupumpukum min nyēētisatinee: maa tūn ditundaaa, kaa lù satab,

²⁹ama m tükù-ni yii ubóti Saloomon, nì u-gaajati kọkọee, waa ńún ki ká tiwannyaandi ki pèeń an bàń mpumpukum gbanti kansikin miba nyaanķu.

³⁰Unimbóti yaa nyāantí mìn timool tin bí tisatin dín, fool ńńmi n dāá wò-tèe, mimmee waa làá ńá án jítiń mìn ki tī-naaan? Ba pu ní ni-fookiiu kaa náan mìn!

³¹Mimmee, taa nń yálinjímaan, yii: 'Ti dàá jī ba? Ti dàá nyò ba? Ti dàá pèeń ba?'

³²An sá bin kaa nyí Unimbótee di nyàab tìn múmul. Ama nimbi Baa un bí yilpuee nyí yii an wanti kọkọ máan ní nń cáá-tì.

³³Péé kí nyàabmaan Unimbóti beel nì deedee un u balfi-ni yii ní nń bée, ní Unimbóti n dū tin kínee kí kūtì-ni.

³⁴Mìn puee ní kpèe dín yati, ní taa nń yálinjímaan fool pu. Fool mun nì u-yati ní. Ọwiin kamaa nì ńu-gińdi ní.”

Maatiu 7

¹“Taa nń sòommaan tob bóti, an nín dàá ńá pu ní Unimbóti n taa láā sòon ni mun yatee.

²Min min ní a dì kí sòon a-nabiki bótee, mìn ní Unimbóti dàá dī kí sòon si mun yati: a nín ńmántī min kí tī a-jutee, mìn ní u dàá dāá ńmántī kí tī si mun.

- ³Ba pu ní a wāl kimɔmbiki kin kā a-nabiki nimilinee, ní kaa wāl didɔjal din kā sii a-ba yalinee?
- ⁴Mana ní a ɲū̀n kɪ̀ lɪ̀ yii: 'M-nabiki, yàntī́ m̄ lḗ-si kimɔmbiki a-nimilin,' ɲyunti ɲun didɔjal kā sii nimilinee?
- ⁵Mpoonnyoondaan, péé kɪ̀ lḗdidɔjal din kā sii a-ba nimilinee kɪ̀ wàatī́, ní kɪ̀ nín wāl mmɔntiimin kɪ̀ lḗkimɔmbiki kin kā a-nabiki yalinee.
- ⁶“Ní taa dū́ tin bí circiree kɪ̀ tī́ iboo, i dàá fàtí́ tòntī́-ni; kɪ̀ taa dū́ ni-beedimbiliɲ kɪ̀ lúkú afab, bi dàá tā́ kɪ̀ bī́l.”
- ⁷“Mèèmaan Unimbɔti, u dàá tī́-ni; nyàabmaan, u dàá yàntī́ ní ká; fáámaan, u dàá pìitī́-ni kipunyɔkɔ.
- ⁸Kun puee sii un yaa mḗUnimbɔti tibe see ú tī́-si kudɔɲu, ní sii un yaa nyàab tibe see á ká kudɔɲu, sii un yaa tí yú kɪ̀ fátée see bí pìitī́-si.
- ⁹Ni-kansikin ubɔ jipɔɔn di yaa mḗ-u kpɔɔ, u kííkí kɪ̀ dū́ ditaɲkpal kɪ̀ tī́-uaaa?
- ¹⁰U yaa tí mḗ-u ujɔm, u kííkí kɪ̀ dū́ ukoobu kɪ̀ tī́-uaaa?
- ¹¹Nimbi binikpitib nyí kɪ̀ tī́ ni-biyaamu tiwammontiil, kin miɲa pu ní ni-Baa un bí yilpuee di kaa nín ɲū̀n kɪ̀ dū́ tiwammontiil kɪ̀ tī́ bin mḗ-uee?
- ¹²“Min ní ni yaa là bí ɲá kɪ̀ tī́-nee, nín ɲáámmaan mín kɪ̀ tì bí mun. Mooisi marab nì Unimbɔti bɔnaatiliibi takaldab nín lɪ̀ puee dee.”
- ¹³“Dīmaan kipunyɔkɔwaa kɪ̀ kó. Kun puee kipunyɔkɔ nì nsan ɲun waayee di càn binib diwankilin, niin ní kunipaau nóó.
- ¹⁴Ama kipunyɔkɔwaa kin pɔ́ dijitilee nì nsan ɲun kaa wā́yee di càn binib dimaɲfal laɲki, binib fiii di kántí-ɲu kɪ̀ dī.”
- ¹⁵“Ní nín nyímmaan ni-ba nì bin yî bi-ba yii Unimbɔti bɔnaatiliibi kin kaa sée. Bi yaa dōón ni-ceeyee, bi bí sooo kii ipiiyee, ama ní bi-pɔbiliɲ sá isaakpan, kɪ̀ cútí.
- ¹⁶Bi-tuuɲi ní ni dàá dū́ bée-bi, kun puee baa tòó atùn abɔjanaakun pu, kaa tí kītī kɔɲkib bukuɲkumbu pu.
- ¹⁷Busumontiibu sá kamaa lòòn asubimonti ní, ní busukpitibu lòòn asubikpiti.
- ¹⁸Busumontiibu kaa ɲū̀n kɪ̀ lòòn asubikpiti, mín ní busukpitibu kaa ɲū̀n kɪ̀ lòòn asubimonti.
- ¹⁹Isufi in kɔkɔ kaa lòòn asubimontee, bi dàá gā́-i ní kɪ̀ tɔ ɲɲmin.
- ²⁰An puee, bin yî bi-ba yii Unimbɔti bɔnaatiliibi kin kaa sée tuuɲi ní ni dàá dū́ kɪ̀ bée-bi.”
- ²¹“An kaa sá bin kɔkɔ yî-mi yii: 'M-Dindaan, M-Dindaanee' di dàá dā́ kó Unimbɔti beelin, asee bin ɲáán min m-Baa un bí yilpuee lèe baba di dā́ kòó.

²²Ibɔsoon dalee binib tikpil dàá dāá lì-mi yii: 'Ti-Dindaan, ti-Dindaan, a-yindi puee Unimbɔti kaa nìn sòon̄ nì ti, ti dūu nāatì binibaaa? Taa jìñ arasiniibi a-yindi puɔɔɔ? Taa ɲáān maamaacib a-yindi puɔɔɔ?'

²³Niinee ní m̄ dāá tükù-bi yii: 'Maa nyí-ni ki ká kpataaa. Sútímaan niin kí wàatī-mi, nimbi bikpitiŋaliibee dee.' “

²⁴“Mín̄ ní un kamaa yaa gbīl̄ man ɔti tin m̄ sòon̄ nee ní ki yaa kíñ̄ ki ɲáān mimmee, udaan náān nì uciŋfiti un mán̄ u-diiku ki tókò̄n ditaŋkpal puee ní.

²⁵Utaa dómín̄ ki nìn̄, ní nnyingbeen dómín̄ ki léen̄ kudiiyee pu, ní kubuŋkpaan̄ɲu jíti, ama kudiiyee kaa líti, kun puee ku tókó̄ ditaŋkpal pu.

²⁶Ama un kamaa di yaa gbīl̄ man ɔti tin m̄ sòon̄ee ní kaa ɲáān mimmee náān nì ugbaan un mán̄ u-diiku ki tókò̄n dibul puee ní.

²⁷Utaa dómín̄ ki nìn̄, ní nnyingbeen dómín̄ ki léen̄ kudiiyee pu, ní kubuŋkpaan̄ɲu dómín̄ ki jíti, ní ku líti ki nān̄ dúsídusi.”

²⁸Yeesu nín̄ sòon̄ ki dākā samaayee ki dóòyee, ní u-dàkatam gbanti kó-bi tikpil,

²⁹kun puee ún̄ dàkatamee cáá mpɔn, kaa bí kii bimaradakaliibi yamee.

Maatiu 8

¹Yeesu kpákatiñ̄ dijool puee, ní kunipaau nóó-u.

²Ní unyaŋgbanti ubɔ sútín̄ ki pīl̄-u, ki gbāān u-nimiin ki bí-u yii: “Ukpil, cáān-mi kun puee m̄ nyí yii a yaa là, a ɲūn̄ kí cáān-mi m-wunti n̄ ɲāŋkì.”

³Yeesu tāntì u-ɲal ní ki gbēē-u, ní ki bí yii: “M̄ là. Pōkìñ̄!” Niin niin ní uninjee póokì ní u-wunti ɲāŋkì.

⁴Ní Yeesu bí-u yii: “Pīlfi tiŋan: á taa tükù báà ubɔ tibɔti nee, ama á cáá a-ba kí dākà usaraaŋal ú bée yii a-wunti ɲāŋkì, ní kí ɲá saraa kii Mooisi marab nín̄ lī puee ní usaraaŋal n̄ tükù báà ɲma yii a póokì.”

⁵Yeesu nìn̄ kó Kapeenaayum tiŋkinee, ní Room soojakpiliu ubɔ sútín̄ ki pīl̄-u ki gbāān-u yii:

⁶“Ukpil, m-tòntòliu dō kudiin ki bñ̄, ki fāl̄ ki yálin̄kí tikpil.”

⁷Ní Yeesu bí-u yii: “M̄ dàá cù kí cáān-u”

⁸Ní usojakpilee bí-u yii: “Ukpil, maa máān á kó m-dumpu. Péelì dinyɔɔbundi dibaba m-tòntòliu dàá pōkì.

⁹Di sá yii man m-ba, m cáá bikpilib bin taapu m bée, ní ki mun cáá soojab bin mun bí man taapuee. M̄ ɲūn̄ kí tükù ubɔ yii: 'Cù doo!' ní ú cù, ní kí bí ubɔ mun yii: 'Dāān doo!' ní ú dāān, ní kí bí m-tòntòliu una yii: 'Dá yéè!' ní ú ɲá.”

¹⁰Yeesu nín̄ gbīl̄ an nyɔɔbuŋɲee, ní u bākati ki bí bin nóó-uee yii: “Ibaamɔn ní m sòon̄ nì ni, maa láá pééká Israyeel yab kansikin ubɔ fōō-mi ki kí kii Uroomja nee.

- 11Mín ní m tükù-ni yii binib tikpil dàá dāá nyānní ɲwiín nín nyēeh puee nì ɲu nín jēetí puee kí kó Unimbōti beelin, bi nì Abraam nì Isaaki nì Jaakob ń kpāfi kí jī nnaam!
- 12Ama ní Israyeel yab bin bàà máań kí nīn sá Unimbōti beelin yabee bí dāá nyāntiń-bi mmońki kí tō dibombōndin, laakin ní bi dàá nīn sūn bi-nyiińgi gā tōb kākakee.”
- 13Ní Yeesu tükū usoojapilee yii: “Nīn kùn a-dumpu, a nín fōō ki kíkí puee, án ɲá mín kí tī-si.” Kukuluu gbantee ní utōntōnlee kpāā pōókì.
- 14Ní Yeesu búntì Piyeer dumpu ki bàñee, Piyeer nimpuu na būn mmańfanyim ki dō u-wunti píl kpāńkpam,
- 15ní Yeesu gbēēu-ɲal, ní mmańfanyim cāntì-u ní u yíkì ki ɲá-u tijin u jín.
- 16Kujooee, bi cáań-u biwaatiibi tikpil, ní u jīn arasiniibi nì u-nyōobundi, ní ki cáań bibunliibi kōkō.
- 17U ɲá mín án nōó nì Unimbōti bōnaatiliu Eesayi nín nīn lī puee, yii: “U fōō ti-wōfii nì ti-weeni.”
- 18Yeesu nīn ká yii kunipaau māntì ki tú-uee, ní u pú kinyōkō yii bí kó buńalimbu kí dùtì kí cù lapu pu buńgbandi.
- 19Niinee ní umaradakai ubō sūtīn ki pīl-u ní ki bí yii: “Ukpil, m dàá nīn nōó-si bāa laakin ní a yaa cée.”
- 20Ní Yeesu kíkí-u yii: “Jiińkpaaibi cáá bi-kōńkooni ki dō, ní nnōmbiyaamu mun cáá mu-diińgi, ama man Kinibiki kaa cáá laakin m dàá bíl m-yil kí ɲuńfèe.”
- 21Ní bin nīn nōó-uee kansikin ubō bí-u yii: “Ukpil, pō-mi nsan ń síb m-baa.”
- 22Ní Yeesu bí-u yii: “Sii dee, nōó man, kí yāntī bitańkpiibi ń nīn síb bi-tańkpiibi.”
- 23Niinee ní Yeesu kó buńalimbun ní u-boonooliibi mun nōó-u ki búntì.
- 24Kpalaayee kubuńkpańɲu kubō kíl ki bī jītí dimōol pu ní buńalimbuee bī gbéè nnyim, ama ní Yeesu nīn dō ki gèè.
- 25Ní u-boonooliibi sūtīn ki fīntì-u, ki bí-u yii: “Ti-Dindaan, fī-ti, ti kpî ní!”
- 26Ní Yeesu bí-bi yii: “Ba ɲá ní ni fāńkí mín, ni-fookiiu kaa náań.” U lī mín ki dōyee, ní ki yíkì ki yúl ki kpāti kubuńu nì nnyim pu, ní an ɲmíl fōńfōń díkídiki.
- 27Ní binibee bākatì sèeee, ní ki bíl lì yii: “Kin, u nín sá ɲma dee ní ki kpāań kubuńu nì dimōol tó-u nan dee?”
- 28Yeesu nín dūtì lapu buńgbandi Gadara yab tińkinee, ní binib bili bin pu arasiniibi ká bi wáatèe nyānní kuceeun ki tūńkiń-u. Biwaatiibee nīn cáá ntoom tikpil, an puee ubō kaa nīn mākantí kí dī niin.
- 29Ní bi nīn bíl kūuntí yii: “Unimbōti Jipōon, a nyàab-ti nì tilati poon ní? Ibōsoon yuntĩu kaa láá bāań ní a dōmiń doo kí sàań-taaa?”
- 30Difakitikpaandi diba nīn bí ɲkpaanceeti niin ki jīn.

³¹Ní arasiniibee gbāam-u yii: “A yaa làá jà-tee, á jà-ti kí kón difakitil nee ni”

³²Ní u bí yii: “Níñ cámaan!” Ní bi nyán biwaatiibin ki kó difakitilee ni, ní afabee sán ki wúntì nsitimin ki jéetì diməolin ki gbíntì nnyimin ki kpî.

³³Ní bifakpaaliibi sán ki cūti ki tükū kitiñin tin kəkə jítèe ki kpáan bin pu arasiniibi nìn kēe mun yati.

³⁴Ní kitiñin nib kəkə nyán ki nín túŋkiñ Yeesu. Bi nín ká-uee, ní bi gbāam-u yii ú yīki bi-tiŋki pu.

Maatiu 9

¹Niinee Yeesu kó buŋalimbu ki fātii dūti ki nín gítíñ u-tiŋkin.

²Ní binib biba túnní ufaliŋfaan ubə nlún pu ki cáan ki bíl-u. Yeesu nín ká binib gbanti fṣṣ ki kíí yii u ŋūn kí cáan ubunlee ní u bí ufaliŋfaanee yii: “M-biki, pṣon a-ba, m dū a-kpitii ki pú-si!”

³Niinee ní bimaradakaliibi biba bí dākafī bi-pəbiliñin yii: “Kijapaai nee ŋèen nì Unimbṓti ní.”

⁴Yeesu béè tin bi bí dākafēe, ní ki bālfī-bi yii: “Ba pu ní ni cáá ilandəkəkṓpiti mín?”

⁵Ba di kaa pṣṣ dilil ní: 'A ká a-kpitii pṓtam' di kaa pṣṣ dilil naaan, 'Yīki kí yūl kí nīn còom' di kaa pṣṣ ní?

⁶Ama ní béé yii, man Kinibiki cáá mpən kitiñ pu kí dū unil kpitii kí pṓ-u.” Niinee ní u bí ufaliŋfaanee yii: “Yīkiñ kí yòon a-lúŋŋu kí nīn kùn a-dumpu.”

⁷Ní kijapaayee nyī ki yīki ki nín kùn.

⁸Kunipaauuee nín ká mimmee, ní tifaandi kó-bi, ní bi bí pākà Unimbṓti u nín pú binib mpən ŋuŋyee pu.

⁹Yeesu nyán niin ki bí còomēe, ní ki ká uninja ubə bi yī-u Maatiu u kā fṓtiku diikun, di sá yii u nìn sá ufṓtil ní. Ní Yeesu bí-u yii: “Dāañ kí nīn nṓó-mi!” Niinee ní u yīki ki táá-u.

¹⁰Yeesu kó ki kāl Maatiu dumpu ki bí jīn tijinee ní bifṓtliibi tikpil nì binikpitib bin kə kínee dómín ki kútì u nì u-boonnooliibi pu ki mun bí jīn.

¹¹Fariisab ká mimmee, ní ki bí u-boonnooliibi yii: “Ba pu ní ni-kpiliu nì bifṓtliibi nì binikpitib bin kə kínee kpáfí ki kā ki jīn tijin mín?”

¹²Yeesu gbīl an bṓtee, ní ki bí-bi yii: “Bin pṣṣyee kaa nyàab unyṓdaan, bin būñee di nyàab unyṓdaan.

¹³Cùu bīfimaan Unimbṓti nyṓbundi nee taapu, yii: 'Maa là saraabi, m là ní nīn sūn tṓb saai ní.' Maa dómín kí yīñ deedeedambi, m dómín kí yīñ binikpitib ní.”

¹⁴Niinee ní Jaan boonnooliibi sūtíñ ki pīl Yeesu, ní ki bālfī-u yii: “Ba pu ní timbi nì Fariisab bṓb kinyəkə múmul, ní sii boonnooliibi kaa bṓb ní?”

15Ní Yeesu kíf-bi yii: “Unimpucaan cal bɔɔbi n̄h̄n kí n̄n bí kunimbaaun nyunti nun unimpucaan cal u-ba dáá béeee? Aayee, baa n̄h̄n! Ama nyunti n̄ubɔ bí ki dòón, bi dàá dàá yòon-u bi-kansikin, an yuntiŋu ní bi dāa b̄ɔb̄ kinyɔkɔ.

16“Baa gífí n̄yaaɔɔn kí dūú lib̄ dibɔkutikpikil. Bi yaa n̄á mimmee, n̄yaaɔɔn kpāantí dibɔkutikpikil ní kí cáti ní dibundee n̄ m̄t̄í wāān.

17Mín ní baa tí dù ndapɔm kí fūúñ tilɔkpikilin; bi yaa n̄á mimmee, tilɔti pòol̄ ní ndaam n̄ kpáatí fá ní tilɔti mun n̄ b̄il̄. Mín puee, bi dù ndapɔm ní kí s̄it̄i tilɔpɔn ni, ní an kɔkɔ n̄ n̄n bí.”

18Yeesu n̄n bí ki sòon n̄i bi an bɔtee, ní Juuda yab yidaan u-bɔ bāān ki gbāān u-nimiin, ní ki bí yii: “M-sapɔmbiki dáá péékúú dee, dāān kí dū a-n̄al kí páān ki-pu kí mèè, kí dàá fikití!”

19Ní Yeesu yíkì ní u-boonnooliibi n̄óó-u.

20Ní unimpu ubɔ n̄n bí ki fūul̄ n̄kpin baabadal, doooo abin saalaa n̄i ali an kaa gūñ. Yeesu còom̄ ki cée, ní u d̄in̄ Yeesu boon pú ki dómín ki gbēēu-bɔkutil kpaanceetiŋu.

21Kun puee u n̄n dākafi u-pɔbilin yii: “M yaa péē n̄jún ki gbēēu-bɔkutil kpaŋkpanee, m bāà pókí.”

22Yeesu fātì ki ká-u ní ki bí yii: “M-bisal, pɔɔn a-ba, a n̄n f̄ɔ̄ ki kífí puee f̄i-si.” Niin niin ní unimpuee pókí.

23Yeesu dūu bān uyidaanee dumpuee, u ká bin bún awul ki gā ikpiisilanee n̄i kunipaau kun b̄i gā dituweelee gbí niin k̄ilamm̄

24ní u bí-bi yii: “Nyāmaan doo! Kisapɔmbiki kaa kp̄i, kí gèèn ní.” Niinee ní bi b̄i b̄eēl̄-u.

25Bi nyánti binib kɔkɔ ki dóyee, ní Yeesu n̄n kòò kudii poon ní ki cúú kisapɔmbikee n̄al ní kí yíkì.

26Ní an bɔtee dūu gb̄it̄i kitiŋ gbanti jaŋŋi kɔkɔn.

27Yeesu nyán niin ki búntèe, ní bijɔfub bili páān u-boon ki tátí yii: “Dafiidi naantiu, s̄ɔ ti-saai!”

28Yeesu bān kudiinee, ní bijɔfubee s̄ut̄i ki p̄l̄-u, ní u bālf̄i-bi yii: “Ni f̄ɔ̄ ki kífí yii m lafun n̄h̄n kí cáān-naaan?” Ní bi kífí-u yii: “Iin, Ukpil, a n̄h̄n kí cáān-ti.”

29Ní Yeesu gbēēbi-nimiliŋ ki bí-bi yii: “Ni n̄n f̄ɔ̄ ki kífí yii m n̄h̄n kí cáān-nee, án n̄á mín kí t̄i-ni.”

30Niinee ní bi-nimiliŋ cúū n̄ubit̄i. Ní Yeesu kpáafi-bi yii: “Ní p̄l̄fi tiŋan, ní taa péē yánti ubɔ n̄ b̄éé tibɔti nee!”

31Ama bi tin l̄i yii bi nyēēyee, bi kífí ki b̄i t̄ukù, ní kitiŋ gbanti kɔkɔ nib gb̄il̄ Yeesu pu.

32Bi nyán niin ki cée ní bi cáān uninja ubɔ Yeesu cee, arasinii k̄a u-pu ní u s̄a umɔomiin.

³³Dyunti ñun Yeesu jìñ arasiniyee, ní umòomiinee kí kí bī sòòh, ní kunipaau kun nìn bí niinee bākati sèeee ní ki lī yii: “Doooo nee, taa láá pééká yèè Israyeel tiŋkin!”

³⁴Ama ní Fariisab, bíh bí yii: “An sá arasiniibi bōtiu di tī-u an-pōŋŋu ní u cáā jì arasiniibi.”

³⁵Yeesu nìn yìh ntiŋkpaammu nì ntiŋwaamu poon ki dākà binib akpafidiin ni, ki sòòh tibòmōntiil tin sá Unimbōti beel bōtee, ki cāantí iween kōkō nì bin kōkō wòbēe.

³⁶U nín nìn ká kunipaau gbantee ní an kó-u inimōon kun puee binibee nìn gī bi-wunti yōtì ali kii ipii in kaa cáā ukpaalee.

³⁷Niinee ní u bí u-boonnooliibi yii: “Kudiceeu wīkí tikpil, ama ní bicaliibi kaa náan.

³⁸An puee, ní mèèmaan kusaaudaan ú tōh bitōntōnliibi n dāá cā!”

Maatiu 10

¹Yeesu yìh u-boonnooliibi saalaa nì bilee, ní ki tī-bi mpōn bí jà arasiniibi kí cáan iween kōkō nì bin wòbēe kōkō.

²Yeesu kpambaliŋ saalaa nì alee yinŋi sèe: Mbaayee, Siimōn un bi gītī yì Piyeeree (an taapu sá yii: Ditaŋkpal), nì u-naal Andree, nì Seebeedee jipōmbi Jaaki nì u-naal Jaan,

³nì Fiiliipi nì Baateeleemii, nì Toomasi nì Maatiu un sá ufōtilee, nì Jaaki Alfee jipōon, nì Tadee,

⁴nì Siimōn un nìn là kí jàn Room yabee, nì Juudasi Iskaariyōti un dāa dū Yeesu ki nyáfìh u-nannanliibee.

⁵Yeesu nìn tú u-kpambaliŋ saalaa nì alee, ní ki kpáafi-bi yii: “Ní taa cù bin kaa sá Juuda yabee cee, kí taa kó Samarii yab timmun.

⁶Túlmaan Israyeel yab bin bí kii ipii in wāŋkèe cee.

⁷Cùú sòommaan Unimbōti bōti yii: 'Unimbōti beel sùti ki pilīn-ni.'

⁸Cáammaan bibunliibi kí fikitī bitaŋkpiibi kí ŋāŋkì binyanŋbantiibi wunti, kí jà arasiniibi. Kii ni nín fōō faalaa puee, nì mun tīmaan faalaa.

⁹Ní taa nyàab sindaariya nì animil nì tikúman nimiliŋ kí fúuñ ni-tōkōliŋin,

¹⁰kí taa nyàab tilōti ni-saŋkindi pu, nì abōkuti ali, nì anaataka nì ŋkpōndō kun puee bin kansikin ni bí ki tūh ditundee di máan kí kpèè-ni.

¹¹“Ni yaa bàñ ki kó kitiŋkpaanŋin àá kitiŋwaai poonee, nyàabmaan kí béé un kítì kí fōō-nee. Ni yaa kó udaan ceeyee, ní kālmaan niin kí tin sāa nyunti ñun ni làá dāá yīki kitiŋ gbantinee.

¹²Ni yaa kó kudicaŋuee nee, ní péé kí jāam-bi, yii: 'Unimbōti n tī-ni ŋgbansōŋfi!'

- 13**Bin bí kudicaŋu gbantinee yaa kítèe, ní ni nín jáam̀ ki tī-bi nsɔŋfi ɲuɲyee dàá nīn bí bi-pu. Ama bi yaa kaa kítì kí fṵṵ ɲgbansɔŋfi gbantee, ɲú fātī gítīn ni-cee.
- 14**Ni yaa kó dicindi diban, an yaa tí sá kitiŋ kiban ní bi yaa yī kaa fṵṵ-ni, kaa là kí pīlfīn-nee nyāmaan niin kí gbāfi ni-taŋi kpɔŋkpɔm án nīn dākà yīi ni kpáafi-bi bi-kpitii pu.
- 15**Ibaamɔn ní m̀ tükù-ni, ibɔsoon dalee, Unimbɔti nín nīn dáal Soodɔm nì Goomɔɔr timmu tafaliŋ ki yāntì ɲɲmi nyánní yilpu ki wūn-mu puee dāa só nì kitiŋ gbanti yab nín dàá ká ditafadaaldi diŋyee.”
- 16**Ní Yeesu bí-bi yīi: “Ní pīlfī. M̀ dū-ni ki tú kii ipiiyee isaakpan kansikin. An puee ní nīn nyīn ni-ba kii ikoobuee kí nīn bímaan soooo kii abeenanjilee.
- 17**Ama ní nīn nyīn ni-ba nì binib, kun puee bi dàá nīn cútī-ni ki càn ibɔsoon, kí nīn gbáà-ni anaalab bi-kpafidiŋɲin.
- 18**Bi dàá nīn càn-ni biyidambi nì bibɔtiibi cee man pu, an nín dàá ɲá pu ní sòòn tin ni nyí man puee Juuda yab nì bin kaa sá Juuda yabee nimiinee.
- 19**Bi yaa láā cáá-ni ki càn bibɔsoonliibi nimiinee, ní taa nīn yáliŋkí min ní ni dàá tin sòònee nì tin ni dàá lèe pu. ɲyunti gbantee ní Unimbɔti dàá tī-ni tibɔti tin sá ní lèe.
- 20**An kaa sá nimbi ni-ba di dàá sòòn, ni-Baa Unimbɔti Fām di dàá sòòn ni-ni.
- 21**Unil dāa cútī u-nabiki kí tī bí kpò, ní ubaati ń dāá cúú u-biki kí tī bí kpò, ní mbiyaamu mun dāa yíkí kí ján bibaatiibi nì binaatiibi kí yàntī bí kpò-bi.
- 22**Bàà ɲma dàá nīn ná-ni kun puee ni fṵṵ-mi ki kífí. Ama un yaa póòn ki tin kátì-kuee dāa kántí difiil.
- 23**Bi yaa láā bī páb-ni kitiŋ kibanee, ní sān kí póotímaan kiban. Ibaamɔn ní m̀ tükù-ni, naa làá yīn kí dós Israyeel timmu kɔkɔ ní man Kinibiki ń bàń.
- 24**Utumbifil ubɔ kaa bí ki jítiñ un dākà-uee, mín ní utɔntɔnli ubɔ mun kaa bí ki jítiñ u-kpiliu.
- 25**An ɲmāntì utumbifil ń nīn kíñ ki bí kii un dākà-uee, ní utɔntɔnli mun ń nīn kíñ ki bí kii u-kpiliuee. Bi yaa yīn kudiidaan yī Beelsebul, arasiniibi bɔtiuee, mana ní baa dāa ɲūn kí yīn u-dicaŋku yab bín mín?”
- 26**An puee, ní taa fāŋkimaan binib. Tin kɔkɔ bí dibalinee dàá dāá nyā mpaampiin pu ní tin pu baa nyée bi dàá dāá bée-tì.
- 27**Tin ní m̀ tükū-ni dibɔmbɔndinee, sòommaan-tì ɲwiñ pu, ní tin ní m̀ lókɔfi-ni dibalinee, dū-tì kí bāakimaan.
- 28**Taa fāŋkimaan bin ɲūn kí kpò-ni ama ní kaa ɲūn kí kpò ni-naŋkee. Ama fāŋkimaan Unimbɔti un ɲūn kí dū ni nì ni-naŋki kɔkɔ kí tō ɲɲmin kí nàañ-bee.
- 29**Baa nyáfi seerib bili gboooo? Nì mín kɔkɔee ni-Baa Unimbɔti yaa kaa pú nsan seer ubɔ kaa lítiñ kitiŋ.

- ³⁰Nimbee Unimbɔti kàaṅ ni-yikpiti kɔkɔ ní.
- ³¹An puee, ní taa fāŋkì: ni pɔɔ kudaau ki jítiṅ kuseerpaau.
- ³²Un kamaa yaa lī binib nimiin yii u sá man yɔuee, man mun dāa li m-Baa un bí yilpuee nimiin yii u sá m-yɔu ní.
- ³³Ama un di yaa nɛè binib nimiin yii waa nyí-mee, man mun dàá nɛé m-Baa un bí yilpuee nimiin yii maa nyí-u.
- ³⁴“Ní taa dākafi yii m cáaṅ ɲgbansɔŋfi kitiŋ pu, maa cáaṅ ɲgbansɔŋfi, kijiki ní m cáaṅ.
- ³⁵M dómiṅ kí yàkatī unil nì u-baa, usapɔɔn nì u-na, unimpu nì u-beel ní.
- ³⁶Unil nannanliibi di dāa sá u-dicaŋkun yab, kun puee u fɔɔ-mi ki kíí.
- ³⁷“Un nɛéṅ u-baa àá u-na ki jítiṅ mamee kaa kítì kí nīn sá man yɔu, ní un nɛéṅ u-jipɔɔn àá u-bisal ki jítiṅ mamee kaa kítì kí nīn sá man yɔu.
- ³⁸Un yaa kaa yɔɔn u-dɔpuntikaŋu ki túṅ kí nīn nɔ́-mee, kaa kítì kí nīn sá man boonooliu.
- ³⁹Un di nyàab kí fī u-manɲfalee dàá fá-di. Un di yaa dū u-manɲfal ki fá man puee di dāa kántí u-manɲfal.”
- ⁴⁰“Un yaa fɔɔ-nee, fɔɔ man dee, ní un yaa fɔɔ-mee fɔɔ un túnní-mee dee.
- ⁴¹Un yaa fɔɔ Unimbɔti bɔnaatiliu yii u nín sá Unimbɔti bɔnaatiliuee puee udaan dàá dāá fɔɔ ipaati in Unimbɔti bɔnaatiliuee dàá dāá fɔɔyee ní. Ní un yaa fɔɔ un yú deede Unimbɔti nimiinee, yii u nín yú deede Unimbɔti nimiinee puee, udaan dàá dāá fɔɔ ipaati in un yú deede Unimbɔti nimiinee dàá dāá fɔɔyee ní.
- ⁴²Un di yaa pú ɲwaamu nee kansikin kiba nnyinsɔm kraŋkpan kì nyùṅ yii kì nín sá man boonooliuee puee, ibaamɔn ní m tükù-ni, udaan dàá ká u-paatii.”

Maatiu 11

- ¹Yeesu nín dākā u-boonooliibi saalaa nì bilee mín ki dódoyee, ní u yíkì ki nín nìkì ntimu mun kíṅee ni ki sòṅ Unimbɔti bɔti ki dākà binib.
- ²Ní Jaan un fùul binib Unimbɔti nyimee kāl kusarkadiinee ki gbìl Kriisitoo tuuŋŋi ɲin u ɲáaṅee pu. Niinee ní u lēu-boonooliibi biba ki tú bí cùú bàlfi-u yii:
- ³“Sii di sá un ti nyí yii u dòoŋeeyaaa tí nīn ká ki cí ubɔ ní?”
- ⁴Ní Yeesu kíí-bi yii: “Nīn cámaan kí māafi Jaan tin ni kée nì tin ni gbìlee:
- ⁵Bijɔfub nimiliŋ ɲúbití, bideembi còom, binyanɲbantiibi wunti ɲáŋkí, bitafakpaafub kíṅ ki gbìl, bitaŋkpiibi fikiti, m sòṅ tibɔmɔntiil ki tì binandambi.
- ⁶Án nīn mōn un fɔɔ-mi ki kíí kaa gùgufēe.”

⁷Jaan boonnooliibi búntèe ní Yeesu bí sòòn Jaan pu samaayee cee, yii: “Ni nín cūti kupɔɔun ki kpēe Jaanyee, dinicil dilar ní u sá? U sá kii dikalingbaandi din kubuɔu fíntéee? Aayee.

⁸Kin, ba ní ni cūti ki kpēeni? Unil un pēe agaajabokuteee? Bin pēegaajabokutee bi kántí bín bibotiibi ciɔɔin ní!

⁹Kin, ba pu ní ni baasii cūti niin ki kpēeJaan ní? Ni cūti ki kpēe-u yii u nín sá Unimboti bɔnaatiliuee níiin? Iiin tiɔman, m tükù-ni yii, un ní ni ká niinee jítiñ Unimboti bɔnaatiliu gba.

¹⁰Kun puee Jaan sá un pu Unimboti takaldau poon sòon yii: Unimboti bí yii: 'M dàá tón m-tontonliu ú lintín a-nyokɔpu kí bóntí-si nsan.' Ní Yeesu gítí bí-bi yii:

¹¹Ibaamon ní m sòon, bin binib mǎlee kansikin ubɔ kaa bí ki jítiñ Jaan, ama un sá kiwaai Unimboti beelinee jítiñ Jaan.

¹²Kí yòon nyunti ɔun Jaan un fùul binib Unimboti nyimee nìn sòon Unimboti botee ki dāa sāa dínee, Unimboti beel dómiñ nì mɔon ní, bin nimiliɔ mán di-puee di kòd.

¹³Unimboti bɔnaatiliibi kòkò nì Mooisi marab sòon Unimboti beel pu bati ní ki dāa dūu sāa Jaan yuntiɔu.

¹⁴Ni yaa là kí gbilñ-mee, Jaan di sá Eelii un bi nìn sòon yii u dàá gítínee.

¹⁵Un yaa cáá ditafalee n gbil̃.”

¹⁶Ní Yeesu gítí bí yii: “Ba ní m dàá dū waanee nib kí ɔmántiñ dee? Bi náan nì mbiyaamu mun ká sampaan puee: mubɔ kūuntí ki lì mu-jutiibi yii:

¹⁷'Ti búñ-ni awul, naa ɔón, ki gāa-ni ikpiisilan, naa sún.'

¹⁸Di sá yii Jaan un fùul binib Unimboti nyimee dómiñ ní kaa là tijinaaan, kaa là ndaam, ní ni bí yii: 'Arasinií di bí u-pu.'

¹⁹Ní man Kinibiki dómiñ ki jñ̃ ki nyù, ní ni bí yii: 'Uninja nee sá upoofu, ki sá udanyɔl, ní ki bóotí bifotiliibi nì binikpitib bin kò kínee.' Ama bin fɔ̃ Unimboti ciini ki kíyee dàkà yii i sá deede.”

²⁰Niinee ní Yeesu bí wòon ntimu mun poon u nìn ɔá maamaacib tikpilee nib, kun puee baa kpánti bi-bimbim.

²¹U bí yii: “Mbusu dō ki cí nimbi Koorasin tiɔki nib, mbusu dō ki cí ni mun Beetsayida tiɔki nib. Kun puee, maamaacib bin m ɔá ni-cee nee di yaa bàà nìn ɔámaan Tiir nì Siidon timmun, niin yab bàà nìn kpántimaan bi-bimbim ki pēen kutukub ki dū ɔfantam ki pükū bi-ba kí dàkà yii bi bēe yii bi sá binikpitib.

²²An puee m tükù-ni yii, ibosoon dalee, nimbi tafadaaldi dāa jítiñ Tiir nì Siidon nib tafadaaldi.

²³Kin, nimbi Kapeenaayum tiɔki nib. Ni nyí yii ni dàá yíkì yilpu kí tin sāa kutagbɔɔu níiin? Ni dàá sintí kí bà taapu taɔkpiibi ní, kun puee maamaacib bin m ɔá ni-cee nee di

yaa bàà nìn ñámaan Soodom tiŋkinee, bín bàà nìn kpántìmaan bi-bimbim ki bàà dáá gbíntii bí dín.

²⁴An puee ní m tükù-ni yii, ibosoon dalee, Soodom tiŋki tafadaaldi dāa só nì nimbi tafadaaldi.”

²⁵Dyunti gbantee ní Yeesu bí yii: “Oooo, m-Baa, yilpu nì taapu Dindaan, m nyóŋkí-si a nín dū tiboti nee ki bál bin yŋ bi-ba biciŋfitiibi nì binyiliibi bí taa béé-tì, ki dū-tì ki dākā bin sá ñwaamuee.

²⁶M-Baa, tiŋman a ñá mín kun puee mín di ñāñ a-cee ní ki fáatì-si.

²⁷“M-Baa dū tikokò ki ñúbiñ-mi, ní báà ubò kaa nyí man u-Jipɔɔn asee m-Baa baba, mín ní ubò mun kaa tí nyí m-Baa asee man u-Jipɔɔn baba, nì bin man u-Jipɔɔnee yaa là kí dū-u kí dākèe.

²⁸“Nimbi bin tú awaŋgul ki gŋyee, dāammaan man-cee m túutí-ni ní ñùŋfi,

²⁹kí yòommaan man kpaambooku kí fɔɔmaan m-boti. Kun puee m-poon mō, ní m-boti kaa pōō, ni dàá ká diŋuŋfil.

³⁰Man kpaambooku pòfi ní m-waŋgul mun bí fúkufuku.”

Maatiu 12

¹Boonee ní Yeesu nì u-boonnooliibi bí jítí blee kpaanŋin ñwiŋuŋfikaa dal. Dkùm cúú u-boonnooliibee, ní bi bí gífi blee fini ki ñmèem abil ki ñmód.

²Fariisab nín ká mimmee, ní bi bí Yeesu yii: “Kpèè a-boonnooliibi bí ñáañ min ti-marau kòó ñwiŋuŋfikaa dalee.”

³Ní Yeesu kíí-bi yii: “Naa láá péekāñ dalba ñkùm nín nìn cúú Dafiidi nì u-naacimbi bi ñá pueeee?

⁴U nìn kó Kunimbótidiin ní usaraaŋakpil tī-u kpɔɔb bin bi nìn dūu ñá Unimboti saraayee u nì u-naacimbi ñmó, ama ti-marau poonee, an kaa nìn pú nsan yii u nì u-naacimbi ñ ñmó kpɔɔb gbanti.

⁵Àá, naa kāñ Mooisi marab takaldaun yii ñwiŋuŋfikaa dalee bisaraaŋaliibi yintī ñwiŋuŋfikaa marau Kunimbótidiin, an kaa sá-bi ikpiti?

⁶Ama dee, m tükù ki cántí-ni yii: Man un jítin Kunimbótidiyee bí doo.

⁷Ni yaa bàà nyímaan Unimboti nyɔɔbundi nee taapu yii: 'Maa là saraabi, m là ní nīn sūñ tɔb saai ní,' naa bàà kù ibaamɔndambi nee bōti fam.

⁸Kun puee man Kinibiki di sá ñwiŋuŋfikaadaan.”

⁹Ní Yeesu nyán niin ki búnti bi-kpafidiiku kubɔn.

¹⁰Ní uninja ubò nìn bí niin, u-ŋal fáká. Ní bi bālfī Yeesu yii: “Ti-marau pú nsan bí cáañ ubunli ñwiŋuŋfikaa dalaaa?” Kun pu ní bi nìn bālfī-u mimmee di sá bi nìn nyàab nnaakpal kí ñá-u tiboti.

- 11Ní Yeesu bālfī-bi yii: “Ni-kansikin ubo di yaa cáá dipibaabil ní dī yaa jéetì mboon ḡwiḡḡfikaa dalee, waa cá kí nyāntí-dàaa?”
- 12Kin, ḡma nín kalaasi unil un jítiḡ upii kpataaayee. Míḡ puee an pú nsan tí ḡá tiḡan kí tī unil ḡwiḡḡfikaa dal.”
- 13Ní u bí kijapaayee yii: “Tāntī a-ḡal!” Ní u tāntì-ḡu. Niinee ní u-ḡal póokì, ní ki ḡḡḡkì kii ḡun béeyee.
- 14Niinee, Fariisab búntì ki cūti ki kpáfī kí kpèè bi nín dàá ḡá pu kí kpò Yeesuee.
- 15Yeesu nín béè mimmee, ní u yíkì niin. Binib tikpil nóó-u ní u cāantí bibunliibi kòkò.
- 16Ama ní u nìn kpáfī-bi tiḡan bí taa tükù báà ubo un ní u sée.
- 17An ḡá míḡ kí dākà Unimbōti bōnaatiliu Eesayi nín nìn lī tibōti tiḡyee dee, yii:
- 18“Unimbōti bí yii: 'Kpèè m-tōntōnliu un m lēēyee sèé. Úḡ ní m nééḡ ní m-pōbil sòm u-pu. M dàá dū m-Fām kí ḡá u-pu. Úḡ di dàá dāá sòḡḡ deedeē bōti kí tükù atimbun kòkò.
- 19Waa làá nyàab báà ubo tibōti, kaa làá dāá nīn tátí, baa làá dāá gbīl u-nyòkò pu sampaambi pu.
- 20U dàá dāá tūtuḡ biwōfib, kaa làá dāá púntí mmóḡḡ ḡun ḡí ki gbàkēe, kaa làá dāá gbíntí fitila un fòol bílbilee. U dàá nīn ḡáaḡ míḡ ní ali ibaamōn ḡ dāá jī mpaan.
- 21Ní atimbun kòkò ḡ dāá nīn kíḡ ki māká u-pu.' “
- 22Niinee ní bi cáaḡ uninja ubo Yeesu cee, arasiniī kā u-pu, u sá umōmiin ki sá ujōfu mun. Ní Yeesu cáaḡ-u, ní u kíḡ ki ḡūḡ ki sòḡḡ ní ki wāl mun.
- 23Ní kunipaau kun yú niinee bākati seeee ní ki lì yii: “Dafiidi naantiuee kaa kalin sòḡḡ?”
- 24Ama Fariisab nín gbīl bi lī mimmee, ní bīn bí yii: “An sá arasiniibi bōtiu Beelsebul di tī uninja nee mḡḡn ní u cáā jì arasiniibi.”
- 25Ama Yeesu nyí bi-landòkò, ní ki bí-bi yii: “Dibeel din nib di yaa cúū yākatì ki jáà nì tōbee, see dí kúntí, dàa ḡūḡ kí nīn bí ki cá. Kitiḡ kin kamaa di yaa fātì ki bī jáaḡ ki-bee, kaa ḡūḡ kí nīn bí ki cá. Míḡ ní kudicaḡu kun kamaa di yaa jáaḡ ku-bee, kaa ḡūḡ kí nīn bí ki cá.
- 26Míḡ mbaantiim, Sitaan yaa fātii bī jì Sitaanee, mimmee u yākatì ki jáaḡ u-ba dee, mana ní u-beel ḡūḡ kí nīn bí ki cá?
- 27Ni dākafī yii arasiniibi bōtiu Beelsebul di tī-mi mḡḡn ní m jì arasiniibaaa? Mimmee ni dàá lì yii arasiniibi bōtiu Beelsebul ubaanti di tī ni-jipōmbi mun mḡḡn ní bi jì arasiniibi deeyaa? Ni-jipōmbi bi-ba dākà yii ni bí diyìntil poon.
- 28Ama an yaa sá nì Unimbōti Fām pōḡḡu ní m jì arasiniibee, mimmee Unimbōti beel pōḡḡu bāaḡ-ni dee.

29“**A** yaa kaa bóob Sitaan upondaan, aa ḡūn kí kó u-dumpu kí kóon u-wanti, see a yaa bóob-u ki dóoyee, ní á nín kó kí kóon u-wanti.

30“**Un** yaa kaa bí man jandi puee jáan man dee, ní un kaa bí tátuñ-mi m kōontí ki kpráfée, udaan bí kafi ki yàantí dee.

31**An** pu ní m tükù-ni yii ikpiti kamaa nì tibofan tin unil péēḡūn kí sòonee Unimboti ḡūn kí dū ikpiti gbanti kí pō udaan. Ama un di yaa sòon ki yīntiñ Unimboti Fāmee kpá kí ká u-kpitii pōtam.

32**Un** di yaa sòon ki yīntiñ man Kinibikee ḡūn kí ká u-kpitii pōtam. Ama, un di yaa sòon ki yīntiñ Unimboti Fāmee, u kpá kí ká u-kpitii pōtam ḡyunti nee poonaaan ki kpraan ḡyunti ḡun dāa bí ki dòonee ni.”

33“**Kí** wātī á ká disubimontiilee, see á nīn cáa busumontiibu, a yaa cáa busukpitibuee, see á ká asubikpiti mun. Busubu biliḡ pu ní bi béetí-bu.

34**Nimbi** bin tū kii ikoowaatee! Mana ní ni ḡūn kí sòon tibomontiil nimbi bin sá bikpitibee? Tin gbí dipobilinee, tīn ní kinyokó sòon. Unimonti lèekī tin ḡānee u-bonyaanti tin sá u-gaajatee poon ní,

35**ní** unikpiti pōbikpiti mun sá-u tigaajati ní u lèekī tikpiti di-poon.

36**M** tükù ki cántí-ni yii, ibosoon dalee Unimboti dàa dāa balfi tibofan tin bi sòonee kōkō pu.

37**Kun** puee a-nyoobuḡḡi pu ní Unimboti dāa di kí pò a-boti, a-nyoobuḡḡi pu ní u dāa tí di kí kpò a-boti.”

38**Niinee** ní bimaradakaliibi nì Fariisab biba bí Yeesu yii: “Ukpil, ti bàà là á ḡá maamaaci ubo kí dākà-taa.”

39**Ní** u kíi-bi yii: “Nimbi waanee nib sá binikpitib, ni nyēēUnimboti boon, ní ki balfi yii m ḡá maamaaci ubo kí dākà-ni.” Naa làá ká maamaaci ubo asee un náan nì Unimboti bōnaatiliu Joonasi yōuee.

40**Kii** Joonasi nín nìn ḡá uḡḡkpaan poon iwiin ita tinyati mun tita ki dāa nyánnée, mīn ní man Kinibiki dàa dāa ḡá iwiin ita tinyati tita dikaakulin ní kí dāá fikiti.

41**Ibosoon** dalee, kitiḡ kin bi yī Niniifée yab nín nìn ḡá puee dàa dāa kpò nimbi waanee nib boti, kun puee, Joonasi nín nìn cūti ki sòon nì bi Unimboti bōtee, bi nìn kpranti bi-bimbim ní; ama, ubo bí doo ki jitiñ Joonasi ní ki sòon nimbi kaa kpranti ni-bimbim.

42**Ibosoon** dalee, Seeba tiḡki nimpubotiu dàa dāá yīkì kí kpò waanee nib boti, kun puee ùn nìn nyánní doooo kitiḡbeennyokó ní ki dómiñ ki pílfí Saloomon nín sòon nì iciin puee, ama ubo bí doo ki jitiñ Saloomon.

43“**Arasinii** yaa nyán unil nee, u búntí ki yīiñ kitimpiliḡḡi pu ní kí nyàab ḡkōḡkoon. U yaa nyàab ki ḡī, kaa kée,

⁴⁴ní ú bí yii: 'M dàá fātí gítí laakin m nìn nyánnée.' U yaa fātì niin ki ká ñkɔŋkoonee dō fam ki ñātì dándánee,

⁴⁵ní ú cùú cááñ arasiniibi biluli bin gítí sá bikpitib ki jítìh ùh-uee, ní bi-kɔkɔ ñ dāāñ kí kpāfi kí kāl udaan pu, ní ú mòtí bīl. Mìn mbaantiim ní an dāa sá ki tī waanee nib binikpitib.”

⁴⁶Dyunti ñun Yeesu dáá bī sòh nì kunipaauee, ní u-na nì u-naalib bāāñ ki yú mmɔŋki ki bàà nyàab kí sòh nì u.

⁴⁷Ní ubɔ bí-u yii: “Kpèè, a-na nì a-naalib yú mmɔŋki ki nyàab kí sòh nì si.”

⁴⁸Ní Yeesu fātì kíf kijapaayee, yii: “Dma di sá m-na ní bilab di sá m-naalib, kpèè bin sá m-na nì m-naalibee sèé.”

⁴⁹Ní u dū u-ñal ki dākā u-boonnooliibi ní ki bí yii: “Kpèè, m-na nì m-naalib sèé!

⁵⁰Un kamaa di yaa ñāāñ m-Baa un bí yilpuee nín là puee udaan di sá m-naalaaa, m-niisalaaa, m-na.”

Maatiu 13

¹Dwiin gbantee, Yeesu nyán kudiin ní ki cūti kāl dimɔɔgbandi,

²ní kunipaau kóhñí ki kpáfi u-cee, ní u jóm ki kāl buŋalimbun nnyim pu, ní kunipaauee yú dibuŋbandi.

³Ní u cáá alaŋkpan ki sòh nì bi tibɔti tikpil, ní ki bí yii: “Uninja ubɔ di nyán kí yāh iwambool.

⁴U bī yāantée ní abil aba lítì nsan pu, ní nnɔmbiyaamu dómín ki tōó ki jín.

⁵Ní aba mun lítì kuteeun laakin kitiŋ kaa nyóoyee, ní ki pūti kpáāā nyán kun puee kitiŋ kaa nyò.

⁶Dwiín dāa pílee, ní an kpíi kun puee inyaan kaa kó kitiŋ.

⁷Ní aba mun lítì ikuŋkumin, ní ikuŋkumee wíh ki múkuh i-pu.

⁸Ama ní abil aba lítì laakin kitiŋ ñāñee ní ki lòhñ abil. Dwambool ñubɔ lòhñ dilaataal, ñubɔ imuŋku ita, ñubɔ mun mmuŋku nì saalaa.”

⁹Ní Yeesu bí yii: “Sii un yaa cáá ditafalee ñ gbīl.”

¹⁰Ní Yeesu boonnooliibi sūtín ki pīl-u ní ki bālfī-u yii: “Ba pu ní a cáá alaŋkpan ki sòh nì bi ní?”

¹¹Ní u kíf-bi yii: “Unimbɔti yāntì nimbi bée u-beel bɔti tin bí dibalinee taapu. Ama an kaa yāntì bín ñ bée.

¹²Un yaa cááyee, bi dàá gítí kūtì-u u-cee ñ wíh. Ama un kaa cááyee, bi dāa fòol fiih un u cááyee ní ú gbíntí pílpil.

- 13**Kun pu ní m cáá alaŋkpan ki sòòn nì bee dee: di sá bi kpèè ní kaa wāl, ki pílfi ní kaa gbìl.
- 14**Bín puee an ɣá kii Unimbòti bɔnaatiliu Eesayi nín nìn lī puee dee, yii Unimbòti bí yii: 'Ni dàá dāá nīn pílfi, ama ní kaa làá gbìl. Ni dàá dāá kpèè ama ní kaa làá wāl.
- 15**Kun puee binib nee pɔbiling tīlfi, ní bi kpáá bi-tafaling ní ki ɣúb bi-nimiling, kí taa wālaaa, kí taa gbìlaaa, kí taa béé taapu, kí taa kpántí bi-bimbim, m̀ bàà cáàn-bi.'
- 16**Ama nimbee, ni bí mmɔn ni kun puee ni-nimiling wāl man nì m-tuunɣi, ni-tafaling mun gbìl m-bòti.
- 17**Ibaamɔn ní m tükù-ni, Unimbòti bɔnaatiliibi nì deede nib tikpil bàà nìn nyàab kí ká kun ni ká nee, kaa ɣún ki ká, bi bàà nìn nyàab kí gbìl tin ni gbìl nee, kaa ɣún ki gbìl-tì.”
- 18**“Mimnee, pīlfimaan uwambooyaanli laŋkpandi din m lēe taapu.
- 19**Un pílfi bi nín sòon Unimbòti beel bɔti ní kaa gbìlee, náan nì ɣwambool ɣun líti nsaan puee ní. Sitaan ukpiti di dòn ki cútí tin bi búl u-pɔbilinee ki lèekī.
- 20**Ní un náan nì abil ɣin líti kuteeunee, ún pílfi tibɔtee ní ki fòol-ti malaa nì dipɔɔpindi,
- 21**ama waa yánti tibɔtee n kál u-ni kí yúntí kí báan inyaan, Unimbòti bɔti puee digiñdi kii disaandi diba yaa bāan-uee, ní ú dū nnimbòtisan kí fá.
- 22**Un mun náan nì abil ɣin líti ikuŋkuminee gbìl Unimbòti bɔti, ní duulnya poon landokoi nì tiguaajati tin ɣmàtín binibee neendi n dāá dūú múkuñ an bɔti pu, ní an kaa ɣūn kí lòon.
- 23**Un pílfi Unimbòti bɔti ki gbìl taapuee dàá ɣá atummɔnti ɣin tìl Unimbòti yindi tinyoolee kii iwambool in líti kitimmɔntiii pu ɣubò lòon abil dilaataal, ɣubò mun imuŋku ita, ɣubò mun mmuŋku nì saalaayee ní.”
- 24**Ní Yeesu gítí dū tibɔɣmantikaal nee ki sòon nì bi yii: “Unimbòti beel náan nì uninja ubo un búl iwamboomɔnti u-saakunee ní.
- 25**Kunyeuu, báà ɣma kó ki dɔonèe, ní u-nannanliu dómín ki dū ukeenja ki búl idin, ní ki búnti.
- 26**Dyunti ɣun idi nyán ki lòonèe, ní ukeenja mun nyán,
- 27**Ní bitɔntɔnliibi dómín ki bí bi-kpiliu yii: 'Ukpil, an kaa sá idi ní a búl bukpaanaaan? Kin ukeenja mun nyán la?’
- 28**Ní ukpilee kíi-bi yii: 'An sá unannanli ubo di ɣá mín.' Ní bitɔntɔnliibi bālfí-u yii: 'Mimnee, tí cù kí fùkù ukeenja gbanti kí fáaa?’
- 29**Ní u kíi-bi yii: 'Aayee, taa fùkùmaan-u, kun puee ni yaa làá fùkùee, see án kpáan idi kí fùkù.

³⁰Mín puee, yàntīmaan an kòkò ñ nīn yú ki cí kudiceeu; nyunti ñun bidicaliibi yaa làá dāá cēe, ní m̄ tükù-bi bí fükù ukeenjee kí bíl̄ afeencun afeencun kí tūū ññmi, ama ní kí cáá m-dii kí ñá m-cakalaaun.' “

³¹Ní Yeesu gítī tí dū tiboti tiba ki ñmāntiñ-bi yii: “Unimboti beel náán nì kisubilii kin uninja ubo cáá búl̄ u-saakunee.

³²Kí mun di sá kisubifiifiitii asubil kòkò kansikin, ama kì yaa nyán ki wíiñ ki dódoyee, an wīkíñ tikunfaal tin kòkò kíñee, ní kí kpántí busubu, ali nnombiyaamu dòon ki pāantí mu-diiñji bu-pañji pu.”

³³Ní Yeesu gítī tí dū tibonmantikaal tiba mun ki tí ñmāntiñ-bi yii: “Unimboti beel náán nì nnyoko ñun bi ñáán kpono saabun án jōmee ní. Unimpu dù fiii ní kí ñmālim̄ ñkponoyim boto dijandi poon kí búuñ ní bukponosaa kòkò ñ jōm̄.”

³⁴Yeesu n̄n dù tibonmantikaal ní ki sòon̄ nì samaa. Waa n̄n sòon̄ nì bi fam see ú dūū ñmāntiñ tiba.

³⁵Mimnee, an ñá kii Unimboti bōnaatiliu nín n̄n sòon̄ ki síiñ puee dee, yii: “Nì tibonmantikaal ní m̄ dàá dāá dūū sòon̄ nì bi, m̄ dàá dāá tükù-bi doooo m̄ nín náán duulnyee tin bí dibalinee.”

³⁶Niinee, Yeesu yānti kunipaauee ní ki nín kùn, ní u-boonnooliibi sūt̄i ki pīl̄-u ki bí-u yii: “Tükù-ti ukeenja un bi cáá búl̄ kusaaunee taapu.”

³⁷Ní Yeesu bí-bi yii: “Un būul̄ idee di sá man Kinibiki.

³⁸Kusaauee di sá duulnya, ní idi sá Unimboti beelin biyaamu, ní ukeenjee di sá Sitaan biyaamu.

³⁹Unannanli un dóm̄iñ ki búl̄ ukeenjee di sá Sitaan. Kudiceeu di sá duulnya kúntitam, ní bidicaliibi sá Unimboti tūuni.

⁴⁰Kii bi nín béel̄ kumokpitiu pu kí bíl̄ afeencun kí tūū puee, mín ní an dāa sá duulnya kúntitam.

⁴¹Man Kinibiki dàá dāá tōñ m-tūuni ní í dāá lēem-beelin bin kòkò sá nsugimu bi-jutiibi gbéetí ki lítée nì bin ñáán ikpatee,

⁴²ní kí dū-bi kí tō kipaai ñmiñun, ñun ni bi dàá n̄n k̄a ki sūñ, bi-nyiiñji ḡa t̄ob k̄akakee.

⁴³Ama ní deedeedambi dāa j̄il̄ kii ñwiínee ní p̄alpal bi-Baa beelin. Un yaa cáá ditafalee ñ gbīl̄.”

⁴⁴Ní Yeesu ḡāa dilan̄kpandi nee yii: “Unimboti beel náán nì kii t̄igaajati tin bál̄ kusaaunee, ní ubo cūti ki p̄íi ní ki ḡiñ ki bál̄. An nín m̄ókiñ-u puee, ní u cūti ki nyāfi u-wanti tin kòkò u cááyee p̄ilpil, ní ki cáá dá kusaau gbanti.

⁴⁵Unimboti beel tí náán nì kii unyampu nín nyāab̄ abeedimbim̄nti puee ní,

⁴⁶u yaa ká ñin ñāñ ki lákatèe ní ú cūu nyāfi tin kòkò u cááyee p̄ilpil ní kí cáán kí dā.”

47“Unimbōti beel náán nì kii bi nín dù kulaaṅṅu kí tō dimoolin án cúú kujombuluu kamaa puee ní,

48bi nín dū kulaaṅṅu ki tó an cúú ijōmee, ní bí dáal kí nyāntiñ dimoogbandi, ní kí kàl kí lútí imōnti kí ṅá tikabitin, ní kí dū in kaa ṅānee kí tō kí fá.

49Mín ní duulnya kúntitam an dàá ṅá. Unimbōti tūuni dāa dōon ní kí gantī binikpitib nì bimōntiibi,

50ní kí dū bikpitibee kí tō kipaai ṅminun, niin ní bi dàá nīn sūn bi-nyinṅi gā tōb kākaka.”

51Ní Yeesu bālfí u-boonnooliibi yii: “Ní gbīl tibōti tin kōkō m sōon-ni nee taapuōō?” Ní bi kíí yii: “Iiin ti gbīl”.

52Ní u bí-bi yii: “Mín ní umaradakal kamaa un di yaa fōō Unimbōti beel bōtee náán nì kudiidaan un cáá tigaajati ki lèekī ti-poon tikpikil nì tipōn ki cáá tūtun binibee ní.”

53Yeesu nín dū tibōṅmantikaal ki sōon nì bi ki dōyee, ní u yíkì niin,

54ní ki nín gítí u-dumpu. U bànee, ní ki kó niin kpafidiikun ki bīl dākà u-dumpu yab Unimbōti bōti, ní bin kōkō bí niinee bākatì seeee, ní bi bīl lì yii: “U nín ká la iciin gbanti dee? An dī mana ní u ṅūn ki ṅáán maamaacib nee dee?”

55Ti nyí-uaa! An sá kapinta jipōnaa! U-na di sá Maariiyaa! U-naalib mun di sá Jaaki nì Jooseefi nì Siimōn nì Juudaa!

56U-niisalib kōkō mun di kōdō ti-kansikineeyaa! Kin, an ṅá mana ní u cáá mpōn nee?”

57An di nīn yāntì ní baa fōō-u ki kíí. Ní Yeesu bí-bi yii: “Baa kpèé Unimbōti bōnaatiliu fam laaaba an yaa kaa sá u-tiṅkin nì u-cindin ní bi kpèé-u fam.”

58Bi nín kaa fōō-u ki kííyee pu ní waa nīn ṅá maamaacib tikpil niin.

Maatiu 14

1Dyunti gbantee, Eeroodi un nīn sá ubōti Gaaliileeyee gbīl bi nín sōon Yeesu pu miṅyee

2ní ki bí u-tōntōnliibi yii: “Unee di sá Jaan un fūul binib Unimbōti nyimee, u fātii fikiti ní, an pu ní u cáá mpōn ki ṅáán maamaacib mín.”

3-4Kun pu ní Eeroodi nīn lī mimmee di sá u nīn cáá u-maan Fiiliipi nimpuu, un bi yīl Eeroodiyee. Ní Jaan nīn tūkū Eeroodi yii: “An kaa máan á cáá unimpu gbanti.” An puee Eeroodi yāntì bi cúú Jaan ki bóob ki cáá tó sarkan kun puee an kaa nīn móokin Eeroodiya.

5Niinee ní u kíñ ki nyàab kí kpò Jaan, ama ní ki fāṅkí Juuda yab, kun puee báà ṅma nyí Jaan pu yii u sá Unimbōti bōnaatiliu.

6Ní dalin kin bi bīl jīn Eeroodi maalwiinṅu jīṅaaliuee, Eeroodiya bisal ṅón bin bi yīin jīṅaalee nimiin, ní an móokin Eeroodi,

- ⁷ní u pū̀tì ki bí yii: “Kun kamaa ní a yaa lèe, á bàlfi-mi, m dàá tī-si kudɔŋu.”
- ⁸Ní usapɔɔnee na yāntì u lī yii: “Á tū̀kutī Jaan un fū̀ul binib Unimbɔti nyimee yil kí tàkañ-mi kpaatan kɔŋkɔnee.”
- ⁹Niinee, an kó ubɔti kunimbaau, u nín gítī dáá pū̀tì kunipaau nimiinee puee ní u kíí yii u dàá tī-u,
- ¹⁰ní ki tú ubɔ ñ cù kusarkadiin kí tīlīn Jaan un fū̀ul binib Unimbɔti nyimee yil kí cááñ.
- ¹¹Ní bi tīl Jaan yil ki ñá kpaatan, ki cááñ ki tīl usapɔɔnee, ní ú mun cáá tī u-na.
- ¹²Ní Jaan boonnooliibi dómiín ki yɔ̀on-u ki cáá síb, ní ki cū̀tì ki tū̀kū Yeesu tin jítèe.
- ¹³Yeesu nín gbīl mimmee, ní u yíkì niin u nì u-boonnooliibi kó buŋalimbu ki búnti laakin binib kpée, ama ní kunipaau nyánní ntimun ki còom ataa ki nín jì u-boon.
- ¹⁴Yeesu nì u-boonnooliibi nyáñ buŋalimbunee, ní ki ká kunipaau nín tíibiínee, binibee nìn cúú-u falaa ní u kíí ki bíí cáantí bibunliibi.
- ¹⁵Kujoou bíí jótée, ní u-boonnooliibi sūtín ki pīl-u, ní ki bí-u yii: “Binib kaa kóò laakin ti bí nee, kunyeeu mun bíí móotí. Mìn puee, yántì binib ñ nīn cá ntimbilimun kí dā tijin kí jī.”
- ¹⁶Ní Yeesu kíí-bi yii: “An kaa bàlfi bí cù, nimbi ni-ba tīmaan-bi tijin bí jī.”
- ¹⁷Ní bi bí-u yii: “Kpɔnɔb biŋmoo nì ijɔm ili ja di bí.”
- ¹⁸Ní u bí yii: “Yòon kí cáammaan-mi!”
- ¹⁹Niinee, ní u bí yii samaa kɔkɔ ñ kál kumɔsɔŋu pu, ní u fɔɔ kpɔnɔb biŋmoo nì ijɔm ilee ní ki wáañ kutaa, ki jáam Unimbɔti, ní ki gífi gífi kpɔnɔbee ki dūu tī u-boonnooliibi, ní bīn dūu yākatì binib kɔkɔ.
- ²⁰Ní bi-kɔkɔ jín ki díkí, an kīn, ní bi kóon akpɔnɔkati nì ajɔŋgin ñin kínee ki gbéèñ tikabiti saalaa nì tili.
- ²¹Bininjab bin nìn jín tijin gbantee nìn bàñ kii binib kutukub biŋmoo, baa kàañ binimpoobi nì mbiyaamu.
- ²²Niinee Yeesu yāntì u-boonnooliibi kó buŋalimbu malaa ki līntì ki dū̀tì lapu buŋbandi, ní Yeesu ùn dáá bí niin ki tū̀kū binib yii bí nīn kùñ.
- ²³U yāntì bi nín kùnee, ní u búnti ñkpaanceeti dijool pu kí mèè. Kunyeeu móee u dáá gbíntì bí niin u-baba.
- ²⁴Buŋalimbuee mun nìn bàñ dimɔol kansikin kaa ti cá, kun puee kubuŋu nìn tū̀ŋkín-bu ní tinyiŋgbàn nìn yāŋkí-bu.
- ²⁵Ki cá kutaawuntuŋuee, ní Yeesu tókɔn nnyim pu ki còom ki cá u-boonnooliibi cee.
- ²⁶Bi nín ká u páaání ki còomín nnyim puee, ní bi-pɔbiliŋ mál, ní bi bí yii: “Ufanfanti dee!” ní ki bíí gbàà ibiil nì tifaandi.

- ²⁷Kpalaayee ní Yeesu bí-bi yii: “Cúúmaan ni-pòbìliṅ, an sá man! Taa fàṅkìmaan!”
- ²⁸Niinee ní Piyeer bí-u yii: “M-Dindaan, an yaa lafun sá sii, á yàntī m tókòh nnyim pu kí còom kí dāān a-cee.”
- ²⁹Ní Yeesu bí-u yii: “Nín dòoh!” Ní Piyeer nyán buṅalimbun ki tókòh nnyim pu ki còom ki nín cá Yeesu cee.
- ³⁰U nín bí còom ki cá ki ká kubuṅu nín jítí pu mponee, ní u fàṅkì, ki kíí ki bí múl nnyimin, ní u fáá mbiil yii: “M-Dindaan, fī-mi.”
- ³¹Kpalaayee ní Yeesu tāntì u-ṅal ki cúú-u ní ki bí-u yii: “A-fookiiu pátì, ba pu ní a fàṅkì?”
- ³²Ní bi-liitil kó buṅalimbun, ní kubuṅu ṅmíl.
- ³³Ní bin nìn kā buṅalimbunee gbāān Yeesu nimiin ki bí-u yii: “Ibaamøn, a lafun sá Unimbòti Jipōon.”
- ³⁴Bi dūtì dimool ki bàñ Geeneesareeti tiṅki jandi dibee ní ki kpákati.
- ³⁵Niin yab kpáāā bée Yeesu, ní ki nākañ bi tükū ajan kòkò nib, ní bi yḍòhni bibunliibi kòkò ki cáān u-cee
- ³⁶ki mèé-u yii ú yàntī bí gbēēu-bòkutil kpaanceetiṅu kpaṅkpan, ní bin kòkò lafun gbēēyee pòkì.

Maatiu 15

- ¹Fariisab nì bimaradakaliibi biba nyánní Jeerusaleem ki dómín Yeesu cee ní ki bālfì-u yii:
- ²“Ba pu ní a-boonnooliibi kaa nòó ti-yaajab koobiliṅ ní? Kun puee baa fíntí bi-ṅalii kí wàatí ní kí nín jī tijin, kii ti-koobiliṅ nín sá puee.”
- ³Ní Yeesu kíí-bi yii: “Kin nimbi faa, ni nín nòó ni-yaajab koobiliṅ ki yìntī Unimbòti marabee!
- ⁴Unimbòti bí yii: ‘Á nān tó a-baa nì a-na,’ ní ki gítì bí yii: ‘Un di yaa sòon ki bííl u-baa kii u-nee máān bí kpò-u.’
- ⁵Ama ní nimbi dākà binib yii a ṅūh kí tükù a-baa kii a-na yii ‘M nín bàā làā tī-si tiṅyee m dūu ṅá Unimbòti saraa.’
- ⁶A yaa gítì dáá lī mimmee, an kaa ti sá á tūtuñ a-baa; ni nín ṅáān pu ki kpìtī Unimbòti bòti ki ṅáān min ni-naanjab dākèe dee.
- ⁷Mpoonnyoondambi! Unimbòti bōnaatiliu Eesayi nín ṅmāñ u-takaldau ki sòon ni-pu miṅyee sá ibaamøn, yii:
- ⁸Unimbòti bí yii: ‘Binib nee nyòṅkí-mi nì bi-nyòmму fam ní, bi-pòbìliṅ dátìh-mi.
- ⁹Bi jáām-mi fam ní, kun puee tin binib náānee ní bi dākà, ní ki cáā yīi man marab.’ “

- 10Mín boonee ní Yeesu yíín kunipaauee u-cee ní ki bí-bi yii: “Ní pīlfi kí gbīl̄ tiboti nee taapu tiŋan.
- 11An kaa sá tin ò kinyòkòn ki kòò mpoonee di kòntí unil tijòkòndi Unimbòti nimiin, an sá tin nyēē unil nyòkònee di kòntí-u tijòkòndi.”
- 12Niinee, u-boonnooliibi sùtìn ki bí-u yii: “Aa nyí yii tiboti tin a bàà sòòñee wùñ Fariisabaaa?”
- 13Ní Yeesu bí yii: “Busubu bun kamaa ní m-Baa un bí yilpuee kaa cóòñee, bi dàá dāá fùkù-bu kí fá ní.
- 14Yàntīmaan-bi. Bi sá bijòfub ní ki dàtī bijòfub: ujòfu yaa dàtī ujòfuee, see bi-liitil ñ lítí mboon.”
- 15Ní Piyeer bí-u yii: “Tùkù-ti dilan̄kpandi din a bàà gāāyee taapu.”
- 16Ní Yeesu bí-u yii: “Ni mun kaa láá cáá iciin níiin?”
- 17Naa nyí yii tin kòkò ò unil nyòkònee cá u-poon, ní boonee ú cùú sòntáaa?
- 18Ama tin nyēēkinyòkònee nyēēunil pòbilin ní, an di kòntí unil tijòkòndi Unimbòti nimiin,
- 19kun puee unil pòbilin ní ilandòkòkpiti kòkò nyēēh: nnikpaakoon, bininjab nì binimpoobi laakpaati, binaacimpòmbi nì bisapòmbi jòkònti, bunaayubu, abògaan, asiibil.
- 20Tin kòntí unil tijòkòndi Unimbòti nimiinee dee. An yaa sá á jī tijin kaa fìntì a-ŋalii kii akoobil nín sá puee an kaa kòntí-si tijòkòndi Unimbòti nimiin.”
- 21Boonee, Yeesu yíkì niin ki nín cá Tiir nì Siidòn watil pú.
- 22Ukananimpu ubò nìn nyánní niin pú ki dómín ní ki fáá mbiil yii: “Ukpil, Dafiidi naantii, sò m-saai! Di sá arasinii ubò ká m-bisal pu ki páb-u ŋkpitim pu.”
- 23Ama ní Yeesu kaa péégàtì-u tiba, ní u-boonnooliibi dómín ní ki gbāam-u yii: “Jà unimpu un pá ti-boon ki tátí nee.”
- 24Ní Yeesu kíí-bi yii: “Bi túnní-mi Israyeel yab bin wán̄kì kii ipiiyee ŋmanin̄ma cee ní.”
- 25Ama ní unimpuee dómín ki gbāan u-nimiin ní ki bí yii: “Ukpil, jòòh-mi!”
- 26Ní Yeesu lí yii: “An kaa máan bí dū mbiyaamu jinti kí tī m̀bòbiyaamu.”
- 27Ní unimpuee bí yii: “Tiŋman Ukpil, ama nì mín kòkòee, m̀bòbiyaamu dindambi yaa bí jīñee, m̀bòbiyaamu mun tòó igbasigbasi in lítée ní ki jīh̄.”
- 28Niinee ní Yeesu bí yii: “Unimpu nee a-fookiiu wīkíeeee! A nín là puee, án ñá mín kí tī-si.” Niin niin ní u-bisalee pòkì.
- 29Yeesu yíkì niinee ní ki búntì Gaaliilee m̀òogbandi, ní ki cùtì jóm̄ dijool diba pu ki kál.

³⁰Ní kunipaa u-dómiń u-cee ki yǎonńi bin tà bi-taaji puee nì bin wòbee, nì bijofub, nì bimɔmiimbi, nì bibunliibi biba mun tikpil, ní bi cáan-bi ki bíl u-nimiin, ní u cáan bi-koko.

³¹Ní an nìn ńá kunipaauee maamaaci bi nín ká bimɔmiimbi sòon, bin wòbee pókì, bitaakpalfub kíń ki còom tijan, ní bijofub mun wálee puee, ní bi bíl pàkà Israyeel Nimbɔtiu.

³²Ní Yeesu yíń u-boonnooliibi, ki bí-bi yii: “Nnibiim nee gbí-mi falaa: di sá iwiin ita sée ní bi bí m-cee, kaa cáá tiba kí jī. Maa là kí ja-bi bí nīn kùn nì ńkum, bi-wunti ń tin yòtī nsanni.”

³³Ní u-boonnooliibi bí-u yii: “Kin, la ní ti dàá nín kánni tijin kupɔu nee ni kí kpiń nnibiim min bí nee dee?”

³⁴Ní Yeesu fātī bālfī-bi yii: “Kpɔnɔb bija ní ni cáá ní?” Ní bi kíí-u yii: “Biluli, nì ńjɔkaańkaamu.”

³⁵Niinee ní u bí yii samaayee koko ń kàl taapu,

³⁶ní ki fǔɔ kpɔnɔb bilulee nì ijomee, ki jáam Unimbɔti an pu, ní ki gífi gífi ki tī u-boonnooliibi yákatī kunipaauee.

³⁷Ní baa ńma jíń ki díkí, ní bi kóon agin ńin nìn kínee ki gbéeń tikabiti tiluli.

³⁸Bin nìn jíń tijikaal gbantee nyán bininjab kutukub binaa, baa kaań binimpoobi nì mbiyaamu.

³⁹Bi jíń ki dóoyee, ní Yeesu yánti kunipaauee nín kùn ní u kó buńalimbu u nì u-boonnooliibi búnti Magadan watil pú.

Maatiu 16

¹Fariisab nì Sadásab dómín Yeesu cee kí píí-u tibɔti ní ki bí-u yii ú ńá maamaaci ubo kí dákà-bi yii Unimbɔti bí u-cee.

²Ní Yeesu kíí-bi yii: “Kujoouee, ni lè yii: 'Kutagbɔɔu dàá nīn ńāń, kun puee atagban ńmāl mmam.’

³Ní kutaafaauee ni lè yii: 'Utaa dàá nì dín kun puee atagban bí gùngum.' Ni nyí kuta bimbim mìn, ní kaa ńūn kí béé tidaandi tin Unimbɔti bí ńáń iyunti in bí nee poonee.

⁴Waanee nib binikpitib bin kaa yú deede nì Unimbɔtee bālfī yii m ńá kudaanɔu kubo kí dákà-bi. Baa láá ká kudaanɔu kubo asee kun náń nì Joonasi yókɔee!” U lī mimmee ní ki yánti-bi ki búnti.

⁵U-boonnooliibi nín dūti dimɔgbandee, bi súnti kaa kpáańni kpɔnɔb.

⁶Ní Yeesu bí-bi yii: “Ní nīn nyí nì ni-ba nì Fariisab nì Sadásab kpɔnɔnyókɔɔu pu.”

⁷Ní u-boonnooliibi bí dákafī bi-ban yii: “Ti nín kaa kalin kpáańni kpɔnɔbee pu ní u lī mimmaaan?”

- ⁸Yeesu béè bi-landokoi, ní ki lī-bi yii: “Ba pu ní ni bī dākafi ni-ban ni nín kaa ḡubiñ kponobe pu? Ba pu ní ni-fookiu kaa náan mín?”
- ⁹Nìn dín naa láá gliī taapoo? Naa téetí kponob biḡmoo bin m ḡífi ki tī binib kutukub biḡmoo ḡmó ki díki ali ni tōō bin kínee tikabiti saalaa nì tileeee?
- ¹⁰Àá naa téetí kponob biluli bin m ḡífi ki tī binib kutukub binaa ḡmó ki díké? Tikabiti tiḡa ní ni nìn tōō bin kínee ní?
- ¹¹Ba pu ní naa béè yii an kaa sá kponob boti ní m sòon?” Ní u ḡífi būsì ki lī yii: “Ní nīn nyín ni-ba nì Fariisab nì Sodusab nyokəḡu ḡun bi cáā ḡáan bukpənsaan an jómee pu.”
- ¹²Niinee ní u-boonnooliibi nín béè yii waa nìn bī sòon nì bi bí nīn nyí nì bi-ba nì nnyokə ḡun bi ḡáan kponoe pu, ama an nìn sá bí nīn nyín bi-ba nì Fariisab nì Sodusab dākatam pu ní.
- ¹³Ní Yeesu nì u-boonnooliibi búntì Seesaaree Fiiliipi tiḡki watil pú. Bi cée, ní u bālfibi yii: “Binib li man Kinibiki pu yii m sá ḡma ní?”
- ¹⁴Ní bi kí-u yii: “Biba bí yii an sá Jaan un fūul binib Unimbəti nyimee, ní biba mun bí yii a sá Unimbəti bənaatiliu Eeli, ní biba mun bí yii sii di sá Jeereemii àà Unimbəti bənaatiliibi kansikin ubə.”
- ¹⁵Ní Yeesu bālfibi yii: “Kin nimbi faa, ḡma ní nimbi nyí yii m sá ní?”
- ¹⁶Ní Siimən Piyeer kí-u yii: “Sii di sá Kriisitoo, ki sá Unimbəti mmanḡafəkəndaan Jipəon.”
- ¹⁷Ní Yeesu bí-u yii: “Siimən, Jaan jipəon, a bí mmən ni! Di sá yii an kaa sá unil di lēēan baaməni ki dākā-si, an sá m-Baa un bí yilpuee di dākā-si.
- ¹⁸Man tükù-si yii: sii di sá Piyeer, ditəḡkpakpaandi nee pu ní m dàā mā m-nikitil kí tókəñ, ní ḡkúm nì mi-pəḡḡu dàā nyəfiñ kí ḡúl, kaa làa ḡmā kí ḡá-dì tiba.
- ¹⁹M dàā dū Unimbəti beel saafiibi kí tī-si, ní a yaa sòon ki sīn pu taapu dooyee mín ní an sòon ki sīn yilpu mun.”
- ²⁰Yeesu lī mín ki dóoyee, ní ki bí u-boonnooliibi yii bí taa péētükù báà ubə yii u sá Kriisitoo.
- ²¹Dyunti gbantee ní Yeesu kí ki sòon ki cántí-bi yii: “An sá yii m cù Jeerusaleem, bikpilib nì bisaraḡakpilib nì bimaradakaliibi n sàan-mi tikpil, ní kí kpò-mi, winta dal, ní m fikitī.”
- ²²Ní Piyeer cáá-u ki nyántì ḡkpaanceeti ki wəon-u yii: “Ukpil, Unimbəti n cunnì mbusu ndan! An kaa làa bān-si mín.”
- ²³Ní Yeesu fātiḡ Piyeer pu ní ki bí-u yii: “Sii un cáá Sitaan landokəḡuee, sútí lapu kí wātī-mi. A sá-mi kusugḡ ní nsan pu, saa dākafi Unimbəti yam, a dākafi nniyaamin ní.”

²⁴Niinee ní Yeesu tükū u-boonnooliibi yii: “Un yaa là kí nók-mee n fá ún u-ba nín là puee, kí yòon u-dòpuntikaan̄u kí n̄n nók-mi.

²⁵Kun puee un di yaa là kí fī u-man̄falee dàá dāá lantí-dì, ama un di yaa fá u-man̄fal man puee di dàá dāá fī-dì.

²⁶Unil, a yaa jín duulnya nee kókó ní ki yaa fá a-naŋkee ba ní a páati? Ba ní a ŋūn kí dūú pà kí fī a-ba?

²⁷Man Kinibiki dàá dāān n̄ m-Baa Unimbōti nyooti, ní m-tūuni dāa nók-mi, ní m̄ dāá pà bàā ŋma n̄ u-tundi nín sá puee.

²⁸Ibaam̄on ní m tükū-ni, biba bí ni-kansikin doo kaa làá kpú ní kí ká man Kinibiki n̄ dāān kii ubotee.”

Maatiu 17

¹Iwiin iluu boonee, Yeesu yōon̄ Piyeer n̄ Jaaki n̄ Jaan un sá Jaaki naalee ki cáá-bi ki kpōoti ŋkpaanceeti dijoofókol diba pu,

²ní ki cúú u-ba ki kpánti bi-nimiin, ní u-nimiin kí n̄ ki jìl pàlpal kii ŋwiiínee, ní u-wampeŋkaati píil bóiii kii ŋwalfee.

³Niinee ní u-kpambaliŋ kpēēyee Mooisi n̄ Eelii di sí bi n̄ Yeesu sòonee.

⁴Bi ká mimmee, ní Piyeer tükū Yeesu yii “M-Dindaan, an ŋān tí n̄n bí doo! A yaa là m dàá gāa tibiñ tita, sii kubō, Mooisi kubō, Eelii mun kubō.”

⁵U bī sòon̄ mimmee, ní ditagbandi diba dómín ki bīn̄ bi-pu ki jìl pàlpal, ní bi gbīl Unimbōti sòon̄n̄i ditagbandee ni yii: “Un bí nee di sá man Jipōon un m n̄eén tiŋanee, u-pu ní m-pōbil sòm. Ní pīlfimaan-u.”

⁶U-boonnooliibi nín gbīl an sòon̄n̄i mimmee ní bi fāŋkì tikpil ki líti dicincibil,

⁷ama ní Yeesu sùti ki pīl-bi, ní ki gbēē-bi ki bí yii: “Yīkìmaan, taa fāŋkìmaan!”

⁸Bi wāan̄ ki kpēēyee ní kaa ti ká bin kínee, see Yeesu baba.

⁹Dyunti ŋun bi fātī kpákatiñ dijool puee, Yeesu kpáafi-bi yii: “Ní taa māafi báa ubo tin ni kée kí n̄n cí ŋyunti ŋun man Kinibiki dàá fikiti ditaŋkpiilinee.”

¹⁰Ní u-boonnooliibi bālfī-u yii: “Ba pu ní bimaradakaliibi bí yii Eelii di máan̄ kí péé kí dāān kí wātī ní Kriisitoo n̄ nín dāān ní?”

¹¹Ní Yeesu fātī kíf-bi yii: “Ibaam̄on, Eelii di máan̄ kí péé kí dāān kí bóntí tikókó.

¹²Ama m tükū-ni yii Eelii dómín dooooyee ní binib kaa bēè-u, ki ŋá-u bi nín là puee. M̄n̄ mbaantiim ní bi dàá tí sàan̄ man Kinibiki mun.”

¹³Niinee ní u-boonnooliibi bēè yii Jaan un fūul̄ binib Unimbōti nyimee ní u lì.

¹⁴Bi bàñ ki ŋmāntiñ kunipaauee, ní uninja ubo dómín Yeesu cee ní ki gbāan̄ u-nimiin,

¹⁵Ní ki bí-u yii: “Ukpil, sō m-jipɔɔn saai! U bñn abimbil ní an sàantí-u tikpil, an péelíikí-u ní múmul, nyunti ɣubɔee ɣɣmin, nyunti ɣubɔ muee nnyimin.

¹⁶Ní m bàà cáañ-u a-boonnooliibi cee, ní baa ɣún ki cáañ-u.”

¹⁷Ní Yeesu bí yii: “Óo binib nee, naa cáá fookii ki gáati! Kí dāa sāa nyunti ɣulɔɣu ní m bàà dūú kāl ni-cee? M dàá nñ jñ ni-pu kimɔtii kí tin sāa nyunti ɣulɔɣu ní? Cáammaan-mi kibikee doo.”

¹⁸Ní Yeesu kpātì arasinii un kā ki-puee pu, ní u nyáñ, ní kibikee pɔókì niin dicilpu.

¹⁹Niinee ní Yeesu boonnooliibi dómín u-cee bi-ɣmaniɣma ki bālfí-u yii: “Ba pu ní timbi kaa ɣún ki jñ arasiniiyee ní?”

²⁰Ní Yeesu kífí-bi yii: “Di sá yii ni-fookiiu un ni cáá Unimbɔti puee di pátì. Ibaamɔn ní m tükù-ni, ni-fookiiu yaa bàà gbìfì fiii kii dijɔɣɔmbilee, ni bàà ɣñn kí tükù dijool nee yii: 'Yíkì laakin a bí nee kí nñ cá lapu doo!' Ní dí bàà lafun kpíkítì. Tiba kaa bàà ɣñn kí nñ pōō ki tī-ni.

[²¹Ama arasiniiibi bin bí kii uneeyee, see ɣwimmeem nì dinyɔɔboobil ní a ɣñn kí dūú jà-bi.”]

²²Dalba Yeesu nì u-boonnooliibi kpáfí ki bí Gaaliileeyee, ní u tükū-bi yii: “Bi dàá cúu man Kinibiki kí tī binib, bí kpò-mi.

²³Ama ní winta dalee m fikitì.” Niinee, an kó-bi kunimbaau tikpil.

²⁴Yeesu nì u-boonnooliibi nñ bàñ Kapeenaayumee bin nñ fòol Kunimbɔtidii lampoouee dómín Piyeer cee ní ki bālfí-u yii: “Ni-kpiliu kaa pà Kunimbɔtidii lampoou níin?”

²⁵Ní Piyeer kífí-bi yii: “U pà.” Nyunti ɣun Piyeer kóon kudiinee, ní Yeesu bí-u yii: “Siimɔn, a dàkafí yii ba? Bilab di pà fɔtiku nì lampoo ki tì duulnya ɔtíibi ní? Bitindambaaa binicambi ní?”

²⁶Ní u kífí-u yii: “Binicambi.” Ní Yeesu bí-u yii: “Mimmee, bitindambi kaa pà dee.

²⁷Ama timbi kaa là kí bàkañ binib gbanti, mñn puee, nñ cá dimɔlin kí tō njɔmpiin. Ujɔmpeepeekaa un a dàá cúúyee, á tábití u-nyɔkɔ, a dàá ká animil ɣin dàá ɣmàntí binib bili lampoouee. Cáañ animilee kí pà man nì sii yil pu.”

Maatiu 18

¹Dyuntée ní Yeesu boonnooliibi dómín u-cee ki bālfí-u yii: “Ŋma di sá ukpaan Unimbɔti beelin ní?”

²Ní u yíin kibiyaawaai kiba ki yóon bi-nimiin,

³ní ki bí-bi yii: “Ibaamɔn ní m tükù-ni, ni yaa kaa kpántì ni-bimbim ki ɣá kii mbiyaamuee, ni kpá kí kó Unimbɔti beelin.

⁴Un sá ukpaan Unimbɔti beelinee di sá un di sɔntñ u-ba ki kpántí kii kibikee.

- ⁵Man puee, un di yaa fõõ kibiki kiba kii kineeyee, fõõ man m-ba dee.”
- ⁶“Ama un di yaa yāntì mbiyaamu mun fõõ-mi ki kii nee kansikin kiba ná ikpatee, bí dū kunakpaaṅṅu kí kúú udaan neen kí cáá-u kí tō tṅkun ú múl taapu taapuee só.
- ⁷Mbusu bí ki tī duulnya u nín yāntī binib ṅáaṅ ikpatee. An dàá nīn péēbí mín ní. Ama mbusu bí ki tī sii un pu ní ikpiti dī ki dómínee.
- ⁸“An yaa sá a-ṅal kii a-taal di yaa làá yāntī á ṅá ikpatee, gùutí fá kí wàatī a-ba! Á kó mmaṅfafòkòn ni nì ditaagindi kii diṅṅgindi só nì a-ṅalii liitil nì a-taaṅi liitil ṅ nīn bí, bí cáá-si kí tō ṅṅmi ṅun kaa kúú jaanjaanee ni.
- ⁹An yaa tí sá a-nimil nín kpèé kuṅyee di yaa kaa fáatī Unimbotee lēēan landòkoi a-ni, kun puee an ṅāñ ki tī-si á taa ṅá an kpitii kí taa láā kó ṅṅmi ṅun kaa kúú jaanjaanee ni. Kii an nín ṅāñ ki tī-si bí lúkutí a-nimil diba kí fá á ṅmátí nì a-nimiliṅ liitil ṅ nīn ká á kpú puee.”
- ¹⁰“Ní nīn nyíṅ ni-ba kí taa kpèè mbiyaamu nee kansikin kiba fam, m tükù-ni ibaamòn ní yii itūun in kpèé-muee bí m-Baa un bí yilpuee nimiin ṅyunti sá kamaa.
- [¹¹Di sá yii man Kinibiki dómín kí fī bin nīn wóṅkèe ní.]
- ¹²“Ni dàkafi yii ba? Unil yaa cáá ipii dilaataal, ní ubo wāṅkì i-kansikinee waa yāntī ubo kpá dilaataal in kínee ajoin pu kupikpaaun kí cùú nyàabiṅ ubo un wāṅkèeee?
- ¹³M tükù-ni yii, u yaa tin ká-uee, u-boti móókìṅ-u kí jītìṅ ubo kpá dilaataal in kaa wāṅkèe boti.
- ¹⁴Mín mbaantiim ní ni-Baa un bí yilpuee kaa là mbiyaamu nee kansikin báà kiba ṅ wāṅkì.”
- ¹⁵“A-nabiki yaa yīntiṅ-see, cù u-cee kí dàkà-u min ní u ṅá-si an kaa kítèe sii nì u ṅmaniṅma. U yaa gbìl ki tīṅ-see, mimmee, a ṅún ki gíiṅní a-nabiki nsammòntin dee.
- ¹⁶Ama u yaa yíi, kaa gbìlṅ-see, á kpáaṅ unil ubo kii bili kí cù u-cee an nín dàá ṅá pu binib bili kii bita ṅ ká kí ṅmā kí sòòṅ min udaan ṅá an kaa kítèe, kii Unimboti takaldau poon nín lī puee.
- ¹⁷U yaa kaa tí gbìl ki tīṅ bí muee, á tükū Unimboti nikitil, u yaa tí yíi, kaa gbìlṅ Unimboti nikitilee, ú kpántí a-cee kii unil un kaa nóó Unimbotee.”
- ¹⁸“Ibaamòn ní m tükù-ni, tin ní ni yaa sòòṅ ki síiṅ taapu dooyee, mín ní an sòòṅ ki síiṅ yilpu mun.
- ¹⁹“Ibaamòn ní m tükù-ni, binib bili ni-kansikin yaa kpáfi kinyòko taapu doo ki mēēbáà kuṅyee, m-Baa un bí yilpuee dàá tī-bi kudṅṅu.
- ²⁰Di sá yii laakin binib yaa kpáfi bili kii bita man yindi puee, m bí bi-kansikin.”
- ²¹Niinee ní Piyeer dómín Yeesu cee ki bālfí-u yii: “Ukpil, m-nabiki yaa yīntiṅ-mi, kí tin sāā miṅa ní an máaṅ m dūú pō-u ní? Kí tin sāā milulaaa?”

- ²²Ní Yeesu kíf-u yii: “Aayee, an kaa sá miluli, an sá kí tin s̄ā imuṅku ita nì saalaa miluli pu ní á p̄ō.”
- ²³An puee, Unimbōti beel náań nì kii ubōti ubō nín yíín u-tòntòntliibi n̄ dāá pà-u bi-p̄ōṅṅi puee ní.
- ²⁴U kíf ki bī kàańee, ní bi cáań-u u-p̄onliu ubō un cáá-u dip̄ondi miiliyōmbi kutukuee.
- ²⁵Kijapaayee nín kaa n̄n cáá kun ní u dàá dūú p̄ee, ní ukpilee bí yii bí dū u nì u-nimpuu nì u-biyaamu nì tin k̄k̄o u cááyee kí nyāfi án ḡmā kí bà kunimbiṅmiiu.
- ²⁶Ní utòntòntlee líti kitiṅ u-kpiliu nimiin, ki d̄ō ki filiṁ ki gbāam̄-u yii: “Á jī kimōtii! M dàá dāá pà-si k̄k̄o.”
- ²⁷U nín kaa ḡṅn̄ kí pà puee ní u-kpiliu sún u-saai ki dū u-p̄ondi ki pú-u, ní ki bí yii ú n̄n cá.
- ²⁸“Utòntòntlee nyáńee ní ki dūu tú u-tòntòntjuti un mun cáá ún̄ dip̄ondi kutukuee nsan, ní ki c̄b̄ ki cúú-u ki ḡmāam̄ u-neen ki bí-u yii 'Pà-mi m-nimiliṅ!’
- ²⁹Ní u-tòntòntjutee líti kitiṅ u-nimiin ní ki gbāam̄-u yii: ‘Á jī kimōtii, m dàá pà-si.’
- ³⁰Ama waa kíf see u nín cáá-u ki tó sarka ú pà u-p̄ondi k̄k̄oee.
- ³¹U-tòntòntjutiibi nín ká min jítèe, ní an kó b̄n̄ inimōon, ní bi cūti kàań tin jítèe k̄k̄o ki tükū bi-kpiliu.
- ³²Niinee ní bi-kpiliu yíín utòntòntlee ní ki bí-u yii: ‘A sá utōṅfiti ní! A nín gbāam̄-mi puee ní m dū a-p̄ondi ki pú-si.
- ³³An kaan máań á s̄ō a-bōō saai kii man nín sún a-saai pueeee?’
- ³⁴Ní u-kpiliuee gíi diṅuul, ní ki yānti bi dū-u ki tó sarkan bí dáal̄ u-tafal ali ú dāá pà u-p̄ondi k̄k̄o kí d̄óó.”
- ³⁵Ní Yeesu bí yii: “M̄n̄ ní m-Baa un bí yilpuee dàá dāá ḡá un kamaa kaa dū u-nabiki kpitii ki pú-u nì u-p̄obil k̄k̄oee.”

Maatiu 19

- ¹Yeesu dākā an bōti ki d̄óyee, ní ki yíkì Gaaliilee tiṅkin ki p̄óti Juudee watil, Jōdan buṅbandi lapu pu.
- ²Kunipaau n̄n n̄óó-u ní u cāantí bi-weeni.
- ³Niinee Fariisab biba d̄ómiń u-cee kí píl-u tiboti kí kp̄èè u-nyōkōn ní ki bālf̄i-u yii: “Ti-marau pú nsan yii á jà a-nimpuu báa tin ní u yaa péēṅéee?”
- ⁴Ní Yeesu kíf-bi yii: “Naa kàań Unimbōti takaldau ki ká an nín lī puee níiin? Yii ḡkilkaaminee Unimbōti unaanli náań uninja nì unimpu ní, ní ki bí yii:
- ⁵‘An sá uninja n̄ yíkì u-baa nì u-na cee ní u nì u-nimpuu n̄ n̄n bí ní biliitil n̄ kpánti unibaanti.’

⁶Mimmee, baa ti sá bili, bi ná unibaanti dee. Mìn puee, unil n̄ taa yàkatī tin Unimbōti dūu kpáfèe.”

⁷Niinee ní bi bālfī-u yii: “Kin mimmee ba pu ní Mooisi n̄n pú nsan yii: 'Á ḡmà takalda un dākà yii a j̄n̄ a-nimpūee kí ḡb̄n̄-u ní kí n̄n jà-u ní?' “

⁸Ní u kíí-bi yii: “An sá ni-pɔɔgbif̄ḡḡu di yì-tì ní Mooisi pú-ni nsan yii ní jà ni-nimpoobi, ḡkilkaaminee an kaa n̄n sá mìn.

⁹M tükù-ni yii, sii un nimpūu yaa kaa nyán a-boon, ní a j̄n̄-u ki f̄t̄i cáá ubɔee, a ḡ t̄laakpaal Unimbōti n̄miin.”

¹⁰Ní u-boonnooliibi bí yii: “An yaa sá mìn uninja n̄ u-nimpūu kansikinee, mimmee, a yaa kaa p̄t̄i cáá unimpū, an só dee.”

¹¹Ní u bí-bi yii: “An kaa sá báà ḡma di ḡḡn̄ tibōti nee see bin an pú bí ḡmēe.

¹²Kun yàntī bininjab biba kaa cāab̄ binimpoobee bí t̄bin: bibee, an sá doooo bi-na poon ní baa sá bininjab, ní bi f̄at̄i biba, ní biba muee, an sá Unimbōti beel puee ní bi dū bi-ba ki ḡ kii baa sá bininjabee. Un yaa ḡḡn̄ kí ḡb̄l̄ tibōti nee taapuee n̄ ḡb̄l̄.”

¹³Bi n̄n cáan̄ mbiyaamu Yeesu cee ú dū u-ḡalii kí páan̄ mu-pu kí mēè kí t̄i-mu, ní u-boonnooliibi b̄i wòon̄ bin cáan̄-muee.

¹⁴Ní Yeesu bí-bi yii: “Càntīmaan mbiyaamu nee! Yàntīmaan mú dāan̄ m-cee kí taa p̄im̄maan-mu nsan, kun puee Unimbōti beel sá ki t̄i bin náan̄ n̄ muee ní.”

¹⁵Ní u dū u-ḡalii ki páan̄ mu-pu ki mēēki t̄i-mu ní ki búnt̄i.

¹⁶Uninja ubɔ dóm̄in̄ Yeesu cee ní ki bālfī-u yii: “Ukpil, ditumm̄nt̄iil dilar ní m dāá ḡ ní kí ká dimaḡfal̄ din kaa cáá dikunt̄ilee ní?”

¹⁷Ní Yeesu kíí-u yii: “Ba pu ní a bālfī-mi tim̄nt̄iil pu? Unimbōti baba di sá um̄nt̄i. A yaa là kí kó dimaḡfal̄ din kaa cáá dikunt̄ilee nee á n̄n tó marab.” Ní u f̄t̄i bālfī Yeesu yii: “Marab bilab?”

¹⁸Ní Yeesu bí-u yii: “Taa kpò unil, taa ḡ t̄laakpaal, taa yò, taa m̄nt̄i ubɔ nyɔkɔ pu,

¹⁹kí n̄n tó a-baa n̄ a-na, kí n̄n n̄eēn̄ a-juti kii sii a-bee.”

²⁰Ní unaacimp̄ɔonee bí-u yii: “M ḡ mìn̄ kɔkɔ, tilati di ḡt̄i k̄n̄?”

²¹Ní Yeesu kíí-u yii: “A yaa là kí ḡ min̄ sá páayee, cù kí dū tin kɔkɔ a cááyee kí nyāf̄i kí dū animil kí yàkatī bifalaadambi, ní kí tin ká tigaajati Unimbōti cee, ní kí dāá n̄n n̄ó-mi.”

²²Unaacimp̄ɔonee n̄n ḡb̄l̄ an nyɔɔbundee, kunimbaau kó-u ní u búnt̄i soooo, kun puee u cáá tigaajati tikpil kaa là kí dūú p̄.

²³Niinee ní Yeesu bí u-boonnooliibi yii: “Ibaam̄n̄ ní m tükù-ni, an dāa p̄ɔɔ ki t̄i ugaaja n̄ kó Unimbōti beelin.

²⁴M gítí tükù-ni yii, an pòfi ki tī ugutaamu n jítí ujoo buṅṅun ki jítìn ugaaja n kó Unimbòti beelin.

²⁵U-boonnooliibi nín gbìl mimmee, ní bi bākatì tikpil, ní ki bí yii: “Kin, ḡma di ḡṅṅ ká difiil dee?”

²⁶Ní Yeesu kpēē-bi dímmm ní ki bí yii: “An pōṅṅ unil, ama Unimbòti ceeyee tikòkò sá sòkómii ní.”

²⁷Niinee ní Piyeer bí-u yii: “Kin, timbi nín yíkì ki fá tikòkò nì tikòkò ki nòó-si nee timbi paatii dāa sá ba?”

²⁸Ní Yeesu bí yii: “Ibaamṅn ní m tükù-ni duulnyapṅṅ un dōṅṅee nee, man Kinibiki yaa láā kāl m-beejal pu nì tinyoolee, nimbi bin nòó-mee mun dāa kàal abeejal saalaa nì alì pu ní kí sòṅṅ Israyeel naakòti saalaa nì tilee bòti.

²⁹Ní un kamaa yaa yíkì ki fá u-diiṅṅi nì u-nabiyaamu, nì u-niisalib, nì u-baa, nì u-na, nì u-biyaamu, nì u-kpaatanti man puee, Unimbòti dàá tin pà udaan mín dilaataal pu, ní ú gítí fṅṅ dimaṅfal dín kaa cáá dikuntilee.

³⁰Ama bisanlintiliibi tikpil dāa kpántí biboompaanliibi, ní biboompaanliibi mun tikpil n kpántí bisanlintiliibi.”

Maatiu 20

¹“Unimbòti beel náán nì kii bukpaadaan ubò nín nyán kutaafaau pòlpòl kí nyàab bipaadambi bí tṅ ditundi u-kpaabun puee ní.

²U ká-bee, ní bi sòṅṅ ki bóntì yii u dàá pà-bi ḡwiin ḡubò tundi paati, ní u cáá-bi ki tó u-kpaabun.

³Tikúti tiwa gbánee, u nyán ki ká biba ká kinyṅṅin fam kaa bí tūn diba,

⁴ní u bí-bi yii: 'Ni mun nín cámaan m-kpaabun, m dàá dāá pà-ni an nín máan puee.'

⁵Ní bi búntì. Ní bukpaadaan tí nyán tikúti saalaa nì tili ní ki dāa nyán wiṅkpooti tikúti tita ki ká biba mun.

⁶Kujoou tikúti tiḡmoo watilee, ní u tí nyán ki ká biba ká, ní u bālfì-bi yii: 'Ba ḡá ní doooo kutaafaau nì ká doo fam, kaa bí tūn diba?'

⁷Ní bi kífì-u yii: 'Di sá yii ubò kaa cúú-ti.' Ní u bí yii: 'Too, ni mun nín cámaan man kpaabun.'

⁸“Kujoou jótèe, ní bukpaadaan bí un kpèe u-paadambèe yii: 'Yíin bipaadambèe kí pà-bi bi-paati, kí kílín bin m lúnkèe kí dāá kátí bin m péeyee.'

⁹Ní bin bi cúú kujoou tikúti tiḡmooyee dómiín, ní bi-kòkò fṅṅ ḡwimmṅn paati.

¹⁰Bin bin u péé péé ki cúúyee dàkafì yii bín dàá fṅṅ tipaal án nín wīkí ki jítìn bin lúnkì boonee, ní bi dū ḡwiin ḡubò paati ki tī bāa ḡma.

¹¹Bi nín fṅṅ animilee, ní bi bí gbùkuṅ ukpilee pu, yii:

- 12'Bin a lúnkì ki f̄ōō nee, kukúbambaantiiu ní bi dūu tún ditundi, ní a pān-bi mbaantiim kii timbi bin kíí doooo kutaafaau ki kùñ ki ḡī, ḡwìiín píl-tee.'
- 13Ní u fātii kíí bi-kansikin ubo yii: 'M-bōō, maa mūul-si. Man nì si kaa sòōñ a kíí yii a dàá f̄ōō ḡwìin ḡubō paati níiin?
- 14F̄ōō a-nimiliḡ kí n̄n cá, m là kí t̄ī ujoollkaa nee kii m n̄n t̄ī si mun puee ní.
- 15Maa cáá nsan kí dū m-nimiliḡ kí ḡá m n̄n là pueeee? Àá, m n̄n ḡá un béeyee tiḡanee ní an wù-si ní?' “
- 16Ní Yeesu ḡit̄ī l̄i yii: “Bin bin sá bisanlintiliibi k̄ḡk̄ḡneeyee dàá ḡá biboompaanliibi, ní biboompaanliibi n̄ dāá ḡá bisanlintiliibi.”
- 17Ḳyunti ḡun Yeesu cá Jeerusaleemee ní u gānt̄i u-boonnooliibi saalaa n̄ bilee nsanni, ní ki bí-bi yii:
- 18“Ni ká Jeerusaleem un ti jóm̄ neeyaa, bi dàá cúú man Kinibiki kí t̄ī bisaraaḡakpilib n̄ bimaradakaliibi, ní b̄iñ n̄ dāá sòōñ m-bōti kí l̄i yii bí kpò-mi,
- 19kí dū-mi kí ḡubiñ bin kaa sá Juuda yabee ní b̄iñ n̄ bèēl̄-mi kí gbá-mi anaalab, kí kpáá-mi ndḡpuntikaa pu kí kpò-mi, ní winta dalee m̄ fāt̄i fikit̄i.”
- 20Niinee, Seebeedee jipōmbi na yōōñn̄i u-biyaamu ki dóm̄iñ Yeesu cee ki gbāñ u-nimiin kí mèè-u t̄iba.
- 21Ní Yeesu bālfi-u yii: “Ba ní a là?” Ní u bí-u yii: “Ḳyunti ḡun a yaa láā kpánti ubōtee, á yānt̄i m-jipōmbi bili nee ubo n̄ dāá n̄n k̄a a-ḡaḡḡiil pú, un kíñee a-ḡaḡḡan pú.”
- 22Ní Yeesu bí yii: “Naa nyí tin ni mèéyee. Ni ḡūñ kí nyò falaa un man dàá nyò naaan?” Ní bi kíí-u yii: “Iiin, ti ḡūñ.”
- 23Ní Yeesu kíí-bi yii: “Tiḡman, an lafun sá ní nyò falaa gbanti, ama an yaa kíñ ḡaḡḡiil n̄ ḡaḡḡan kakaḡuee, an kaa sá man di pūñ an paani. Ipaan gbanti sá ki t̄ī bin pu m-Baa bōnt̄i-i ki síiñee ní.”
- 24U-boonnooliibi saalaa bin kíñee n̄n gb̄l̄ mimmee, ní bi f̄ōō nnabiyaamu mulee pu diḡuul.
- 25Niinee ní Yeesu yíiñ bi-kōkō, ní ki bí-bi yii: “Ni nyí yii atimbun bōtiibi wób bi-yab, ní binikpaambi tókó bin kíñee pu ki dākà-bi bi-pḡḡḡu.
- 26An kaa máañ kí n̄n bí m̄iñ nimbi kansikin, ama un yaa là kí n̄n sá ukpaan ni-kansikinee, udaan n̄ ḡiñ u-ba ni-tōntōnliu,
- 27ní ni-kansikin ubo yaa là kí n̄n sá upeepeekaayee, udaan n̄ n̄n sá ni-yumbuu.
- 28M̄iñ ní man Kinibiki kaa dóm̄iñ bí ḡá ditundi kí t̄ī-mi, m dóm̄iñ kí t̄ō atuun kí t̄ī binib ní kí dū m-maḡfal kí pà kí f̄ōō binib tikpil kí líí.”
- 29Ḳyunti ḡun Yeesu b̄i nyēēJeeriikooyee, dinikitikpaandi diba n̄n n̄óó-u.

³⁰Ní bijofub bili n̄n k̄a nsan caḡin, bi gb̄il̄ Yeesu b̄f̄i j̄t̄i bi-cee niinee, ní bi b̄f̄i t̄at̄i yii: “Ukpil, Dafiidi naantuu, s̄o ti-saai!”

³¹Ní diniwulee b̄f̄i w̄oòh̄-bi yii bí ḡm̄ílee ní bi m̄ōt̄i b̄f̄i t̄at̄i m̄p̄on yii: “Ukpil, Dafiidi naantuu, s̄o ti-saai!”

³²Niinee ní Yeesu s̄ā ki s̄il̄, ní ki ȳiín̄-bi ki b̄ālf̄i-bi yii: “Ba ní ni là m̄ ḡá kí t̄ī-ni ní?”

³³Ní bi k̄í-u yii: “Ukpil, ḡúbit̄i ti-nimiliḡ.”

³⁴Ní Yeesu s̄ún bi-saai ní ki gb̄ēēbi-nimiliḡ, kp̄alaa niinee ní bi w̄á̄l̄, ki k̄iñ̄ ki n̄óó-u.

Maatiu 21

¹Dyunti ḡun bi t̄oób̄ Jeerusaleem ki b̄ān̄ Beetifagee timbiliki kin bí Ōliifi sufii jool caḡinee, ní Yeesu l̄ēē u-boonnooliibi bili ki tú,

²yii: “N̄iñ̄ cámaan kitimbilii kin bí ti-nȳok̄opu nee, ni yaa b̄ān̄ kp̄alaaayee, ni dàá ká kimansalii kiba n̄i ki-biki gb̄iñ̄ niin. Ní gb̄iñ̄t̄iñ̄-mu kí cáañ-mi.

³Ubo yaa b̄ālf̄i-ni t̄ibee, kíímaan-u yii: 'Ti-Dindaan di nyàáb̄ kimaḡ,' niinee, udaan dàá ȳānt̄i ní cáañ-mu.”

⁴An j̄t̄i m̄iñ̄ kí d̄àkà Unimb̄oti b̄onaatiliu n̄iñ̄ n̄iñ̄ l̄i ki s̄iñ̄ puee yii:

⁵“T̄ùk̄ùmaan Siiȳon̄ t̄iḡki nib, yii: Kp̄èèmaan, ni-b̄ot̄iu d̄oòh̄ ni-cee, ki sá unil un m̄ōee ki k̄āñ̄ kimambiki pu.”

⁶Ní u-boonnooliibi bilee b̄únt̄i ki c̄ūtiñ̄ ḡá kii Yeesu n̄iñ̄ bí yii bí ḡá miḡyee.

⁷Bi cáañ̄ kimansaliiyee n̄iñ̄ ki-biki, ní ki d̄ū bi-b̄okutiḡ ki p̄āañ̄ mu-pu, ní Yeesu j̄óm̄ ki k̄ā̄l̄.

⁸Ní dinikitilee kansikin binib tikpil kp̄at̄i bi-b̄okutiḡ ki b̄iñ̄l̄ nsan pu, ní biba mun ḡa tikpakpati ki b̄iñ̄l̄ nsan pu.

⁹Ní kunipaau kun l̄iñ̄ Yeesu nȳok̄opuee n̄iñ̄ kun pá u-boonee k̄ūnt̄i yii: “Oosaana! Dafiidi naantuu n̄ ká tinyool! Ti-Dindaan n̄ b̄iñ̄ un d̄oòh̄ u-yindi puee! Bí nȳōḡki Unimb̄oti un bí yilpuee!”

¹⁰Yeesu n̄iñ̄ b̄ān̄ ki k̄ó Jeerusaleemee, ní kit̄iḡ k̄ok̄o f̄ōō ki p̄íl̄ d̄āmm̄m̄, ní binib b̄ālf̄i yii: “Unil nee sá ḡma ní?”

¹¹Ní kunipaau ee kííkí yii: “An sá Yeesu Unimb̄oti b̄onaatiliu un sá Naasaareeti Gaaliilee t̄iḡkinee.”

¹²Ní Yeesu k̄ó Kunimb̄otidiin̄ ki j̄iñ̄ biwanyafiliibi n̄iñ̄ bidaliibi k̄ok̄o ki nȳánt̄i, ní ki l̄ábit̄i binimikpantiliibi teebilbi n̄iñ̄ binanjinyafiliibi jal̄iḡ, ki c̄iḡ.

¹³ní ki bí-bi yii: “An ḡm̄āñ̄ Unimb̄oti takaldau p̄oon yii: 'Bi dàá d̄āá n̄iñ̄ ȳiñ̄ man diiku ḡwimmeem diiku ní,' ama ní nimbi d̄ū-ku ki kp̄ánt̄i kunaayudii.”

- 14Niinee ní bijofub nì bin tà bi-taanji puee sùtín ki pìl̄-u Kunimbōtidii poon, ní u cáan-bi.
- 15Bisaraanjakpilib nì bimaradakaliibi nín ká maamaaci tuuŋŋi ŋin Yeesu ŋáaŋee, nì mbiyaamu nín bí Kunimbōtidii poon ki tátí yii: “Oosaana! Dafiidi naantiiu n ká tinyoolee!” ní bi fǒǒ diŋuul,
- 16ní ki bí-u yii: “A gbìl̄ bi nín tátí ki l̄i pueeyaaa saa gbìl̄?” Ní u kíi-bi yii: “M gbìl̄! Naa láá péēkàaŋ Unimbōti takaldaun laakin an ŋmān̄ yii: 'A yānti a-nyoŋkii nyēmbiyaamu ki kpáaŋ mun dáá bí ŋáarnee nyommuneeee?’ “
- 17U lī mimmee, ní ki yānti-bi, ki nyán ki búnti Beetanii ki tin dǒoŋ.
- 18Ku wúnti kutaafaauuee, Yeesu fātī gítín kitiŋinee ní ŋkùm cúu-u.
- 19U kpēēyee ki ká busubu bun bi yīi fiigee yú nsan caŋin, ní u pāatì ki bàñ ki bàà nyàab asubil kí ŋmó, ní ki ká yii tifaal ŋmaniŋma di tókú, ní u lī busubuee yii: “Sii péēgítī kpá kí lòoŋ dibil.” Kpalaa niin ní busubuee kún.
- 20U-boonnooliibi ká mimmee ní an ŋá-bi bitii, ní bi bālf̄i-u yii: “Mana ní busubuee pūti kpáa kún mín dicilpuee?”
- 21Ní Yeesu bí-bi yii: “Ibaamōn ní m tükù-ni, ni yaa fǒǒ Unimbōti ki kíi mbaamōmin kaa gùgufēe, an kaa sá min m ŋá busubu nee ŋmaniŋma ní ni dáá ŋmā kí ŋá, ni dāa ŋūn̄ kí l̄i gba dijool nee yii: 'Á yīkì laakin a yú nee kí cùú jētí tiŋkun!' ní dí lafun ŋá mín.
- 22Tin kamaa ní ni yaa mēēUnimbōti ní ki yaa fǒǒ ki kíi yii u dàá ŋá kí tī-nee, ni dàa ká kudōŋu.”
- 23Yeesu tí kó Kunimbōtidiin ki bí dākà binib Unimbōti bōtee, ní bisaraanjakpilib nì Juuda yab kpilib dómiñ u-cee ki bālf̄i-u yii: “Nì nsan ŋuloŋu pu ní a ŋáaŋ atuun ŋin a ŋáaŋ nee ní? Ōma di pú-si an saŋŋu?”
- 24Ní u bí-bi yii: “Dinyoobumbaantiil ní m dáá péēbālf̄i-ni ní kíi-mi kí wàatī, ní man mun n̄ tükù-ni nì nsan ŋun pu ní m ŋáaŋ mimmee.
- 25Ōma di túnní Jaan un fūul̄ binib Unimbōti nyimee ní? Unimbōtaaa binib?” Niinee ní bi kíi ki bí sòoŋ bi-ŋmaniŋma yii: “Ti yaa kíi yii: 'An sá Unimbōti di túnní-u,' u dàa wòoŋ-ti yii: 'Kin, ba ŋá ní naa fǒǒ-u ki kíi?’
- 26Ti yaa tí kíi-u yii: 'An sá binib di túnní-uaaa,' ti fàŋkí kunipaau mun, kun puee báa ŋma kókó nyí yii Jaan sá Unimbōti bōnaatiliu ní.”
- 27Ní bi kíi Yeesu yii: “Taa nyí.” Ní ú mun bi yii: “An yaa sée, man mun kaa láá tükù-ni nì nsan ŋun pu ní m ŋáaŋ mimmee!”
- 28Ní Yeesu gítī bí yii: “Ni dàkafī tiboti nee pu yii ba? Uninja ubo di cáá binaacimpōmbi bili ní ki bí upeepeekaa yii: 'M-jipōon, á cù kusaau dīn kí ŋá ditundi.’
- 29Ní kibikee yīi, yii: 'Maa láá cù,' ama ní boonee ki dāa kpánti ki-landókōŋu ní ki búnti kusaau.

30Ní u cū̀tì un kí̀nee cee ní ki lī́ ú mun tibòbaantiil. Ní ún kíí-u yii: 'M-baa, m dàá cù!' ama ní kaa gbóón kusaau.

31Binaacimpòmbee liitil kansikinee ulou di ñá min bi-baa lèe?" Ní bi kíí yii: "Upeepeekaa di ñá." Niinee ní Yeesu bí-bi yii: "Ibaamón ní m tükù-ni, bifòtiliibi nì nnimpulaakpaamu dàá lĩ̀tĩ̀ ni-nyòkòpu kí kó Unimbòti beelin.

32Di sá yii Jaan dómiń ni-cee ki dákà-ni deedeede saṅṅu ní naa fṛṛ-u ki kíí, ama ní bifòtiliibi bin ni kpèé famee nì nnimpulaakpaamu fṛṛ-u ki kíí. Ní nín ká mimmee boonee naa kpántì ni-landòkòi kí fṛṛ-u kí kíí."

33Ní Yeesu bí yii: "Gítĩ̀ pĩ̀lfimaan dilaṅkpandi diba. Uninja ubò di kũ̀n isufi in biliṅ bi cáā ñà ndamamee kpaabu. U còon kunaabakau ki mǎnti ki tú-bu, ki gbìñ mboo ṅun ni u dàá nĩ̀n ṅmā̀m isufee biliṅee, ki gā̀a isupaa bukpaayee kansikin, ní ki dũ̀ isufee ki tĩ̀ bipaadambi biba, ní ki búnti nсан.

34Isufee biliṅ kítitam bàñee, ní ukpilee túnni u-tòntòliibi biba u-paadambee cee bí fṛṛ u-jandi kí cáān-u.

35Ní bipaadambee cúú u-tòntòliibee ubò ki gbán ní ki kũ̀u ubò mun ní ki yáṅki utataati ataṅkpee ki kũ̀u.

36Ní bukpa daanee gítĩ̀ túnni bitòntòliibi biba bíñ wĩ̀kĩ̀n bin u péé péé ki túnnee, ní bipaadambee tí cú bí mun ki ñá kii bi nín ñá bipeepeekaabi puee.

37Boonee ní u baasii dũ̀ u-jipòon ki tú, ki dákafĩ̀ yii: 'Ún sá m-jipòonee, bi dàá fàṅki-u.'

38Ama bipaadambee nín ká u-jipòonee páañnee, ní bi bí lĩ̀ tòb cee yii: 'Kpèè un dàá dàá jĩ̀ kusaau fool boonee di dòoñee! Tí kpòmaan-u kí jĩ̀ kusaau!'

39Ní bi cúú-u ki nyánti ṅkpaabuku ki kũ̀u-u."

40Ní Yeesu bǎlfi-bi yii: "Mimmee bukpaadaan yaa láā bāañee u dàá ñá-bi mana?"

41Ní Bisaraaṅkpilee nì Fariisab kíí-u yii: "U yaa bāañee, see ú kpò binikpitib gbanti nsansaaṅkúm ní kí dũ̀ u-kpaabu kí tĩ̀ bipaadambi bin ṅyunti yaa bāañ bi dàá nĩ̀n tĩ̀n-u an subiliṅee."

42Ní Yeesu bí-bi yii: "Ni sũ̀nti tiṅmaṅmabiti tin ni kaañ Unimbòti takaldauneeeee? yii: 'Ditaṅkpal din bidimaliibi nĩ̀n dũ̀u fée, di dāa kpánti ditaṅkpal din ṅúb kudii pòṅṅuee. Ti-Dindaan nín ñá tiṅyee kaa sá maamaaci ki tĩ̀-taaa?'

43An pu ní m tükù-ni yii bi dàá dāá fṛṛ ni-cee Unimbòti beel kí dũ̀u tĩ̀ ditimbundi din yab dàá ñá Unimbòti lamme.

[**44**Un di yaa líti ditaṅkpalee puee dàá yàañ, ama ní ditaṅkpalee yaa tàb ṅyee, udaan nà ní dúsidusi.]"

45Bisaraaṅkpilee nì Fariisab nín gbĩ̀ Yeesu gā̀a an laṅkpaṅṅee, ní bi bée yii bíñ ní Yeesu lĩ̀.

⁴⁶Ní bi bí nyàab̀ nsan ηun bi dàá dī kí cúú-uee, ama ní ki fàṅkí kunipaau, kun puee báà ηma nyí yii Yeesu sá Unimbòti b̀onaatiliu ní.

Maatiu 22

¹Ní Yeesu tí ỳoòh alaṅkpan ki dūu s̀oòh̀ nì bi yii:

²“Unimbòti beel nín náah̀ nì kuṅyee s̀èé: ubòti ubò di cáá unimpu ki t̄i u-jip̄oòn ní ki ηá tican kí t̄i binib,

³ní ki dū u-tòntòliibi ki tú bí cù kí t̀k̀k̀ binib bin u ỳiínee yii bí d̀āāñ, ní bi ỳi kaa là kí d̀āāñ.

⁴Ní u gít̄i dū u-tòntòliibi biba mun ki tú ki bí-bi yii: 'Cùú t̀k̀k̀maan bin m ỳiínee yii, tijikaal bónti ki d̀òò, m k̀ū inajaa, ki k̀ū tiwaṅkuti tin cáá ηkpamee, an k̀òk̀ bónti ki sí! Bí d̀āāñ tí j̄i j̄iṅaal.'

⁵Ama bi-kansikin báà ubò kaa f̄ati tó, ní báà ηma búnti u-laṅki: ubò búnti u-saaku, ubò mun búnti u-bantil,

⁶ní bin kínee cúú bitòntòliibee ki s̀āāh̀ ki k̀ū.

⁷Ní ubòtee f̄òò diṅuul ní ki dū u-soojab ki tú bi c̀t̄i k̀ū binikp̀liibi gbanti ki s̀ēbi-tiṅki mun ηṅmi.

⁸Niinee ní u bí u-tòntòliibi yii: 'Tijikaal bónti ki sí dee, ama ní bin m bàà ỳiínee kaa kít̄i.

⁹M̀iñ puee níñ cámaan isampuyakati pu kí n̄n ỳiín bin k̀òk̀ ní ni yaa p̀ēk̀ée bí d̀āāñ kí j̄i.'

¹⁰Ní bitòntòliibee nyáñ isantaan pu ki kp̄afi bin k̀òk̀ bi k̀ée, bikpitib nì bimòntiibi k̀òk̀, ní ki cáāñ-bi ki gbéèh̀ kudii.

¹¹“Ubòtee kó kí kp̀èè bin u ỳiínee, ki dūu ká kijapaai kiba kíh̀ kaa p̀ēj̄iṅaal b̀okutil din bin béeyee p̀ēki d̀ómiñ unimpucan j̄iṅaaliuee.

¹²Ní u b̄alfi-u yii: 'M-bòò, ba ηá ní a k̀ónní doo kaa p̀ēdij̄iṅaalb̀okutil?' Ní kijapaayee k̄a ki ηmí.

¹³Niinee ní ubòti bí u-tòntòliibi yii: 'B̀óòbmaan u-taṅi nì u-ηalii iṅmii kí dū-u kí t̄o mmòṅki dibòmbòndin. Niin ní u dàá s̄o u-nȳiṅi n̄n g̀à t̀òb k̀àkaka.' “

¹⁴Ní Yeesu gít̄i l̄i yii: “Unimbòti ỳiín tikpil ama ní ki l̀t̄i f̄ií.”

¹⁵Niinee Fariisab c̀t̄i ki s̀oòh̀ ki bónti bi nín dàá dī min kí dū tibòti kí píl Yeesu n̄ s̀oòh̀ bí ηm̄a kí cúú-uee.

¹⁶Ní bi dū bi-yab biba nì Eeroodi yab ki tú bí d̀āá b̄alfi-u yii: “Ukpil, ti nyí yii sii di s̀oòh̀ ibaamòh̀ ní ki d̀àk̀a min ní Unimbòti là unil n̄n b̀ée, kaa fàṅkí binib nín d̀àk̀af̄i puee, kaa f̄ati t̄o báà udaan yaa sá kuṅyee.

- 17Mimmee á tükù-ti sii nín dākafi tiboti nee pu miŋyee. Ti-marau pú-ti nshan tí pà lampoo kí tī Room gōminau Seesaaraa an kaa pú?”
- 18Ama ní Yeesu bée bi-landəkəkpitii, ní ki bí-bi yii: “Ipoonnyoondambi, ba pu ní ni pí-l-mi tiboti kí kpèè m-nyəkən mín?”
- 19Dākàmaan-mi animil ŋin bi cáā pà lampooyee.” Ní bi lēēanimil ki dākā-u.
- 20Ní u bālfī-bi yii: “Dma yil nì u-yindi di náká animil pu na?”
- 21Ní bi kii-u yii: “An sá Room gōminau Seesaar.” Ní Yeesu bí-bi yii: “Dūmaan tin gōmina yèe kí tī gōmina, kí dū Unimbōti mun yati kí tī Unimbōti!”
- 22Bi nín gbīl an bōtee ní bi bākatì, ní ki yāntì-u ki búntì.
- 23Dwimbaanti gbantee, Sodusab biba mun dómín Yeesu cee, bìn di sá dinikitil din lì yii difikitil kaa bée. Bi bālfī Yeesu yii:
- 24“Ukpil, Mooisi bí yii: 'Ubo yaa kpî, kaa màl̄ mbiyaamu, u-nabiki n̄ f̄ōō ukpiipu kí màal̄ kí tēēn u-nabiki kin kpîyee yil.’
- 25Kun pu ti bālfēe di sá nnabiyaamu mululi nìn bí ti-kansikin. Upeepeekaa cáā unimpu ní ki kpî ki yāntì unimpuee, kaa màl̄ kibiki, ní u-naal f̄ōō ukpiipu;²⁶mín mbaantiim uliliitee kpî, kaa cáā kibiki, ní utataati mun f̄ōō ukpiipu ní ki mun kpî. Bi péē f̄oōl̄ ukpiipuee mín ní ki tin s̄ā ululuúti ní ú mun kpî.
- 27Boonee ní unimpuee mun dāa dūu kpî.
- 28Difikitil dalee, nnabiyaamu mululee kansikinee ŋma di dāa yì unimpu dee? Kun puee bi-kəkō péēcāá-u ki ká.”
- 29Ní Yeesu kí-bi yii: “Ni bí diyintil poon ní nee, kun puee naa nyí Unimbōti takaldau poon bōtaaa, kaa nyí Unimbōti pōŋŋu mun.
- 30Di sá yii, binib yaa láā fikitèe, dinimpucaal nì dicamondi dāa gítī kpá, báà ŋma dāa bí kii Unimbōti tūuni nín bí pu yilpuee ní.
- 31An yaa kíñ bitaŋkpiibi fikititamee, naa láá péē kàān ki ká Unimbōti nín sòōn nì ni pueeee? Yii:
- 32'Man di sá Abraam Nimbōtiu ki sá Isaaki Nimbōtiu ki sá Jaakōb mun Nimbōtiu.' Unimbōti yaa bí yii u sá bin kpîyee Nimbōtiuee, mimmee an dākà yii ùn ceeyee bìn kəkō kaa kpî.”
- 33Kunipaaun nìn bí pílfín-uee nìn bākatì nì u-dākatam.
- 34Fariisab nín gbīl̄ yii Yeesu sòōn ki lí Sodusabee ní bìn kpáfi,
- 35ní bi-kansikin umaradakal ubo là kí pí Yeesu tiboti kí kpèè u-nyəkōnee ní ki bālfī-u yii:
- 36“Ukpil, marab kəkō kansikinee, ulou di sá ukpaan ní?”

³⁷Ní Yeesu kíí-u yii: “ 'Á n̄n n̄eéń a-Dindaan a-nimbōtiu n̄ a-pōbil kōkō, n̄ a-fām kōkō, n̄ a-landōkōŋu kōkō.’

³⁸Mara un sá ukpaan ki l̄īyee dee.

³⁹Ní maraliliiti un páb kíí upeepeekaayee s̄eé: 'Á n̄n n̄eéń a-juti kii sisi a-bee.’

⁴⁰Marab bili nee pu ní Mooisi marab n̄ Unimbōti bōnaatiliibi dākātām kōkō tókó.”

⁴¹Fariisab n̄n n̄n dáá bí dicilpuee, ní Yeesu bālfi-bi dinyōbundi nee yii:

⁴²“Ni dākāfi Kriisitoo pu yii ba ní? Dma naantiiu ní u sá ní?” Ní bi kii-u yii: “Dafiidi naantiiu.”

⁴³Ní Yeesu bí-bi yii: “Kin, ba pu ní Unimbōti Fām yānti Dafiidi u-ba yíín Kriisitoo yii u-Dindaan ní? Di sá u bí yii:

⁴⁴“ 'Ti-Dindaan tūkū m-Dindaan yii: Kāl m-ŋaŋgiil pú kí n̄n cí ŋyunti ŋun m dáá yānti á n̄n k̄n̄ ki tókó a-nannanliibi puee.’

⁴⁵“Mimmee, Dafiidi yaa ȳi Kriisitoo yii u-Dindaanee, mana ní u ḡt̄i ŋūn̄ kí n̄n sá u-naantiiu mun?”

⁴⁶Bi-kansikin ubō kaa ŋún ki kíí-u báà dinyōbumbaantiil. Kí yōoń ŋyunti gbantee ubō kaa ti mākān̄ kí bālfi-u tiba kí kp̄èè u-nyōkōn.

Maatiu 23

¹Niinee, Yeesu bí kunipaauee n̄ u-boonnooliibi yii:

²“Bimaradakaliibi n̄ Fariisab di bí ki dākà Mooisi marab.

³Mín̄ puee, ní n̄n ŋáam̄maan min bi dākà-nee ama ní taa f̄ōō b̄n̄ bi-ba bimbim, kun puee baa ŋáań tin bi dākà yii binib̄ n̄ n̄n ŋáańee.

⁴Bi nyānti marab bin nyim̄ kii awaŋgulee ní ki tūnti binib̄ ní kaa là kí dū bi-ŋambiki kí dááb̄ diwaŋgulee kí tūtuñ̄ binib̄.

⁵Bi péēŋáań bi-tuŋŋi kōkō binib̄ n̄ n̄n wāl̄-bi, ní ki mōt̄i wāant̄i igban in pu bi ŋmà Unimbōti bōti ki cáā fin̄ bi-ŋalii n̄ bi-yigbeeŋee, ní ki fōkōnti bi-bōkut̄iŋ gbeeŋbeeni binib̄ n̄ ká yii bi n̄óó Unimbōti páaa.

⁶Bi n̄eéń ki kàal̄ ikakaam̄onti diinabin n̄ nyōkōpu kakaai akpafidiin ni,

⁷ki n̄eéń bí n̄n j̄aam̄-bi binibin, ki n̄eéń bí n̄n ȳi-bi yii: 'Ukpil, ukpil.’

⁸Ama nimbi n̄ taa yānti bí n̄n ȳi-ni bikpilib, kun puee ni cáá ukpibaanti ní, ní ni-kōkō sá nnabiyaamu.

⁹Ní taa yíín ubō kit̄iŋ pu yii ni-Baa, kun puee ni-Baa péēsá ubambaanti ní, ki bí yilpu.

¹⁰Ní taa yānti bí n̄n ȳi-ni bikpootiliibi, kun puee ubaanti di sá ni-kpootiliu: ùn̄ di sá Kriisitoo.

11 Un gíìh u-ba ni-tòntònlíuee di dāa sá ukpaan ni-kansikin.

12 Un yaa yōh u-ba yilpuee bi dàá dāá sīntīh-u taapu, ní un yaa sīntīh u-ba taapuee, bi dàá dāá yòh-u yilpu.”

13 Yeesu bí yii: “Mbusu dō ki cí-ni, nimbi bimaradakaliibi nì Fariisab mpoonnyoondambi, kun puee ni pìntí binib Unimbōti beel punyōkō, naa làá kó ni-ba, ní kaa là bin bàà là kí kóee n kó.

[14 “Mbusu dō ki cí-ni, nimbi bimaradakaliibi nì Fariisab mpoonnyoondambi, kun puee ni fikì tin kōkō bikpiipoobi cááyee, ní ki mèé ḡwimmeem min yúntí fōḡḡee bí ká-ni. An pu ní Unimbōti dàá dāá dáal ni-tafaliḡ tikpil.]

15 “Mbusu dō ki cí-ni, nimbi bimaradakaliibi nì Fariisab mpoonnyoondambi, kun puee ni yíìh tīḡkub nì kitiḡ jaḡḡi kōkō pu ki nyàab un dàá kpántí ni-boonnoolíuee ní ni yaa ḡúh ki yāntì u kpántì u-bee, ní ní yāntì ú kpántì un dàá dāá kó ditafadaaldínee mili pu ki jítiḡ nimbi.

16 “Mbusu dō ki cí-ni, nimbi bijōfub bin kpòotī binibee, kun puee ni lì yii: 'Unil yaa pūti Kunimbōtidíyee an kaa sá tiba, ama un yaa pūti sindaariya un bí Kunimbōtidíinee, ú ḡá min u pūtèe.'

17 Bijōfugbaambi! Ba di páb ní? Sindaariyaaa Kunimbōtidii kun yāntì sindariyee kpántì circiree?

18 Ni tí lì yii: 'Unil yaa pūti nsaraafanee, an kaa sá tiba, ama un di yaa pūti saraa un pá nsaraafan puee, ú ḡá min u pūtèe.'

19 Bijōfub, tilati di páb ní? Saraayaaa nsaraafan ḡun pu saraayee pá ki kpántì circiree ní?

20 Un di yaa pūti nsaraafanee, pūti ki kpáan tin kōkō pá nsaraafan puee dee.

21 Un di yaa pūti Kunimbōtidíyee, pūti Unimbōti un kòd kudii gbantínee dee.

22 Un yaa pūti kutaayee, pūti Unimbōti beejal nì Unimbōti un kā di-puee dee.

23 “Mbusu dō ki cí-ni, nimbi bimaradakaliibi nì Fariisab mpoonnyoondambi, kun puee ni pá tikḡfaal tin kōkō ni kùee saalaa kamaa pu kubō kubō, ama ní ki yíití, kaa nóó marab bin bōti pábee, an dàkà yii: á nīn cáá ibaamōn, kí nīn sūn binib saai kí nīn yú deede, tin bàà máan ní ḡee dee, ní kí nín dū tin kínee kí páan boon.

24 Bijōfub bin kpòotī binibee! Ni jákà ki lèekī inaacib ni-nyōkaatin, ama ní ki nátí igutaamu.

25 “Mbusu dō ki cí-ni, nimbi bimaradakaliibi nì Fariisab mpoonnyoondambi, kun puee ni fíntí tiyuti nì asambil boon, ama ní ni-naayutuḡḡi nì ni nín kaa ḡūn kí cúú ni-ba puee gbí poon.

26 Fariisab bijōfub! Ní péé kí fíntímaan kuyuu poon, ní boon mun n kápáá nyā.

27“Mbusu d5 ki cí-ni, nimbi bimaradakaliibi nì Fariisab mpoonnyoondambi, kun puee ni náán nì akaakul ñin bi píil boonee, ñi ñāñ nnimikpee, ama ní ñi-poonee anikpil sūū ní akpab gbí ñi-ni.

28Mín ní ni mun bí. Binib wāl-ni ñgban puee yii ni sá deeededambi ama mpoonnyoon nì ikpiti gbí ni-poon.”

29“Mbusu d5 ki cí-ni nimbi bimaradakaliibi nì Fariisab mpoonnyoondambi, kun puee ni māā Unimbōti bōnaatiliibi akaakumōnti ní ki nyāántí bin yúl deedeeyee kaakuliñ,

30ní ki lì yii: 'Ti yaa bàà nìn bímaan ti-naanjab yuntiñu, taa bàà nìn kúti bi-pu bí kpò Unimbōti bōnaatiliibi gbanti.'

31Mín ní ni bí lèekī ni-ba pu seera yii ni sá bin kūū Unimbōti bōnaatiliibee naantiibi.

32Mim mee, púntímaan ni-naanjab nín nìn kí ditundi diñyee!

33Nimbi bin tū kii ikoowaatee! Mana ní ni dākafī yii ni ñūñ kí ñmátí kí taa kó ditafadaaldi lañki?

34An puee, ní pīlfímaan: M dàá tōñ ni-cee Unimbōti bōnaatiliibi nì biciñfitiibi nì bidakaliibi, ni dāá kpò biba, kí kpáá biba idōpuntikaa pu, kí gbá biba anaalab ni-kpafidiññin, kí já biba bí pótóti ntimu ni dī ki sàantí-bi.

35An puee nnikpaakoon tafadaaldi dàá dāá líti ni-pu, deedee nib bin kòkò ni kūūyee pu, kí yòñ ñyunti ñun bi nìn kūū Abeelee kí tin sāā ñyunti ñun bi kūū Sakari Baaraasii jipōon Kunimbōtidii nì nsaraafan kansikinee.

36Ibaamōn ní m tükù-ni, nnikpaakoonee tafadaaldi dàá dāá líti nimbi waanee nib pu ní.”

37“Jeerusaleem yab, Jeerusaleem yab, nimbi di kù Unimbōti bōnaatiliibi ní ki cáá atañkpee ki yāñkí ki kù bin Unimbōti túnní ni-ceedee! Miña pu ní maa mākañ kí bàà kóon ni-kòkò kí kpāfi m-cee kii ukonaati nín kōntí u-biyaamu u-taapu puee? Ama ní ni yî.

38Too, kəñkənee Unimbōti dàá fá ni nì ni-diiku.

39M tükù-ni yii, kí yòñ dín kí nīn cée, naa làá ti ká-mi kí nīn cí ñyunti ñun ni dàá dāá sòon m-pu yii: 'Unimbōti ñ biñ un dòon ti-Dindaan yindi puee.' ”

Maatiu 24

1Ñyunti ñun Yeesu nyán Kunimbōtidiin ki cée, ní u-boonnooliibi sùtìñ ki pīl-u ní ki bí yii ú kpèè bi nín baasii mán Kunimbōtidii puee.

2Ní u bí-bi yii: “Kee ni ká kòkò neeyaa! Ibaamōn ní m tükù-ni, ditañkpal diba kaa làá dāá nīn gítí tókó di-juti pu, an kòkò dàá dāá wī ní.”

3Yeesu cūti ki kāl Oliifi sufii jool pu, ní u-boonnooliibi dómíñ ki ká-u bi-ñmaniñma ní ki bālfí-u yii: “Tükù-ti ñyunti ñun tin a bàà lēe dàá dāá bānee, nì kudaanñu kun dàá dāá dākà-ti ñyunti ñun a dàá gítínee nì ñyunti ñun duulnya mun dàá kúntée.”

- ⁴Niinee ní Yeesu kíí-bi yii: “Ní nīn nyín ni-ba ubó n̄ taa ḡmàtìh-ni,
- ⁵kun puee binib tikpil dàá dā́ dū man yindi kí kpántí bi-yaḡ kí lì yii bín di sá 'Kriisitoo' ní ki dàá dā́ kīl binib tikpil.
- ⁶Ni dàá dā́ gbīl bi sòh̄n tijáti tin bi bī jáyee n̄ tin gítí bí ki dōónee b̄oti ama, ní nīn nyín ni-ba ni-p̄obilij̄ n̄ taa bīl. An máah̄n t̄h̄ k̄ok̄o n̄ b̄ah̄n, ama niin kaa dá láá sá duulnya kúntitam.
- ⁷Ditimbundi diba dā́ yíkí kí jáh̄n diba, ní dibeel diba yab mun n̄ jáh̄n diba; ní ḡkùm dàá dā́ nyā, kitiḡ dàá dā́ c̄iḡki ajan kupaau.
- ⁸T̄h̄n k̄ok̄oee dā́ sá kii imatiḡween n̄n kífí puee ní.
- ⁹“Binib dàá dā́ cúú-ni kí t̄i bí s̄aah̄n-ni ní kí kpò-ni. Atimbun k̄ok̄o nib dàá dā́ nīn ná-ni ni n̄n f̄ōō man ki kíyee pu.
- ¹⁰Dyunti gbantee binib tikpil dàá dā́ fá bi-fookiū un bi cáá man puee, kí nīn kíh̄n ki nyáfí t̄ob ki ná t̄ob.
- ¹¹Bin ȳh̄ bi-ba yii Unimb̄oti b̄onaatiliibi kaa s̄ee dàá dā́ dā́ah̄n kí ḡmàtìh̄ binib tikpil mun.
- ¹²Tikpitiil dàá dā́ w̄īh̄n, an puee, binib tikpil neendi dàá dā́ s̄oḡki.
- ¹³Ama un di yaa p̄óh̄n mm̄ontiimin ki tin k̄at̄i-kuee di dā́ ḡm̄atí.
- ¹⁴Bi dā́ s̄oḡn Unimb̄oti beel b̄om̄ontiiti nee kitiḡ jaḡḡi k̄ok̄o pai, án nīn sá seera kí t̄i atimbun k̄ok̄o kí w̄aāt̄i ní duulnya n̄ n̄n kúntí.”
- ¹⁵“Ni dàá ká kuwaḡkpitiu kun c̄āb̄ih̄n n̄timbiilee, kun pu Unimb̄oti b̄onaatiliu Daniyeel n̄n s̄oónee sí Kunimb̄otidiin. (Un k̄aah̄n tib̄oti neeyee n̄ gbīl ti-taapu.)
- ¹⁶Dyunti gbantee, Juudee tiḡki yab n̄ nīn s̄áh̄n ki d̄àb̄ ajoin.
- ¹⁷Un yaa láā bí dicindee^fc^ n̄ taa lì yii u dàá kpákatí kí kó kudiin kí yòoh̄n tiba,
- ¹⁸ní un yaa láā bí kusaauee n̄ taa lì yii u dàá ḡit̄ih̄n mm̄oḡki kí yòoh̄n u-b̄okutil.
- ¹⁹Ama falaa d̄ō ki cí bip̄odambi n̄ bimatiḡ iwiin gbanti poon!
- ²⁰Mèèmaan Unimb̄oti an b̄otee n̄ taa b̄ah̄n-ni kuseeun, kí taa n̄n sá ḡwiḡḡuḡfikaa dal,
- ²¹kun puee doooo duulnya n̄n k̄il̄ih̄n ki dā́ s̄ā́ an yuntiḡuee, an niminaamandee juti kaa láá cúú binib, ki kpá kí ḡit̄í cúú-bi mun.
- ²²Unimb̄oti yaa kaa bàà b̄at̄i falaayee wiini pu, unibaanti kaa bàà ḡm̄atí. Ama binib bin u l̄ut̄i bi sá u-yabee pu, ní u b̄at̄i iwiin gbanti pu.
- ²³“Dyunti gbantee, ubó yaa t̄uk̄ū-ni yii: 'Kriisitoo bí doo,' àà 'U b̄ih̄n lapu,' ní taa f̄ōō kí kíí.

²⁴Di sá yii, bin dàá dāá mōntì yii bìn di sá Kriisitooyee nì bin dàá mōntì yii bi sá Unimbōti bōnaatiliibee, dàá dāá nyā ki ḡaañ tikpaṅkpantiil nì maamaaci tuuṅṅi ki nyàab bi yaa ṅūn kí ḡmàtìn bin Unimbōti lútèe gba.

²⁵M tükū-ni ki yóon dee.

²⁶“Mín puee bi yaa láā tükū-ni yii, m dómiñ ki bí kupōonee, taa cùmaan. Bi yaa láā tí bí-ni yii, m bí dilōnlōkōlin kudiinaaan, taa fōō kí kíímaan.

²⁷Kii utaa nín ḡmóò pu nyàlab báà ḡma wālee, kí kiliñ ḡwiin nín nyēēpuee kí cáá sāa ḡu nín jēetì puee, mín ní man Kinibiki dāantam dāa bí.

²⁸Laakin diwaṅkpil yaa dōee, niin ní kaajiikub kpáfí.”

²⁹Ní Yeesu ḡtí lī yii: “Diniminaamandee yaa jíti kpalaayee, ḡwiin dāa kpánti dibōmbōndi, uḡmal mun kaa dāa ḡtí pīn, iḡmalbijaa dāa kitīn kutaa pu ki lítiñ, ní ipōn in bí kutaa puee n cìḡkì.

³⁰Niinee ní man Kinibiki daaṅku n nyā kí páanní kutagbōḡu pu, ní duulnya timbuliḡ kōkō n dāa fōō itiminsi, ní kí ká man Kinibiki n páanní yilpu atagban ni nì mpōn nì tinyool.

³¹Dikantāndi dāa bñn mpōn, ní m tō m-tūuni kitiḡ jaṅḡi kōkō kí tin sāa kutagbōḡu nì kitiḡ kuntinyōkō, bí kpāfi bin Unimbōti lútèe.”

³²“Pīlfimaan fiigi subu nín dākà-ti tiḡyee. Di sá yii, ni yaa ká fiigi subu tó apan ki bí tükù tifaapōnee, ni bēetì yii kuseeu tōobiñ dee.

³³Mín mbaantiim, ni yaa láā ká tin m máafi nee bí jītée, béémaan yii m-dāantam tōobiñ, m sùti ki piliñ kipunyōkō dee.

³⁴Ibaamōn ní m tükù-ni, waanee nib kōkō kaa làá kpú kí dōó ní an bōtee kōkō n bān.

³⁵Kutagbōḡu nì kitiḡ dāa bí kí kúntí, ama man bōti kaa bí kí kúntí jaanjaan.”

³⁶“Báà ubō kaa nyí ḡwiin nì kukuluu kun ni an bōti dàá bānee. Unimbōti tūuni in bí yilpuee kaa nyí, man u-Jipōon gba kaa nyí, see m-Baa Unimbōti baba di nyí.

³⁷Tin nín jíti Noowee yuntiḡuee, man Kinibiki yaa láā dàá dāaṅee, mín mbaantiim di dàá tí jíti.

³⁸Kí wàatī nnyingbeen n bānee, binib nín jīn ki nyù, ní ki cāab binimpoobi ki cáá bi-bisalib ki pūn ticati, ali Noowee dāa kpāā kó buḡalimbun,

³⁹ní baa kpāā bēè kun dō ki cí-bee ní nnyingbeen dómiñ ki yōon bi-kōkō. Mín mbaantiim ní man Kinibiki yaa làá dāa dāaṅee an dàá ḡá.

⁴⁰Bininjab bili dāa gbāa kusaaun ki kù, ní m yōon ubō kí yàntī un kínee.

⁴¹Binimpoobi bili mun dāa gbāa kunaau pu ki nà, ní m yōon ubō kí yàntī un kínee.

⁴²An puee, ní taa níñ ḡèmmaan, kun puee naa nyí ḡwiin ḡun ní ni-Dindaan dàá fātí ḡtínee.

⁴³Níñ nyímaan tiñan yii, kudiidaan yaa bàà nyí kukuluu kun unaayuu dàá dāāñ kunyeeu u-diikunee, waa bàà gèèñ kí yàntī unaayuu n̄ cíí u-diiku.

⁴⁴Míñ puee, ni mun bóntímaan kí n̄n cí, kun puee man Kinibiki dàá dāāñ kukuluu kun naa dākafī yii m dàá dāāñee ní.”

⁴⁵“Dma di sá utóntónli un bí deedee ki cáá iciinee, ní u-kpiliu dū u-tóntónjutiibi ki ñúbiñ-u ú n̄n tìi-bi tijin ñyunti ñun máaà ù n̄n tìi-bee?

⁴⁶An sá mm̄on ki tī utóntónli gbanti u-kpiliu yaa láā fātii bàñ ki ká-u, u bī tūn an tundee.

⁴⁷Ibaam̄on ní m tükù-ni, ukpilee dù u-gaajawanti kòkò ní kí kūtì kí ñúbiñ utóntónlee.

⁴⁸Ama utóntónlee yaa sá unikpitee, u dàá dākafī yii: 'M-kpiliu kaa láá yàkañ digitindi,'

⁴⁹ní kí kíí ki gbàà u-tóntónjutiibi ní u n̄ bidanyògbiliibi bí ki jīn ki nyù,

⁵⁰ní u-kpiliu n̄ dāá dūú túuñ-u ñwiin n̄ kukuluu kun pu waa nyí yii u dàá bàñee,

⁵¹ní kí dáal u-tafal ñkpitim pu, kí pà-u mpoonnyoondambi paati. Niin ní u dàá s̄o ní u-nyìñji n̄ n̄n gà tób kàkaka.”

Maatiu 25

¹“Unimb̄oti beel náaà n̄ kii bisap̄ombi saalaa biba bin yòon bi-fitilab ki búnti kí tūñkìñ unimpucan calee ní.

²Bi-kansikinee biñmoo sá bigbaambi ní biñmoo sá biciñfitiibi.

³Bigbaambee yòon bi-fitilab, kaa ñúb ñkpam ansañkiya pu,

⁴ama bin bin sá biciñfitiibee yòon bi-fitilab ní ki gítī kpíí ñkpam miba ansañkiya pu.

⁵Unimpucan cal nín kaa bī bàñ malaayee ní ñgeem cúú bisap̄ombee kòkò, ní bi gèèñ.

⁶“Kunyataasiiu búmbumee, ní bi téen yii: 'Kpèèmaan unimpucan cal dee! Cù kí tūñkìmaan-u!’

⁷Niinee ní bisap̄ombi saalaayee kòkò fīnti ki bī ñáñkí bi-fitilab.

⁸Ní bisap̄ongbaambee bí bin cáá iciinee yii: 'Pōmaan-ti ni-kpamaa! Timbi fitilab bī kúù.’

⁹Ní bin cáá iciinee bí-bi yii, 'Aayee, min bí timbi cee nee kaa láá bà kí kpáaà ni mun. Pūti níñ cámaan bin nyáfée cee kí dāmaan.’

¹⁰Dyunti ñun bi búnti kí dā ñkpamee, ní unimpucan cal bāaà, bin bóntèe n̄s̄o-u ki kó kunimpucandiin, ní bi dū kipunyòkò ki pīñ.

¹¹Boonee, bisap̄ombi bin kínee mun dūu bāaà ki bī yī yii: 'Ukpil, ukpileeee, pīitī-ti!’

¹²Ní u kíí-bi yii: 'Ibaam̄on ní m tükù-ni, maa nyí-ni.' “

- 13Ní Yeesu gítī lī yii: “Taa nín gèemmaan kun puee naa nyí ñwiin, kaa nyí kukuluu kun m dàá dàá gítínee.”
- 14“Unimbōti beel dāa bí kii Uninja ubo nín dàá cù nsan ki yíín u-tòntòntliibi ki dū u-gaajawanti ki ñúbiñ-bi puee ní.
- 15U dū nnimifōmu muḡmoo ki tī ubo, ní ki dū nnimifōmu muli ki tī ubo, ní ki dū kinimifōḡ kiba ki tī utataati: u péētī báà ḡma nì u-pōḡḡ nyokom, ní ki búntì nsan.
- 16Dicilpu niinee, un fōō nnimifōmu muḡmooyee kpáàá búntì dibàntil ní ki ká nnimifōmu muḡmoo ki kútì muḡmoo mun bi tī-uee pu.
- 17Mín ní un fōō nnimifōmu mulee mun kánní muli ki kútì mun bi tī-uee pu.
- 18Ama ní un fōō kiba jee cūti ki gbìñ mboo ki dū u-kpiliu nimiliḡ ki bál.
- 19“Uninjee búntèe, ki yúntín tikpil. U dāa fātì báañee ní ki yíín u-tòntòntliibi bí tükù-u bi nín dū animil ki ḡá kuḡyee.
- 20Ní un nìn fōō nnimifōmu muḡmooyee sútín ki bí yii: 'Ukpil, a nìn tī-mi nnimifōmu muḡmoo, ní m dūu bāntì ki ká muḡmoo ki kútì, an sèé.'
- 21Ní u-kpiliu bí-u yii: 'An ḡāñ, a sá utòntòmmonti ki bí deede. A nín ḡúb tin kaa náañee deedeeyee, m dàá kàañ-si á nìn kpèé tiwan tikpil. Kó man a-kpiliu mōḡḡun!'
- 22Ní utòntòntli un mun fōō nnimifōmu mulee dómín ki bí yii: 'Ukpil, a nìn tī-mi nnimifōmu muli, ní m dūu bāntì ki ká nnimifōmu muli ki kútì, an sèé!'
- 23Ní u-kpiliu bí-u yii: 'An ḡāñ, a sá utòntòmmonti ki bí deede. A nín ḡúb tin kaa náañee deedeeyee m dàá kàañ-si á nìn kpèé tiwan tikpil. Kó man a-kpiliu mōḡḡun!'
- 24Ní un fōō kinimifōḡ kiba jee mun sútín ki bí yii: 'Ukpil, m nyí yii a sá unil un bōti pōōyee, laakin saa yāañ iwamboolee niin ní a dāa cēē, ní laakin saa gbán ki bílee niin ní a fà.
- 25An puee m fāḡki, ní ki cáá a-nimiliḡ ki gbìñ kitiḡ ki dūu bál, kpèè, a-wanti sèé!'
- 26Niinee ní u-kpiliu kí-u yii: 'Utòntōḡkpiti, uwutijoodaan ní a sá! A nín nyí yii laakin maa yāañee ní m dāa cēē, ní laakin maa gbán ki bílee niin ní m fèe,
- 27ba pu ní saa dū m-nimiliḡ ki ḡá-mi baḡkan? M bàà bāñ nee ní kí fōō m-nimijaliḡ nì ipaati,'
- 28ní ki bí yii: 'Fōōmaan u-nimifōḡki kí dūú kūtì un cáá nnimifōmu saalaayee.
- 29Di sá yii un kamaa yaa ḡúb tin u cááyee tiḡanee bi dāa kútì-u, ní ú nìn bí digbílín; ama un kamaa yaa kaa ḡúb tin u cááyee tiḡanee, bi dāa fòól fiii un u cááyee.
- 30Ama an yaa kíñ utòntòntli un kaa bí tibanee, cúumaan-u kí tō mmōḡki dibombòndin! Niin ní u dàá nìn sūñ, u-nyìḡḡi n nìn gá tōb kàkaka.' “
- 31“Man Kinibiki yaa láá dómín kii ubōtee nì Unimbōti tūuni kòkòee, m dàá dàá kāl m-beejal pu nì tinyool,

³²ní duulnya timbuliŋ kəkə dāa kpáfí m-nimiin ní m̀ gántí-bi kii uwaŋkpaal nín gántí ipii nì iŋoobu puee,

³³ní kí dū ipii kí yóoŋ m-ŋaŋgiil pú, ní kí dū iŋoobu kí yóoŋ m-ŋaŋgan pú.

³⁴Niinee ní man ubotí n̄ bí bin bí m-ŋaŋgiil púee, yii: 'Dāaŋmaan, nimbi bin pu m-Baa bīnee, kí f̄oŋmaan dibeel din u bóntì ki yóoŋ-ni doooo duulnya kíltamee.

³⁵Di sá ŋkùm n̄n cúú-mi ní ni tī-mi tijin m jíń; nnyinyoo n̄n cáá-mi ní ni pú-mi nnyim m nyūñ; m n̄n sá unicaan ní ni f̄oŋ-mi;

³⁶maa n̄n cáá tiba kí p̄eñ ní ni pú-mi tiwan m p̄eñ; m n̄n b̄ñ ní ni kp̄ē-mi; m n̄n bí sarkan ní ni dómín ki m̄ntì m-pu.'

³⁷Niinee ní bin yúl̄ n̄ Unimboti deedeeyee n̄ dāa ḱí-mi yii: 'Ti-Dindaan, ba dal ní ti n̄n ká-si ŋkùm cáá-si ní ti tī-si tijin a jíń, àa nnyinyoo cáá-si ní ti tī-si nnyim a nyūñ ní?

³⁸Ba dal ní ti n̄n ká-si a sá unicaan ní ti f̄oŋ-si, àa aa cáá tiba kí p̄eñ ní ti tī-si tiwan a p̄eñ ní?

³⁹Ba dal ní ti ká-si a b̄ñ, àa a bí sarkan ní ti cūti ki m̄ntì a-pu?'

⁴⁰Ní man ubotí n̄ dāa ḱí-bi yii: 'Ibaam̄n ní m t̄kù-ni yii, ni nín péēŋá min ki tī bin sá ŋwaamu m-naalib nee kansikinee, man ní ni ŋá ki tī.' "

⁴¹"Mín boonee ní m̀ f̄atí ḱí t̄kù bin yú m-ŋaŋgan púee yii: 'Sútímaan niin ḱí w̄atí-mi, mbusudambi! Nín cámaan ŋŋmi ŋun dàa n̄n w̄u jaanjaanee ni, ŋun bóntì ki yóoŋ Sitaan n̄n u-tūniee!

⁴²Di sá yii ŋkùm n̄n cáá-mi naa pú-mi tijin m jíń; ní nnyinyoo n̄n cáá-mi, naa pú-mi nnyim m nyūñ.

⁴³M n̄n sá unicaan, naa f̄oŋ-mi; maa n̄n cáá tiba kí p̄eñ, naa tī-mi tiwan m p̄eñ; m n̄n b̄ñ, naa kp̄ē-mi; m n̄n bí sarkan, naa dómín ki m̄ntì m-pu!'

⁴⁴Niinee ní bí ḱí-mi yii: 'Ti-Dindaan, ba dal ní ti n̄n ká-si ŋkùm n̄n nnyinyoo cáá-si, àa a sá unicaan, àa aa cáá tiba kí p̄eñ, àa a b̄ñ, àa a bí sarkan, ní taa tútuñ-si?'

⁴⁵Ní man ubotí n̄ dāa ḱí-bi yii: 'Ibaam̄n ní m t̄kù-ni, ni nín kaa ŋá min ki tī ŋwaamu nee kansikin kibe, man ní naa ŋá ki tī.'

⁴⁶Ní bí dāa dū-bi ḱí t̄o ditafadaaldi din kaa cáá dikuntilee ni, ní bin yúl̄ n̄ Unimboti deedeeyee n̄ n̄n cá dimaŋfal din kaa cáá dikuntilee ni."

Maatiu 26

¹Yeesu s̄oñ an b̄tee ki d̄òyee, ní ki bí u-boonooliibi yii:

²"Kee, ni nyí yii an kíñ iwiin ili dee tí j̄ apibil j̄ŋaaliu un ti j̄ñ ki t̄etí Unimboti n̄n n̄n f̄i ti-naanjab pueeyaa! Niin ní bi dàa dū man Kinibiki ḱí ŋubiñ m-nannanliibi bí kp̄áa-mi nd̄puntikaa pu."

- ³Ní bisaraanǎkpilib nì Juuda yab kpilib kpáfi usaraanǎkpil un bi yìi Kaayifée naakookun,
- ⁴ki sòon ki bónti kí cúú Yeesu dibalin kí kpò-u.
- ⁵Ama ní ki lī yii: “Án taa níñ sá jijaalin, an nín dàá ǎ́ pu samaa ń taa láá yìkì kí ján-tee.”
- ⁶Yeesu nín nìn bí Beetanii, Siimòn un nìn sá unyanǎgbantee dumpuee,
- ⁷ní unimpu ubo sùtín ki pìl̄-u ki ǎ́bìí talaalumónti un p̄s̄ kudaau tikpilee, an k̄a ditaǎkpil kpalbanyaunun.^{^fd^} Dyunti ǎ́un Yeesu k̄a ki j̄n̄ tijinee, ní u kpáati talaalúee ki s̄tì Yeesu yil pu.
- ⁸Yeesu boonooliibi nín ká mimmee, an kaa móokì-n̄-bi, ní bi bí yii: “Ba pu ní bi bíi talaalumónti nee mìn?”
- ⁹Bi bàà ǎ́un kí nyāfi-u animikpaan kí dūú yàkatì biwǎfibaa!”
- ¹⁰Yeesu gbìl̄ bi nín bí ki sòon tiǎyee, ní u bí lìn-bi yii: “Ba pu ní ni páb unimpu nee mìn? An sá ditummóntiil ní u ǎ́ ki t̄i-mi.
- ¹¹Kun puee ni nì biwǎfib di dàá n̄n péēbí baabadal, ama man kaa làá n̄n bí ni-cee baabadal.
- ¹²U nín yān̄ talaalu nee m-wunti puee, u bónti-tì ki s̄iìn m-s̄bitam dee.
- ¹³Ibaamòn ní m tükù-ni, duulnya jaǎǎi k̄ok̄o, laakin ní bi dāa sòon tibómóntiil neeyee, bi dàá dāa sòon unimpu nee nín ǎ́ min nee kí n̄n t̄etì u-pu.”
- ¹⁴Ní akpambal saalaa nì alee kansikin un bi ȳi Juudasi Iskaariyotee cūti ki ká bisaraanǎkpilib,
- ¹⁵ní ki bí-bi yii: “Ni dàá t̄i-mi ba ní m̄ nyàab̄ nsan ǎ́un ni dàá d̄i kí cúú Yeesuee?” Ní bi k̄aān̄ animil j̄tombi mmun̄ku nì saalaa ki t̄i-u.
- ¹⁶Dyunti gbantee ní Juudasi kíí ki nyàab̄ nsan kí dū Yeesu kí ǎ́bì-n̄-bi.
- ¹⁷Jijaal un bi ǎ́mód̄ kp̄on̄ob̄ bin baa ǎ́ kp̄on̄o nȳok̄on̄u ǎ́n̄ j̄m̄nee wimpeepeekaǎyee, Yeesu boonooliibi dóm̄in̄ ki b̄alfi-u yii: “La ní a là tí bóntì-si apibil jijaaliu jinti ní?”
- ¹⁸Niinee ní u bí-bi yii, cùmaan kitin̄in̄ ǎ́m̄on̄m̄ok̄o dumpu kí tükù-u yii: “Ukpil bí yii: ‘M-yuntiǎu b̄aān̄ m̄ kpú, sii cee ní man nì m-boonooliibi dàá j̄i apibil jijaaliu.’ “
- ¹⁹Ní bi ǎ́ kíí Yeesu nín tükū-bi puee, ki bónti jijaalee.
- ²⁰Kujoou j̄ot̄ee, bi nì u k̄al̄ ki bí j̄n̄ tijin.
- ²¹Bi bí j̄nee, ní u bí-bi yii: “Ibaamòn ní m sòon, ni-kansikin ubo dàá dū-mi kí t̄i m-nannanliibi.”
- ²²Niinee kunimbaau kó-bi ní bi kíí ki bí b̄alfi-u ubo ubo yii: “Ukpil, kee an kaa sá mamaa?”

- 23**Ní Yeesu kíí-bi yii: “An sá man nì un jīn disambibaantiilinee di dàá dū-mi kí núbìn m-nannanliibi.
- 24**Man Kinibiki cá kí kpú ní nee, kii an nín ηmān m-pu ki yóon miñyee, ama mbusu dō ki cí un dàá dū-mi kí nyāfiñ m-nannanliibee! Bi yaa kaa bàà màl̄ udaan, an bàà só.”
- 25**Ní Juudasi un bī cáá-u ki nyáfée bālfī-u yii: “Ukpil, man di dàá dū-si kí tīii?” Ní Yeesu kíí-u yii: “Iiin.”
- 26**Dyunti ηun bi bí ki jīnee, ní Yeesu yōon kpōnō ki pākā Unimbōti, ní ki cúū gífi ki yākatī ki tī-bi, ní ki bí-bi yii: “Fōō kí ηmómaan! An di sá m-wunti.”
- 27**Ní ki tí yōon ndamam ní ki jáam Unimbōti mi-pu, ní ki dūu tī-bi, ní ki bí-bi yii: “Ní kōkō fōō kí nyòmaan!
- 28**An di sá m-fatikuu un nyán ki cáan mpée Unimbōti nì binib tikpil kansikin bí ká bi-kpitii pōtamee.
- 29**Ibaamōn ní m tükù-ni, m péēgītī kpá kí nyò ndaam nee kí nīn cí dalin kin man nì ni dàá dāá gītī kpāfi kí nyò ndaam min sá mpōmee m-Baa beelinee.”
- 30**Dyunti ηun bi gāa jījaal lani ki dóoyee, ní bi nyán ki búnti Oliifi sufii jool pu.
- 31**Niinee, Yeesu bí u-boonnooliibi yii: “Bi nín dàá ηá-mi puee dàá yàntī ni-kōkō n fá-mi kunyeeu nee gba, kii Unimbōti takaldau nín sōon ki síin puee yii: ‘M dàá kpō upikpaal ní ipii n yāl.’
- 32**Ama m yaa láā fikitèe, m dàá lintī kí cùú cītī-ni Gaaliilee”
- 33**Ní Piyeer kíí-u yii: “Báà bi-kōkō yaa féen-si, man kpá kí fá-si jaanjaan!”
- 34**Ní Yeesu bí-u yii: “Ibaamōn ní m tükù-si, dín nyeeeku gba, kí wātī ukol n bāakèe, a dàá néé mita ní yii saa nyí-mi.”
- 35**Ní Piyeer kíí-u yii: “Báà an yaa sá-mi ηkúm man nì si dàá kpú, man kpá kí néé yii maa nyí-si!” Ní u-boonnooliibi bin kōkō kínee mun kíí mín.
- 36**Niinee ní Yeesu nì u-boonnooliibi bàñ laakin bi yī Geetiseemane, ní u bí-bi yii: “Kālmaan doo, man dàá cù nyōkōpu doo kí mèè.”
- 37**Ní u kpáan Piyeer nì Seebeede jipōmbi liitil. Niinee, u kíí ki kpáaā bī gbìl diniminaamandì nì kunimbaau pu,
- 38**ní ki bí-bi yii: “Kunimbaau kó-mi tikpil, ki cáñ-mi ηkúmin! Nīn kāmaan doo kí nīn wāl kí taa gèen!”
- 39**Ní Yeesu sūtī nyōkōpu fīi ní ki líti dicincibil ní ki bī mèé yii: “M-Baa, falaanyōkaa nee yaan ηūn kí kàkatī kí wātī-mi! Ama, min sii lèe nín ηá án taa ηá min man lèe.”
- 40**Ní u fātī gītīn u-boonnooliibi bitee cee ki ká bi dō ki gèen, ní u bí Piyeer yii: “Naa kpáaā ηūn man nì ni n kāl kukubambaantiiu kpankpan ní taa gèènaan?”

- 41 Fintīmaan kí nīn mēé, an nín dàá ḡá pu ni yaa kó icṛḡkinee ní taa lítéé, unil bàà cáá nlandṛkṛmṛnti, ama ní ki bí iwṛfin.”
- 42 Ní Yeesu fātii tí nín ḡítí nliitiim ki tí mēēyii: “M-Baa, an yaa sá yii m yaa kaa nyūñ falaa nee waa ḡūñ kí jītée, a nín là puee ní ḡá!”
- 43 Ní u fātii tí nín ḡítín ki bāánee, bi tí dṛ ki ḡeēñ, kun puee ḡgeem nīn cáá-bi tikpil.
- 44 Ní u ḡítí tí yānti-bi ki fātii nín ḡítí ntataatiim, ki tí mēēki būsì tibṛbaantiil.
- 45 Mīñ boonee u fātii nín ḡítín u-boonnooliibi cee, ní ki bí-bi yii: “Ni dṛ ki ḡeēñ ki ḡḡfāa! Kpèè, kukuluu kun bi dàá dū man Kinibiki kí nyāfīñ binikpitibee bāañ ní nee.
- 46 Yīkì, tí nīn cámaan! Un dàá dū-mi kí nyāfèe di bāañ nee!”
- 47 Yeesu kaa láá sṛṛñ ki ḡmíl, ní u-kpambaliḡ saalaa nì alee kansikin un bi yī Juudasee bāañ u nì kunipaau nṛṛñ ki ḡúbíñ njimu nì atambṛn; bisaraḡakpilib nì Juuda yab kpilib di nīn túnní-bi.
- 48 Úñ un dàá dū Yeesu kí nyāfèe nīn tīñ-bi kudaḡḡu, yii: “Un m yaa tin jáam ki kpālèe, un ni nyāabee dee, ní cúú-u!”
- 49 U tin péèlì yii u bānee, u sūtì ki pīl Yeesu, ki bí-u yii: “Ukpil, a-jooku!” ní ki kpāl-u.
- 50 Ní Yeesu bí-u yii: “M-bṛṛ, ḡá tin pú a dṛmīnee!” Niinee ní binibee dṛmīñ ki cúú Yeesu.
- 51 Bin nīn bí Yeesu ceeyee kansikin ubṛ fṛfì u-jiki ní ki ḡā ki wúkutì usaraḡakpil tṛntṛnliu tafal.
- 52 Ní Yeesu bí-u yii: “ḡíñ a-jiki kí fúuñ kujitooun, kun puee bin kṛkṛ yaa yṛṛñ njimuee njimu di dàá dāá kpṛ bidambi.
- 53 A nyí yii maa ḡūñ kí yīñ m-Baa ḡ jṛṛñ-mi, ní ú tīñ-mi niin niin itūun kutukub kutukubaaa?
- 54 Ama, m yaa ḡá mimmee, mana ní Unimbṛti takaldau nín sṛṛñ ki síñ m-pu miḡyee dàá ḡmā kí ḡá?”
- 55 Niinee ní u fātii bí kunipaau ee yii: “M sá unikpiti naaan? Ba pu ní ni ḡúbíñ njimu nì atambṛn kí dāá cúú-mi! Baabadal m kàal Kunimbṛtidiin ki dākà, ba pu ní naa cúú-mi niin?”
- 56 Ama tin bí nee kṛkṛ bāañ, án ḡá kii Unimbṛti bṛnaatiliibi nín ḡmāñ ki síñ m-pu miḡyee.” Niinee ní u-boonnooliibi kṛkṛ sàñ ki fá-u.
- 57 Bin nīn cúú Yeesuee cáá-u ki cūnnì usaraḡakpil Kaayifi dumpu, niin ní bimaradakaliibi nì bikpilib nīn kpáfì.
- 58 Ní Piyeer táá Yeesu aboon aboon ki tin bāñ usaraḡakpil dumpu ki kāl u-tṛntṛnliibi cee kí kpèè an nín dàá kúntí miḡyee.

⁵⁹Bisaraanakpilib nì bibosoonliibi bin kòkò kínee bí nyàab un dàá ká nnyimòn ñubò kí sòòn u-pu bí ká nnaakpal kí kpò-uee.

⁶⁰Ama, nì min kòkò binib dómín kupaau ki cáan inyimòn seerab ki tún u-puee, báà ubò yòu kaa kāl. Boonee ní bili dómín ki bí yii:

⁶¹“Kijapaaí nee bí yii, ùn ñhùn kí wī Kunimbətidií kí fātī mā-ku iwiin ita.”

⁶²Niinee ní usaraanakpil yíkì ki bí Yeesu yii: “Binib nee nín bí ki sòòn a-pu miñyee, ba ñá ní saa kíikí ní?”

⁶³Ama ní Yeesu ñmí-bi fónfón. Ní usaraanakpil gítí bí-u yii: “Nì Unimbəti un bée ní m pūti ki tī-si, á tükù-ti a yaa sá Kriisitoo, ki sá Unimbəti Jipəon!”

⁶⁴Ní Yeesu kíí-u yii: “Mín ní a lī nee. Ama m tükù-ni yii, kí yòon kənkənee, ni dàá ká man Kinibiki ká mpòn kòkò daan ñaṅgiil pú, ki dàá dāá ká m nyánní yilpu atəṅban ni ki dòn”

⁶⁵Niinee, usaraanakpil dáal ki cáti u-bokutil kii bi-koobiliñ nín lī puee kí dákà yii an kaa mókiñ-u, ní ki bí yii: “U ñeèn nì Unimbəti ní! Ti gítí nyàab seeradambi kí ñá ba? Nimbi ni-ba, ni gbīl u nín ñeèn nì Unimbətee.

⁶⁶Ni ká yii ba?” Ní bi kíí-u yii: “U máan ñkúm ní!”

⁶⁷Niinee ní bi kíí ki tíl timətan ki sīt Yeesu nimiin ní ki gbáa-u aṅaṅkul, ní biba mun fátí-u itampa,

⁶⁸ki lì-u yii: “Sii Kriisitoo, sii un wálee, tükù-ti un di fáá-see!”

⁶⁹Dyunti ñun Piyeer ká dicindinee, usapəon ubò un bí niin ki tūn ditundee, sútín ki pīl Piyeer, ní ki bí-u yii: “A mun nín bí Yeesu Gaaliilee yəuee cee!”

⁷⁰Ní Piyeer néé báà ñma nimiin yii: “Maa nyí tibəti tin a sòòn nee.”

⁷¹U còom ki cá kipunyəkò watil púee, ní usapəon ubò mun gítí ká-u, ní ki tükū bin bí niinee yii: “Kijapaaí nee mun nín bí Yeesu Naasaareeti yəuee cee ní.”

⁷²Ní Piyeer gítí tí néé ki pūti yii: “Maa nyí uninja gbanti!”

⁷³An kúti fiiyee, bin bí niinee mun sútín u-cee ní ki bí-u yii: “A mun lafun sá binib bin nóó-uee kansikin ubò ní, a-sòontam dákà mín.”

⁷⁴Niinee ní u kín ki bí pūti ki títí yii: “Maa péenyí kijapaaí nee!” Kpalaayee, ní ukooja báakì.

⁷⁵Niinee ní Piyeer tétè dinyəəbundi din Yeesu bàà lī-uee, yii: “Kí wàatī ukəl n̄ bāakèe, a dàá néé ñfunyəm mita yii saa nyí-mi.” Ní u nyán ki bí sūn ki yálinjí.

Maatiu 27

¹Kutaafaau pòlpolee, bisaraanakpilib kòkò nì Juuda yab kpilib kpáfí ki sòon bi nín dāá dī nsan ñun pu ní kí kpò Yeesuee.

- ²Ní bi bóob-u ñhmii ki cáá-u ki ñúbiñ gōmina Piilati.
- ³Juudasi un nìn dū Yeesu ki nyáfèe nín ká yii bi dàá kpò Yeesuee, ní u-pòbil bíl tin u ñée pu, ní u cááñ animil jítōmbi mmuñku nì saalaayee ki gíiñ ki tī bisaraañakpilib nì Juuda yab kpilib,
- ⁴ní ki bí-bi yii: “M ñá ikpiti ní ki dū un kaa ñá tibe ki tī ní kpò!” Ní bín kíi-u yii: “An ká timbi la? Sii nì a-bōti dee!”
- ⁵Ní Juudasi dū animilee ki yāl Kunimbōtidiin, ní ki cūti lúnti u-ba ñhmii ki kpíi.
- ⁶Niinee bisaraañakpilib cūti ki tōō animilee, ní ki bí yii: “Ti-marau kaa pú-ti nsan tí dū an nimiliñee kí ñá Kunimbōtidii nimiliñ dakaauñ, kun puee an sá fatiku nimiliñ ní.”
- ⁷Ní bi sòñ ki gbilñ tōb, ní ki dū animilee ki dá uyōōmaati ubō saaku ki dūu ñá binicambi ceeku.
- ⁸An puee, bi yî kusaau gbanti yii “Fatiku saaku” ali nìn dín.
- ⁹An ñá kii Unimbōti bōnaatiliu Jeereemii nín nìn sòñ puee dee yii: “Ní bi fōō animil jítōmbi mmuñku nì saalaa ñin Israyeel yab nìn kíi yii bí pà u-puee,
- ¹⁰ní ki dū an nimiliñ ki dá uyōōmaati saaku, kii ti-Dindaan nín nìn tükū-mi puee.”
- ¹¹Bi cáá Yeesu gōmina nimiin, ní gōmina bālfī-u yii: “Sii di sá Juuda yab bōtiuaaa?” Ní Yeesu kíi-u yii “Mín ní a lī nee.”
- ¹²Ama, bisaraañakpilib nì Juuda yab kpilib nín dū tibōti tin ki tūn u-puee, waa gāti báà tiba.
- ¹³Ní gōmina Piilati bí-u yii: “Aa gbīl tin kōkō bi sòñ ki tūntí a-puee níiñ?”
- ¹⁴Ama Yeesu kaa péēgāti-u báà tiba an poon, ní an mōti bākatiñ gōmina tikpil.
- ¹⁵Apibil jinjaaliu kamaayee, gōmina nìn gīntí usarkadaan un samaa kōkō yaa bālfèe ní kí líí.
- ¹⁶Dyunti gbantee usarkadaan ubō nìn bí un pu báà ñma péēnyée: bi yî-u Baaraabasi.
- ¹⁷Ní Piilati bālfī samaa un nìn kpáfèe yii: “Ōma ní ni là m gíiñ kí líí, Baaraabasaaa, Yeesu un bi yî yii Kriisitooyee?”
- ¹⁸Di sá yii u nìn nyí yii nnimidiki ñun bi cáá Yeesu puee di yì-tì ní bi cááñ-u ki ñúbiñ-u.
- ¹⁹Dyunti ñun u ká ibōsoon puee, ní u-nimpuu túnní bí tükù-u yii: “Á taa péēcèen deedeedaan nee bōtin! Di sá yii m jín u-pu falaa tikpil kudamintiiun dín.”
- ²⁰Ní bisaraañakpilib nì Juuda yab kpilib téé kunipaau nì lè yii bi là bí gíiñ Baaraabasi kí líí kí kpò Yeesu.
- ²¹Ní gōmina fātii tí būsì ki bālfī-bi yii: “Binib bili nee kansikinee, ñma ní ni là m gíiñ kí líí ní?” Ní bi kíi-u yii: “Baaraabasi ní ti là á gíiñ kí líí!”

- 22Ní u fātì bālfì-bi, yii: “Mimmee, m dàá nǎ Yeesu un bi yì yii Kriisitooyee ún mana?” Ní bi-kòkò kí yii: “Bí kpáá-u ndòpuntikaa pu!”
- 23Ní u bālfì-bi yii: “Mimmee, ba kpitii ní u nǎ?” Ama ní bi mòtì kùuntí mpòn yii: “Bí kpáá-u ndòpuntikaa pu!”
- 24Gòmina Piilati ká yii waa ti n̄n kí nǎ tiba, fikilfikil mòtì bī wīntée, ní u yòh nnyim ki fíntì u-nǎlii samaa kòkò nimiin, ní ki bí yii: “Maa bí uninja nee kúm poon, ni nì ni-bòti dee!”
- 25Ní kunipaauee kòkò kí yii: “U-kpuulool n̄ lúntí timbi nì ti-biyaamu pu!”
- 26Niinee ní gòmina gíin Baaraabasi ki líi, ní ki yāntì bi gbán Yeesu anaalab, ní ki dū-u ki tī bí cáá-u kí kpáá ndòpuntikaa pu.
- 27Niinee ní gòmina soojab cáá Yeesu ki kón gòmina cindi poon, ní ki yíin disoojakitil kòkò dómín ki kpáfì.
- 28Ní bi pēetì u-wanti ki dū dibòkutimandi cínciṅ ki pēen-u,
- 29ní ki dū ikuṅkum ki lūn kibeefuulii ki cíkiṅ-u, ki dū ṅkpòndò ki ṅúbìn u-ṅaṅgiil, ní ki kíṅ ki gbàantí u-nimiin ki bèel̄-u yii: “Ti jáam̄-si, Juuda yab bōtiu!”
- 30ní ki tíl̄ timòtan ki làbit̄-u, ki fòol̄ ṅkpòndòee ki cáā fátì u-yil.
- 31Bi bèel̄-u mín ki dódoyee, ní ki cúú dibòkutimandee ki pēetì-u, ní ki gíin ún u-ba wanti ki pēen-u, ní ki cáá-u ki búntì kí tin kpáá.
- 32Bi nyán ki cée, ki tú uninja ubò nsanni u sá Siireeni tiṅkin, bi yì-u Siimòn, ní bi páb̄-u ú fòò Yeesu dòpuntikaaṅu kí bùkuñ.
- 33Ní bi cáá Yeesu ki bānnì laakin bi yii Gòlgòtee, an taapu sá yii: “Kuyikpabiku laṅki.”
- 34Ní bi dū ṅkaam ki ṅmālìṅ ndamam poon ki tī-u ú nyò. U dákée ní ki yī, kaa nyūñ.
- 35Ní bi dū-u ki kpáá ndòpuntikaa pu, ní ki tó kasi ki yākatì u-bòkutiṅ,
- 36ki kíṅ ki ká ki cí-u.
- 37Bi n̄n ṅmāñ tiṅmaṅmabiti ki nákaṅ u-yil pú kí dàkà kun pu ní bi kūū-uee, yii: “Un bí nee di sá Yeesu, Juuda yab bōtiu.”
- 38Bi kpáá diganṅandambi bili idòpuntikaa pu ki ṅāl̄-u, ubò bí u-ṅaṅgiil pú ní un kínee bí u-ṅanṅan pú.
- 39Ní bisanjitiliibi bèel̄-u, ki gāt̄i bi-yiliṅ
- 40ki lì yii: “Sii un gbàà kí wī Kunimbòtidii kí fāt̄i mā-ku iwiin itee, a yaa sá Unimbòti biki, fī a-ba kí kpákatiṅ ndòpuntikaa pu!”
- 41Mín mbaantiim, bisaraaṅakpilib, nì bimaradakaliibi nì Juuda yab kpilib mun bí ki bèel̄-u, ki lì yii:

- 42“U fīi biba dee, kaa ḡūn kí fīi u-ba! U sá Israyeel yab bōtiu naa! Ú kpákatiń ndōpuntikaa pu kōḡkōnnee! Mimmee, ti dàá fōō-u kí kíí.
- 43U dū u-mákal ki ḡá Unimbōti pu dee, ki li yii: 'Man sá Unimbōti Jipōon,' too, kōḡkōnnee Unimbōti yaa néeń-u, ú fīi-uaa!”
- 44Ní diganḡandambi bin bi nìn kpáá ki ḡāl-uee mun nìn sīi-u mín mbaantiim.
- 45Kuwiḡkuluuee, dibōmbōndi jéeti kitiḡ kōko pu ki tin sāa tikúti tita.
- 46Ki cá tikúti titee, Yeesu fáá mbiil mpōn, yii: “Eelii, Eelii, lama sabakitani?” (Taapu sá yii, M-Nimbōtiu, m-Nimbōtiu, ba ḡá ní a dū-mi ki fá?)
- 47Yeesu fáá mbiil mimmee, ní bin bí niinee biba ḡbīl u-biiliḡuee pu, ní ki lī yii: “U yīi Eelii dee!”
- 48Ní bi-kansikin ubō sán ki yōon kuca ki múl ndaam min ḡàḡee ni, ki dūu túun ḡkpōndō pu ki tīi-u ú nyò.
- 49Ama ní bin kínee bí yii: “Yàntī! Tí kpèèmaan Eelii yaa làá dāá fīi-u!”
- 50Yeesu ḡítī fáá mbiil mpōnee ní ki dū u-fām ki tīi ki kpīi.
- 51Niinee, sata un bi nìn dūu pīti Kunimbōtidii poon ki ḡānti laakin bi yīi circir páaa lanḡee nì laan kínee cúū cáti yilpu ki tin káti taapu, ní kitiḡ cīḡki, ní titaḡkpanaakōti cúū búkúti,
- 52ní akaakul wāań, ní bin nìn nōó Unimbōti ki kpīyee tikpil fikiti,
- 53ki nyáń bi-kaakuliḡin. Yeesu fikitiitam boonee, an nibee kó Jeerusaleem tiḡkin, ní binib tikpil ká-bi.
- 54Room soojakpiliu nì u-yab bin nìn cí Yeesuee nín ká kitiḡ cīḡkitam nì tin kōko péējítèe, ní tifaandi cúū-bi tikpil ní bi lī yii: “Tiḡman, kijapaaí nee lafun sá Unimbōti Jipōon ní.”
- 55Binimpoobi kupaau mun nìn yú ndan ki kpèeń. Bi nìn céèńńi-u doooo Gaaliilee ní ki tútuń-u atuun.
- 56Maarii un sá Magdala tiḡkinee nì Maarii un sá Jaaki nì Jooseefi nee, nì Seebeedee jipōmbi na nìn bí bi-kansikin.
- 57Kujoou jótèe, ní ugaaja ubō dómiń laakin bi nìn kpáá Yeesuee, bi yīi-u Jooseefi, u sá Arimatee tiḡkin, ki mun nìn sá Yeesu boonooliu.
- 58Ní u cūti ki ká Piilati, ní ki mēē-u nsan kí yōon Yeesu wunti, ní Piilati bí yii bí dūu tīi-u.
- 59Ní u cūti yōon, ki nyāab ḡḡaapiin mpōon ki dūu fiń-u,
- 60ní ki cáā ḡá u-kaakupōndin din u nìn lùkū ditaḡkpalinee, ní ki bínti ditaḡkpaakpaandi diba ki pīiń dikaakul nyōkōpu, ní ki búnti.

⁶¹Maarii un sá Magdala tiŋkinee nì Maarii un kínee mun nìn cūti ki ká ki pìl̄ dikaakulee nyokɔpu.

⁶²Bi nín bónti ŋwiŋŋufikaa, kutaa wúntè, ní bisaraanɔkpilib nì Fariisab nós dicilpu ki cūti ká Piilati,

⁶³ní ki bí-u yii: “Ukpil, ti téetí yii unyimondaan nee nín nìn dáá bí dimaŋfalinee u nìn bí yii, u yaa kpíyee, winta dalee u dàá fikití.

⁶⁴Mín puee, yánti soojab n̄ cù kí cītí u-kaakul ali iwiin ita, an nín dàá ŋá pu u-boonnooliibi n̄ taa dāān kí yò u-wunti kí tükù samaa yii u fikitè: mimmee, nnyimɔn gbanti ŋùn dāa pókí kí jītìn mpeepeekaa.”

⁶⁵Ní Piilati kí-bi yii “Ni cáá soojabaa! Cáamaan-bi bí cītí u-kaakul ni nín là puee.”

⁶⁶Ní bi dū kudaanɔ ki nákañ ditaŋkpalee pu ubɔ yaa gbēyee bí bée, ní ki cáá soojab ki cīti.

Maatiu 28

¹Ŋwiŋŋufikaa jíti ku wúnti kɔɔsil ntaafaabɔmbɔminee, Maarii un sá Magdala tiŋkinee, nì Maarii un kínee cūti kí kpèè dikaakul.

²Kpalaayee kitiŋ cīŋki tikpil, ní Unimbɔti tūuŋɔ ŋubɔ nyánní yilpu ki dómiñ ki cúu ditaŋkpaandee ki binti ní ki kāl̄ di-pu.

³U nìn jìl̄ kii utaa nín ŋmód puee, ní u-wampeŋkaati pīn̄ kánkaŋ.

⁴Soojab nín wál-uee, ní bi fāŋki tikpil, bi-wunti bí jìkì ní bi fikì.

⁵Ní Unimbɔti tūuŋuee bí binimpoobee yii: “Nimbi taa fāŋkimaan! M nyí yii ni nyàab Yeesu un bi kpáá ndɔpantikaa puee ní.

⁶Waa bí doo, u fikitì, kii u nín nìn péel̄i puee. Dāān kí kpèèmaan laakin u nìn dōee,

⁷kí n̄n cámaan malaa, kí tükù u-boonnooliibi yii u fikitì ditaŋkpiilin. U dàá lint̄i kí cù Gaaliilee, niin ní ni dàá tin ká-u. Tin m cáá kí tükù-nee dee.”

⁸Niinee ní bìn buntì malaa, tifaandi nì dipɔɔpiŋkpaandi kɔkɔ ŋmāl̄, ki sán ki cá kí cáá dinyɔɔbundee kí tükù Yeesu boonnooliibi.

⁹Niin kpalaa ní Yeesu tú-bi nsan ní ki jáam̄-bi, ní bi sūtì ki pìl̄-u ní ki lítì u-nimiin ki jáam̄-u.

¹⁰Ní Yeesu bí-bi yii: “Taa fāŋkimaan! Cù kí tükùmaan m-nabiyaamu yii bí n̄n cá Gaaliilee. Niin ní bi dàá tin ká-mi.”

¹¹Ŋyunti ŋun binimpoobee dáá bí nsanni ki cée, ní soojab bin nìn cí dikaakulee biba cūti kitiŋin ki máafi bisaraanɔkpilib tin jítèe kɔkɔ.

¹²Ní bìn kpáfi Juuda yab kpilib ki sòon̄ ki gbil̄n̄ tɔb, ní ki nyàab̄ kunimigbaau ki ŋéeb̄ soojab nyɔmmu,

¹³ní ki tükū-bi yii: “Ní li yii, kunyeeu timbi dō ki gèènee, ní u-boonnooliibi dómín ki yùñ u-wunti.

¹⁴Báà gōmina yaa gbīlaaa, timbi dàá sòkòl-u kí nyāntí-ni tibōtin.”

¹⁵Ní soojab fōō animil, ní ki ñá bi nín bí bí ñá puee. Ní an bōtee gbīti Juuda yab kansikin ki dāa sāa dín.

¹⁶Yeesu boonnooliibi saalaa nì ubōee búnti Gaaliilee gbantaŋki kiba pu, laakin Yeesu nìn bí bí kintí-uee.

¹⁷Bi nín ká-uee, ní bi gbāaŋ ki jáam-u, ama nì mín kòkòee, bi-kansikin biba nìn dākafī mili mili.

¹⁸Ní Yeesu sūtín ki sòoñ nì bi, yii: “M fōō ipōn kòkò yilpu nì taapu kòkò pu.

¹⁹Mín puee, nīn cámaan atimbun kòkò nib cee kí dū-bi kí kpántí m-boonnooliibi, kí fàl-bi Unimbōti nyim, Ubaati, nì man u-Jipōon nì Circir Fām yindi pu;

²⁰kí dākà-bi bí nīn ñúb tin kòkò m tī-ni ní ñée. Ní nīn nyí yii m bí ni-cee baabadal ali duulnya kúntitam.”

Maarki

Maarki 1

- ¹Tibomontiil tin sòòn Yeesu Kriisitoo Unimböti Jipoon puee killanji sèé.
- ²Eesayi Unimböti bōnaatiliu nìn ηmāñ u-takaldau poon ki síñ, yii: Unimböti bí yii: “M-tūuηηu sèé! M túnní-ηu ηú lintīñ a-nyokopu kí dāá ηāηki-si nsan.
- ³M-tūuηηuee di báakí kupōoun yii: Bóntímaan ti-Dindaan saηηu, kí tàntímaan u-sambiyaamu kí cīití-u.”
- ⁴Ntūunee di sá un bi yīi Jaan u kó kupōoun ki fūul binib Unimböti nyimee. U nìn báakí ki tükù binib yii: “Kpántímaan ni-bimbim kí yántī bí fāl-ni nnyim, Unimböti í dū ni-kpitii kí pō-ni.”
- ⁵Ní Juudee watil pú yab nì Jeerusalem tiηkin nib kəkə nìn cá Jaan cee. Bi nìn biitī bi-kpitii pu, ní u fūul-bi Unimböti nyim Jōdan mōolin.
- ⁶Jaan gbanti nìn pēēugutaamu kuti bokutil ní ki gbīñ ηgban dambalau. U nìn ηmód inaakitoon nì tisiil ní. U nìn báakí yii:
- ⁷“Ubo bí m-boon ki tóobiñ ki cáá mpōn ki jítiñ man. Maa sàafi kí nīn sá u-yumbuu kí sóntí kí kútí u-naataaηmiii gba.
- ⁸Man fūul-ni nnyim ní, ún dàá dāá dū Circir Fām ní kí fāl-ni.”
- ⁹Dyunti gbantee, Yeesu nyánní Gaaliilee tiηki kin bi yīi Naasaaretee, ki dómiñ Jaan fūl-u Jōdan mōolin.
- ¹⁰Jaan nín fūl-u ki dóò, u nyēēñ nnyiminee, ní ki wál kutagbōηu pīiti ní Unimböti Fām kpákatiñ kii dinanjilee ki tókōñ u-pu,
- ¹¹ní u gbīl Unimböti sòōñní kutaa pu ki lī yii: “Sii di sá m-Jipōon un m nēēñ tikpilee! M-pōbil fáati-si.”
- ¹²Kpalaa niinee ní Unimböti Fām yānti u cūti kupōoun.
- ¹³U nìn ηá kupōoun iwiin imuηku ili ní Sitaan cóηki-u. U nì ipeel di nìn kíñ ki bí, ní Unimböti tūuni bí u-cee ki kèētī-u.
- ¹⁴Bi nìn cúú Jaan ki pīñ kudii. Mīñ boonee ní Yeesu cūti Gaaliilee ki kíí ki bí sòòn Unimböti bōmōntiiti ki tükù-bi yii:
- ¹⁵“Dyunti bāañ Unimböti beel sūti ki pilīñ-ni. Fāmaan ni-kpitii kí fōōmaan tibōmōntiil nee kí kí!”
- ¹⁶Dwiin ηubə, Yeesu nìn bíi kpàkañ Gaaliilee mōolee ní ki ká bijōncuuliibi bili, Siimōn nì u-naal Andree bí ki tòò kulaaηηu dimōolin.
- ¹⁷Ní Yeesu bí-bi yii: “Dāá nīn nóómaan-mi. Ni sá bi-jōncuuliibi ní, ama m dàá dū-ni kí kpántí bin nyàabiñ binib ki cāabiñ m-ceeyee.”

- 18Ní bi yāntì bi-laanti dicilpu niin ki táá-u.
- 19U c̄ōm̄ ki cūti ndan fiiyee, ní ki gítí ká Seebeedee jip̄ombi Jaaki nì Jaan k̄a buḡalimbun ki ḡaḡkí tilaandi.
- 20Kpalaa niinee ní Yeesu yíin-bi ní bi yāntì bi-baa Seebeedee nì bitont̄onliibi buḡalimbun ki táá-u.
- 21Yeesu nì u-yab cūti Kapeenaayum tiḡkin. D̄wiḡḡuḡfikaa b̄aánee, ní Yeesu kó kukpafidiin ki kíí ki b̄í d̄àkà binib Unimb̄oti b̄oti.
- 22Binib bin n̄in b̄í p̄ilf̄in-uee n̄in b̄akatì tikpil nì u-d̄akatam. Kun puee u-d̄akatam n̄in cáá mp̄on kaa náán nì bi-maradakaliibi yam.
- 23Kpalaa niinee, uwaati ub̄o un pu arasinii k̄ee téen̄ kupkafidiin niin yii:
- 24“Yeesu Naasaareeti you, a nyàab̄-ti nì tilati ní? A d̄omiin̄ kí kúntí-ti níin? M nyí un ní a s̄ee! A sá circirdaan un nyánní Unimb̄oti ceeyee ní!”
- 25Ní Yeesu kp̄ati arasiniiyee pu, yii: “Á ḡm̄ílee kí nyā uninja nee ni!”
- 26Ní arasinii yāntì uninjee wunti fáá dijinjikil ḡkpitim pu, ní u t̄il mbiil mp̄on, ní ki nyán u-ni.
- 27Báa ḡma b̄akatì s̄eeee, ní ki b̄alf̄i t̄ob̄ yii: “Ba b̄oti ní ti n̄in ká na? Tib̄ocan s̄eé! N̄i mp̄on ní u p̄ūn̄ kinyok̄o ki kp̄aan̄ arasinii bi ní nyā, ní bi p̄ilf̄in-u!”
- 28Ní Yeesu yindi gb̄iti kpalaa Gaaliilee jaḡḡi k̄ok̄on.
- 29Bi nyán kukpafidiinee kpalaayee ní u nì Jaaki nì Jaan búnti Siim̄on nì Andree dumpu.
- 30Siim̄on nimp̄uu na n̄in b̄ūn̄ mmaḡfanyim ki d̄ō u-wunti p̄íl kp̄aḡkpam. Bi b̄an̄ kpalaayee ní bi t̄ukū Yeesu unimp̄uee bumbunti pu,
- 31ní u kó unimp̄uee cee ki cúú u-ḡal ki yáati-u ki k̄aan̄. Ní mmaḡfanyimee yānti-u dicilpu, ní u yíkì ki kíí ki b̄í ḡaán̄ tijin̄ kí t̄ī-bi.
- 32Kujoou, ḡwiin̄ j̄eet̄e, bi cūnn̄i Yeesu cee bibunliibi nì biwaatiibi bin pu arasinii k̄ee k̄ok̄o,
- 33ní kitiḡin̄ yab k̄ok̄o k̄oon̄ ki kp̄afi kudii kun ni u n̄in b̄ee nyok̄o pu.
- 34Binib kupaa n̄in b̄ūn̄ igbaḡween̄ iba iba ní u cáan̄-bi, ní ki j̄iḡ arasinii tikpil ki nyánti, kaa p̄ú-bi kinyok̄o bí s̄oon̄, kun puee bi n̄in nyí un ní u s̄ee.
- 35Kutaa wúnti ntaafaab̄omb̄ominee Yeesu péé ki nyán̄ ki búnti ḡkpaanceeti kumooun̄ kí m̄èè Unimb̄oti,
- 36ní Siim̄on nì u-jutiibi cūti b̄í nyàab̄-u.
- 37Bi ká-uee, ní ki bí-u yii: “Báa ḡma b̄í nyàab̄-si.”

³⁸Ní u kíí-bi yii: “Tí cùmaan ntingbamu mun kínee mun poon, m sòòn nì bí mun Unimbòti bòti. Mìn pu ní m dómiín kitiṅ pu.”

³⁹Ní u cūti ki mānti Gaaliilee jaṅṅi kəkə ki sòòn Unimbòti bòti akpafidiin ni ní ki jìñ arasiniibi biwaatiibi pu.

⁴⁰Ḑwiin ḡubōee, uninjanyaṅbanti ubo dómiín Yeesu cee ki gbāaṅ u-nimiin, ní ki bī gbàam-u yii: “A yaa là a ḡūṅ kí cáaṅ-mi m-wunti n ḡāṅkì.”

⁴¹Ní Yeesu sún u-saai ki tānti u-ḡal ki gbēē-u ní ki bí-u yii: “M là! Pōkìṁ.”

⁴²Niinee, dinyaṅbandi kpáā wāṅkì, ní u-wunti ḡāṅkì.

⁴³Yeesu ḡee, ní ki jìñ-u ú fātí gítí malaa,

⁴⁴ní ki kpáafi-u tiṅan yii: “Taa péētùkù báà ubo tibòti nee. Cáá a-ba kí dākà usaraṅal, kí ḡá saraa kii Mooisi marau nín lī puee kí dākà yii a pókì an nīn sá-bi seera.”

⁴⁵Nì min kəkə bi kpáafi-uee, u nín péēbúntèe, u kíí ki máafi báà ḡma tin jíti u-puee, ki yānti tibòti gbīti ilaan kəkə. An puee, Yeesu kaa nìn gítí ḡūṅ kí kó kitiṅ poon binib kansikin. U nìn kíñ ki bí ikpaanceeti ní binib nyēē ajan kə pu ki dòoṅ u-cee.

Maarki 2

¹Iwiin iba boonee, Yeesu nìn gítí Kapeenaayum, ní an gbīti yii u bí kudiin

²ní kunipaau dómiín ki kpáfi ki gbí kudiiyee, ní mpaan kaa ti kpáā bí kipunyəkəpu gba. U nìn bī sòòn nì bi Unimbòti bòti ní.

³Ní bininjab binaa túnní ufaliṅfaan ubo ki cáaṅ u-cee.

⁴Nniwíin puee, baa ḡúṅ kí pīl Yeesu. Mìn puee, bi nìn jóm ki cíl kudii yilpu ki bítì laakin Yeesu bée, ní ki dū ufaliṅfaan nì nlún ki dīñ dibundee ni ki sīntiñ ki bíl.

⁵Yeesu nín ká binib gbanti fōṣ ki kíí yii u ḡūṅ kí cáaṅ ubunlee, ní u tükū ufaliṅfaanee yii: “M-biki, m dū a-kpitii ki pú-si.”

⁶Bimaradakaliibi biba nìn kā niin ki dākafi bi-pòbiliṅjin yii:

⁷“Ba pu ní uninja nee lì mìn? U ḡèèṅ nì Unimbòti ní. Ubo kaa ḡūṅ kí dū ikpiti kí pō asee Unimbòti baba.”

⁸Niinee Yeesu bēè bi-landəkəṅu ní ki bālfī-bi yii: “Ba pu ní ni dākafi mìn ni-pòbiliṅjin?”

⁹Ba di kaa pōṣ bí lì ufaliṅfaan ní: ‘A ká a-kpitii pōtam’ di kaa pōṣ dilil naaan? ‘Yòoṅ a-lúṅṅu kí nīn còom’ di kaa pōṣ ní?

¹⁰Ama ní bée yii man Kinibiki cáá mpəṅ kitiṅ pu kí dū unil kpitii kí pō-u.” Niinee ní u tükū ufaliṅfaanee yii:

¹¹“Sii yīkìṁ kí yòoṅ a-lúṅṅu kí nīn kùn a-dumpu!”

- 12**Ní u nyī ki yíkì dicilpu niin ki yḡon̄ u-lún̄ḡu ki nyán báà ḡma nimiin, ní an bākatiñ-bi sèeee, ní bi bī̀ pàkà Unimbṓti ki lì yii: “Taa láá péēká mín̄ dalba dalba!”
- 13**Yeesu tí fātii nyán Gaaliilee mṓol caḡin, kunipaau tí kíł ki dṓon̄ u-cee u dākà-bi Unimbṓti bṓti.
- 14**U jītée, ki ká Leefii Alfee jipṓon̄ ká fṓtiku diikun. Ní u bí-u yii: “Dāāñ kí n̄n̄ nṓó-mi!” Ní Leefii lafun yíkì ki táá-u.
- 15**Yeesu n̄n̄ kó Leefii dumpu ki bī̀ j̄n̄ tijinee, bifṓtiliibi tikpil n̄n̄ binikpitib bin kṓ k̄nee dómín̄ ki kúti u n̄n̄ u-boonnooliibi pu: di sá yii an nikpitibee n̄n̄ nṓó-u ki wīkí.
- 16**Bimaradakaliibi bin sá Fariisab kitilinee n̄n̄ ká u n̄n̄ binikpitib kpáfí ki j̄ñee, ní bi bālfí u-boonnooliibi yii: “Ba pu ní u n̄n̄ binib nee kpáfí ki j̄ñ: mín̄?”
- 17**Yeesu gbī̀ bi n̄n̄ lī puee, ní ki gāā-bi dilaḡkpandi yii: “Bin cáá laafiyee kaa nyàab unyṓdaan, see bin b̄ñee di nyàab unyṓdaan. Di sá yii maa dómín̄ kí yíin̄ deedeedambi, m dómín̄ kí yíin̄ binikpitib ní.”
- 18**Jaan boonnooliibi n̄n̄ Fariisab n̄n̄ bṓṓb̄ kinyṓkṓ. Dalbee ní biba dómín̄ ki bālfí Yeesu yii: “Ba pu ní Jaan boonnooliibi n̄n̄ Fariisab boonnooliibi bṓṓb̄ nnyṓmu ní sii yab kaa bṓṓb̄ ní?”
- 19**Ní Yeesu fātii bālfí-bi yii: “Uṓ yaa cáá unimpucaan ki yaa yíin̄ u-bṓṓbee, bi j̄n̄ ki nyù naaan, nnyṓmu ní bi bṓṓb̄ ní? Unimpucaan cal yaa bí bi-kansikinee, baa kàal ḡkùm.
- 20**Ama ḡwiin̄ ḡubṓ bí ki dṓon̄ bi dàá dāa yṓon̄ unimpucaan cal bi-kansikin, an yuntiḡu ní u-bṓṓbi dāa bṓṓb̄ nnyṓmu.
- 21**“Bi yaa dū ḡḡaapṓon̄ ki dūu līb̄ satakpiki bundi, ki yaa f̄ntèe ḡḡaapṓon̄ kṓontí ní kí kpáan̄ satakpiki kí cáti, ní dibundee n̄ mṓtí wāāñ.
- 22**Mín̄ mbaantiim ní baa tí dù ndapṓm kí fúuñ tilṓkpikilin. Bi yaa dūu fúuñ mín̄, tilṓkpikil pṓṓl̄ ní ndaam n̄ fá, ní tilṓti mun n̄ bī̀l̄. Bi dù ndapṓm kí fúuñ tilṓṓon̄ ni ní.”
- 23**Dwiḡḡuḡfikaa ḡubṓ dalee, Yeesu n̄n̄ u-boonnooliibi bī̀ j̄tí blee kpaḡḡin̄ ní u-boonnooliibi bī̀ gífí blee fini ki ḡmèem̄ abil ki ḡmṓṓ.
- 24**Fariisab ká mimmee, ní ki bí-u yii: “Ba pu ní a-boonnooliibi ḡáañ min̄ kṓṓ ḡwiḡḡuḡfikaa dalee?”
- 25**Ní u fātii kíi-bi yii: “Naa láá péē kaañ takalda poon ki ká tijin̄ takaasiu n̄n̄ n̄n̄ cúu ubṓti Dafiidi n̄n̄ u-naacimbi bi ḡá pueeee? D̄yunti ḡun̄ Abiyata n̄n̄ sá usaraḡakpilee,
- 26**Dafiidi n̄n̄ kó Kunimbṓtidiin̄ ki ḡmṓ saraa kpṓnṓb̄ ki kíñ ki tī u-yab. Ti-koobiliḡ poonee, usaraḡal baba di cáá nsan kí ḡmṓ an kpṓnṓb̄ gbanti, ama Dafiidi n̄n̄ ḡmṓ ki kíñ ki tī u-naacimbi gba.”
- 27**Yeesu gítí lī-bi yii: “Unimbṓti náañ ḡwiḡḡuḡfikaa binib pu ní waa náañ binib ḡwiḡḡuḡfikaa pu.

²⁸Man Kinibiki di sá ḡwiḡḡuḡḡfikaadaan.”

Maarki 3

¹Yeesu nìn fātii kó kukpafidiin. Uḡaḡḡakafu ubo nìn bí niin.

²Ní binib bí cónkí Yeesu kí kpèè u yaa làá cáañ-u ḡwiḡḡuḡḡfikaa dal, bí ḡmā kí yíiín-u ibosoon.

³Ní Yeesu bí uḡaḡḡakafuee yii: “Yíkì kí sīl ti-kansikin báà ḡma nimiin.”

⁴Ní u bālfī-bi yii: “Ti-marau pú nsan tí ḡá tiḡan ḡwiḡḡuḡḡfikaa dalaaa tí ḡá tikpitiil ní? An pú nsan yii tí fī unil naaan tí kpò-u ní?” Ní bi ḡmí.

⁵U nìn kpēē-bi dinimil ki mānti, ki fōō bi-pu diḡuul, ama ní bi-pōōgbifīḡḡu mun nìn kón-u kunimbaau. Ní u bí uḡaḡḡakafuee yii: “Tāntī a-ḡal!” Ní u tāntī-ḡu, ní u-ḡal ḡáḡkì.

⁶Niin niinee ní Fariisab nyán ki nyàab uboti Eeroodi naacimbi bí kpāfi kí nyàab nsan ḡun bi dàá dī kí kpò Yeesuee.

⁷Niinee ní Yeesu nì u-boonooliibi nyán kukpafidiin ki cūti dimōol caḡin. Kunipaau nìn táá-u ki nyánni Gaaliilee nì Juudee,

⁸nì Jeerusaleem nì Idumee, nì Jōdan gbandi lapu pu, nì Tiir nì Siidon tiḡbammun. Kunipaauēē kōkō nìn gbīl tin kōkō u ḡáañee ní ki dómiín u-cee.

⁹Dinikitil nín nìn múkú u-pu miḡyee ní u bí u-boonooliibi yii bí ḡāntī-u kiḡaliḡwaai kiba nnyim pu ú ḡmā kí tókōn.

¹⁰Di sá yii u nìn cáañ binib tikpil, an yānti bibunliibi kōkō kpákà kí gbēē-u.

¹¹Biwaatiibi yaa nìn ká-uee, arasiniibi cáá-bi ki gbàantí u-nimiin, ní bi kūuntí ki lì yii: “Sii di sá Unimbōti Jipōon!”

¹²U nìn kpātī bi-pu ki lì-bi yii bí taa yānti bí bée-u.

¹³Boonee Yeesu jóm kigbantaḡ pu ní ki yíiín bin u lèe ní bi dómiín u-cee.

¹⁴Niinee ní u lúti saalaa nì bili bí nīn sá u-kpambaliḡ u nì bi nīn kīn ki bí, ú nīn tūn-bi bí nīn sōon u-bōti,

¹⁵kí nīn cáá mpon ki jì arasiniibi.

¹⁶Binib saalaa nì bili bin u lútèe yiḡḡi sée: Siimōn (un u nìn páañ diyindi yii Piyeeree),

¹⁷nì Seebeedee jipōmbi Jaaki nì Jaan (bin u pú diyindi yii Bōwanegeesee an taapu sá yii: “Binib bin náañ nì ataadunee”).

¹⁸Bin kínee di sá Andree, Fiiliipi, Baateeleemii nì Maatiu, Toomasi, nì Jaaki Alfee jipōon, nì Tadee, Siimōn un nìn là kí já nì Room yabee,

¹⁹nì Juudasi Iskariyōti, un nìn dāa dū Yeesu ki tī u-nannanliibee.

- ²⁰Yeesu lútì-bi mín ki dódoyee, ní bi nín gítí mməŋki, ní kunipaau tí kóòní ki múkuñ. An yānti Yeesu nì u-boonnooliibi kaa ti kpáà cáá mpaan kí jī tjin.
- ²¹Yeesu yab gbìl̄ tin kəkə jītée, ní bi yíkii kiliín nsan kí dāá cúú-u, kun puee biba nìn l̄i yii: “U-yil bíl ní.”
- ²²Bimaradakaliibi biba nìn nyánní Jeerusaleem ki l̄i yii: “Arasiniibi kpiliu Beelsebul di kā u-pu. Úñ pəŋŋu ní u cáā jì arasiniibi.”
- ²³Ní Yeesu yíín-bi u-cee, ki gāā-bi dilanjkpandi ki l̄i yii: “Mana ní Sitaan ŋūn kí jà Sitaan?”
- ²⁴Dibeel din nib yaa cúú di-ba ki yākatì mili ki jáan tōbee kaa ŋūn kí n̄n bí kí cù ndan.
- ²⁵Mín mun ní kudicaŋu kun di yaa cúú ku-ba ki yākatì mili ki jáan tōbee kaa tí ŋūn kí n̄n bí ki cá.
- ²⁶An yaa sá yii Sitaan yíkii jáan u-ba ki cúú u-ba ki yākatèe, mimmee, waa ŋūn kí n̄n bí ki cá, u-pəŋŋu kúntí ní.
- ²⁷“Bi yaa kaa bóob̄ upəol ŋəmii ki wāatì ŋma di ŋūn kí kó u-dumpu kí kóon̄ u-wanti? See bí bóob̄-u kí wāatī ní kí nín ŋmā kí kó kí kóon̄ u-wanti.
- ²⁸“M sòon̄ n̄i ni ibaaməŋ ní, nnibiyaamu ŋūn kí ká bi-kpitii kəkə pōtam ki kpáan tibəfan tin bi sòon̄ Unimbətee.
- ²⁹Ama un yaa sòon̄ Unimbəti Fām tibəfanee, ún kpá kí ká u-kpitii pōtam jaanjaan, u kó diyintil din kaa cáá dikuntilee ni!”
- ³⁰Yeesu nìn l̄i mín kun puee bi nìn l̄i yii: “U cáá arasinii u-ni!”
- ³¹Yeesu nabiyaamu n̄i u-na bāan̄ ki sí mməŋki ki tú bí yíín-u.
- ³²Binib tikpil nìn kā ki gón̄-u ní bi tükū-u yii: “A-na n̄i a-nabiyaamu sí mməŋki ki nyāab̄-si.”
- ³³Ní u kíí-bi yii: “Ŋma di sá m-na n̄i m-nabiyaamu?”
- ³⁴U kpēēki mānti ki tú bin nìn kā ki gón̄-uee, ní ki l̄i yii: “Kpèèmaan, m-na n̄i m-nabiyaamu sèé nee!”
- ³⁵Un kamaa yaa ŋāan̄ Unimbəti nín là puee, udaan gbanti di sá m-naal, m-niisal n̄i m-na.”

Maarki 4

- ¹Yeesu tí kíí ki bíí dākà Gaaliilee məol caŋin, ní kunipaau kóon̄ní ki kpáfi u-cee. Bi-wiŋŋu puee, ní u jóm̄ ki kāl̄ buŋalimbun nnyim pu, ní kunipaauuee kəkə sí diməogbandi ki p̄l̄l̄n̄-u.
- ²U nìn cáá alaŋkpan tikpil ki sòon̄ n̄i bi tibəti ní ki dākà-bi ki bí-bi yii:

- ³“P̄ilfimaan! Uwan̄yaanli ub̄o nyán kí yààn u-wamboolii.
- ⁴U b̄ī yàant̄ee ní iba líti nsan pu, ní ilunlukuti dómiín ki d̄ūu jín.
- ⁵Iba mun líti kuteeu pu, laakin kitiŋ kaa nyóòyee ní ki p̄t̄i k̄p̄àà nyán.
- ⁶Ɖw̄īn pílee ní i k̄p̄ī kun puee kitiŋ kaa nyóò inyaan n̄ kó.
- ⁷Iba mun líti ikuŋkumin ki nyán, ní ikuŋkum w̄īn ki múkuñ i-pu, ní iaa ḡún kí lòon̄.
- ⁸In kínee mun líti laakin kitiŋ ḡānee, ki nyán ki w̄īn ki cáá apoo, ní ki lòon̄ ifin. Iba cáá abil mmuŋku n̄ saalaa, iba mun imuŋku ita, in kínee mun dilaataal.”
- ⁹Ní u ḡit̄i k̄t̄i ki l̄i yii: “Sii un yaa cáá ditafalee n̄ gb̄ī!”
- ¹⁰Ɖyunti ḡun u kíñ u-babee ní bin n̄n c̄ent̄i-uee n̄ u-boonnooliibi saalaa n̄ bilee b̄alfi-u u-laŋkpaŋḡee taapu.
- ¹¹Ní u kíi-bi yii: “Unimb̄oti yānt̄i nimbi n̄ b̄ee u-beel b̄oti tin n̄n bí dibalinee taapu. An yaa kíñ bifantantiibee, an k̄o sá b̄īn cee alaŋkpan ní,
- ¹²an n̄n dàá ḡá pu ní: 'Bi-nimiliŋ n̄ n̄n k̄p̄it̄i bí taa n̄n w̄á, bí n̄n p̄ilfi mun tikpil kí taa n̄n gb̄ilee; an yaa ȳi, bi yaa k̄p̄ēeki w̄á, ki yaa p̄ilfi mun ki gb̄ilee, bi f̄eeñ bi-saŋkpitii, Unimb̄oti n̄ d̄ū bi-k̄pitii kí p̄o-bi.' “
- ¹³Ní Yeesu ḡit̄i l̄i-bi yii: “Naa gb̄ī dilan̄kpan̄di nee taapu? Kin ni dàá d̄āá ḡá mana kí gb̄ī alaŋkpan ḡin kínee taapu?
- ¹⁴An sá Unimb̄oti nȳōobundi ní uyaanlee bí ki yàant̄i.
- ¹⁵Binib biba ḡm̄àn kii iwambool in líti nsan puee ní. Binibee yaa gb̄ī dinȳōobundee, Sitaan d̄ōon̄ ki l̄eek̄i dicilpu tib̄oti tin bi búl bi-p̄obilin̄inee.
- ¹⁶M̄īn mbaantiim ní binib biba náan̄ n̄ kuteeu, laakin iwambool lít̄ee. Binibee yaa gb̄ī dinȳōobundee, bi f̄ōol̄-di n̄ dip̄ōp̄indi.
- ¹⁷N̄i min k̄ok̄o bi f̄ōol̄ mimmee, baa cáá inyaan kí s̄īl̄ kí báan̄. Bi n̄n f̄ōō dinȳōobundee puee, an yaa sá diḡīndi kii disaandi, di yaa j̄et̄i bi-puee ní bí d̄ū dimákal din bi cáá Unimb̄oti puee kí fá malaa.
- ¹⁸Biba mun ḡm̄àn kii ikuŋkumin, laakin iwamboolee lít̄ee. B̄īn di sá bin gb̄ī dinȳōobundee,
- ¹⁹ní waanee land̄ok̄oi p̄áb-bi, t̄igaajati ḡm̄at̄iñ-bi, ní nnimitaataam mun cáá-bi. An wantee k̄ok̄o m̄ükunt̄i ki biint̄i dinȳōobundee pu, ní dàá ḡūn kí lòon̄ abil.
- ²⁰Biba mun tí ḡm̄àn kii laakin kitiŋ ḡān̄ iwamboolee lít̄ee ní. B̄īn di sá bin gb̄ī dinȳōobundee ki f̄ōō-di, ní ki lòon̄ abil. Ɖfin ḡub̄o pu lòon̄ mmuŋku n̄ saalaa, ḡub̄o imuŋku ita, ḡub̄o mun dilaataal.”
- ²¹Ní u ḡit̄i bí-bi yii: “Baa t̄ut̄i fitila kí d̄ūu tàkañ kul̄oŋun, kaa tí d̄ū-u kí síiñ kilambaŋ taapu. Bi d̄ū fitila kí t̄ok̄on̄ kifan̄k̄olii pu ní.

22Mìn ní tin kəkɔ pu binib biintée dàá dāá biitī, tiba kaa bí dibalin kaa làá nyā mpaampiin pu.

23Sii un cáá ditafalee n̄ gbīl!”

24Ní u tí bí-bi yii: “Ní n̄n pílfí tiboti nee tiḡan. Ni nín ḡmānti pu ki tīyee, Unimboti dāa ḡmānti mìn ní kí tī-ni, kí gbéeñ-ni gba án yàaḡ.

25Di sá yii Unimboti dāa kútí un cááyee ní kí fḡḡ un kaa cááyee cee fiii un u bàà cááyee.”

26U gítí lī yii: “Unimboti beel náaḡ n̄ kii unil nín yàantí iwambool kitiḡ puee ní.

27U yaa gèèneeee, u yaa wāleeee, kunyeeueeee, ḡwiin̄ pueeee, iwamboolee nyēēki wīntí, waa kpāantí kí bée an nín di pu ní kí dāá ḡá mimmee.

28Kitiḡ ki-ba càntī iwambool n̄ nyā kí cáá apoo kí màtī, ní kí lòoḡ abil ifin ni.

29Abil yaa bīn̄ ki dóyee, mimmee, kudiceeu bāaḡ dee ní bí yòoḡ kijiki kí kó kí cā.”

30Yeesu gítí lī yii: “Ti dàá dū Unimboti beel kí nántin̄ ba? Áá dilan̄kpandi dilar ní ti dàá gāa kí dākà dibeelee nín bí puee?

31Di náaḡ n̄ kii tikun̄faal subiki kin bi yīi muutaadee bil ní. Bi yaa búl-dèe dín di sá kiwaa kitiḡ pu subiliḡ kəkɔ kansikin.

32Ama bi nín búl-dèe ní dí nyā kí wīn̄ kí tō apan kí kpántí busukpaambu kí jītín̄ tikun̄faal tin kɔ kínee subiyaamu, ali nnombiyaamu gba ḡñ̄ kí dāá páaḡ mu-diḡḡi kí bál busubuee faatin.”

33Alaḡkpan nee jutiibi tikpil ní Yeesu n̄n cáā sòoḡ n̄ bi u-boti, min ní bi n̄n ḡñ̄ kí gbīl̄ taapuee.

34Waa n̄n sòoḡ n̄ bi fam an yaa kaa sá n̄ alaḡkpan. Boonee, u n̄ u-boonnooliibi yaa kīn̄ bi-ḡmaniḡmee ní u càntí alaḡkpanee taapu ki tükù-bi.

35Ḋwimbaanti gbanti jookuee, Yeesu bí u-boonnooliibi yii: “Tí dùtīmaan lapu buḡbandi!”

36U-boonnooliibi yānti kunipaau yālee, ní bi kó buḡalimbu bun ni u n̄n kēēki kpāaḡ-u ki búnti. In̄aliḡfi iba mun n̄n táá-u.

37Bi cée ní kubuḡkpaan̄ḡu kubɔ kíl̄ ki bī jītí ki yòontí nnyim ki tòó buḡalimbun, ki yānti buḡalimbuee bī gbée nnyim kpala.

38Ama Yeesu ún̄ n̄n dō buḡalimbu boon pú ki kúl̄ diyikuḡkul ki gèeḡ, ní u-boonnooliibi finti-u, ní ki bí-u yii: “Ukpil, ti nín dàá kpúee, an kaa ká-saaa?”

39U fintèe, ní ki kpātí kubuḡu pu ní ki tükū dimḡol̄ yii: “Ḋmīl̄ kí dōoḡ soooo!” Ní kubuḡu kpāā gbéeḡ, ní an ḡmīl̄ fḡḡfḡḡ díkídiki.

40Niinee ní Yeesu bālfí u-boonnooliibi yii: “Ba ḡá ní ni fāḡkí mimmee? Ba pu ní naa māká m-pu?”

⁴¹Tifaandi n̄n baasii kó-bi tikpil, ní bi bálfi t̄ob yii: “Kijapaai nee n̄n baasii sá ŋma dee, ní ki s̄oñ̄ kubuŋu n̄i dim̄oal gbiliñ̄-u m̄n̄ nan dee.”

Maarki 5

¹Bi n̄n d̄ūti lapu buŋbandi Geereseen yab tiŋkin.

²Yeesu kpákati buŋalimbunee, kpalaayee, kijapaai kiba kin pu arasinii kā ki wáat̄e, nyánni kuceeun ki túŋkiñ̄-u.

³U n̄n k̄òd̄ akaakulin ní. Báà ub̄o kaa n̄n ŋūñ̄ k̄i b̄oob̄-u, báà bi yaa d̄ū ikusaka gba.

⁴Di sá bi n̄n b̄ā-u abaa ki gb̄n̄-u ikusaka mun, ní ú t̄iñ̄ ikusakee ní k̄i w̄iil̄ abaa mun. Ub̄o kaa n̄n ḡiñ̄ ŋūñ̄ k̄i p̄eefi-u.

⁵U n̄n bí ní ki ȳiñ̄ ŋw̄iñ̄ pu n̄i kunyeeu k̄ok̄o akaakulin n̄i ajoin pu ki k̄ūunt̄i ní ki cáá atan̄kpee ki ḡiñ̄ u-ba.

⁶U wál̄ Yeesu ndanee, ní ki s̄ánni ki d̄ómiñ̄ ki líti dicincibil u-nimiin,

⁷ní ki fáá mbiil̄ mp̄on̄ yii: “Yeesu Unimb̄oti un bí yilpuee Jip̄oñ̄, man n̄i si yii ba ní? M̄ d̄ū Unimb̄oti ki gb̄āam̄-si, taa s̄āñ̄-mi!”

⁸U n̄n l̄i m̄n̄ kun puee Yeesu n̄n l̄i-u yii: “Arasinii, nyā uninja nee ni!”

⁹Ní Yeesu bálfi-u yii: “Bi ȳi-si yii ba?” Ní uwaatee k̄iñ̄-u yii: “M-yindi di sá yii: 'Kusoojapaau,' kun puee ti w̄iñ̄ tikpil.”

¹⁰Ní u gb̄āam̄ Yeesu tikpil ki l̄i yii: “Taa j̄a-ti kitiñ̄ nee pu!”

¹¹Dijool diba n̄n bí niin, di-cañ̄inee difakitikpaandi diba n̄n sí ki j̄ñ̄.

¹²Arasiniibee gb̄āam̄-u yii: “C̄ant̄i tí c̄ùú k̄o afab nee ni.”

¹³Ní u p̄ú-bi mpaan, ní bi nyán̄ uwaatee ni ki k̄o afabin, ní difakitilee s̄āñ̄ ki w̄unti nsitimin ki j̄eet̄i dim̄oalin ki m̄úl̄ ki kp̄iñ̄. Afabee n̄n b̄āñ̄ kutukub bili nȳok̄om̄.

¹⁴Ní bifakpaaliibi s̄āñ̄ ki c̄ūt̄i kitiñ̄in n̄i ikaan ki máafi an b̄oti. Binib nyánni k̄i d̄āá kp̄eè tin di ŋ̄e,

¹⁵ki b̄āñ̄ Yeesu ceeyee ní ki k̄a uwaati un pu kurasiniipaau n̄n k̄eē kā ki p̄ēētiwan ki d̄akafi nnim̄ontiyaamin. Bi k̄a-uee, ní tifaandi kó-bi.

¹⁶Bin n̄n k̄a tin j̄it̄eē máafi bin k̄iñ̄ee an n̄n ŋ̄á pu ní uwaatee p̄óok̄i ní afab kp̄iñ̄yee.

¹⁷Dyunti gbantee ní bi k̄iñ̄ ki bí gb̄āam̄ Yeesu yii ú ȳiñ̄ bi-tiñ̄ki pu.

¹⁸Yeesu bí k̄òd̄ buŋalimbunee, ní uninja un n̄n wáat̄eē gb̄āam̄-u yii ú ȳant̄i ú táá-u k̄i n̄n k̄iñ̄ ki bí u-cee.

¹⁹Ama ní Yeesu kaa p̄ú-u nsan, ní ki bí-u yii: “N̄iñ̄ k̄ūñ̄ a-m̄oñ̄kiñ̄u a-yab cee k̄i m̄āafi-bi min ní ti-Dindaan s̄ún̄ a-saayee n̄i tin k̄ok̄o u ŋ̄á ki t̄iñ̄-see.”

- 20Ní kijapaayee búntì ki kíí ki máafi ntimu saalaa jaan̄ji kòkòn tin kòkò Yeesu ñá ki tī-uee, ní bàà ñma bākatì sèeee.
- 21Yeesu kó buṅalimbun ki fātii dūtì dibuṅbandi. U dáá bí dibuṅbandee ní dinikitikpaandi dómín ki kpáfi u-cee.
- 22Kukpafidii kpiliu ubò nìn dómín, bi yíi-u Jayirusi. U ká Yeesuee, ní ki gbān̄n u-nimiin
- 23ki mèé-u nì igbaam poon ki bí yii: “M-sapòmbiki būn̄ ki dàá kpú. Á jī kimotii kí péédān̄ kí dū a-ṅal kí páan̄ ki-pu, kí cáan̄-kì kí ṅmátí.”
- 24Ní u nì Yeesu búntì, ní dinikitilee fāā ki bīn̄n u-boon bòm̄mm.
- 25Unimpu ubò nìn ṅmāl̄ niin ki fūul̄ ṅkpin an kaa gún̄ ali abin saalaa nì ali.
- 26U nìn jín̄ falaa tikpil ki nìn bíil̄ u-nimiliṅ mun kòkò binyòdambi tikpil cee, kaa kpáā ká dicaandi, ní an mōt̄ii púnt̄i-u.
- 27Unimpuee nìn gbīl̄ bi sòon̄ Yeesu puee, ní u dómín̄ kunipaaun ki dīn̄ Yeesu boon pú ki gbēe u-bòkutil.
- 28Di sá u nìn lī u-pòbilin yii: “M yaan̄ péēṅún̄ ki gbēe-u-bòkutil kpaṅkpan m bàà kānt̄i dicaandi.”
- 29Niinee, fatiku un nyēe-uee kpáā gún̄, ní u gbīl̄ u-wuntin yii u pòkì.
- 30Kpalaayee Yeesu gbīl̄ u-ban yii mpon̄ ṅubò nyán̄ u-ni ní u fāt̄i kunipaauee pu ki bí yii: “ጌma di gbēe m-bòkutil?”
- 31Ní u-boonooliibi kíi-u yii: “Sii wāl̄ kunipaau téekí-si yéè, ní a bàlf̄i yii: 'ጌma gbēe-maaan?' “
- 32Yeesu kpēēki mānt̄i ki tú ki nyàab̄ kí béé un di ṅá mimmee.
- 33Niinee, tifaandi cúú unimpuee, u-wunti kíí ki bí jìkì, kun puee u nyí tin di jít̄i u-puee. Ní u dómín̄ ki lít̄i Yeesu taan̄i taapu ní ki kàān̄-u tikòkò nì ibaam̄on.
- 34Niinee ní Yeesu bí-u yii: “M-bisal, a nín̄ fōō ki kíi puee fī-si. Nín̄ cá nì ṅgbans̄ṅfi, a-weeni ṅ yānt̄i-si.”
- 35Waa láá ṅmíl̄, ní kukpafidii kpiliuee yab biba nyán̄n̄i u-dumpu ki bāan̄ ki bí yii: “A-bisal kp̄i. Taa ti páb̄ ukpil ṅ dāan̄.”
- 36Yeesu gbīl̄ dinyòbundi din bi lēe, ní ki tükū kukpafidii kpiliuee yii: “Taa yānt̄i a-pòbil ṅ bíil̄! Sii dee fōō man kí kíí.”
- 37Waa yānt̄i báà ubò ṅ céen̄-u ki kút̄i Piyeer nì Jaaki nì Jaan̄ Jaaki naal pu.
- 38Bi nín̄ bàñ̄ kukpafidii kpiliuee dumpuee, Yeesu ká binib̄ gà dituweel an tùm̄ dàiiyee,
- 39ní u kó ki bí-bi yii: “Ba pu ní ni sūn̄ ki ṅāan̄ kuwoou mín̄? Kibikee kaa kp̄i, ki gèen̄ ní.”

⁴⁰Ní bi bī bèeĪ-u, ní u jīn bi-kòkò ki nyántì, ní ki yòòn kibiki baa nì ki-na nì u-boonnooliibi bita bin nìn céeñní-uee, ki kòn laakin kibikee dōee,

⁴¹ní u cúú kibikee ñal ki bí-kì yii: “Taliita kumii.” An taapu di sá yii: “Kisapombiki, yīkì, sii ní m lì!”

⁴²Kpalaayee ní kibikee nyī yīkì ki bī còom̄. Kì nìn cáá abin saalaa nì ali ní. Ní bin nìn bí niinee bākatì sèeee.

⁴³Ama ní Yeesu kpáafi-bi tiñan bí taa yàntì báà ubò ñ béé, ní ki bí-bi yii, “Tīmaan-kì tijin.”

Maarki 6

¹Yeesu nyán niinee, ki nín kùn u-tiñkin, ní u-boonnooliibi táá-u.

²Dwiññuñfikaa bāánee, ní u kíí ki bī dākà binib Unimbōti bōti kukpafidiin. Ní kunipaau kun nìn bí ki pīlfin̄-uee bākatì ki bī l̄ yii: “U nín kánní la tin u sòòn nan dee? U nín kánní la iciin nee bulfi dee? An dī mana ní u ñūn ki ñáań maamaacib nee?”

³Ti nyí-uaa! An sá Maarii jipōon kapintaa! U-naalib mun di sá Jaaki nì Joosee nì Juudi nì Siimōn. U-niisalib mun di kód̄ ti-kansikin neeyaa!” Ní an yāntì baa ti ñūn kí fōō-u kí kíí.

⁴Ní Yeesu bí-bi yii: “Laaaba yab kaa kpèé Unimbōti bōnaatiliu fam see u-tiñkin yab nì un bin pēēyee nì u-cindin yab.”

⁵Waa nìn gītī ñúh ki ñá maamaaci tuuñji niin, see bibunliibi ñwaam pu ní u nìn dū u-ñalii ki páań ní ki cáań-bi.

⁶Ní u bākatì bi nín kaa fōō-u ki kííyee. Dyunti gbantee, Yeesu nìn yīh̄n̄ ntimbilimu nì ikpaanceeti ki dākà binib Unimbōti bōti.

⁷Ní u kpáfi u-kpambaliñ saalaa nì alee, ní ki tú-bi bili bili, ní ki tī-bi mpon bí n̄n jì arasiniibi,

⁸ní ki kpáafi-bi yii: “Ni yaa cée ní taa n̄n ñúb̄ tiba see ñkpōndò baba, ní taa n̄n ñúb̄ tijin kí taa yòòn̄ atòkòl kí taa n̄n̄ fúuń animil mun,

⁹kí taa pēēñ abokuti ali ali, ama kí n̄n̄ táká anaataka.”

¹⁰U tükū-bi yii: “Ni yaa kó kudii kun nee, n̄n̄ bímaan niin kí n̄n̄ cí daliñkin ni dàá yīkèe.

¹¹Ni yaa bāñ laakin binib yaa yī, kaa là kí fōō-ni, kaa tí là kí pīlfin̄-nee, nyāmaan niin kí pítí ni-taañi kpōñkpōm kí yāl̄ bi-tiñki pu, án n̄n̄ sá-bi kudaañju yii ni cáań-bi tibōmōntiil ní baa fōō.”

¹²Ní bi búntì ki cūti bī sòòn nì binib yii bí kpántí bi-bimbim.

¹³Bi nìn jì arasiniibi tikpil biwaatiibi pu, ní ki cáá ñkpam ki ñáań bibunliibi tikpil pu ki cāantí-bi.

14Ubɔti Eeroodi n̄n gbīl̄ bi sòh̄n Yeesu pu, kun puee u-yindi n̄n gbīti ajan kəkəwooooo. Binib biba n̄n sòh̄n Yeesu pu yii: “An sá Jaan un n̄n fùul̄ binib Unimbɔti nyimee di fikiti ditaŋkpiilin, an pu ní u ŋūh̄ ki ŋáān maamaacib.”

15Biba lī yii: “An sá Eelii.” Ní bin kínee mun lī yii: “U sá Unimbɔti bɔnaatiliu kii bitɪŋkpikib bɔnaatiliibi ubɔee.”

16Eeroodi, ùh̄ nín gbīlee, ní u lī yii: “Jaan un man yānti bi tīl̄ u-yilee, di fikiti.”

17-18Di sá yii Eeroodi n̄n cúu u-maan Fiiliipi nimpuu Eeroodiya ki cáá. Ní Jaan bí-u yii: “An kaa máān á cáá a-maan nimpuu.” Tíh̄ pu ní Eeroodi n̄n yānti bi cúu Jaan ki bóob̄ ki tó sarkan.

19Eeroodiya n̄n fɔ̄ɔ̄ Jaan pu kudòŋu ki nyàab̄ kí kpò-u, ama Eeroodi puee, waa n̄n ŋūh̄.

20Di sá yii Eeroodi, ùh̄ n̄n fàŋkí Jaan ki nyí yii Jaan sá ibaamɔndaan ki sá Unimbɔti tɔntɔnliu. An puee Eeroodi n̄n mótí u-pu. Jaan yaa n̄n sòh̄nee, an n̄n páb̄ Eeroodi ama u n̄n néeh̄ ki pílfín̄-u.

21Dalbee, Eeroodiya ká nsan ŋun u dàá dī kí kpò Jaanyee. Di sá yii Eeroodi n̄n bí jīh̄ u-maalwiinŋu jīŋaaliu. U n̄n yíih̄ u-kpilib n̄n bisoojakpilib n̄n Gaaliilee yidambi kəkə.

22Dyunti ŋun bi kpáfèe, Eeroodiya bisal kóon̄ bi-kansikin ki ŋón̄ ní u-ŋool fáatì ubɔti Eeroodi n̄n bin kəkə u yíinee, ní u bí usapɔnee yii: “Mèè-mi tin kəkə a lèe, m dàá tī-si!”

23Ní u pūti ki lī yii: “Tin kamaa a yaa bālfí-mee, m dàá tī-si, báà an yaa sá m-beel dijandi, m dàá tī-si!”

24Niinee ní usapɔnee nyá̄n ki cūti ki bālfí u-na yii: “M-na, m̄ mèè ba?” Ní u-na kí-u yii: “Lì yii a là Jaan un fùul̄ binib Unimbɔti nyimee yil.”

25Ní u fātì tóotì ki gítì ubɔti cee ki bí-u yii: “M là yii á tükutī Jaan un fùul̄ binib Unimbɔti nyimee yil kí tàkañ-mi kpaatan kəŋkənee.”

26Niinee, kunimbaau kó ubɔti, ú mun gítí dāá pūti u-nicambi bin u yíinee nimiin, waa ti ŋūh̄ kí yíí.

27Ní u tú dicilpu niin u-soojau ubɔ ki tükū-u yii ú cūu cáān Jaan yil. Ní soojee cūti ki kó kusarkadiin ki lafun tükutiñ̄ Jaan yil

28ki tàkañní kpaatan, ki cáān ki ŋúbiñ̄ usapɔnee, ní usapɔnee mun cáā tī u-na.

29Jaan boonooliibi nín gbīl̄ an bɔtee, ní bi dómiñ̄ ki yɔ̄h̄n̄-u ki cáā síb̄.

30Yeesu kpambaliŋ ŋin u n̄n túee kpáfí u-cee ki máafi-u bi nín cūti ki ŋá tɪnyee n̄n tin bi dàkēe.

31Ní Yeesu bí-bi yii: “Dāam̄maan tí kàkatī ŋkpaanceeti, laakin binib kpée ní ŋūŋfi fii.” Kun puee binib n̄n cáá ní libitilibiti, biba kùn̄ ní biba bàñ̄, an yānti Yeesu n̄n u-kpambaliŋ kaa n̄n cáá mpaan kí jī tijin.

- 32Ní bi kó buɔalimbun ki kākati laakin binib kaa bée.
- 33Binib tikpil ká bi nín cée ní ki béè-bi, ní ki sán ki nyán ntimun ki dū ataa ki péen-bi ki bān laakin bi cée.
- 34Yeesu kpákati buɔalimbunee, ki ká kunipaau sí kii ipii in kaa cáá ukpaalee. An nín kó-u falaa ní u kíí ki bíí dākā-bi tiboti tikpil.
- 35Kujoou nín bíí jótée, u-boonnooliibi sútín ki píl̄-u ki tükū-u yii: “Binib kaa kóò laakin ti sí nee, kí wàatēe, kujoou mun bíí jótí.
- 36Yànti binib nee n̄ cù ikaan n̄ ntimbilimu mun píl̄n̄ dooyee kí dā tijin kí jī.”
- 37Ní Yeesu kíí-bi yii: “Nimbi ni-ba tīmaan-bi tijin bí jī!” Ní bi fātii bālf̄i-u yii: “Mimnee, ti dù animil cutimaanyi ní kí dā tijin kí tī bí jī deeyaaa?”
- 38Ní Yeesu mun fātii bālf̄i-bi yii: “Kpɔnɔb biɔa ní ni cáá? Cùú kpèèmaan!” Bi cūti bālf̄i ki béèyee, ní ki bí-u yii: “Ti cáá kpɔnɔb biɔmoo n̄ ijɔm ili.”
- 39Niinee ní u tükū u-boonnooliibi bí tükù binib n̄ kāl̄ akiti akiti kumɔsɔɔu pu.
- 40Ní bi kāl̄ kitiɔ. Akiti aba cáá binib dilaataal, aba mun cáá imuŋku ili n̄ saalaa.
- 41Yeesu f̄ɔɔ kpɔnɔb biɔmoo n̄ ijɔm ilee ki wáan̄ kutaa ki jáam̄ Unimboti tijinee pu, ní ki gífi gífi kpɔnɔb ki tī u-boonnooliibi bí yàkatī binib. U yàkatī ijɔm ilee mun ki tī bi-kɔkɔ,
- 42ní bi-kɔkɔ jín ki díkí.
- 43Ní u-boonnooliibi t̄ɔɔ akpɔnɔkati n̄ ajɔŋgin n̄in kínee ki gbéè tikabiti saalaa n̄ tili.
- 44Bin nín jín tijin gbantee nín nyán bininjab kutukub biɔmoo.
- 45Niinee ní Yeesu bí u-boonnooliibi yii bín̄ n̄ kó buɔalimbu kí lintī malaa kí dùtī dimɔɔl Beetsayida watil pú, nyunti gbantee ún̄ n̄ yànti samaayee n̄ kpì.
- 46U yānti samaayee nín kùnee ní u jóm̄ dijool pu kí mèè.
- 47Ku jótèe u-boonnooliibi bān̄ dimɔɔl kansikin, Yeesu ún̄ dáá bín̄ dibuŋgbandi u-baba.
- 48U ká yii u-boonnooliibi bí ki n̄aál̄, an kaa cá, kun puee kubuŋu nín tún̄kiín-bi. Ki cá kutaawuntin̄uee ní u tókɔn̄ nnyim pu ki còom̄ ki cá bi-cee ki dáá jítí bi-pu.
- 49Bi nín ká u còom̄in̄ nnyim pu ki dòoñee, ní bi dākafi yii an sá ufaŋfanti, ní bi kíí ki bíí gbáà ibiil,
- 50kun puee bi-kɔkɔ nín wál̄-u ní bi-pɔbiliŋ bíí. Kpalaayee, Yeesu sòon̄ n̄ bi yii: “Cúúmaan ni-pɔbiliŋ, an sá man! Taa fàŋkìmaan!”
- 51Niinee ní u jóm̄ bi-cee buɔalimbun, ní kubuŋu mun n̄míl̄. Tifaandi nín kó-bi, ní bi kāl̄ ki bākati.

⁵²Di sá yii baa nìn gbìl̄ Yeesu nín nìn dū kp̄on̄ob̄ fiii ki b̄t̄i ki kp̄īn̄ kunipaauee taapu, kun puee bi-p̄obilī nìn gb̄fi.

⁵³Bi d̄t̄i dim̄ōl̄ ki d̄ōyee, ki kó Geenesareeti tīn̄ki jaan̄hun ki s̄l̄ dibun̄gbandi.

⁵⁴Dyunti hun bi kp̄akat̄i bun̄alimbunee, binib kp̄aā bée Yeesu,

⁵⁵ní ki s̄an̄ ki c̄t̄i ntimun ki máafi ní binib yòont̄īn̄ bibunliibi ki t̄unt̄īn̄ ilún pu ki c̄ab̄īn̄ laakin Yeesu bée.

⁵⁶Mín̄ ní báa laakin ní u yaa nìn bàñee, ntingbamu neeee, ntingkpaamu neeee, ikaaneeee, binib nìn c̄ab̄īn̄ bibunliibi ki b̄īl̄ im̄ōn̄kijaa ní ki gb̄aām̄-u yii ú pé̄ȳant̄ī bibunliibee n̄ d̄áb̄ u-b̄okutil nȳōōgb̄an̄gi. Bin k̄ōk̄ō yaa nìn gb̄ē-uee p̄ōk̄í ní.

Maarki 7

¹Fariisab n̄i bimaradakaliibi biba nìn nȳán̄n̄i Jeerusaleem ki d̄ōm̄īn̄ ki kp̄afi Yeesu cee.

²Bi bí niinee, ní ki ká Yeesu boonnooliibi biba j̄n̄, kaa fint̄i bi-ḡalii kii bi-naanjab koobilī nín sá puee.

³Di sá yii Fariisab n̄i Juuda yab bin kíñee k̄ōk̄ō yaa kaa fint̄i bi-ḡalii tīn̄, kii bi-naanjab nín nìn ḡaān̄ puee, baa j̄n̄.

⁴Bi yaa tí nȳán̄n̄i kitīn̄ ki b̄aañee, baa tí j̄n̄ asee bí fint̄i bi-ba n̄i nnyim kí w̄aat̄i, ní kí nín j̄i. Bi cáa akoobil tikpil ki k̄ut̄i ḡin bí nee pu: ḡiba sá bí fint̄i k̄ōn̄k̄ombi, kí fint̄i aboon n̄i asambil.

⁵Tīn̄ pu ní Fariisab n̄i bimaradakaliibee nìn b̄alfi Yeesu yii: “Ba pu ní a-boonnooliibi kaa ḡúb̄ ti-naanjab koobilī, kaa fint̄i ki j̄n̄?”

⁶Ní Yeesu kíi-bi yii: “Mpoonnyoondambi, an pu ní Unimb̄oti b̄onaatiliu Eesayi ḡm̄ān̄ u-takaldaun ki s̄ōn̄ ni-pu yii Unimb̄oti bí yii: 'Binib nee nȳōn̄k̄i-mi n̄i bi-nȳōmmun fam ní. Ama bi-p̄obilī d̄at̄īn̄-mi.

⁷Bi j̄aām̄-mi fam ní, kun puee tin binib náañee ní bi d̄ak̄à, ní ki cáa ȳī man marab.' “

⁸Ní Yeesu n̄ik̄i ki l̄i-bi yii: “Ni f̄eēn̄ Unimb̄oti marab ki f̄ōl̄ n̄nibiyaamu koobilī.”

⁹Ní u ḡit̄i k̄ut̄i yii: “Ni f̄eēn̄ Unimb̄oti marab tīn̄ pu kí ḡm̄ā kí ḡúb̄ nimbi ni-ba koobilī.

¹⁰Mooisi nìn l̄i u-marabin yii: 'Á n̄n̄ tó a-baa n̄i a-na,' ní ki ḡit̄i l̄i yii: 'Un yaa s̄ōn̄ ki b̄īl̄ u-baa kii u-nee, séé bí kp̄ō-u.'

¹¹Ama nimbi li yii, unil yaa cáa tiba ki bàa ḡūn̄ kí t̄ī u-na kii u-baayee u ḡūn̄ kí li yii: 'An wanti sá k̄ōban', (an d̄ak̄à yii saraa ki t̄ī Unimb̄oti).

¹²U yaa l̄i mimmee, naa ti ȳant̄i ú ḡá tiba kí t̄ī u-baa kii u-na.

¹³Mín̄ ní ni cáa nimbi ni-ba koobilī ḡin ni-baabi d̄ak̄ā-nee ki cáa kp̄it̄i Unimb̄oti b̄oti. Tiwan tikpil bí ni ḡaān̄ mín̄ mbaantiim.”

14Mín boonee, Yeesu gítī yíin kunipaau u-cee, ní ki tükū-bi yii: “Ni-kəkə́ n̄ p̄l̄fimaan kí gbīl̄ m̄ nín dàá l̄i puee taapu!

15Tiba kaa nyēēn̄ dipaal pu kí kó unilin kí kón̄-u tijəkəndi Unimbəti nimiin. An sá tin nyēēn̄ unilinee di kōntí-u tijəkəndi Unimbəti nimiin.

[16Un yaa cáá ditafalee n̄ gbīl̄ taapu.”]

17Dyunti n̄un u kó kudiin ki kíñ u-babee, ní u-boonnooliibi bālf̄i-u dilaŋkpandi din u bàà gāāyee taapu.

18Ní u kíf̄-bi yii: “Ni mun kaa cáá iciin níin? Naa gbīl̄ yii tin kəkə́ nyēēn̄ dipaal pu ki kóo unilinee kaa n̄un̄ kí kón̄-u tijəkəndi Unimbəti nimiinaaan?

19Di sá yii tijikaal kaa kóo unil pəb̄ilin, an kóo u-poon ní, ní ú cù pəəm.” (Yeesu l̄i mín̄ ki dākā yii tijikaal kəkə́ n̄ān̄ ki t̄i unil n̄ j̄i.)

20U gítī l̄i yii: “Tin nyēēn̄ unilinee di sá tin kōntí-u tijəkəndi Unimbəti nimiinee.

21Di sá yii binib pəb̄il̄in̄ ní ilandəkək̄piti kəkə́ nyēēn̄: binaacimpombi n̄i bisapombi jəkənti, bunaayubu, nnikpaakoon,

22binimpoobi n̄i bininjab laakpaati, ikummunti, digan̄gam, diŋmatindi, bimaraməntiibi fátam, nnimidiki, tibəfan, timən̄ n̄i nyipən̄.

23Tibək̄piti gbanti kəkə́woooo nyēēn̄ binib pəb̄il̄in̄ ní ki kōntí-bi tijəkəndi.”

24Yeesu yík̄i niinee, ki pəot̄i Tiir n̄i Siidən̄ jaan̄pu pú. U bān̄ ki kó kudii kubən̄, kaa bàà là yii bāà ubə́ n̄ béé u-pu, n̄i mín̄ kəkə́ee, waa n̄ún̄ ki bál̄.

25Unimpu ubə́ n̄in̄ bí, ki cáá kisapəmbiki arasinií k̄a ki-pu. U nín̄ gbīl̄ bi sòon̄ Yeesu puee, waa ti kāl̄, u yík̄in̄ ní malaa, ki dómín̄ ki líti u-nimiin.

26Unimpu gbanti kaa n̄in̄ sá Ujuudanimpu, u sá Feenisii, Siirii tiŋkin ní. U mēēYeesu n̄ jà arasiniyee u-bisal pu.

27Ní Yeesu kíf̄-u yii: “Yànt̄i mbiyaamu n̄ díki kí wàat̄i. Kun puee an kaa máan̄ bí dū mbiyaamu jinti kí t̄i mbəbiyaamu!”

28Ní unimpuee f̄ati ki kíf̄-u yii: “Tiŋman, an sá mín̄ ní, m-Dindaan. Ama mbiyaamu yaa bíi j̄in̄ an gbátée, mbəbiyaamu mun t̄ó igbasigbasi ní.”

29Niinee, ní Yeesu bí-u yii: “A kíf̄ tiŋan! Mín̄ puee, níñ kùn̄. Arasiniyee nyán̄ a-bisalin.”

30Unimpuee f̄ati gítin̄ u-dumpuee arasiniyee nyán̄ u-bisalin u pók̄i ki d̄o u-doon̄pu pu.

31Yeesu yík̄i Tiir tiŋkin ki f̄ati d̄in̄ Siidən̄, ki jítiñ̄ n̄timu saalaa pu ki nín̄ d̄oon̄ Gaaliilee mool watil.

32U bān̄ niinee, bi cáan̄-u uməomiin ubə́ ní ki mēē-u yii ú dū u-n̄alii kí páan̄ u-pu.

33Ní Yeesu ȳd̄on̄-u ki cūnn̄i n̄kpaanceeti u n̄i u liitil, ki dū u-n̄ambiyaamu ki b̄o uməomiinee tafal̄in̄, ní ki t̄iil̄ timətan̄ ki dūu gbēēuməomiinee limbil,

- ³⁴ki wáaṅ kutaa ki fáá diniindi, ní ki lī yii: “Eefata!” An taapu sá yii: “Cúú ḡátí!”
- ³⁵Niin niin ní umṵmiinee tafaliḡ cúú ḡátì, ní u-limbil mun búti, ní u kíṅ ki sòòṅ tiḡan.
- ³⁶Ní Yeesu kpáafi-bi bí taa péēmāafi báà ubṵ tin jítèe. Ama Yeesu nín móti yii bí taa lèe, mín ní bín dàá nín mòtí lí.
- ³⁷Bi nìn bākati tikpil, ní ki lí yii: “Tin kṵkṵ u ḡáanee ḡān ki lákati, ali ki yānti bitafakpaafub gbìl, bimṵmiimbi sòòṅ!”

Maarki 8

- ¹Iwiin gbanti poonee, kunipaau kubṵ tí fātii kpáfi u-cee, ní kaa nìn cáá tiba kí jī. An puee Yeesu yíin u-boonnooliibi ki bí-bi yii
- ²“Nnibiiim nee gbí-mi falaa, di sá yii iwiin ita sèé bi nín bí m-cee, kaa ti cáá tiba kí jēe.
- ³M yaa jīn-bi nì ḡkùm nee, bí nīn kùṅ bi-dumpuiyee, bi dàá yòl nsanni, kun puee bikansikin tikpil nyánní ndan.”
- ⁴Niinee ní u-boonnooliibi kí-u yii: “La ní ti dàá kánní tijin kupṵṵ nee ni kí kpíin binib nee?”
- ⁵Ní Yeesu fātii bālfí-bi yii: “Kpṵṵṵ biḡa ní ni cáá?” Ní bi kí-u yii: “Biluli.”
- ⁶U yānti kunipaau kāl taapu ki dṵṵyee, ní u yṵṵṵ kpṵṵṵ bilulee ki jáam Unimbṵti tijin gbanti pu, ní ki gífi gífi ki tī u-boonnooliibi ḡ yākatī binib. Ní bi dūu yākatī kunipaau.
- ⁷U-boonnooliibi nìn cáá ḡṵmbiyaamu mubṵ mun. U jáam Unimbṵti mú mun pu ki dṵṵyee ní ki tükū-bi yii bí dū-mu kí yākatī.
- ⁸Kunipaau jín ki díkí, ní bi kṵṵṵ aḡḡḡḡ nì akpṵṵṵṵ ḡṵn kínee ki gbéēṅ tikabiti tiluli.
- ⁹Bin nìn jín an jikaati gbantee ḡṵṵ kí bà binib kutukub binaa. Bi jín ki dṵṵyee, ní u yānti bi nín kùṅ,
- ¹⁰ní u nì u-boonnooliibi kó buḡalimbun ki nín cá Dalmanuta watil.
- ¹¹Fariisab nìn jīnní Yeesu boon ki bāaṅ ki bī kpākantí-u kí pí-u tibṵti. Bi nìn bālfí-u yii ú ḡá maamaaci ubṵ un nyánní Unimbṵti ceeyee.
- ¹²Ní Yeesu fáá diniindi ní ki lī yii: “Ba pu ní waanee nib nee bālfí kí ká kudaḡḡḡ? Ibaamṵn ní m sòòṅ nì ni, ni kpá kí ká kudaḡḡḡ báà kubṵ!”
- ¹³U lī mín ki dṵṵyee, ní ki fātii tí kó buḡalimbun ki dūtī lapu pu buḡḡbandi ki wāati-bi.
- ¹⁴Yeesu boonnooliibi nìn súnti kaa kpáaṅ tijin, asee kpṵṵṵbaanti di nìn tàkā bi-cee buḡalimbun.

- 15 Ní Yeesu kpáafi-bi ki bí-bi yii: “Nín nyímmaan ni-ba nì Fariisab nì Eeroodi kpɔnɔ nyɔkɔŋu!”
- 16 U-boonnooliibi dākafi ki lī bi-ŋmanɪŋma kansikin yii: “Ti nín kaa ɲúb tijinee pu ní u kalin sòòn mimmaan?”
- 17 Yeesu bèè bi-landɔkɔiee ní ki bí-bi yii: “Ba pu ní ni sòòn ni nín kaa ɲúbiɲ kpɔnɔee pu? Nìn dín naa láá gbìl tibɔti taapuɔɔ? Naa láá bèè-maaan?”
- 18 Ni pɔbiliŋ pɔɔ níin? Ni cáá animil fam ní kaa wālāaa? Ni cáá atafal ki pílfi ní kaa gbìlāaa? Naa cáá nlandɔkɔ
- 19 Kí tétí ɲyunti ɲun m dū kpɔnɔb biŋmoo ki gífi gífi ki tī binib kutukub biŋmoo ɲmó ki díkéeee? Tikabiti tiŋa ní ni tɔɔ akati ki gbéè ní?” Ní bi kíi-u yii: “Saalaa nì tili.”
- 20 “Kin, m nín gífi gífi kpɔnɔb biluli ki tī binib kutukub binaayee, tikabiti tiŋa ní ni tí kóòn akati ki gbéè ní?” Ní bi tí kíi-u yii: “Tiluli.”
- 21 Ní u lī-bi yii: “Ní ali nìn dín, naa láá gbìlāaa?”
- 22 Bi bàñ Beetsayidee binib biba cáañ uɔfu ubɔ Yeesu cee ki gbāam-u yii ú gbēēuɔfuee.
- 23 Yeesu cúú uɔfuee ɲal ki kpáañ-u ki kpɔtì kitimbiliiyee kpaanceetiŋu, ní ki tíil timɔtan ki ɲá uɔfuee nimilin, ki dū u-ɲalii ki gbēēu-nimiliŋ, ní ki bālfi-u yii: “A wāl tibāaa?”
- 24 Uɔfuee kpēē, ní ki bí yii: “M wāl binib, ní bi bí kii isufi di còomēe.”
- 25 Niinee ní Yeesu gítí tí dū u-ɲalii ki gbēē u-nimiliŋ. ɔyuntēe, uɔfuee kpítì u-nimiliŋ ki kpēēyee ní ki pɔkì ki kíñ ki wāl bómbɔŋ.
- 26 Ní Yeesu tükū-u yii: “Nín kùn a-dumpu kí taa dī kitin poon.”
- 27 Ní Yeesu nì u-boonnooliibi yíkì buntì Seesaaree-Fiiliipi timbilimmu watil pú. Bi bàñ nsanee, ní u bālfi u-boonnooliibi yii: “Binib lì yii m sá ɲma ní?”
- 28 Ní bi kíi-u yii: “Biba lì yii a sá Jaan un fùul binib Unimbɔti nyimee, ní biba mun lì yii a sá Eelii. Biba bíñ ceeyee, a sá Unimbɔti bɔnaatiliibi kansikin ubɔ ní.” Ní u bālfi-bi yii:
- 29 “Kin nimbi faa, ɲma ní nimbi nyí yii m sá ní?” Ní Piyeer kíi-u yii: “Sii di sá Kriisitoo!”
- 30 Niinee ní Yeesu kpáafi-bi tiŋan bí taa sòòn u-pu mín báà ubɔ cee.
- 31 ɔyunti gbantēe, u kíí ki bí tükù-bi yii: “An sá man kinibiki ń jī falaa tikpil; bikpilib, nì bisaraaŋakpilib, nì bimaradakaliibi kɔkɔ dàá dāá lì yii baa là m-bɔti, bi dàá dāá kpò-mi, ní m fātī fikiti winta dal.”
- 32 U nìn péētükù-bi an bɔtee ki cántí-bi ní. Ní Piyeer cáá-u ki nyántì ɲkpaanceeti ki kíí ki bí wòòn-u

³³Niinee ní Yeesu fātì kpēēu-boonnooliibi ní ki kpātì Piyeer pu ki bí yii: “Sii un cáá Sitaan landəkəŋuee, sútí kí wàatī-mi! Aa dàkafī Unimbəti yam, a-landəkəi sá binib landəkəi ní.”

³⁴U lī mín ki dóòyee, ní ki yíín kunipaau nì u-boonnooliibi u-cee, ní ki bí-bi yii: “Un yaa là kí nók-mee n fǎ ún u-ba nín là puee kí nók min ní man lèe, kí yòoñ u-dəpuntikaan̄u kí n̄n nók-mi.

³⁵Kun puee un di yaa là kí fī u-manɣfalee dàá fá-dì, ama un di yaa dū u-manɣfal ki fá kí nók-mi kí sòoñ m-bòməntiiti kí tī binibee, udaan di dàá fī u-manɣfal.

³⁶Unil, a yaa jín duulnya nee kəkə ní sisi a-ba wánkèe, a páatì ba?

³⁷Ba ní a ŋūn kí dūú pà kí fī a-ba?

³⁸Un kamaa yaa cáá icoo man nì m-bəti pu waanee nib bin nyēēUnimbəti boon ki ŋáań ikpíteee kansikinee, ŋyunti ŋun m yaa láā gítín m-baa nyootin nì u-tūuníee man Kinibiki dàá dāá kón udaan icoo.”

Maarki 9

¹Ní Yeesu gítí kútì ki lī yii: “Ibaaməń ní m tükù-ni, ni-kansikin biba kaa làá kpú ní kí ká Unimbəti beel dómiń nì mpəń.”

²Iwiin iluu boonee, Yeesu gāntì Piyeer nì Jaaki nì Jaan ki cáá-bi ki jóm̄ dijoofoəkəl diba pu. Niinee ní u cúú u-ba ki kpántì

³ní u-wampeenkaati píil kánkaŋ ki kín ki jìl pàlpal. Unil báà ubə kitiŋ nee pu kaa ŋūn kí fintí tiwan n̄ píil̄ kii u-wanti nín n̄n pīn̄ puee.

⁴Niinee ní akpambal atee kpēēyee Eelii nì Mooisi di sí bi nì Yeesu sòoñee.

⁵Ní Piyeer tükū Yeesu yii: “Ukpil, an ŋān tí n̄n bí doo; tí gāa tibín tita: sii kubə, Mooisi kubə, Eelii kubə!”

⁶Di sá yii waa ti nyí u nín dàá l̄ puee, kun puee tifaandi n̄n kó-bi tikpil.

⁷Niinee, ditagbandi diba dómiń ki bīn̄ bi-pu, ní bi gbīl̄ Unimbəti sòoñní ditagbandee ni yii: “Un bí nee di sá m-Jipəneeŋkaau. Ní p̄l̄f̄im̄maan-u!”

⁸Kpalaayee, bi fātì kpēēki māntì ki tú, kaa ti ká báà ubə asee Yeesu baba di kín bi-cee.

⁹Dyunti ŋun bi fātì kpákatiń dijool puee ní Yeesu kpáafi-bi bí taa māafi báà ubə tin bi kée kí n̄n cí daliŋkin ún̄ Kinibiki dàá dāá fikit̄ ditaŋkpiilinee.

¹⁰Bi kpáafi dinyəəbundee bi-ni, nì mín kəkəee bi gítí balfi təb yii: “Ba di sá yii ú fikit̄ ditaŋkpiilinee?”

¹¹Ní bi balfi-u dinyəəbundi nee yii: “Ba pu ní bimaradakaliibi bí yii Eelii di máań kí péé kí dāań kí wàatī ní Kriisitoo n̄ nín dāań ní?”

- ³⁰Bi yíkì niinee ní ki cū̀tì jí̀tì Gaaliilee. Yeesu kaa nìn là bàà ubó n bée u-pu.
- ³¹Di sá u nìn dàkà u-boonnooliibi ki tükù-bi yii: “Bi dàá cúú man Kinibiki kí ñúbiñ binib bí kpò-mi. Bi yaa kũ̀-̀mi, ñwintataati dal m dàá fikiṭi.”
- ³²U-boonnooliibi kaa nìn gbìl̄ tibotee taapu ní ki fā̀ṅkì kaa bā̀lfi-u ti-taapu.
- ³³Dyunti ñun bi bā̀ñ Kapeenaayum ki kó kudiinee, ní Yeesu bā̀lfi-bi yii: “Ba pu ní ni bàà kpákà nsanee?”
- ³⁴Ní bi ñmí: di sá yii tikpiti pu ní bi bàà kpákà.
- ³⁵Niinee ní u kāl̄ ní ki yíin u-boonnooliibi saalaa nì bilee ní ki tükũ-bi yii: “Un yaa là kí n̄n sá usanliitee, udaan n̄ paañ bàà ñma boon kí n̄n sá bàà ñma tontonliu.”
- ³⁶U l̄i m̄n̄ ki dóoyee, ní ki cū̀tì ki cúuñ kibiyaawaai kiba ñal ki cáan-kì ki síin bi-kansikin, ní ki dũ u-ñalii ki kpāl̄-kì, ní ki bí-bi yii:
- ³⁷“Un kamaa yaa f̄ṣ̄ kibiyaawaai kiba kii kínee juti man puee, udaan f̄ṣ̄ man dee. Un kamaa yaa tí f̄ṣ̄ mamee, kaa sá man baba ní u f̄ṣ̄, udaan f̄ṣ̄ un túnní-mee mun dee.”
- ³⁸Ní Jaan bí-u yii: “Ukpil, ti ká uninja ubo un kaa sá ti-yoúee cáá a-yindi ki jì arasiniibi, ní ti bí yii ú taa ti ñá m̄n̄, kun puee waa bí ti-kansikin.”
- ³⁹Ní Yeesu kí-u yii: “Taa n̄n̄ p̄intímaan-u nsan! Di sá yii unil kaa ñáan maamaaci man yindi pu, kí p̄tì kpáā bí s̄on̄ m-pu tikpiti.
- ⁴⁰Un yaa kaa ná-tee sá ti-yoú ní.
- ⁴¹M tükù-ni ibaamon̄ yii un kamaa di yaa pú-ni kinyiñyukubiki ni nyuñ yii ni n̄n sá Kriisitoo yabee puee, udaan kaa làá lantí u-paati.”
- ⁴²“Ama un di yaa yā̀ntì mbiyaawaamu mun f̄ṣ̄-mi ki kíí nee kansikin kiba ñá ikpatee, bí dũ kunakpaan̄ñu kí kúl̄ udaan neen kí cáá-u kí t̄o tiñkune s̄o.
- ⁴³A-ñal yaa là kí nyā̀ntí-si nsamm̄nti poonee, tükut̄i-ñu kí fá. An ñā̀ñ ki t̄i-si á kó mmañfaf̄k̄on ni n̄ diñan̄gindi ki jí̀t̄iñ á n̄n cáá ñal ili kí tin kó ñmi ñun kaa kúu jaanjaanee ni.
- [⁴⁴Niin ní akoosibil ñin kaa kúyeee bí ki ñm̄ò binib. Niin di sá ñmi ñun bí kaa cáá digbintilee.]
- ⁴⁵A-taal yaa là kí nyā̀ntí-si nsamm̄nti poonee, tükut̄i-di kí fá. An ñā̀ñ ki t̄i-si á kó mmañfaf̄k̄on ni n̄ ditaagindi ki jí̀t̄iñ á n̄n cáá ataa ali bí tin dũ-si kí t̄o ñmi ñun kaa cáá digbintilee ni.
- [⁴⁶Niin ní akoosibil ñin kaa kúyeee bí ki ñm̄ò binib. Niin di sá ñmi ñun bí kaa cáá digbintilee.]
- ⁴⁷An yaa sá a-nimil n̄n̄ kp̄éé kuñyee di yaa kaa fáati Unimbotee á lúkutí-dì kí fá. An ñā̀ñ ki t̄i-si á kp̄aan̄ diniñkpundi kí kó Unimb̄oti beelin ki jí̀t̄iñ á n̄n cáá animil ali bí tin dũ-si kí t̄o ñmin.

⁴⁸Niin ní akoosibil ŋin kaa kúùyee bí ki ŋmóò binib. Niin di sá ŋŋmi ŋun bí kaa cáá digbintilee.”

⁴⁹Ŋŋmi dāa sá kii ŋyaamee ní bí dūú pùkū báà ŋma pu.

⁵⁰“Ŋyaam sá tiwammontiil: ama ŋyaam yaa fá mi-məŋŋuee mana ní ni dàá gítī ŋá ní mí mōòkì? Ŋyaam n̄ n̄n bí ni-ni, ŋgbansəŋfi n̄ n̄n bí ni-kansikin.”

Maarki 10

¹Yeesu fātii yíkì niin ki póotì Juudee watil ki dūtì Jəodan buŋgbandi. Ní anikiti tí kóòní ki múkuñ u-pu, ní u tí kíí ki bíí dākà-bi Unimbəti bəti, kii u nín kpāāa péēŋāān puee.

²Niinee, Fariisab sūtīn ki pīl-u ki nyàab kí bàkañ-u tibəti. Bi bālfī-u yii: “Ti-marau pú nsan yii uninja n̄ jà u-nimpuaa?”

³Ní u kíí-bi yii: “Mara uləu ní Mooisi n̄n tī-ni ní?”

⁴Ní bi fātii kíí-u yii: “Mooisi bí-ti yii tí ŋmà takalda un dākà kun pu ní a jīñ a-nimpuee kí ŋúbiñ-u ní kí nín jà-u.”

⁵Niinee ní Yeesu fātii kíí-bi yii: “An sá ni-pəəgbifīŋŋu pu ní u síiñ-ni an marau gbanti.

⁶Ama ŋyunti ŋun Unimbəti kíí ki náān tiwan kəkəee, u n̄n náān uninja n̄ unimpu ní.

⁷Mīn puee ní an sá uninja n̄ yíkì u-baa n̄ u-na cee ní u n̄ u-nimpuu n̄ n̄n bí,

⁸ní biliitil n̄ kpántí unibaanti. Mim mee, baa ti sá binib bili, bi ŋá unibaanti dee.

⁹Mīn puee, unil n̄ taa yàkatī tin Unimbəti dūu kpáfēe.”

¹⁰Yeesu n̄ u-boonnooliibi kūñ kudiinee, u-boonnooliibi fātii bālfī-u an bəti pu.

¹¹Ní u kíí-bi yii: “Un kamaa yaa jīñ u-nimpuu ki fātii cáá upəənee, udaan ŋá tilaakpaal Unimbəti nimiin ki yīntì n̄ u-nimpupeepeekaa.

¹²Mīn mun mbaantiim, unimpu yaa yíkì u-cal cee ki cūtii mōn uninjapəənee, ú mun ŋá tilaakpaal Unimbəti nimiin ki yīntì n̄ u-calkpiki.”

¹³Bi n̄n cāabiñ mbiyaamu Yeesu cee ú dū u-ŋalii kí páān mu-pu kí mēè kí tī-mu, ní u-boonnooliibi bí wòon bin cāabiñ-muee.

¹⁴Yeesu ká mim mee, ní an kaa mōòkiñ-u, ní u bí-bi yii: “Yàntīmaan mbiyaamu n̄ dāān m-cee kí taa pīimmaan-mu nsan, kun puee Unimbəti beel sá ki tī bin náān n̄ muee ní.

¹⁵Ibaamən ní m sòon n̄ ni, un kamaa yaa kaa fōō Unimbəti beel bəti kibiyaawaai yamee, kaa dāa kòò di-ni.”

¹⁶Niinee ní u fōō mbiyaamuee ní ki dū u-ŋalii ki páān mu-pu ní ki mēē Unimbəti n̄ biñ mu-boon.

- 17Yeesu yíkì ki tākān nsan pu ki dàá n̄n cée, uninja ubo sànní ki dómiń ki gbān u-nimiin, ki bālfí-u yii: “Ukpmonti! M dàá ńá mana ní kí ká dimanfal din kaa cáá dikuntilee?”
- 18Ní Yeesu fātii kífí-u yii: “Ba pu ní a yíi-mi yii umonti? Unil báà ubo kaa bí ki sá umonti, see Unimboti baba.
- 19Sii a-ba nyí Unimboti marab, an lī yii: ‘Á taa kpò unil, á taa ńá tilaakpaal, á taa yò, á taa lēennyimōn seerau, á taa ńmàtiń ubo, á n̄n tó a-baa n̄n a-na.’ “
- 20Ní uninjee fātii kífí-u yii: “Ukpil, doooo m-naacimpōntin ní m péēńúb an marab.”
- 21Niinee, Yeesu kpēē-u dímmm, ní uninjee bōti fáatí-u, ní u lī-u yii: “Kuwambaantiiu di kíń-si á ńá. Nín cá kí nyāfi tin kōkō a cááyee, kí dū animil kí yàkatī bifalaadambi, ní kí tin ká tigaajati Unimboti cee. A yaa ńá mĩn ki dóyee, á dāāń kí n̄n n̄s-mi.”
- 22Kijapaayee gbīl an nyōobuńjee, u-nimiin cúū bííl, ní u búnti n̄n kunimbaau, kun puee u n̄n cáá tigaajawan tikpil.
- 23Niinee, Yeesu fātii kpēēki māntii tú bin yú ki gón-uee, ní ki bí u-boonnooliibi yii: “An dāa pōō ki tī bigaajab bí kó Unimboti beelineeee!”
- 24U-boonnooliibi bākati n̄n an nyōobuńji gbanti. Ní Yeesu fātii lī-bi yii: “M-biyaamu, an pōō ki tī [bin kō dū bi-mákal ki ńá tigaajatinee] ń kó Unimboti beelineeee!
- 25An pōfi ki tī ugutaamu ń jītí ujoo buńgun n̄n ugaaja ń kó Unimboti beelin.”
- 26Niinee, u-boonnooliibi gítī bākati tikpil, ki lì tōb cee yii: “Kin, ńma di nín ńūn kí ńmátí dee?”
- 27Ní Yeesu kpēē-bi ní ki bí yii: “Binib kaa ńūn kí fī bi-ba asee Unimboti baba di ńūn kí fī-bi. Di sá yii Unimboti di ńūn tikōkō.”
- 28Ní Piyeer bí-u yii: “Kin, timbi nín yíkì ki fá tin kōkō ti cááyee ki táá-see?”
- 29Ní Yeesu fātii kífí-u yii: “M sōn̄n n̄n ni ibaamōn ní, un kamaa yaa yíkì ki cānti u-diiku, u-nabiyaamu, u-na n̄n u-baa, u-biyaamu n̄n u-kpaatanti man pu ní ki sōn̄n m-bōmōntiiti ki t̄i binibee,
- 30udaan dàá fōō tipaal ńyunti ńun ti bí nee mĩn dilaatal pu. U dàá fōō adiin, nnabiyaamu, nab, mbiyaamu, tikpaatan, ní kí jī falaa mun. Ama ńyunti ńun bí ki dōōnee poonee, udaan dāa fōōl mmānfafōkōn ńun kaa cáá dikuntilee.
- 31Bisanlintiliibi tikpil dāa kpántí biboompaanliibi, ní biboompaanliibi mun tikpil ń kpántí bisanlintiliibi.”
- 32Yeesu n̄n u-boonnooliibi n̄n tākā nsan ki jóm Jeerusaleem, ní u lī bi-nyōkōpu. U-boonnooliibi pōbiliń n̄n bííl ní tifaandi kó bin kōkō n̄n n̄s-uee. Ní Yeesu gítī tí yīiń u-kpambaliń saalaa n̄n alee ki sīiń u-cee, ní ki kíl ki bī tükù-bi tin di dàá bāń u-puee, yii:

- 33“Ti jóm Jeerusaleem ní nee, ti yaa bàñ niinee, bi dàá cúú man Kinibiki kí tī bisaraaṅkpiilib nì bimaradakaliibi ní bìn ñ cáá-mi ibosoon kí lì yii m máaṅ bí kpò-mi, ní bí dū-mi kí ṅúbiṅ bin kaa nyí Unimbótee.
- 34Bìn dàá bèèl-mi kí tíl timotan kí sītī m-pu, kí gbá-mi anaalab kí wàatī kí kpò-mi. Bi yaa kūū-mee, m dàá fikitī winta dal.”
- 35Dyunti gbanti ní Seebeedee jipombi Jaaki nì Jaan sūtīn ki pīl Yeesu ní ki bí-u yii: “Ukpil, ti là kí mèè-si tiba, á pō-ti!”
- 36Ní u fātīi kíf-bi yii: “Ni là m ṅá ba ní kí tī-ni?”
- 37Ní bi kíf-u yii: “Ti là yii, ṅyunti ṅun a yaa láā kpánti ubótee, ti-kansikin ubo ñ dāā nīn kā a-ṅaṅgiil pú, un kíñee a-ṅaṅgan pú.”
- 38Ní Yeesu kíf-bi yii: “Naa nyí tin ni mèéyee. Ni ṅūñ kí nyò falaa un m dàá nyò naaan? Ni ṅūñ kí fàl falaa kii un man dàá fàl naaan?”
- 39Ní bi kíf-u yii: “Iiin, ti ṅūñ.” Ní Yeesu bí-bi yii: “Ibaamōn, ni dàá nyò falaa un m dàá nyòdee, ní kí fàl-u kii m nín dàá fàl-u pu nee.
- 40Ama an yaa kíñ m-ṅaṅgiil nì m-ṅaṅgan kakaṅjee, an kaa sá man di pūñ an paani. Ipaan gbanti sá ki tī bin pu Unimbóti bónti-i ki síñee ní.”
- 41Akpambal saalaa ṅin kíñee gbīl mimmee, ní ki fōḍ diṅuul Jaaki nì Jaan pu.
- 42Ní Yeesu yíin bi-kòkò u-cee, ní ki bí-bi yii: “Ni nyí yii duulnya yidambi bin kpèe ntimuee tókó bin kíñee pu, ní ki cáá bi-pōni ki fàantí-bi.
- 43An kaa máaṅ kí nīn bí mīn nimbi kansikin, ama un yaa là kí nīn sá ukpaan ni-kansikinee, udaan ñ gíin u-ba ni-tontonliu.
- 44Mīn mun ní un kamaa yaa là kí nīn sá ukpaan ni-kansikinee, udaan ñ gíin u-ba ni-kòkò yumbuu.
- 45Kun puee man Kinibiki kaa dómīn bí ṅá tiba kí tī-mi, m dómīn kí tō atuun kí tī binib, ní kí dū m-maṅfal kí pà kí fōḍ binib tikpil kí líí.”
- 46Yeesu nì u-boonnooliibi nì kunipaau nīn bàñ Jeeriikoo. Bi yíkì Jeeriikoo kí nīn càatē, uṅofu ubo kā disaṅkaṅkpil ki mèè bisanjitiliibi animil. Bi nīn yī uṅofu gbanti Baatimee ní ki yī u-baa Timee.
- 47Dyunti ṅun u bée yii an sá Yeesu Naasaareeti you di jītée, ní u kíí ki bíí tátí mpon yii: “Yeesu Dafiidi naantiiu sō m-saai!”
- 48Binib tikpil nīn bí ki wòñ-u yii ú ṅmīl, ní u mōtīi tátí mpon yii: “Dafiidi naantiiu sō m-saai!”
- 49Yeesu sāā ki síl, ní ki bí yii: “Yíimmaan-u!” Ní bi yíin uṅofuee ní ki bí-u yii: “Póñ a-ba kí yíkì, u yī-si!”
- 50Niinee ní uṅofuee lēēu-satau ki lúkú, ki nyī ki yíkì kùrub ki síl ní ki nín cá Yeesu cee.

⁵¹Ní Yeesu bālfī-u yii: “Ba ní a là m̀ ná ḱ tī-si ní?” Ní ujoḥuee fātii ḱí-u yii: “Ukpil, m̀ là ḱ wāl ní!”

⁵²Ní Yeesu bí-u yii: “A nín f̄ō-mi ki ḱíyee puee a ká dicaandi!” Kpalaa niinee u-nimiliḡ cúū ḡúbitì, ní u ḱìḡ ki táá Yeesu boon.

Maarki 11

¹Dyunti ḡun bi c̄ōm̀ ki tóob̄ Jeerusaleem ki p̄l̄ìḡ Beetifagee n̄ Beetanii Oḡiifi sufii jool caḡinee, ní Yeesu tú u-boonooliibi kansikin bili,

²ki t̄ukū-bi yii: “Cùmaan kitimbilii kin b́ín ni-nyòkòpu nee. Ni dàá ká dimampòmbil din pu bàà ubò kaa láá k̄álee. Ní gb̄nt̄íḡmaan-di ḱ cááḡ-mi.

³Ubo yaa bālfī-ni yii, Ba ní ni ḡááḡee? Ní ḱí-u yii, ti-Dindaan di nyàab̄ kimaḡ, u yaa d̄óyee, u dàá ḡíḡḡ-n̄-kì doo an kaa làá yúntí.”

⁴Bi búntì ki bàḡ ki ká dimampòmbilee gb̄ḡḡ ki nákaḡ kipunyòkò, mm̄ḡḡki didandi caḡin, ní bi b́í gb̄nt̄í-dì.

⁵Ní bin n̄n sí niinee biba bí-bi yii: “Ba di cáá-ni ní ni gb̄nt̄í kimaḡ?”

⁶Ní bi ḱí-bi kii Yeesu nín bàà t̄ukū-bi puee, ní binibee yāntì bi gb̄nt̄í-kì.

⁷Bi cááḡ dimampòmbilee Yeesu cee ní ki p̄ētì bi-wampeḡkaati ki páaḡ di-pu, ní Yeesu jóm̄ ki kāl.

⁸Binib tikpil n̄n kpátí bi-wanti ki b̄īl̄ n̄san poon. Ní biba mun ḡaḡ tifaal akpaan ni ki b̄īl̄.

⁹Bin n̄n l̄ī u-nyòkòpuee n̄n bin n̄n pá u-boonee n̄n k̄ūntí yii: “Oosaana! Unimbòtì ḡ b̄iḡḡ un d̄òóḡ ḡḡ ti-Dindaan yindi puee!

¹⁰Unimbòtì ḡ b̄iḡḡ ti-naanja Dafiidi beel din d̄òóḡee pu! Oosaana, Dànt̄ímaan un b́i yilpu yilpuee!”

¹¹U bàḡ Jeerusaleemee, ki kó Kunimbòtidiin. U kp̄ē kp̄ēki m̄ántì ki tú ki d̄óyee, kukúluu jítì ní u fātii nyáḡ ki búntì Beetanii u n̄n u-kpambaliḡ saalaa n̄n alee.

¹²Kutaa wúntèe, Yeesu n̄n u-boonooliibi nyáḡ Beetanii tiḡkin ki c̄ee, ḡkùm cúú-u.

¹³U kp̄ēḡḡḡḡḡ, ki wāl̄ busubu bun bi ȳḡ fiḡḡee sí n̄n bu-faati. Ní u c̄ūtì bu-taapu ḱ kp̄èe u yaa k̄ántì bu-biliḡ ḱ kit̄i ḱ ḡmó. U bàḡḡḡ, tifaal ḡmaniḡma di t̄úkú. Kun puee an kaa n̄n ḡm̄ántì ḡyunti ḡun busubuee lòḡḡḡ.

¹⁴Niinee ní u l̄i busubuee yii: “Dalba dalba ubò ḡ taa láá ḡt̄i ḡmó sii biliḡ!” U l̄ee, u-boonooliibi gb̄l̄.

¹⁵Bi búntèe, ki bàḡ Jeerusaleem ki kó Kunimbòtidiin ní Yeesu ḱí ki b̄ī j̄i biwanyafiliibi n̄n bidaliibi bin n̄n b́i niinee, ki l̄ábit̄i binimikpantiliibi teebilbi n̄n binanjinyafiliibi jaliḡ ki c̄ìb̄.

¹⁶Waa pú mpaan ubò ḡ yòḡḡ u-wanti ḱ c̄òḡḡ ḱ p̄unt̄i Kunimbòtidiin.

¹⁷Ní u kíí ki bí sòòn nì bi yii: “An kaa ñmàñ ki síìn yii: M-diiku dàá n̄n sá ñwimmeem diiku ní ki t̄i atimbun kòkòò? Ama ní nimbi dū-ku ki kpántì kunaayudii.”

¹⁸Bisaraanakpilib n̄n bimaradakaliibi gbīl mimmee, ní ki bí nyàab̄ n̄san ñun bi dàá d̄i kí kpò-uee. Di sá yii bi n̄n f̄aṅkí-u kun puee tin u sòònee n̄n kó samaa tikpil.

¹⁹Ku jótèe ní Yeesu n̄n u-boonnooliibi nyáñ kitiñin.

²⁰Bi f̄at̄i gít̄iñ kutaafaauee, ní ki ká fiigi subuee k̄ñ ki kpáañ bu-nyaani.

²¹Niinee, Piyeer téet̄i, ní ki bí Yeesu yii: “Ukpil, kpèè fiigi subu bun a fu tó mbusuee k̄ñ!”

²²Ní Yeesu f̄at̄i kíí-bi yii: “F̄òòmaan Unimbòti kí kíí!

²³Ibaam̄n ní m sòòn n̄n ni, ubò yaa l̄i dijool nee yii: Á ȳk̄i laakin a yú nee kí cùu j̄eet̄i tiṅkun, ní ki yaa kaa dàkaf̄i ki gùguf̄i u-pòb̄ilin ama ní ki yaa máká yii u n̄n l̄i puee dàá ñá mimmee, asee án lafun ñá mín kí t̄i udaan.

²⁴Mín pu ní m t̄ukù-ni yii, tin kòkò ní ni yaa m̄ēUnimbòtee, ní n̄n máká yii ni f̄òò, ni dàá lafun f̄òò kud̄oṅu.

²⁵Ni yaa bí m̄ē Unimbòti ní ni n̄n ni-jutiibi kansikin yaa kaa m̄ò, d̄uú p̄òmaan-bi, ni-Baa un bí yilpuee ñ ñm̄a kí d̄u ni mun ȳntitam kí p̄ò-ni.”

[²⁶Ama ni yaa kaa p̄ñ̄n ni-jutiibi bi-kpitiiyee, ni-Baa un bí yilpuee kaa làá d̄u ni mun kpitii kí p̄ò-ni.]

²⁷Bi n̄n tí f̄at̄i gít̄i Jeerusaleem. Dyunti ñun Yeesu kó ki bí còom̄ Kunimbòtidiinee, bisaraanakpilib, n̄n bimaradakaliibi n̄n bikpilib dóm̄in u-cee

²⁸ní ki bí-u yii: “N̄n n̄san ñul̄oṅu pu ní a fu j̄iñ binib Kunimbòtidiin ní? Ìma di p̄ú-si an saṅṅu ní?”

²⁹Ní Yeesu f̄at̄i kíí-bi yii: “D̄inyòobumbaantiil ní m dàá bàlf̄i-ni, ní kíí-mi kí wàat̄i ní m̄ n̄n t̄ukù-ni n̄n n̄san ñun pu ní m ñáañ mimmee.

³⁰Ìma di túnní Jaan ú f̄al̄ binib Unimbòti nyim ní? Unimbòtaaa binib? Kíímaan-mi!”

³¹Ní bi kíí ki bí lókòf̄i bi-ñman̄iṅma yii: “Ti yaa kíí-u yii: 'Unimbòti di túnní-u', u dàá bàlf̄i-ti yii: 'Kin ba ñá ní naa f̄òò u-bòti kí kíí?’

³²Mimmee, tí l̄i yii: 'Binib di túnní-uaaa?...! ’’ (Ama baa là kí l̄i mín, kun puee bi f̄aṅkí kunipaau. Di sá yii báà ñma n̄n nyí Jaan pu yii ibaam̄n u sá Unimbòti b̄onaatiliu.)

³³Niinee, ní bi kíí Yeesu yii: “Taa nyí.” Ní Yeesu mun f̄at̄i kíí-bi yii: “Man mun kaa làá t̄ukù-ni n̄n n̄san ñun pu ní m ñáañ mimmee!”

Maarki 12

¹Niinee, Yeesu kíí ki bí sòòn n̄n bi n̄n alaṅkpan, ní ki l̄i yii: “Uninja ubò di k̄ñ isufi in lòòn abil ñin bi cáā ña ndamamee kpaabu. U còòn kunaabakau ki m̄ant̄i ki tú-bu, ní ki

gbīn mboo^{^fc^} ηun ni u dàá nīn cùkutī abil ki lèekī ndamamee, ní ki gāa isupaa, ki dū bukpaayee ki kpāaṅ bipaadambi, ní ki búntì nsan.

²Isufee bilij kititam bāaṅee, ní u túnní u-tòntòntliu ubo bipaadambee cee ú dàá fṣṣ u-jandi.

³Ní bi cúú utòntòntlee ki gbáṅ ní ki jīn-u ki gíiṅ nì iṅaṅkulim.

⁴Ní bukpaadaanee gítī tí nyàaḅ u-tòntòntliu upṣṣon ubo ki tú bi-cee. Ní bi gítī cúú ú mun ki gbáṅ ki cíl diyil ki sāaṅ-u.

⁵Ní bukpaadaan gítī tí lēēunitataati ki túnní ní bi-kūū ún. Mīn mbaantiim ní bi nīn ṅāaṅ bitòntòntliibi kupaau, bi nīn gbáṅ biba ní ki kūū biba.

⁶Bāa ubo kaa ti bí ú tṣ see u-jipṣm̄baabil un u nēēee. Ní u dū-u ki túnní bi-cee njoolkaam, ki dākafi yii: 'Bi dàá fāṅkì m-jipṣon.'

⁷Ama bipaadambee nīn wál u dòoṅee, ní bi lī tṣb yii: 'Kpèè, un dàá dàá jī u-baa gaajawantee di dòoṅee! Tí kpòmaan-u kí jī kusaau.'

⁸U bāaṅee ní bi cìḅ ki cúú-u ki kūū, ní ki dū-u ki lúkú ṅkpaabuku.”

⁹Yeesu lī mīn ki dṣòyee, ní ki bālfi-bi yii: “Kṣṅkṣṅnee, bukpaadaanee dàá ṅá mana? Asee ú dāaṅ kí kpò bipaadambee, ní kí dū bukpaayee kí ṅúbīn bipṣm̄bi.

¹⁰Ni péēmāaṅ ki kaaṅ Unimbṣṣti takaldaun dinyṣṣbundi din lì yii: 'Ditaṅkpal din bidimaliibi nīn dūu fée, dīn di dāa kpántì ditaṅkpal din ṅúb kudi pṣṅṅuee.

¹¹Ti-Dindaan nīn ṅá tiṅyee kaa gbí mmaam ti-ceeee?’ “

¹²Dyuntēe, Yeesu nannanliibi bī nyàaḅ kí cúú-u, ní ki gítī fāṅkì kunipaau. Di sá yii u-nannanliibee nīn bée yii bīn ní u gāa dilaṅkṣpandi gbanti. Ní bi yāntì-u ki búntì.

¹³Bi túnní Yeesu cee Fariisab nì Eeroodi naacimbi kansikin biba bí dāaṅ kí píí-u tibṣṣti.

¹⁴Bi bāaṅee, ní ki bí-u yii: “Ukpil, ti nyí yii sii di sṣoṅ ibaamṣn, kaa fāṅkì bāa ubo, kaa fātī tṣ bāa udaan yaa bí puee, ki dākà nnimbṣṣtisan nì ibaamṣn. Mīn puee, timarau pú nsan yii tí pà lampoo kí tī Room gṣminau Seesaaraaa an kaa pú?”

¹⁵Yeesu bēè bi-poonnyoṣṣṅṅu puee, ní ki bālfi-bi yii: “Ba pu ní ni píí-mi tibṣṣti mīn kí kpèè m-nyṣkṣn? Cáaṅmaan-mi animil m̄ kpèè!”

¹⁶Bi cáaṅee, ní u bālfi-bi yii: “Ṭma yindi nì u-yil di náká animil pu na?” Ní bi kíí-u yii: “An sá Seesar.”

¹⁷Niinee ní Yeesu fātī kíí-bi yii: “Dūmaan tin Seesar yèe kí tī Seesar kí dū tin Unimbṣṣti yèe kí tī Unimbṣṣti!” Ní bi bākatì nì an nyṣṣbundi gbanti.

¹⁸Dyuntēe ní Sadásab dṣmīn Yeesu cee. (Bīn di sá dikitil din lì yii difikitil kpée.) Ní bi bí Yeesu yii:

- 19“Ukpil, Mooisi ηmān ki sīn-ti yii, Unil yaa cáá kinabiki ní kinabikee yaa kp̄u ki yānti unimpu kaa cáá kibikee, ú f̄ōō ukpiipu kí māl kí téen u-nabikee yil.
- 20Kun pu ti bālfēe di sá nnabiyaamu mululi di bí. Upeepeekaa cáá unimpu ní ki kp̄i ki yānti unimpuee, kaa māl.
- 21Uliliiti mun f̄ōō ukpiipuee ní ki mun kp̄u, kaa māl. Utataati mun mín,
- 22ki tin sāā bilulee k̄ok̄o cáá-u ki kp̄i, kaa ká kibiki. Bín k̄ok̄o kúm boonee, unimpuee mun kp̄u.
- 23Mín puee, difikitiil dalee, bi-k̄ok̄o yaa láā fikitée, bi-kansikin ηma di dāa yì unimpuee? Kun puee bilulee k̄ok̄o cáá-u ki ká.”
- 24Ní Yeesu kíi-bi yii: “Kun pu ni bí diyintil poonee di sá naa nyí Unimbōti takaldau poon bōti, kaa nyí Unimbōti p̄ηηu mun.
- 25Difikitiil yuntiηuee, dinimpucaal nì dicam̄ondi dāa kp̄á, báā ηma dāa bí kii Unimbōti tūuni nín bí pu yilpuee ní.
- 26An yaa kín bitaηkpiibi fikitiimee, naa kaañ Mooisi nín ηmān pu u-takaldauneeeee? Laakin s̄oñ tin jíti kikuηkumbiki caηinee, Unimbōti n̄n lī-u yii: ‘Man di sá Abraam Nimbōtiu, Isaaki Nimbōtiu n̄n Jaak̄ob Nimbōtiu.’
- 27Waa sá bitaηkpiibi Nimbōtiu, u sá bin wālee ηu ní. Ni baasii bí diyintikpaandin ní!”
- 28Bimaradakaliibee ub̄o n̄n bí ki gb̄il̄ tibōti tin pu Yeesu n̄n Sadiusab n̄n kp̄ákée; u nín ká yii Yeesu kíi-bi mm̄ontiimee ní u s̄utiñ ki p̄il̄-u ki bālf̄i-u yii: “Marab k̄ok̄o kansikinee, ul̄o di sá ukpaan ní?”
- 29Ní Yeesu kíi-u yii: “Mara un sá ukpaanee di sá un l̄i yii: ‘Israyeel yab p̄il̄fimaan. Ti-Dindaan Unimbōti sá ubaanti ní.
- 30Ni máañ kí n̄n néeñ ni-Dindaan ni-Nimbōtiu n̄n ni-p̄obil̄iη k̄ok̄o n̄n ni-fām k̄ok̄o n̄n ni-land̄ok̄oηu k̄ok̄o n̄n ni-p̄oηηu mun k̄ok̄o.’
- 31Maraliliiti di sá yii: ‘Á n̄n néeñ a-juti kii a nín néeñ a-ba puee.’ Mara ub̄o kaa ti bí ki jítiñ bin bí nee.”
- 32Ní umaradakalee lī-u yii: “An kā, ukpil. A lī n̄n ibaam̄on ní yii Unimbōti sá ubaanti, ub̄o kaa ti bí asee ún̄ baba.
- 33Unil máañ kí n̄n néeñ Unimbōti n̄n u-p̄obil̄ k̄ok̄o n̄n u-ciini k̄ok̄o n̄n u-p̄oηηu k̄ok̄o, ní ki máañ kí n̄n néeñ u-juti kii ún̄ u-bee. Mín jítiñ tiwaηkuti saraabi bin bi dù kí w̄o ηηmi kí t̄i Unimbōtee n̄n saraabi bin k̄o kínee.”
- 34Yeesu ká yii u kíi-u n̄n iciinee, ní u lī-u yii: “Aa dátin̄ Unimbōti beel.” Niinee báā ub̄o kaa ti mākañ kí bālf̄i-u tiba.
- 35Yeesu n̄n b̄i dākà binib Unimbōti bōti Kunimbōtidiinee, u bālf̄i-bi tibōti yii: “N̄n nsan ηul̄oηu poon ní bimaradakaliibi l̄i yii Kriisitoo sá Dafidi naantiiu ní?”

³⁶Di sá Unimbōti Fām yāntì Dafiidi u-ba sòon̄ yii: 'Ti-Dindaan tükū m-Dindaan yii: Kāl̄ m-ṅaṅgiil pú kí n̄n cí ṅyunti ṅun m dàá yāntī á n̄n kíh̄ ki tókó a-nannanliibi puee.'

³⁷Dafiidi u-ba yî-u yii u-Dindaan, kin mana ní u ṅūh̄ kí n̄n sá u-naantiiu mun?" Kunipaau n̄n pílfiñ̄ Yeesu ní an mōñ̄-bi.

³⁸U n̄n bī sòonee, ní ki gítī lī yii: "Ní n̄n nyím̄maan n̄ ni-ba n̄ bimaradakaliibi! Bín̄ di néen̄ ki pèentí abokutifókó ki yìh̄ bi jáam̄-bi ipaan in pu binib kpáfée,

³⁹ki kàal̄ nyókòpu jaliṅ akpafidiin ni n̄ diinabin.

⁴⁰Bín̄ di fikì bikpiipoobi wanti ki gbèentí ki mée ṅwimmeem ki yúntí fórrr bí ká-bi, bín̄ gbanti di dāa kóò ditafadaaldi din gítī lákatèe ni!"

⁴¹Yeesu cūti kāl̄ ki bítin̄ laakin bi tòó saraa nimiliṅee, ki kpèe kunipaau n̄n tòó animil puee. Bigaajab tikpil n̄n tòó animikpaan,

⁴²ní ukpiipusoodaan ubo mun cáan̄ igboo ili ki tó.

⁴³Niinee ní Yeesu yíh̄ u-boonnooliibi ki bí-bi yii: "Ibaam̄on ní m tükù-ni, ukpiipusoodanee tó ki jítiñ̄ bin kókó tó saraa dooyee.

⁴⁴Bin béeyee cáan̄ bi-nimiliṅ ṅin baa làá dūu ṅá n̄ tibee ki tó, ama unimpu nee, n̄ u-sool poonee, tin kókó u bàà cáá kí jēe ní u kúnti ki tó."

Maarki 13

¹Dyunti ṅun Yeesu nyēen̄ Kunimbōtidiinee, ní u-boonnooliibi kansikin ubo bí-u yii: "Ukpil, kpèe bi n̄n dū atañkpakpaan ṅin ki mán̄ adikpaan an ṅāñ̄ miṅyee!"

²Ní Yeesu kíi-u yii: "Kee a ká adikpaan neeyaa? Dalbee, ditañkpal diba kaa dāa gítī tókó di-juti pu. An kókó dàá dāá wī ní."

³Yeesu bāñ̄ ki kāl̄ Oliifi sufii jool pu, u-nimiin̄ túliñ̄ Kunimbōtidiyee watil, ní Piyeer, n̄ Jaaki, n̄ Jaan n̄ Andree bālfī-u tibōti nee bi-ṅmaniṅma yii:

⁴"Tükù-ti ṅyunti ṅun ni tin kókó a bàà lēe dàá dāá bāñee, n̄ kudaanṅu kun ti dàá dū kí béé yii ṅyunti bāañee."

⁵Niinee, Yeesu kíi ki bī sòon̄ n̄ bi yii: "Ní n̄n nyíh̄ ni-ba ubo n̄ taa ṅmàtiñ̄-ni,

⁶kun puee binib tikpil dàá dāá dū man yindi kí kpántí bi-yaṅ ní kí l̄i yii bín̄ di sá Kriisitoo ní kí ṅmàtiñ̄ binib tikpil.

⁷Ni dàá dāá gbīl̄ bi sòon̄ tijáti tin p̄l̄ñ̄-nee n̄ tin dátin̄-nee bōti. Ama ni-pòbilinḡ n̄ taa bīl̄. An máan̄ t̄ñ̄ kókó n̄ bāñ̄ kí wàatī, ama duulnya kúntitam kaa dá láá yá.

⁸Ditimbundi diba dāa yíkí kí jáñ̄ diba, ní dibeel diba mun n̄ jáñ̄ diba. Kitiṅ dàá dāa c̄iṅkì ajan kupaau pu, ṅkùm dàá dāá nyā. T̄ñ̄ kókóee dāa sá kii imatiṅween n̄n kífi puee ní.

9“Ní nīn nyìh ni-ba! Man puee bi dàá dāá cunnì-ni ibosoon, kí gbá-ni anaalab akpafidiin ni, kí cáá-ni gominab nì bibotiibi nimiin, mimmee ni dàá ká mpaan kí sòòn nì bi man pu.

10Ama an máàn yii inibool kəkə́ n̄ gbīl̄ m-bòmōntiiti kí wàatī ní duulnya n̄ nín kúntí.

11Dyunti n̄un bi yaa láā cúú-ni ki cān ibosoonēe, ní taa nīn yálin̄kí tin ni dàá tin sòonēe pu. Ní yaa láā bàñee, ní sòòn tin Unimbōti yaa tī-ni niinee. Di sá yii, an kaa sá nimbi di dàá sòòn, an sá Unimbōti Fām di dàá tī-ni tin ni dàá sòonēe.

12Unil dàá dāá cúú u-nabiki ní kí tī bí kpò, ní ubaati n̄ dū u-biki kí tī bí kpò, ní kibiki n̄ jān ki-baa nì ki-na ní kí yāntī bí kpò-bi.

13Bàà n̄ma dāa ná-ni kun puee ni n̄óó-mi. Ama un yaa p̄óòn u-ba ki tin kátì-kuee di dàá dāá n̄mátí.”

14“Ni dàá ká kuwan̄kpitiu kun cāabīn̄ n̄timbiilee kó ki kíh̄ ki bí laakin kuaa bàà máàn kí kóee (un kààn tibōti nee máàn kí n̄á n̄ka.) Dyunti gbantee, bin yaa láā bí Juudee t̄in̄kinee n̄ sān̄ kí dàb̄ ajoin.

15Un yaa láā bí dicindee^fd^ n̄ taa li yii u dàá kpákátí kí kó kudiin kí yòon̄ tiba,

16ní un yaa láā bí kusaaunee n̄ taa li yii u là kí fātī mm̄n̄ki kí yòon̄ u-bōkut̄il.

17Ama falaa d̄5 ki cí bip̄odambi nì bimatib yaadal wiini!

18Mèèmaan Unimbōti an bōti n̄ taa bàñ kuseeun.

19Doooo, Unimbōti nín náàn̄ kitiñ ki dāa s̄ā d̄in̄ nee, an falaa juti kaa láá jéeti n̄nibiyaamu pu, m̄in̄ ní falaa gbanti juti mun kaa ti bí kí dāān̄.

20Ti-Dindaan yaa kaa bàà bātī falaayee wiini pu bàà unibaanti kaa bàà n̄mátí. Ama bin u lútì bí n̄in sá u-yabee pu ní u bātī an wiini.

21“Dyunti gbantee, ubo yaa t̄ukū-ni yii, Kriisitoo bí doo, àá u b̄in̄ lapu, ní taa f̄ōō kí k̄íí.

22Di sá yii bin dàá m̄ōnt̄i yii b̄in̄ di sá Kriisitooyee nì bin dàá m̄ōnt̄i yii bi sá Unimbōti b̄onaatiliibee dàá dāá nyā ki n̄áañ tikpañkpantiil̄ nì maamaaci tuuññi, kí bàà dūū n̄màtiñ bin Unimbōti lútèe gba.

23M̄in̄ puee, ní n̄in nyìh̄ ni-ba. M̄ t̄ukū-ni tikəkə́ ní n̄in nyí ki yóòn ní an n̄in bàñ.”

24“Falaayee yaa j̄it̄i boonee, n̄w̄iñ̄ dāa kpántí dibōmbōndi, uñmal mun kaa dāa ḡit̄i p̄iñ̄.

25In̄malbijaa dāa k̄it̄in̄ kutaa pu ki lítiñ, ní ip̄on in bí kutaa puee n̄ c̄in̄k̄i.

26Dyunti gbantee ní bi dàá ká man Kinibiki d̄oñ̄ atagban ni ki cáá mp̄on tikpil nì tinyool.

27Ní m̄ dāá t̄ōñ̄ Unimbōti tūuni n̄ cū duulnya kəkə́n, kí tin s̄ā kutagbōñu nì kitiñkuntinyəkə́, kí k̄oñ̄n̄i bin bin Unimbōti lútèe.”

- ²⁸“Ní p̄lfimaan fiigi subu nín dàkà-ti tiboti tiŋyee. Di sá yii ni yaa ká fiigi subu tó apan ki bī tókù tifaaponee, ni béetí yii kuseeu tóobiń dee.
- ²⁹Mín mbaantiim, ni yaa ká tin kəkə m máafi-ni nee bī jītee, béemaan yii m-dāantam tóobiń dee.
- ³⁰Ibaamon ní m tükù-ni, waanee nib kaa làa kpú kí kúntí ní an bōti kəkə n bān.
- ³¹Kutagboŋu nì kitiŋ dāa bí kí kúntí, ama man bōti kaa bí kí kúntí jaanjaan.
- ³²Ubo kaa nyí ŋwiin nì kukuluu kun ni an bōtee dàá bànee. Unimbōti tūuni in bí yilpuee kaa nyí, man u-Jipōon gba kaa nyí, asee ti-Baa Unimbōti baba di nyí.
- ³³Ní n̄n nyín ni-ba kí taa gèèn. Di sá yii naa nyí an yuntiŋu.
- ³⁴An dāa bí kii unil ubo nín cá nsan pu ki yānti u-tontōnliibi u-cindee ní. U yākatī báa ŋma nì u-tundi, ní ki kpáafi un cí kipunyokōee n̄ taa n̄n gèèn, ní ki búnti.
- ³⁵Taa gèmmaan! Di sá yii naa nyí ŋyunti ŋun kudiidaan dàá bànee, an yaa sá kujouueee, kunyataasiueee, ŋkoosiimeee, kutaafaueee, naa nyí.
- ³⁶Ní taa yāntī ú bān kí túuñ-ni ni dō ki gèèn.
- ³⁷Tin m li nee m li ki tükù báa ŋma ní: taa gèmmaan!”

Maarki 14

- ¹An n̄n k̄n iwiin ili, bí jī apibil jiŋaaliu un Juuda yab j̄n̄ ki tēetí Unimbōti n̄n n̄n f̄i Israyeel yab ki nyānti Eejipiti puee n̄ jiŋaal un ni bi n̄n ŋmód̄ kpōnōb bin baa ŋá ŋkpōnōnyokōee, ní bisaraaŋakpilib n̄ bimaradakaliibi n̄n nyāab n̄ nciin poon kisambiki kin bi dàá dī kí cúú Yeesu kí kpò-uee.
- ²Ní bi l̄ yii: “Án taa n̄n sá jiŋaal poon, fikilfikil n̄ taa kó samaa kansikin.”
- ³Yeesu n̄n bí Beetanii, Siimōn un n̄n sá unyangbantee dumpu. Ŋyunti ŋun u k̄a ki j̄n̄ tijinee, unimpu ubo kóon̄ ki ŋúbiń talaalumōnti un bi ȳi náaree, u n̄n pōō kudaau tikpil ki k̄a ditaŋkpal kpalbanyaanun. Ní unimpuee fáá ki w̄i kpalbee nyokō ki kpáati talaaluae ki s̄ti Yeesu yil pu.
- ⁴Ní biba f̄ōō diŋuul ki bí yii: “Ba pu ní bi fá talaalumōnti nee mín?”
- ⁵Bi bàā ŋūn̄ kí nyāfi-u animikpaan kí dūú yākatī biwōfib.” Ní bi yíkii bī wōon̄ unimpuee.
- ⁶Ní Yeesu bī l̄n̄-bi yii: “Yāntīmaan-u! Ba pu ní ni páb-u mín? Unimpu nee ŋá ditummōntiil ní ki t̄i-mi.
- ⁷Ni n̄n biwōfib di dàá n̄n péebí baabadal, ni ŋūn̄ kí n̄n ŋáań-bi tiŋan ŋyunti ŋun ni yaa lèe. An yaa k̄n̄ man, maa làa n̄n bí ni-cee baabadal.
- ⁸Min u ŋúnee ní u ŋee: u péé ki dómín̄ ki yāań-mi talaalu kí bōntí m-wunti kí c̄iti ŋu-s̄bitam dal dee.

- ⁹Ibaamɔn ní m tükù-ni, duulnya kəkowoooo laakin kamaa ní bi yaa láā sòòñ m-bòmòntiitee, bi dāa tétí unimpu nee pu ki máafi min u ɣée.”
- ¹⁰Dyunti gbantee ní akpambal saalaa nì alee kansikin un bi yíi Juudasi Iskaariyotee cùtì ki ká bisaraanɔkɔpilibee kí sòòñ nì bi min ní u dàá ɣá kí dū Yeesu kí ɣúbìñ-bee.
- ¹¹Bi nín gbíl mimmee, an móòkìñ-bi, ní bi p̄òòñ-u yii bi dàá tī-u animil. Juudasi nìn kíí ki bí nyàab̄ ɣyunti ɣun di kítì ú dū Yeesu kí ɣúbìñ-bee.
- ¹²Jiɣaal un bi ɣmóòd kɔnɔb bin kaa cáá ɣkɔnɔnyɔkɔee wimpeekaɣu dal ɣun bi làntí apibil ki tétí Unimbɔti nín nìn fī Israyeel yab ki nyántì Eejipitee, ní Yeesu boonnooliibi bí-u yii: “La ní a là tí cù kí bóntí-si apibil jiɣaaliu?”
- ¹³Ní u tú u-boonnooliibi bili, ní ki tükū-bi yii: “Nín cámaan kitiɣin, ni dàá tū uninja ubo tú dinyimbool. Ní n̄n táá-u.
- ¹⁴Laakin u yaa tin kóee, ni mun n̄ kó niin kí balfi kudiidaan yii: 'Ukpil balfi-si yii, m-diiku kun poon man nì m-boonnooliibi dàá jī apibil jiɣaaliu jikaatee bí la?’
- ¹⁵Niinee, u dàá dākà-ni diditòntòkòl yilpu, kudii kun poon wāā, bi bóntì tikòkò sée. Niin ní ni dàá bóntì-ti tijikaal.”
- ¹⁶U-boonnooliibi búntì ki bàñ kitiɣinee, ki ká an jíti kii u nín bàà tükū-bi pu ki síinee deedee, ní bi bóntì apibil jiɣaaliu jikaati.
- ¹⁷Kujoou jótèe, Yeesu nì u-kpambaliɣ saalaa nì alee bāañ niin.
- ¹⁸Dyunti ɣun bi kāl ki bí jīn tijikaalee, ní Yeesu bí yii: “Ibaamɔn ní m tükù-ni, man nì nimbi bin pēki jīnee kansikin ubo dàá dū-mi kí ɣúbìñ m-nannanliibi.”
- ¹⁹Niinee, kunimbaau kó-bi, ní bi kíí ki bí balfi-u ubo ubo yii: “Kee an kaa sá mamaa?” “Kee an kaa sá mamaa?”
- ²⁰Ní Yeesu kíí-bi yii: “An sá nimbi saalaa nì bili nee kansikin ubo man nì un sètí disambibaantiilinee.
- ²¹Man Kinibiki cá kí kpú ní nee, kii an nín ɣmāñ ki síin m-pu miɣyee. Ama mbusu dō ki cí un dàá dū-mi kí ɣúbìñ m-nannanliibee. Bi yaa kaa bàà māl udaan, an bàà só.”
- ²²Dyunti ɣun bi bí jīnee, ní Yeesu ȳòòñ kɔnɔ ki pākā Unimbɔti, ki cūū gífi gífi, ki yākati bi-kòkò, ní ki bí yii: “F̄òòmaan! Doo di sá m-wunti.”
- ²³Ní ki ȳòòñ ndaam, ki jáam Unimbɔti ki dóòyee, ní ki dūu tī-bi, ní bi-kòkò nyūñ.
- ²⁴Ní u tükū-bi yii: “M-fatikuu dee, fatiku un cāabín mpèe binib nì Unimbɔti kansikinee dee. Fatikuee di nyán kí fī binib kupaau.
- ²⁵Ibaamɔn ní m tükù-ni, maa ti bí kí nyò ndamam nee kí n̄n cí daliɣkin m dàá gítí nyò-mì mpɔm Unimbɔti beelinee.”
- ²⁶Dyunti ɣun bi gāā jiɣaal lani ki dóòyee, ní bi nyán ki búntì Oliifi sufii jool pu.

- 27 Yeesu bí-bi yii: “Ni-kòkò dàá fá-mi, kii an nín ñmāñ Unimbòti takaldaun puee yii: 'M dàá dàá fáá kí kpò upikpaal, ní ipii ñ yāl.' “
- 28 Yeesu gítí lī yii: “Ama m yaa láā fikitèe, m dàá lintí kí cīití-ni Gaaliilee.”
- 29 Ní Piyeer lī-u yii: “Bi-kòkò yaa féen-saaa, man kaa bí kí fá-si.”
- 30 Ní Yeesu bí-u yii: “Ibaamōn ní m tükù-si, dín nyeeku gba, kí wàatī ukooja ñ bāaki milee, a dàá néé diba dibee mita yii saa nyí-mi!”
- 31 Niinee ní Piyeer kpákañ-u ki bí yii: “Bàà an yaa sá man nì sii ñ kpú gba, m kpá kí néé!” Ní u-boonnooliibi bin kínee mun lī mín mbaantiim.
- 32 Yeesu nì u-boonnooliibi búnti laakin bi yí Geetiseemane, ní Yeesu tükū-bi yii: “Kālmaan doo, man dàá cù kí mèè.”
- 33 U nìn kpáañ Piyeer, nì Jaaki nì Jaan. Tifaandi nì diniminaamandi kíí ki bí bāñ-uee, ní u tükū-bi yii:
- 34 “Kunimbaau kó-mi tikpil ki cān-mi ñkúmin. Kālmaan doo kí nīn cí kí taa gèèñ!”
- 35 U lī mimmee, ní ki sùtì nyòkòpu fiii ní ki tin dōñ dicincibil, ní ki mēēyii an yaa bàà kítì, Unimbòti ñ kàkatī falaa yuntinju nee kí wàatī-u.
- 36 U lī yii: “M-Baa, tiba kaa péēpōō a-cee! Kàkatī falaanyòkaa nee kí wàatī-mi! Ama nì mín kòkòee, m nyàab a-làtam ní, kaa sá mama m-ba nín là puee.”
- 37 Yeesu fātii gítin u-kpambalinj atee cee ki ká bi dō ki gèèñ, ní u fintì-bi, ní kí bí Piyeer yii: “Siimōn, a gèèñ níin? Aa kpáāà ñún ki kāl ki cíitì kukubaantiu ñ jītí kí taa gèènaaan?”
- 38 Fintīmaan kí nīn mèé, an nín dàá ñá pu ni yaa kó icòñkinee ní taa lítée. Unil bàà cáá nlandòkòmōnti ama ní ki bí iwōfin.”
- 39 Yeesu fātii sùtì nyòkòpu ki mēēki sòñ tibòbaantiil,
- 40 ní ki fātii gítí gítin ní ki ká bi dō ki gèèñ, kun puee ñgeem nìn cáá-bi tikpil. Bi fintèe, baa nyí bi nín dàá kíí-u puee.
- 41 U búnti ki gítí tí gítin ntataatiim, ní ki lī-bi yii: “Ni dáá gbintii dō ki gèèñ ki ñunfāa! Too, an dódò. Kòñkōnee an ñmānti bí dū man Kinibiki kí ñúbiñ binikpitib dee.
- 42 Un dàá dū-mi kí nyāfèe di bàāñ nee. Yīkīmaan tí cù.”
- 43 Yeesu kaa láá sòñ ki ñmíl, kpalaayee ní u-kpambalinj saalaa nì alee kansikin un bi yí Juudasee cílín, u nì kunipaaub kùbò, kún ñúbiñ ñjimu nì atambōn. Bisaraañakpilib nì bimaradakaliibi nì bikpilib di nìn túnní-bi.
- 44 Juudasi un dàá nìn dū Yeesu kí ñúbiñ-bee nìn tī-bi kudaanju yii: “Un m yaa kpāl ki jáamee, un ni nyàabee dee, ní cúúmaan-u tinjan kí nīn cáá-u ki cá!”
- 45 Juudasi bāañ kpalaayee ki sùtì ki pīl Yeesu, ní ki bí yii: “Ukpil,” ní ki kpāl-u.
- 46 Niinee bin táañ Juudasee cīb ki cúú Yeesu.

- 47 Bin nìn bí Yeesu ceeyee kansikin ubo fófi u-jiki ní ki gāā ki wúkutì usaraaṅakpil tontonliu tafal.
- 48 Ní Yeesu bí-bi yii: “M sá unikpiti naaan? Ba pu ní ni ḡúbiín njimu nì atambon kí dāá cúú-mi?”
- 49 Baabadal m bí Kunimbōtidiin ni-kansikin ki dākà binib, ba pu ní naa cúú-mi niin? Ama kəṅkənee, Unimbōti takaldau nín sòon ki síin m-pu miṅyee í ḡá!”
- 50 Niinee, u-boonnooliibi kəkə sán ki wāati-u.
- 51 Unaacimpəon ubo nìn táá Yeesu ki pēēsata. Bi cìb kí cúú-uee,
- 52 ní u yāntì sata bi-ḡaan ki sán dicancangbeel.
- 53 Bi cáá Yeesu ki búntì usaraaṅakpil dumpu, ní bisaraaṅakpilib nì biyidambi nì bimaradakaliibi kəkə kóonni ki kpáfi niin.
- 54 Piyeer nìn táá Yeesu aboon aboon ki tin bān usaraaṅakpil cindi ní ki kāl soojab kansikin ki wùl ḡḡmi.
- 55 Bisaraaṅakpilib nì bibosoonliibi kəkə nyàab bin dàá lēēseera Yeesu pu bí ḡmā kí kpò-uee, ní kaa ká.
- 56 Di sá yii binib tikpil móntí u-nyəkəpu, ní bi-nyəmmu kaa pēē.
- 57 Biba yíkì móntì Yeesu pu yii:
- 58 “Ti gbīl u lī yii: 'M dàá gbá kí wī Kunimbōtidii kun binib mán nee, kí dū iwiin ita kí mā kupəṅu kun binib kaa dū bi-ḡalii ki mánee.' “
- 59 Nì mìn kəkəee, bin lēeki an seerau gbantee nyəmmu kaa pēē.
- 60 Niinee, usaraaṅakpil yíkì síl bi-kəkə nimiin ki bālfì Yeesu yii: “Binib nee nín bí ki sòon a-pu miṅyee ba ḡá ní saa kííkí ní?”
- 61 Ní u ḡmí, kaa gāti tiba. Ní usaraaṅakpil gītī bālfì-u mpəom yii: “Sii di sá Unimbōti tinyooldaan Jipəon un u túnní ú nīn sá uboteeee?”
- 62 Ní Yeesu kíí-u yii: “M lafun sá-u. Ni dàá dāá ká man Kinibiki ká Unimbōti ipon kəkə daan ḡaṅḡil pú, ní ki dàá ká m nyánní yilpu atagban ni ki dòón.”
- 63 Usaraaṅakpil gbīl mimmee, ní ki dáal ki cáti u-bəkutil kii bi-koobiliṅ nín sá puee kí dākà yii an kaa móokìn-u, ní ki bí yii: “Ti gītī nyàab seeradambi kí ḡá ba?”
- 64 Nimbi ni-ba gbīl u nín ḡèèn nì Unimbōtee, ni dākafì yii ba?” Ní bi-kəkə bí yii u-boti kaa ḡān, u máan ḡkúm.
- 65 Ní biba kíí ki tíl timətan ki sītī Yeesu pu. Bi dū ḡḡabu ki bīn u-nimiin ki fátí-u, ní ki bālfì-u yii: “Sii un wālee, tükù-ti un di fáá-see!” Ní plisib mun fōō-u ki bíí fátí-u itampa.
- 66 Dyunti ḡun Piyeer nìn dáá bí taapu cindinee, bisapombi bin bí usaraaṅakpil cee ki tūn ditundee ubo dómin

⁶⁷ki ká Piyeer bī wùl̄ ḡḡmi. Ní u kpēē u-nimiin, ní ki bí yii: “Si mun nì Yeesu Naasaareeti yɔuee di nìn tāatí!”

⁶⁸Ní Piyeer nées ki bí yii: “Maa nyí tin a sòònee, kaa gbìl̄ ti-taapu.” Niinee, Piyeer nyán ki nín kòò kunaakooun ní ukòl̄ sún.

⁶⁹Ní usapɔonee gítí tí ká-u niin, ní ki bī tükù bin bí niinee yii: “Binibee kansikin ubo sèé!”

⁷⁰Ní u gítí nées. An kútí fīiye, bin nìn bí niinee bí Piyeer yii: “Tiḡman, si mun ḡmāl̄ binibee ni. Ti wāl̄ yii a sá Gaaliilee watil niliu ní.”

⁷¹Niinee, Piyeer kíí ki bī pùtí ki títí yii: “Maa nyí uninja un bōti ni sòònee!”

⁷²Kpalaayee, ukooja báakì niliitiim, ní Piyeer téetì dinyɔɔbundi din Yeesu bàà lī-uee, yii: “Kí wàatí ukooja n̄ báakì milee, a dàá nées diba dibee mita yii saa nyí-mi.” Niinee ní u kíí ki bī sūn̄ ki yáliḡkí.

Maarki 15

¹Kutaa wúntèe, bisaraanḡakpilib péé ki kpáfi, bi nì bikpilib nì bimaradakaliibi, bín bibɔsoonliibee kòkò, kí sòòn̄ Yeesu bōti, ní ki bóob̄-u ḡḡmii ki cáā ḡúbìḡ ḡm̄ina Piilati.

²Ní Piilati bālfi-u yii: “Sii di sá Juuda yab bōtiuaaa?” Ní Yeesu kíí-u yii: “A nín lī puee, mín̄ dee.”

³Bisaraanḡakpilibee dómín̄ ki sòòḡ tibōti tikpil ki tún̄ u-pu.

⁴Mín̄ puee, ní Piilati fātii gítí bālfi-u yii: “A ḡmí níiin? Aa gbìl̄ tin kòkò bi sòòn̄ ki tūntí a-pueeee?”

⁵Yeesu kaa ti péēḡātí tiba, ní Piilati bākatí sèeee.

⁶Jiḡaal un Juuda yab jīn̄ ki téetí Unimbōti nín nìn nyántì bi-naanjab Eejipitee sá kamaayee, ḡm̄ina Piilati nìn ḡīntí usarkadaan ubo, un samaa yaa mēē-uee ní kí líí.

⁷Kijapaai kiba nìn bí, bi yī-kì Baaraabasi. Bi nìn cúú u nì u-jutiibi biba ki tó sarkan, kun puee bi nìn kūū unil daliḡkin kunipaau kubò nìn yī yii baa là kí pīlfin̄ ḡm̄inee.

⁸Ní kunipaau jóm̄ ki bālfi Piilati n̄ ḡiḡn̄ un bi lèe kí líí, kii u nín kpāā ḡáán̄-bi puee.

⁹Ní u bālfi-bi yii: “Ni là m̄ ḡiḡn̄ Juuda yab bōtiu kí líí-naaan?”

¹⁰Di sá yii u nìn bée yii kinán̄ kin kin bisaraanḡakpilib nìn cáā Yeesu puee di yāntì bi cáán̄-u ki ḡúbìḡ-u.

¹¹Niinee, bisaraanḡakpilibee téé kunipaau n̄ l̄ yii bi là ḡm̄ina n̄ ḡiḡn̄ Baaraabasi ní kí líí.

¹²Ní Piilati fātii bālfi-bi yii: “Kin, m̄ dàá ḡá un ní ni yī Juuda yab bōtiuee mana?”

¹³Ní bi fātii kíí-u ki téēn̄ m̄pɔn̄ yii: “Bí kpáá-u ndɔpuntikaa pu!”

- 14Ní gɔmina Piilati fātii bālfī-bi yii: “Tikpitil tin u ɲée di sá tilati?” Niinee ní bi mōtìi kúuñ mpɔn yii: “Bí kpáá-u ndɔpuntikaa pu!”
- 15Piilati là kí sòŋkì bi-pɔbiliŋee, ní ki gíiñ Baaraabasi ki lî-bi, ní ki yānti bi gbán Yeesu anaalab, ní ki dū-u ki tī-bi bí cáá-u kí kpáá ndɔpuntikaa pu.
- 16Niinee, soojab cáá Yeesu ki kón gɔmina cindi poon ní ki yíiñ disoojakitil din kínee kɔkɔ.
- 17Ní bi dū dibɔkutimandi cínciŋ ki pēēñ Yeesu, ní ki dū ikuŋkum ki lūñ kibeeŋfuulii ki cíkiñ-u,
- 18Ní ki kíí ki jáam-u yii: “Ti jáam-si Juuda yab bɔtiu!”
- 19Bi cáá ɲkpɔndɔ ki fátí u-yil ki tíí timɔtan ki sītí u-pu, ní ki dōon ki gbàantí u-nimiin.
- 20Bi bēēl-u mín ki dódoyee, ní ki cúú dibɔkutimandee ki pēētí-u ní ki gíiñ ùñ u-ba wampeeŋkaati ki pēēñ-u, ki nyánti-u kí cáá tin kpáá ndɔpuntikaa pu.
- 21Bi cée, ki ká usanjitil ubɔ nyánní kusaau, bi yî-u Siimɔn, u sá Siireeni tiŋki, Aleeksandi nì Rufusi baa dee. Ní bi páb-u yii ú fǒǒ Yeesu dɔpuntikaaŋu kí bùkuñ,
- 22ní ki cáá Yeesu ki cūnni laakin bi yíi Gɔlgɔtee (an taapu sá yii Kuyikpabiku laŋki).
- 23Bi tī-u ndamam min ni nnyɔkɔ ɲun bi yíi miiree ɲmālee ú nyò, ama u yî, kaa nyūñ.
- 24Ní bi dū-u ki kpáá ndɔpuntikaa pu, ní ki yākatì u-wampeeŋkaati, ki tó kasi kí kpèè bāa ɲma nín dàá jī kuŋyee.
- 25An nìn sá ntaafaawíiñ tikúti tiwa ní bi kpáá-u ndɔpuntikaa pu ki dūu còon.
- 26Bi nìn ɲmāñ tiŋmaŋmabti ki nákañ u-yil pu kí dàkà kun pu ní bi kūu-uee, yii: “Juuda yab bɔtiu sèé.”
- 27Bi nìn kpáá diganɲandambi bili mun idɔpuntikaa pu ki dūu còon ki ɲāl-u, ubɔ u-ɲanɲiil pú, un kínee u-ɲanɲan pú.
- [28An ɲá kii an nín nìn ɲmāñ puee dee yii: “Bi dū-u ki ɲāl binikpitib.”]
- 29Bisanjitiibi nìn bèēl-u ní ki gātí ayil ki lì yii: “Iiin, sii un lī yii a dàá gbá Kunimbɔtidii kí wī kí fātí mā-ku iwiin ita dalee,
- 30fī a-ba kí kpákatiñ ndɔpuntikaa pu!”
- 31Bisaraanɲakpilib nì bimaradakaliibi mun nìn bí ki bèēl-u bi-kansikin, yii: “U fī bin kínee ní kaa ɲūñ kí fī u-ba!
- 32Israyeel yab bɔtiu Kriisitoo n kpákatiñ kɔŋkɔnnee, tí kpèè kí nín fǒǒ-u kí kíí!” Bin bi nìn kpáá idɔpuntikaa pu ki còon ki ɲāl-uee mun nìn bí ki sī-u.
- 33Kuwiŋkuluu gbánee dibɔmbɔndi jéeti kitiŋ kɔkɔ pu ki tin sāa tikúti tita.
- 34Tikúti titee, Yeesu fáá mbiil mpɔn, yii: “Eelooi, Eelooi, lama sabakitani?” (An taapu sá yii “M-Nimbɔtiu, m-Nimbɔtiu, ba ɲá ní a dū-mi ki fá?”)

³⁵Bin bí niinee biba nín gbìl̄ u fáá mbiil mimmee, ní bi bí yii: “P̄ilfimaan! U yîi Eelii dee!”

³⁶Ní bi-kansikin ubo sán̄ ki ȳoñ̄ kuca ki múl̄ ndaam min gàmee ni, ní ki dūu túuñ̄ ñk̄p̄ond̄o pu ki t̄ī Yeesu n̄ nyò, ní ki l̄ī yii: “Tí yànt̄imaan k̄i kp̄èè Eelii yaa làá dāāñ̄ k̄i kp̄ákatiñ̄-u!”

³⁷Yeesu ḡit̄i fáá mbiil mp̄onee, ní ki kp̄î.

³⁸Ní sata un n̄n p̄it̄i Kunimb̄otidii poon ki ḡānt̄i laakin bi yîi circir páaa lañkee n̄i laan kínee cúū cáti abuku ali ki k̄il̄iñ̄ yilpu ki dāa k̄ati taapu.

³⁹Room yab soojakpiliu un n̄n sí ki b̄iit̄iñ̄ Yeesuee wál̄ u n̄n s̄int̄i puee, ní ki l̄ī yii: “Tiñman kijapaai nee lafun sá Unimb̄oti Jip̄oon ní.”

⁴⁰Binimpoobi biba mun n̄n sí kudandañu ki kp̄èè. Maarii un nyánni Magdala tiñkinee, n̄i Saloomee n̄i Maarii un sá Jaakiwaai n̄i Joosee nee, mun n̄n bí bi-kansikin.

⁴¹Bín̄ di n̄n táá Yeesu ki tútuñ̄-u ñyunti ñun u n̄n bí Gaaliileeyee. Biba mun tikpil n̄n céèñi-u ki jóm̄ Jeerusaleem.

⁴²⁻⁴³Bib̄soonliibi kansikin ukpil ubo n̄n bí, binib n̄n tó-u tiñan pu, bi yîi-u Jooseefi u sá Arimatee tiñkin, ú mun n̄n b̄ont̄i u-ba ki cí Unimb̄oti beel. D̄wiin̄ n̄n tóob̄ k̄i j̄eet̄i ñwiññuñfikaa n̄ k̄ílee, ní u ká dip̄obil ki cūti Ḡomina Piilati cee ki m̄eē-u nsan k̄i yòoñ̄ Yeesu wunti.

⁴⁴ḡomina Piilati n̄n gbìl̄ yii Yeesu p̄ut̄i kp̄áāā kp̄iyyee, ní u b̄akat̄i, ní ki ȳiñ̄ usoojakpil ki b̄alfi-u yii Yeesu n̄n kp̄îyee an yúnt̄āa.

⁴⁵Usoojakpilee n̄n t̄ukū-u yii Yeesu lafun kp̄î an yúnt̄èe, ní Piilati pú Jooseefi kinyok̄o yii ú cūū yòoñ̄ Yeesu wunti.

⁴⁶Ní Jooseefi cūti ki dá ññaapiin ki d̄omiñ̄ ki kp̄aat̄i Yeesu wunti, ki dūu t̄akan̄ ññaapiinee ni, ní ki cáá-u ki b̄il̄ dikaakul din bi n̄n l̄ukū ditañkpalinee. U dū-u ki ñá dikaakulee ni ki d̄óyee, ní ki b̄int̄i ditañkpaakpaandi diba ki dūu p̄iñ̄ dikaakul nyok̄o.

⁴⁷Maarii Magdala ȳou n̄i Maarii Joosee na mun n̄n sí ki kp̄èè laakin bi dū-u ki bílee.

Maarki 16

¹D̄wiññuñfikaa jít̄èe, Maarii Magdala ȳou, n̄i Saloomee n̄i Maarii Jaaki na, cūti ki dán̄ talaalub bin bi cáā ñáñk̄i bitañkpiibi wuntee, k̄i cáā ñm̄it̄i Yeesu wunti.

²Ku wúnt̄i ñwimpeekaa dal kutaafaau p̄òlp̄olee ní bi búnt̄i dikaakul lañki.

³Bi céé ní ki b̄alfi t̄ob̄ yii: “D̄ma di dáá tin b̄ikit̄i-ti ditañkpal k̄i w̄aat̄i dikaakul nyok̄o dee?”

⁴Bi wáañ̄ ki kp̄ēyee, ki ká ditañkpaakpaandee b̄int̄i ki w̄aat̄i dikaakul nyok̄o.

⁵Binimpoobee b̄āañ̄ ki kó dikaakulinee, ní ki wál̄ unaacimp̄oon ubo k̄a bi-ñan̄giil pú ki p̄ējibapiin, ní tifaandi kó-bi.

⁶Ama ní unaacimpɔɔnee bí-bi yii: “Taa fàŋkìmaan! M nyí ni nín nyàab̀ Yeesu Naasaareeti you un bi kpáá ndɔpuntikaa puee. U fikiti, waa bí doo. Kpèèmaan, laakin bi nìn bíl-uee sèé,

⁷kí nín cámaan kí tükù u-boonnooliibi nì Piyeer yii u dàá lintī, ni tin kántí-u Gaaliilee. Niin ní ni tin kántí-u kii u nín nìn péētükū-ni puee.”

⁸Bi nyán dikaakulinee bi-pɔbiliŋ bíil ní bi sán bi-wunti gbàà. Bi nín fàŋkée puee, baa péēmáafi báà ubɔ tiba.

[⁹Yeesu nín fikiti kinyɔŋ wimpeepeekaaŋuee, Maarii Magdala you un ni u nìn jīn arasiniibi bilulee ní u yāntì u péé ki ká-u.

¹⁰Unimpuee cūti ki máafi bin nì Yeesu nìn tāatée, u bàñee bíh ká nì diniminaamandi ki sūh.

¹¹Dyunti ŋun bi gbīl unimpuee cee yii Yeesu bí dimaŋfalin u ká-u muee, baa fǔǔ ki kíf.

¹²Mín boonee, Yeesu gítī tí nyántì u-ba mbamin nsanni ki dàkā bi-kansikin bili bin nìn yíkì ki cá kitimbilii kibanee.

¹³Bi nìn fātii gítin ki máafi bin kínee, ní baa tí fǔǔ bí mun bɔti ki kíf.

¹⁴Boonee ní u nyántì u-ba ki dàkā u-kpambaliŋ saalaa nì dibee ŋyunti ŋun bi ká ki jīn tijinee. Yeesu wòon-bi bi-pɔbiliŋ nín gbifi baa fǔǔ-u ki kíyee pu, kun puee baa nìn fǔǔ bin ká u nín fikitèe bɔti ki kíf.

¹⁵Ní u tükū-bi yii: “Cùmaan kitiŋ jaŋŋi kòkòwoooo kí sòon tibòmantiil nee kí tī kunibuluu kamaa!

¹⁶Un yaa fǔǔ ki kíf ní bi fūl-u Unimbɔti nyimee kántí difiil. Ama un yaa kaa fǔǔ ki kíyee dāa kòò ditafadaaldin ní.

¹⁷Maamaaci tuuŋŋi ŋin bin yaa fǔǔ-mi ki kíyee dàá nīn ŋáanee sèé: m-yindi puee bi dàá jà arasiniibi, ki dàá sòon isooncaan.

¹⁸Bi dàá cūti ikoobu, kí nyò ndabiim, tiba kaa làá ŋá-bi. Bi dāa pāantí bi-ŋalii bibunliibi pu ní bí ká dicaandi.”

¹⁹Ti-Dindaan Yeesu sòon nì bi mín ki dóyee, ní ki yíkii nín jóm yilpu ki tin kāl Unimbɔti ŋaŋgiil pú.

²⁰Ní u-boonnooliibi búnti ki sòon tibòmantiilee ajan kòkò, ní ti-Dindaan bí bi-cee ki ŋáan maamaaci tuuŋŋi ki dàkà yii tibɔti tin bi sòonee sá ibaamɔn.]

Luuki

Luuki 1

- ¹Ukpil Teeoofiil, binib tikpil pɔ̀n̄ ki n̄mān̄ ditundi din Yeesu t́n̄ ti-kansikinee bɔ̀ti.
- ²Bi péēn̄mān̄ kii bin n̄n̄ ká tibɔ̀tee killan̄ki ki ḱn̄ ki sòn̄ ki n̄aat̄i Unimbɔ̀ti bɔ̀tee, n̄n̄ máafi-t̄i puee ní.
- ³Mín̄ puee, kii m̄ n̄n̄ nyàaḅ̄ ki cúú mbaamɔ̀m̄ tin̄ jítī doooo n̄kilkaaminee, an k̄itī yii man̄ mun̄ n̄ dū-t̄i k̄i n̄mà k̄i t̄i-si,
- ⁴an n̄n̄ dàa n̄á pu á n̄mā k̄i béé yii bi n̄n̄ dàkā-si tibɔ̀ti tin̄yee sá ibaamɔ̀nee.
- ⁵Dyunti n̄n̄ Eeroodi n̄n̄ sá ubɔ̀ti Juudee tin̄kinee, usaraan̄al ubɔ̀ n̄n̄ bí, bi ȳn̄-u Sakari, u n̄n̄ sá usaraan̄al Abiya kitil poon ubɔ̀ ní, ní bi ȳn̄ u-nimpuu Eelisabeeti ú mun̄ n̄n̄ sá Aarɔ̀n̄ maaliṅu poon ní.
- ⁶Biliitil n̄n̄ yú deede Unimbɔ̀ti n̄imiin̄ ní ki tó ti-Dindaan marab kɔ̀kɔ̀ mm̄ntiim̄,
- ⁷ama baa n̄n̄ cáá kibiki kun puee Eelisabeeti n̄n̄ sá un̄man̄n̄manti, ní biliitil n̄n̄ púl̄.
- ⁸Sakari kitil yuntiṅu b̄aaṅee, bi f̄ɔ̀s̄ saraa tundi ní Sakari kó Kunimbɔ̀tidiin̄ ki b̄i n̄j̄aān̄ u-tundi Unimbɔ̀ti n̄imiin̄.
- ⁹Kii bisaraan̄aliibi n̄n̄ n̄j̄aān̄ puee, bi tó kasi ki lēe-u ú kó ti-Dindaan diiku poon k̄i tūū talaalu,
- ¹⁰n̄i kunipaau kɔ̀kɔ̀ bí mm̄n̄ki ki m̄eé n̄yunti n̄n̄ un̄ b̄i t̄ut̄i talaalu nsaraafan puee.
- ¹¹U bí niinee, ní ti-Dindaan tūun̄ṅu n̄ubɔ̀ dóm̄in̄ ki yúl̄ nsaraafan cee n̄n̄ṅaṅiil pú.
- ¹²U ká ntūunee, ní u-pɔ̀bil b̄iil̄, ní tifaandi cúú-u.
- ¹³Ní ntūunee bí-u yii: “Sakari, taa fan̄ki! Di sá yii Unimbɔ̀ti f̄ɔ̀s̄ a-wimmeem, a-nimpuu Eelisabeeti dàá d̄áá màal̄-si kibinin̄jabiki, á d̄áá p̄-k̄i diyindi yii Jaan.
- ¹⁴An dàá n̄n̄ sá-si dipɔ̀p̄in̄kpaandi n̄i mm̄n̄ ní, ní binib tikpil dàá f̄aal̄ u-m̄altam pu.
- ¹⁵U dàá d̄áá n̄n̄ sá unikpaan ti-Dindaan n̄imiin̄. Waa d̄áa nyù ndaam n̄i tinyɔ̀kaal tin̄ kɔ̀kɔ̀ péēgbéèyee. U dàá d̄áá gb̄i Unimbɔ̀ti F̄am̄ doooo u-na poon ní.
- ¹⁶U dàá d̄áá ḡīn̄ Israyeel yab kupaau ti-Dindaan bi-Nimbɔ̀tiu cee.
- ¹⁷U dàá d̄áá lint̄in̄ ti-Dindaan nyɔ̀kɔ̀pu k̄i d̄áá n̄n̄ cáá Unimbɔ̀ti F̄am̄ n̄i m̄p̄on̄ kii Eelii n̄n̄ n̄n̄ cáá puee, k̄i ȳant̄i b̄ibaatiibi n̄i m̄biyaamu n̄ k̄p̄iiki, ní k̄i ḡīn̄n̄i bin ḡaat̄e deedeedambi cīn̄ṅun̄, ní k̄i b̄ont̄ī dinikitil mm̄ntiim̄ k̄i yóon̄ ti-Dindaan.”
- ¹⁸Niinee ní Sakari bí Unimbɔ̀ti tūun̄ṅuee yii: “M̄ dàá n̄á mana k̄i béé yii tibɔ̀ti nee sá ibaamɔ̀n̄? Kun puee man̄ púl̄aaa, m-nimpuu mun̄ púl̄.”
- ¹⁹Ní ntūunee bí-u yii: “Man di sá Gabriyeel, man di bí Unimbɔ̀ti n̄imiin̄ ki tūn̄ atuun̄. Unimbɔ̀ti di t́nn̄i-mi m̄ cáan̄ dinyɔ̀b̄umm̄ɔ̀ndi gbanti k̄i t̄uk̄u-si,

- ²⁰ní saa f̄ōō m-bōti tin m sōōn nì si nee ki kíí, ama an yuntiṅu yaa bàñ an dàá ḡá mín. Mín puee, a dàá kpántí umōōmiin kí taa ti ḡmā kí sōōn ní kí nīn cí ḡyunti ḡun tibōti tin m sōōn nee dàá ḡée.”
- ²¹Dyunti gbantee, an ḡá bin kā mmōḡki ki cí Sakari n̄ nyānnée bitii, kun di ḡúb-u kudii poon ní waa nyēēhee.
- ²²U nín dāa nyānnée, waa ti ḡūñ kí sōōn, u kíñ ki lábití u-ḡalii mmōōmiimmin ní. Niinee ní bi bēè yii Unimbōti ḡúbitì u-nimiliṅ u wál tiba kudii poon.
- ²³Iwiin in sá Sakari n̄ dūú ḡá Kunimbōtidii poon tundee sāāyee, ní u nín kùñ u-dumpu.
- ²⁴Mín boonee ní u-nimpuu Eelisabeeti cáá dipool, ní ki bál, kaa ti nyēēali iḡmal iḡmoo,
- ²⁵ní ki bí yii: “Kōḡkōñnee kpèèmaan Unimbōti nín ḡá min ki tī-mee! U ḡá mín kí lēēkun n̄n kōntí-mi icoo binib kansikinee dee.”
- ²⁶Eelisabeeti cáá dipool iḡmal iluuyee, ní Unimbōti tú u-tūḡḡu Gabriyeel Gaaliilee tiḡki kin bi yí Naasaaretee
- ²⁷usapōon un kaa nyí uninja bi yî-u Maariyee cee. Usapōonee n̄n cáá bōon, bi yî-u Jooseefi, u sá ubōti Dafiidi maaliṅun ní.
- ²⁸Ní Unimbōti tūḡḡuee kó usapōonee cee ní ki bí yii: “M jáám-si, sii un Unimbōti pú diyimōolee, ti-Dindaan bí a-cee.”
- ²⁹U jáám ki dōyee, ní Maarii fāḡkì tikpil ní ki bālfì u-ba yii: “Ba jaamii di nín yá dee?”
- ³⁰Niinee ní ntūunee bí-u yii: “Maarii, taa fāḡkì, diyimōol ní a ká Unimbōti cee.
- ³¹A dàá cáá dipool kí màal kibininjabiki, á dāá pō-kì diyindi yii Yeesu.
- ³²U dāa sá unikpaan ní. Yilpu fōḡḡḡ Nimbōtiu dāa yíi-u u-Jipōon. Úñ ní ti-Dindaan Unimbōti dàá dū u-naanja Dafiidi beel kí tī.
- ³³Úñ di dàá nīn sá Israyeel yab bōtiu jaanjaan ní u-beel kaa dāa cáá dikuntil.”
- ³⁴Ní Maarii bí ntūunee yii “Maa nyí uninja, an dàá ḡá mana ní kí bàñ mín?”
- ³⁵Ní ntūunee kíi-u yii: “Unimbōti Fām di dàá kpákatiñ a-pu, ní yilpu fōḡḡḡ Nimbōtiu pōḡḡu n̄ bliñ a-pu kii mboonee. An pu ní circir biki kin a dàá màalee bi dāa yíi-kì Unimbōti Jipōon.
- ³⁶Kpèè, a-kpilintō Eelisabeeti unimpunaatee mun cáá kibininjabiki pool, ún un bi n̄n yíi uḡmaḡḡmantee bí u-ḡmaluluutiu poon ní nee;
- ³⁷di sá yii tiba kaa bí ki pōō Unimbōti cee”
- ³⁸Ní Maarii bí yii: “M sá ti-Dindaan yumbuu ní, a nín lī puee, án ḡá mín.” Ní ntūunee yíki u-cee.

- 39 Dyunti gbanti poon ní Maarii yíkì Naasaareeti ki búntí ajoin watil pú, ní ki tin bàñ Juudee tiŋki kiban,
- 40 ki kó Sakari dumpu ní ki jáam̄ Eelisabeeti.
- 41 Eelisabeeti nín gbìl̄ Maarii jaamiyee, ní kibiki cīŋkì u-poon, ní u gbí Unimbōti Fām
- 42 ní kí téen̄ m̄p̄on̄ yii: “Unimbōti bīn̄ a-pu ki jítiñ binimpoobi kòkò, ní ki bīn̄ kibiki kin a dàá màalee mun pu.
- 43 Ma mun ŋma ní m-Dindaan na ñ dāañ m-cee?
- 44 Di sá m nín péēgbìl̄ a-jaamii puee, ní kibiki cīŋkì m-poon n̄ ifaal.
- 45 Án n̄n̄ mōn̄ sii un f̄ōō ki kíkí yii ti-Dindaan nín lī miŋyee, an dàá lafun ŋá mimmee.”
- 46 Ní Maarii bí yii: “M nyóŋkí ti-Dindaan n̄ m-pōbil kòkò u nín sá ukpaan puee,
- 47 an mōn̄-mi tikpil Unimbōti m-Fiiliu pu,
- 48 kun puee u t̄int̄in̄ ki kpēēman u-t̄ont̄onliu nín s̄intiñ u-ba puee. Ní kí yòon̄ d̄in̄ kí n̄n̄ cée, iyunti kòkò nib dàá yíin̄-mi diyimōlda.
- 49 Kun puee Unimbōti m̄p̄oŋkpaandaan un bí circiree ŋá atuŋkpaan ki t̄i-mi. U-yindi bí circir.
- 50 U-saasol bí kí n̄n̄ cá abin abin ki t̄i bin f̄aŋkí-uee.
- 51 U-p̄oŋŋu ní u d̄ū ŋá atuŋkpaan, ki yāañ bin dākà bi-bee.
- 52 U téé bibōtiibi bi-jaliŋ pu ki lúkú, ki yōon̄ binandambi yilpu.
- 53 U yānti bin ŋk̄um̄ n̄n̄ cááyee ká digbil mm̄ont̄iim̄ ní ki j̄in̄ bigaajab ki ḡiñ̄ n̄ in̄aŋkulim.
- 54 U j̄ōon̄ u-t̄ont̄onliibi Israyeel yab, ki téet̄i u-poondi pu ki ŋá-bi tiŋan,
- 55 kii u nín péēp̄ōon̄ ti-naanjab, Abraam n̄ u-maaliŋu kòkò puee, kí n̄n̄ cá jaanjaan.”
- 56 Maarii n̄n̄ kāl̄ Eelisabeeti cee iŋmal ita nyòk̄om̄ ní ki f̄ati ki nín k̄un̄.
- 57 Eelisabeeti maalyuntiŋu bāañ ní u màl̄ uninja,
- 58 ní u-k̄oŋk̄onnaat̄ob̄ n̄ u-nabiyaamu nín gbìl̄ tiŋaŋkpaandi tin ti-Dindaan ŋá ki t̄i-uee puee, ní bi n̄n̄ u kòkò bí f̄aal̄.
- 59 An tú iwiin̄ iniyee, ní bi d̄omiñ̄ ki nyánti kibiki ní ki ḡí-kì ní ki bàà là kí p̄ō-kì ki-baa yindi Sakari.
- 60 Ní ki-na bí yii: “Aayee, ti dàá n̄n̄ yíi-u Jaan ní.”
- 61 Ní bi bí-u yii: “A-yōu ŋma ní bi yíi m̄in̄?”
- 62 Niinee ní bi bālf̄i ubaati mm̄ōomiim̄min̄ diyindi din u là bí p̄ō kibikee,

⁶³ní u yāntì bi fī-u kupiliŋu, ní u ŋmān yii: “U-yindi di sá Jaan.” Ní báà ŋma bākati seeee.

⁶⁴Niinee, Sakari limbil cúū kpāti, ní u kíí ki bī sòòh ki nyóŋkí Unimbōti.

⁶⁵An yāntì tifaandi kó bi-kòŋkonnaatòb, ní binib kíh ki máafí an bōti Juudee tiŋki kin sá ajoonee kòkò ni.

⁶⁶Bin kòkò nìn gbīl an bōtee nìn bī dākafí ti-pu, ní ki bālfí bi-ba yii: “An bikee dàá dàá nīn bí mana dee?” Tiŋman, ti-Dindaan pòŋŋu nìn bí kibikee pu.

⁶⁷Niinee ní Unimbōti Fām gbí Sakari, kibikee baa, ní ki yāntì u bī nātī Unimbōti bōti yii:

⁶⁸“Ti-Dindaan Israyeel nimbōtiu n ká inyòŋki, kun puee u gíinní u-landòkòŋu u-niboolii pu ki fī-bi ki lí.

⁶⁹U nyántiín-ti Ufiil mpòndaan ubò, udaan sá u-tòntòliu ubōti Dafiidi maaliŋu poon ní,

⁷⁰kii u nín nìn yāntì u-circir bōnaatiliibi bin nìn bí njaminee sòòh ki síh puee,

⁷¹yii: u dàá nyánti-ti ti-nannanliibi nì bin kòkò ná-tee ŋaan,

⁷²ki dàá dākà ti-naanjab u-saasòl, kí téetí u circirpoondi din u nìn pòòh-bee pu,

⁷³kii u nín nìn pūti ki pòòh ti-naanja Abraam cee puee,

⁷⁴yii u dàá nyánti-ti ti-nannanliibi ŋaan, tí ŋmā kí nòó-u kí taa fàŋkì,

⁷⁵kí nīn bí circir nì deede u-nimiin ali ti-kúm dal.

⁷⁶Ní sii, kibiki, bi dàá dàá nīn yī-si yilpu fòŋŋŋ Nimbōtiu bōnaatiliu ní, kun puee sii di dàá dàá nīn lí ti-Dindaan nyòkòpu kí ŋāŋkì u-saŋŋu,

⁷⁷u-niboolii n bée yii u dàá dàá fī-bi kí dū bi-kpitii kí pò-bi.

⁷⁸Kun puee Unimbōti nín cáá tiŋan u-poon mō puee, u dàá yānti yilpu walfiŋu n ŋmínti ti-pu kii ŋwiih nín nyēēpuee,

⁷⁹kí ŋmínti bin bí dibòmbòndinee nì bin bin bí ŋkúm saŋŋu puee, kí kpòotī-ti kí gíh ŋgbansòŋfi saŋŋun.”

⁸⁰Kibikee nìn wīnti ní ki-ciini mun wīnti. U nìn kòòh kupòoun ní ali ki tin sāa dalin kin u kíí ki bī sòòh nì Israyeel yab Unimbōti bōtee.

Luuki 2

¹Dyuntē ní gòminakpaan Oogusti yòòh mara yii bí kààh ntimu kòkò nib.

²Dikaampeepeekaalee nìn sá ŋyunti ŋun Kirinusi nìn sá gòmina Siirii tiŋkinee ní.

³Ní báà ŋma nìn cá u-naanja tiŋkin bí kààh-u.

- ⁴Mín puee ní Jooseefi mun yíkì Naasaareeti Gaaliilee tiŋkin ki nín cá uboti Dafiidi dumpu Beetleem, Juudee tiŋkin, kun puee u nìn sá Dafiidi naantitòntòkòl ní,
- ⁵u nì u-bòon Maarii un nìn sá upòdaanee di nìn cū̀tì dikàandi gbanti.
- ⁶Bi bí Beetleem niinee, ní ηwiin ηun Maarii dàá màalee dūu bā́ań,
- ⁷ní u màl̄ u-biseemal kibininjabiki ní ki dū iŋaabu ki fiń-kì, ní ki dū-kì ki bíl̄ kunaakooun laakin bi ηáań tiwaŋkuti timool tì ηmòòyee, kun puee binib nìn gbí kunicandii poon, baa nìn ηū̀n kí kó niin.
- ⁸Kitiŋ gbanti poonee, bipikpaaliibi biba nìn dō tisatin ki kpàá bi-piii,
- ⁹ní Unimbòti tūuηηu ηubò cílìn bi-pu, ní ti-Dindaan walfiŋu ηmíntì ki mǎntì ki tú-bi ní bi fǎŋkì tikpil.
- ¹⁰Ní ntūunee bí-bi yii: “Taa fǎŋkìmaan! Dinyòobummòondi din dàá mōòkìh̄n bā́a ηma tikpilee ní m cáań-ni.
- ¹¹Dinyòobundi gbanti di sá yii dín nyeeeku nee bi màl̄-ni Ufiil ubò Dafiidi dumpu Beetleem, ù̀n di sá Kriisitoo, ti-Dindaan.
- ¹²Min ni dàá dūu béé an bikee di sá, ni yaa bàñee, ni dàá ká ki dō laakin bi ηáań tiwaŋkuti timoolee, bi dū iŋaabu ki fiń-kì.”
- ¹³Kpalaayee, ní Unimbòti tūuni dikitikpaandi diba nyánní yilpu ki dómíń ki kú̀tì ηun béeyee pu, ní i kíł ki bí nyóŋkí Unimbòti yii:
- ¹⁴“Inyòŋki sá ki tī Unimbòti un bí yilpu fóŋŋŋee, ní u-gbansòŋfiŋu sá ki tī taapu doo nib bin fáatì-uee.”
- ¹⁵Itūunee yíkì ki nín gítí yilpuee, ní bipikpaaliibee sòoń yii: “Tí cùmaan Beetleem! See tí ká tin di bā́ań ní ti-Dindaan yāntì bi dómíń ki tükū-tee. “
- ¹⁶Niinee ní bi yíkì malaa malaa ki búntì. Bi bàñee, ki ká Maarii nì Jooseefi nì kibiki kíh̄n dō laakin bi ηáań tiwaŋkuti timoolee poon.
- ¹⁷Bi ká kibikee, ní ki máafi Unimbòti tūuηηu nín dómíń ki tükū-bi kibiki gbanti bōti puee.
- ¹⁸Binib bin kòkò gbíl̄ tin bipikpaaliibee sòoñee, nìn bākati seeee.
- ¹⁹Ama Maarii ù̀n dū an bōti kòkò ki kpáafi u-pòbilin ki dākafi ti-pu.
- ²⁰Ní bipikpaaliibi fātì nín gítí, bi-pikpaaku laŋki ki nyóŋkí Unimbòti ki pàkà-u bi nín gbíl̄ tiŋyee nì tin bi kée pu, kun puee ntūunee nín péē tükū-bi puee, míh̄n deedeede ní bi ká.
- ²¹An tú winniyee, bi gí kibiki ní ki pú-kì diyindi yii Yeesu, kii Unimbòti tūuηηu nín nìn péē tükū u-na pu kí wàatī ú nín cáá dipoolee.

²²Dyunti ñun sá bí ñá Maarii akoobil kii Unimbɔti nín yāntì Mooisi ñmāñ marab puee bàñee, ní bi yóòn kibiki ki cáā cūnni Jeerusaleem tiŋkin kí cáá-kì kí ñá ti-Dindaan ñaan,

²³kii an nín ñmāñ ti-Dindaan marau poon puee yii: “Kibiseebiki yaa sá kininjabikee, an sá bí gāntī kí ki-ba kí yóón ti-Dindaan”

²⁴ní “kí cáā abeenanjipɔmbil ali àá nnanjilimu muli kí ñá saraa, kii ti-Dindaan nín síiñ mara puee.”

²⁵Uninja ubɔ nín bí Jeerusaleem, bi yî-u Siimeeyɔn, u bí deede ki tó Unimbɔti ní ki nín kâ ki cí un dàá dāñ kí fī Israyeel yabee. Unimbɔti Fām nín bí u-cee,

²⁶ní ki nín tükū-u yii u dàá ká Kriisitoo ní kí nín kpú.

²⁷Unimbɔti Fām kpɔtì Siimeeyɔn ki kóñ Kunimbɔtidiin ñyunti ñun Yeesu na nì u-baa cáá-u niin kí ñá mara nín bālfī miñyee,

²⁸ní Siimeeyɔn fɔɔ-kì u-ñaan ki jáam Unimbɔti yii:

²⁹“M-Dindaan, a nín nín pɔòn puee, an ñá mín! Kɔŋkɔnnee, yāntī a-tɔntɔnliu n kpú nì ngbansɔŋfi,

³⁰kun puee m-nimil ká Ufiil

³¹un a bóntí ki yóòn inibool kɔkɔee.

³²Ún di sá ñwalfi ñun dàá yāntī atimbul kɔkɔ n bée-see, ún di dàá tī a-nikitil Israyeel yab tinyool.”

³³Niinee, ní Yeesu baa nì u-na bākatì nì tibɔti tin Siimeeyɔn bí sòòn bi-biki puee.

³⁴Ní Siimeeyɔn mēēUnimbɔti n bliñ bi-pu. U mēēki dódyee, ní ki bí Maarii yii: “Kpèè, Unimbɔti lēēkibiki nee, ki-puee Israyeel yab tikpil n lítí ní tikpil mun n yīkì, ún di dàá dāā nīn sá Unimbɔti daaŋku kun binib dàá dāā kpákañee,

³⁵ki dàá dāā biitī binib tikpil landɔkɔi in bál bi-pɔbiliŋ poonee. Ama sii ubinaati, bi nín dàá dāā ñá-u puee dàá dāā kó kí dóó-si, kii kijiki ní bi dūu sāā a-pɔbilee.”

³⁶Unimpu ubɔ mun nín bí, bi yî-u Ana, u sá Unimbɔti bɔnaatiliu. Fanuyeel un sá Aseer naantitɔntɔkɔlee bisal dee. U nín mɔñ ticatee, u ñá abin aluli ní u-cal kpî,

³⁷ní u gbíntì mín ki sá ukpiipu, kaa ti mɔñ, ní ki púl tikpil ki tin bāñ abin imuŋku inaa nì abin anaa. U nín tūñ Unimbɔti tundi ñwīñ pu nì kunyeeu ki bɔɔb kinyɔkɔ ki mēé Unimbɔti, kaa sūtí kí wātī Kunimbɔtidi.

³⁸Dyunti gbanti ní unimpuee bāñ ki ñmāntiñ-bi Kunimbɔtidiin ní ki bí pākā Unimbɔti, ní ki sòòn kibikee bɔti ki tükù bin kɔkɔ kâ ki cí Unimbɔti n dāā fī Jeerusaleem yabee.

³⁹Yeesu baa nì u-na ñá ti-Dindaan nín yóòn mara bí nīn ñáañ puee ki dódyee, ní bi fātī nín gítí bi-dumpu Naasaareeti Gaaliilee tiŋkin.

- ⁴⁰Ní kibikee n̄n w̄intí ki cíkití ki cáá iciin tikpil, ní Unimb̄oti b̄i ki-boon.
- ⁴¹Abin kamaayee, Yeesu baa n̄n u-na cá Jeerusaleem ní ki j̄n̄ apibil j̄njaaliu un bi j̄n̄ ki t̄etí Unimb̄oti n̄n n̄n nyánti bi-naanjab Eejipitee.
- ⁴²Yeesu b̄an̄ abin saalaa n̄n alee, u-baa n̄n u-na tí cá Jeerusaleem j̄njaalee, ní ki kp̄aan̄-u.
- ⁴³Bi j̄ín j̄njaal ki d̄òyee, ní Yeesu ùn̄ gb̄int̄i niin, ní u-baa n̄n u-na n̄n k̄unn̄í, kaa nyí yii Yeesu gb̄int̄ín̄,
- ⁴⁴ní bi c̄ōm̄ ñwimm̄on̄ ki d̄akaf̄i yii u bí bi-saŋkinjutiibi bin kínee cee. Boonee ní bi kíñ ki b̄í nyàab̄-u bi-nabiyaamu n̄n bi-b̄oobi cee.
- ⁴⁵Baa ká-uee, ní ki n̄n ḡítí Jeerusaleem kí nyàab̄-u.
- ⁴⁶Winta dalee, ní bi d̄ā ká-u Kunimb̄otidiin, u k̄a bimaradakaliibi kansikin ki p̄ílf̄i bi n̄n s̄oñ puee, ní ki b̄alf̄i-bi tib̄oti.
- ⁴⁷Bin k̄ok̄o n̄n bí niin ki p̄ílf̄ee n̄n b̄akat̄i u n̄n cáá iciin ki kíikí tib̄oti miŋyee.
- ⁴⁸U-baa n̄n u-na b̄ān̄ ki ká-u niinee, ní bi b̄akat̄i, ní u-na bí yii: “M-biki, ba ñá ní a ñá-ti mimmee! Man n̄n a-baa nyàab̄-si, ti-nimiliŋ mánti.”
- ⁴⁹Ní u bí-bi yii: “Ba ñá ní ni nyàab̄-mi? Naa nyí yii m máan̄ kí n̄n bí m-Baa diikunaaan?”
- ⁵⁰Ama baa n̄n gb̄il̄ u n̄n s̄oñ puee taapu.
- ⁵¹Niinee ní u yík̄i n̄ó-bi ki n̄n ḡítí Naasaareeti, ní ki s̄int̄iñ u-ba ki t̄i-bi. Ní u-na cúú tin k̄ok̄o j̄ít̄i Kunimb̄otidiinee ki kp̄aafi u-p̄obilin.
- ⁵²Yeesu n̄n w̄intí ní u-ciini mun w̄intí, ní u n̄n m̄ot̄i fáat̄iñ Unimb̄oti n̄n binib.

Luuki 3

- ¹Ḡominakpaan Tibeer beel biŋŋi saalkuee, P̄onsi Piilati n̄n sá ḡomina Juudee tiŋkin, ní Eeroodi n̄n sá ub̄oti Gaaliilee tiŋkin ní u-maan Fiiliipi mun sá ub̄oti Iituree n̄n Trakoonii timmun, ní Liisaaniyasi sá ub̄oti Abileen tiŋkin,
- ²ní Ana n̄n Kaayifi n̄n sá bisaraaŋakpilib. Dyunti gbanti ní Unimb̄oti n̄n s̄oñ n̄n Jaan Sakari jip̄oñ kup̄oñ.
- ³Ní Jaan kí ki b̄í ȳiñ̄ n̄timu mun bí J̄oñdan m̄oñ caŋinee ki s̄oñ yii: “Kp̄ántímaan ni-bimbim bí f̄al̄-ni Unimb̄oti nyim, ní Unimb̄oti ñ d̄ū ni-kpitii kí p̄o-ni.”
- ⁴An n̄ó n̄n Unimb̄oti b̄onaatiliu Eesayi n̄n ñm̄ān̄ u-takaldau poon puee yii: “Ubo báakí kup̄oñ yii: B̄ontímaan ti-Dindaan saŋŋu kí tantímaan u-sambiyaamu kí c̄iit̄i-u.
- ⁵Atantakal k̄ok̄o dàá d̄ā gb̄iŋk̄i, ajoon n̄n ñgbantamu k̄ok̄o dàá bit̄i. Asaŋḡoŋḡol dàá tant̄i. Isan in cáá ab̄obil ab̄obilee dàá ñaŋk̄i.
- ⁶Ní báa ñma ñ d̄ā ká Unimb̄oti n̄n fiil̄ binib puee.”

- ⁷Jaan nìn lì kunipaau kun nìn dòon ú fàl-bi nnyimee yii: “Nimbi bin tū kii ikoowaatee, ŋma di tükū-ni yii ni ŋūn kí sān kí ŋmátí Unimbōti ŋuul din dòoŋee ni?”
- ⁸Lòommaan abil ŋin dākà yii ni kpántì ni-bimbimee, kí taa nīn kā ki dākafī yii Abraam sá ni-naanja! M tükū-ni ibaamōn ní, di sá Unimbōti ŋūn kí dū ataŋkpee nee kí kpántí Abraam naantiibi.
- ⁹Ali gba, Unimbōti bóntì kicōkō ki bíl isufi taapu: busubu bun kamaa yaa kaa lòon abimōntee, bi dàá gāa-bu kí tō ŋŋmin.”
- ¹⁰Ní kunipaau ee bíl bālfī-u yii: “Mim mee, ti dàá ŋá mana ní kí fáatí Unimbōti?”
- ¹¹Ní u kí-bi yii: “Un yaa cáá abōkuti alee n lēēdiba kí tī un kaa cááyee. Un mun yaa tí cáá tijinee, n lēēkí tī un kaa cáá kí jēe.”
- ¹²Ní bifōtīliibi mun dómiín bí fàl-bi Unimbōti nyim, ní ki bālfī Jaan yii: “Ukpil, ti máaŋ kí ŋá mana ní?”
- ¹³Ní u bí-bi yii: “Bi nín yóon mara yii bí nīn fótí puee, ní taa fótí kí lákatí mín pu.”
- ¹⁴Ní soojab mun dómiín ki bālfī-u yii: “Timbi máaŋ kí ŋá mana?” Ní u kí-bi yii: “Ní taa nīn dākà binib mpōn, kí taa nīn gífí inyimōn ki tūntí binib pu, ama ní yàntí tipaal tin ni fòol ŋmal ŋmalee n nīn mōn-ni.”
- ¹⁵Kii báà ŋma nín nìn kā ki cí Kriisitoo puee ní bi kíŋ ki bālfī bi-ba yii Jaan di kalin sá Kriisitoooo?
- ¹⁶Niinee ní Jaan bí bi-kōkō yii: “Man fūul-ni nnyim ní, ama ubō dòon, u-pōŋŋu jítiŋ man yōŋu, man kaa kpántì kí nīn sá u-yumbuu kí kútí u-naataaŋmiii gba. Ún di dàá dàá fàl-ni Unimbōti Fām nì ŋŋmi.
- ¹⁷Ún di ŋúb u-yubakalkaaku ki dàá bàkal kí gāntí idi nì tīfin, kí dū idee kí ŋá kulōŋun, ní kí dū tīfin kí tō ŋŋmi ŋun kaa kúu jaanjaanee ni.”
- ¹⁸Mín ní Jaan nìn sánkí binib, ki gítí kútí-bi tibōti tikpil ní ki sòon nì bi tibōmōntiil.
- ¹⁹Ní Jaan wòon ubōti Eeroodi un nìn cáá u-maan nimpuu Eeroodiyee nì u nín ŋaán atūŋkpiti tikpil ki kútèe.
- ²⁰Niinee ní Eeroodi gítí ŋá ditūŋkpitiil ki kútí: di sá yii u cúú Jaan ki pīn kudi.
- ²¹Dyunti ŋun Eeroodi kaa láá pīn Jaan kudiyyee, báà ŋma nìn fūul Unimbōti nyim ní Yeesu mun fūl Unimbōti nyim. U fūl ki bíl mèeyee, kutagbōŋu cúú pīti,
- ²²ní Unimbōti Fām kpákatiín Yeesu pu ki náaŋ nì dibeenanjil ní bi gbīl Unimbōti sòoní kutaa pu yii: “Sii di sá man Jipōon un m nēēŋ tikpilee, sii ní m-pōbil fáatí.”
- ²³Yeesu nìn ŋá kii abin mmuŋku nì saalaa ní ki kíl u-tundi. Binib nìn nyí-u yii u sá Jooseefi jipōon, ní Jooseefi baa sá Eelii,
- ²⁴Eelii baa sá Maataati, ní Maataati baa sá Leefii, ní Leefii baa sá Meelki, ní Meelki baa sá Jaanayi, ní Jaanayi baa sá Jooseefi,

- ²⁵ní Jooseefi baa sá Matatiyasi, ní Matatiyasi baa sá Amoosi, ní Amoosi baa sá Nawum, ní Nawum baa sá Eesilii, ní Eesilii baa sá Nagayi,
- ²⁶ní Nagayi baa sá Maatiyasi, ní Maatiyasi baa sá Matatiya, ní Matatiya baa sá Seemeeyini, ní Seemeeyini baa sá Jooseeki, ní Jooseeki baa sá Jooda,
- ²⁷ní Jooda baa sá Jooyana, ní Jooyana baa sá Reesa, ní Reesa baa sá Sooroobaabeel, ní Sooroobaabeel baa sá Salatiyeel, ní Salatiyeel baa sá Neerii,
- ²⁸ní Neerii baa sá Meelki, ní Meelki baa sá Adii, ní Adii baa sá Koosam, ní Koosam baa sá Eelmadam, ní Eelmadam baa sá Eer,
- ²⁹ní Eer baa sá Yeesu, ní Yeesu baa sá Eelieeseer, ní Eelieeseer baa sá Joorim, ní Joorim baa sá Maataati, ní Maataati baa sá Leefii,
- ³⁰ní Leefii baa sá Siimeeyon, ní Siimeeyon baa sá Juuda, ní Juuda baa sá Jooseefi, ní Jooseefi baa sá Joonam, ní Joonam baa sá Eeliyakim,
- ³¹ní Eeliyakim baa sá Meeleeya, ní Meeleeya baa sá Meenna, ní Meenna baa sá Maataata, ní Maataata baa sá Naatan, ní Naatan baa sá Dafiidi,
- ³²ní Dafiidi baa sá Jeesee, ní Jeesee baa sá Joobeedi, ní Joobeedi baa sá Boowaasi, ní Boowaasi baa sá Salmøn, ní Salmøn baa sá Naason,
- ³³ní Naason baa sá Aminadab, ní Aminadab baa sá Adameen, ní Adameen baa sá Arnii, ní Arnii baa sá Eesroom, ní Eesroom baa sá Fareesi, ní Fareesi baa sá Juuda,
- ³⁴ní Juuda baa sá Jaakøb, ní Jaakøb baa sá Isaaki, ní Isaaki baa sá Abraam, ní Abraam baa sá Tara,
- ³⁵ní Tara baa sá Nakoor, ní Nakoor baa sá Seeru, ní Seeru baa sá Rago, ní Rago baa sá Faleeki, ní Faleeki baa sá Eebeer,
- ³⁶ní Eebeer baa sá Sala, ní Sala baa sá Kayinaam, ní Kayinaam baa sá Arfakisadi, ní Arfakisadi baa sá Seem, ní Seem baa sá Noowee,
- ³⁷ní Noowee baa sá Lameeki, ní Lameeki baa sá Matusela, ní Matusela baa sá Eenoki, ní Eenoki baa sá Jareedi, ní Jareedi baa sá Maleeleel,
- ³⁸ní Maleeleel baa sá Kayinan, ní Kayinan baa sá Eenoosi, ní Eenoosi baa sá Seeti, ní Seeti baa sá Adam, ní Adam ùn sá un Unimboti péé ki náanee.

Luuki 4

- ¹Yeesu gbí Unimboti Fām ki nyánní Jōdan, ní Dfāmee cáá-u ki cūnnì kupōun.
- ²Ní Sitaan cóŋkì-u iwiin imuŋku ili. Waa nèn jín tiba iwiin imuŋku ilee, ní ñkùm cúú-u.
- ³Ní Sitaan bí-u yii: “A yaa lafun sá Unimboti Jipōon, á li yii ditankpal nee ñ kpántí kpōnō.”

- ⁴Ní Yeesu yî ní ki kíf-u yii: “Unimböti takaldau poon lî yii: 'An kaa sá tijin dijil ηmanijma di yì unil manfal.' “
- ⁵Niinee ní Sitaan yḏoñ Yeesu ki jóm̄ yilpu, ní ki yānti u kpēduulnya beeni kòkò dicilpu,
- ⁶ní ki bí-u yii: “M dàá dū mp̄on gbanti kòkò nì abee gbanti nyooti kí tī-si, kun puee man ní bi dū an wanti kòkò ki tī, ní man mun yaa là uḡyee ní m̄ tī.
- ⁷Mìn puee, a yaa gbāan̄ ki jáam̄ man, sii di dàá n̄n̄ kíñ ki yì an kòkò.”
- ⁸Ní Yeesu kíf-u yii: “An ηmāñ Unimböti takaldau poon yii: 'Ti-Dindaan a-Nimbötiu baba ní án sá á jāam̄, ní kí n̄n̄ bí ùñ baba tundin.' “
- ⁹Mìn boonee, ní Sitaan yḏoñ-u ki cáā cūnni Jeerusaleem, ní ki cáá-u ki tókòñ Kunimbötidi yilpu kúnti kúnti, ní ki bí-u yii: “A yaa sá Unimböti Jip̄oñ, á yùkū kí tiiñní tiba kaa làá ḡá-si,
- ¹⁰kun puee an ηmāñ Unimböti takaldau poon yii, 'Unimböti dàá yānti u-tūuni n̄ n̄n̄ cí-si.’
- ¹¹Ní ki gítí bí yii: 'I dàá n̄n̄ tiki-si i-ḡaan a-taal n̄ taa gbéetí ditaḡkpal.' “
- ¹²Ní Yeesu yî ní ki bí-u yii: “Unimböti takaldau lî yii: 'Á taa cōḡkì ti-Dindaan a-Nimbötiu.' “
- ¹³Sitaan cōḡkì Yeesu isan kòkò pu ki dóòyee, ní ki búnti kí n̄n̄ tí cí ḡyunti ḡubo.
- ¹⁴Ní Yeesu fātii nín gítí Gaaliilee tiḡkin ki gbí Unimböti Fām p̄ḡḡu tiḡan, ní u-yindi gb̄tī niin pú kòkò.
- ¹⁵U n̄n̄ dākà binib Unimböti b̄oti akpafidiin ni ní báa ḡma n̄n̄ pākà-u.
- ¹⁶Ní Yeesu búnti Naasaareeti, laakin u n̄n̄ kāl̄ ki wíiñee. Dwiḡḡuḡfikaa bāañee, ní u kó kukpafidiin, kii u nín péēkpāā ḡaāñ puee, ní ki yíkì kí kaañ Unimböti takaldau,
- ¹⁷ní bi dū takalda un Unimböti bōnaatiliu Eesayi ḡmāñee ki tī-u, ní u fḏḏ ki cúū kpátì ní ki ká laakin lî yii:
- ¹⁸“Ti-Dindaan Fām bí m-pu, u lēē-mi m̄ sòoñ tib̄om̄ntiil kí tī biw̄fib, u túnni-mi m̄ bāakì kí tükù bisarkadambi yii Unimböti dàá lí-bi, kí tükù bij̄ofub mun yii bi dàá wāl̄, kí tükù bin bi sàantée yii bi dàá ká dibat̄ol,
- ¹⁹kí tükù binib yii ḡyunti nee ní ti-Dindaan dàá s̄o bi-saai.”
- ²⁰Ní Yeesu kpáb takaldee ní ki gíiñ ki tī un kp̄éē kukpafidiyee, ní ki kāl̄ kí n̄n̄ dākà-bi ní bin kòkò n̄n̄ bí niinee kíñ ki k̄a ki kp̄éé-u címm̄.
- ²¹Ní u kíí ki bí tükù-bi yii: “Kí yòoñ d̄in̄ kí n̄n̄ cée tib̄oti tin m̄ kaañ ni gb̄l̄ nee bāañ dee.”
- ²²Ní báa ḡma kíñ ki sòoñ min ḡāñee u-pu, ní an ḡá-bi bitii tib̄om̄ntiil tin u sòoñee pu. Ní bi bí l̄i yii: “Joosefi jip̄oñ kaa yáaa?”

²³Ní u bí-bi yii: “M nyí yii ni dàá gāā-mi dilan̄kpandi nee yii, 'Unyɔɔdaan, cáan̄ a-ba' ní ki dàá gítī lì-mi yii: 'Ti gbīl̄ a nín n̄á min Kapeenaayumee, n̄á a-tuun̄ji gbanti abaanti a-tin̄ki poon doo.' “

²⁴Ní u gítī lī yii: “Ibaam̄n ní m sòon̄ n̄i ni, baa fòol̄ Unimb̄oti b̄onaatiliu u-dumpu mm̄ontiiimin.

²⁵Ibaam̄n ní m sòon̄, Unimb̄oti b̄onaatiliu Eelii yuntiñuee, utaa kaa n̄n gítī n̄n̄ abin ata n̄i dijandi ñkùm n̄n jéetì kitiñ kòkò pu. Bikpiipooobi n̄n w̄ikí Israyeel tin̄kin ñyunti gbanti,

²⁶ama Unimb̄oti kaa n̄n gítī tú Eelii Israyeel kpiipuu báà ubò cee, asee unican̄kpiipu un n̄n kòò Sareepita tin̄ki kin bí Siidon̄ tin̄kinee baba cee ní u n̄n tú-u.

²⁷Unimb̄oti b̄onaatiliu Eeliisee yuntiñuee, binyan̄gbantiibi mun tikpil n̄n tí bí Israyeel tin̄kin, ama bi-kansikin báà ubò kaa n̄n ká dicaandi, asee Naaman Usiirijja baba.”

²⁸Niinee ní bin kòkò n̄n bí kukpafidiin ki gbīl̄ an b̄otee f̄òò an̄uu,

²⁹ní ki yíkì ki cúú Yeesu ki dáal̄ ki nyántì kitiñ kpaanceetiñu, ní ki cáá-u ki nín jóm̄ dijool̄ din pu bi-diiñji n̄n tókóee yilpu, kí bàà téé-u kí t̄ón̄ taapu.

³⁰Ama ní u dī bi-kansikin ki búntì.

³¹Yeesu cūti Kapeenaayum, Gaaliilee tin̄kpaan̄ki kiban, ní ñwiññun̄fikaa dalee, u kó kukpafidiin ki bīl̄ dākà binib Unimb̄oti b̄oti.

³²U-dàkatamee n̄n n̄á binib bitii, kun puee mp̄on̄ n̄n bí u-b̄oti tin u dākèe ni.

³³Kijapaai kiba n̄n bí kukpafidiyee ni, arasinii kā u-pu, ní ki téen̄ yii:

³⁴“Yeesu Naasaareeti ȳou, a nyàab̄-ti n̄i tilati ní? A dóm̄in̄ kí kúntí-ti níiin? M nyí un a sée, a sá circirdaan un Unimb̄oti túnnée ní!”

³⁵Ní Yeesu kp̄ati arasiniyee pu yii: “Á ñm̄il̄ niin kí nyā unin̄ja nee ni!” Ní arasiniyee fiin̄ unin̄jee ki lúkú kitiñ binib nimiin, ní ki nyán̄, kaa n̄á-u tiba.

³⁶Ní báà ñma b̄akatì sèeee, ní ki b̄alf̄i t̄ob̄ yii: “Batii nȳɔɔbundi ní u nín sòon̄ ní ñi cáá mp̄on̄ ki j̄i arasiniibi nan dee?”

³⁷Ní Yeesu b̄oti gb̄iti Kapeenaayum tin̄gbammu kòkò.

³⁸Yeesu nyán̄ kukpafidiinee, ní ki búntì Siim̄on̄ dumpu. Siim̄on̄ nimpuu na n̄n b̄un̄ ki d̄ò u-wunti píll̄ kp̄an̄kpam, an páb̄-u, ní bi m̄eē Yeesu n̄ cáan̄-u.

³⁹Ní Yeesu s̄uti ki píll̄-u ní ki kp̄ati mman̄fanyim pu, dicilpu niin ní u p̄ók̄i ki yíkì ki n̄á-bi tijin.

⁴⁰Kujoou, ñwiin̄ jéetèe, bin bin cáá bibunliibee cáan̄-bi Yeesu cee, báà ñma n̄i u-weeñju u-weeñju, ní u cáá u-ñalii ki p̄aantí bi-kòkò pu ní bi p̄ók̄i.

⁴¹Arasiniibi n̄n nyēēbinib tikpil pu ní ki fátí ibiil yii: “A sá Unimbōti Jipōon!” Ama ní Yeesu kpātī bi-pu, kaa pūh̄-bi kinyokō bí sòon̄, kun puee bi n̄n nyí yii ùn̄ dī sá Kriisitoo.

⁴²Yeesu péé ntaafaabōmbōmin ki nyán̄ kitiṅin ki búntí ṅkpaanceeti, laakin binib kpée. Ní kunipaa u bī nyàab̄-u. Bi ká-uee, ní ki bàà là ú gbíntí bi-cee kí taa ti cù laaaba.

⁴³Ní u bí-bi yii “An máan̄ m̄ cù kí sòon̄ tibōmōntiil tin sá Unimbōti beel bōtee ntimu mun kínee poon: kun pu Unimbōti túnní-mee dee.”

⁴⁴Ní u n̄n yìh̄ ki sòon̄ Unimbōti bōti Juudee kpafidiṅṅin.

Luuki 5

¹Ḑwiin ṅubōee, Yeesu cūti ki yú Geeneesareeti mōogbandi, ní binib dómín̄ ki múkuñ̄ u-pu kí p̄lfi Unimbōti bōti.

²Ní u ká ṅaliṅfi ili yú dimōogbandi, bilaantōliibi kpákati ki bī f̄ntí bi-laanti.

³ṅaliṅfee kansikinee, Siimōn̄ yì bubō, ní Yeesu cūti kó bu-ni ní ki mēē-u yii, ú s̄tí buṅalimbu kí wātī digbandi kí kón̄ dimōolin̄ f̄ii ú sòon̄ binib ṅ ṅmā kí gbīl̄. Ní Yeesu kāl̄ buṅalimbun, ki bī dākà kunipaauee Unimbōti bōti.

⁴U sòon̄ ki dōyee, ní ki bí Siimōn̄ yii: “S̄tí buṅalimbu kí cunn̄i laakin nnyim nyōyee, sii n̄ a-bōobi ṅ tō ni-laanti kí cúú ijōm.”

⁵Ní Siimōn̄ bí yii: “Ukpil, ti dū kunyamōṅu ní ki tó tilaandi, kaa cúú báà tiba, ama, a-nyōobundi puee, m̄ dàá tō kulaaṅṅu.”

⁶Ní bi dūu tó, ní ki cúú ijōm tikpil, ali bi-laanti bī tifi.

⁷Ní bi kábiti bi-bōobi bin bí buṅalimbu bun béeyee nee, yii bí dāan̄ kí tūtuñ̄-bi bí dáal̄ ijōm kí nyāntí. Ní bi dómín̄ ki dáal̄ ki nyāntín̄ ijōm ki gbéen̄ ṅaliṅfi liitil, ní ṅaliṅfee bī m̄l̄ nnyimin.

⁸Siimōn̄ Piyeer n̄n ká mimmee, ní u dómín̄ ki gbāan̄ Yeesu nimiin̄ ní ki bí-u yii: “M-Dindaan, s̄tí kí wātī-mi, kun puee man sá unikpiti ní.”

⁹Di sá yii ijōm in bi n̄n cúúyee wíṅṅu yānti tifaandi n̄n kó Siimōn̄ n̄ u-bōobi,

¹⁰ní ki kó Seebeedee jipōmbi Jaaki n̄n Jaan, bin sá u-jōncuujutiibee mun. Ama ní Yeesu bí Siimōn̄ yii: “Taa f̄ṅkì! Di sá, kí yòon̄ d̄n̄ kí n̄n̄ cée, a dàá n̄n̄ k̄n̄ ki sá un cāab̄in̄ binib m-ceedee ní.”

¹¹Niinee ní bi cāan̄ bi-ṅaliṅfii ki yōon̄ dimōogbandi, ní ki yānti tikokō ní ki k̄n̄ ki n̄ó Yeesu.

¹²Yeesu n̄n bí kitiṅ kiban, ní uninja ubō dómín̄ d̄nyangbandi p̄in̄ u-pu. U ká Yeesuee ní ki lít̄i dicincibil ki gbāan̄-u yii: “Ukpil, cāan̄-mi kun puee m̄ nyí yii a yaa là, a ṅūn̄ kí cāan̄-mi m-wunti ṅ ṅāṅkì.”

- 13Ní Yeesu tāntì u-ŋal ki gbēē-u, ní ki bí-u yii: “M là, Pṑkì̀m!” Niin niin ní dinyanḡbandi kpááa wánḡki uninjee pu.
- 14Ní Yeesu kpáafi-u yii ú taa péētùkù báa ubo, ní ki bí-u yii: “M nín cáañ-si puee, cáá a-ba kí dákà usaraanḡkpil ú bée yii a-wunti ḡanḡki ní kí cùú ḡá saraa kii Mooisi nín yóòn mara unyee ní usaraanḡalee n̄ tükù báà ḡma yii a pó̀kì̀.”
- 15Niinee, Yeesu yindi mòtìi gbìtì ki cá, ní kunipaau dòon ki pílfì u-boti kí kpááa ká biweeni cáantam.
- 16Ama Yeesu n̄n cá u-baba laakin binib kpée ki mée ḡwimmeem.
- 17Ḍwiin ḡuboe, Yeesu bí dákà binib Unimboti bōti, ní Fariisab n̄ bimarakaliibi n̄n k̄a niin, bi n̄n nyánni Gaaliilee n̄ Juudee n̄ Jeerusaleem timbilimmu k̄ok̄on ní. Ti-Dindaan p̄ḡḡu n̄n bí Yeesu pu ki yantì u cāantì bibunliibi.
- 18U bí sòonee, ní binib biba ḡúbiñ uninjafaliḡfaan ubo nlún pu, ki nyàab kí kón-u Yeesu cee kudiin.
- 19Nniw̄in puee, baa bée bi nín dàá ḡá pu kí bà Yeesuee, m̄n puee bi jóm̄ kudii yilpu ki c̄l̄, ní ki dū ufaliḡfaanee n̄ u-lúḡḡu ki dūu d̄n̄ dibundee ni ki kpákati-u ki bí Yeesu nimiin kunipaauuee kansikin.
- 20Yeesu n̄n ká binib gbanti f̄ō̄ ki k̄íi yii u ḡūn̄ kí cáañ ubunlee, ní u bí ufaliḡfaanee yii: “M-bōo, m̄ dū a-kpitii ki pú-si.”
- 21Niinee ní bimarakaliibi n̄ Fariisabee k̄n̄ ki bí dákaf̄i bi-p̄obilin̄in yii: “Uninja nee sá ḡma ní ki ḡèè̄n̄ n̄ Unimboti m̄n̄? Ḍma di ḡūn̄ kí dū ikpiti kí p̄ō? See Unimboti baba.”
- 22Yeesu bée bi nín bí dákaf̄i puee, ní ki bí-bi yii: “Ba pu ní ni bí dákaf̄i m̄n̄ ni-p̄obilin̄in?”
- 23Ba di kaa p̄ō̄ dilil ní: 'A ká a-kpitii p̄ōtam' di kaa p̄ō̄ dilil naaan? 'Ȳk̄i kí yū́l̄ kí n̄n c̄ōm̄' di kaa p̄ō̄ ní?
- 24Ama ní bée yii man Kinibiki cáá m̄p̄on̄ kitin̄ pu kí dū unil̄ kpitii kí p̄ō. Niinee ní u bí ufaliḡfaanee yii: 'Sii ȳk̄im̄ kí yòon̄ a-lúḡḡu kí n̄n̄ kùn̄ a-dumpu.' “
- 25Kpalaayee ní u nȳi ki ȳk̄i samaa nimiin, ki ȳōon̄ u-lúḡḡu ḡun pu u bàà d̄ee, ki p̄akà Unimboti ki kùn̄ u-dumpu.
- 26An yānti báa ḡma f̄anḡki ki b̄akat̄i seeee ki p̄akà Unimboti, ki li yii: “Ti ká tibocan d̄n̄!”
- 27M̄n̄ boonee, Yeesu nyán̄ ki búntèe, ní ki ká uf̄otil̄ ubo, bi ȳi-u Leefii u k̄a f̄otiku diikun. Ní Yeesu bí-u yii: “Dāañ̄ kí n̄n̄ n̄ó-mi!”
- 28Ní u ȳk̄i ki yānti u-wanti k̄ok̄o, ní ki lafun t̄áá-u.
- 29Ní Leefii ḡá Yeesu tican u-dumpu, ní bif̄otiliibi n̄ binib biba mun tikpil d̄ómiñ ki k̄ut̄i bi-pu ki kpáf̄i ki bí j̄n̄ tijin.

³⁰Fariisab nì bimaradakaliibi nín ká mimmee, an kaa móòkiñ-bi, ní bi bālfī Yeesu boonnooliibi yii: “Ba pu ní ni nì bifətīliibi nì binikpitib nee kpáfi ki k̄a ki j̄n̄ ki nyù mín?”

³¹Ní Yeesu kíí-bi yii: “Bin p̄ōyee kaa nyàab unyɔɔdaan, bin b̄ñee di nyàab unyɔɔdaan.

³²Maa dómiñ kí yíín deedeedambi, m dómiñ kí yíín binikpitib bí kpántí bi-bimbim ní.”

³³Ní bi lī Yeesu yii: “Jaan boonnooliibi b̄ōb̄ kinyɔkɔ múmul ki m̄é ɣwimmeem, ní Fariisab boonnooliibi mun ɣáań mín, ama ní sii boonnooliibi j̄n̄ ki nyù.”

³⁴Ní Yeesu bí-bi yii: “Ni ɣūn̄ kí yàntī unimpucan cal b̄ōbi ń b̄ób̄ kinyɔkɔ ɣyunti ɣun u dáá bí bi-ceeyeee?

³⁵Ama ɣwiin ɣubɔ bí ki d̄oń, bi dàá d̄á yòñ unimpucan cal bi-kansikin, an yuntiɣu ní bi d̄a b̄ōb̄ nnyomu.”

³⁶Ní Yeesu gítī ḡā-bi dilan̄kpandi yii: “Baa gífī dibɔkutip̄ondi ɣaakatil kí d̄ū līb̄ dikpikil. Bi yaa ɣá mimmee bi gíí ki b̄iíl dibɔkutip̄ondee fam dee, ní dijandi din bi gííyee kaa làá ɣm̄a kí līb̄ kí k̄al̄ dikpikil pu.

³⁷Baa tí dù ndap̄om kí f̄uún̄ tilɔkpikilin. Bi yaa ɣá mimmee, see tilɔtee ń p̄ō ní ndaam ń kp̄atíí fá, ní tilɔti ń b̄iíl.

³⁸Bi dù ndap̄om ní kí s̄itī tilɔp̄on ni.

³⁹Bi yaa nyūñ ndakpikim ɣmanijmee, ní bi lì yii ndakpikim di ɣāñ, baa ti là ndap̄om.”

Luuki 6

¹Dwiɣɣɣfikaa ɣubɔ dalee, Yeesu nì u-boonnooliibi j̄tī blee kpaɣɣin, ní u-boonnooliibi b̄i gífī blee fini ki ɣm̄eēm̄ abil ki ɣm̄ò.

²Fariisab biba ká mimmee, ní ki bí-bi yii: “Ba pu ní ni ɣáań min kòóyee ɣwiɣɣɣfikaa dal?”

³Ní Yeesu kíí-bi yii: “Naa láá péēk̄aāñ ɣk̄um̄ nín n̄n̄ cúú ubɔti Dafidi nì u-naacimbi u ɣá pueeee?

⁴U n̄n̄ kó Kunimb̄otidiin ní usaraaɣakpil t̄i-bi kp̄onɔb bin bi n̄n̄ d̄ū ɣá Unimb̄oti saraayee, ní u n̄n̄ u-naacimbi ɣm̄ó, ama ti-marau poonee, b̄aà ubɔ kaa máań kí ɣm̄ó an kp̄onɔb gbanti, see bisaraaɣaliibi baba di ɣm̄ò-bi.”

⁵Ní Yeesu gítī bí-bi yii: “Man Kinibiki di sá ɣwiɣɣɣfikaadaan.”

⁶Dwiɣɣɣfikaa ɣubɔ mun dalee, Yeesu f̄atī tí c̄utī kukpafidiin, ní ki b̄iíl d̄àkà binib Unimb̄oti b̄oti, ní kijapaai kiba n̄n̄ bí niin, u-ɣaɣgiil f̄áká.

⁷Bimaradakaliibi nì Fariisab n̄n̄ bí ki c̄ɔɣkí Yeesu kí kp̄èè yii u dàá cáań ubɔ ɣwiɣɣɣfikaa dalaaa waa làá cáań, kun puee bi n̄n̄ b̄iíl nyàab̄ nnaakpal kí d̄ū ɣá-u tib̄oti.

- ⁸Ama Yeesu nyí bi-landokoi, ní ki bí uṅṅfakafuee yii: “Yíkì kí sīl binib kansikin,” ní uṅṅfakafuee yáatìi yúl bi-kansikin.
- ⁹Ní Yeesu bí-bi yii: “M balfi-ni yii: ti-marau lī yii ba ní? yii, tí ḡá tiṅan ḡwiṅḡṅfikaa dalaaa tikpiti ní? Tí fī unilaaa tí kpò-u ní?”
- ¹⁰Ní u fātii kpēebi-kòkò ki māntì, ní ki bí uṅṅfakafuee yii: “Tàntì a-ḡal!” ní u tāntì-ḡu, ní u-ḡal fātii ḡitìn ḡu-laṅki.
- ¹¹Ní bi fōō mbum, ní ki bī sòòḡ ki bóntí bi-kansikin kí béé bi nín dàá ḡá Yeesu puee.
- ¹²Dyuntèe ní Yeesu jóm dijool diba pu kí mèè Unimbòti, ní ki dū kunyamḡḡu ki mèè.
- ¹³Kutaa wúntèe ní u yíín u-boonnooliibi, ní ki lēebi-kansikin saalaa nì bili bìn n̄ n̄n sá u-kpambaliḡ.
- ¹⁴Akpambalee yiṅḡi sèé: Siimḡn un u n̄n páan diyindi yii Piyeeree (an taapu di sá yii Ditaṅkpal), n̄ Siimḡn naal Andree, n̄ Jaaki n̄ Jaan n̄ Fiiliipi n̄ Bateeleemii
- ¹⁵n̄ Maatiu n̄ Toomasi n̄ Jaaki un sá Alfee jipḡḡnee, n̄ Siimḡn un n̄n là kí ján Room yabee,
- ¹⁶n̄ Juuda Jaaki jipḡḡn, n̄ Juudasi Iskaariyḡti un dāa dū Yeesu ki nyáfin̄ u-nannanliibee.
- ¹⁷Ní bi n̄ Yeesu kpákatiḡn ki bāan̄ ki yúl ditantakalin, laakin u-boonnooliibi kupaa u n̄ binifantatiibi tikpil mun n̄n yúee. Binib ḡbantee, biba n̄n nyánní Juudee timmu kòkòḡ, ní biba nyánní Jeerusalem tiṅkin, ní biba mun nyánní Tiir n̄ Siidḡn, n̄timu mun bí dimḡḡl caḡṅnee.
- ¹⁸Binibee n̄n dómiḡn kí p̄lfi Yeesu n̄n sòòḡ Unimbòti bḡti pueeyaaa ki là ú cáan̄-bi mun. Ní bin pu arasiniibi n̄n kēe ká dicaandi.
- ¹⁹Báa ḡma n̄n péenyàab kí ḡbēēYeesu ní, kun puee mpḡn ḡubḡ n̄n nyēēn̄ u-ni ki cāantí bi-kòkò.
- ²⁰Ní Yeesu kpēēu-boonnooliibi ní ki bí yii: “Án n̄n mōḡn nimbi binandambi kun puee ni sá Unimbòti beelin yab.
- ²¹“Án n̄n mōḡn nimbi bin ḡkum cáá kḡḡkḡnneeyee, kun puee ni dàá dāá jī kí díkí. “Án n̄n mōḡn nimbi bin bī sūn̄ kḡḡkḡnneeyee, kun puee ni dàá dāá lā.
- ²²“Án n̄n mōḡn nimbi bin bi ná, ki jì, ki s̄í, ki bííl ni-yiṅḡi man Kinibiki puee.
- ²³Yaadalee ní n̄n fāal̄ ki nyákantī án n̄n mōḡn-ni, kun puee ni-paatii wīkí yilpu. M̄n̄ mbaantiim ní bi-naanjab mun n̄n sāan̄ Unimbòti bḡnaatiliibi.
- ²⁴“Ama nimbi bigaajab, mbusu dō ki cí-ni, kun puee nimbi jín̄ ni-mḡḡḡu doo.
- ²⁵“Nimbi bin bí digbil poon kḡḡkḡnneeyee, mbusu dō ki cí-ni, kun puee ḡkum dàá dāá cúú-ni. “Nimbi bin bí tilaal poon kḡḡkḡnneeyee, mbusu dō ki cí-ni, kun puee ni dàá dāá kó kunimbaaun kí s̄.

- 26“Nimbi bin ní duulnya yab pàkà yii ni sá bimontiibee, mbusu dō ki cí-ni, kun puee mín ní bi-naanjab nìn pàkà bin nìn móntí yii bi sá Unimbōti bōnaatiliibee.”
- 27“ Ama m tūkù nimbi bin pílfiñ-mi nee yii, ní nīn néerímaan ni-nannanliibi kí nīn ḡáammaan bin ná-nee tiḡan.
- 28Bin bin tòó-ni mbusuee, mèèmaan Unimbōti ḡ ḡá-bi tiḡan, kí mèè kí tīi bin sàantí-nee.
- 29Ubo yaa fáá a-taḡkpanjil diba ntampee, á fātī din kíñee kí tīi-u ú fáá. Ubo yaa yōon a-kpalibuee, á yàntī ú yōon a-bōkutiwaaki mun.
- 30Ubo yaa mēē-si tiba, tīi udaan. Ubo yaa yōon a-wanti, á taa bàlfi-u.
- 31Ni nín là bí ḡá min kí tīi-nee, ḡámaan mín kí tīi ni-jutiibi.
- 32“Ni yaa nééñ bin nééñ-nee ḡmaniḡmee, ba paatii ní ni ḡítī kā ki cí boon? Bin kaa nyí Unimbōtee mun péē nééñ bin nééñ-bee ní.
- 33Ní ni yaa tí ḡáañ tiḡan ki tìi bin ḡáañ ni mun tiḡanee babee, ba paatii ní ni ḡítī kā ki cí boon? Bin kaa nyí Unimbōtee mun péēḡáañ tiḡan ki tìi bin ḡáañ-bi tiḡanee ní.
- 34Ni yaa tí pìntí bin ni nyí yii bi dàá téèñ-nee ḡmaniḡmee, ba paatii ní ni ḡítī kā ki cí boon? Bin kaa nyí Unimbōtee mun péēpìntí bi-jutiibi bin kaa nyí Unimbōtee ní ki nyí yii bi dàá fātí téèñ-bi bi-nimiḡmiiku deede.
- 35Min máañ ní ḡée di sá ní nīn néerímaan bin ná-nee, kí nīn ḡáañ-bi tiḡan, kí nīn pìntímaan kí taa nīn dàkafī yii bi dàá téèñ-ni. Mín ní ni dāa fōol tipaakpaandi ní ki dāa sá Unimbōti un bí yilpuee biyaamu, kun puee ùn ḡáañ tiḡan ki tìi bin kaa nyí tiḡanee nì bin sá binikpitibee.
- 36Ní nīn cáá tiniti tikpil kii ni-Baa nín cáá tiniti tikpil puee.”
- 37“Taa nīn sōon a-juti bōti, ní Unimbōti mun ḡ taa láā sōon a mun yati. Taa kpò a-juti bōti, ní Unimbōti mun ḡ taa kpò a-yati. Dū a-juti yìntitam kí pō-u, ní Unimbōti ḡ dū a mun yìntitam kí pō-si.
- 38Tīi a-juti, ní Unimbōti ḡ dāá tīi-si mun. Bi dàá dāá ḡmàntī ní kí cìḡkì kí tēefi, ní án gbí púmmm, ní bí dūú sītī a-lookun. A nín ḡmānti pu ki tīi a-jutee, mín ní Unimbōti dàá dāá ḡmàntī kí tīi si mun.”
- 39Ní Yeesu ḡítī dū tibōti nee ki ḡmānti yii: “Ujōfu ḡūñ kí dàti u-jōfujutaaa? Biliitil kaa líti mboonaaan?”
- 40Utumbifil kaa bí ki jítiñ u-kpiliu, ama, u yaa bífi tiḡanee, u dāa kpánti kii u-kpiliuee ní.
- 41“Ba pu ní a wāl kimōmbiki kin kā a-nabiki nimilinee ní kaa wāl didōjal din kā sii nimilinee?”
- 42Àá mana ní sii un kaa wāl didōjal din kā a-nimilinee ḡūñ kí lì a-nabiki yii: 'M-nabiki, yàntī m lēē-si kimōmbiki a-nimilin!' Mpoonnyoondaan, lēē didōjal din kā sii a-

ba nimilinee kí wàatī, kí nín wāl mm̄ntiimin kí lēēkim̄mbiki kin kā a-nabiki nimilinee.”

⁴³“Busum̄ntiibu kaa lòon̄ asubikpiti, m̄n̄ ní busukpitibu mun kaa lòon̄ asubim̄nti.

⁴⁴Busubu kamaa bil pu ní bi béetí-bu. Baa kitī k̄ŋkib ab̄janaakun pu, kaa tí tòó atuun kikuŋkumb̄ŋ pu.

⁴⁵Unim̄nti ḡaañ atumm̄nti ní, kun puee u-p̄obil poon ḡāñ, ní unikpiti ḡaañ atuŋkpiti, kun puee u-p̄obil poon kaa ḡāñ. Di sá yii tin ḡbí unil p̄obilinee, tíñ ní u-nȳk̄k̄ò s̄on̄.”

⁴⁶“Ba pu ní ni yīi-mi 'Ukpil, ukpil' ní kaa ḡaañ min m̄ bí yii ní ḡée ní?

⁴⁷M dàá dākà-ni bin d̄on̄ m-cee ki p̄l̄f̄i m-b̄oti ki kp̄áf̄i-tee nín náań n̄i kuŋyee.

⁴⁸Bi náań n̄i unil un di dàá mā kudii, ki ḡb̄iñ kitiŋ an nȳoñ, ki b̄ań ataŋkpee, ki dū kudii ki m̄ań ataŋkpeeyee puee ní. Utaakpaan d̄omiń ki n̄iñ, ní mbun ḡbí ki d̄omiń ki léen̄ kudiiyee pu, ama kuaa c̄ŋki, kun puee ku tókó ataŋkpee pu.

⁴⁹Ama bin di p̄l̄f̄i m-b̄oti nee, kaa kp̄áf̄i-tee, náań n̄i unil un dàá mā kudii, kaa ḡb̄iñ kitiŋ ní ki dū kudiiyee ki m̄ań ki tók̄on̄ kitiŋ pu famee. Utaa n̄iñ ní nnȳŋbeen̄ d̄omiń ki léen̄ kudiiyee pu: kp̄alaayee, ku líti ní ki n̄ań d̄úsídusi.”

Luuki 7

¹Yeesu nín s̄on̄ n̄i samaa m̄n̄ ki d̄òyee, ní u búnti Kapeenaayum.

²Room soojakpiliu ub̄o n̄iñ bí niin ki cáá ut̄ont̄onli un u néen̄ tikpilee, u b̄ūn̄ ki dàá kp̄ú.

³Usoojakpilee nín ḡb̄iñ bi s̄on̄ Yeesu puee, ní u tú Juuda yab kp̄ilib biba bí c̄úú m̄èè Yeesu ḡ d̄āá cáań u-t̄ont̄onliu.

⁴Ní bi b̄ań ki ká Yeesu, ní ki ḡb̄aam̄-u mm̄ntiimin, yii: “Usoojakpil ḡbanti péēm̄ań á t̄utuñ-u ní,

⁵kun puee u néen̄ timbi Juuda yab. Ún̄ di m̄ań ti-kp̄afidiiku.”

⁶Bi l̄i mimmee, ní Yeesu n̄óó-bi ki búnti. Bi t̄óób̄ mm̄ŋkee, ní usoojakpilee túnni u-b̄oobi bí t̄uk̄u Yeesu yii: “Ukpil, taa s̄ań a-ba, maa máań á k̄oń m-dumpu.

⁷An pu ní m̄ d̄akafi yii man kaa kp̄ánti kí d̄āań a-cee. Á péeli dinȳoobumbaantiil, m-t̄ont̄onliu dàá p̄ōk̄i.

⁸Kun pu m̄ nyí yii a ḡūn̄ kí ḡa mimmee di sá, man cáá bikpilib bin taapu m̄ b̄ée, ní ki mun cáá soojab bin mun bí man taapuee. M̄ ḡūn̄ kí t̄uk̄u ub̄o yii: 'C̄ú doo,' ní ú c̄ú; ki ḡūn̄ kí t̄uk̄u ub̄o mun yii: 'D̄āań doo,' ní ú d̄āań; ní kí bí m-t̄ont̄onliu una yii: 'D̄á yéè,' ní ú ḡa.”

⁹Yeesu nín ḡb̄iñ mimmee, an ḡa-u bitii ní ki m̄óokiñ-u, ní u f̄ati ki bí kunipaau kun n̄óó-uee yii: “Ibaam̄on̄ ní m̄ s̄on̄, maa láá péeká ub̄o f̄ōō-mi ki kí yéè Israyeel yab kansikin ḡba.”

- ¹⁰Ní bin usoojakpilee túnnée fātii nín gítí ki bàñ mmɔŋki, ki ká utɔntɔnlee pɔ̀kì.
- ¹¹Boonee ní Yeesu búntì Naayin tiŋkin, ní u-boonnooliibi nì kunipaau mun nɔ́-u ki cūti.
- ¹²Bi tóob kí bà kitiŋ gbanti gundi punyɔ̀kɔ̀kee, kpalaayee binib biba càn utaŋkpiil ubo kuceeun kí síb. An nìn sá ukpiipu ubo jipɔ̀mbaabil ní, ní kitiŋee nib kupaau nìn cēentí ukpiipu gbanti.
- ¹³Ti-Dindaan nín ká-uee, ní u-bɔ̀ti cúú-u falaa, ní u bí-u yii: “Taa ti sɔ̀!”
- ¹⁴ní ki sùtiŋ ki dāati u-ŋal ki gbēēnlún dɔ̀ŋu, ní bin tú utaŋkpiilee síl. Ní Yeesu bí yii: “Unaacimpɔ̀ɔ̀n, m pú-si kinyɔ̀kɔ̀ yii á yìkì!”
- ¹⁵Ní utaŋkpiilee fikiti ní ki yáati kāl ní ki bí sòò. Ní Yeesu dū-u ki tī u-na.
- ¹⁶Niinee, tifaandi kó báà ŋma, ní bi bí pàkà Unimbɔ̀ti ki lì yii: “Unimbɔ̀ti bɔ̀naatikpaanu ubo nyán kitiŋ pu, Unimbɔ̀ti dómiŋ kí jòò u-samaau dee.”
- ¹⁷Ní Yeesu bɔ̀ti gbanti gbìti Juudee timmu kɔ̀kɔ̀n, ki kpáaŋ ikpaanceeti mun.
- ¹⁸Jaan boonnooliibi cūti ki máafi-u Yeesu nín ŋaàŋ tiŋyee kɔ̀kɔ̀, ní Jaan yíiŋ bi-kansikin bili
- ¹⁹ní ki dū-bi ki tú ti-Dindaan Yeesu cee, bí bàlfi-u yii: “Sii di sá un ti nyí yii u dòòŋeyaaa tí nīn ká ki cí ubo ní?”
- ²⁰Bi bāaŋ Yeesu ceeyee, ní ki bí-u yii: “Jaan un fùul binib Unimbɔ̀ti nyimee di túnní-ti tí bàlfi-si yii sii di sá un ti nyí yii u dòòŋeyaaa tí nīn ká ki cí ubo ní?”
- ²¹Dyunti ŋun bi bāaŋ Yeesu ceeyee, u bí cāantí bibunliibi tikpil iween kupaau, ki jì arasiniibi binib pu, ki ŋúbití bijɔ̀fub nimiliŋ.
- ²²Ní u fātii kíi bin Jaan túnnée yii: “Níŋ cámaan kí tükù Jaan tin ni kée nì tin ni gbìlee: bijɔ̀fub nimiliŋ ŋúbití, bideembi còom, binyaŋgbantiibi pɔ̀kí, bitafakpaafub kín ki gbìl, bitaŋkpiibi fikiti, ní biwɔ̀fib gbìl tibɔ̀mɔ̀ntiil.
- ²³Án nīn mɔ̀n un fɔ̀ɔ̀-mi ki kíi kaa gùgufēe.”
- ²⁴Jaan boonnooliibee nín gítée, ní Yeesu bí sòò nì kunipaau Jaan pu yii: “Ni cūti kupɔ̀un kí kpèè Jaanyee dinicil dilar ní u sá ní? U-bɔ̀ti kpántí kii kubuŋu nín fiintí dikaliŋbaandi pueeee? Aayee.
- ²⁵Kin ba ní ni cūtií kpèè ní? Uniŋja ubo un pēēabɔ̀kutimɔ̀nteeeee? Aayee. Bin pēēagaajabɔ̀kuti ki bí mmɔ̀ntiiminee bí bibɔ̀tiibi dumpui ní.
- ²⁶Kin ba pu ní ni baasii cūti ki kpēēJaan ní? Ni cūtií kpèè-u yii u nín sá Unimbɔ̀ti bɔ̀naatiliuee níiŋ? Iiŋ! Tiŋman ní m sòò nì ni, un ni ká niinee jítiŋ Unimbɔ̀ti bɔ̀naatiliu.
- ²⁷Kun puee Jaan pu ní Unimbɔ̀ti takaldau poon sòòŋ yii: Unimbɔ̀ti bí yii: 'M dàá tōn m-tūuŋu ŋú lītīn a-nyɔ̀kɔ̀pu kí ŋānkì-si nsan.' “

- ²⁸Ní Yeesu gítí bí yii: “Ibaamɔn ní m sòòh, bin binib màl̄ee kansikin, ubo kaa bí ki sá ukpaan ki jítiñ Jaan. Ama un sá kiwaai Unimbɔti beelinee jítiñ Jaan.”
- ²⁹Dinikitil kòkò, ki kpáañ bifotiliibi gba, pílfíñ Jaan ní ki bée yii Unimbɔti sá deedeedaan ní ki yāntì Jaan fùl-bi Unimbɔti nyim.
- ³⁰Ama ní Fariisab nì bimaradakaliibi yî min Unimbɔti bàà là bí ñée, kaa cāntì Jaan fùl-bi Unimbɔti nyim.
- ³¹Ní Yeesu gítí bí yii: “Ba ní m dàá dū kí ñmàntìh nimbì waanee nib dee? Ni náañ nì ba deeyaaa?”
- ³²Ni náañ nì mbiyaamu mun k̄a mmɔŋki ki tátí mu-jutiibi pu yii: ‘Ti búñ-ni awul, naa ñóh, ní ti gāa-ni ikpiisilan, naa sún.’
- ³³Di sá Jaan un fùul binib Unimbɔti nyimee dómiñ, kaa jīhnaan, kaa nyù ndaam, ní naa fṣṣ-u ní ki bí yii arasinii di bí u-pu.
- ³⁴Ní man Kinibiki dómiñ ki jīh ki nyù ní ni bí yii: ‘Kpèèmaan, uninja nee, ùh sá upoofu nì udanyol ní ki bóotí bifotiliibi nì binikpitib bin kòkò kíñee.’ “
- ³⁵Ama bin fṣṣ Unimbɔti ciini ki kíyee dàkà yii i sá deedee.
- ³⁶Dalbee ní Fariisa ubo yíiñ Yeesu yii ú dāañ u-dumpu bí jī, ní Yeesu cūti ní ki kāl bí-jī.
- ³⁷Kinimpulaakpaai kiba nìn bí kitiñ gbantin. U nín gbil̄ yii Yeesu bí Fariisee dumpu ki jíñee ní u yṣòhñi talaalu un k̄a ditanjpal kpalbaunee.
- ³⁸U bāañee ní ki yúl Yeesu boon u-taaji cee ní ki bí sūh ní nnyinnyim sītí Yeesu taaji pu, ní ki cáá u-yikpiti ki pítí nnyinnyim ki móotí Yeesu taaji ní ki dū talaaluae ki sītí ñi-pu.
- ³⁹Ufariisaja un nìn yíiñ Yeesu bí jēe nín ká mimmee ní u bí dākafī u-pòbilin yii: “Kijapaaí nee yaa bàà lafun sá Unimbɔti bōnaatiliu, u bàà béetí unimpu un gbèetī-u nee nín sá dinimpucil diñyee, kun puee u sá kilaakpaai ní.”
- ⁴⁰Ní Yeesu bí-u yii: “Siimɔn, m cáá tiba ki dàá tükù-si.” Ní Siimɔn kí-u yii: “Ukpil, sòòh.”
- ⁴¹Ní Yeesu bí yii: “Kijapaaí kiba nìn pīnni binib bili animil. Ubo nìn cáá-u dipɔndi tili nì ñmoo, un kíñee ili nì saalaa.
- ⁴²Bi-liitilee kansikin, bàà ubo kaa ñūh kí pà-u, ní u dū dipɔndee ki pú bi-kòkò. Bi-kansikinee, ñma di dàá nīn nēēn un dū dipɔndi ki pú-bee tikpil?”
- ⁴³Ní Siimɔn bí yii: “M pākā yii un pɔndi wīkée di dàá nīn nēēn-u ki jítiñ un pɔndi kaa náañee.” Ní Yeesu bí-u yii: “A lī an kāl.”
- ⁴⁴Ní Yeesu fātì unimpuee watil ní ki bí Siimɔn yii: “Kee, a ká unimpu neeyaa? M nín kóón a-dumpuee aa pú-mi nnyim m fíntì m-taaji. Ama ùh dū u-nyinnyim ní ki sītí m-taaji pu ní ki dū u-yikpiti ki pítì-ñi.

⁴⁵M nín páànnée, aa lī-mi yii: 'Si nì nsan.' Ama, doooo m nín kónnée, unimpu nee péēbí ki móotí m-taanj ki dākà u nín néēn-mi puee.

⁴⁶Aa yāaṅ m-yil pu ṅkpam mun kpaṅkpan, ama ùṅ sītì m-taanj pu talaalu.

⁴⁷An pu ní m lī-si yii unimpu nee dākā dineendi tikpil m-pu kun puee m dū u-kpitii kupaau ki pú-u. Un kpitii di yaa bí fiii ní bi dūu pú-uee, ùṅ dākà dineendi fiii ní.”

⁴⁸Ní Yeesu bí unimpuee yii: “M dū a-kpitii ki pú-si.”

⁴⁹Bin bin nìn kpáfii kā ki jñee nìn bí dākafí bi-pòbiliṅin yii: “Uninja nee sá ba you ní ki tin pūn binib kpitii na?”

⁵⁰Ama ní Yeesu tūkū unimpuee yii: “A-fookiiu fī-si, nīn cá nì ṅgbansṅfī.”

Luuki 8

¹Boonee ní Yeesu nìn kíṅ ki yìṅ ntiṅkpaammun nì ntiṅwaammun ní ki sòṅ ki nàatí tibòmòntiil tin sá Unimbòti beel botee, ní u-boonnooliibi saalaa nì bilee táá-u.

²Ní binimpoobi biba bin pu u nìn jñ arasiniibee nì bin u nìn cáaṅ iweenee mun nìn nòó-u. Binimpoobee biba yìṅ sèé: Maarii un bi yí Magdalayee, un pu u nìn jñ arasiniiibi bilulee,

³nì Kusa un nìn kpèé ubòti Eeroodi gaajatee nimpuu Jaanni, nì Susana, nì binimpoobi tikpil bin nìn tì tin bi cááyee ki tútuṅ Yeesu nì u-boonnooliibee.

⁴Ntimu kamaa poon nib nìn dòṅ Yeesu cee, ní bi-kòkò dūu kpáfii ki ṅá dinikitikpaandi, ní Yeesu gāa-bi dilanṅkpandee nee yii:

⁵“Uninja ubò di nyáṅ kí yāaṅ u-wamboolii u-kpaabun. U yāaṅee, abil aba líti nsan pu ní binib tàṅ tàṅ ní inoon dāa dūu jín.

⁶Aba mun líti kuteeu pu ki nyáṅ ní ki pūtì kpāā kūn, kun puee kitiṅ kaa sòm.

⁷Ní aba mun líti ikuṅkumin, ní an nì ikuṅkum nyáṅ dicilpu, ní ikuṅkumee wíṅ ki múkuṅ ní ṅaa ṅúṅ ki lòṅ.

⁸Ama ní abil aba, líti laakin kitiṅ ṅānee, ní ki nyáṅ ki wíṅ ki cáá apoo, ki lòṅ, ní ṅfīn kamaa lòṅ dilaataal.” Ní Yeesu kútì ki lī yii: “Sii un yaa cáá ditafal kí gbìlee n gbìl.”

⁹Ní Yeesu boonnooliibi bālfī-u yii: “Dilanṅkpandee taapu dākà yii ba?”

¹⁰Ní u kíí-bi yii: “Unimbòti yāntì nimbi bée u-beel bòti tin bí dibalinee taapu, ama bin kíṅee, an dāá nīn sá bíṅ alanṅkpan ní, an nín dāá ṅá pu bi-nimiliṅ n nīn kpítì bí taa nīn wālee, ní bí nīn pílfi kí taa nīn gbìlee.”

¹¹“M-lanṅkpandee taapu sèé: ṅwamboolee di sá Unimbòti nyòṅbundi.

¹²Binib biba náaṅ nì iwambool in líti disanṅkpaṅkpilee ní. Binibee gbìl Unimbòti bòti ní Sitaan n dāá cúú lēēbi-pòbiliṅin bí taa fṅṅ kí kí kí ká difiil.

- 13**Ní biba mun náán nì in líti kuteeu puee. Bìn gbìl Unimbòti bòti ní ki fòol̄ ki kííkí nì dipòòpindi, ama ní kaa cáá inyaan kí báán kí sīl̄, nyunti fiii ní bi dù bi-mákal kí ña Unimbòti pu. Diniminaamandi yaa bāán-bee, ní bí lítí.
- 14**Iwambool in líti ikun̄kuminee náán nì bin gbìl Unimbòti bòti ama ní ki yàntí ilandòkò nì tigaajati nì duulnya m̄nḡu j̄n̄ mpaan bi-ni, ní baa ti ñūn̄ kí lòon̄ abil án bēe.
- 15**Iwambool in líti kitimm̄ontiiinee náán nì bin gbìl Unimbòti bòti nì dipòòm̄ntiil ki fòol̄-tì ki kííkí ki kpáafí-tì bi-p̄bilih̄ poon tiñan, ki p̄òntí mm̄ontiiimin kí lòon̄ abilee.”
- 16**Ní Yeesu gítí bí-bi yii: “Baa t̄ut̄i fitila kí dū dibool kí cíkiín u-pu, kaa tí dù-u kí síiín kilambañ taapu, ama bi dù fitila kí tókòñ kifañk̄olii pu ní, ní án n̄n̄ wāl̄ bin kòkò kòònee.
- 17**Tin kòkò bí dibalin binib kaa wālee dàá dāá biit̄i, ní tin kòkò bí dibalin binib kaa nyée dàá dāá nyā mpaampiin pu bí bée.
- 18**“Ní kpèè tiñan min ní ni pílf̄i tibòtee. Di sá un yaa cáá tibee dāa fòol̄ kí k̄ut̄i, ní un yaa kaa cááyee, Unimbòti dāa fòol̄ fiii un u bàà nyí yii u yèe!”
- 19**Yeesu na nì u-naalib dómín kí ká-u, ama kunipaau puee baa ñún̄ ki bàñ u-cee.
- 20**Ní bi t̄ukū Yeesu yii: “A-na nì a-naalib yú mm̄oñki ki là kí ká-si.”
- 21**Ní Yeesu kíí-bi yii: “Bin pílf̄i Unimbòti bòti ki kpáafí-tèe di sá m-na nì m-naalib.”
- 22**Dwiin ñubòee, Yeesu nì u-boonnooliibi kó buñalimbun, ní u bí-bi yii: “Tí dùt̄iimaan lapu pu buñgbandi”, ní bi búnt̄i.
- 23**Bi bí ñaál̄ kí dùt̄ee, ní Yeesu gèēñ. Kpalaayee, kubuñkpaaññu kubò dómín ki bí j̄t̄i dim̄ool pu, ní nnyim bí gbèè buñalimbu. Niinee animil mánt̄i,
- 24**ní u-boonnooliibi s̄ut̄i ki p̄l̄-u ní ki f̄int̄i-u, ní ki bí-u yii: “Ukpil, ukpil, ti kp̄i ní!” Yeesu f̄int̄ee, ní ki kp̄ati kubuñu nì nnyim pu. Niinee ní kubuñu nì nnyim gbēēñ ki ñm̄l̄ f̄oñf̄oñ díkídiki
- 25**ní u bālf̄i u-boonnooliibi yii: “Ni-fookiiu bí la?” Tifaandi kó-bi, ní bi bākat̄i ki bālf̄i t̄ob̄ yii: “Kijapaai nee nín sá ñma ní ki sòon̄ nì kubuñu nì nnyim gbiliñ-u mín̄ nan dee?”
- 26**Ní bi dùt̄i dim̄ool ki bàñ Geeraseen tiñki lapu buñgbandi din túl̄ Gaaliileeyee.
- 27**Yeesu bí kpákat̄i buñalimbunee kpalaayee kitiñee waatiu ubò dómín ki túñkiñ-u. Arasiniibi biba di n̄n̄ k̄a u-pu, ní u còom̄ dicancangbeel kaa n̄n̄ gítí kòò mm̄oñki an yúnt̄i, see kuceeun.
- 28**U nín ká Yeesuee, ní u fáá mbiil ní ki líti u-taani taapu ki téeñ m̄p̄on̄ yii: “Yeesu Unimbòti un bí yilpuee Jip̄oon, a nyàab-mi nì tilati ní? M gbàam̄-si, taa sàañ-mi.”
- 29**Kun pu uwaatee n̄n̄ l̄i mimmee di sá Yeesu n̄n̄ kíí ki bí kp̄at̄i arasiniiyee pu yii: “Á nyā uninja nee ni!” Arasini gbantee n̄n̄ yíkí uninjee pu ní múl̄mul, ní báà bi yaa bàà

dū ikusaka ki bóob u-taan̄i n̄i u-ŋalii kí kàaŋ-u sooooyaaa ní ú tifi-i, ní arasiniyee n̄ cáá-u kí cunn̄i kupɔɔun.

³⁰Ní Yeesu bālf̄i-u yii: “Bi yì-si yii ba?” Ní u bí yii: “Bi yì-mi yii Kupaa-u.” Kun pu u l̄i mimmee di sá yii arasiniibee n̄n k̄a u-pu ki w̄ikí tikpil.

³¹Ní bi gbāam̄ Yeesu yii ú taa jà-bi kí kòn̄ ditafadaaldi laŋki.

³²Difakitil diba n̄n yú dijool pu niin ki j̄n̄, ní bi mēēYeesu n̄ p̄o-bi kinyɔkɔ bí cùú kó afabee ni, ní Yeesu p̄u-bi kinyɔkɔ.

³³Niinee arasiniibee nyán̄ uninjee ni ní ki cūti kó afabee ni, ní difakitilee sán̄ ki wúnti ki jéet̄i dimɔɔlin ki kp̄h̄.

³⁴Bifakpaaliibi n̄n ká mimmee, ní bi sán̄ ki cūti tükū kitiŋin n̄i ikaan kɔkɔ.

³⁵Ní binib nyán̄ni kí dāá kpèè tin di ŋée. Bi bāaŋ Yeesu ceeyee, ní ki ká uninja un pu u j̄n̄ arasiniibee p̄ók̄i ki k̄a u-cee ki pēētiwan ki yì u-nimiliŋ. Bi ká-uee, ní tifaandi kó-bi.

³⁶Bin ká tin jítèe b̄i máafi bin kínee an n̄n ŋá pu ní arasiniibi nyán̄ uninjeeni ní u p̄ók̄èe.

³⁷Niinee ní Geereseen tiŋkin yab kɔkɔ gbāam̄ Yeesu yii ú ȳk̄i bi-tiŋkin, kun puee bi fāŋk̄i tikpil. Yeesu kó buŋalimbun kí búntée,

³⁸n̄i uninja un pu u j̄n̄ arasiniibee mēē-u yii ú yànt̄i ú n̄n bí u-cee.

³⁹Ní Yeesu bí yii: “N̄in̄ kùn̄ a-dumpu kí tin māafi a-yab Unimb̄oti n̄n ŋá min kɔkɔ ki t̄i-see.” Ní kijapaayee lafun n̄n kùn̄, ki bān̄ ki máafi kitiŋ kɔkɔ dituŋkpaandi din Yeesu ŋá ki t̄i-uee.

⁴⁰Yeesu n̄n fāt̄i dūt̄i dimɔɔgbandee, dinikitikpaandi n̄n k̄a ki cí-u, kí f̄ɔ̄-u.

⁴¹Niinee ní uninja ubo dóm̄in̄ u-cee, bi ȳh̄-u yii Jayirusi, u sá kukpafidii kpeekpiliu. U dóm̄in̄ ki gbāam̄ Yeesu n̄iini ní ki mēē-u yii ú dāaŋ bí cù u-dumpu,

⁴²kun puee u-sap̄ombaabil b̄i kúù, u n̄n cáá abin saalaa n̄i ali nyɔkɔm. Ŋyunti ŋun Yeesu kíí n̄san ki cá ukpilee dumpuee, binib n̄n b̄i u-pu b̄om̄mm.

⁴³Unimpu ubo n̄n bí ki f̄uul̄ ŋkpin baabadal an kaa gún̄ ali abin saalaa n̄i ali. U n̄n b̄iil̄ u-nimiliŋ kɔkɔ binyɔɔdambi cee, báà ubo mun kaa ŋún̄ ki cáan̄-u.

⁴⁴Ní unimpuee d̄in̄ Yeesu boon p̄u ní ki gbēē u-bokutil kpaanceet̄i. Niin niin ní fatiku kp̄aā gún̄.

⁴⁵Ní Yeesu bālf̄i yii: “Ŋma di gbēē-mee?” Ní báà ŋma bí-u yii baa gbēē-u. Ní Piyeer l̄i yii: “Ukpil, binib di kaa m̄ant̄i ki tú-si ki téekí-si naaan?”

⁴⁶Ní Yeesu bí yii: “Ubo gbēē-mi, kun puee m gb̄il̄ mp̄on̄ ŋubo nyán̄ m-ni.”

⁴⁷Unimpuee ká yii Yeesu béè u-puee, ní u dómiń ki gbāan Yeesu nimiin, tiwun jiki kpàkpakpa, ki lĩ kunipaaun niin kun weeni u bũnee nì u nín gbēēYeesu min ní ki ká dicaandi dicilpu dicilpuee.

⁴⁸Niinee ní Yeesu bí-u yii: “M-bisal, a-fookiu di fī-si. Nín cá nì ηgbansɔŋfi.”

⁴⁹Yeesu kaa láá ηmíl ní unil nyánní kukpafidii kpiliuee dumpu, ní ki bí kukpafidii kpiliu yii: “A-bisal kp̄h, taa ti páb ukpil fam.”

⁵⁰Yeesu gb̄lee, ní ki bí Jayirusi yii: “Taa f̄ŋki, f̄ḥ kí kíí, u dàá ηmátí.”

⁵¹Bi búnti ki bàñ mm̄ŋkee, ún nì Piyeer nì Jaan nì Jaaki nì kibiki na nì ki-baa di kó, waa yānti bin kínee kó kudiin.

⁵²Binib nèn bí sūn ki yálin̄kí kibiki gbanti pu. Ní Yeesu bí-bi yii: “Taa ti sōmaan! Kàa kp̄i, kì gèèn ní.”

⁵³Niinee ní bi bí bèē Yeesu kun puee bíñ nèn nyí yii ki kp̄i.

⁵⁴Ní Yeesu cúú ki-ηal ní ki téen̄ yii: “Kibikee, ȳki.”

⁵⁵Niinee ní ki-fām f̄t̄i dómiń ki-ni, kì fikiti kpalaayee ní ki yáat̄i kāl. Ní Yeesu bí yii bí t̄i-kì t̄ijin kí j̄i.

⁵⁶An ηá kibikee baa nì ki-na bitii ní Yeesu kpáafi-bi yii, tin ηá nee, bí taa péēmāafi-t̄i báà ubo cee.

Luuki 9

¹Yeesu yíin u-kpambaliŋ saalaa nì alee ki kpáfi ki t̄i-bi ip̄on bí n̄n j̄i arasiniibi k̄ok̄o, kí n̄n cāantí bibunliibi,

²ní ki tú-bi bí n̄n s̄oñ Unimb̄oti beel b̄oti kí n̄n cāantí bibunliibi.

³Ní u bí-bi yii: “Ni yaa cée, ní taa yòon̄ báa t̄iba: ní taa ηúb ηkp̄ond̄o, kuloouaaa, tijinaaan, animilaaa, kí taa ηúb abokuti ali ali.

⁴Ni yaa kó kudicaŋu kun ni ní bi yaa f̄ḥ-nee, n̄n bímaan niin kí tin s̄ā daliŋkin ni dàá ȳkèe.

⁵Laan kamaa ní ni yaa bàñ ní baa f̄ḥ-nee, ní ȳki kit̄iŋ gbanti pu kí pítí ni-taŋi kp̄ŋkp̄om kí yāl bi-tiŋki gbanti pu, án n̄n sá-bi kudaŋŋu yii bi ȳnti.”

⁶U s̄oñ nì bi mín̄ ki dóoyee, ní bi búnti ki ȳiñ n̄timbilimu k̄ok̄on ki s̄oñ Unimb̄oti b̄oti, ki cāantí bibunliibi an k̄ok̄o.

⁷Ub̄oti Eeroodi n̄n n̄n gb̄l̄ tin k̄ok̄o bí j̄itée, u b̄akat̄i, kun puee biba n̄n bí yii: “Jaan di f̄t̄i fikiti.”

⁸Ní biba mun bí yii: “Unimb̄oti b̄onaatiliu Eelii di nyánní yilpu ki f̄t̄iñ.” Ní biba mun bí yii: “An sá Unimb̄oti b̄onaatiliibi dooooyee yab ubo di f̄t̄i fikiti.”

- ⁹Ama ní Eeroodi bí yii: “Man yāntì bi lēēJaan yil, kin ŋma di gítī sá kijapaai kin pu bi sòòñ mín nan dee?” Niinee ní u kíí ki nyàab kí ká Yeesu.
- ¹⁰Yeesu kpambaliŋ ŋin u nìn túee bāań ki kpáfi u-cee ki bī máafi-u bi nín ŋáań puee. Ní Yeesu cáá-bi ki kpōtò bi-ŋmaniŋma kitin kin bi yí Beetsayidee caŋin.
- ¹¹Ama kunipaau nín dāa béè laakin bi túlee ní bi nín jì bi-boon. Ní Yeesu fōō-bi ki sòòñ nì bi Unimbòti beel bōti, ní ki cáań bin nìn nyàab ú cáań-bee.
- ¹²Kujoou nìn bī jótée, ní Yeesu kpambaliŋ saalaa nì alee sùtìn ki pīl-u ní ki bí-u yii: “Yāntī binib nee n̄ n̄n cá ntimbilimun nì ikaan kí nyàab tijin nì laakin bi dàá dōōnee. Di sá yii laakin ti bí nee, binib kpá.”
- ¹³Ní Yeesu kíí-bi yii: “Nimbi ni-ba tīmaan-bi bí jī.” Ní bi bí-u yii: “Timbi cáá kpōnōb biŋmoo nì njōmbiyaamu muli ja ní, áá a là tí cùú dāń tijin kí cáań kí tī samaa nee kōkō n̄ jī ní.”
- ¹⁴Kunipaau poonee bininjab nìn bàń kutukub biŋmoo nyōkōm. Ní Yeesu bí u-boonnooliibi yii: “Ní yāntī bí kāl ikuul ikuul, ŋkuul kamaa n̄ n̄n cáá binib ili nì saalaa nyōkōm”
- ¹⁵Ní u-boonnooliibi ŋá u nín lī puee ki yāntì bi kāl ikuul ikuul.
- ¹⁶Ní Yeesu yōōn kpōnōb biŋmooyee nì njōmbiyaamu mulee ní ki wáań kutaa ki jáań Unimbòti tijin gbanti pu, ní ki gífi ní ki dūu tī u-boonnooliibi bí yàkatī kunipaau kōkō n̄ jī.
- ¹⁷Ní báa ŋma jín ki díkí, ní bi tōō akpōnōkati nì ajōŋgin ŋin bi ŋmó ki kínee an gbí tikabiti saalaa nì tili.
- ¹⁸Dalba Yeesu tí kākati ki bí laaaba u-baba ki mēé, u-boonnooliibi nìn bí u-cee ní u bālfī-bi yii: “Binib lì yii m sá ŋma ní?”
- ¹⁹Ní bi kíí-u yii: “Biba lì yii an sá Jaan un fūul binib Unimbòti nyimee di fātī fikiti, biba mun lì yii a sá Unimbòti bōnaatiliu Eelii, biba mun lì yii an sá Unimbòti bōnaatiliibi bikpikib kansikin ubo di fikiti.”
- ²⁰Ní Yeesu fātī bālfī-bi yii: “Kin nimbi faa, ŋma ní nimbi nyí yii m sá?” Ní Piyeer kíí-u yii: “A sá Kriisitoo un Unimbòti túnnée ní.”
- ²¹Ní Yeesu kpāafi-bi tiŋan yii bí taa péēlī-tì báa ubo cee,
- ²²ní ki gítī lī yii: “An máań man Kinibiki n̄ jī falaa tikpil. Biyidambi nì bisaraaŋaliibi nì bimaradakaliibi dàá dāá yí-mi, kí kpò-mi, ní m dāá fikiti winta dal.”
- ²³Ní u tūkū bi-kōkō yii: “Un yaa là kí nōó-mee n̄ fá ún u-ba nín là puee kí yōōn u-dōpuntikaan̄u kí n̄n nōó-mi baabadal.
- ²⁴Un di yaa là kí fī u-maŋfalee dàá dāá fá-di, ama un di yaa dū u-maŋfal ki fá man puee dàá dāá fī-di.
- ²⁵Unil, a yaa jín duulnya nee kōkō, ní sisi a-ba wāŋkèe ba ní a páati?

- ²⁶Un yaa cáá man nì m-bɔti pu icooyee man Kinibiki mun dàá dāá nīn cáá udaan pu icoo m yaa láá gítín nì m-nyootin nì m-Baa nì u-circir tūuni nyootinee.
- ²⁷Ibaamɔn ní m sòon nì ni, ni-kansikin biba dàá ká Unimbɔti beel kí wàatī ní kí nín kpú.”
- ²⁸Yeesu sòon mín, iwiin inii boonee ní ki yɔon Piyeer nì Jaan nì Jaaki ki jòm dijool pu kí mèè ñwimmeem.
- ²⁹Dyunti ñun u bī mèéyee ní u-nimiin cúū kpánti, ní u-bɔkutil píil kánkan ní ki jilinkī.
- ³⁰⁻³¹Kpalaayee, binib bili nyán ki yúl u-cee ki jil pàlpal, u nì bi bī gbàa faawii, an nìn sá Mooisi nì Eelii. Bi nìn bī sòon nì Yeesu u-tundi din sá yii ú kpú Jeerusaleemee pu ní.
- ³²Piyeer nì u-bɔɔbi nìn gèen ki kó poon, ama bi dāa fintèe, ní ki ká Yeesu walñu nì binib bilee yú.
- ³³Dyunti ñun bi dàá yīkì Yeesu ceeyee, ní Piyeer bí-u yii: “Ukpil, an ñān tí gbíntí doo, tí gāa tibín tita, sii kubɔ, Mooisi kubɔ, Eelii mun kubɔ.” (Di sá waa nìn nyí tin u bī sòonee.)
- ³⁴U bī sòon mimmee, ní ditagbandi diba dómiín ki bīn bi-pu, ní tifaandi cúú Piyeerbi.
- ³⁵Ní bi gbī Unimbɔti sòoní ditagbandin, yii: “Un bí nee di sá m-Jipɔon un m lēyee! Ní pīlfin-u”
- ³⁶Unimbɔti tin sòon mín ki ñmīlfée an kíñ Yeesu baba, ní bi kpáafi an bɔti, kaa péesòon tin bi kée báa ubɔ cee.
- ³⁷Kutaa wúnti, bi bī kpákatiñ dijoolee, ní dinikitikpaandi diba túñkín Yeesu.
- ³⁸Binib gbanti poon ní uninja ubɔ kúuñ, yii: “Ukpil, m gbàam-si, péefatī kí kpèè m-jipɔon nee. An sá-mi dibibaabil ní.
- ³⁹Arasini ubɔ di bí u-pu, an yaa bāañ-uee, ní u tátí ní u-wunti jìkì, ní u-nyoko nyēekupumpukuu, ní arasiniyee sàantí-u, kaa là kí yánti-u malaa.
- ⁴⁰M mēea-boonnooliibi yii bí jà-mi-u, ní baa ñún.”
- ⁴¹Ní Yeesu bí yii: “Oo binib nee, naa cáá Unimbɔti pu dimákal ki gáatì! Ni là m bàà kāl ni-cee kí tin sāa ñyunti ñulɔñu ní? M dàá nīn jīn ni-pu kimotii kí tin sāa ñyunti ñulɔñu ní? Uninjee, cáañ a-biki doo.”
- ⁴²Dyunti ñun kibikee dòn Yeesu ceeyee, ní arasiniyee fiin-kì ki lúkú ní ki cīñkì-kì ñkpitim pu. Ní Yeesu kpāti arasiniyee pu, ki cáañ kibikee, ki dū-kì ki tī ki-baa.
- ⁴³Ní báa ñma bākatì seeee Unimbɔti pɔñu nín sá ñkpaan miñyee. Báa ñma dáá bī pākà maamaacib bin kòkò Yeesu ñáañee, ní u bí u-boonnooliibi yii:
- ⁴⁴“Ní cúú tibɔti tin m dàá tükù-ni kɔñkɔnneeyee tiñan. Bi dàá dū man Kinibiki kí dū nyāfin binib.”

45 Ama baa n̄n gbīl tibotee taapu, an n̄n bí-bi dibalin, baa n̄n ḱ bée, ní bi fàṅkí, kaa bālfí-u taapu.

46 Yeesu boonnooliibi n̄n bī ḱpákà tikpiti pu.

47 Ní Yeesu bée bi-landokoi, ní ki cáán kibiyawaai ki yóon u-cee,

48 ní ki bí-bi yii: “Un di yaa f̄ōō kibiyawaai kii kinee man puee, f̄ōō man m-ba dee, ní un yaa f̄ōō-mee, f̄ōō un túnní-mee mun dee. Di sá yii un yaa sá kiyaawaai ni-kansikinee, ùn di sá ukpaan.”

49 Ní Jaan bí Yeesu yii: “Ukpil, ti ká uninja ubo cáá a-yindi ki jì arasiniibi binib pu, ní timbi móti kun puee waa sá ti-you.”

50 Ní Yeesu ḱí-u yii: “Taa n̄n mótimaan, kun puee un kaa ḱpákantí-nee sá ni-you ní.”

51 Dyunti n̄n u dàá ȳkí duulnyan ḱ n̄n jóm̄ yilpuee tóobiínee, ní u bóob̄ yii see ú péēcù Jeerusaleem.

52 Ní u tú binib n̄ lintī. Binib gbanti cūti ki kó Samarii tiṅki kiban ḱ bóntí laakin u dàá dāá kóee,

53 ní niin yab ȳi, kaa f̄ōō-u, u n̄n n̄n cá Jeerusaleemee pu.^{^fc^}

54 U-boonnooliibi Jaaki n̄ Jaan n̄n gbīl mimmee, ní bi bí yii: “Ti-Dindaan, tí m̄è Unimb̄oti n̄mi n̄ nyānní yilpu ḱ dāá wò ḱ céetí-baaa?”

55 Ní Yeesu f̄ati ki ḱp̄iñ-bi yii: [Naa nyí n̄fām min bí ni-nee].

56 Ní bi n̄k̄i kitingbaṅ kiban.

57 Bi bí nsanni ki céé, ní uninja ubo bí Yeesu yii: “M dàá n̄n péēnóó-si, báà laakin ní a yaa céé.”

58 Ní Yeesu bí-u yii: “Jiṅkpaabi cáá bi-k̄ṅkooni ki d̄ò, ní nn̄ombiyaamu cáá an̄ndiin ki d̄ò, ama man Kinibiki kaa cáá laakin m dàá bí m-yil ḱ ṅ̄nf̄ee.”

59 Ní Yeesu bí kijapaai kiba yii: “Nóó-mi.” Ní kijapaayee bí-u yii: “Ukpil, p̄-mi nsan m̄ síb̄ m-baa ḱ n̄n dāá nóó-si.”

60 Ní Yeesu ḱí-u yii: “Yántī bitaṅkpiibi n̄ n̄n síb̄ bi-taṅkpiibi, sii n̄ cùú sòon̄ Unimb̄oti beel b̄oti ḱ t̄k̄ù binib.”

61 Ní ubo mun gítī dóm̄in̄ ki bí Yeesu yii: “Ukpil, m dàá n̄n nóó-si, ama á dá láá p̄-mi nsan m̄ cùú k̄aān̄ m-dumpu yab ḱ w̄atī.”

62 Ní Yeesu bí-u yii: “Sii un yaa cúú dikool ḱ kpò ní ki gítī bī f̄atī kp̄éé a-boonee, kaa sá Unimb̄oti beel you.”

Luuki 10

1 Boonee ní ti-Dindaan gítī l̄ēbinib im̄uṅku ita n̄ saalaa n̄ bili biba, ki tú-bi bili bili bí lintī u-nyok̄opu ḱ cù n̄timu mun k̄ok̄on̄ ùn u-ba bàà làá c̄úee,

- ²ní ki bí-bi yii: “Kudiceeu wīkí, bidicaliibi kaa náan. Mèèmaan bukpaadaan ú tōn bitontonliibi kí kūtì bí dāá cā u-jikaati.
- ³Nīn cámaan. M tú-ni, ni dàá nīn bí kii apibil ñin bí isaakpan kansikinee ní.
- ⁴Ní taa yòon animil, nì kuloou nì anaataka, kí taa yūl nsanni kí jāam-ubō.
- ⁵Ní ni yaa kó kudicaŋu kunnee, ní péé péé kí jāam-bi yii: 'Ŋgbansoŋfi n nīn bí kudicaŋu nee pu.'
- ⁶Ní un yaa là ŋgbansoŋfee yaa bí niinee, ní ú fṣṣ ni-gbansoŋfiŋuee. Un là ŋgbansoŋfee yaa kpá niinee, ní kpáan ni-gbansoŋfiŋuee kí búntí.
- ⁷Ni yaa kó laakin ní bi yaa fṣṣ-nee, nīn kāmaan kudicaŋu gbantin. Tin kamaa ní bi yaa péécáan-nee, ní jī kí nyò, kun puee utontonli máan tipaal. Ní taa nīn kóò ki pótí adiin.
- ⁸Ni yaa kó kitiŋ kin poon ní bi yaa fṣṣ-nee, jīmaan tin kəkō bi yaa péécáan-nee,
- ⁹ní kí cáammaan kitiŋ gbanti poon bunliibi, kí tükù ki-nib yii: 'Unimbōti beel sūtì ki pīlīn-ni.'
- ¹⁰Ama ni yaa kó kitiŋ kin poon ní baa fṣṣ-nee, nyāmaan adan pu kí lì yii:
- ¹¹'Ti pítì ni-tiŋki kpōŋkpōm min táká ti-taŋŋee gba ki gíin ki tī-ni. Ama nì mín kəkōee ní béé yii Unimbōti beel sūtì ki pīlī-ni.'
- ¹²Ibaamōn ní m tükù-ni, ibōsoon dalee Soodōm tiŋki tafadaaldi dāa só nì kitiŋ gbanti yal.”
- ¹³“Nimbi Kōrasin tiŋki nib, mbusu dō ki cí-ni, nimbi Beetsayida tiŋki nib, mbusu dō ki cí-ni, kun puee maamaaci tuuŋŋi ñin m ṅáan nimbi cee nee di yaa bàà nīn ṅá Tiir nì Siidōn, kōnampu nee ntimu gbanti nib bàà nīn pēēn ikpalcati kí dū ṅfantam kí pükū bi-ba ki dākā yii bi kpántì bi-bimbim.
- ¹⁴Mín puee, ibōsoon dalee, nimbi tafadaaldi dāa jítiñ Tiir nì Siidōn nib tafadaaldi.
- ¹⁵Nimbi Kapeenaayum tiŋki nib, ni nyí yii ni dàá yīkì kí tin sāā kutagbōŋu níin? Ni dàá sīntī kí bà taapu taŋkpiibi ní.”
- ¹⁶Ní u gītī lī u-boonnooliibi yii: “Un yaa pīlfiñ-nee, pīlfiñ man dee, un yaa yī-nee, yī man dee, ní un yaa yī mamee yī un túnní-mee dee.”
- ¹⁷Binib imuŋku ita nì saalaa nì bili bin Yeesu túee fātī bāan nì dipōpindi, ní ki bí yii: “Ukpil, ali gba arasiniibi sīntiñ bi-ba ki tī-ti a-yindi pu!”
- ¹⁸Ní Yeesu bí yii: “M ká Sitaan nín nyánní kutagbōŋu kí bí kii utaa nín ṅmóò puee kí lítèe.
- ¹⁹M tükù-ni yii m tī-ni mpōn ní tāā ikoobu nì inoom pu kí cōmò kí nāan Sitaan pōŋŋu kəkō, tiba kpá kí ṅá-ni tikpiti.
- ²⁰Ní taa nín fāal yii arasiniibi nín sīntiñ bi-ba kí tī-nee ṅmaniŋma pu, ama ní nīn fāal yii ni-yiŋŋi nín ṅmāñ yilpuee pu.”

- ²¹Niinee ní Unimbɔti Fām yāntì Yeesu kíh̄n ki bī fāal̄, ní ki lī yii: “Oooo m-Baa, yilpu nì taapu Dindaan, m nyóh̄kí-si a nín dū tibɔti nee ki bál̄ bin yū bi-ba biciŋfitiibi nì binyiliibi bí taa béé-tì, ki dū-tì ki dàkā bin sá ŋwaamuee. M-Baa, tiŋman an sá mín, kun puee mín di ŋān a cee ki fáatì-si.
- ²²“M-Baa Unimbɔti dū tikəkɔ ki tī-mi. Báà ubɔ kaa nyí man un sá Unimbɔti Jipɔonee asee m-Baa, mín ní báà ubɔ kaa nyí un di sá Ubaatee asee man u-Jipɔon nì bin man u-Jipɔon yaa là kí dū-u kí dàkèe.”
- ²³Ní u fātì u-boonnooliibi pu ní ki bí bīn ŋmaniŋma yii: “An sá diyimɔl ki tī bin wāl̄ tin ni wāl̄ nee.
- ²⁴Ibaamɔn ní m sòh̄n nì ni, Unimbɔti bɔnaatiliibi nì bibɔtiibi tikpil bàà nìn péēnyàab kí ká tin ni wāl̄ nee ní kaa wál̄, ki bàà nìn nyàab kí gbīl̄ tin nimbi gbīl̄ nee ní kaa gbīl̄.”
- ²⁵Niinee ní umaradakal ubɔ là kí píll̄ Yeesu tibɔti kí kpèè u-nyɔkɔn, ní ki yíkì ki bí-u yii: “Ukpil, mana ní an sá m̄ ŋá ní kí ká dimaŋfal din kaa cáá dikuntilee?”
- ²⁶Ní Yeesu bí-u yii: “An ŋmān yii ba ní ti-marau poon? Tin tin a kaaŋee sòh̄n yii ba ní?”
- ²⁷Ní uninjee kíí-u yii: “An lī yii: 'Á nīn nēēn a-Dindaan a-Nimbɔtiu nì a-pɔbil kəkɔ nì a-naŋki kəkɔ nì a-pɔŋŋu kəkɔ nì a-landəkɔŋu kəkɔ, ní kí nīn nēēn a-juti kii sisi a-bee.' “
- ²⁸Ní Yeesu bí-u yii: “A kíí an ŋān, ŋá mín kí dāá ká dimaŋfal gbanti.”
- ²⁹Umaradakalee là kí pò u-bee ní ki bālf̄i Yeesu yii: “Ŋma di sá m-juti ní?”
- ³⁰Ní Yeesu bí-u yii: “Uninja ubɔ di nyánní Jeerusaleem ki sintī Jeeriikoo, ní digan̄gandambi biba kintì-u nsanni ki tāfi-u tiŋan pu u fikī, bi fúkul̄ u-wanti pílpil, ki búntí ki yāntì-u, u kíh̄n ki dō.
- ³¹Ní usaraaŋal ubɔ mun yíkì ki dīn̄ nsan gbanti. U bāań ki ká kijapaayee dōee ní u páań mpampa.
- ³²Ní bin tūh̄n ditundi Kunimbɔtidiinee ubɔ mun bāań ki ká kijapaayee dōee, ní ú mun páań mpampa.
- ³³Ama usamariija ubɔ cá nsan ki bāań ki yīkih̄n uninjee, ní ki sún̄ u-saai,
- ³⁴ní ki sútì ki pīl̄-u, ní ki ŋá u-buuni ŋkpam ní ki dū ndamam mun ki ŋá, ní ki póob̄-u, ki yōh̄n-u ki kāań u-maŋki pu, ní ki cáá-u ki cūnn̄i anicandiin ni, ki kpēē-u tiŋan.
- ³⁵Kutaa wúntèe, ní u nyántì animil ki tī ukpil un kpèè anicandiinee, ní ki bí-u yii: 'Á kpèè-mi kijapaai nee tiŋan, a yaa gītī jín̄ animil min nyɔkɔm u-puee, m yaa láā fātínee, m̄ téēn-si.' “
- ³⁶Ní Yeesu bālf̄i umaradakalee yii: “Binib bitee kansikinee, ŋma ní a ká yii u sá un digan̄gandambi kintì ki gbánee juti ní?”

³⁷Ní u kíf Yeesu yii: “Un ḡá-u tiḡanee di sá u-juti.” Ní Yeesu bí-u yii: “Too, a mun cùú ḡá mín mbaantiim.”

³⁸Yeesu nì u-boonnooliibi nìn cá nshan ní ki bàñ kitimbilii kibanee, unimpu ubo fṣṣ-u u-dumpu, bi yî-u Maata.

³⁹U nìn cáá naal ubo, bi yî-u Maarii. Maarii ún nìn kâ ti-Dindaan taanji taapu ki pílfí u-boti.

⁴⁰Maata kaa nìn cáá mpaan, atuun kupaau nìn ḡúb-u, ní u dómiín ki bí yii: “Ukpil, a-tafal kpá nì m-naal nín yánti man baba péēbī ḡáán atuun kəkəēēē? Tùkù-u ú dāá tūtuñ-mi.”

⁴¹Ní ti-Dindaan kíf-u yii: “Maata, Maata, a niìn ki jiki tiwan tikpil pu,

⁴²ama tiwambaantiil di páb. Tíñ ní Maarii lēē, ní ubo kaa bí kíf fṣṣ-tì u-cee.”

Luuki 11

¹Dalbee, Yeesu nìn bí laaaba ki mēē Unimboti: u mēē ki dóyee, ní u-boonnooliibi kansikin ubo bí-u yii: “Ukpil, dākà-ti bi nín mēē Unimboti puee, ali kii Jaan nín nìn dākā u-boonnooliibi puee.”

²Ní u bí-bi yii: “Ni yaa bí mēēyee, limaan yii: 'Ti-Baa, yánti bí béé yii a sá Unimboti circirdaan, kíf yánti a-beel n dāāñ,

³kíf tī-ti kutaa sá kamaa kun ti dàá jēe,

⁴kíf dū ti-kpitii kíf pō-ti, kun puee ti mun pūn bin ḡáán-ti ikpatee bi-kpitii, kíf taa pō mpaan Sitaan n kīl-ti.' “

⁵Ní Yeesu gītí bí-bi yii: “Tí dū ḡmánti yii ni-kansikin ubo di yaa cáá bōo ní ki yaa cūti u-cee kunyataasiiu, ki bí-u yii. 'M-bōo, pìnni-mi kpōnōb bita,^fd^6kun puee m-bōo ubo nyánni nshan ki kó-mi ní maa cáá báa tiba kíf ḡá-u tijin.’

⁷U-bōoyee yaa kīín-u kudii poon yii: 'Taa páb-mi, man pīn kudii, man nì m-biyaamu kó ki dṣōn, maa ti ḡūñ kíf yīkí kíf tī-si kpōnōb.’

⁸M tükù-ni ibaamōn ní, báa u yaa kaa làá yīkí kíf tī-u kpōnōb u nín sá u-bōoyee puee, see ú yīkí kíf tī-u tin kəkə u nyàabee u nín péēgbínti páb-uee pu.

⁹Mín pu ní man tükù-ni yii, mēēmaan Unimboti, u dàá tī-ni; nyàabmaan, u dàá yánti ní ká; kpāafimaan, u dàá pītī-ni.

¹⁰Kun puee, sii un yaa mēēUnimboti tibee, see á fṣṣ kudōḡu; ní sii un yaa nyàab tibee, see á ká kudōḡu; sii un di yaa tí yú ki kpāafēe, see bí pītī-si.

¹¹“Ni-kansikin ḡma di yaa cáá kibiki, ní kíf yaa mēē-u ujōm, ní ú dū ukoobu kíf tī-kì?

¹²Àá, kíf yaa tí mēē-u dijindi, ḡma kīkí kíf dū unoom kíf tī-kì?

¹³Too, nimbi bin sá binikpitibee yaa nyí ki tū ni-biyaamu tiwammōntiil, kin ataa ḡḡa pu ní Ubaati un bí yilpuee kaa nín tì Circir Fām bin kəkə yaa mēē-u Ōfām gbantee?”

- 14 Kijapaai kiba n̄n bí, arasinii kā u-pu ki yāntì u kpántì um̄omiin. Yeesu j̄n̄ arasiniiyee, ní um̄omiinee k̄n̄ ki b̄í s̄oòh̄, ní kunipaauee b̄akatì seeee.
- 15 Ama biba bí yii an sá arasiniibi b̄otiu Beelseebul di t̄ī-u mp̄on ní u cáā j̄i arasiniibi.
- 16 Ní biba mun là kí p̄íl-u tib̄oti ní ki bí-u yii ú ñá kudaan̄ɣu kub̄o bí béé yii u-p̄oɣɣu gbanti baasii nyánní Unimb̄oti cee.
- 17 Ama Yeesu n̄n nyí bi-land̄ok̄oi ní ki bí yii: “Dibeel din nib di yaa cúū yākatì ki jáà n̄ t̄obee, see dí k̄untí, ní di-diin̄ɣi ñ lítí kí yāɣk̄i t̄ob kí w̄iil̄.
- 18 Ní ni bí yii Beelseebul di t̄ī-mi mp̄on ní m j̄i arasiniibaa? Mimmee, Sitaan yaa f̄at̄ii b̄í jáà n̄ ùn u-bee, mana ní u-beel ñh̄n̄ kí n̄n bí ki cá!
- 19 Man yaa cáā Beelseebul p̄oɣɣu ní ki j̄i arasiniibee, mimmee ni dàá l̄i yii arasiniibi b̄otiu Beelseebul di t̄ī ni-jip̄ombi mun mp̄on ní bi j̄i arasiniibi deeyaa! Ni-yab bi-ba d̄akà yii ni bí diyintil p̄oon dee.
- 20 Ama, an yaa sá Unimb̄oti p̄oɣɣu ní m cáā j̄i arasiniibee, mimmee, an d̄akà yii Unimb̄oti beel p̄oɣɣu d̄omiín ni-cee dee.
- 21 “Up̄ondaan yaa kā n̄i u-janjawanti ki cí u-diikuee, tiba kaa gb̄et̄i u-wanti.
- 22 Ama ub̄o mun yaa ḡit̄i bí ní ki p̄ōh̄-uee, u d̄ooh̄ kí já n̄i u kí f̄ōō u-janjawanti tin pu u m̄akée, ní kí k̄ooh̄ u-wanti kí ȳakat̄i u-yab.
- 23 “Un yaa kaa bí man jandi puee jáà n̄i man dee, ní un yaa kaa b̄í t̄utuñ-mi m k̄ōnt̄i ki kp̄áf̄ee, b̄í yàant̄i dee.”
- 24 “Arasinii yaa nyáñ unilinee, u búnt̄i kuteeu pu ní ki ȳiñ̄ ki nyàab̄ ñk̄oɣk̄oon, u yaa nyàab̄ ki ḡī, kaa kée, ní ú bí yii: 'M dàá f̄at̄ii ḡit̄i laakin m n̄n nyánn̄ee.’
- 25 U yaa ḡit̄in̄ ki ká bi ñ̄at̄i kud̄ii ki b̄ont̄i-kuee,
- 26 ní ú cùú nyàab̄in̄ arasiniibi biluli bin cáā ntoom ki j̄it̄in̄ ùn-uee, ní bí d̄āñ̄ kí kp̄āfi kí k̄āl̄ udaan pu, ní ú mòt̄i b̄iil̄ kí j̄it̄in̄ mpeepeekaam.”
- 27 Yeesu b̄í s̄oòh̄ mimmee, ní unimpu ub̄o t̄eeñ̄ kunipaaun yii: “Unimpu un cáā a-pool ki m̄āl̄-si a ñáam̄ u-biilee bí mm̄on neeee!”
- 28 Ní Yeesu kíi-u yii: “Bin baasii bí mm̄on nee di sá bin p̄ilfi Unimb̄oti b̄oti ki ñáañ̄ t̄i n̄in̄ l̄i puee!”
- 29 Kunipaau d̄omiín ki w̄iñ̄ Yeesu ceeyee, ní u bí yii: “Nimbi waanee nib sá bikpitib, ki b̄ālf̄i m̄ ñá kudaan̄ɣu kub̄o. Ama naa làá ká kudaan̄ɣu kub̄o asee kun náañ̄ n̄i Unimb̄oti b̄onaatiliu Joonasi ȳok̄oee.
- 30 Kii Joonasi n̄in̄ n̄n sá kudaan̄ɣu ki t̄ī Niniifi yab puee, m̄in̄ ní man Kinibiki dàá n̄n sá kudaan̄ɣu ki t̄ī nimbi waanee nib.
- 31 Ib̄osoon dalee, unimpub̄oti un n̄n nyánn̄i Seeba tiɣk̄inee dàá d̄ā ȳik̄i kí kp̄o nimbi waanee nib b̄oti, kun puee u n̄n nyánn̄i kitiɣk̄untinyok̄o ki d̄omiín ki p̄ilfi Saloom̄on ciini. Ama ub̄o bí doo ki j̄it̄in̄ Saloom̄on.

- 32 Ibosoon dalee, kitiŋ kin bi yīi Niniifēe yab dàá yīkì nimbi waanee nib pu kí kpò ni-bòti kun puee Joonasi nín nèn sòòñ nì bi Unimbòti botee, bi nèn kpántì bi-bimbim. Ama ubo bí doo ki jítiñ Joonasi ní ki sòòñ nimbi kaa kpántì ni-bimbim.”
- 33 “Ubo kaa tùutī fitila kí dūú bál, kaa tí dù dibool kí cíkiñ u-pu, bi dùú tókòñ kifaŋkòlii pu ní bin kóòñee n̄ n̄n wāl.
- 34 A-nimiliŋ sá a-wunti fitilau ní. A-nimiliŋ yaa ñāñee, a-wunti kòkò wāl ní, ama ñi yaa kaa ñāñee, a-wunti kòkò kó dibombòndin dee.
- 35 Mìn puee, á kpèè tiŋan ñwalfi ñun bí a-nee n̄ taa kpántí dibombòndi.
- 36 A-wunti kòkò yaa wāl ní dijandi diba yaa kaa bí dibombòndinee, mimmee a-wunti kòkò bí ñwalfin dee, kii bi yaa tūū fitila ñwalfi nín ñmíntí-si pu a wālee.”
- 37 Yeesu sòòñ mìn ki dóòyee, ní Fariisa ubo yíiñ-u yii ú dāañ bí jī tijin, ní Yeesu kó u-cee ki kāl kí jī.
- 38 Fariisee ká yii Yeesu kaa fíntì u-ñalii, kii bi-marau nín sá bí ñá pu kí wàatī kí nín jī tijinee, ní an ñá-u bitii.
- 39 Ní ti-Dindaan bí-u yii: “Nimbi Fariisab, ni fíntí tiyuti nì asambil boon kaa fíntí poon, diwaŋfikil nì ntoom gbí ni-pòbiliŋ poon.
- 40 Bigbaambi, Unimbòti un ñá boonee, ùn di kaa tí ñá poonaaan?
- 41 An bàà sá ní ñá biwòfib tiŋan, ní tikòkò n̄ ñāŋkì kí tī-ni.
- 42 “Mbusu bí ki tī nimbi Fariisab, kun puee ni lèekī saalaa kamaa pu kubò kubò goosi faati nì ditunnuul nì tikunfaal tin kòkò kínee pu ki tìi Unimbòti, ama ní kaa là kí n̄n bí deede kí n̄n n̄eñ Unimbòti. Kin, min ni bàà máan kí péé kí ñá kí wàatī kí nín ñá tin kínee dee.
- 43 “Mbusu bí ki tī nimbi Fariisab kun puee ni n̄eñ ki kàal nyòkòpu jaliŋ akpafidiin ni, ki n̄eñ bí n̄n jáań-ni sampaambi pu ki tì-ni jilma.
- 44 Mbusu bí ki tī-ni, kun puee ni bí kii akaakul ñin jīlfi ki nákañ kitiŋ, á dàá còom kí jīti ñi-pu, kaa kpāantí bée yii tiwan tin kaa ñāñee pu ní a jítee ní.”
- 45 Ní umaradikal ubo bí yii: “Ukpil, a nín sòon pu nee, a sīi ki kpāantí timbi deeyaa!”
- 46 Ní Yeesu kíi-u yii: “Mbusu bí ki tī nimbi bimaradakaliibi mun, kun puee ni cáá awaŋgul ñin nyim̄ee ki tūntí binib ní nimbi ni-ba kaa là kí dū ni-ñambiki kí dáb kí tūtuñ-bi.
- 47 Mbusu bí ki tī-ni, kun puee ni māā Unimbòti bōnaatiliibi bin ni-naanjab n̄n kūyee akaakumōnti.
- 48 Ni ñáañ mìn kí dàkà yii ni-naanjab nín n̄n ñáañ atuun ñiŋyee ñāñ ni-cee, kun puee b̄n kūū Unimbòti bōnaatiliibi, ní nimbi māā bi-kaakuliŋ.
- 49 An pu ní Unimbòti iciindaan n̄n lī yii: ‘M dàá tōñ m-bōnaatiliibi n̄n m-kpambaliŋ bi-cee: bi dàá kpò biba ní kí sàan bin kínee.’

⁵⁰An puee, nimbi waanee nib dàá ká ditafadaaldi Unimbɔti bɔnaatiliibi bin kɔkɔ ni kũyee pu, doooo Unimbɔti nín náán duulnya

⁵¹kí yòòní Abeel kí dāá sā Sakari un bi nìn kũ nsaraafan nì Kunimbɔtidii kansikinee. Tiŋman ní m tükù-ni, nimbi waanee nib dàá ká ditafadaaldi nnikpaakoon gbanti pu.

⁵²“Mbusu bí ki tī nimbi bimaradakaliibi, kun puee ni pīn dinyil punyɔkɔ ki lēesaafii. Naa làá kó ni-ba ní ki jì bin bàà là kí kóee.”

⁵³Yeesu nyán Fariisee dumpuee, ní bimaradakaliibi nì Fariisab fɔɔ aŋuu ŋkpitim pu ní ki kíh ki bí balfi-u tibɔti tikpil.

⁵⁴Bi bí pīl-u tibɔti ki là ú sòòh kí yìntī bí ká nsan kí cúú-u.

Luuki 12

¹Dyunti gbantee, binib nìn kpáfí Yeesu cee ki wīkí tikpil, an kaa cáá ŋkaan. Bi nín múkú tikpil puee, bi nìn kíh ki tà tɔb. Ní u sòòh nì u-boonnooliibi ki lī yii: “Tikɔko poonee ní nīn nyīh ni-ba nì Fariisab kpɔnɔnyɔkɔŋu pu, an dàkà yii bi-poonnyooŋu.

²Tin kɔkɔ bí dibalinee, bi dàá biitī ti-pu, ní tin kɔkɔ baa nyée, bi dàá béé-tì.

³An puee, tin kɔkɔ ni yaa láā lī dibɔmbɔndinee, ŋwiín pu ní bi dàá dāá gbīl-tì, ní tin ni yaa láā kó kudii poon ki lókɔfèe, mpaampiin pu ní bi dàá dāá bāakì-tì”

⁴“Nimbi m-bɔɔbi ní m tükù tibɔti nee, ní taa fàŋkìmaan bin kù binib, ní boonee kaa ti ŋūh kí ḡá tiba kí kūtèe.

⁵M dàá dàkà-ni un ni máah kí fàŋkèe: fàŋkìmaan Unimbɔti un ŋūh kí lēedimaŋfal ní ki gítí cáá mɔn kí dū kinaŋ kí tō ŋŋmin ŋkúm boonee. Tiŋman ní m tükù-ni, un ní ni máah kí fàŋkèe dee.

⁶“Baa nyáfí seerib biŋmoo igboo ilaaa? Ama nì mín kɔkɔee, Unimbɔti kaa súntí seer bàà ubo pu.

⁷Unimbɔti kàān ni-yikpiti kɔkɔ ki nyí ti-nyɔkɔm. An puee, taa fàŋkìmaan! Nimbi jítiñ kuseerpaau.”

⁸“M tükù-ni yii un kamaa di yaa sòòh binib nimiin yii u sá man yɔuee, man Kinibiki mun dàá dāá lī Unimbɔti tūuni cee yii ú mun sá man yɔu.

⁹Ama un di yaa néé binib nimiin yii waa nyí-mee, man Kinibiki mun dàá dāá néé Unimbɔti tūuni nimiin yii maa nyí-u.

¹⁰“Un di yaa sòòh ki bíl man Kinibikee ŋūh kí ká u-kpitii pōtam, ama un di yaa sòòh ki bíl Unimbɔti Fāmee kpá kí ká u-kpitii pōtam.

¹¹“Bi yaa láā cúú-ni ki cūnni akpafidiin nì bikpilib nì biyidambi nimiin kí sòòh ni-botee, ni nín máah kí sòòh pu kí ŋmátée bɔti n taa páb-ni,

¹²kun puee ŋyunti gbanti yaa bāanee, Unimbɔti Fām dàá dàkà-ni tin sá ní sòòhee.”

- ¹³Kunipaau kansikinee ní unil ubo bí-u yii: “Ukpil, tükù m-maan ú yàkatī ti-baa fakal dīn u kpīi kī fēe kī lēēman yati kī tī-mi.”
- ¹⁴Ní Yeesu kīí-u yii: “Oo kijapaai, ŋma di kāañ-mi ni-bōsoonliu nì ni-wanyakatiliu?”
- ¹⁵Ní u bí báà ŋma yii: “Ní nīn nyīn ni-ba tiŋan kī taa nīn cáá nnimitaataam, kun puee báà unil yaa yānti kī sá ugaaja min, u-gaajawanti di kaa yì-ti ní u cáá dimañfal.”
- ¹⁶Ní u lī tibōŋmantikaal nee, yii: “Ugaaja ubo di nīn bí kī cáá tikpaatan kī kùñ, ní an lōñ tiŋan.
- ¹⁷Ní u lī u-ban yii: ‘M dàá péēgītī ŋá mana deeyaaa? Maa ti cáá mpaan laaaba kī cáá m-jikaati kī ŋá.’
- ¹⁸Niinee ní u bí yii: ‘M bēè m nīn dàá ŋá puee: m dàá kpītī m-cakalaabi ní kī fātī gāā bikpaŋkpaambi, ní kī kōon m-jikaati kōkō nì m-wanti tin kīnee kī gbēēn.
- ¹⁹M yaa ŋá mín kī dódoyee, ní m bí m-ba yii: M cáá tikōkō nì tikōkō tikpil kī jī kī nyò kī nīn fàal kī ñŋfi ali abin kupaau.’
- ²⁰Ama ní Unimbōti bí-u yii: ‘Ugbaan, kunyeeu nee gba m dàá fātī fōō a-naŋki. Tin kōkō a bōnti kī yōon a-bee, ubo di dàá nīn kīn kī yì.’ “
- ²¹Ní Yeesu gītī lī yii: “Mín ní an dàá ŋá un kamaa nyàab tigaajawan kī yōontí u-ba, ama ní kaa sá ugaaja Unimbōti nimiinee.”
- ²²Mín boonee ní Yeesu bí u-boonnooliibi yii: “An pu ní m tükù-ni yii ní taa nīn nīn tipōjikaal nì tiwampeenkaal pu,
- ²³Kun puee dimañfal jítiñ tijin, ní tiwun mun jítiñ tiwampeenkaal.
- ²⁴Kpèèmaan inoon, iaa būul, kaa cēē, kaa cáá kukaau kaa tí cáá kukaatuŋu, ama Unimbōti kpīinti-i. Kin nimbi bin jítiñ inoon kpataaayee ní ni-Baa un bí yilpuee kaa nīn kpèéee?
- ²⁵Báà a yaa bí yáliŋkí nì a-ba, saa ŋūñ kī gbēēn a-mañfal fōkōŋŋu pu fīii.
- ²⁶Ni yaa kaa ŋūñ kī ŋá tin bí fīii mimmee, kin ba pu ní ni yáliŋkí tin kīnee pu?
- ²⁷Kpèèmaan mpumpukum! Maa tūn ditundi kī gī, kaa lù satab, ama m tükù-ni yii ubōti Saloomon gba, nì u-gaajati kōkōee, waa ŋún kī ká tiwannyaandi kī pēen an bān mpumpukum nee kansikin miba nyaanŋku.
- ²⁸Unimbōti yaa nyāantí mín timool tin bí tisatin dīn fool ŋŋmi n dāá wò-tèe, mimmee waa làá ŋá án jítiñ mín kī tī-naaan? Ba pu ní ni-fookiiu kaa náan mimmee?
- ²⁹Ní taa nīn bīn kī nyàab tin ni dàá jēe nì tin ni dàá nyòee, kī taa nīn páb ni-ba an wanti pu.
- ³⁰Duulnya nib bin kaa nós Unimbōtee di nyàab tīn kōkō, kaa gbèentí, ama nimbee, ni cáá Ubaati un nyí yii an balfi ní nīn cáá an wantee.
- ³¹Péé kī nyàabmaan Unimbōti beel, ní ú tī-ni kī kpáan tin kōkō kīnee.”

- 32“Nimbi bin sá kinikitiwaayee, taa fàṅkìmaan, ni-Baa lēȳȳi u dàá tī-ni dibeel.
- 33Nyāfìmaan ni-wanti kí dūú tīmaan bisoodambi. Mimmee ni sīn̄ animitokol ṅin kaa cífée n̄i tìgaajati tin kaa dótótee dee yilpu, laakin binaayub kaa ṅūn̄ kí yòṵṵ dikotul mun kaa ṅūn̄ kí móee.
- 34Kun puee laakin a-gaajati bée, niin ní a-landokṅu mun bí.”
- 35“Bóntímaan ni-ba, kí n̄n̄ gbīn̄ ni-dambalab, ni-fítìlab n̄ n̄n̄ fòol̄ kí cí m-gítintam.
- 36Ní n̄n̄ bí kii bitontonliibi bin bin kpiliu búntì animpucan̄gbiil, bi k̄a ki cí-u, u yaa láā bāān̄ ki fáá kipunyok̄o bí p̄it̄i-uee.
- 37An sá mm̄on ki tī bitontonliibi bin bin kpiliu bāān̄ ki ká bi k̄a ki wāl, kaa gèènee. Ibaam̄on ní m̄ tükù-ni, u dàá dū ditontombokutil kí p̄eēn̄ ní kí yant̄i bí k̄al̄, ní ú cáān̄ tijin kí tī-bi.
- 38Bāā an yaa sá kunyataasiiu àá ṅkoosiiim ní u yaa bāān̄ ki ká bi k̄a kaa gèènee, an sá mm̄on ki tī bidambi.
- 39Ní gbīl̄maan tinee mun: kudiidaan yaa nyí ṅyunti ṅun unaayuu dàá dāān̄ kí yò-uee, u bàā k̄al̄ kí c̄it̄i ní bí taa láā cíl̄ u-diiku kí yò-u.
- 40M̄in̄ mbaantiim, ni mun n̄ bóntí kí n̄n̄ címaan, kun puee man Kinibiki dàá b̄an̄ ṅyunti ṅun naa bàā d̄akaf̄ee ní.”
- 41Ní Piyeer bí yii: “Ukpil, tibṅmantikaal gbantee, a li timbi baba naaan, a li bàā ṅma ní?”
- 42Ní ti-Dindaan kí-u yii: “Tibṅmantikaal nee sá ki tī utontonli kamaa un yú deede ki cáá iciin, u-kpiliu dū u-cindi yab ki ṅúb̄in̄-u ú n̄n̄ kp̄eé ki t̄i-bi tijin ṅyunti ṅun sá ú tī-bee ní.
- 43An sá mm̄on ki tī utontonli gbanti u-kpiliu yaa bāān̄ ki ká u b̄i ṅáān̄ min u tükū-uee.
- 44Ibaam̄on ní m̄ tükù-ni, u-kpiliu dàá dū u-gaajati k̄ok̄o ní kí ṅúb̄in̄-u.
- 45Ama ní utontonlee yaa bí yii: 'M-kpiliu yúnt̄in̄ tikpil.' ní ki kíl̄ ki b̄i gbāā bitontonliibi bin kínee bininjab n̄i binimpoobi, ní ki j̄in̄ ki nyù ki gbéè,
- 46niinee ní u-kpiliu n̄ dāā f̄at̄in̄ ṅwiin ṅun pu waa d̄akaf̄i yii u dàá ḡit̄inee n̄i kukuluu kun pu waa nyée. U yaa bāānee, see ú tont̄i-u ní kí dū-u kí t̄o bin ȳi kaa f̄ōō Unimbotee lan̄ki.
- 47“Utontonli un yaa nyí min ní u u-kpiliu l̄e ama ní kaa bónt̄i m̄in̄ ki tī-uee, u-gbati dàá n̄n̄ w̄it̄i tikpil.
- 48Ama, utontonli un yaa kaa nyí min u-kpiliu l̄e ní ki ȳint̄in̄-uee u-gbati kaa dāa náān̄. Sii un Unimboti yaa tī tikpilee, u dāa b̄alfi-si tikpil mun ní, ní sii un Unimboti yaa ti kp̄āān̄ tikpilee, see ú dāā b̄alfi-si tikpil mun.”
- 49Ní Yeesu bí yii: “M̄ dóm̄in̄ kí cáān̄ ṅṅmi kí t̄o kitij pu ní, m̄ bàā là ṅú f̄ōō dooooyee gba ní.

- ⁵⁰M dàá fàl falaa, an puee m bí digìḡkpaandin kí n̄n cí ḡyunti ḡun an dàá dāá ḡée.
- ⁵¹Ni nyí yii m dómín kí cáán ḡgbansḡḡfi kitiḡ pu níiin? Aayee, m cáán diyakatil ní.
- ⁵²Di sá yii, kí yòon kí n̄n cée, binib yaa bí biḡmoo kudicaḡu poonee, bi dàá yàkatī ní, bita kaa làá n̄n gbiliḡ bili, ní bili mun kaa làá n̄n gbiliḡ bita.
- ⁵³Ubaati kaa làá n̄n gbiliḡ u-jipḡon ní u-jipḡon mun kaa làá n̄n gbiliḡ ubaati, unaati kaa làá n̄n gbiliḡ u-bisal, ní u-bisal mun kaa làá n̄n gbiliḡ-u, ní unimpu kaa làá n̄n gbiliḡ u-coopu, ní u-coopu mun kaa làá n̄n gbiliḡ-u.”
- ⁵⁴Ní Yeesu bí kunipaauee yii: “Ni yaa ká atagban yaa yíkìḡ laan pú ḡwiḡḡ jēetée, ní ní l̄i yii: 'Utaa dàá n̄i,' ní ú lafun n̄i.
- ⁵⁵Ní dipeel buḡku yaa bāánee, ní ní bí yii: 'Ti dàá kó kutuntuḡun dee,' ní an lafun ḡáán mín.
- ⁵⁶Mili mili dambi, ni nyí ki gant̄i yilpu n̄i taapu daanti, ba pu ní naa ḡūḡ kí bée tin b̄i j̄it̄i kḡḡkḡneeyee?”
- ⁵⁷“Ba pu ní naa dākaf̄i kí lēemin bí deedeeyee ni-ba?”
- ⁵⁸Yeesu kúti ki l̄i yii: “Uḡo yaa cān-si ibḡsoon, ḡyunti ḡun ni dáá bí nsanni ki cée, pḡḡn a-ba kí ḡḡḡki tibḡti kí kúnt̄i-t̄i nsanni niin, an n̄in dàá ḡá pu ú taa dáal-si kí cūnn̄i ubḡsoonli cee, ún n̄ dū-si kí t̄i plisib n̄ cáá-si kí piḡn sarkee.
- ⁵⁹M tük̄u-si ibaam̄on ní, bi yaa cáá-si ki tó sarkanee, see á pà a-pḡndi kḡkḡ nyík̄inyiki, bāa gboo ubḡ kaa k̄int̄i, ní bí n̄in líi-si”

Luuki 13

- ¹Dyunti gbantee ní binib biba dómín ki tük̄u Yeesu yii Gaaliilee yab biba n̄in b̄i k̄u tiwaḡkuti ki ḡáán saraa ki t̄i Unimbḡti, ní ḡḡmina Piilati yānt̄i bi dómín ki k̄ū-bi, ní bi-fatikuu n̄i tiwaḡkuti tin bi k̄ūyee fatikuu ḡmālim̄ tḡbin.
- ²Ní Yeesu bí-bi yii: “Mimmee, ni dākaf̄i yii Gaaliilee yabee n̄in kp̄iḡ nsansaḡkúm gbantee, an dākà yii bi sá binikpitib ki j̄it̄iḡ Gaaliilee yab bin kíḡnee kḡkḡḡ?”
- ³Aayee, baa sá, ama, ni mun yaa kaa kp̄ant̄i ni-ba, ni dàá kp̄u kii bí mun n̄in n̄in kp̄iḡ puee ní!
- ⁴Áá, ni dākaf̄i yii binib saalku n̄i bita bin Siiloowee difḡkḡku líti ki t̄ab̄ ki k̄ūyee sá diganḡam nib ki j̄it̄iḡ Jeerusaleem yab bin kíḡnee kḡkḡ?
- ⁵Aayee, baa sá, ama, ni mun yaa kaa kp̄ant̄i ni-ba, ni dàá kp̄u kii bí mun n̄in kp̄iḡ puee ní.”
- ⁶Ní Yeesu ḡit̄i l̄i tibḡḡmantikaal nee yii: “Uninja ubḡ di bí ní ki cḡḡn busubu bun bi ȳiḡ fiigee u-kpaabun. Dalbee, u cūti kí kit̄i abil, ní kaa ká.
- ⁷Ní u bí upaadaan un kp̄èe u-kpaabuee yii: 'Kp̄èe, abin ata sèe m n̄in péedḡḡn ki nyāab busubu nee biliḡ, kaa k̄ant̄ee. Gāa-bu kí fá. Ba pu ní bu yú ki j̄iḡ mpaan fam mín?’

⁸Ní upaadaanee bí yii: 'Ukpil, gítī yàntī-bu dibindi nee, m̄ yòkòtī bu-taapu kí ñá tinaabin.

⁹M yaa ñá mín, an yaa yíi, jiil bu dàá lòòh, bu yaa kaa nín lòòñee, á nín gāa-bu kí fá.'
“

¹⁰Ɖwiññuñfikaa ñuɔ dalee, Yeesu n̄n bíi dākà binib Unimbòti b̄ti kukpafidii kub̄n.

¹¹Unimpu ubo n̄n bí niin, arasinii ubo n̄n ñúḃ-u doooo abin saalku n̄i ata ki yānti an gúkùh-u u kpánti udeen, waa ti ñūh kí yáatí báà fiii.

¹²Yeesu ká-uee, ní ki yíiñ-u ní ki bí-u yii: “Unimpuee, a-weeni yānti-si,”

¹³ní ki dū u-ñalii ki páah̄ u-pu. Kpalaa niin ní unimpuee yáat̄i yúl cáacaa, ní ki bíi pàkà Unimbòti.

¹⁴Niinee, an kaa móòkiñ kukpafidii kpiliu Yeesu n̄n cáah̄ unimpuee ñwiññuñfikaa dalee, ní u tükū bin kpáfi niinee yii: “Kinyoñ poonee iwiin iluu di sá báà ñma n̄ dūú t̄o u-tundi, mín puee, dāam̄maan iwiin iluuyee poon bí cáah̄-ni, án taa n̄n sá ñwiññuñfikaa dal.”

¹⁵Ní Yeesu kíi-u yii: “Mpoonnyoondambi, kee ñwiññuñfikaa dalee, ni gb̄nti ni-naai n̄i ni-mammu kunaakooun ki cáh̄-i i nyùɔɔ?”

¹⁶Kin unimpu nee, mun sá Abraam naantiiu ubo ní Sitaan bóob̄-u doooo abin ali kpá mmuñku s̄éé, ùh̄ di kaa nín máah̄ m̄ báat̄i-u dikpambaal ñwiññuñfikaa dalaaa?”

¹⁷Yeesu n̄n kíi-bi mimmee, ní icoo kó u-nannanliibi gb̄anti, ama samaa un kíñee n̄n f̄aal atunnyaan ñin Yeesu n̄n ñáañee pu.

¹⁸Ní Yeesu gítī tí dū tib̄oti tiba ki ñm̄antiñ-bi yii: “M dàá dū Unimbòti beel kí nántin̄ ba deeyaaa, ba ní m̄ dàá dū-dì kí ñm̄antiñ?”

¹⁹Dì náah̄ n̄i kisubiki kin bi yíi muutaadee bil ní ubo ȳoñ ki dūú búl u-kpaabun, ní ñi nyáñ ki kpánti busubu, ní nn̄ombiyaamu dóm̄iñ ki páah̄ mu-diiññi bu-paññi pu.”

²⁰Ní u kút̄i ki lí yii. “Ba ní m̄ gítī ñūh̄ kí dū Unimbòti beel kí dūú ñm̄antiñ?”

²¹An náah̄ n̄i kp̄oñ nyòk̄oñu ñun ní unimpu dū ki ñm̄alim̄ ñkp̄oñoyim̄ b̄oto dijandi poon ní ki búuh̄, ní busaa kòkò jóñee.”

²²Yeesu n̄n c̄oñm̄ ki j̄it̄i ntiñwaamu n̄i ñkpaammu ki dākà Unimbòti b̄oti ki cá Jeerusaleem.

²³Ní ubo b̄alfi-u yii: “Ukpil, binib fiii di dàá dāá p̄ēkà difiilaaa?” Ní Yeesu kíi-u yii:

²⁴“P̄óom̄maan ni-ba kí d̄imaan kipunyòk̄owaai kí kó yilpu! Mbaam̄on ní m̄ tükù-ni, binib tikpil dàá dāá nyàab̄ kí kó, kaa làá dāá ñm̄a.

²⁵“Unimbòti kudiidaan yaa láā yík̄i ki p̄iñ u-punyòk̄okee, ni dāa kíñ ki yú boon ki gb̄àa kipunyòk̄o ní ki lí yii: 'Ti-Dindaan, piit̄i-ti!' Ní ú dāá kíi-ni yii: 'Maa nyí laakin ní ni s̄éé.’

²⁶Niinee ní ni dāa lì yii: 'Ti nì si nìn jín ki nyùñ, a dómiñ ti-tiŋkin ki yúl ti-daŋŋi pu ki dākā Unimbōti bōti.'

²⁷Ní ú fātí kùbití kí tükù-ni yii: 'Maa nyí laakin ní ni sée. Sútímaan niin kí wàatí-mi, nimbi bikpitiŋaliibee kòkò.'

²⁸Niin ní ni dàá dāá ká Abraam nì Isaaki nì Jaakòb nì Unimbōti bōnaatiliibi kòkò ká Unimbōti beelin, ní nimbee, bí dū-ni kí fá mmòŋki, ní ní dāá sō anyin gà tòb kàkaka.

²⁹Binib dàá dāá nyānní duulnya jaŋŋi kòkò, kí dāāñ kí kó Unimbōti beelin kí jī nnaam.

³⁰Bin bin sá kòŋkònee biluŋkikaabee, biba di dāa sá bipeepeekaabi, ní bin sá kòŋkònee bipeepeekaabee, biba dāa sá biluŋkikaabi."

³¹Dyunti gbantee ní Fariisab biba dómiñ Yeesu cee ní ki bí-u yii: "Yíkì doo kí nīn cá laaaba kun puee Eeroodi nyàab kí kpò-si."

³²Ní Yeesu kíf-bi yii: "Cùú tükùmaan Eeroodi un cáá nciin kii jiiŋkpaayee yii: 'M dàá jà arasiniibi kí cáañ bibunliibi dín nì fool, daapudalee, m dódò dee.'

³³An máañ m còmò dín nì fool nì daapudal, kun puee an kaa pú nsan yii Unimbōti bōnaatiliu n kípú laaaba an yaa kaa sá Jeerusaleem.

³⁴"Jeerusaleem yab, Jeerusaleem yab, nimbi bin kù Unimbōti bōnaatiliibi ki cáá ataŋkpee ki yāŋkí ki kù bin Unimbōti túnnée, ataa aŋa pu ní maa nyàab kí kóon-ni kí kpāfi m-cee kii ukòl nín kōontí u-biyaamu kí nà u-taapu kí dū u-feeni kí biñ mu-pu miŋyee! Ama ní ni yí.

³⁵An puee Unimbōti dàá fá ni nì ni-diiku. Ibaamòñ ní m tükù-ni, naa làá ti ká-mi kí nīn cí nyunti nūn ni dàá dāá sòon m-pu yii: 'Unimbōti n biñ un u túnnée boonee.'

Luuki 14

¹Dwiŋŋuŋfikaa ŋubò dalee, ní Fariisab kpilib ubò yíin Yeesu ú dāāñ u-dumpu bí jī tijin. Yeesu bàñee, ní bin bí niinee ká ki còŋkí-u.

²Ucùúdaan ubò nìn bí u-nimiin.

³Ní Yeesu bālfí bimaradakaliibi nì Fariisab yii: "Ti-marau pú nsan tí cáañ ubunli ŋwiŋŋuŋfikaa dalaaa an kaa pú?"

⁴Ní baa kíf-u tiba. Ní u cúú ubunlee ŋal ní ki cáañ-u ní ki bí yii ú nīn kùn.

⁵Miñ boonee ní Yeesu bí-bi yii: "Ni-kansikin ubò di yaa cáá jipòon àá unaa, ní u yaa jéeti lòkòñ ŋwiŋŋuŋfikaa dal, waa lèekí-u malaaa?"

⁶Ní baa ŋún ki kíf-u an bōti.

⁷Yeesu dáañ ki ká yii bin bi yíin bí dāāñ kí jī tijinee bí nyàab ikakaamònti, ní u dū tibòŋmantikaal ki bí bi-kòkò yii:

⁸"Bi yaa yíin-si tinimpucan jim ní a yaa bàñee, taa kàl nyòkòpu jal pu, an yaa yí, bi yíin unikpaan un jítiñ-see mun.

- ⁹A dāa kpèéyee, un yíín nimbi liitilee bāań a-cee ní kí b́-si yii: 'Yíkì kí pō ukpil nee mpaan.' Ní á yíkì nì icoo gbòooo kí n̄n gítí boon boon kí cùú kàlín.
- ¹⁰Mín puee, bi yaa yíín-si njimee, cùú kàlín boon, ní un yíín-see yaa bāań ki ká-si a kān boonee, ní ú b́-si yii: 'M-bòò, dāá kàl̄ nyòkòpu dijamòntiil pu.' Niinee an sá diyindi ní ki t̄i-si, sii nì bin kòkò b́ niin kí jēe nimiin.
- ¹¹Mín mbaantiim ní un kamaa yaa yòòh u-ba yilpuee Unimbòti dàá sinti-u taapu, ní un yaa s̄inti u-ba taapuee Unimbòti dàá yòòh-u yilpu.”
- ¹²Ní Yeesu fàtì b́ un yíín-uee yii: “A yaa làá yíín binib n̄ dāań a-dumpu kí j̄i tijinee, taa yíín a-bòòbi n̄ a-nabiyaamu, n̄ bin nàań-see n̄ a-gaajajutiibi, kun puee b́ mun ḡh̄n kí dāá ḡá mín kí yíín-si mun, mimmee bi pān-si tin a n̄n ḡá ki t̄i-bee dee.
- ¹³Ama a yaa ḡá tijin ki dàá yíín binib n̄ dāań a-dumpu kí jēe, á yíín bisoodambi, bideembi, bifaliḡfaambi n̄ bijòfub.
- ¹⁴A yaa ḡá mimmee, a dàá n̄n b́ mm̄on ni kun puee an nibee kaa ḡh̄n kí tēeń-si, ní daliḡkin Unimbòti yaa làá f̄ikitì deedeedambee, ní ú dāá pà-si.”
- ¹⁵Bin n̄ Yeesu n̄n k̄a ki j̄inee kansikin ubò n̄n gb̄l̄ an b̄tee, ní u b́ Yeesu yii: “Án n̄n m̄òh un dàá dāá j̄i Unimbòti beelin jikaatee!”
- ¹⁶Ní Yeesu k̄í-u yii: “Unimbòti beel n̄n náań n̄ kunyee s̄èe: Kijapaai kiba di n̄n bónti n̄j̄iḡkaamm̄i miba ní ki yíín binib tikpil.
- ¹⁷Njimee yuntiḡu bāańee, ní u tú u-tòntònl̄iu yii ú cùú t̄ukù bin u yíínee yii: 'Dāańmaan, an kòkò bónti.'
- ¹⁸Ní bi-kòkò b̄i t̄i inaakpal fam kun pu ní baa làá ḡmā kí c̄uee. Upeepeekaayee b́ yii: 'M c̄ikitì-si kif̄uulii maa làá ḡmā kí dāań, kun puee m dá kusaau kubò, m máań kí cùú kp̄èè-ku.'
- ¹⁹Ní ubò mun b́ yii: 'M c̄ikitì-si kif̄uulii, maa làá ḡmā kí dāań, di sá yii m dá inaa in bi cāa kù tikpaalee saalaa, m dàá cáá-i kusaau kí m̄akań-i kí kp̄èè.'
- ²⁰Ní ubò mun t̄i b́ yii: 'M dáá péēcāá unimpucan dee, an puee maa làá ḡmā kí dāań.'
- ²¹Ní utòntònl̄ee ḡit̄in ki t̄ukū u-kp̄iliu binibee n̄n k̄í-u puee. Niinee ní ukpil f̄òò diḡuul ní ki b́-u yii: 'N̄n cá malaa kitiḡin sampaambi pu n̄ adan pu kí cáań bisoodambi n̄ bideembi n̄ bijòfub n̄ bifaliḡfaambi!'
- ²²An k̄ut̄i f̄iiyee, ní utòntònl̄ee ḡit̄in ki b́ yii: 'A n̄n b́ yii m̄ ḡá puee, m ḡá mín, binib tikpil d̄om̄in ama mpaan dáá gb̄nt̄i b́.'
- ²³Ní ukpil b́-u yii: 'N̄n cá isaasan pu n̄ ikpaabuku, a yaa péēká binib biḡyee á páb-bi b́ dāań an n̄n dàá ḡá pu m-diiku n̄ gb̄ee.
- ²⁴Ibaam̄on ní m s̄òh n̄ ni, bin kòkò m bàà péé péé ki yíínee, bàà ubò kaa làá dáká m-jinti nee.' “
- ²⁵Dinikitikpaandi n̄ Yeesu n̄n táá ki c̄om̄ nsanee, ní Yeesu fàtì ki b́-bi yii:

26“Un yaa dómiín man cee ki là kí kpántí m-boonnooliuee see ú nīn nēeń man ki jítìń u-baa nì u-na nì u-nimpuu nì u-biyaamu nì u-nabiyaamu, ní kí nīn nēeń man ki jítìń ùń u-ba.

27Sii un yaa kaa yǒon a-dǒpuntikaanju ki túń kí nīn nǒó-mee kaa ŋūń kí nīn sá man-boonnooliu.

28Ni-kansikin ŋma di yaa làá mā kudikpaaŋju, waa kàal kí cǒtí kunimiŋmiiu kí bée animil ŋin u cááyee yaa bà ú mā an diiku?

29An yaa sá fam, u cǒontí kudii ní kí dūú gbèeń, kaa ti ŋūń kí púntí, ní bin kǒkǒ jítí ki wāl-kuee kíń ki bēeĹ-u yii:

30'Kpèè kijapaaí nee bàà kíł ki bī māā kudii dee ní ŋŋmam kaa ti bí-u ú púntí.'

31'Àá, uboti ulou di yaa làá cùú jáń u-botijuti waa kàal kí kpèè yii u-nib kutukub saalaa yaa ŋūń kí cùú jáń uboti un dǒon kí jáń-u nì binib kutukub mmuŋkuee?

32U yaa kpēēyii waa làá ŋmēe, ŋyunti ŋun uboti un béeyee dáá bín ndan ki dǒonee ní ú tǒ binib n cù kí gbàam-u yii: 'A là m ná mana ní ŋgbansŋfi n dāāń ti-kansikin ní?' "

33Ní Yeesu gítí tí lī yii: “Mín mbaantiim ní ni-kansikin un yaa là kí nīn sá man boonnooliuee see ú fá tin kǒkǒ u cááyee.”

34“Dyaam sá tiwammontiil ní, ama ŋyaam yaa kpíyee, mana ní bi dàá ná ní mí fātí mǒkì?

35Maa ŋāń bí dūú bíł kitiŋ án tī ntiŋkpamaaan kaa ŋāń bí dūú bíł tiwambolkaal taapu án lǒon mun, see bí dūú fá ditampundi pu. Un yaa cáá ditafalee n pīłfi.”

Luuki 15

1Bifotiliibi nì binikpitib^{fe} bin kó kínee nìn sútìń ki pīł Yeesu kí pīłfi tin u sǒonee.

2An yānti Fariisab nì bimaradakaliibi bī gbùkuṁ, yii: “Kijapaaí nee fòol binikpitib, u nì bi jīń tijin.”

3Ní Yeesu dū tiboti nee ki ŋmāntiń yii:

4“Ni-kansikin ubo yaa cáá ipii dilaataal, ní ubo yaa wánkèe, waa dù ubo kpá dilaataalee kí yóon kupikpaapǒun kí cùú nyàabín un wánkèe ali kí tin kánńi-uaaa?

5U yaa kánńi-uee niinee an móokín-u ní ú dū-u kí bùkuńńí.

6U nín bāāń mmŋkee, ní ú yíín u-bǒobi nì u-kŋkŋnaatǒb kí bí-bi yii: 'Fàal kí tūtummaan-mi, kun puee m fātii ká m-piiu un nìn wánkèe.'

7Ibaamŋ ní m tükù-ni, mín mbaantiim ní unibaanti un fá u-kpitiyee puee dipǒopiŋkpaandi bí yilpu ki jítìń deedeedambi ubo kpá dilaataal bin an kaa ti bàłfi bí kpántí bi-bimbimee.”

8“Àá unimpu ubo di yaa cáá jitǒmbi^{ff} saalaa bin sá-u tipijatee ní ubo yaa wánkì, waa tūtí fitila kudiin kí ñatí kí nyàab tiŋan ali kí tin ká u-nimiliŋee?

- ⁹U yaa kée ní ú yíín u-bòobi nì u-kòṅkòṅnaatòb, yii: 'Fàal kí tūtuṅmaan-mi, kun puee m-nimiliṅ ṅin nìn wáṅkèe, m fātii ká-ṅi.'
- ¹⁰Ibaamòn ní m tükù-nì, mìn mbaantiim Unimbòti mun nì u-tūuni bí dipòòpìṅkpaandin un fá u-kpitiyee pu.”
- ¹¹Ní Yeesu fātii tí bí-bi yii: “Ukpil ubò di bí ní ki cáá jipòmbi bili.
- ¹²Ní kiwaayee bí u-baa yii: 'M-baa, tī-mi tiwan tin a yaa láā kpíi m dàá jēe kòṅkòṅnee.' Ní u-baa lafun tī biliitil, báà ṅma nì u-wanti.
- ¹³Iwiṅkaaṅkaa boonee, ní kiwaayee dū u-jandi din bi tī-uee ki nyáfì ní ki fṛṛ animil, ní ki yíkì buntì ndandati kitiṅ kiban, ní ki bí niin ki jīn u-nimiliṅ pùsìpusi.
- ¹⁴U jín u-nimiliṅ ki dóòyee, ní ṅkùm miba nyán kitiṅ gbanti poon ki pṛṛ tikpil, niinee disool kíṅ ki cáá-u.
- ¹⁵Ní u cūti ki nyàab kitiṅ gbanti niliu ubò cee ditundi ní ùn dū-u ki tó kusaau difakpaal.
- ¹⁶Ní u bàà nìn là kí nīn jīn afab jinti, ní báà ubò kaa tì-u.
- ¹⁷Niinee ní u kíí ki bí dākafì tin poon ní u kóee, ní ki bí yii: 'M-baa tòntòṅliibi tikpil bí mmòṅki ki bíntí tìjin pu, ní man dāa bí doo ki kúu ṅkùm nee.
- ¹⁸M dàá yíkì kí fātì m-baa cee. M yaa bànee, m bí-u yii: M-baa, m yīntiṅ Unimbòti ki yīntiṅ si mun,
- ¹⁹maa ti máaṅ á yíín-mi a-biki. Dū-mi kí ṅá kii a-tòntòṅliu ubòee.’
- ²⁰U dākafì mìn ki dóòyee ní ki yíkì ki kiliṅ nsan ki nín dòoṅ u-baa cee. “U-baa ká u páaṅṅee, ní an cúú-u falaa, ní u sàṅ ki túṅkì-u ní ki ṅá-u aatúuè.
- ²¹Ní u bí u-baa yii: 'M yīntiṅ Unimbòti ki yīntiṅ si mun, maa ti máaṅ á yíín-mi a-biki.’
- ²²Ama ní u-baa bí u-tòntòṅliibi yii: 'Cáaṅmaan dibòkutil din ṅān tikpilee malaa malaa kí pèēmmaan-u, kí cáaṅ kibòmbiki kí fúuṅ u-ṅambiki, kí cáaṅ anaataka kí tákámaan-u,
- ²³kí cúúmaan dinajapòmbil din cáá ṅkpamee kí kpò tí jī kí fàal.
- ²⁴Kun puee m-biki nee ṅman nìn kpíi ní ki fātii fikiti, kì nìn wáṅkì ní m fātii ká-kì.' Ní bi kíí ki bí jīn jīṅaal.
- ²⁵“Dyuntèe u-jipòṅkpiliu dáá bíṅ kusaau. U kunní ki tóobiṅ mmòṅkee, ki gbīl agbiil nì diṅool tūm mmòṅki.
- ²⁶Ní u yíín bitòntòṅliibi ubò ki bālfì-u yii: 'Ba ṅá mmòṅki doo ní?’
- ²⁷Ní utòntòṅlee kíí-u yii: 'A-naal di fātii gítín, ní a-baa kūu dinajapòmbil din cáá ṅkpamee, kun puee u fātii ká-u nì alaafiya.’
- ²⁸Niinee, u-jipòṅkpilee fṛṛ diṅuul ní ki yíi kaa là kí kó kudiin. Ní u-baa nyánní ki sòkòl-u ú kóoṅ.

²⁹Ní u fātii bí u-baa yii: 'M-baa, kpèè abin kupaau sèè m nín k̄a ki ḡaañ ditundi ki t̄i-see, maa ȳi a-tundi d̄iba yii maa làá ḡá kí t̄i-si, ama a mun kaa t̄i-mi dalba kiḡobiki yii man n̄i m-boobi n̄ j̄i jiḡaal.

³⁰Ama un sá a-bikee, fātii b̄aañee, ùn un ȳoñ a-gaajawanti u n̄i nnimpulakpaamu jínee, ùn ní a cúú unajapoon un cáá ḡkpamee ki k̄ū!' "

³¹Ní u-baa bí-u yii: 'M-biki, sii péebí m-cee doo ní baabadal, tin k̄ok̄o m cááyee, sii di ȳi.

³²Ama an máaḡn tí j̄i jiḡaal kí f̄aal, kun puee a-naal un ḡman n̄n kp̄iyyee fātii fikiti, u n̄n w̄aḡk̄i ní m fātii ká-u.' "

Luuki 16

¹Yeesu ḡit̄i k̄ut̄i ki l̄i u-boonooliibi yii: "Ugaaja ubo di bí ní ki cáá ut̄ont̄onli un kpèè u-wanti k̄ok̄oee, ní bi t̄uk̄ū-u yii ut̄ont̄onlee cáá u-wanti ki biil̄.

²Ní u ȳiñ-u, ní ki bí-u yii: 'An kaa móok̄iñ-mi m nín gb̄il̄ tin a ḡaañee. Dá ak̄ontaa kí t̄i-mi kí t̄uk̄ū-mi a nín t̄ún ditundi ki ḡiñ puee, kun puee aa làá n̄n ḡit̄i kpèè m-wanti.'

³Ní ut̄ont̄onlee b̄alfi u-ba yii 'M-kpiliu dàá j̄a-mi dee, m dàá ḡá mana dee? M̄ cúú n̄n k̄ù tikpaalaaa? Maa cáá mp̄on kí kp̄ò. M̄ cúú n̄n mèéee? An cáá-mi icoo!

⁴M b̄èè m nín dàá ḡá pu ní bi yaa j̄iñ-mee, binib n̄ f̄õ-mi bi-dumpuiyee.'

⁵Niinee ní u ȳiñ bin k̄ok̄o cáá u-kpiliu ap̄oonee ubo ubo, ní ki b̄alfi upeepeekaa yii: 'Mana ní a cáá m-kpiliu dip̄ondi ní?'

⁶Ní u bí-u yii 'D̄kpam aḡk̄orab dilaataal.' Ní u fātii bí yii: 'A-p̄ondi takaldau s̄èé, f̄õ kí k̄al̄ kí ḡmà malaa yii a cáá dip̄ondi aḡk̄orab ili n̄i saalaa.'

⁷Ní u bí un kínee yii: 'Sii faa, a-p̄ondi sá mana?' Ní ùn bí yii: 'Idi kutukub dilaataal,' ní u bi yii: 'A-p̄ondi takaldau s̄èé, f̄õ kí ḡmà idi kutukub imuḡku inaa.'

⁸Ut̄ont̄onkp̄itee kpiliu nín gb̄il̄ tin u ḡée, ní u p̄ak̄ā-u u nín ȳáb ki ḡá miḡyee: di sá yii bin kaa sá Unimb̄oti nibe w̄alfi bi-jutiibi b̄oti pu ki j̄itiñ bin sá u-yabee."

⁹Ní Yeesu l̄i yii: "Man t̄uk̄ū nimbi yii: N̄iñ cáámaan ni-gaajati ki ḡaañ min fáati Unimb̄otee an nín dàá ḡá pu, t̄i yaa láā k̄unt̄i ni-ceeyee, Unimb̄oti n̄ f̄õ-ni kí k̄aañ ikoḡkoon in bí jaanjaanee nee.

¹⁰Un ḡúb tiwan f̄iñ n̄i deedeeyee tí ḡúb tiwaḡkpaandi mun deedeé ní. Un kaa ḡúb tiwan f̄iñ n̄i deedeeyee kaa tí ḡúb tiwaḡkpaandi mun n̄i deedeé.

¹¹Ni yaa kaa ḡūñ kí ḡúb duulnya gaajati tin kaa sá tim̄ontiilee Unimb̄oti kaa d̄ā dù u-gaajam̄ontiiti kí ḡubiñ-ni.

¹²Tin tin sá ubo wantee, ni yaa kaa ḡúb-t̄i n̄i deedeeyee, Unimb̄oti kaa t̄i ni mun tin sá ni-yatee.

13“Utontɔnli ubɔ kaa ŋūn kɪ n̄n bɪ bikpilib bili cee. See ú n̄n ná ubɔ kɪ n̄n néén un kínee, kɪ dū u-ba kɪ t̄i ubɔ, kɪ n̄n kpèé un kínee fam. Naa ŋūn kɪ kpāfi Unimbɔti n̄ animil kɪ n̄ó.”

14Fariisab n̄n gb̄l̄ an bɔtee n̄i bi b̄i b̄eēl̄ Yeesu kun puee b̄n̄ néén animil.

15Ní Yeesu b̄i-bi yii: “Ní là binib n̄ n̄n wāl-ni yii ni sá deededambi, ama Unimbɔti wāl ni-pɔbilih poon; ní tin binib kpèé yii tiŋaŋkpaandee t̄n̄ ní Unimbɔti wāl yii an sá tikpitikpaandi.

16“Mooisi marab n̄n Unimbɔti b̄naatiliibi n̄n sòon tiŋyee n̄n b̄i ki dāa s̄ā Jaan un f̄uul̄ binib Unimbɔti nyimee yuntiŋu. Dyunti ŋun Jaan b̄āanee ní binib gb̄l̄ Unimbɔti beel b̄oti, ní b̄āa ŋma kí n̄ ki b̄i mò kɪ kó Unimbɔti beelin.

17An p̄ofi ki t̄i kutagbɔŋu n̄n kitiŋ n̄ j̄t̄i n̄n marab ŋmaŋmabiku kubɔ n̄ kp̄t̄i.

18“Un kamaa yaa j̄n̄ u-nimpuu ní ki f̄at̄i cáá upɔonee, udaan ŋá tilaakpaal Unimbɔti nimiin, ní un cáá unimpu un u-cal j̄nee mun ŋá tilaakpaal Unimbɔti nimiin.”

19Ní Yeesu b̄i yii: “Ugaaja ubɔ di n̄n b̄i ki p̄ent̄i abɔkutinyaan ŋin p̄ōō kudaau tikpilee ní ki p̄ēb̄i ki j̄n̄ j̄ŋaal mm̄nt̄iimin baabadal.

20Usodaan ubɔ n̄n b̄i bi ȳi-u Laasaar, u n̄n d̄o ugaajee punyɔkɔpu ibunsoon p̄ín u-wunti pu.

21U bàà là kɪ n̄n tòó ugaajee n̄n j̄n̄ tin gb̄at̄i ki lít̄i kitiŋee kɪ kp̄īn̄ u-ba, ní iboo mun ḡit̄i d̄oón ki línt̄i u-buuni.

22Usodaanee dūu kp̄ī, ní Unimbɔti t̄uuni d̄ómīn̄ ki ȳōn̄-u ki cáā n̄n j̄óm̄ yilpu ki k̄ān̄ Abraam cee. Ní ugaajee mun dāa dūu kp̄ī, ní bi síb-u.

23U b̄ān̄ ditaŋkpiilinee ki b̄i j̄n̄ falaakpaan. U b̄i falaa poonee ki w̄ān̄ ki kp̄ēyee ki ká Abraam ndan, Laasaar k̄ā u-cee.

24Niinee ní u t̄één mp̄on̄ yii: 'Ti-baa Abraam, s̄ō m-saai kɪ p̄ēt̄ōn̄ Laasaar n̄ dū u-ŋambiki kɪ s̄ēn̄nyim kɪ cáān̄ kɪ mèel̄ m-limbil, kun puee m b̄i j̄n̄ falaa ŋmi nee poon tikpil.'

25Ní Abraam k̄ī-u yii: 'M-biki, t̄ét̄i yii a n̄n n̄n b̄i duulnyanee, a n̄n j̄ín̄ mm̄on̄, ní Laasaar ùn̄ n̄n j̄ín̄ falaa. K̄ōŋk̄on̄nee ú mun b̄i f̄oól̄ u-m̄ŋŋu dee, ní si mun b̄i falaan.

26Ali gba mbookpaan ŋubɔ di p̄it̄i timbi n̄n nimbi kansikin; bin yaa bàà là kɪ nyānn̄i timbi cee kɪ cù nimbi ceeyee n̄ taa ŋmāan, bin mun yaa bàà là kɪ nyānn̄i nimbi ceen kɪ dāān̄ timbi cee dooyee mun n̄ taa ŋmā.'

27Ní ugaajee b̄i yii: 'Mimmee, m gb̄āām-si, á t̄ō Laasaar m-baa dumpu,

28kun puee m cáā nnabiyaamu muŋmoo, ú cù kɪ kp̄āfi-bi b̄n̄ n̄ taa dāān̄ nnaabu ŋun poon man b̄i nee n̄.'

29Ní Abraam k̄ī-u yii: 'Bi cáā tin Mooisi n̄n Unimbɔti b̄naatiliibi ŋmānee, b̄i n̄ó t̄n̄.'

³⁰Ní ugaajee bí yii: 'Aayee, m-baa Abraam, ubo di yaa bàà fikiti bitaŋkpiibi kansikin ki cùtèe, bi bàà kpántí bi-bimbim.'

³¹Ní Abraam fātii bí-u yii: 'Bi yaa kaa làá nós Mooisi nì Unimbōti bōnaatiliibi nín ŋmān tiŋyee, bàà ubo yaa nyán bitaŋkpiibi kansikin ki fikiti ki sòon nì bi, baa làá fōō udaan bōti kí kíí.' ”

Luuki 17

¹Ní Yeesu tí bí u-boonnooliibi yii: “Kun dàá nīn yàntī binib n̄ nīn ŋáań ikpítee dàá nīn péébi ní. Ama mbusu dō ki cí un pu ní an dàá dīnee.

²Bi yaa bàà dū ŋmii ki kúl kutaŋkpanaau ki dūu léen u-neen, ki cáá-u ki tó tiŋkun, an bàà só nì ú yàntī ŋwaamu nee kiba n̄ líti ikpitin.

³Ní nīn nyín ni-ba tiŋan! “A-nabiki yaa ŋá ikpítee, á wòon-u ú taa ti ŋá mín. U yaa bí yii u-bōti kpíyee, dūu pō-u.

⁴U yaa yīntiñ-si ali miluli ŋwimbaanti ní ki dómín miluli gbantee ki tükù-si yii: 'M-bōti kpíyee,' dūu pō-u.”

⁵Ní Yeesu kpambaliŋ bí-u yii: “Ti-Dindaan, kūtī-ti fookii.”

⁶Ní ti-Dindaan kí-bi yii: “Ni yaa bàà cáamaan fookii ní báa u yaa bí fiii kii dijōnjōmbilee, ni bàà ŋūn kí tükù busubu nee yii: 'Á kpikitī laakin a yú nee kí cùu còon tiŋku poon,' ní bú ŋá ni nín lī puee.”

⁷“Ni-kansikin ubo yaa cáá utōntōnli, u gbāā ki kù-u tikpaal áa u kpàá-u tiwaŋkuti, ní utōntōnlee yaa nyánni kusaau ki bāanee, u kíiki kí tükù-u yii: 'Dāān malaa kí dāá nīn jīn tijinaaan!’

⁸See ú tükù-u yii: 'Dá-mi tijin, kí kpántí a-bokutil kí yòon tijin kí cáan-mi. Man yaa jín ki nyūnee, si mun n̄ nín jī a-yati.’

⁹Aa cáá ijaam kí jāam a-tōntōnliu u nín ŋá ditundi din a tī-uee pu.

¹⁰Mín mbaantiim ní an sá ni mun cee: ni yaa ŋá tin Unimbōti bí ní ŋee kōkō ki dōyee, līmaan yii: 'Timbi sá bitōntōnliibi bin kaa bí tibanee ní, ti-tundi din ti máan kí ŋee ní ti ŋá nee.' “

¹¹Yeesu nín n̄n cōm̄ ki cá Jeerusaleemee u n̄n jíti Samarii n̄ Gaaliilee kansikin ní.

¹²U dàá kó kitimbilii kibanee ní binyaŋgbantiibi saalaa tūŋkiñ-u ki dómín ki yú kudandaŋu,

¹³ní ki káan yii: “Ukpil Yeesu, sō ti-saai!”

¹⁴Yeesu ká-bee ní ki bí yii: “Cáamaan ni-ba kí dākà bisaraaŋaliibi.” Nyunti ŋun bi cée, ní bi pókì.

¹⁵Bi-kansikin ubo nín dáan ki ká yii u pókèe, ní u gbēen niin ki fāti u-taani pu ní ki nín gitiñ ki sòon mpon ki pākà Unimbōti,

- 16 ní ki dómiń ki líti Yeesu nimiin dicincibil ki jáam-u, kijapaayee nńn sá usamariija ní.
- 17 Ní Yeesu bí yii: “M cáan binib saalaa ní, kin biwa bin kínee bí la?”
- 18 Mimmee báa ubo kaa dākafi kí gítin kí nyōŋkì Unimbōti see unicaan nee babaaa?”
- 19 Ní Yeesu bí-u yii: “Yīkì kí nńn cá, a-fookiiu di fī-si.”
- 20 Fariisab bālfī Yeesu yii: “Dyunti ŋulōŋu ní Unimbōti beel dàa bàn ní?” Ní Yeesu kí-bi yii: “Unimbōti beel kaa dōon yèè bí ká-dì.
- 21 Baa dāa lì yii: Kpèèmaan di bí dooyaaa, di bín lapu doo, ama ní béé yii Unimbōti beel kíń ki bí ni-kansikin doo.”
- 22 Ní u bí u-boonnooliibi yii: “Dyunti ŋubo dōon ni dāa nyàab man Kinibiki wiini nee ŋubo, kaa làá ká.
- 23 Bi dāa tükù-ni yii: 'U bí doo ní!' 'Aayee, u bí lapu ní!' Taa sān kí cùmaan laaaba.
- 24 Man Kinibiki dāantam wiinŋu dal dāa sá kii utaa nín ŋmóò ki ŋmíntí pu kí kíliń kutagboŋu killanŋki kí nńn cá ku-kuntilanŋee ní.
- 25 Ama kí wàatī míń n nín bànee, see m jī falaa tikpil, waanee nib n dū-mi kí fá.
- 26 Tin nńn jíti Noowee yuntiŋuee, tńn tibaantiil di dàa dāa ŋá man Kinibiki mun wiinŋu dal.
- 27 Binib nńn jńn, ki nyù, bininjab cāab binimpoobi ní binimpoobi món ticati ali ki tin sāa ŋyunti ŋun Noowee dāa kó buŋalimbunee, ní nnyiŋbeen dómiń ki kúnti bi-koko pílpil.
- 28 “An dàa dāa péētí ŋá kii Lōoti yuntiŋuee ní: binib nńn jńn, ki nyù, ní bin dāāyee dāā, ní bin nyáfée nyáfí, ní bin kù tikpaalee bí ki kù, ní bidimaliibi bí ki māā.
- 29 Ama daliŋkin Lōoti yíkì Soodomee, ní farwata nì ŋŋmi nyánní yilpu kii utaayee ki nńn kitiŋ pu ní ki wùń ki kúnti bi-koko pílpil.
- 30 “Daliŋkin man Kinibiki yaa láā páañnee, min dàa dāa ŋée dee.
- 31 Yaadal wiinŋuee, un yaa láā bí dicindee^fg^ n taa lì yii u dàa kpákatí kí kó kudii poon kí yòon u-wanti tiba, míń ní un bí kusaauee mun n taa fātín mmōŋkì.
- 32 Téetímaan Lōoti nimpuu un nńn fātii kpēēboon ki kpánti diyatanŋpalee bōti.
- 33 Un là kí fī u-manŋfalee dàa fá-dì. Ama un yaa làá fá u-manŋfalee dàa kpāafi-dì.
- 34 Ibaamōn ní m tükù-ni, an nyeekuee, binib bili dāa dō kilambaŋ pu ní án yòon ubo kí yánti un kínee.
- 35 Binimpoobi bili dāa gbāā ki nà kunabaantiiu pu ní án yòon ubo kí yánti un kínee.
- [36 Bininjab bili dāa gbāā kusaaui ki kù, ní án yòon ubo kí yánti un kínee.”]
- 37 Ní u-boonnooliibi bālfī-u yii: “Ukpil, la ní míń dàa dāa ŋée.” Ní Yeesu kí-bi yii: “Laakin diwanŋkil yaa dōee, niin ní kaajiikub kpáfí.”

Luuki 18

- ¹Ní Yeesu tükū-bi tibəŋmantikaal nee kí dākà yii an máaṅ bí nīn péēmèé kí taa gbèēn,
- ²u bí yii: “Ubəsoonli ubə di nīn bí kitij kiban, kaa fāŋkí Unimbətaa kaa tó unil mun.
- ³Kitij gbanti poonee unimpukpiipu ubə nīn bí ki dōon ubəsoonlee cee múlmul ki bí-u yii: ‘M-nannanliu ḡá-mi tibəti, pò m-bəti kí tī-mi.’
- ⁴Ní ubəsoonlee tafal kpá, an tin yúntì, boonee ní u dāa bí u-ba yii: ‘Nì min kəkə maa fāŋkí Unimbəti, kaa tó unilee,
- ⁵ukpiipu nee nīn dōon ki páb-mi pu nee, m dàá sòon bi-bəti nee kí tī-u. An yaa sá fam, u dàá nīn péədōon ki páb-mi yéè ní kí dāá tīl m-fām.’ “
- ⁶Ní ti-Dindaan ḡítī bí yii: “Pīlfimaan ubəsooŋkpíteē nīn lī puee.
- ⁷Mīn ní Unimbəti dàá sòon kí pò bin u lútì bi tíminsí-u ḡwīn pu nì kunyeeuee, waa làá yàntī-bi, u dàá tūtuṅ-bi malaa.
- ⁸Ibaaməṅ ní m tükù-ni, see ú sòon kí pò bi-bəti. Ama, man Kinibiki yaa láā fātii ḡítínee, m dàá ká bin fǒǒ-mi ki kíiyee wīkí kitij puəə?”
- ⁹Yeesu ḡítī lī tibəŋmantikaal nee bin nīn lì yii bīn bí deedeē Unimbəti nimiin nì bi-ba nyítam ki kpèé ki sīnkīn bin kíneeyee,
- ¹⁰yii: “Binib bili di nīn cūti Kunimbətidiin kí mèè, ubə nīn sá Fariisa ní un kínee sá ufətil.
- ¹¹Fariisee nīn yú ki mèé u-ban, yii: ‘Oo Unimbəti, m jáam-si man nīn kaa bí kii bin kínee nīn bí pu ki sá binaayub, binikpitib, bilaakpaadambee, m jáam-si man nīn kaa bí kii ufətil un bí neeyee.
- ¹²M bǒob kinyəkə mili kinyəŋ poon, ní m-wanti tin kəkə m kāntée, m lèekī saalaa sá kamaa puee kubə kubə ki tū-si.’
- ¹³Ní ufətílee, ún yún kudanḡaŋu, kaa là kí wáaṅ u-yil yilpu gba, ki fátí u-bindi ki yáliŋkí u-kpitii pu ní ki lì yii: ‘Oo Unimbəti, sō m-saai, m sá unikpiti ní!’ “
- ¹⁴Ní Yeesu ḡítī lī yii: “M tükù-ni yii ufətílee fātì u-dumpu, Unimbəti dū u-kpitii ki pú-u, kaa pú un béeyee. Kun puee un sá kamaa yaa yǒontí u-ba yilpuee Unimbəti dàá sīntīn-u taapu, ní un sīntīn u-ba taapuee Unimbəti dàá yòon-u yilpu.”
- ¹⁵Binib nīn cāabīn ki kpáaṅ mbiyaawaamu Yeesu cee ú dū u-ŋal kí páaṅ mu-pu kí mèè kí tī-mu, ní u-boonooliibi nīn mótí ki jì-bi.
- ¹⁶Ní Yeesu yíin-mu, ní ki bí yii: “Yàntīmaan mbiyaawaamu n dāaṅ m-cee, ní taa pīn-mu nsan, kun puee Unimbəti beel sá ki tī bin náaṅ nì muee ní.
- ¹⁷Ibaaməṅ ní m sòon nì ni, un kamaa yaa kaa fǒǒ Unimbəti beel kii kibiyaawaayee kpá kí kó u-beelin.”

- 18**Niinee, Juuda yab kpiliu ubo bālfī Yeesu yii: “Ukpimonti, m daá nǎ mana ní kǎ ká mmanǎfakɔn nɔn kaa cáá dikuntilee ní?”
- 19**Ní Yeesu fātii kǎ-u yii: “Ba pu ní a yíín-mi yii umonti, ubo kaa ti sá umonti see Unimboti baba.
- 20**Kee, sii a-ba nyí Unimboti marabaa? An lī yii: ‘Á taa nǎ tilaakpaal, kǎ taa kpò unil, kǎ taa yò, kǎ taa mōnti kǎ páán ubo pu fam, kǎ nīn tó a-baa nì a-na.’ “
- 21**Ní uninjee fātii kǎ-u yii: “Doooo m-naacimpontin ní m péējúb an marab gbanti.”
- 22**Yeesu gbīl u nín lī puee, ní ki bí-u yii: “Kuwambaantiiu di kíñ-si á nǎ. Nín cá kǎ nyāfi tin kɔkɔ a cááyee kǎ dūú yàkatī bifalaadambi kǎ tin kǎ tiguaajati Unimboti cee; a yaa nǎ mimmee, á dāān kǎ nīn nós-mi.”
- 23**Kijapaayee nín gbīl mimmee, kunimbaau kó-u kun puee u nín cáá tiguaajawan tikpil kaa là kǎ dūú pō.
- 24**Yeesu nín kǎ yii kunimbaau kó-uee, ní u bí yii: “An pōō tikpil ki tī bigaajab bí kó Unimboti beelineeee!
- 25**An pòfi ki tī ugutaamu n jītí ujoo bunɔnun ki jitiñ ugaaja n kó Unimboti beelin.”
- 26**Ní bin nín bīl pǎlfīn-uee bí yii: “Kin, nma di dàá nín kǎ difiil dee?”
- 27**Ní Yeesu kǎ-bi yii: “Tin pōō binib ceeyee, kaa pōō Unimboti cee.”
- 28**Ní Piyeer bí yii: “Kin timbi bin cānti tin ti cááyee ki táá-see faa?”
- 29**Ní Yeesu kǎ-u yii: “M sòon nì ni ibaamɔn ní, un kamaa di yaa fá u-dumpu, u-nimpuu, u-nabiyaamu, u-baa nì u-na, nì u-biyaamu, Unimboti beel puee,
- 30**dàá fōō tipaal tikpil nyunti nɔn ti bí nee poon ní kǎ dāá gītī fōō mmanǎfakɔn nɔn kaa cáá dikuntilee nyunti nɔn dòoñee.”
- 31**Ní Yeesu gānti u-kpambaliɔ saalaa nì alee ní ki bí-bi yii: “Ní pǎlfī tiɔan, Jeerusaleem un ti cá nee tin kɔkɔ Unimboti bōnaatiliibi nín nmanñ ki yóon yii an dàá dāá bān man Kinibiki puee, nyunti bāān ní nee an dàá nǎ mīn.
- 32**Bi dàá cúú-mi kǎ tī bin kaa sá Juuda yabee bí bèel-mi, kǎ sī-mi, kǎ tīl timɔtan kǎ làbiti-mi.
- 33**Bi dàá gbá-mi anaalab kǎ wàatī ní kǎ kpò-mi. Ní iwiin ita dalee n fikiñ.”
- 34**Ama u-kpambaliɔ kaa nín gbīl an kɔkɔ taapu, kaa nyí tin pu ní Yeesu sòon mimmee kun puee tibotee nín dáá bí-bi dibalin.
- 35**Yeesu nín tóobiñ Jeeriikooyee uninjajofu ubo nín kǎ disaɔkaɔkpil ki mée tiwan.
- 36**U gbīl kunipaau jītée, ní u bālfī yii: “Án sá ba ní?”
- 37**Ní bi tükū-u yii: “Yeesu Naasaareeti yóuee di jītí.”
- 38**Niinee ní u téeñ mɔn yii: “Yeesu, Dafidi naantiiu, sō m-saai!”

³⁹Ní bin n̄n l̄i nyòkɔpuee b̄i kpàt̄i u-pu yii ú ñm̄ílee. Ní u m̄òt̄i b̄i k̄aant̄i yii: “Dafiidi naant̄iu s̄o m-saai!”

⁴⁰Ní Yeesu s̄ā ki s̄l̄, ní ki bí yii bí cáañ-u u-cee. U b̄āañee, ní Yeesu b̄ālf̄i-u yii:

⁴¹“A là m̄ ñá-si mana ní?” Ní u bí yii: “Ukpil, m̄ là kí wāl ní.”

⁴²Ní Yeesu bí-u yii: “N̄n̄ k̄in̄ ki wāl! A-fook̄iiu di f̄i-si.”

⁴³Niin niin ní u-nimiliñ cúū ñúbit̄i ní u wāl ní ki k̄in̄ ki táá Yeesu ki nyóñk̄i Unimb̄oti. Kunipaauee k̄ok̄o n̄n ká mimmee, ní bi b̄i p̄akà Unimb̄oti.

Luuki 19

¹Yeesu b̄āñ Jeeriikooyee, ki b̄i c̄oom̄ ki j̄it̄i kitiñin.

²Uninja ub̄o n̄n bí niin, bi ȳi-u Jaasee. U n̄n sá bif̄ot̄iliibi kpiliu ní ki sá ugaaja.

³Kijapaayee bàà péēnyàab̄ kí wāl un ní Yeesu baasii s̄ee, ama u n̄n sá kinigiñgiñee puee waa ñūn̄ kí ká-u kun puee binib n̄n múkú Yeesu pu tikpil.

⁴Ní u s̄ān̄ ki l̄int̄i nyòkɔpu ki c̄ūt̄i j̄om̄ busubu pu kí wāl Yeesu, kun puee Yeesu dàà j̄it̄i niin ní.

⁵Yeesu d̄ū b̄āñ niinee, ní ki w̄āñ yilpu ní ki bí-u yii: “Jaasee, kpákatiñ malaa, kun puee sii dumpu ní m̄ dàà kó d̄in̄.”

⁶Ní Jaasee ñá malaa malaa ki kpákatiñ ní ki f̄ōō Yeesu ki c̄ūnn̄i u-dumpu n̄ dip̄ōp̄indi.

⁷Bin n̄n bí niin ki ká mimmee n̄n b̄i gb̄ukūm̄ yii: “Uninja nee c̄ūt̄i ki kó unikpiti dumpu dee.”

⁸Ní Jaasee s̄l̄ ti-Dindaan n̄miin̄ ní ki bí yii: “Ti-Dindaan, kp̄èè, m̄ dàà l̄ēem-gaajati dijandi kí t̄i bisoodambi, ní m̄ yaa n̄n m̄ūl̄ ub̄o ki f̄ōō animil u-cee, m̄ dàà t̄eeñ-u min m̄ m̄ūl̄-uee minaa pu.”

⁹Ní Yeesu bí-u yii: “Difiil k̄onn̄i kudii nee poon d̄in̄, kun puee uninja nee mun sá Abraam maaliñun ní.

¹⁰Di sá yii man Kinibiki d̄omiñ̄ kí nyàab̄ kí f̄i bin n̄n w̄āñk̄ee ní.”

¹¹Ní Yeesu ḡit̄i k̄ūt̄i tib̄oñmantikaal nee ki l̄i bin n̄n bí ki p̄ilf̄in̄-uee, kun puee bi n̄n d̄akaf̄i yii, u n̄n t̄oób̄ Jeerusaleem nee, Unimb̄oti dàà d̄ū-u kí k̄āñ dibeel k̄oñk̄onnee dee.

¹²Ní u l̄i yii “Uninja ub̄o di sá ub̄oti maaliñun, ní ki ȳiki ki búnt̄i kitiñ kiba poon ndandati kí c̄u kí f̄ōon̄ dibeel, kí ḡitiñ u-tiñki pu kí dàà k̄āl̄ tib̄otiil.

¹³Kí w̄at̄i ú n̄n ȳik̄èè, u ȳiñ̄ u-t̄ont̄onliibi kansikinee saalaa ní ki t̄i bi-k̄ok̄o kinimif̄oñ kiba kiba bí n̄n b̄ant̄i ú d̄āñ.

- 14 Ama ní u-tiŋkin nib kaa là u-boti. U yíkì kpalaayee, ní bi tú binib u-boon bí cùú tükù-u yii bíñ kaa là kijapaai gbanti ñ n̄n sá bi-boti.
- 15 “U nín cūti bi k̄aani-u dibeel u f̄atiínee ní u yíiñ u-tontonliibi saalaa bin u n̄n t̄i animil bí n̄n cáā b̄antēe kí kpèè yii bi b̄anti ki ká mana.
- 16 Ní upeepeekaa dómiñ ki bí yii: 'Ukpil, a nín t̄i-mi animil m̄ b̄antēe, m b̄anti ki ká m̄n saalaa mun ki kúti.'
- 17 Ní u-kpiliu bí yii: 'Mboo, a sá utontommonti, kun puee m t̄i-si tiwan fiii ní a ñúb-ti n̄i deedee, an puee m k̄aani-si á n̄n sá n̄timu saalaa botiu.'
- 18 Ní uliliiti mun b̄aani ní ki bí yii: 'A nín t̄i-mi animil ñiñyee, m b̄anti ki ká m̄n miñmoo pu ki kúti.'
- 19 Ní ukpilee bí yii: 'Si mun ñ n̄n sá n̄timu muñmoo botiu.'
- 20 Ní ubo mun b̄aani, ní ki bí yii: 'Ukpil, kpèè, a-nimiliñ sèé, m dūu kúl kiñaabikin ki yóon-si.
- 21 M f̄aŋki-si, kun puee a sá unil un boti p̄ōyee, kun saa yóonee kún ní a yòontí, ní ki cēekun saa búlee.'
- 22 Ní ubotee bí-u yii: 'Utontonkpiti ní a sá. Tin tin a sòonee t̄in ní m dàá giñ k̄i kpò a-boti. A nyí m sá unil un boti p̄ōyee, ní kun maa síínee ní m yòontí, ní ki cēekun kun maa búlee,
- 23 kin, ba pu ní aa cáá m-nimiliñ kí ñá baŋkan, m yaa láā f̄atií gitiínee, m̄ bàà f̄ō m-nimiliñ n̄i ipaati?'
- 24 Ní u bí bin bí niinee yii: 'F̄ōmaani animil u-cee kí dūu kūti un cáá saalaayee.'
- 25 Ní bíñ bí yii: 'Ukpil, u cáá saalaayaa!'
- 26 Ní u kíí-bi yii: 'M tükù-ni yii, un kamaa yaa ñúb tin u cááyee tiñanee, bi dāa kúti-u ní. Ama un kamaa yaa kaa ñúb tin u cááyee tiñanee ní bí dāá f̄ō fiii un u cááyee.
- 27 An yaa kíñ m-nannanliibi bin bí yii baa là m̄ n̄n sá bi-botiuee, cáam̄maani-bi kí kpò-bi m-nimiin doo.' “
- 28 Yeesu sòon̄ m̄n ki dóyee, ní ki l̄inti bin táá-uee nyok̄o pu ki búnti Jeerusaleem.
- 29 U nín tóob Beetifagee n̄i Beetanii, kigbant̄aŋ kin bi yí Ōliifi suffi joollee ceeyee, ní u dū u-boonnooliibi bili ki tú u-nyok̄o pu ki tükū-bi yii:
- 30 “N̄iñ cámaan kitimbilií kin bí ti-nyok̄o pu nee. Ni yaa b̄an̄ ki kó ki-nee, ni dàá ká dimamp̄ombil diba gb̄iñ, din pu b̄aà ubo kaa láá k̄álee, ní gb̄int̄imaan-di kí cáani-mi.
- 31 Ubo yaa b̄alfi-ni yii: 'Ba pu ní ni gb̄int̄i-dee?' ní kíí-u yii: 'Ti-Dindaan di nyàab̄ kimañ.' “
- 32 Bin Yeesu túee búnti ní ki b̄an̄ ki ká kii u nín tükūñ-bi puee deedee.
- 33 Dyunti ñun bi bí gb̄int̄i kimañee ní ki-dindambi b̄alfi-bi yii: “Ba pu ní ni gb̄int̄i-kì?”

³⁴Ní bi kíf-bi yii: “Ti-Dindaan di nyàab kimaṅ.”

³⁵Bi cáan dimampɔmbilee Yeesu cee ní ki pēetì bi-wampeɛkaati ki páan di-pu ní ki yāntì Yeesu kāl.

³⁶Yeesu còom̄ ki cée, ní binib kpátì bi-wampeɛkaati ki bīl nsan pu.

³⁷U bī kpákatì Ōliifi sufii joolee pu ki tóobin̄ Jeerusaleemee, u-boonnooliibi kpáfi dinikitikpaandi an mōn̄-bi tikpil bi fāal̄ ki pàkà Unimbɔti mpɔn maamaacib bin bi n̄n ká Yeesu ṅáañee pu.

³⁸Ní bi lì yii: “Ti-Dindaan ṅ bīn̄ ubɔti un dōon̄ u-yindi puee boon. Unimbɔti tīn̄-ti ṅgbansɔṅfi ní binib bī tì-u tinyool.”

³⁹Fariisab biba n̄n bí kunipaaun, ní ki bí Yeesu yii: “Ukpil, tükù a-boonnooliibi yii bí ṅmīlee.”

⁴⁰Ní Yeesu kíf-bi yii: “M tükù-ni ibaamɔn ní, báa binee yaa ṅmílaaa, atan̄kpee dàá kūuntì.”

⁴¹Yeesu n̄n pīl̄ Jeerusaleem ki wāl̄ kitiṅee ní u bī sūn̄ ki-nib pu,

⁴²ní ki bí yii: “Din̄ wiṅṅu nee ni yaa bàà ṅūn̄ kí bée kun ṅūn̄ kí cáan̄-ni ṅgbansɔṅfee, ama kɔṅkɔnnee an bí-ni dibalin.

⁴³An puee iwiin̄ iba dōon̄ ni-nannanliibi dàá dāan̄ kí bīl̄ atan̄kpuku kí m̄ntī tū ni-tiṅki, ní kí lūtī gón̄-kì kí táká-ni.

⁴⁴Bi dàá kúntí ni n̄ ni-tiṅki kòkò, kí taa kín̄ báa kudigbuṅu, kun puee naa bée ṅyunti ṅun Unimbɔti dómīn̄ kí jòon̄-nee.”

⁴⁵Yeesu bāan̄ Jeerusaleemee, ní ki kó Kunimbɔtidiin, ki kíl̄ ki bī jì biwanyafiliibi,

⁴⁶ní ki tükū-bi yii: “An ṅmān̄ Unimbɔti takaldaun yii: 'M-diiku dàá n̄n sá ṅwimmeem diiku ní, ama ní nimbi dū-ku ki kpántì kunaayudii.' “

⁴⁷Yeesu n̄n k̄n̄ ki bí baabadal Kunimbɔtidiin ki dākà Unimbɔti bɔti, ní bisaraan̄akpil̄ib n̄n bimaradakaliibi n̄n biyidambi bī nyàab̄ bi n̄n dàá dī pu kí kpò-uee,

⁴⁸kaa nyí min̄ ní bi dàá ṅée, kun puee kunipaaun kòkò n̄n bí ki p̄l̄f̄n̄ Yeesu kaa là kí ló u-nyɔɔbundi báa diba.

Luuki 20

¹Dalba, Yeesu bī dākà samaa ki sòon̄ tibɔm̄ontiil̄ Kunimbɔtidiinee, ní bisaraan̄akpil̄ib n̄n bimaradakaliibi n̄n biyidambi c̄l̄n̄ bi-pu,

²ní ki bí-u yii: “N̄n nsan ṅuloṅu pu ní a ṅáan̄ tin̄ bí nee ní? Ōma di pú-si nsan á ṅá m̄n̄?”

³Ní u kíf-bi yii: “Man mun dàá b̄l̄fi-ni tibɔti tiba.

⁴Ní tükù-mi un di túnn̄í Jaan ṅ dāá f̄l̄ binib Unimbɔti nyimee: Unimbɔtaaa, binib?”

- ⁵Niinee ní bi kíí ki bī sòòn bi-ḡmaniḡma, yii: “Ti yaa bí-u yii: 'Unimbōti di túnní-u,' u dàá lì yii: 'Kin, ba ḡá ní naa fḡḡ u-bōti ki kíí?’
- ⁶Ti yaa tí bí-u yii: 'Binib di túnní-u,' kunipaau nee kəkə dàá yāḡki-ti atanḡpee kí kpò, kun puee bàà ḡma nyí ibaamōn yii, Jaan sá Unimbōti bōnaatiliu ní.”
- ⁷Niinee ní bi kíí Yeesu yii: “Taa nyí un di túnní Jaan ú dàá fàl binib Unimbōti nyimee.”
- ⁸Ní u fātii kíí-bi yii: “Man mun kaa làá tükù-ni nì nsan ḡun pu ní m ḡaaḡ mimmee.”
- ⁹Boonee ní Yeesu dū tibōḡmantikaal nee ki bī sòòn nì samaa yii: “Uninja ubō di kùḡ isufi in lòòn abil ḡin bi cáā ḡà ndamamee kpaabu, ní ki dūu ḡúbiḡ bipaadambi, ní ki búntì nsan ki dàá yúntiḡ.
- ¹⁰Isufee biliḡ kītitam bāaḡee, ní u túnní u-tōntōnliu ubō bipaadambee cee ú fḡḡ u-jandi kí cáāḡ-u. Ní bi cúú-u ki gbáḡ ní ki jìḡ-u ki ḡiḡḡ nì iḡaḡkulim.
- ¹¹Ní bukpaadaanee ḡití túnní u-tōntōnliu ubō mun bi-cee ní bi tí cúú ú mun ki gbáḡ ní ki kón-u icoo ní ki jìḡ-u ki ḡiḡḡ nì iḡaḡkulim.
- ¹²Ní u ḡití tú utataati, ní bi cúú-u ki ḡá-u tiweendi ní ki jìḡ-u ki nyántì.
- ¹³Ní bukpaadaan bí yii 'M dàá ḡití ḡá mana? See m dū m-jipōōn un m nēēee kí tḡ. An yaa yí, bi dàá fāḡki ún.’
- ¹⁴Ama bipaadambee nín wál u-jipōōn dòōnee ní bi bī lì tōb yii: 'Kpèè, un dàá dāá jī kusaa fool boonee dee! Tí kpōmaan-u, kusaa ḡ kpánti ti-yōkə.’
- ¹⁵Ní bi cīb ki cúú-u ki cáá-u ki nyántì ḡkpaabuku ní ki kūū-u.” Ní Yeesu bālfī-bi yii: “Kōḡkōnee, bukpaadaan dàá ḡá-bi mana?”
- ¹⁶U dòōn ní kí kpò-bi ní kí dū u-kpaabu kí ḡúbiḡ biba.” Bin pílfee nín gbīl an bōtee, ní bi lī yii: “Mbusu ḡ cù ndan.”
- ¹⁷Ní Yeesu dū u-nimiliḡ ki báaḡ bi-pu, ní ki bālfī-bi yii: “Unimbōti takaldau pōon nín ḡmāḡ puee dàá lì yii ba dee, yii: 'Ditaḡkpal din bidimaliibi nìḡ dūu fee, dīḡ di dāa kpánti ditaḡkpal din ḡúb kudii pōḡḡuee.’
- ¹⁸Un kamaa di yaa líti ditaḡkpal gbanti puee dàá kōfi, ní un pu ní ditaḡkpaalee yaa tābee, udaan dàá nà ní, dúsidusi.”
- ¹⁹Niinee, bimaradakaliibi nì bisaraaḡakpilib bī nyàab isan kí cúú Yeesu, kun puee bi bēe yii bīḡ pu ní u ḡāā dilaḡkpandi gbanti, ama binib nín nìḡ wīkí u-cee puee, bi fāḡki.
- ²⁰Ní bi kíí ki bī cōḡkí Yeesu ní ki nyánti binib biba ki túnní u-cee, bi dū bi-ba ki ḡiḡḡ nnimōntiyaamin kí píl-u tibōti bí ḡmā kí cúú-u kí dūu ḡúbiḡ ḡōmina ḡ dáal u-tafal.
- ²¹Ní binibee bālfī Yeesu yii: “Ukpil, ti nyí yii tin a sōōnee nì tin a dākèe bí deede, bàā unil yaa yānti ki bí miḡyee, aa fātii tó, ní ki dākà nnimbōtisan nì ibaamōn.

22Mín puee, á tükù-ti, ti-marau pú-ti nsan yii tí pà lampoo kí tī Room gōminauaaa an kaa pú?”

23Yeesu bée bi nín bī líbití-uee ní ki bí-bi yii:

24“Cáamman-mi animil.” Bi cáanee, ní u bālfí-bi yii: “Ŋma yindi nì u-yil di kà animil pu na?” Ní bi kíí-u yii: “Gōmina Seesaar.”

25Niinee ní u fātì bí-bi yii: “Dūmaan tin gōmina yèe kí tī gōmina, kí dū Unimbōti mun yati kí tī Unimbōti.”

26Baa ḡún ki ká u sòon dinyɔɔbuŋkpitil diba binib nimiin bí bàà ḡmā kí cúú-u. U nín nín kíí-bi puee, bi bākatì, ní kaa ti ká tiba kí gātì.

27Boonee ní Sadasab biba dómiń, bín di sá dikitil din lì yii difikitil kaa bée, ní ki bālfí Yeesu yii:

28“Ukpil, Mooisi ḡmān mara ki síin-ti yii: 'Unil yaa cáá kinabiki ní u kpî ki yāntì u-nimpuu, kaa màlee, u-nabikee n fōō ukpiipuee kí màal kí téen u-nabiki kin kpîyee yil.’

29Kun pu ti bālfēe di sá, nnabiyaamu mululi di nín bí, upeepeekaa cáá unimpu ní ki kpî ki yāntì u-nimpuu, kaa màl.

30Ní uliiti fōō-u ní ki mun kpî, kaa màl

31ní utataati mun mín. Binib bilulee kòkò cáá-u ki tin tú ki kpî kpî kaa màl mbiyaamu.

32Boonee, unimpuee u-ba mun dāa kpî.

33Mimnee, difikitil dalee, bi-kòkò yaa láā fikitèe, bi-kansikin ḡma di dāa yì unimpuee? Kun puee bín binib bilulee kòkò cáá-u ki ká.”

34Ní Yeesu kíí-bi yii: “Duulnya nee poon ní bininjab cāab binimpoobi, ní binimpoobi mun món bininjab.

35Ama bininjab nì binimpoobi bin Unimbōti ká yii bi máan kí dāá fikitì ditaŋkpiilin kí dāá kàl duulnyapɔon un dòon boonee, dinimpucaal nì dicamondi dāa kpá.

36Baa dāa gítì kùù, ní ki dāa bí kii Unimbōti tūuni nín bí puee, ní ki dāa sá Unimbōti jipombi, kun puee bi fātì fikiti ditaŋkpiilin.

37Mooisi nín ḡmān ki cántì yii bitaŋkpiibi dàá dāá fikitì, laakin u sòon kikuŋkumbiki botee, u nín yíin ti-Dindaan yii: 'Abraam Nimbōtiu, Isaaki Nimbōtiu, Jaakob Nimbōtiu.’

38Unimbōti sá bin wālee Nimbōtiu ní waa sá bitaŋkpiibi Nimbōtiu, kun puee ùn ceeyee bín kòkò kaa kpî.”

39Niinee ní bimaradakaliibi biba bí-u yii: “Ukpil, a nín sòon puee ḡān tikpil.”

40Kun puee baa nín gítì ḡūn kí bālfí-u tiboti tiba kí kpèè u-nyòkɔn.

- ⁴¹Ní Yeesu bí-bi yii: “Nì mana ní ni ñūn kí lì yii Kriisitoo sá Dafiidi naantiuu?”
- ⁴²Dafiidi u-ba lī Soom takaldau poon yii: 'Ti-Dindaan tükū m-Dindaan yii: Kàl m-ṅaṅgiil pú yéè
- ⁴³kí nīn cí ṅyunti ṅun m dàá càntī a-nannanliibi n kpántí a-taaji təkəṅkaatee.’
- ⁴⁴Dafiidi u-ba yī-u u-Dindaan ní: kin mana ní u ṅūn kí nīn sá Dafiidi naantiuu mun?”
- ⁴⁵Yeesu bī sòon kunipaau bī pílfiñ-uee ní u bí u-boonooliibi yii:
- ⁴⁶“Ní nīn nyīn ni-ba nì bimaradakaliibi. Bi nēén ki pèentí abəkutikpaan ki yīn, ki nēén bí nīn jáam-bi sampambi pu, ní ki nēén ki kàal nyəkəpu jaliṅ akpafidiin ni nì diinabin,
- ⁴⁷ní ki fikì bikpiipoobi wanti, ki mèé ṅwimmeem yúntí, kí dākà binib yii bi sá bimontiibi. An puee ditafadaaldi din gítī lákatèe dō ki cí-bi.”

Luuki 21

- ¹Yeesu yáatì ki ká bigaajab nín tòó animil saraa dakaau pu Kunimbətidiinee,
- ²ní u ká ukpiipusoodaan ubə cáan igboo ili ki tó.
- ³Ní u bí yii: “Ibaamən ní m tükù-ni, Unimbəti nimiinee ukpiipusoodaan nee tó ki jítiñ bin kəkə kínee.
- ⁴Di sá yii bin kínee dū bi-nimiliṅ ṅin pá baa làá dūú ṅá nì tibee ní ki tó, ama ukpiipu nee nì u-sool poonee, u nín bàà cáá ṅin kí dā tijin kí jēe ní u cáan kəkə ki dūu tó nee.”
- ⁵Binib biba nīn bī sòon Kunimbətidi nyaanṅku pu, ataṅkpanyaan ṅin bi nīn dūu mán-kuee, nì tiwammontiil tin bi nīn dūu ṅá saraa ki tī Unimbətee. Ní Yeesu bí-bi yii:
- ⁶“Kun ni wāl neeyaa, iwiin iba dōon naa dāa gítī kántí ditaṅkpal diba tókó di-juti pu. An kəkə dàá dāá wī ní.”
- ⁷Bi bālfī Yeesu yii: “ጎyunti ṅuloṅu ní tin a sòonee dàá bàn? Kudaanṅu kuləkə di dàá dākà yii an tóobín?”
- ⁸Ní Yeesu bí yii: “Ní nīn nyīn ni-ba ubə n taa ṅmàtiñ-ni, kun puee binib tikpil dàá dāá dū man yindi kí kpántí bi-yaṅ, kí bí yii bīn di sá man, kí tükù-ni yii ṅyunti bāañ. Ama ní taa nók-bi.
- ⁹Ni yaa láā gbīl bi sòon tijáti nì fikilfikil kitiṅ puee, ni-pəbiliṅ n taa bīl. An máan tīn kəkə n bàn kí wàatī. Ní nīn nyí yii duulnya kúntitam kaa dá láá yá.”
- ¹⁰Ní u gítī lī yii: “Kitiṅ kiba yab dāa yíkí ní kí ján kiba yab, ní dibeel diba yab n yīki kí ján diba mun yab.
- ¹¹Ajan tikpil kitiṅ dàá dāá cṅkì ṅkpitim pu, ní bilbil kúm nì ṅkùm dàá dāá nyā atinjan kupaau poon. Tiwan tikpil dàá dāá ṅá kí kón binib tifaandi, ní tidaandi tikpaandi dāa pāantí kutagboṅu pu.

- 12“Kí wàatī tìn kòkò ń bàńee, bi dàá cū̀tì-ni kí sààh-ni, kí cáá-ni ibòsoon akpafidiin ni, kí pìiń-ni sarka; ki dàá cáá-ni bibòtikpaambi nì biyidambi nimiin man pu.
- 13Niin ní ni dāa kāntí mpaan kí sòòh nì bi tin ni nyí man puee.
- 14Mín yaa bāań nee, ní bóntí ni-ba kí taa nīn yálińkí tin ni dàá tin sòòh kí fī ni-bee pu.
- 15Kun puee mama m-ba di dàá dāá tī-ni iciin nì tibòti tin ni dàá sòòh kí líi ni-nannanliibi, baa làá ńmā kí kpákań-nee.
- 16Ni-baabi nì ni-nab, nì ni-nabiyaamu, nì ni nì bin pēēyee, nì ni-bòobi dàá dāá dū-ni kí ńúbiń ni-nannanliibi, ní bíh ń kpò ni-kansikin biba.
- 17Bàa ńma dàá nīn ná-ni ni nín fōō man ki kííyee pu.
- 18Ama, nì mín kòkòee, ni-yikpiliku bàa kubò kaa làá lēēni-yil pu kí wōńkì.
- 19Yū̀lmaan mmòntiimin, mín ní ni ńū̀n kí dàá fī ni-ba.”
- 20“Ni yaa láā ká bijanjaliibi dómín ki mānti ki tú Jeerusaleemee, ní béé yii, ńyunti gbantee, butòbu dàá jàkà-u dee.
- 21An yuntińuee, bin yaa láā bíń Juudee tińkinee ń nīn sán ki dàb ajoon, bin yaa láā bí Jeerusaleem tińkinee ń nīn sán ki nyēē, ní bin yaa láā bíń tisanee ń taa kpinní mmòńki.
- 22An dāa sá ipòntoon wiini ní, kí ńá kii Unimbòti takaldau poon nín ńmāń ki síiń puee.
- 23Ama, falaa dō ki cí bipòdambi nì bimatib iwiin gbanti poon. An dāa sá kunimbaakpaanńu ní kitiń kòkò. Unimbòti ńuul dàá dāá líti inibool nee pu tikpil.
- 24Bi dàá kpò binib tikpil nì njimu, kí cúú tikpil kí cáá cunnì kuyunńu atimbun kòkò, ní bin kaa nyí Unimbòtee ń dāá jī Jeerusaleem kí tāā pùb, kí dāá sāā bi-yuntińu.”
- 25“Ni dàá dāá ká tidaandi ńwiń nì uńmal nì inĩmalbijaa pu. Kitiń puee, atimbun dāa bí ki yálińkí nì ńi-ba, ní tińku nyińgunńi wooku dāa kōntí-bi tifaandi.
- 26Binib yaa dākafī tin bí ki dòòń kitiń puee, an-faantee dàá dāá kpò-bi. Ní ipòn in bí kutaa puee ń dāá cĩńkì.
- 27Nyunti gbantee ní bi dāa kāntí man Kinibiki dòòń ditagbandi pu ki jìl pàlpal nì mpon nì tinyool tikpil.
- 28Tin bí nee yaa láā bíí ńáańee, nimbi ń mòtí yū̀l kí ká kunyannyaau, ni-fiil tóobiń dee.”
- 29Ní Yeesu lī tibòńmantikaal nee yii: “Kpèèmaan fiigi subu nì isufi in kòkò kíńee nín dākà-ti tińyee.
- 30Ni yaa ká i bí túkù tifaapònee, ni béetí yii kuseeu yàkań dee.
- 31Mín mbaantiim, ni yaa láā ká tin kòkò m sòòh nì ni nee bíí jītée, béèmaan yii Unimbòti beel tóobiń dee.

- ³²Ibaamon ní m tükù-ni, nimbi waanee nib kaa làá kpú kí kúntí ní an botee kòkò n bān.
- ³³Kutagbòṅu nì kitiṅ dāa bí kí kúntí, ama man bōti kpá kí kúntí jaanjaan.”
- ³⁴“Ní nīn nyímmaan nì ni-ba kí taa yàntī njinjim nì ndanyoon nì duulnya landòkoi n jī mpaan ni-pòbiling poon. An yaa sá fam, Unimbōti bōsooni wiiṅṅu gbanti dāá dāá túuñ-ni.
- ³⁵Ḑu dāa tòon kii kulaanṅuee kun puee an dāá dāá biin kitiṅ kòkò nì ki-nib pu ní.
- ³⁶Mín puee ní taa nīn gèmmaan, nīn mèemaan múmul, mbusu wiini gbanti yaa láā bāaṅee ní ká mpon kí ṅmátí tikòkò poon, kí ṅmā kí dāá yūl man Kinibiki nimiin.”
- ³⁷Kinyōṅ gbanti poonee, baabadalee, Yeesu nìn dākà Unimbōti bōti Kunimbōtidiin, ní kunyeeuee ú cù kitimbilii kin bí dijool din bi yī Oliifi sufii joolee pu kí dōon.
- ³⁸Ní samaa kòkò nìn kintiñ-u kutaafaau pòlpòl Kunimbōtidiin kí pīlfi tin u sòoṅee.

Luuki 22

- ¹Jiṅaal un bi ṅmòḍò kpònòb bin baa ṅāān ṅkpònònyòkò bi yī-u Paakee nìn tóobiñ.
- ²Ní bisaraanṅakpilib nì bimaradakaliibi nìn bī nyàab n̄san kí cúú Yeesu, ama ní ki fāṅkí kunipaau.
- ³Niinee ní Sitaan dómiñ ki kó Juudasi un bi yī Iskaariyotee ni; u nìn sá Yeesu kpambaliṅ saalaa nì alee kansikin diba ní.
- ⁴Ní Juudasi cūti ki ká bisaraanṅakpilib nì soojab bin cí Kunimbōtidiyee kpilib, ki sòon nì bi min ní u dāá ṅá kí nyàab n̄san ṅun u dāá dī kí cúú Yeesu kí ṅubiñ-bee.
- ⁵Ní an móòkiñ-bi ní bi síin kunimiṅmiiu kun bi dāá tī-uee.
- ⁶Ní u kīí ní ki kīl ki bī nyàab ṅyunti ṅun di kiti ú dū Yeesu kí ṅubiñ-bi, binib n̄ taa bééyee.
- ⁷Jiṅaalee poonee, ṅwiin ṅun bi máan kí kpò apibilee bāan,
- ⁸ní Yeesu tú Piyeer nì Jaan yii: “Cùú ṅámaan apibil jiṅaaliu jinti tí jī.”
- ⁹Ní bi bālfī-u yii: “La ní a là tí cù kí ṅá tijin gbanti?”
- ¹⁰Ní u bí-bi yii: “Ní pīlfi, ni yaa làá kó kitiṅinee ni nì uninja ubò dāá tin kpāfi u tú dinyimbool, ní nīn táá-u kí kó kudii kun ni u yaa kóee,
- ¹¹kí bālfī kudiidaan yii: ‘Ukpil bālfī-si yii kudii kulòkòn ní u nì u-boonnooliibi dāá jī jiṅaal jikaati ní?’
- ¹²Niinee, u dāá dākà-ni diditòntòkòl dikpaanṅku kubò, tikòkò bí poon ki bònti ki sí, niin ní ni dāá ṅá tijikaal.”
- ¹³Ní bi búnti ki lafun bān ki ká min u lēe deede, ní ki ṅá jiṅaalee jinti niin.
- ¹⁴Ḑyunti bāaṅee, Yeesu nì u-kpambaliṅ kāl ki bī jīn tijinee,

- 15 ní u bí-bi yii: “M lēēm-pòbilin páaa yii man nì ni ñ jī apibil jiŋaaliu nee kí wàatī ní m nín jī falaa.
- 16 M tükù ki cántí-ni yii m gítī kpá kí jī jiŋaal nee kí nīn cí daliŋkin u-tapu dàá nyā mpaampiin pu Unimbōti beelinee.”
- 17 Niinee ní u yǒhòndaam, ní ki jáam Unimbōti ní ki bí yii: “Fǒǒmaan kí nyò kí kín tǒb.
- 18 M tükù ki cántí-ni yii m gítī kpá kí nyòndaam nee kí nīn cí nyunti ŋun Unimbōti beel dàá dāānee.”
- 19 Boonee ní u yǒhòndaam ní ki jáam Unimbōti ní ki gífī ki tī-bi ní ki bí yii: “Doo di sá m-wunti [tin m tī ni-puee. Nīn ḡáammaan mín ki tétí m-pu.”
- 20 Bi ḡmó ki dóyee, ní u gítī yǒhòndaam mbaantiim ki tī-bi ní ki bí yii: “Ndaam nee di sá dipoompòndi din dàá nīn bí Unimbōti nì binib kansikinee. M-fatikuu un dàá nyā nimbi puee di tì an poondi gbanti.]
- 21 “Kpèè, un dàá dū-mi kí tī m-nannanliibee bí doo, man nì u pēedisambil ki jīn tijin.
- 22 Tiŋman, man Kinibiki dàá kpú kii Unimbōti nín nīn lī ki síin puee, ama mbusu dō ki cí un di dàá dū-mi kí nyāfīn m-nannanliibee.”
- 23 Ní bi kí ki bí bālfī tǒb yii: “Dma di bí ti-kansikin ki dàá ḡá mín?”
- 24 Niinee ní Yeesu kpambaliŋ kí ki bí kpákà ki là kí béé bi-kansikin un di dàá nīn sá ukpaanee.
- 25 Ní Yeesu bí yii: “Atimbun bōtiibi wób binib bin pu bi kā dibeelee ní, ní biyidambi là bí nīn yī-bi bilaŋfītiibi.
- 26 Ama án taa nīn sá mín nimbi cee. Un sá nimbi cee ukpaanee ñ nīn sá kii kiwaayee, ní un là kí nīn sá uyidaanee ñ kpánti ni-tòntòliu.
- 27 Dma di sá ukpaan ní? Un kā ki jīheeyaaa un yú ki tì tijinee ní? Un kā ki jīnee di sá ukpaan. Ama man sá ni-kansikin kii utòntòlee ní, mín puee ni mun ñ nīn bí kii mamee.
- 28 “Nimbi di bí m-cee m-falaabi poon baabadal, kaa fá-mi.
- 29 Mín puee m-Baa bónti dibeel kí tī-mi, mín mbaantiim ní man mun bónti dibeel kí tī-ni.
- 30 Ní nyunti ŋun m dàá kāl dibeelee, ni dàá kāl m-cee m-beelin kí jī kí nyò, ní kí kāl abeejal pu kí nīn sòhò Israyeel yab naakōti saalaa nì tilee bōti.”
- 31 Ní ti-Dindaan lī yii: “Siimōn, Siimōn, á pīlfī, Sitaan bālfī kí bàkał-si kii bi nín bàkał idi puee.
- 32 Ama m mēēa-pu an nín dàá ḡá pu a-fookiiu ñ taa wāŋkèè. Boonee a yaa láā fātī kpánti a-bee, á dāá nyàatī a-nabiyaamu.”

- 33Ní Piyeer bí-u yii: “Ukpil, man bóntì ki cí, an yaa sá sarkaaa man nì si di dàá kó, an yaa tí sá ñkúmaaaan man nì si di dàá kpú.”
- 34Ní Yeesu fātì kíf-u yii: “Piyeer, ibaamōn ní m tükù-si, dín gba kí wàatī ukooja ń bāakèe, a dàá néé yii saa nyí-mi, diba dibee mita.”
- 35Ní Yeesu gítì bí-bi yii: “M nín nìn tú-ni ki bí yii ní taa yòōñ animil nì ditòkòl, nì anaatakee, tiba nìn lóò-naaa?” Ní bi kíf yii: “Aayee.”
- 36Ní u bí-bi yii: “Kòṅkōnnee un yaa cáá animilee ń yòōñ, un cáá ditòkòlee mun ń yòōñ, un kaa cáá kijanjajikee ń nyāfi u-bòkutìl kí dā kijiki.
- 37Di sá yii m tükù ki cántì-ni yii, see án bàñ m-pu kii an nín ḡmāñ ki síñ Unimbòti takaldau poon puee, yii: 'Bi kàāñ-u ki tó bikpitibin.' Tinman tin kòkòwoooo Unimbòti bōnaatiliibi ḡmāñ ki síñ m-puee dàá ḡá mín.”
- 38Ní bi bí yii: “Ukpil, kpèè, njanjajimu muli sèè.” Ní Yeesu bí-bi yii: “An ḡmāntì.”
- 39Bi lī mín ki dóòyee, ní u nyán ki búntì Oliifi sufii jool pu kii u nín péèkpàāa cá puee. Ní u-boonnooliibi nóó-u.
- 40Bi bāāñ niinee ní u bí-bi yii: “Ní nīn mèémaan kí taa gèèñ an nín dàá ḡá pu ni yaa kó icòṅkinee ní taa lítée.”
- 41Ní u sùtì ki cùtì nyòkòpu ki ḡmāntì kii bi nín tòó ditanḡpal puee ní ki gbāāñ ki mēēyii:
- 42“M-Baa, a yaa là, kàkatī falaa un an sá m nyò nee kí wàatī-mi, nì mín kòkòee, án taa nīñ sá man lammi ní ń ḡá, án nīn sá sii yam.”
- [43Niinee ní Unimbòti tūuḡḡu ḡubò nyānní yilpu ki dómín ki tī-u kunyannyaau.
- 44Diniminaamandi din nìn kó-uee puee ní u mōtì bī mèé mbaamōm, ali u-tuntunḡku tin kpántì kii afatikudindikee ki lítì kitiḡ.]
- 45U mēēki dóòyee ní ki yíkì ki nín gítìñ u-boonnooliibi cee. U bāāñee, bīñ dō ki gèèñ kunimbaau geem.
- 46Ní u fìntì-bi ki bālfì-bi yii: “Ba pu ní ni gèèñ? Yíkì mèémaan kí taa ti gèèñ an nín dàá ḡá pu ni yaa kó icòṅkinee ní taa lítée.”
- 47Yeesu kaa láá sòōñ ki ḡmíl, ní dinikitil diba cíliñ. Juudasi un sá u-kpambaliḡ kansikin dibee līñ bi-nyòkòpu, ní ki sùtì ki pìlīñ Yeesu kí kpāl-u.
- 48Ní Yeesu bālfì-u yii: “Juudasi, mimmee nì dikpàldi poon ní a dàá dū man Kinibiki kí ḡúbiñ m-nannanliibaaa?”
- 49Yeesu boonnooliibi bèè yii bi là kí cúú-uee, ní bi bālfì-u yii: “Ti-Dindaan, tí dū njimu kí gàatì-baaa?”
- 50Niinee, bi-kansikin ubò dū kijiki ki gāā ki wúkutì usaraaḡakpil tòntòliu ḡaḡgiitafal.

- 51 Ama ní Yeesu bí yii: “Yàntīmaanee! An ḡmāntèe,” ní ki gbēūtōntōnlee tafal, ní u pókì.
- 52 Ní Yeesu bālfī bisaraaḡkpilib nì bin cí Kunimbōtidiyee kpilib, nì bibōsoonliibi bin dōmīn kí cúú-uee yii: “Ba pu ní ni ḡbīn njimu nì atambōn kí dāá cúú-mi kii m sá unikpītee?”
- 53 Man nì ni di péēbī Kunimbōtidiin baabadal, ba pu ní naa cúú-mi niin? Ama ḡyunti bāān ni nì dibōmbōndi bōtiu n ḡá ni-tundi.”
- 54 Ní bi cúú Yeesu ki cáá-u ki búnti usaraaḡkpil dumpu, ní Piyeer nōó-u aboon aboon.
- 55 Bi nìn kpāā ḡḡmi dicindi kansikin ki bī wùl, ní Piyeer dōmīn ki kāl bi-cee.
- 56 Usapōon ubō, u sá utōntōnli, u ká Piyeer nín ká ki kól ḡḡmee, ní u dū u-nimil ki bāān u-pu ki kpēē-u címmm, ní ki bí-bi yii: “Uninja nee mun bí kijapaai kin bi cúú nee cee ní.”
- 57 Ní Piyeer néé yii: “Unimpu, man kaa nyí-u.”
- 58 An kútì fīiyee, ní ubō mun ḡtī ká-u, ní ki bí yii: “A mun sá bin nōó-uee kansikin ubō ní.” Ní Piyeer kíí-u yii: “Maa sá u-yōu.”
- 59 An yúnti ki bān kii kukuluu kubō nyōkōmee, ní ubō mun ḡtī bí yii: “An péēsō kí lā uninja nee mun nìn bí kijapaai nee cee ní, kun puee u sá Gaaliilee ní.”
- 60 Ní Piyeer kíí-u yii: “M-bōō, maa nyí tin tin a sōōnee.” U bī sōōnee, niin niin ní ukooja báakì.
- 61 Ní ti-Dindaan fātīi kpēēPiyeer dímmm, niinee ní Piyeer téetì ti-Dindaan nín bàā tükū-u puee, yii: “Dín, a daá néé yii saa nyí-mi díba díbee mita ní ukooja n báakì.”
- 62 Ní Piyeer nyán ki bī sūn ki yálinḡkí.
- 63 Binib bin nìn cí Yeesuee nìn bī bēēl-u ní ki gbāà-u,
- 64 ní bi dū ḡḡabu ki bóób u-nimiin ní ki lì-u yii: “Béé un fáá-see kí lì.”
- 65 Ní bi ḡtī sī-u asiibil tikpil ki kútì.
- 66 Kutaa wúntèe, Juuda yab kpilib nì bisaraaḡkpilib nì bimaradakaliibi kpáfī ki dàā sōōn u-bōti, ní ki yānti bi cáá-u ki cūnni bi-cee.
- 67 Ní bi bālfī-u yii: “Tükù-ti sii di yaa sá Kriisīto?” Ní u kíí-bi yii “Bāā m yaa péē tükū-naaan naa làá fōō kí kíí,
- 68 m yaa tí bālfī-ni tibōtaaa naa làá kíí-mi.
- 69 Ama kí kíí kōḡkōnee kí nīn cá, man Kinibiki dàā nīn ká Unimbōti mpōndaan ḡḡḡiil pú.”
- 70 Ní bi-kōkō bí yii: “Mīmmee a sá Unimbōti Jipōon níin?” Ní u kíí-bi yii: “Kii nimbi ni-ba nín lī puee, m lafun sá ní.”

⁷¹Niinee ní bi bí yii: “Ti dàá gítī n̄á ba biseeradambi! U sòòñ timbi ti-ba gbīl dee.”

Luuki 23

¹Ní bikpilibee kòkò yíkì ki yḡòñ Yeesu ki cáā cūnnì gōmina Piilati cee,

²ní ki bī móntí ki tūntí u-pu yii: “Ti ká kijapaai nee bī gáatí ti-nib yiliḡ yii bí taa pà lampoo kí tī gōminakpaan Seesaar, ní ki bí yii ùn u-ba sá Kriisitoo, ubòti.”

³Ní Piilati bālfī-u yii: “Sii di sá Juuda yab bōtiuaaa?” Ní Yeesu kíí-u yii: “Sii di lī.”

⁴Niinee ní Piilati bí bisaraaḡakpilib n̄i binib kòkò yii: “Maa ká kijapaai nee pu tikpitiil bāà tiba.”

⁵Ní bi yīi, ki mòtī sòòñ mp̄on yii: “U yīiñ ní ki dākà ki gáatí binib n̄ taa nīn tó gōmina. U kíliñ Gaaliilee ní ki dómín ki jíti Juudee tiḡki kòkò poon ní ki dāa bāañ timbi cee doo.”

⁶Dyunti ḡun Piilati gbīl mimmee, ní u bālfī yii: “Kijapaai nee sá Ugaaliileeja níiin?”

⁷Bi nín kíí-u yii Yeesu lafun nyánní Gaaliilee kitiḡ kin n̄i Eeroodi sá ubòtee, ní u dū Yeesu ki tī Eeroodi un n̄n dómín Jeerusaleem ḡyunti gbantee.

⁸Eeroodi nín ká Yeesuee, an móòkiñ-u tikpil, di sá yii u n̄n gbīl bi sòòñ Yeesu pu an yúnti, u bàà péēnyàab kí ká-u ú n̄á maamaaci ubò ú ká.

⁹Ní u bālfī-u anyòobun tikpil ama Yeesu kaa kíí-u bāà dinyòobumbaantiil.

¹⁰Bisaraaḡakpilib n̄i bimaradakaliibi n̄n bí niin ki sòòñ mp̄on ki móntí ki tūntí u-pu.

¹¹Ní Eeroodi n̄i u-sooḡab kíí ki bī bèēl̄-u ki kpèé-u fam, ní ki dū dibòkutil din jīlee diba ki pēēn̄-u mbōtiyaamin ní ki fātī gíiñ-u ki tī Piilati.

¹²Dwiin gbantee ní Piilati n̄i Eeroodi kpíikì ní ki kpánti bibòotiibi, dooooyee baa n̄n kpí.

¹³Ní Piilati kóòñ bisaraaḡakpilib n̄i biyidambi n̄i binib kòkò ki kpáfī,

¹⁴ní ki bí-bi yii: “Ni cáañ-mi unil nee yii u bī gáatí binib, ní m bālfī-u ni-kòkò nimiin tibòkpitiil tin ni bí yii u ḡée, ama man kaa ká bāà tiba u-pu.

¹⁵Eeroodi mun kaa ká u-bòkpil, an pu ní u gíiñn̄i-u ki tīiñ-ti. Kijapaai nee kaa n̄á tiba tin máañ ḡkúmee.

¹⁶Mín puee m dàá yàntī bí gbá-u anaalab ní kí gíiñ-u kí líí.”

¹⁷[Apibil jīḡaaliu kamaayee an n̄n sá Piilati n̄ líí-bi usarkadaan ubò.]

¹⁸Ní bi-kòkò kíí ki bī tátí dicilpu yii: “Bí kpò kijapaai nee kí gíiñ Baaraabasi kí líí.”

(¹⁹Bi n̄n cúú Baaraabasi gbanti ki tó sarkan kun puee u n̄n yíkì kí já n̄i gōmina ní ki kūu unil mun.)

²⁰Piilati n̄n nyàab kí líí Yeesuee, an pu ní u n̄n gítī būsì ki sòòñ n̄i samaa.

- 21** Ama ní bi bī kūuntí yii: “Bí kpáá-u ndɔpuntikaa pu, bí péēkpáá-u ndɔpuntikaa pu.”
- 22** Ní Piilati fātii tí lī ntataatiim yii: “Tibɔkpitil tilati ní u baasii ɲá ní? Man kaa ká diyintil diba u-pu din pu ní u máaɲ ɲkúmee. Míɲ puee m dàá yāntī bí gbá-u anaalab kí gíiɲ-u kí líí.”
- 23-24** Ama ní bi yíi, ki mòtī péētátí mɔɔn yii bí kpáá-u, ní bi-tantatii yānti Piilati gī ní ki fōō bi-nyɔkɔ.
- 25** Ní u gíiɲ uninja, un nín yíkì ki jáaɲ gɔmina ki kūu unil muee ki líi, ní ki dū Yeesu ki tī-bi bí ɲá-u bi nín là puee.
- 26** Bi yōɔn Yeesu ki cān kí kpááyee, ní ki dūu tú Siimɔn un sá Siireeni tiɲkinee, u nín nyánni kusaau. Ní bi cúú-u ní ki dū ndɔpuntikaa ki būkuɲ-u ú nín bükū ki pá Yeesu boon.
- 27** Dinikitikpaandi nín dī Yeesu, ní binimpoobi mun nín sūn ki yáliɲkí u-pu.
- 28** Ní Yeesu fātii bí-bi yii: “Jeerusaleem nimpoobi, taa nín sūmmaan man pu, nín sūmmaan nimbi ni-ba nì ni-biyaamu pu.
- 29** Kun puee ɲyunti bí ki dòoɲ ɲun ni bi dāa lì yii: ‘Biɲmaɲɲmantiibi bin kaa péēmāl ki kée, mbiyaamu kaa ɲáaɲ bi-biiɲee, ká diyimɔl.’
- 30** Ní binib dāa lì ajoon yii: ‘Lítímaan ti-pu!’ Ní kí lì agbantán yii: ‘Nyíkímmaan ti-pu!’
- 31** Bi yaa ɲá man un sá bususɔmbuee mimmee, kin nimbi bin sá isukulimee faa?”
- 32** Soojab cáaɲ diganɲandambi bili ki kútì Yeesu pu kí kpò bí mun.
- 33** Bi bàɲ laakin bi yíi kuyikpabikuee, ní ki dū-u ki kpáá ndɔpuntikaa pu ùn nì diganɲandambi bilee, ubɔ u-ɲanɲiil pú, un kínee u-ɲanɲan pú.
- 34** Ní Yeesu bí yii: “M-Baa, dūú pɔ-bi, kun puee baa nyí tin bi bī ɲáaɲ nee taapu.” Ní bi tó kasi bi-kansikin ki yākatì u-bɔkutiɲ.
- 35** Ní kunipaau yú ki kpèé, ní Juuda yab yidambi bí ki bèl̄-u yii: “U fī bin kínee, u yaa lafun sá Kriisitoo, un Unimbɔti lēēyee, ú fī u-ba mun.”
- 36** Ní soojab mun bí ki bèl̄-u, ní ki cáaɲ ndaam min gàmee ki tī-u ú nyò,
- 37** ní ki bí-u yii: “A yaa sá Juuda yab ɔtiu, á fī a-ba.”
- 38** Ní bi ɲmāɲ u-yilpu yii: “Un bí nee di sá Juuda yab ɔtiu.”
- 39** Ní diganɲandambi bin bi kpáá ki kútì u-puee ubɔ mun bí ki sī-u yii: “Sii di kaa sá Kriisitoooo? Fī a-ba kí fī kí kpáaɲ ti-muaa!”
- 40** Ní u-juti bī wòɔn-u yii: “Sii nì ùn kɔkɔ bí ditafadaalbaantiilin ní, aa fāɲkí Unimbɔtaaa?”
- 41** Timbi nín máaɲ puee di sá ditafadaaldi din poon ti bí nee, kun puee diganɲam tuuɲɲi ɲin ti ɲáaɲee paatii dee. Ama un bí nee, ùn kaa ɲá diganɲam ubɔ.”

- ⁴²Ní u bí Yeesu yii: “A yaa láā gítín kí jī dibeelee á dāá téetí m-pu.”
- ⁴³Ní Yeesu kíf-u yii: “Ibaamɔn ní m tükù-si, dín gba man nì si di dàá nīn bí Unimbɔti beelin.”
- ⁴⁴Kuwiŋkuluu nyəkɔmee, ní ŋwiin wánkì ní dibɔmbɔndi jéeti kitij kəkɔ pu ki tin sāā tikúti tita.
- ⁴⁵Ní sata un bi nīn dūu pītì Kunimbɔtidii poon ki gāntì laakin bi yīi circir páaa lankee nī laan kínee cúū cáti kansikin nī kansikin.
- ⁴⁶Ní Yeesu fáá mbiil mpɔn yii: “M-Baa, m dū m-fām ki ŋá a-ŋaan.” U lī mimmee, ní ki kpī.
- ⁴⁷Room soojakpiliu ká mimmee ní ki bīi pàkà Unimbɔti, ní ki bí yii: “Ibaamɔn, kijapaai nee sá unimɔnti ní.”
- ⁴⁸Kunipaau kun nīn dómīn kí kpèè bi nīn kpáá Yeesu puee nīn ká mimmee, ní bi fātī kùn ki fātī bi-biŋŋi nī kunimbaakpaanŋu.
- ⁴⁹Yeesu bɔɔbi kəkɔ nī binimpoobi bin nīn céènní-u doooo Gaaliileeyee nīn yú kudanŋu ní ki kpèé tin kəkɔ bīi jīté.
- ⁵⁰Uninja ubɔ nīn bí, bi yīi-u Jooseefi. U nīn sá bibɔsoonliibee kansikin ubɔ ní ki sá unimɔnti ki yú deede.
- ⁵¹Uninjee nīn sá Juuda yab tiŋki kin bi yīi Arimateeyee ní ki nīn ká ki cí Unimbɔti beel. Waa nīn yú bibɔsoonliibi bin kínee boon, ní kaa nīn bí tin bi bónti kí ŋée poon.
- ⁵²Ún di cūti Piilati cee ki mēē-u nsan kí yòon Yeesu wunti.
- ⁵³U pú-u nsanee, ní u cūti ki kpáati Yeesu wunti ndɔpuntikaa pu, ní ki dū ŋŋaapiin ki fiñ-u ki cáá-u ki bíl dikaakul din bi nīn lükū ditaŋkpalinee. Baa nīn dáá síb báa ubɔ dikaakul gbanti poon.
- ⁵⁴An nīn sá ŋwiin ŋun jooku ŋwiŋŋufikaa kífée, ní ŋwiin tóob kí jēetí.
- ⁵⁵Binimpoobi bin nīn céènní Yeesu doooo Gaaliileeyee táá Jooseefi ki cūti ki ká dikaakul nī bi nīn bíl u-wunti puee,
- ⁵⁶ní ki fātī nīn kùn, ki dómīn ki bónti ikpafi nī talaalub kí dāá cáan kí yàan utaŋkpiil pu, ní ki kāl ŋwiŋŋufikaa, kii bi-marau nīn sá puee.

Luuki 24

- ¹Kinyɔŋ poon wimpeekaŋu dal ntaafaabɔmbɔminee, ní binimpoobee búnti dikaakul lanŋi ki ŋúb ikpafi nī talaalub bin bi bóntèe.
- ²Bi bànee, ki ká ditaŋkpal din bi nīn dūu pīn dikaakul nyəkɔee bīnti ki tin dō ŋkpaanceeti,
- ³ní bi kó dikaakul poon kaa ká ti-Dindaan Yeesu wunti.

- ⁴Bi bākatì ki kìn ki yú ki dākafēe ní bininjab bili cílín bi-pu ki pēētiwampin kánkaŋ.
- ⁵Bi fāŋkì ki tīntì taapu, ní binibee bí yii: “Ba pu ní ni nyàab̄ unil un wālee bitaŋkpiibi kansikin ní?”
- ⁶Ún fīkitì, waa bí doo, téetímaan u nín nìn bí Gaaliilee ki tükū-ni puee,
- ⁷yii: ‘An sá bí dū man Kinibiki kí ḡúbiñ binikpitib ní bí kpáá-mi ndɔpuntikaa pu m̄ kpú, ní winta dalee m̄ fikitì.’ “
- ⁸Niinee ní bi fātìi téetì Yeesu bōti gbanti pu.
- ⁹Ní bi búntì ki cūtií máafi an bōti kòkò akpambal saalaa nì dibee nì binib bin kínee kòkò.
- ¹⁰An nimpoobee di sá Maarii Magdala yōu, nì Jaanni, nì Maarii Jaaki na, nì binimpoobi biba mun nìn céen̄-bi, ki tükū akpambal tibobaantiil.
- ¹¹Ama binimpoobee nín dómín ki tükū akpambalee baa nìn fōō ki kíí, bi nìn dūu yíin mmaam ní.
- ¹²Ama ní, Piyeer yíkìi sán ki nín cá dikaakul laŋki. U bàñ ki gbóónee ḡaabu ḡun bi nìn dūu fīñ-uee baba di dō. Ní u fātìi nín gítín, ki bākatì nì an bōti sèeee.
- ¹³Ḋwimbaanti gbanti ní u-boonnooliibi bili yíkì ki nín cá kitimbilii kiba bi yî-kì Eemayusi. Kí yíkì Jeerusaleem kí cù kitiŋ gbantinee an sá ataŋkpee saalaa nì diba ní.
- ¹⁴Ní bi còom̄ ki sòon̄ tin kòkò jíti Yeesu puee.
- ¹⁵Bi nìn bíi sòon̄ mín ki kpákèe, ní Yeesu u-ba bāañ bi-cee ní u nì bi táá ki nín cá.
- ¹⁶Bi wál-u ní tiba yāntì baa béè-u.
- ¹⁷Ní Yeesu bālfì-bi yii: “Tilati ní ni còom̄ ki kpákà ní?” Ní bi sāā ki síl̄ nì kunimbaau.
- ¹⁸Ní bi-kansikin ubò, bi yî-u Kleeopasi, bí-u yii: “M̄ pākā sii baba di péekín̄ Jeerusaleem tiŋkin doo, kaa gbīl̄ tin jíti iwiin nee poonee.”
- ¹⁹Ní u bālfì-bi yii: “Ba bōti di jíti ní?” Ní bi kíí-u yii: “Tin bāañ Yeesu Naasaareeti yōu, un nìn sá Unimbōti bōnaatiliu ki ḡaāñ maamaaci tuuŋŋi, u-nyòobuŋŋi mun cáá mp̄on̄ Unimbōti nì binib kòkò nyée.
- ²⁰Ti-saraaŋakpilib nì ti-yidambi dū-u ki tī bí sòon̄ u-bōti kí kpò-u, ní bi dū-u ki kpáá ndɔpuntikaa pu.
- ²¹Ún pu ní ti bàà máká yii u dàá fī Israyeel yab. Nì mín̄ kòkòee, an bōti nín jítee dín̄ iwiin ita sèé nee.
- ²²Ama ti-kansikin binimpoobi biba cáañ-ti maamaaci bōti dínee. Di sá yii bi péé kutaafaau ní ki cūtií u-kaakul laŋki.
- ²³Bi bànee, kaa ká u-wunti, ní ki fātìi gítín̄ ti-cee ki máafi-ti yii Unimbōti tūuni cílín̄ bi-pu ki tükū-bi yii u fikitì.

- ²⁴Ti-yab biba mun cūti u-kaakul lan̄ki ki mun ká kii binimpoobee nín bàà lī puee, ama baa ká ún u-ba.”
- ²⁵Niinee ní Yeesu bí yii: “Oooo binib nee kaa cáá iciin, kaa yáb kí fṣṣ Unimbṓti bṓnaatiliibi nín sòòn tiŋyee kí kíí.
- ²⁶Mim mee an kaa máaṅ Kriisitoo n̄ jī falaa mín kí nín kó u-nyooti naaan?”
- ²⁷Ní u kíí ki bí sòòn ki cántí-bi Unimbṓti takaldau poon tibṓti tin kṓkṓ Mooisi n̄ Unimbṓti bṓnaatiliibi n̄n ḡmān̄ ki síin̄ u-puee.
- ²⁸Bi nín bāaṅ kitimbilii kin ni bi cée, ní Yeesu ḡá kii u là kí càatī nyṓkṓpuee.
- ²⁹Ní bi bí yii: “Aayee, gbíntí ti-cee, ḡwīn̄ dàá jēetí kunyeeu n̄ mó dee.” Ní u kó bi-
cee.
- ³⁰Ḋyunti ḡun bi kāl̄ ki dàá n̄n jīnee, ní Yeesu yṓòn̄ kṓṓn̄ ní ki jáam̄ Unimbṓti ní ki gífi ki tī-bi.
- ³¹Niinee ní bi-nimiliŋ cúū ḡāatī ní bi béè-u, ní u wāŋkì bi-kansikin niin.
- ³²Ní bi bí l̄i tòb cee yii: “U nín bí sòòn n̄ ti ki lèekī Unimbṓti takaldau taapu ki dàkà-ti nsanee, saa bàà ká an nín kó ti-pṓbiliŋin fiŋfiŋeeeee?”
- ³³Ní bi yíkì niin niin ki nín gítí Jeerusaleem. Bi bànee ki ká akpambal saalaa n̄ dibee n̄ bi-jutiibi bin kínee kpáfi,
- ³⁴ki bí l̄i yii: “Tiŋman, ti-Dindaan lafun fikiti! Di sá yii Siimṓn ká-u.”
- ³⁵Ní bí mun dū tin bi ká nsanee, n̄ Yeesu nín gí kṓṓn̄ bi béè-u puee ki máafi-bi.
- ³⁶Bi bí sòòn mim mee, Yeesu bāaṅ bi-kansikin ki jáam̄-bi yii: “Unimbṓti n̄ tī-ni ḡgbansṓḡfi.”
- ³⁷Ní bi fāŋkì tikpil bi-wunti kp̄i, kun puee bi dàkafi yii an sá ufaŋfanti ní.
- ³⁸Ní Yeesu bāfi-bi yii: “Ba pu ní ni-pṓbiliŋ máfi mín? Ba pu ní ni cáá ilandṓkṓ ili ili mín?”
- ³⁹Man dee, kpèèmaan m-ḡalii poon n̄ m-tafati tibuŋwati. Gbēēmaan-mi kí kpèè! Ufaŋfanti kaa cáá tiwunaaan kaa cáá akpab kii ni nín wāl̄ man cáá pu nee.”
- ⁴⁰U lī mim mee, ní ki dàkā-bi u-ḡalii n̄ u-taaji.
- ⁴¹Baa n̄n dáá baasii fṣṣ ki kíí mbaamṓmin kun puee an n̄n sá-bi mmṓnaaan ki ḡá-bi bitii mun, an puee ní Yeesu bāfi-bi yii: “Ní cáá tiba doo kí jāaa?”
- ⁴²Ní bi dū diŋṓŋgindi din ḡófèe ki tī-u,
- ⁴³Ní u fṣṣ ki ḡmó bi-nimiin niin.
- ⁴⁴Ní u bí-bi yii: “Naa tēetí m nín n̄n dáá bí ni-cee, ki tükū-ni yii tin kṓkṓ bi ḡmān̄ m-pu Mooisi marab n̄ Unimbṓti bṓnaatiliibi takaldab n̄ Soom takaldau poonee máaṅ kí ḡá mimmaaṅ?”

Jaan

Jaan 1

- ¹Kí wàatī Unimbōti n̄ náán duulnyee, ubo n̄n bí bi yî-u Dinyoobundi ní ki bí Unimbōti cee, ní ki sá Unimbōti.
- ²Dinyoobundi gbanti di n̄n péēbí Unimbōti cee doooo ŋkilkaamin.
- ³Díñ ní Unimbōti dū ki náán tikokɔ. Tiba kaa bí fam Unimbōti kaa dū Dinyoobundee ki náán kudɔŋu.
- ⁴Di-ni ní dimaŋfal n̄n bí, dimaŋfal gbanti di n̄n tì binib ŋwalfi.
- ⁵Ní ŋwalfee dómiń ki ŋmíntí binib bin bí dibombɔndinee, ní binibee kaa f̄ɔ̄-ŋu.
- ⁶Unimbōti n̄n túnní uninja ubo, bi yî-u Jaan.
- ⁷U n̄n dómiń kí sòon̄ n̄ binib ŋwalfi bōti, báà ŋma n̄ p̄lfiń-u kí f̄ɔ̄ ŋwalfee.
- ⁸Jaan u-ba kaa n̄n sá ŋwalfi, u n̄n dómiń kí lēēŋwalfee pu seera ní.
- ⁹Dwalfi gbanti baba di sá mm̄onti, ki dómiń kitij pu ki ŋmíntí báà ŋma.
- ¹⁰Unimbōti dū-ŋu ki náán taapu doo wanti kɔkɔ, ama, ŋyunti ŋun ŋu n̄n bí taapu dooyee, baa béè-ŋu.
- ¹¹Un sá Dinyoobundee dómiń u-yab cee, ní u-yab kaa f̄ɔ̄-u.
- ¹²Ama bin kɔkɔ f̄ɔ̄-u ki gb̄l̄ ki t̄iń-uee, u yānti bidambi kpánti Unimbōti biyaamu,
- ¹³mun ní unil kaa màlee, kaa tí sá unil làtam ama an sá Unimbōti di màl̄ bín.
- ¹⁴Dinyoobundee kpánti unil ki kāl̄ ti-kansikin ki cáá tiŋan n̄n ibaam̄on tikpil, ní ti ká u-nyooti tin u n̄n f̄ɔ̄yee kun puee u sá Unimbōti Jipɔmbaabil.
- ¹⁵U-pu ní Jaan n̄n kúuñ ki l̄ yii: “Un m̄ n̄n l̄ yii u d̄oń man boon ama ùn j̄it̄in mamee, dee! Di sá yii ùn péēbí ní bi nín màl̄ man.”
- ¹⁶Ún cee ní tiŋan k̄woooo nyánní ní ki b̄ań-ti, ní timbi kɔkɔ f̄ōl̄-ti múl̄mul.
- ¹⁷Unimbōti n̄n yānti Mooisi t̄i-ti marab, ama ní Yeesu Kriisitoo cááń-ti diyim̄oal̄ n̄n ibaam̄on.
- ¹⁸Báà ubo kaa wál̄ Unimbōti dalba, ama u-Jipɔmbaabil un mun sá Unimbōti ki bí ki nákañ u-Baa Unimbōtee di yānti ti béè-u.
- ¹⁹Juuda yab kpilib bin n̄n bí Jeerusalemee n̄n túnní bisaraañakpilib n̄n Leefiibi bin ŋááñ Unimbōti diiku poon ditundee biba Jaan cee bí d̄áá b̄alfi-u yii: “Sii di sá ŋma?” Ní u kíf-bi yii:
- ²⁰“Man di kaa sá Kriisitoo.” Waa n̄n b̄al̄-bi, ki s̄oñ ki cánti-bi m̄n̄.

- 21 Ní bi fātii bālfī-u yii: “Kin sii di sá ŋma ní? Eeliii?” Ní u bí yii: “Aayee, maa sá Eelii.” Ní bi tí bālfī-u yii: “Sii di sá Unimbōti bōnaatiliu ubo un máaŋ kí dāaŋeēēē?” Ní u tí bí yii: “Aayee.”
- 22 Ní bi fātii tí bālfī-u yii: “Kin, sii baasii sá ŋma ní? Di sá ti là kí tin tükù bin túnní-tee un ní a baasii séé. Sii yî a-ba yii ŋma?”
- 23 Ní Jaan kíi-bi yii: “Man di sá un báakí kupōoun yii: 'Dāŋkimaan ti-Dindaan saŋŋu,' ” kii Unimbōti bōnaatiliu Eesayi mun nín nìn lī puee.
- 24 Fariisab biba nìn bí bin bi nìn túnní Jaan ceeyee kansikin,
- 25 ní bín bālfī-u yii: “A yaa kaa sá Kriisitoo, kaa sá Eelii, kaa tí sá Unimbōti bōnaatiliu un ti céé, kin ba pu ní a fùul binib Unimbōti nyim?”
- 26 Ní Jaan kíi-bi yii: “Man fùul binib nnyim ní, ama ubo bí ni-kansikin, naa nyí-u,
- 27 ùn di dàá dāá dāaŋ man boon. Man kaa kpánti gba kí gútí u-naatakaŋ ŋmiii.”
- 28 Bi nìn bí Beetanii, kitiŋ kin bí Jōdan mōogbandi lapu pu, laakin Jaan fùul binib nnyimee, ní ki sòon an bōti gbanti.
- 29 Kutaa wúntèe ní Jaan ká Yeesu dòon u-cee, ní u bí yii: “Kpèèmaan, Unimbōti pibil din lèekī binib kōkō kpitiyee dee!
- 30 Ùn pu ní m sòon yii: 'Uninja ubo dàá dāá dāaŋ man boon, ama ùn jítin man, kun puee ùn péé bí ní bi nín māl man.’
- 31 Maa nìn nyí un ní an séé, ama an sá yii Israyeel yab n bée-uee pu ní man dómiín ki bí fùul binib Unimbōti nyim.”
- 32-33 Ní Jaan gítí lī yii: “Maa nìn nyí un ní an séé, ama Unimbōti un túnní-mi m nīn fùul binib u-nyimee bí-mi yii: 'A yaa láa ká man Fām kpákatiŋ ki kòò un puee, ùn di dàá fàl binib Circir Fām.' Ní m ká Unimbōti Fām lafun nyánní yilpu kii dibeenanjilee ki kpákatiŋ Yeesu pu.
- 34 M ká mimmee, ní ki sòon ki tükù-ni yii ùn di sá Unimbōti Jipōon.”
- 35 Kutaa tí wúntèe, Jaan nì u-boonooliibi bili tí yúee,
- 36 ní ki ká Yeesu jítí, ní u bí yii: “Kpèèmaan, dipibil din Unimbōti dàá dūú ŋá saraa binib kpitii puee sèé!”
- 37 Jaan boonooliibi bilee gbìl mimmee, ní ki nós Yeesu.
- 38 Yeesu fātii kpēēbi nós-uee, ní ki bí-bi yii: “Ni nyàab ba?” Ní bi bí yii: “Rabii, la ní a kòò ní?” (Rabii taapu di sá yii, Udakal.)
- 39 Ní Yeesu bí yii: “Dāaŋmaan kí cùú bée laakin m kòoyee.” Ní bi nós-u ki cūti bée laakin u kòoyee, ní ki kpáaā gbintì niin yaadal wiŋŋu. An nìn sá tikúti tinaa kujoou ní bi nìn cūti.

⁴⁰Andree un sá Siimɔn Piyeer naalee nɛn sá bilee kansikin ubɔ bin nɛn gbɪ̄ Jaan nyɔɔbundi gbanti ki nɔ́ Yeesuee,

⁴¹ní Andree péé ki cūtií ká u-maan Siimɔn ki tükū-u yii: “Timbi ká Meesiya!” (An dākà yii Kriisitoo).

⁴²Ní u cáá Siimɔn ki cūnnì Yeesu cee. Ní Yeesu kpēē-u ní ki bí yii: “Sii di sá Siimɔn Jaan jipɔɔn. Bi dàá nɛn kíh ki yí-si Keefaasi ní.” (Greeki sooninee bi yí Piyeer, an dākà yii ditankpal.)

⁴³Kutaa gítí tí wúntèe, Yeesu bí yii u dàá cù Gaaliilee, ní ki ká Fiiliipi, ní ki bí-u yii: “Nɔ́-mi!”

⁴⁴Fiiliipi nɛn sá Beetsayida tinjin ní. Niin ní Andree nì Piyeer mun nɛn sá.

⁴⁵Boonee ní Fiiliipi ká Natanayeel, ki tükū-u yii: “Timbi ká un pu ní Mooisi nɛn ɣmāñ u-marab takaldaun ki kpáañ Unimbɔti bɔnaatiliibi mun sòon u-puee. An sá Yeesu Jooseefi jipɔɔn un sá Naasaareetee.”

⁴⁶Ní Natanayeel bālfí-u yii: “Mimmee, tiwammɔntiil ɣñh kí nyānní Naasaareeti mun deeee?” Ní Fiiliipi bí-u yii: “Dāañ kí cùú kpèè.”

⁴⁷Yeesu kpēēyee, Natanayeel dòn u-cee, ní u bī sòon u-pu yii: “Un bí nee di sá Israyeelja páaa, kaa sá mili mili daan.”

⁴⁸Ní Natanayeel bālfí-u yii: “A ɣá mana ní ki nyí-mi?” Ní Yeesu kífí-u yii: “Min a bí fiigi subu taapuee ní man ká-si ki wāatí ní Fiiliipi dāa nín yíin-see.”

⁴⁹Niinee ní Natanayeel bí-u yii: “Ukpil, a sá Unimbɔti Jipɔɔn ki sá Israyeel yab mun botiu!”

⁵⁰Ní Yeesu bí-u yii: “M nín bí yii m ká-si fiigi subu taapuee pu ní a fɔ̄ɔ̄ ki kíiii? A dàá gítí ká tin jítiñ tin bí neeyee.

⁵¹Ibaamɔn ní m tükù-ni, ni dàá dāá ká kutagbɔɣu cū pīti, ní Unimbɔti tūuni sɛntīn ki jóm man Kinibiki pu.”

Jaan 2

¹Winta dalee, ubɔ nɛn cáá unimpu Kana, Gaaliilee timbilikin. Yeesu na mun nɛn bí niin,

²ní bi nɛn yíin Yeesu mun nì u-boonnooliibi bí dāañ.

³Ndaam dāa dóòyee, ní Yeesu na bí-u yii: “Bi-daam dóòyaa!”

⁴Ní Yeesu kífí-u yii: “Unimpu, sii di dàá tükù-mi m nín dàá ɣá pueeee? Dyunti ɣun m dàá ɣá m-tundee kaa láá ɣmānti.”

⁵Niinee ní Yeesu na bí bitɔntɔnliibi bin bí niinee yii: “U yaa bí ní ɣá puee, ɣáman mín.”

- ⁶Tilɔn tiluu nɛn yu ki sa atankpee. Niin ni bi nɛn jooti nnyim ki finti, kii Juuda yab koobiling nin sa puee. Tilɔn nɛn fɔol mbamu mmuŋku ni tiba mun mmuŋku ni saalaa.
- ⁷Ni Yeesu bi bitontonliibee yii bi lɔn nnyim ki gbɛɛn tilɔn gbanti. Ni bi lafun lɔn ki gbɛɛn yatiyati.
- ⁸Niinee ni Yeesu bi-bi yii: “Jɔɔmaan ki caa ti ukpil un kpɛɛ tijinee!” Ni bi jɔɔ ki caa ti-u. Ni nnyimee kpanti ndaam.
- ⁹Ukpilee kaa nɛn nyi laakin ndaamee nyannee, see bitontonliibi bin nɛn lɔn nnyimee di nyi. U dakee, ni ki yini unimpucan cal,
- ¹⁰ni ki bi-u yii: “Bi pee peti ki caan ndamontim, ni binib yaa nyun an nyaatibee ni bi nin nyanti min kaa moti mee. Ni sii du ndamontim ki kpaafi ki daa caabin-mi nanƙonampuu?”
- ¹¹Kana timbiliki kin bi Gaaliileeyee ni Yeesu nɛn na u-maamaacipeepeekaa ki daka u-nyooti, ni u-boonooliibi fɔɔ-u ki ki.
- ¹²Boonee ni u ni u-na ni u-naalib ni u-boonooliibi nin sinti Kapeenaayum, ki kal niin iwinƙaƙaa iba.
- ¹³Juuda yab jijaaliu un bi jin ki teti Unimbɔti nin nɛn fi bi-naanjab ki nyanti Eejipitee nɛn tobiinee, ni Yeesu nin ca Jeerusalem.
- ¹⁴U ban ki ko Kunimbɔtidiinee ni ki ka bin nyafi inaa, ni ipii ni abeeanjilee ni binimikpantiliibi ka.
- ¹⁵Ni u nyaab imii ki du na dinaalabil, ni ki jin-bi ki nyanti ni bi-piii ni bi-naai kaka, ni ki du binimikpantiliibi nimiling ki yaɔ kitiŋ, ni ki labiti bi-teebilbi ki ciɔ,
- ¹⁶ni ki bi bin nyafi abeeanjilee yii: “Nyantimaan ni-wanti nee doo. Ni taa nin caa m-Baa diiku ki kpanti kunyompudii!”
- ¹⁷Niinee ni u-boonooliibi teti tiboti tin bi nman Unimbɔti takaldaunee, yii: “Ti-Dindaan, m nin moti a-diiku nee pu miyyee di wu m-pobilin kii nymee.”
- ¹⁸Ni Juuda yab kpilib bi-u yii: “Daka-ti kudaanhu ni ti bee yii a caa nsan ki na min a na nee!”
- ¹⁹Ni Yeesu ki-bi yii: “Wimaan Kunimbɔtidii nee, iwiin ita dal m daa fati ma-ku.”
- ²⁰Niinee ni Juuda yab kpilib bi yii: “Bi du abin imuŋku ili ni aluu ni ki man Kunimbɔtidii nee, ni mana ni sii nun ki du iwiin ita ki fati ma-ku?”
- ²¹Ama Yeesu nɛn soon u-wunti pu ni ki nantini Kunimbɔtidii.
- ²²Boon u nin daa fikiti ditaŋkpiilinee ni u-boonooliibi teti yii u nɛn li min, ni ki fɔɔ tin bi nɛn nman Unimbɔti takaldaunee ni Yeesu nin soon tin u-fikititam puee ki ki.
- ²³Yeesu nin nɛn bi Jeerusalem jijaal gbanti yuntiŋuee ni binib tikpil kanti maamaacib bin u naanee ni ki fɔɔ-u ki ki.

- ²⁴Ama Yeesu kaa n̄n m̄áká bi-pu. Di sá yii u nyí bi-kòkò n̄n sá biyee,
²⁵kaa nyààb̄ ubò n̄ tükù-u kun bi sée, kun puee u nyí tin bí bi-pòbiliḡinee.

Jaan 3

- ¹Uninja ubò n̄n bí, bi yî-u Niikoodeem, ki bí Fariisab jandi pú ní ki sá Juuda yab kpiliu ubò.
- ²Ukpilee n̄n dóm̄in̄ Yeesu cee kunyeeu kubò ní ki bí-u yii: “Ukpil, ti nyí yii Unimbòti di túnni-si á dāān̄ kí dākà-ti. Di sá yii, Unimbòti yaa kaa bí unil cee, waa ḡñ̄n̄ kí ḡá maamaacib̄ kii bin a ḡáán̄ nee.”
- ³Ní Yeesu kíi-u yii: “Ibaam̄on̄ ní m̄ tükù-si, Unimbòti yaa kaa f̄at̄ii m̄āl̄ unil mp̄om̄, u kpá kí ká Unimbòti beel.”
- ⁴Ní Niikoodeem b̄alfi-u yii: “Mimmee, mana ní bi ḡit̄i ḡñ̄n̄ kí m̄aal̄ unil un púlee mp̄om̄? Unil ḡñ̄n̄ kí f̄at̄ii ḡit̄i kó u-na poon bí m̄aal̄-uaaa?”
- ⁵Ní Yeesu ḡit̄i bí-u yii: “Ibaam̄on̄, Ibaam̄on̄ ní m̄ tükù-si, ubò kaa ḡñ̄n̄ kí kó Unimbòti beelin bi yaa kaa f̄at̄ii m̄āl̄ udaan̄ mp̄om̄ n̄ nnyim̄ n̄ Unimbòti Fāmin̄.
- ⁶Bin binib̄ m̄àalee di sá nnibiyaamu, ní bin Unimbòti Fām̄ m̄àalee mun sá ḡfām̄.
- ⁷M̄ n̄n̄ bí yii: 'Ni-kòkò m̄áan̄ Unimbòti n̄ f̄at̄ii m̄aal̄-ni mp̄omee', án̄ taa b̄akat̄in̄-si.
- ⁸Kubuḡu j̄it̄i ki cá laakin pú ku yaa lèe, ní a ḡb̄il̄ ku-wooku pu ní kaa nyí laakin pú ku nyáḡeeyaaa kaa nyí laakin pú ku cée mun, m̄in̄ ní an̄ ḡáán̄ bin kòkò Unimbòti Fām̄ m̄àalee.”
- ⁹Ní Niikoodeem bí-u yii: “Mana ní an̄ ḡñ̄n̄ kí ḡá m̄in̄?”
- ¹⁰Ní Yeesu f̄at̄ii kíi-u yii: “Sii un sá udakakpaan̄ ki dākà Israyeel̄ yabee di kaa nyí tin bí neeee?”
- ¹¹Ibaam̄on̄, Ibaam̄on̄ ní m̄ tükù-si nee, ti sòon̄ n̄ ni tin ti nyée n̄ tin ti kée, ní naa là kí f̄ōō tin ti lèe.
- ¹²M̄ sòon̄ n̄ ni taapu doo b̄oti tin báà ḡma nyée, ní naa là kí f̄ōō kí kíi, kin m̄ yaa láā p̄ot̄i ki bí sòon̄ yilpu b̄oti tin naa w̄álee, ni dāa ḡáán̄ mana kí f̄ōō t̄in̄ kí kíi?”
- ¹³Báà ubò kaa láā péj̄òm̄ yilpu, asee man̄ Kinibiki kin nyánni yilpu ki s̄int̄iḡee.
- ¹⁴“Kii Mooisi n̄n̄ n̄n̄ lúnti kukoonaḡu ndò pu kup̄oun̄ binib̄ kp̄èe ki p̄ókée, m̄in̄ mbaantiim̄ ní bi dàá dāá dū man̄ Kinibiki kí lúnti yilpu,
- ¹⁵an̄ n̄n̄ dàá ḡá pu un sá kamaa yaa láā f̄ōō-mi ki kíiyee ú dāá ká mmanḡaf̄òk̄on̄ ḡun kaa cáá dikuntilee.
- ¹⁶Kun puee Unimbòti n̄eēn̄ kit̄iḡ pu nib̄ kòkò tikpil, m̄in̄ pu ní u dū u-Jip̄ombaabil̄ ki t̄i, an̄ n̄n̄ dàá ḡá pu un sá kamaa yaa f̄ōō-u ki kíiyee n̄ taa kp̄ú, ama ú ká mmanḡaf̄òk̄on̄ ḡun kaa cáá dikuntilee.

- ¹⁷Unimbɔti nín túnní u-Jipɔɔn duulnyan doo nee, an kaa sá u là kí kpò binib ɔti ama u là bi-kòkò n ká difiil u-Jipɔɔn pu ní.
- ¹⁸Unimbɔti kaa dāa gítí kù bin fɔ̃ɔ u-Jipɔɔn gbanti ki kííyee ɔti, ama un kaa fɔ̃ɔ-u ki kííyee ɔti kpî, u nín kaa fɔ̃ɔ Unimbɔti Jipɔmbaabil ki kííyee pu.
- ¹⁹Kun cāabìñ dibɔkpilee sèé: di sá yii un sá ηwalfee dómíñ duulnyan doo, ní binib là dibɔmbɔndí, kaa là ηwalfi, kun puee bi ηáañ atun̄kpiti.
- ²⁰Un sá kamaa yaa ηáañ ikpitee ná ηwalfi ní kaa cá ηwalfin, kun puee u fàn̄kí yii ηwalfi dàá biití u-tun̄kpitiη pu.
- ²¹Ama un nóó ibaamɔnee cá Unimbɔti walfiηun ní bí ká yii Unimbɔti pu ní u ηáañ atummɔnti.”
- ²²Míñ boonee ní Yeesu nì u-boonnooliibi búnti Juudee watil pú ki kāl̄ niin ki fùul̄ binib Unimbɔti nyim.
- ²³Ní Jaan mun nìn bí Eenoon, Saaliim cañin, ki fùul̄ binib Unimbɔti nyim, kun puee nnyim nìn dō niin tikpil. Niin ní binib nìn cá bi fùul̄-bi.
- ²⁴(Nyunti gbantee, baa láá cúú Jaan sarka.)
- ²⁵Niinee ní Jaan boonnooliibi biba nì Ujuudaja ubɔ bī kpákà bi-marab bin sá yii bí nīn fintí bi-ba ki kpáañ tiwan kòkɔee pu.
- ²⁶Ní bi cūti Jaan cee ki bí-u yii: “Ukpil, sii nì un nìn bí Jɔɔdan gbandi lapu puee, un pu a nìn sòon̄ yii u sá unikpaanee, bāa ηma di yíkí sii cee ki cá u-cee u fùul̄-bi Unimbɔti nyimee.”
- ²⁷Ní Jaan kíi-bi yii: “Unil kaa ηūn̄ kí nīn cáá tiba Unimbɔti yaa kaa tī-u kudɔηu.
- ²⁸Nimbi ni-ba ni gbīl̄ m nín nìn lī yii: ‘Man di kaa sá Kriisitoo, bi túnní man n̄ lintín u-nyɔkɔpu ní.’
- ²⁹Un cáá unimpucaanee, unimpucaan cal dee, ama unimpucaan cal ɔɔ bí niin ki pílfi u-ɔɔ neen, ní an mōn̄-u tikpil. An mɔηηuee di sá man yɔηu nee.
- ³⁰An máañ ùn̄ nyooti n̄ nīn wīntí ní man yati n̄ nīn bàtī!”
- ³¹Di sá un nyánní yilpuee di tókó tikòkò pu. Un bí taapu dooyee di sá taapu yɔu ní ki sòon̄ taapu doo ɔti. Un nyánní yilpu ki tókó tikòkò puee
- ³²di sòon̄ tin u kée nì tin u gbīlee, ní bāa ubɔ kaa fɔ̃ɔ u-ɔti ki kíí.
- ³³Un di yaa fɔ̃ɔ u nín lī puee ki kííyee, udaan dākà yii Unimbɔti sá mbaamɔndaan dee,
- ³⁴kun puee un Unimbɔti túnnée sòon̄ Unimbɔti ɔti ní. Di sá Unimbɔti tì-u u-Fām ní an kaa cáá bí dūú ηmàntī.
- ³⁵Unimbɔti néeñ u-Jipɔɔn ki dū tikòkò ki ηá u-ηaan.

³⁶Un yaa fɔ̃ɔ̃ u-Jipɔ̃ɔ̃n gbanti ki kííyee kántí mmanɔ̃fɔ̃kɔ̃n ɔ̃n kaa cáá dikuntilee. Un yí kaa fɔ̃ɔ̃-u ki kííyee kaa kántí dimanɔ̃fal gbanti. Unimbɔ̃ti ɔ̃nuul dàá n̄n péédàñ udaan pu ní.

Jaan 4

¹Yeesu béè yii Fariisab gbìl̄ yii u kìn ki fùul̄ binib tikpil Unimbɔ̃ti nyim ki jítiñ Jaan ní bi kpántí u-boonnooliibee,

²(ama an kaa n̄n sá Yeesu u-ba di n̄n fùul̄-bi nnyim, an sá u-boonnooliibi di n̄n fùul̄-bi.)

³Ní u yíkì Juudee ki n̄n gítí Gaaliilee.

⁴Kí wàatī kí n̄n bà Gaaliileeyee, see ú dī Samarii watil pú.

⁵Ní u dūu bàñ Samarii tiŋki kin bi yí Siikaar, k̄i p̄l̄iñ Jaakɔ̃b saaku kun u n̄n t̄i u-jipɔ̃ɔ̃n Jooseefee.

⁶Niin ní Jaakɔ̃b lɔ̃kɔ̃u bí. Yeesu c̄ɔ̃m̄ ki ḡnyee, ki kāl̄ lɔ̃kɔ̃ee nyɔ̃ɔ̃gbandi pu. An n̄n ɔ̃m̄ant̄i awinsaan.

⁷U k̄ee ní Usamariinimpu ubɔ̃ dóm̄iñ kí lún nnyim, ní Yeesu m̄ē-u yii: “P̄ɔ̃-mi nnyim m̄ nyò.”

⁸Di sá yii u-boonnooliibi n̄n búnt̄i kitiŋin kí nyàabiñ t̄ijin.

⁹Ní unimpuee kí-u yii: “Sii sá Ujuudaja ní, ba pu ní a m̄ē man un sá Usamariinimpuee nnyim?” (Di sá yii Juuda yab n̄n Samarii yab kaa n̄n kpí.)

¹⁰Ní Yeesu bí-u yii: “A yaa bàà nyí Unimbɔ̃ti p̄ɔ̃tam n̄n man un m̄ē-si nnyimee, sii gba di bàà làá m̄ē man nnyim, ní man n̄n bàà t̄i-si nnyim min t̄i dimanɔ̃falee.”

¹¹Ní unimpuee bí-u yii: “Ukpil, aa cáá guuka, lɔ̃kɔ̃ mun di nyòòyee, kin a dàá ɔ̃á mana kí kánní nnyim min t̄i dimanɔ̃falee gbanti?”

¹²Ti-naanja Jaakɔ̃b di n̄n gb̄iñ-ti lɔ̃kɔ̃ nee, ki nyùñ u-ba lɔ̃kɔ̃ gbanti nyim, ki kpáañ u-biyaamu n̄n u-waŋkuti. Mim mee, sii dàkaf̄i yii a jítiñ Jaakɔ̃baa?”

¹³Ní Yeesu f̄atií kí-u yii: “Un sá kamaa yaa nyùñ nnyim neeyee, nnyinnyoo dàá gítí cúú udaan.

¹⁴Ama un yaa nyùñ nnyim min man t̄iyyee, nnyinnyoo kaa ti cúú udaan jaanjaan, kun puee nnyim min man t̄iyyee kpántí nnyimbul u-p̄obilin, ní ki kìn ki p̄ub ki t̄i-u mmanɔ̃fɔ̃kɔ̃n ɔ̃n kaa cáá dikuntilee.”

¹⁵Ní unimpuee bí-u yii: “Ukpil, yaa s̄ee t̄i-mi a-nyim gbanti m̄ nyò, nnyinnyoo n̄n taa ti cúú-mi, m̄ taa n̄n gítí d̄oñ doo ki lún nnyim.”

¹⁶Ní Yeesu bí-u yii “Cúú yíiñ a-cal kí f̄at̄i gítí doo!”

¹⁷Ní u kí-u yii: “Maa cáá cal.” Ní Yeesu bí-u yii: “A cáá nsan kí l̄i yii saa cáá cal,

- 18Kun puee a m̀ǹ bininjab biḡmoo dee ki yíkì, ní un cee a bí k̀ḡk̀nnee mun kaa tí sá a-cal. M̀ǹ puee, a s̀oñ a-baam̀ni ní.”
- 19Ní unimpuee bí yii: “Ukpil, k̀ḡk̀nnee m ká yii a baasii sá Unimb̀ti b̀naatiliu ní.
- 20Di sá ti-naanjab ǹn j́am̀ Unimb̀ti dijool nee pu ní, ní nimbi Juuda yab bí yii Jeerusaleem ní bi máan ḱ c̀úú j́am̀ Unimb̀ti.”
- 21Ní Yeesu bí-u yii: “Unimpuee, á p̀lfiǹ-*mi!* Ɔyunti ḡub̀ d̀oñ an kaa d́a gítí b̀lfi yii unil ǹ c̀ú dijool nee puḡḡ Jeerusaleem ní ḱ j́am̀ Unimb̀ti.
- 22Nimbi Samarii yab, naa nyí kun ni j́amee, ama timbee ti nyí un ti j́amee, kun puee Unimb̀ti d̀u difiil ki d́n Juuda yab pu ní.
- 23K̀ḡk̀nnee, ḡyunti ḡub̀ d̀oñ, ḡu b́aán gba, ḡun ni ní bin j́am̀ ti-Baa Unimb̀ti mm̀ntiiminee dàá ǹn j́am̀-*u* ǹ ḡf́amin ǹ ibaam̀n. Kun puee bin j́am̀-*u* mimmee ní Unimb̀ti nyàab.
- 24Unimb̀ti sá Ɔf́am ní: m̀ǹ puee, bin j́am̀-*uee* máan ḱ j́am̀-*u* ǹ ḡf́amin ǹ ibaam̀n.”
- 25Ní unimpuee bí-u yii: “M nyí yii Meesiya (an d̀akà yii Kriisitoo) dàá d́a. Ún yaa láa b́amee, ní u dàá t̀k̀-*ti* tik̀k̀.”
- 26Ní Yeesu bí-u yii: “An sá man un b́i s̀oñ ǹ si nee di sá Kriisitoo.”
- 27Niinee ní Yeesu boonooliibi b́aán, ní an ḡá-*bi* bitii bi ńn ká u ǹ unimpu b́i s̀oñee, ama baa b̀lfi yii: “A là ba u-*cee?* ” áá “A s̀oñ ǹ u tilati?”
- 28Niinee ní unimpuee yánti u-nyimbool ki f́ati ńn gítí mm̀ḡki, ki t̀k̀ binib yii:
- 29“D́a k̀p̀emaan uninja ub̀ b́iti m-*b̀ḡḡḡ* pu! An kaa kalin sá Kriisitoooo?”
- 30Ní bi yík̀n kitiḡin ki ńn d̀oñ Yeesu cee.
- 31Unimpuee búntè, ní u-boonooliibi b́i l̀ yii: “Ukpil, d́a j́i t́jin!”
- 32Ní u bí-*bi* yii: “Man cáá t́jin tin nimbi kaa nyée.”
- 33Niinee ní u-boonooliibi ḱn ki b́i b̀lfi t̀b yii: “Uḡ kalin cáan-*u* t́jin níin?”
- 34Ní Yeesu bí-*bi* yii: “M-*jinti* di sá m̀ ḡá un túnní-*mee* ńn là puee, ḱ ḡá u-tundi.
- 35Kee, ni cáá yii an ḱn iḡmal inaa dee, kudiceeuaa! Ama man t̀k̀-*ni* yii ní wáan ḱ k̀p̀è, t́jin ḱn ki ḡmánti dicál.
- 36Kii un c̀ēyee ńn k̀ontí ki k̀áfí ki f̀oḡ u-*paati* puee, m̀ǹ mbaantiim ni mun cáamman binib m-*cee* m̀ t́-*bi* mmaḡfaf̀k̀n ḡun kaa cáá dikuntilee. Ní an m̀ḡk̀n un búlee ǹ un cánee k̀k̀.
- 37Kun puee dilanḡpandi din l̀ yii: ‘Uḡ b́ul ní ub̀ ǹ d́a c̀ē’ sá t́ḡman ní.
- 38M̀ǹ puee, m tú-*ni* ní c̀úú ća laakin biba búlee ní, nimbi ǹ páatí b́n ḡíndi pu.”

- ³⁹Unimpuee nín tükū-bi yii Yeesu bīiti u-bōoŋŋi puee, ní Samarii yab bin kòò kitiŋ gbantinee tikpil fṣṣ Yeesu ki kíf.
- ⁴⁰Samarii yab gbanti nín dāa bāaŋ ki ká-uee, ní bi mēē-u yii ú kāl bi-cee, ní u lafun kāl iwiin ili.
- ⁴¹Binib tikpil nèn gítī fṣṣ-u ki kíf tin u nèn sòoŋ nì bee pu.
- ⁴²Ní binibee lī unimpuee yii: “Ti nín fṣṣ ki kíf nee, an kaa ti sá sii nín lī puee ŋmaniŋma pu. U sòoŋ ti mun ti-ba gbīl ki béè yii, ibaamōn, u sá duulnya kòkò Fiiliu.”
- ⁴³Iwiin ili gbanti boonee, Yeesu yíkì niin ki nín cá Gaaliilee.
- ⁴⁴Kun puee úh u-ba nèn lī yii: “Unimbōti bōnaatiliu dumpu yab kaa tó-u.”
- ⁴⁵U nín bàñ Gaaliileeyee, niin yab fṣṣ-u tiŋan, kun puee bi nèn cūti Jeerusaleem ki ká u nín nèn ḡá tin kòkò jiŋaalinee.
- ⁴⁶Ní u fātī gítī Kana, Gaaliilee timbilikin, laakin u nèn dū nnyim ki kpánti ndaamee. Gōmina kalinjakpaanu ubo nèn bí Kapeenaayum u-jipōon būh.
- ⁴⁷U gbīl yii Yeesu nyánní Juudee ki dómín Gaaliileeyee, ní u dómín u-cee ki gbāam-u ú cù Kapeenaayum kí cáan u-jipōon un būh ki dàá kpúee.
- ⁴⁸Ní Yeesu bí-u yii: “Ni yaa kaa ká maamaacib, naa fòol kí kíf!”
- ⁴⁹Ní ukalinjakpaanee bí-u yii: “Ukpil, dāaŋ tí cù malaa, m-biki ḡ taa kpú!”
- ⁵⁰Ní Yeesu kíf-u yii: “Nín cá, a-jipōon pòkì.” Uninjee fṣṣ Yeesu nín lī puee ní ki nín cá.
- ⁵¹U bí nsanni ki fātī kùnee, ní u-tòntòntliibi biba túŋkín-u ki tükū-u yii: “A-jipōon pòkì.”
- ⁵²Ní u bālfī-bi yii: “Dyunti ḡulōŋu ní an yānti-u?” Ní bi kíf-u yii: “Fool, kukuluu kubō, ní an cānti-u, u-wunti kaa ti tùm.”
- ⁵³Niinee ní u béè yii kukuluu gbanti deedee ní Yeesu tükū-u yii: “A-jipōon pòkì”. Ní u nì u-dicaŋku kòkò fṣṣ Yeesu ki kíf.
- ⁵⁴Yeesu nín yíkì Juudee ki fātī Gaaliileeyee, maamaacililiiti un u ḡee dee.

Jaan 5

- ¹Boonee ní Yeesu nín jóm Jeerusaleem kun puee Juuda yab nèn cáá jiŋaal ubo.
- ²Dinyimbōbil diba nèn bí Jeerusaleem, kadantikub biŋmoo māntii tú-dì, bi yî-dì Eebru soonin yii Beeteesida, di bí ki nákaŋ kipunyòkò kin bi yî ipii punyòkòee.
- ³Bijofub nì bideembi nì bifaliŋfaambi nì bibunliibi tikpil nèn dō kadantikub taapu [ki cí ŋyunti ḡun Unimbōti tūuŋŋu dàá dāaŋ kí gbātī nnyimee.
- ⁴Di sá ntūunee nèn dōoŋ ḡyunti ḡyunti ki gbātī nnyim. Du yaa gbātī mín, ní un yaa péé péé ki kóee kántí dicaandi, bàà an yaa yānti ki sá iween in.]

- ⁵Uninja ubo nìn bí niin ki bũn doooo abin ali kpá imuṅku ili.
- ⁶Yeesu ká u dōee, ní ki béè yii u bũnee an yúntì, ní u bálfi-u yii: “A là kí pōkàaa?”
- ⁷Ní ubunlee kí-u yii: “Ukpil, bi yaa gbātì nnyimee, maa cáá ubo ń yòoñ-mi kí tō niin. Dyunti ṅun m bí pōontí ki céé ní ubo ń péèñ-mi kí cùú jēetí.”
- ⁸Niinee ní Yeesu bí-u yii: “Yíkíí yūl kí yòoñ a-kampeeku kí còom!”
- ⁹Kpalaa niinee ní uninjee pókì ki yōon u-kampeeku ki kíñ ki bí còom. An nìn sá ṅwiṅṅufikaa dal ní.
- ¹⁰Mín pu ní Juuda yab kpilib nìn bí uninja un ká dicaandee yii: “Dín di sá ṅwiṅṅufikaa dal. Aa cáá nsan kí bũkuñ a-kampeeku.”
- ¹¹Ní u kíí-bi yii: “Un cáañ-mee di bí-mi yii ń yòoñ m-kampeeku kí nīn còom.”
- ¹²Ní bi bálfi-u yii: “Dma di bí-si yii á yòoñ a-kampeeku kí nīn còom ní?”
- ¹³Uninjee kaa nìn nyí un di cáañ-uee kun puee Yeesu nìn nyán kunipaau kansikin ki búntì.
- ¹⁴Boonee ní Yeesu dāa ká uninjee Kunimbōtidiin ní ki bí-u yii: “A nín pókì pu nee, á taa ti ńá ikpiti, an nín dàá ńá pu tiba ń taa láā gítí bāñ-si kí jītìn tin bí neeyee!”
- ¹⁵Niinee, uninjee cūti tūkū Juuda yab kpilib yii an sá Yeesu di cáañ-u.
- ¹⁶Mín pu ní Juuda yab nìn páb Yeesu u nín ńá mín ṅwiṅṅufikaa dalee pu.
- ¹⁷Ní Yeesu kíí-bi yii: “M-Baa tūn ditundi baabadal, mín ní man mun tūn.”
- ¹⁸Tibōti tin u lēe puee, Juuda yab kpilib mōtì bí nyàab kí kpò-u. An kaa sá u nín yīntì mara un sá bí taa tō ditundi ṅwiṅṅufikaayee ṅmanīṅma pu, an sá u nín lī yii Unimbōti di sá u-Baayee, ki cáá u-ba ki ṅmàntìn Unimbōtee pu.
- ¹⁹Niinee ní Yeesu bí-bi yii: “Ibaamōn, ibaamōn ní m sòon nì ni, tin Ubaati ńáánee ní u-Jipōon kántí ki ńááñ. An yaa sá fam, waa ṅūn kí ńá tiba u-ba ṅma. Tin kōkō Ubaati ńáánee, u-Jipōon mun ńááñ mín mbaantiim ní.
- ²⁰Kun puee Ubaati néeñ u-Jipōon, ní ki dākà-u tin kōkōwoooo u ńáánee. U dàá dāá gítí dākà-u tin jítìn tin bí neeyee gba, án dàá ńá-ni maamaaci.
- ²¹Kii Ubaati nín fikiti bitaṅkpibi ki tì-bi dimaṅfal puee, mín mbaantiim ní u-Jipōon mun tì un un u yaa lèe dimaṅfal.
- ²²Ubaati kaa sòon báà ubo bōti, u dū ibōsoon kōkō ki ńá u-Jipōon ṅaan ní,
- ²³an nín dàá ńá pu binib kōkō ń nīn tì-u jilma kii bi nín tì Ubaati puee. Un kaa tī Ubaati Jipōon jilmee kaa tī Ubaati un túnní-uee mun jilma dee.
- ²⁴“Ibaamōn, ibaamōn ní m tūkù-ni, un yaa pílfì m-bōti ki fōō un túnní-mee ki kíyee kántí dimaṅfal din kaa cáá dikuntilee, udaan kaa dāa gítí bí ibōsoon ni, u nyán ṅkúmin ki pótì dimaṅfalin.

- ²⁵Ibaamɔn, ibaamɔn ní m tükù-ni, nyunti jubɔ dòón, ɲu bāán gba, ɲun ni bitaŋkpiibi dàá gbīl Unimbɔti Jipɔɔn neenee, ní bin yaa láá gbīl u-neen gbantee dāa kánti dimaŋfal.
- ²⁶Ubaati nín cáá mpɔn kí tī dimaŋfal puee, mín ní u tī u-Jipɔɔn mpɔn ú mun n̄ n̄n tì dimaŋfal,
- ²⁷ní ki tī-u mpɔn ú n̄n sá ubɔsoonli kun puee u sá Kinibiki.
- ²⁸Án taa bàkatīn-ni, kun puee nyunti jubɔ dòón ɲun ni bin kəkɔ dɔ akaakul poonee dàá dāá gbīl u-neen pu
- ²⁹kí nyānnée, bin yaa ɲá tiŋanee n̄ fikitī kí ká dimaŋfal, ní bin yaa ɲá ikpatee n̄ fikitī kí kó ibɔsoon ni.”
- ³⁰“Maa ɲūn kí ɲá tiba m-ba. M-bɔsooni n̄óó n̄ un túnní-mee nín tükù-mi puee ní, m sòòn tibɔti deede kun puee maa nyàáb kí ɲá min man m-ba lèe, see un túnní-mee nín là puee.
- ³¹M yaa sòòn tiba m-ba pu, an kaa ɲūn kí dākà ibaamɔn,
- ³²ama ubɔ di lèekī m-pu seera, ní m nyí yii tin u sòòn m-puee sá ibaamɔn.
- ³³Ni n̄n tú binib Jaan cee ní u sòòn-ni ibaamɔn m-pu.
- ³⁴Kun pu m l̄ mimmee di sá m là ní ká difiil, an yaa sá fam, maa nyàáb ubɔ n̄ lēem-pu seera.
- ³⁵Jaan n̄n sá fitila ní ki ɲmíntí nyákányaka, ní ni n̄n k̄í ki n̄óó u-walfiɲu gbanti nyunti jubɔ poon, ní an m̄n̄-ni.
- ³⁶Ama m cáá kun lèekī m-pu seera ki jítiñ Jaanee: di sá yii atuun ɲin m-Baa tī-mi m̄ ɲá m b̄í ɲáánee sòòn ki dākà m-pu yii m-Baa di lafun túnní-mi.
- ³⁷Ní m-Baa un túnní-mee mun u-ba lèekī seera m-pu. Naa láá péēgbīl u-neen pu dalba, kaa láá ká u-nimiin dalba,
- ³⁸kaa kpáafí u-bɔti mun ni-ni kun puee naa f̄ɔ̄ un u túnnée ki k̄í.
- ³⁹Ni bífí Unimbɔti takaldau poon ki dākafī yii niin ní ni ɲūn kí ká dimaŋfal din kaa cáá dikuntilee. An sá man pu ní takaldee sòòn,
- ⁴⁰ama naa là kí dāān man cee kí ká dimaŋfal.
- ⁴¹“Man kaa nyàáb binib pampakaku,
- ⁴²di sá yii m nyí-ni, naa cáá Unimbɔti neendi ni-ni
- ⁴³M-Baa di túnní-mi, ní naa là kí f̄ɔ̄-mi, ama bin dòón bi-ba puee, ni f̄oól b̄ín.
- ⁴⁴Mana ní ni ɲūn kí f̄ɔ̄ kí k̄í, nimbi bin néen ni-jutiibi n̄ n̄n pākà-nee, kaa nyàáb kupampakau kun Unimbɔtibaanti t̄iye?

⁴⁵Ní taa dàkafi yii man dàá dāá bàlfi-ni tiboti m-Baa nimiin, an sá Mooisi, un pu ni dū ni-mákal ki ñée, ún di dàá dāá bàlfi-ni tiboti.

⁴⁶Ni yaa bàà fṵṵ Mooisi ki kííyee, ni bàà tí fṵoḷ man mun ní kí kíí, di sá yii man bṵti ní Mooisi nìn ñmāñ.

⁴⁷Ni nín kaa fṵṵ tin Mooisi nìn ñmāñee ki kííyee, ni dàá ñá mana kí fṵṵ man bṵti kí kíí?”

Jaan 6

¹Mín boonee ní Yeesu dūti Gaaliilee mṵṵṵbandi lapu pu (bi gítī yíi dimṵṵlee yii Tiibeeriyaadi mṵṵl.)

²Kunipaau nín kánti u ñáañ maamaacib bin ki cáañ bibunliibee puee ní bi nìn nṵṵ-u.

³Ní u nì u-boonnooliibi jóm digbantandi diba pu ki kāl.

⁴Juuda yab jiñaaliu un bi jñ ki tétí Unimbṵti nín nìn nyánti bi-naanjab Eejipitee nìn tṵobiñ.

⁵Yeesu kpēyee, kunipaau di dṵṵn u-ceeyee, ní u bí Fiiliipi yii: “La ní ti dàá ká tijin kí dā kí tī bin kṵkṵ bí nee ñ jī dee?”

⁶Ama Yeesu nìn nyí min ní u dàá ñée, u nìn péēlī mín kí kpèè yii Fiiliipi dàá kíí-u yii ba.

⁷Ní Fiiliipi kíí-u yii: “Báà ti yaa dū animil cutimaanyi ki dá kpṵṵṵ, an kaa làá bà bi-kṵkṵ kikatii kikatii gba.”

⁸Ní u-boonnooliibi kansikin ubṵ, Siimṵn Piyeer naal un bi yñ Andreeyee, bí-u yii:

⁹“Kinaacimpṵmbiki kiba bí doo ki cáañ ṵji yim kpṵṵṵ biṵmoo nì ijṵm ili. An kaa nín ññ kí ñá kunipaau nee tiba ní.”

¹⁰Ní Yeesu bí-bi yii: “Yántīmaan binib ñ kāl!” Kumṵṵṵṵṵ kubṵ nìn bí niin tikpil, ní bi kāl ku-pu. Bi nìn bàñ kii kutukub biṵmoo nyṵkṵm.

¹¹Ní Yeesu yṵṵn kpṵṵṵbee ki jáam Unimbṵti an pu ki wāatì ní ki dūu yākatì-bi, ní ki tí yākatì ijṵm mun, min báà ñma lèe.

¹²Bi jín ki díkéé, ní u bí u-boonnooliibi yii: “Kṵṵṵmaan akati ñin kíñee, diba ñ taa bñl!”

¹³Bi kṵṵn kpṵṵṵ biṵmooyee katiṵ ñin bi nìn ñmṵ ki kíñee, ki gbéèñ tikabiti saalaa nì tili.

¹⁴Yeesu ñá maamaaci gbanti samaa kée, ní bi bí yii: “Tilafuṵṵman, kijapaai nee di sá Unimbṵti bṵnaatiliu un máañ kí dāañ duulnyanee.”

¹⁵Yeesu béè yii bi dàá cúú-u mṵṵn kí kàañ dibeelee, ní u fātii tí nín jóm digbantandi pu u-baba.

- 16**Kujoou jótèè ní Yeesu boonnooliibi nín s̄ntī dimoolin
- 17**ki kó bujalimbu ki fātī nín cá Kapeenaayum watil. Kunyeeu mun n̄n mó Yeesu kaa láá b̄aán bi-cee.
- 18**Kubuŋkpaan̄ŋu kubó kí ki b̄ī j̄tī ki yòontí t̄inyiŋban.
- 19**Bi n̄n ñàal̄ ki b̄ań ataŋkpee aŋmoo kii aluu nyokomee, ní ki ká Yeesu nín tókōn n̄nyim pu ki còom̄in̄ ki d̄oón bujalimbu ceeyee, ní bi f̄aŋkì.
- 20**Ní Yeesu bí-bi yii: “Taa f̄aŋkìmaan, an sá man!”
- 21**Niinee ní bi bí yii bí kp̄aañ-u, kpalaayee, bujalimbu mun p̄t̄i d̄ū s̄ā dibuŋbandi laakin bi cée.
- 22**Kutaa w̄unt̄èe, kunipaau gb̄int̄i k̄ā dimoogbandi lapu pu. Bi n̄n ká yii bujalimbaantiibu di yú niin, ní Yeesu kaa kó bujalimbu gbanti, u-boonnooliibi ŋmaniŋma di kó ki búnt̄i.
- 23**Ama iŋaliŋf̄i iba n̄n yánní Tiibeeriyaadi tiŋkin ki b̄aán laakin ti-Dindaan n̄n m̄ēeki p̄akā Unimb̄oti ki w̄at̄i ní bi nín ŋmó kp̄on̄bee caŋin.
- 24**Kunipaau ee nín kaa ká Yeesu kaa ká u-boonnooliibi muee ní bi kó iŋaliŋfee ki búnt̄i Kapeenaayum kí nyàab̄ Yeesu.
- 25**Bi b̄ań niin ki ká-uee, ní ki bí yii: “Ukpil, ŋyunti ŋul̄oŋu ní a b̄aán doo ní?”
- 26**Ní Yeesu bí-bi yii: “Ibaam̄on, ibaam̄on ní m̄ t̄uk̄u-ni, ni nín ŋmó kp̄on̄b̄ ki díkéee pu ní ni nyàab̄-mi, kaa sá maamaacib bin d̄ak̄ā-ni m̄ nín sá uŋyee pu.
- 27**Ní taa n̄n t̄ūn ditundi tijin tin kaa yúnt̄ee pu, n̄n t̄ūmmaan tijin tin yúnt̄í ki t̄i dimaŋfal din kaa cáá dikunt̄ilee pu. Tijin gbant̄ee, man Kinibiki di dàá t̄ī-ni t̄iñ, di sá yii man ní m-Baa Unimb̄oti t̄ī an p̄oŋŋu daaŋku.”
- 28**Niinee ní bi b̄alfi-u yii: “Ti máañ kí ñá mana ní án n̄n sá min Unimb̄oti l̄èe ní?”
- 29**Ní Yeesu kí-bi yii: “Unimb̄oti nín là miŋyee di sá ní f̄ōō man un u túnn̄ee kí kíí.”
- 30**Ní bi bí-u yii: “Maamaaci ul̄ou ní a dàá d̄ak̄à-ti kí w̄at̄i ní t̄i nín f̄ōō-si kí kíí ní? Àá kudaan̄ŋu kul̄oko ní a dàá ñá t̄i ká?”
- 31**Ti-naanjab n̄n j̄ñ tijin tin bi ȳi máanee kup̄ooun, kii an nín ŋm̄ań Unimb̄oti takaldau poon puee, yii: ‘U n̄n t̄i-bi tijin tin nyēēñ yilpuee ní bi j̄ñ.’ “
- 32**Niinee ní Yeesu kí-bi yii: “Ibaam̄on, ibaam̄on ní m̄ t̄uk̄u-ni, an kaa sá Mooisi di t̄ī-ni tijin tin nyēēñ yilpuee, m-Baa di t̄i tijimm̄ontiil tin nyēēñ yilpuee.
- 33**Tijin tin Unimb̄oti t̄iyyee di sá un nyánní yilpu ki t̄i binib k̄oko dimaŋfalee.”
- 34**Ní bi bí-u yii: “Ukpil, n̄n péēt̄i-ti tijinee baabadal!”
- 35**Ní Yeesu bí-bi yii: “Man di sá tijin tin t̄i dimaŋfalee. Un yaa d̄om̄in̄ m-eeeyee, ŋk̄um kaa ti cút̄i udaan jaanjaan; m̄in̄ ní un yaa t̄i f̄ōō-mi ki kííyee, n̄nyinnyoo kaa ti cút̄i udaan jaanjaan.

- 36 Ama, m péētùkū-ni: ni-nimiliŋ ká tin m ɣée ní naa fǝǝ-mi ki kǐí.
- 37 Bin bin m-Baa tī-mee kəkɔ dàá dāān m-cee. Un di yaa dómíń m-ceeyee, maa làá fá udaan,
- 38 kun puee m nyánní yilpu ki dómíń kǐ ɣá un túnní-mee nín là puee ní, an kaa sá man m-ba nín là puee.
- 39 Un túnní-mee nín là puee di sá m taa fá bin u tī-mee kansikin báà ubɔ kǐ dāá fikitī bi-kəkɔ ɣwinjoolkaa dal.
- 40 M-Baa nín là min miŋyee sèé, yii un sá kamaa yaa ká man u-Jipɔɔn ki fǝǝ-mi ki kǐíyee n ká dimaŋfal din kaa cáá dikuntilee, ní man n dāá fikitī-u ɣwinjoolkaa dal.”
- 41 Yeesu nín lī yii ún di sá tijin tin nyánní yilpuee pu ní Juuda yab bí ɣbùkuṁ u-pu
- 42 ki lì yii: “An kaa sá Yeesu Jooseefi jipɔɔn un timbi nyí u-baa nì u-neeee? Kin an ɣá mana ní u gítī lì yii ún di nyánní yilpu ní?”
- 43 Ní Yeesu kǐí-bi yii: “Ní taa nín ɣbùkuṁ ni-ɣmaniŋma mín!
- 44 Ubɔ kaa ɣūn kǐ dāān m-cee an yaa kaa sá m-Baa un túnní-mee di cáān udaan, kǐ wàatī ní man n nín fikitī-u ɣwinjoolkaa dal.
- 45 Kii Unimbɔti bɔnaatiliibi nín ɣmān puee yii: 'Unimbɔti dàá dākà bi-kəkɔ bí béé-u.' Mimmee, bin kəkɔ yaa pílfī m-Baa ki fǝǝ u nín dākà puee dòón man cee ní.
- 46 Báà ubɔ kaa ká m-Baa Unimbɔti asee man un nyánní u-ceeyee, man baba di ká-u.
- 47 “Ibaamɔn, ibaamɔn ní m tükù-ni, un yaa fǝǝ-mi ki kǐíyee cáá dimaŋfal din kaa cáá dikuntilee.
- 48 Man di sá tijin tin tì dimaŋfalee.
- 49 Nì min kəkɔ ni-naanjab nìn ɣmó máana kupɔɔunee, boonee bi dāa kpíi.
- 50 Ama tijin tin nyánní yilpuee, un yaa jín tintee kaa ti kúu jaanjaan.
- 51 Man di sá tijin tin nyánní yilpu ki cáá dimaŋfalee. Un yaa jín tijin gbantee dàá nín bí kǐ nín cá jaanjaan. Tijin tin m dàá tī binib kəkɔ n nín cáá dimaŋfalee di sá m-wunti.”
- 52 Niinee ní Juuda yab bí kpákà bi-ɣmaniŋma tikpil yii: “Nì mana ní u ɣūn kǐ tī-ti u-wunti tí ɣmó mín?”
- 53 Ní Yeesu fātī bí-bi yii! “Ibaamɔn, ibaamɔn ní m tükù-ni, ni yaa kaa ɣmó man Kinibiki wunti, kaa nyūn m-fatikuu muae, naa làá ká dimaŋfal.
- 54 Ama sii un yaa ɣmó m-wunti ki nyūn m-fatikuu ká mmaŋfafɔkɔn ɣun kaa cáá dikuntilee, ní m dāá fikitī-si ɣwinjoolkaa dal.
- 55 Kun puee m-wunti di sá tijimmontiil ní m-fatikuu mun sá tinyɔkaal tin sá timontiilee.
- 56 Un yaa ɣmó m-wunti ki nyūn m-fatikuu bí m-ni ní man mun bí udaan ni.

⁵⁷M-Baa un túnní-mee nín cáá dimaṅfal puee ní u-puee man mun cáá dimaṅfal, míh ní un yaa fṓṓ-mi ki jínee mun kántí dimaṅfal man pu.

⁵⁸Tijin tin nyánní yilpuee nín bí puee dee. Tíh kaa bí kii tin ni-naanjab nín jín boonee ki dāa kpíyee. Sii un di yaa jín tijin gbantee dàá nīn kīn ki bí kī nīn cá jaanjaan.”

⁵⁹Tin tin Yeesu nín sòōn Kapeenaayum kpafidiikun ki dākā binibee dee.

⁶⁰Yeesu boonnooliibi tikpil nín gbīl tibṓti gbantee, ní bi bī lī yii: “Tibṓti nee pṓṓ tikpil! Dma di ṅūn kī pīlfi-tì?”

⁶¹Yeesu bēè yii u-boonnooliibi bī gbūkuṁ tibṓti gbanti puee ní u bālfī-bi yii: “Tibṓti gbanti páb-ni níin?”

⁶²Mimmee, ni yaa láā ká man Kinibiki fātī jóm laakin m nín péēbínee faa?

⁶³Unil nì u-póòntam kòkò sá fam ní, see Dfām di tì mmaṅfafòkòn ṅun kaa cáá dikuntilee. Míh ní m-bṓti tin m sòōn nì nee sá Unimbṓti Fām ní ki sá dimaṅfal.

⁶⁴Ama ni-kansikin biba bí, kaa fṓṓ ki kíí.” Kun di yì-tì Yeesu sòōn mimmee di sá u nín péēnyí bin kaa fṓṓ ki kíyee doooo ṅkilkaamin, nì un dàá dāá dū-u kī tī binannanliibee.

⁶⁵Ní u lī-bi yii: “Míh pu ní m tükū-ni yii ubò kaa ṅūn kī dāān m-cee an yaa kaa tin sá m-Baa Unimbṓti di cáān-u.”

⁶⁶Ki yṓòn an yuntiṅu ní Yeesu boonnooliibi tikpil yí, kaa ti nók-u.

⁶⁷Niinee ní Yeesu bí u-kpambaliṅ saalaa nì alee yii: “Kin nimbi faa, ni mun kaa làá nīn cáaa?”

⁶⁸Ní Piyeer kíí-u yii: “Ti-Dindaan, sii di cáá tibṓti tin tì mmaṅfafòkòn ṅun kaa cáá dikuntilee. Dma cee ní ti dàá gītī cù?”

⁶⁹Timbi fṓṓ sii ní ki kíí, ní ki nyí yii sii di sá Circirdaan un nyánní Unimbṓti ceeyee.”

⁷⁰Niinee ní Yeesu bí yii: “Man di kaa nín lēē-ni binib saalaa nì bilaaa? Ama ni-kansikinee, ubò sá Sitaan ní!”

⁷¹Juudasi un sá Siimòn Iskaariyṓti jipṓnee pu ní u nín sòōn míh. Di sá yii nì min kòkò Juudasi mun nín sá u-kpambaliṅ saalaa nì alee kansikin dibee ún di dàá dū-u kī ṅúbin binannanliibi.

Jaan 7

¹Míh boonee, Yeesu nín kīn ki bī yíin Gaaliilee timmun, kaa là kī yíin Juudee watil, kun puee Juuda yab yidambi nín nyàab kī kpò-u.

²Juuda yab jīṅaaliu un poon bi nín gà tibínee tóobiínee,

³ní Yeesu naalib bí-u yii: “Níñ cá Juudee, an nín dàá ṅá pu a-boonnooliibi mun n tin ká atuun ṅin a ṅáánee.

- ⁴Unil yaa là bí ká-uee, waa gítī tūn u-tuunji dibalin, mín puee, ñá a-tuunji gbanti báa ñma ñ ká.”
- ⁵Di sá yii Yeesu naalib mun gba kaa nìn là kí fṣṣ-u kí kífí.
- ⁶Niinee ní Yeesu kífí-bi yii: “An yaa sá nimbee, iyunti kòkò péēñāñ ki tī-ni ní, man yuntiñu kaa láá bāañ.
- ⁷Duulnya yab kaa ñūn kí nīn ná nimbi, ama bi ná man, kun puee man sòon yii tin bi ñáañee sá atuñkpiti.
- ⁸Nimbi nīñ cámaan jiñaal gbanti. Man kaa láá cù. Di sá yii m-yuntiñu kaa láá ñmāntì.”
- ⁹U lī-bi mimmee, ní ki gbíntìi ká Gaaliilee.
- ¹⁰U-naalib búnti jiñaal gbanti, boonee ní ú mun dāa dī dibalin ki cūti, kaa là bí ká-u.
- ¹¹Jiñaal gbantinee, Juuda yab kpilib nìn nyàab-u ki bàlfī tób yii: “U nín bí la dee?”
- ¹²Ní binib tikpil nìn lókofí Yeesu bōti pu samaa kansikin, biba bí yii: “U sá unimōnti.” Ní biba mun bí yii: “Waa sá unimōnti, u sá uñmatinli ní.”
- ¹³Mín puee, ubo kaa nìn sòon mpōn, di sá yii bi nìn fāñkí Juuda yab kpilib.
- ¹⁴Bi jín jiñaal ki kó kansikinee, ní Yeesu nín jóm Kunimbōtidiin ki cūti bíi dākà binib.
- ¹⁵Juuda yab kpilib nìn bākati seeee, ní ki bíi lì yii: “An ñá mana ní unil nee nyí Unimbōti takaldau mín, ùn un kaa ñá an sukuliuee?”
- ¹⁶Ní Yeesu bí-bi yii: “M-dàkatam nee nyēēñ un túnní-mee cee ní, an kaa sá man m-ba dākatom.
- ¹⁷Un yaa là kí ñá min Unimbōti lèe, udaan dàá béé m-dàkatam nee yaa nyēēñ Unimbōti ceeyaaa an yaa tí sá man m-ba pōññu pu ní m dākà.
- ¹⁸Un sòon u-ba bindi puee nyàab kí yòon u-ba yilpu ní, ama un nyàab kí yòon un túnní-uee yindi yilpuee di cáá ibaamōn, nnyimōn kpá udaan ùn-ni.
- ¹⁹Mooisi di nìn tī-ni marab áá an kaa sá mín? Kin, ba ñá ní ni-kansikin báà ubo kaa tó marab gbanti?
- ²⁰Ba di yì-tì ní ni là kí kpò-mi?” Ní samaayee bí-u yii: “Arasinii ká a-pu níiin? Ìma di là kí kpò-si ní?”
- ²¹Ní Yeesu kífí-bi yii: “Ditumbaantiil din m ñá ñwiññuñfikaa dalee pu ní ni kòkò bākati nee.
- ²²Ama ni kíikí ki gífí ni-biyaamu ñwiññuñfikaa dal, kun puee Mooisi di nìn tī-ni mara gbanti. (Ama an kaa nìn sá Mooisi di náanní, doooo ni-naañab ní an nìn kílín.)
- ²³Ni nín kaa là kí yintí Mooisi marabee puee, ní ni gífí ñwiññuñfikaa dal. Mimmee, ba pu ní ni fṣṣ man pu diñuul yii m cáañ uninja ubo weeni kòkò ñwiññuñfikaa dal?

- 24**Ní taa pò digàndi ama ní tókòñ ibaamɔn pu kí sòòn nì deede.”
- 25**Niinee ní Jeerusaleem yab biba bī lì yii: “An kaa sá un bi là kí kpòee deeee?”
- 26**Kin, an ñá mana ní u yú ki tó u-ba mpaampiin pu doo ki sòòn, ubo kaa bī li-u tiba! Àá biyidambi kalin bée yii ùn di sá Kriisitoo ní?
- 27**Ama uninja nee ùn-uee, ti nyí laakin u nyánnée, an yaa sá Kriisitooyee ubo kaa dāa bétí laakin ní ùn sée.”
- 28**Dyuntee, Yeesu nìn bí Kunimbətidiin ki dākà, ní ki téén mpɔn yii: “Ni nyí-mi, ki nyí laan̄kin mun m sée. Maa dómín m-ba pu, un sá ibaamɔndaanee di túnní-mi, ní naa nyí-u.
- 29**Ama man nyí-u, kun puee u-cee ní m nyánní, ùn di túnní-mi.”
- 30**Niinee ní bi bī nyàab̄ kí cúú-u, ama báà ubo ñal kaa máaán u-pu, kun puee u-yuntijū kaa láá bāań.
- 31**Samaa kansikinee, binib tikpil nìn f̄ṣ̄-u ki kíí, ní ki bī cáá yii: “Mimnee, Kriisitoo yaa láá bāańee, u dāa ñūn kí ñá maamaacib kí jītín kijapaai nee deeee?”
- 32**Fariisab nín gbīl̄ samaa bī sòòn Yeesu pu mimnee, ní bi nì bisaraan̄akpilib tú soojab̄ n̄ cù kí cúuń-u.
- 33**Ní Yeesu tükū-bi yii: “Dyunti fiii ní m dàá gítí ñá ni-kansikin, ní kí n̄n gítí un túnní-mee cee,
- 34**ní ni dàá dāa nyàab̄-mi, kaa làá ká-mi, kun puee naa làá ñmā kí dāań laakin m dàa n̄n bée.”
- 35**Niinee ní Juuda yab kpilib bī balfi tɔb yii: “La ní u dàá cù ní ki nín tükū-ti yii taa làá ñmā kí ká-u? Àá, u dàá kalin cù Juuda yab bin yāl̄ ki kó Greekib timmune cee kí dākà Greekib Unimbəti bəti ní?”
- 36**U nín bí yii: Ni dàá nyàab̄-mi, kaa làá ká-mi, ki gítí lī-ti yii: Naa làá ñmā kí dāań laakin m dàa n̄n bée, taapu nín sá yii ba dee?”
- 37**Dwiin ñun jiñaal kúntée bəti di nìn páb. Dwiin gbanti ní Yeesu nìn yúl̄ samaa kansikin ki téén yii: “Un ní nnyinnyoo yaa cááyee n̄ dāań m-cee kí nyò!”
- 38**Un di yaa f̄ṣ̄-mi ki kííyee, nnyim min tìl̄ dimañfalee dàá kpántí mbun kí n̄n pùub̄ udaan pòbilin, kii Unimbəti takaldau poon an nín ñmāń ki síh̄ puee.”
- 39**Bin f̄ṣ̄ Yeesu ki kííyee nín dàá f̄ṣ̄ Unimbəti Fām miñyee pu ní Yeesu nìn bī sòòn nì bi. Dyunti gbantee, Unimbəti Fām kaa láá dómín kun puee Yeesu kaa nìn dáá f̄ṣ̄ u-nyooti.
- 40**Kunipaauee kansikin biba gbīl̄ an nyɔɔbuñjee, ní ki bí yii: “Unil nee lafun sá Unimbəti bənaatiliu un ti cée ní!”
- 41**Ní biba mun bí yii: “Ún di sá Kriisitoo!” Ní biba mun gítí bí yii: “Kriisitoo ñūn kí nyānní Gaaliileeee?”

⁴²Ama Unimbōti takaldau tükù-ti yii Kriisitoo dàá dāá nīn sá Dafiidi maaliṅun, ní ki sá Beetleem, kitiṅ kin ni Dafiidi nīn sée.”

⁴³Yeesu puee kunipaauee nīn cúū yākatì mili.

⁴⁴Ní bi-kansikin biba bàà nīn là kí cúú-u, ama báà ubo ṅal kaa máań u-pu.

⁴⁵Soojab nīn fātii gítì bisaraaṅakpilib nì Fariisab ceeyee, ní bi bālfì soojabee yii: “Ba ṅá ní naa cáań-u ní?”

⁴⁶Ní soojab kíí-bi yii: “Doooo nee, taa láá ká ubo sòòń kii kijapaai nee!”

⁴⁷Ní Fariisab fātii bí soojabee yii: “Ni mun yāntì u kíìl-ni naaan?”

⁴⁸Ni ká biyidambi kansikin ubo àá Fariisab kansikin ubo fṣṣ-u ki kííi?

⁴⁹An sá binifantantiibi bin kaa nyí Unimbōti marab ki sá mbusudambee, bīn di fṣṣ-u ki kíí.”

⁵⁰Niikoodeem un nīn cūtii ká Yeesu ṅyunti ṅubōee mun nīn ṅmāl Fariisab kansikin, ùn di bí yii:

⁵¹“Ti-marab poonee, an pú-ti nsan tí kpò unil bōti fam, kaa bālfì-u ki bée kun u ṅéee?”

⁵²Ní bi kíí-u yii: “A mun sá Gaaliilee níin? Nyàab Unimbōti takaldau poon kí kpèè! A dàá ká, baa ṅmāń yii Unimbōti bōnaatiliu ubo dàá nyānní Gaaliilee!”

[⁵³Niinee ní bi-kəko yāań ki nīn kùń bi-dumpui.

Jaan 8

¹Ní Yeesu, ùn nīn jóm Oliifi sufii jool pu.

²Kutaa wúntì kutaafaau pòl pōlee, ní u fātii nīn gítiiń Kunimbōtidiin, ní binib tikpil dómiiń u-cee, niinee ní u kāl ki bī dākà-bi Unimbōti bōti.

³Ní bimaradakaliibi nì Fariisab cáań-u unimpu ubo, bi nīn cúú-u u bī ṅáań tilaakpaal. Ní bi cáá-u ki yóòń kunipaau kansikin,

⁴ní ki bí Yeesu yii: “Ukpil, unimpu nee bī ṅáań tilaakpaal ní ti cúú-u.

⁵Mooisi marab poonee, u bí-ti yii tí dū ataṅkpee kí yāṅkì an nimpoobee kí kpò. Mimmee, sii ká yii ba?”

⁶Bi nīn píí Yeesu ki là ú sòòń kí kó bi-bōtinee, ní bi cáań-u an bōti. Ní Yeesu bōòń ki cáá u-ṅambiki ki ṅmà kitiṅ.

⁷Bi gbíntii bī bālfì-uee, ní Yeesu yáatì, ní ki bí-bi yii: “Ni-kansikin un di yaa kaa péēṅá ikpiti ki kée n péé péé kí dū ditaṅkpal kí yā unimpu nee!”

⁸Ní ki fātii tí bōòń ki bī ṅmà kitiṅ.

- ⁹Binibee nín gbìl mimmee, ní bi kìn ki sùtí ubo ubo ki wāatì unimpuee, ki kílín bitikpilib ki dāa dūu kúntì ɲwaamu, ní an tin kìn Yeesu baba, ní unimpuee yú ki kólí-u.
- ¹⁰Ní Yeesu yáatì ki bí yii: “Unimpuee, bin cáañ-see bí la? Kee, báà ubo kaa ɲá-si tibiaa!”
- ¹¹Ní unimpuee kílí-u yii: “Aayee, ukpil, báà ubo kaa ɲá-mi tiba.” Ní Yeesu bí-u yii: “Man mun kaa làá ɲá-si tiba. Á nīn cá kí taa ti ɲá ikpiti.”]
- ¹²Ní Yeesu fātii yḡoñ dinyḡobundi ki bī sòoñ nì kunipaauee yii: “Man di sá ɲwalfi ɲun ɲmíntí binibee. Un yaa nḡó-mee dàá ká ɲwalfi ɲun tìi dimañfalee, udaan kpá kí còom dibḡombḡandin.”
- ¹³Ní Fariisab bí-u yii: “A nín bī sòoñ a-ba pu min nee, tin a sòoñee kaa sá ibaamḡon.”
- ¹⁴Ní Yeesu kílí-bi yii: “Nì min kamaa m bī sòoñ m-ba pu nee, an sá ibaamḡon ní, di sá m nyí laakin m nyánnée ki nyí laakin m cée mun. Ama nimbi kaa nyí laakin m nyánnéeyaaa kaa nyí laakin m cée mun.
- ¹⁵Nimbi sòoñ tibḡti nniyaamin ní, man kaa sòoñ báà ubo bḡti.
- ¹⁶Báà m yaa bī sòoñ ubo bḡtaaa, m sòoñ-tì nì ibaamḡon ní, kun puee maa bí m-baba, m-Baa un túnní-mee bí m-cee.
- ¹⁷Ni-marab poonee, an ɲmāñ yii binib bili yaa sòoñ tibḡti mbaantiiminee, an sá ibaamḡon ní.
- ¹⁸Míñ di sá m sòoñ m-ba pu, ní m-Baa un túnní-mee mun lèekī m-pu seera.”
- ¹⁹Ní bi bālfí Yeesu yii: “A-Baa bí la ní?” Ní u kílí-bi yii: “Naa nyí-maaan kaa nyí m-Baa mun. Ni yaa bàà nyí-mi ni bàà nyí m-baa mun.”
- ²⁰Yeesu sòoñ tibḡti nee ɲyunti ɲun u bī dākà samaa Kunimbḡtidiin, laakin bi ɲáañ saraa nimiliḡee, ní báà ubo kaa tānti u-ɲal ki gbēē-u, kun puee u-yuntiḡu kaa láá bāañ.
- ²¹Ní Yeesu gítí bí-bi yii: “M dàá nīn cá, boonee ni dàá dāá nyàab-mi, kaa làá ká-mi, ní kí dāá kpáā kpú ni-kpitii poon. Naa làá ɲmā kí dāañ laakin m cée.”
- ²²Niinee ní Juuda yab bī sòoñ yii: “Mim mee, u dàá kalin kpò u-ba naaan? Ba pu ní u bí yii, naa ɲūñ kí dāañ laakin m cée?”
- ²³Ní Yeesu kílí-bi yii: “Nimbi sá taapu doo yab ní, man nyánní yilpu ní. Ni sá duulnya yab ní, man kaa sá duulnya yḡu.
- ²⁴An pu ní m tükū-ni yii ni dàá kpú ni-kpitii poon. Ni yaa kaa fḡḡ ki kílí yii 'man di sá un m sée' ni dàá kpú ni-kpitii poon.”
- ²⁵Ní bi bālfí-u yii: “Sii di sá ɲma ní?” Ní u kílí-bi yii: “M nīn péētükū-ni doooo mpeekaam un m sée.
- ²⁶M cáá tibḡti tikpil kí sòoñ ni-pu kí kpò ni-bḡti. Un túnní-mee sá ibaamḡndaan, ní tin u tükū-mee ní m cáá bī sòoñ ki tükū nimbi taapu doo nib.”

- 27 Ama Juuda yab kaa nìn nyí yii Unimbɔti Ubaati pu ní u bī sòòn nì bi.
- 28 Mìn pu ní Yeesu nìn gítī tükū-bi yii: “Ni yaa láā yǎòn man Kinibiki yilpuee, ní ni dāa béetí m nín sá uŋyee, maa ŋáań tiba m-ba pɔŋɔ pu, see tin m-Baa dākā-mee ní m cáā sòòn.
- 29 Un túnní-mee bí m-cee, waa yàntī m nīn bí m-baba, kun puee m péēŋáań baabadal min fáatì-uee ní.”
- 30 Yeesu nín nìn bī sòòn tibɔti gbantee, binib tikpil nìn fǎǎ-u ki kífí.
- 31 Niinee ní Yeesu bí Juuda yab bin fǎǎ-u ki kífí yii: “Ni yaa ŋúb m-bɔti nee ni dàá nīn sá m-boonnooliibi tiŋman pu yab,
- 32 kí béé ibaamɔn, ní ibaamɔnee n̄ yàntī ní tǔ ni-ba.”
- 33 Ní bi kífí Yeesu yii: “Ti sá Abraam naantiibi ní, doooo nee ubɔ kaa péécúú timbi kuyɔŋu. Ba di yāntì ní a bí yii ti dàá tǔ ti-ba?”
- 34 Ní Yeesu kífí-bi yii: “Ibaamɔn, ibaamɔn ní m sòòn nì ni, un sá kamaa yaa ŋáań ikpítee sá ikpiti yumbuu ní.
- 35 Uyumbu kaa sá kudicaŋu poon niliu kí nīn cá, ama kudiidaan jipɔɔn, ùn dàá nīn sá kudicaŋu poon niliu ní kí nīn péécá jaanjaan.
- 36 Mimmee, man Ubaati Jipɔɔn yaa tī-ni dibatɔlee, mìn ní ni lafun tó ni-ba tiŋman pu.
- 37 M nyí yii ni sá Abraam naantiibi. Nì min kɔkɔ ni sá Abraam biyaamuee, ni nyàab kí kpò-mi. Di sá m-bɔti kaa ká mpaan ni-pɔbilingin.
- 38 Man sòòn tin m-Baa dākā-mee, ní ni mun ŋáań tin ni-baa tükū-nee. “
- 39 Ní bi fātì bí-u yii: “Timbi baa di sá Abraam!” Ní Yeesu bí-bi yii: “Ni yaa bàà sá Abraam biyaamuee, ni bàà ŋáań min Abraam nìn ŋáańee ní.
- 40 Ama, nì min kɔkɔwoooo m sòòn ibaamɔn in m gbīl m-Baa ceeyee, nimbi nyàab kí kpò-mi. Abraam kaa nìn ŋá mìn dalba.
- 41 Ni-baa nín ŋáań puee, mìn ní ni ŋáań!” Ní bi kífí-u yii: “Timbi kaa sá nnaayubiyaamu, ti-baa sá ubaanti ní, ùn di sá Unimbɔti.” Ní Yeesu kífí-bi yii:
- 42 “Unimbɔti yaa bàà sá ni-Baayee, ni bàà néeń-mi ní, kun puee Unimbɔti cee ní m nyánní ki dómiń, maa dómiń m-ba pu, an sá ùn di túnní-mi.
- 43 Ba pu ní naa gbìl m-bɔti tin m sòònee taapu? Kun puee naa ŋūn kí pīlfi-tì.
- 44 Nimbi baa di sá Sitaan, min min ni-baayee lèe, an ní ni là ki ŋáań. U péesá unikpɔl doooo ŋkilkaamin ní. Waa sí ibaamɔn ni kun puee waa cáá ibaamɔn u-ni. U yaa bī mǔntée, mìn di sá u-bimbim, kun puee u sá unyimondaan, ùn di sá inyimɔn na nì i-baa.
- 45 Man nín sòòn nì ni ibaamɔn puee ní naa là kí fǎǎ-mi kí kífí.

⁴⁶Ni-kansikin, ηma di ηūn kí dākà diyìntil din m yīntèe? Mimmee, ni nín nyí yii tin m sòònee sá ibaamōnee, ba ηá ní naa làá fṛṛ-mi kí kíí?

⁴⁷Un sá Unimbṛti yṛuee gbìl Unimbṛti bṛti, ni yaa kaa gbìl Unimbṛti bṛtee, naa sá u-yab dee.”

⁴⁸Ní Juuda yab kpilib fātii kíí-u yii: “Ti nín lī yii a sá Samarii, arasinii mun kā a-puee, an kaa sá ibaamōnaaan?”

⁴⁹Ní Yeesu kíí-bi yii: “Arasinii ubṛ kaa kā m-pu, m-Baa ní m bīi tìi tinyool, ní nimbi kpèe ki sṛkṛn-mi.

⁵⁰Man kaa nyàab bí pākà-mi. Ubṛ bí ki dàá pākà-mi, udaan di sá ubṛsoonli.

⁵¹Ibaamṛn, ibaamṛn ní m sòòn nì ni, un ηúb m-bṛtee kaa ti bí kí kpú jaanjaan.”

⁵²Niinee ní Juuda yab kpilib bí-u yii: “Kṛṅkṛnee ti bée yii arasinii ubṛ kā a-pu! Di sá Abraam kpî, Unimbṛti bṛnaatiliibi mun kpî, ní sii bí yii un yaa ηúb a-bṛtee kaa ti kúu jaanjaanaaan?

⁵³Mimmee sii jítin ti-baa Abraamaaan? Ún kpî, ní Unimbṛti bṛnaatiliibi mun kpî. Sii yî a-ba ηma ní?”

⁵⁴Ní Yeesu kíí-bi yii: “M yaa bīi pākà m-bee, mimmee m-pampakakuee kaa sá kumṛntiiu dee, un pākà-mee di sá m-Baa un ni bí yii u sá ni-Nimbṛtiu,

⁵⁵ama naa nyí-uee. Man nyí-u. M yaa née yii maa nyí-u, m dàá kpántí unyimṛndaan kii nimbee ní. Man nyí-u, ní ki ηúb u-bṛti.

⁵⁶Ni-naanja Abraam nín bée yii m dàá dāān taapu dooyee, an móṛkṛn-u, ní u lafun ká ní u-pṛbil píil.”

⁵⁷Ní Juuda yab kpilib kíí-u yii: “Sii kaa láá bàñ abin imuṅku ili nì saalaa, a ká Abraam la?”

⁵⁸Ní Yeesu kíí-bi yii: “Ibaamṛn, ibaamṛn, man péē bí ní bi nín màl̄ Abraam!”

⁵⁹Niinee ní bi bīi píikí atanṅpee kí yāṅkṛ-u, ní Yeesu nṛnti ki nyán Kunimbṛtidiin.

Jaan 9

¹Dalba Yeesu jītée, u ká ujṛfu ubṛ, bi nín péē màl̄-u nì ijṛfi ní.

²Ní u-boonnooliibi bālf̄i-u yii: “Ukpil, ba pu ní bi màl̄ kijapaai nee nì ijṛfi ní? Ún u-ba di ηá ikpiti naaan u-baa nì u-na di ηá ikpiti ní?”

³Ní Yeesu kíí-bi yii: “An kaa sá ún di ηá ikpitaana an kaa tí sá u-baa nì u-na di ηá ikpiti, ama an sá Unimbṛti n̄ dī u-pu kí dākà u-tundi, an pu ní bi màl̄-u mín.

⁴Dwiiín nín dáá bí pu nee, tí tṛ un túnní-mee tundi, kun puee kunyeeu dàá mó ubṛ kaa dāa gítī ηūn kí ηá ditundi.

⁵M nín dáá bí duulnyan doo nee, man di sá ηwalf̄i ki tī duulnya.”

- ⁶Yeesu lī mimmee, ní ki tíl timotan kitiŋ ní ki dū u-ŋambiki ki mòn ntam ki dūu ŋmīti ujoŋfuee nimiliŋ,
- ⁷ní ki bí-u yii: “Níñ cá Siiloowee nyimbobilin kí fíntí a-nimiin.” (Siiloowee taapu di sá “Bi túnní-u.”) Ujoŋfuee bàñ ki fíntì u-nimiinee, ki wál ní ki nín gítíñ.
- ⁸Ní u-kəŋkəŋnaatəb nì bin nìn kántí u kàal ki mèé animilee bí lì yii: “An kaa sá kijapaai nee di nìn kàal doo ki mèé ki jñeēēē?”
- ⁹Ní biba bí yii: “Tiŋman, an sá ùh!” Ní bin kíñee bí yii: “An kaa sá ùh, bi náań ní.” Niinee ní un nìn sá ujoŋfuee bí yii: “Tiŋman, an sá man!”
- ¹⁰Ní bi bālfī-u yii: “Kin, an ŋá mana ní a wál?”
- ¹¹Ní u kíí-bi yii: “Kijapaai kin bi yíi Yeesuee di səŋkì ntam ki ŋmīti m-nimiliŋ ní ki bí yii m nìn cá Siiloowee kí fíntí m-nimiin. M nín cūti ki fíntì m-nimiinee, ní m wál.”
- ¹²Ní bi bālfī-u yii: “Kijapaayee bí la?” Ní u kíí-bi yii: “Maa nyí u-laŋki.”
- ¹³Ní bi yḏəŋ kijapaai kin nìn sá ujoŋfuee ki cáā cūnni Fariisab cee.
- ¹⁴An nìn sá ŋwiŋŋuŋfikaa dal ní Yeesu nìn səŋkì ntam ki ŋúbitì ujoŋfuee nimiliŋ.
- ¹⁵Míñ pu ní Fariisab mun bālfī kijapaayee yii: “An ŋá mana ní a wál kəŋkəŋnee ní?” Ní u kíí-bi yii: “U səŋkì ntam ki dūu ŋmīti m-nimiliŋ, ní m cūti fíntì m-nimiin ní ki kíñ ki wál kəŋkəŋnee.”
- ¹⁶Ní bi-kansikin biba bí lì yii: “U nín kaa nyí ŋwiŋŋuŋfikaa nee, kijapaayee kaa sá Unimbəti niliu.” Ní biba mun lī yii: “Unikpiti mun ŋūh kí ŋá maamaacib yéèēē?” An di nìn cáań diyakatil bi-kansikin.
- ¹⁷Niinee ní bi fātī bālfī un nìn jəbēē yii: “Un ŋúbitì a-nimiliŋee, sii nyí yii u sá ŋma ní?” Ní u kíí-bi yii: “U sá Unimbəti bənaatiliu ní.”
- ¹⁸Juuda yab kpilibee kaa nìn fḏḏ ki kíí yii kijapaayee nìn sá ujoŋfú ní ki wál kəŋkəŋnee, an pu ní bi tú ki yíiñ u-baa nì u-na.
- ¹⁹ki bālfī-bi yii “Ni-jipəəŋ baasii səəə? Ni lafun məl̄-u nì ijəfaaa? Ní an ŋá mana ní u wál kəŋkəŋnee?”
- ²⁰Ní u-baa nì u-na kíí-bi yii: “Tiŋman, ti-jipəəŋ dee, ti lafun məl̄-uee u sá ujoŋfú ní.
- ²¹Ama taa nyí an nín ŋá pu ní u wál kəŋkəŋneeyee, kaa tí nyí un di yāntì u wálee. Ní bālfīmaan-u, kun puee u cíkitì ki ŋūh kí səəŋ u-ba.”
- ²²Kun pu u-baa nì u-na nìn səəŋ mimmee di sá bi nìn fāŋkì Juuda yab kpilib, kun puee bi nìn səəŋ ki yəəŋ yii un yaa péēlī yii Yeesu sá Kriisitooyee, bí jà-u kukpafidiin ú taa ti níñ bí bi-kansikin.
- ²³Kun yì-tì u-baa nì u-na nìn bí yii u cíkitì ki ŋūh kí kíí u-ba, bí bālfī-uee dee.
- ²⁴Niinee ní bi gítī ti yíiñ kijapaai kin nìn jəbēē nlilitiim, ní ki bí-u yii: “Á pàkà Unimbəti! Ama timbi nyí yii uninjee sá unikpiti ní.”

²⁵Ní u kíf-bi yii: “U yaa sá unikpitaana u yaa kaa sáaa maa nyí, kun m nyée di sá m nìn sá ujofu ní kəŋkəŋnee m wāl.”

²⁶Ní bi gítí bālfí-u yii: “U ɲá-si mana ní? Mana ní u ɲúbitì a-nimiliŋ ní?”

²⁷Ní u kíf-bi yii: “M péētùkū-ni ní naa pílfiñ-mi. Ba pu ní ni là m gítí būsì kí lì nlilitim? Áá ni mun là kí kpántí u-boonooliibi ní?”

²⁸Niinee ní bi bíf síf-u yii: “Sii di sá kijapaai gbanti boonooliu, ama timbi sá Mooisi boonooliibi ní.

²⁹Kun puee, ti nyí yii Unimbəti nìn sòon nì Mooisi, ama un bí nee ún-uee, taa kpááa nyí laakin gba ní u yaa nyánnée.”

³⁰Ní kijapaayee kíf-bi yii: “Tin sá maamaacee sèe: nimbi kaa nyí laakin u nyánnée, ú mun di ɲúbitì man nimiliŋ.

³¹Ti nyí yii Unimbəti kaa pílfiñ binikpitib, ama un yaa tó-u ki ɲáaá min min ní u lèe, udaan ní u pílfiñ.

³²Doooo nee, taa láá gbíl dalba dalba yii ubə ɲúbitì unil un bi māl nì ijofee nimiliŋ,

³³an niliuee yaa kaa nyánní Unimbəti cee, waa ɲūn kí ɲá mín.”

³⁴Ní bi kíf-u yii: “Sii péēsá unikpiti doooo a-na poon ní bi nín māl-si, ní sii là kí dākà timbaa!” Niinee ní bi jīn-u ki nyántì.

³⁵Yeesu gbíl yii bi jīn un nìn sá ujofuee. U dāa ká-uee ní ki bí-u yii: “A fṣṣ Kinibiki ki kífii?”

³⁶Ní u kíf-u yii: “Ukpil, ún di sá ɲma ní, m fṣṣ-u kí kíf ní?”

³⁷Ní Yeesu bí yii: “A wāl-uaa! Ún di bíf sòon nì si nee.”

³⁸Ní u bí yii: “M-Dindaan, m fṣṣ-si ki kíf,” ní ki lítì Yeesu nimiin ki jáam-u.

³⁹Ní Yeesu bí yii: “M dómiñ duulnya nee ni ibəsoon ní. Bin yaa jòbee n wāl ní bin wálee n jòb.”

⁴⁰Fariisab biba nìn bí niin. Bi gbíl an nyəɔbuŋee, ní ki bālfí-u yii: “Mimmee, ti mun sá bijofub deeyaa?”

⁴¹Ní Yeesu kíf-bi yii: “Ni yaa bàà sá bijofubee, naa bàà cáá ikpiti. Ama ni nín bí yii ni wálee puee, ni-kpitii dàá nīn péēdī-ni ní.”

Jaan 10

¹Yeesu bí yii: “Ibaaməŋ, ibaaməŋ ní m sòon nì ni, un yaa kaa dī kipunyəkə ki kó kupikpuŋkpuŋun ní ki yaa dī laaabee, udaan sá diganḡandaan ki sá unaayuu.

²Un yaa dī kipunyəkə ki kó kupikpuŋkpuŋunee di sá upikpaal.

³Un cí kipunyəkəee pītī-u, ní u-piii nyí u-neen. U yī u-piii sá kamaa nì i-yiŋŋi, ní ki lītī i-nyəkəpu ki cān-i kupikpaaun.

- ⁴U yaa nyánti i-kòkò kupikpuṅkpuṅun ki dóòyee, ní ú lintī i-nyòkòpu ní í páań u-boon, kun puee i nyí u-neen.
- ⁵Iaa nḡotí uniyanyan. I sáń-u ní, kun puee iaa nyí u-neen.”
- ⁶Yeesu nìn gāa-bi dilanḡpandi nee, ama ní baa nìn gbīl di taapu.
- ⁷Mín puee ní Yeesu gítī lī yii: “Ibaamɔn, ibaamɔn ní m sòòn nì ni, man di sá kupikpuṅkpuṅu punyòkòki.
- ⁸Bin kòkò péen-mi ki bāańee sá diganḡamdambi, ní ki sá binaayub, ipii mun kaa pílfìn-bi.
- ⁹Man di sá kipunyòkò. Un yaa dīń man-pu ki kóońee kántí difiil. Udaan ḡūn kí nīn kóò ki nyēēki kántí u-jinti.
- ¹⁰Kun pu unaayuu dòońee di sá ú yò, kí kpò, kí bīil. Mamee m dómiń í ká dimanḡfal ní, tiba nì tiba n̄ taa lóó-i dimanḡfal gbantin.
- ¹¹“Man di sá upikpaamɔnti, upikpaamɔnti pii pu ní u kúntí u-manḡfal.
- ¹²Un kpàá ki nyàab animil, kaa sá upikpaal, kaa yì ipiiyee, u yaa ká usaakpan dòońee, u dù ipii ní kí fá kí sān kí kátí, ní usaakpan n̄ dāań kí cūti ipii kí yàań-i.
- ¹³Kun pu upaadaan sáńee di sá u nyàab animil ní, ipii bɔti kaa páb-u.
- ¹⁴⁻¹⁵Man di sá upikpaamɔnti. Kii m-Baa nín nyí-mi, man mun nyí m-Baa puee, mín mbaantiim ní m nyí m-piii, ní m-piii mun nyí-mi. M kúntí m-manḡfal m-piii pu ní.
- ¹⁶M cáá ipii iba in kaa láá kóoń m-naabakaku nee poonee. See m cáań-i; i dàá dāá gbīl m-neen, ní kupicanḡkpuṅu n̄ ḡá kubaantiiu, upikpaal mun n̄ nīn sá ubaanti.
- ¹⁷“Kun pu m-Baa néeń-mee di sá m tì m-manḡfal ní kí fàtī fḡḡ-dì.
- ¹⁸Ubo kaa ḡūn kí tīl man manḡfal, see man m-ba di là ní kí dū-dì kí tī. M ḡūn kí dū-dì kí tī, ki ḡūn kí fàtī fḡḡ-dì mun. M-Baa nín bí m ḡá miḡyee dee.”
- ¹⁹Tibɔti gbanti pu ní Juuda yab cúū yākatì.
- ²⁰Bi-kansikin tikpil nìn l̄ yii: “Arasinii ubo di k̄a u-pu ní u sòòn fam fam. Ba pu ní ni pílfìn-u?”
- ²¹Ní biba mun l̄ yii: “Unil un pu arasinii kēēkaa sòòn yéè. Mimmee arasinii ḡūn kí ḡúbití bijofub nimiliḡaaan?”
- ²²An nìn sá dipeepɔndi ní, bi nìn bí jīn bi nín nìn ḡanḡi Kunimbɔtidii puee jīḡaaliu.
- ²³Yeesu nìn bí Kunimbɔtidiin, laakin bi nìn yī Saloomɔn kasalkauee taapu ki còom̄.
- ²⁴Ní Juuda yab dómiń ki mānti ki tú-u ní ki bí yii: “Ali kí tin sāa ḡyunti ḡulḡu ní a dàá sòòn-ti ibaamɔn ní ti-landòkòi n̄ wāl ní? Sii di yaa sá Kriisitoo á cántí kí tükù-ti!”
- ²⁵Ní Yeesu kí-bi yii: “M péētükū-ni dooooyee, ní naa fḡḡ-mi ki kíí. Atuun ḡin m cáá m-Baa pḡḡu ki ḡáań nee sòòn m-pu,

- ²⁶ní naa fǝǝ-mi ki kǐí, kun puee naa sá m-piii.
- ²⁷M-piii gbìl m-neen, ní man mun nyí-i, ní i nǝó-mi.
- ²⁸M tǐ-i dimanjfal din kaa cáá dikuntilee, i kpá kí kpú jaanjaan, báà ubo mun kaa tí nǝh kǐ fǝǝ-i m-ɲaan.
- ²⁹M-Baa un tǐ-mi-iee cáá mpɔn ki jítiñ báà ɲma. Míñ ní ubo kaa nǝh kǐ fǝǝ tiba m-Baa ɲaan.
- ³⁰Man nì m-Baa Unimbɔti ti sá ubaanti ní.”
- ³¹Niinee ní Juuda yab tí fǝti píí atanjkee kí yǎñkǐ kí kpò-u.
- ³²Ní Yeesu bí-bi yii: “M dū m-Baa pɔɲɲu ki ɲá atummɔnti tikpil ni-nimilin. Mimmee, atuun gbanti kansikinee, dilar pu ní ni là kí yǎñkǐ-mi atanjkee kí kpò na?”
- ³³Ní Juuda yab kǐí-u yii: “An kaa sá atummɔnti pu ní ti là kí yǎñkǐ-si atanjkee kí kpò, an sá a nín sòoñ ki bíl Unimbɔtee pu. Kun puee sii sá unifiantanti ní ki ɲèè nì Unimbɔti.”
- ³⁴Ní Yeesu kǐí-bi yii: “An kaa ɲmǎñ ni-marau poon yii: 'M bí yii, ni sá inimbɔtaaa?’
- ³⁵Tiɲmanɲmabti tin kaa móntée yaa yííñ bin bin bi sòoñ Unimbɔti bɔti ki tükúee yii bi sá inimbɔtee,
- ³⁶kin un Unimbɔti baasii lēēki túnní duulnyanee, ní ni lì yii m ɲèè nì Unimbɔti m nín bí yii man di sá Unimbɔti Jipɔneeee?
- ³⁷M yaa kaa bí ɲáañ m-Baa tuuɲɲi, ní taa fǝǝ-mi kí kǐí.
- ³⁸Ní m yaa bí ɲáañ-ɲi, báà ni yaa kaa làá fǝǝ-mi kí kǐí, fǝǝmaan atuun ɲin m bí ɲáañee kí kǐí kí baasii bée yii Ubaati bí m-ni ní ma mun bí Ubaatin.”
- ³⁹Niinee ní bi tí bí nyàab kí cúú-u ní u ɲmátì bi-ɲaan.
- ⁴⁰Ní u fǝti gítì Jɔɔdan bunɲbandi lapu pu, laakin Jaan nìn dáá kí ki fùul binib nnyimee, ki kǎl niin.
- ⁴¹Binib tikpil nìn dòoñ u-cee niin, ní ki lì yii: “Jaan kaa nìn ɲá maamaaci báà ubo,
- ⁴²ama tin kɔkɔwoooo u nìn sòoñ kijapaai nee puee, an sá ibaamɔn.” Binib tikpil nìn fǝǝ Yeesu ki kǐí niin.

Jaana 11

- ¹Uninja ubo nìn bǔh ki bí Beetanii, kitiɲ kin Maarii nì u-maan Maata nìn kóòyee, bi yí-u Laasaar.
- ²(Maarii gbanti di sá un nìn kpáati talaalu ki sǐti ti-Dindaan taani pu ki dū u-yikpiti ki pítèe, u-niija di sá Laasaar un nìn bǔh.)
- ³Ní Laasaar niisalibee tú ubo ú cúú tükú Yeesu yii: “Ti-Dindaan, a-bɔ bǔh.”

- ⁴Yeesu gbìl mimmee, ní ki bí yii: “Laasaar weeni nee kaa sá-u ñkúm, i sá kí tī Unimbōti tinyool, ní ki dàá tī u-Jipōon mun tinyool.”
- ⁵Yeesu nìn néen Maata nì u-naal nì bi-niija Laasaar.
- ⁶Nì mín kòkòe, u nín gbìl yii Laasaar bñee, u gítī kāl laakin u nìn bée iwiin ili.
- ⁷Ní boonee, u tükū u-boonnooliibi yii: “Tí gítimaan Juudee!”
- ⁸Ní u-boonnooliibi kíí-u yii: “Ukpil, yaadal nee ní Juuda yab kpilib kaa bí nyàab atankpee kí yāñkì kí kpò-saaa? Ní a là kí gítí niinaaan?”
- ⁹Ní Yeesu bí-bi yii: “Dwiiñ n nyā kí dāa jēetée tikúti saalaa nì tili di kaa báaa? Sii un yaa còom̄ ñwiiñ puee, aa gbéetí, kun puee ñwiiñ wāl an kòkò.
- ¹⁰Ama sii un yaa còom̄ kunyeeuee di gbéetí, kun puee ñwalfi kaa ti bí-si.”
- ¹¹Yeesu lī mín ki dóoyee, ní ki gítí kútí yii: “Ti-bòò Laasaar gèen̄. Ama man dàá cùú fintī-u.”
- ¹²Ní bi kíí-u yii: “Ti-Dindaan, u yaa gèen̄ee, u dàá pōkì deeyaa!”
- ¹³Yeesu nìn là kí lì yii Laasaar kpî ní, ama ní u-boonnooliibi bìn dākafi yii u sòon ñgeem min báà ñma gèen̄ee pu ní.
- ¹⁴Mín puee ní Yeesu tükū ki cánti-bi, yii: “Laasaar kpíi.
- ¹⁵Ni-puee an mōh-mi m nín kaa bí niinee, min dàá ñá ní fōō-mi kí kííyee dee. Kōñkōnee tí n̄n cá u-cee!”
- ¹⁶Niinee ní Toomasi (un bi yí atabee) bí Yeesu boonnooliibi bin kínee yii: “Ti mun n̄ táamaan-u kí cù, bi yaa làá tin kpò-uee, bí kpò kí kpáan ti mun!”
- ¹⁷Yeesu bànee ní ki ká yii Laasaar nìn ñá dikaakulin iwiin inaa.
- ¹⁸Beetani kaa nìn dátin̄ Jeerusaleem, an nìn sá kii atankpee ata nyòkòm ní.
- ¹⁹An di yì-tì ní Juuda yab kpilib tikpil nìn dómin̄ kí sòñkì Maarii nì Maata pòbiling bi-niija kúm pu.
- ²⁰Maata nín gbìl yii Yeesu dōoñee, ní u yíkii tūñkì-u, Maarii ùn nìn gbíntii k̄a kudiin.
- ²¹Ní Maata bí Yeesu yii: “Ukpil, a yaa bàà nìn bí doo, m-niija kaa bàà kúu.
- ²²Ama m nyí yii, kōñkōnee gba, tin tin kamaa ní a yaa mēēUnimbōtee u dàá tī-si kudōñu.”
- ²³Ní Yeesu bí-u yii: “A-niija dàá fikitī.”
- ²⁴Ní Maata kíí-u yii: “M nyí yii, ñwinjoolkaa dal, bitankpiibi yaa láā fikitèe, ú mun dàá fikitī.”
- ²⁵Ní Yeesu kíí-u yii: “Man di fikitī, man di sá dimañfal. Sii un fōō-m ki kííyee, báà a yaa kpíi gba a dàá n̄n cáá dimañfal,

- 26 ní sii un yaa bí dimanfalin ní ki f̄õ-m ki kíyee kaa ti kùu jaanjaan. A f̄õ ki kí mimmaaan?”
- 27 Ní u kí-u yii: “Iiin, m-Dindaan: M nyí yii sii di sá Kriisitoo, Unimbɔti Jipɔɔn un máan kí dāān duulnyanee.”
- 28 U sòōn mín ki dóoyee, ní ki cūti ki yíin u-naal Maarii ki tükū-u soooo yii: “Ukpil bāān ki bālfī a-pu.”
- 29 Maarii gbīl mimmee, ní ki yíkì dicilpu ki búntì Yeesu cee.
- 30 (Yeesu dáá gbíntii bí laakin Maata nìn tūŋkì-uee, kaa láá kó kitiŋin.)
- 31 Juuda yab bin nìn bí Maarii cee kudiin ki ŋmēentí-uee nín ká u yíkì dicilpu ki nín nyēēyee, ní bi dī-u: bín dākafī yii u cá dikaakul pu kí sō dee.
- 32 Dyunti ŋun Maarii bān laakin Yeesu bée ki ká-uee, ní u lítì u-nimiin, ki bí-u yii: “Ti-Dindaan, a yaa bàā nìn bí doo, m-niija kaa bàā kùu.”
- 33 Yeesu nín ká u bī sūnee, ki kpāān Juuda yab bin nìn nōōn-uee, ní kunimbaau kó-u ki gbēēu-pɔbil,
- 34 ní u bālfī-bi yii: “La ní ni síb-u ní?” Ní bi kí-u yii: “Ti-Dindaan, dáá cùu kpèè.”
- 35 Ní Yeesu bī sūn.
- 36 Ní Juuda yab bí yii: “Kpèèmaan, u nín bàā baasii néeñ-u puee!”
- 37 Ama ní bi-kansikin biba mun bí yii: “Ún un nìn ŋúbitì ujɔfuee nimiliŋee, kaa ŋūn kí yàntī Laasaar n̄ taa bàā kpúɔɔ?”
- 38 An fātī tí gbēē Yeesu pɔbil, ní u búntì dikaakul laŋki. An nìn sá ntaŋkpalɔkɔn, ní bi dū ditaŋkpal ki ŋéeb di-nyɔkɔ pu.
- 39 Ní Yeesu bí yii: “Nyikitīmaan ditaŋkpalee!” Niinee ní Maata, utaŋkpiilee niisal, bí yii: “Ti-Dindaan, an ŋá iwiin inaa dee, u máan ki sūu ki núukì!”
- 40 Ní Yeesu kí-u yii: “Maa tükū-si yii, a yaa f̄õ-mi ki kíí, a dáá ká Unimbɔti pɔŋju nín bí pueeee?”
- 41 Niinee ní bi nyikitì ditaŋkpal dikaakul nyɔkɔ pu. Ní Yeesu wáān kutaa pu, ní ki bí yii: “M-baa, m jáām-si kii a nín pílfiñ-mee pu.
- 42 M nyí yii a péépílfiñ-mi baabadal, ama bin māntì ki tú-mi nee pu ní m bī lī, bí f̄õ kí kíí yii sii di túnní-mi.”
- 43 U lī mín ki dóoyee, ní ki téen mpɔn yii: “Laasaar, nyānní!”
- 44 Ní utaŋkpiil nyānní, u-taaji nì u-ŋalii fiñ iŋaabu, ní ŋubɔ mun bī u-nimiin. Ní Yeesu bí yii: “Cúú fintīmaan-u kí yàntī ú n̄n cá!”
- 45 Juuda yab kansikin bin nìn dómīn Maarii cee ki ká min min Yeesu ŋée tikpil f̄õ-u ki kíí.

- ⁴⁶Ama bi-kansikin biba cūti ki ká Fariisab ki máafi-bi min Yeesu ñée.
- ⁴⁷Ní bi nì bisaraanǎkpilib kpáfi bibɔsoonkpaambi kɔkɔ ki sòon̄ yii: “Ti dàá ñá mana, ní kijapaayee ñáań maamaacib tikpil mín na!
- ⁴⁸Ti yaa yānti u gbínti ñáań mín, báa ñma dàá fɔ̄-u kí kíí, an dàá yānti Room gominau n̄ dāań kí wī ti-Nimbɔtidiiku n̄ ti-tiŋki.”
- ⁴⁹Bi-kansikinee ubɔ n̄n bí, bi yî-u Kaayifi, ùn di n̄n sá usaraanǎkpil dibindi gbanti, ní ùn bí-bi yii: “Naa gbìl tibɔti taapu.
- ⁵⁰Naa dàkafi yii an ñān̄ yii unibaanti n̄ kpú inifunaan pu ní ditimbul kɔkɔ n̄ ñmátáaa?”
- ⁵¹An kaa n̄n sá ùn u-ba di là ní ki sòon̄ an bɔti; u n̄n n̄n sá usaraanǎkpil dibindi gbantee puee, ní Unimbɔti yānti u sòon̄ yii Yeesu dàá dāa kpú Juuda yab pu.
- ⁵²An kaa sá Juuda yab baba pu, an sá kí kpāfi Unimbɔti biyaamu bin yālee kɔkɔ bí ñá ubaanti.
- ⁵³Ki yɔon̄ an wiin̄u gbanti ní bi bóob̄ yii see bí kpò Yeesu.
- ⁵⁴An di yì-ti ní Yeesu kí n̄ ki còom̄, kaa yānti Juuda yab kānti-u, ní ki búnti kitiŋ kiban k̄i bí kupɔu caŋin, bi yî-k̄i Eefrayim, niin ní u n̄ u-boonnooliibi n̄n cūti kāl.
- ⁵⁵Dyuntēe ní Juuda yab jiŋaaliu un bi j̄n̄ ki tēetí Unimbɔti n̄n n̄n nyānti bi-naanjab Eejipitee tóobiń, ní binib tikpil n̄n yíkí ki cá Jeerusaleem kí cù kí ñá saraabi, kí nyā bi-jòkontin kí wātī ní jiŋaalee n̄ n̄n bān.
- ⁵⁶Bi n̄n nyāb̄ Yeesu niin; bi bí Kunimbɔtidiinee, ní ki bī bālf̄i tɔb̄ yii: “Ni dàkafi yii ba ní? U làa dāań jiŋaal neeyaaa waa làa dāań?”
- ⁵⁷Di sá yii bisaraanǎkpilib n̄ Fariisab n̄n sūn̄ mara yii un yaa nyí laakin Yeesu bée ú l̄i bí cùú cúú-u.

Jaan 12

- ¹An n̄n kí n̄ iwiin iluu jiŋaal un Juuda yab j̄n̄ ki tēetí Unimbɔti n̄n n̄n nyānti bi-naanjab Eejipitee n̄ jēe, ní Yeesu n̄n bān̄ Beetanii, laakin Laasaar, kijapaai kin u n̄n fikitēe n̄n kóðyee.
- ²Niin ní bi ñá Yeesu tican. Maata di n̄n t̄i tijin. Laasaar mun n̄n ñmāl̄ bin n̄n Yeesu n̄n k̄a ki j̄ñee kansikin.
- ³Ní Maarii yɔon̄ní talaalum̄nti un bi yî náaree, u p̄ɔ̄ kudaau tikpil, ní ki cáań ki kpáat̄i s̄it̄i Yeesu taan̄i pu, ní ki dū u-yikpiti ki p̄it̄i, ní kudii kɔkɔ j̄ín talaalu s̄ons̄of̄iŋu.
- ⁴Niinee ní Yeesu boonnooliibi kansikin ubɔ, Juudasi Iskaariyɔti un dāa dū-u ki nyáfēe, bí yii:
- ⁵“Ba pu ní baa dū talaalu nee kí nyāfi kí fɔ̄ animikpaan kí dūú yàkat̄i biwɔfib?”
- ⁶Tin u sòon̄ee, an kaa sá u sūn̄ biwɔfib pu, u n̄n sá unaayuu ní. Ùn di n̄n ñúb̄ bi-nimiliŋ ní ki lèek̄i ñi-poon.

- ⁷Ní Yeesu bí-u yii: “Yàntī-u! U yāàn ki cíitì daliŋkin bi dàá dāá dū-mi kí ñá dikaakulinee dee.
- ⁸Ni nì biwǒfib di dàá nīn bí baabadal, ama man nì ni kaa làá nīn bí baabadal.”
- ⁹Juuda yab tikpil nìn gbīl yii Yeesu bāañ Beetaniyee, ní bi nín cá niin, an kaa nìn sá Yeesu ñmaniŋma pu ní bi cá, ama kí tin kpááā kpèè Laasaar un u fikitèe mun.
- ¹⁰Ní bisaraañakpilibee sòōñ ki yóòñ yii bí kpò Laasaar mun,
- ¹¹kun puee ùn pu ní Juuda yab tikpil kíñ ki nóó Yeesu, kaa ti là bín cee.
- ¹²Kutaa wúntèe, kunipaau kun nìn dómiñ jijaalee gbīl yii Yeesu dòon Jeerusaleemee,
- ¹³ní bi báti tikpakpati ki túŋkì-u nsanni, ní ki kūuntí yii: “Oosaana, tí dàntìmaan-u! Ti-Dindaan ñ bīñ un dòon ùn yindi puee! Unimbōti ñ bīñ Israyeel bōtiu boon!”
- ¹⁴Yeesu nìn ká dimampōmbil ki kā, kii Unimbōti takaldau nín nìn lī ki yóòñ puee, yii:
- ¹⁵“Jeerusaleem yab, ní taa fāŋkì! Kpèèmaan, ni-bōtiu di dòon, ki kā dimampōmbil puee!”
- ¹⁶Dyunti gbantee, u-boonnooliibi kaa nìn dáá láá gbīl taapu. Ama nyunti ñun u fǒō u-nyootee ní bi nín téetì yii Unimbōti takaldau nín nìn sòōñ tin u-puee, mīn ní bi ñá ki tī-u nee.
- ¹⁷Bin kǎkǎwoooo nìn bí nyunti ñun Yeesu yíñ Laasaar dikaakulin ki fikitì-u ditaŋkpiilinee bī mǎafí tin bi ká Yeesu ñée.
- ¹⁸Di sá yii bi nín nìn gbīl maamaaci un u nìn ñée puee ní kunipaauuee túŋkì-u.
- ¹⁹Ní Fariisab bī lī tǎb cee niin yii: “Ní káá, naa làá ti ká báa tība. Binib kǎkǎ di bitifí ki cá kí nóó-uee.”
- ²⁰Greeki yab biba nìn ñmāl bin nìn dómiñ Jeerusaleem kí nyōŋkì Unimbōti jijaalee poonee kansikin.
- ²¹Ní bi dómiñ ki ká Fiilipi (un sá Beetsayida Gaaliilee tiŋkinee), ki bī gbàām-u yii: “Ukpil, ti là kí ká Yeesu.”
- ²²Ní Fiilipi cūti tükū Andree, ní bi-liitil cūti ki tükū Yeesu.
- ²³Ní Yeesu kí-bi yii: “Dyunti ñun man Kinibiki dàá fǒō m-nyootee bāañ dee.
- ²⁴Ibaamōn, ibaamōn ní m sòon nì ni, ñwambool yaa kaa líti kitij ki kpíi, ñu péēgbíntii sá mbaanti ní. Ama ñu yaa kpíyee, ní ñú nyā kí lòon tikpil.
- ²⁵Sii un yaa néeh a-manfaldee dàá fá-dì, ní sii un yaa ná a-manfal taapu doo neeyee, siiyee di kpáafí-dì ki kántí dimanfal din kaa cáá dikuntilee.
- ²⁶Un yaa là kí tō m-tundee máañ kí nīn nóó-mi, ní laakin m yaa bée, m-tǎntǎnliu mun ñ nīn bí niin. Un yaa tūn m-tundee, Ubaati dàá tī-u tinyool.”

- 27“Kɔŋkɔnnee m bākati. Mimmee, m̀ l̀ yii, m-Baa, nyāntí-mi tin dàá bàń-mi nyunti nee pooneeee? Aayee, kun puee nyunti nee falaau gbanti pu ní m dómiń.
- 28Mín puee, m-Baa, tī a-yindi tinyool!” Niinee ní Unimbɔti sòońńi yilpu ki bí yii: “M tī m-yindi tinyool, ki dàá gítí t́ tī-dì.”
- 29Kunipaau kun ǹn yú niinee gbìl Unimbɔti neen puee ní ki bí yii: “An sá utaa di fáá didundi.” Ní biba mun bí yii: “An sá Unimbɔti tūuŋŋu ŋubɔ di sòoń ǹ u.”
- 30Ní Yeesu bí-bi yii: “An kaa sá man pu ní nneenee sòoń, ama an sá nimbi pu ní ŋu sòoń.
- 31Ŋyunti nee ní Unimbɔti dàá sòoń duulnya ɔti, ní ḱ jà duulnya ɔtiu Sitaan.
- 32Bi yaa láā yɔoń-mi yilpuee, m̀ dàá dāá dáaliń nnibiyaamu kɔkɔ ḱ cáañ m-cee.”
- 33(U ǹn l̄ m̀n ḱ dākà ŋkúm min u dàá kpúee n̄n sá miŋyee ní.)
- 34Ní binibee ḱí-u yii: “Ti bífi marab takaldau poon yii Kriisitoo dàá n̄n péēbí ní ḱ n̄n cá jaanjaan. Kin ba pu ní sii l̄ yii bi dàá yòoń Kinibiki yilpu? Ōma di sá Kinibiki gbanti ní?”
- 35Ní Yeesu ḱí-bi yii: “Ōwalfi dáá bí ni-kansikin nyunti ŋubɔ poon fīi. Ní n̄n còoń ŋwalfi gbanti poon, an n̄n dàá ŋá pu dibɔmbɔndi n̄ taa jēetí ni-puee, kun puee un còoń dibɔmbɔndinee kaa nyí laakin u cée.
- 36Ŋyunti ŋun ŋwalfi dáá bí ni-cee nee, ní f̄ɔɔ-ŋu ḱ ḱí an n̄n dàá ŋá pu ní kpántí ŋwalfin nibee.” Yeesu sòoń m̀n ki d̀ɔyee, ní ki yíkì bi-cee ki cūti ndan ki bál-bi.
- 37Ǹ min kɔkɔ u ŋáañ maamaacib tikpil bi-nimiinee, baa f̄ɔɔ-u ki ḱí.
- 38Kii Unimbɔti ɔnaatiliu Eesayi n̄n ǹn ŋmāń pu dooooyee, m̀n ní an ŋá nee. U ǹn ŋmāń yii: “Ti-Dindaan, ŋma f̄ɔɔ ti-ɔti ki ḱí? Ōma bée sii ti-Dindaan pɔŋŋu?”
- 39Eesayi ǹn gítí l̄ kun pu ní baa ǹn ŋúń ki f̄ɔɔ ki ḱíyee: u ǹn bí yii:
- 40“Unimbɔti yāntì bi jòb ní ki p̀ɔkì bi-p̀ɔbiliŋ, an n̄n dàá ŋá pu bi-nimiliŋ n̄ taa n̄n wālee ní bi-p̀ɔbiliŋ n̄ n̄n gbìfi bí taa kpántí bi-bimbim ú cáañ-bee.”
- 41Eesayi l̄ m̀n kun puee u ǹn ká Yeesu nyooti, ní ki sòoń u-pu.
- 42Ǹ m̀n kɔkɔee, Juuda yab kpilib tikpil ǹn f̄ɔɔ-u ki ḱí. Ama Fariisab n̄ taa jà-bi kukpafidiin puee, baa ǹn nyántì bi-ba.
- 43Di sá yii bi là binib n̄ pākà-bi ki jítiń Unimbɔti n̄ pākà-bi.
- 44Yeesu téen mpɔn ki l̄ yii: “Un yaa f̄ɔɔ-mi ki ḱíyee, an kaa sá man ní u f̄ɔɔ ki ḱí, u f̄ɔɔ un túnní-mee ní ki ḱí.
- 45Un yaa ká-mee ká ki kpáañ un túnní-mee dee.
- 46M dómiń duulnyan kii ŋwalfee, an n̄n dàá ŋá pu un sá kamaa yaa f̄ɔɔ-mi ki ḱíyee n̄ taa n̄n gítí bí dibɔmbɔndinee.

⁴⁷Ama un di yaa gbīl m-boti ní ki yaa kaa kpáafi-tèe, an kaa sá man di dàá kpò udaan boti, kun puee maa dómiń kí kpò duulnya nib boti, m dómiń kí fī-bi ní.

⁴⁸Un kaa là-mi, kaa fṵṵ m-botee cáá tin dàá dāá sòon u-botee: an di sá m-boti tin m nìn dākēe, tìn di dàá dāá kpò udaan boti ḡwinjoolkaa dal.

⁴⁹Di sá yii an kaa sá man m-ba pṛṅṅu pu ní m sòon, an sá m-Baa un túnní-mee u-ba di tī-mi tin sá m sòonee nì tin sá m dākèe.

⁵⁰Ní m nyí yii tin ní u sòonee cāabiń dimañfal din kaa cáá dikuntilee. Míń puee, tin tin m-Baa tī-mi m lèe tìn ní m sòonee.”

Jaana 13

¹Kutaa n wúntí jinjal un Juuda yab jīn ki téetí Unimboti nín nìn nyántì bi-naanjab Eejipitee Yeesu nìn nyí yii ḡyunti ḡun u dàá yīkì kitiḡ nee pu kí gítí u-Baa ceeyee bāań. U nìn néen u-yab bin bí duulnyan dooyee, ki gítí néen-bi ki lákatì ali ki tin kátì-ku.

²Dyunti ḡun u nì u-boonnooliibi ká ki jīn tijoojinee, mimmee Sitaan péelūkutì Juudasi Iskaariyoti Siimōn jipṛōn ú dū Yeesu kí nyāfīn u-nannanliibi dee.

³Ní Yeesu mun nìn péenyí yii u nyánní Unimboti cee ní ki dàá fātí gítí Unimboti cee, ní ki nyí yii u-Baa Unimboti dū tikəkōwoooo ki ḡá u-ḡaan.

⁴U nì u-boonnooliibi bī jīnee ní Yeesu yīkì tijin pu, ní ki pēetì u-bəkutil boon yal ní ki dū ḡḡaabu ḡubṵ ki gbīn u-caḡ,

⁵ní ki jṵṵ nnyim ki ḡá kisanpeein, ní ki kíl ki bī fīntí u-boonnooliibi taanḡ, ní ki cáá ḡḡaabu ḡun u gbīn u-caḡee ki cáá pítí bi-taanḡ.

⁶U fīntì ki bāań Siimōn Piyeeree ní Siimōn bí yii: “Ti-Dindaan, sii a-ba di dàá fīntí man-taanḡaan?”

⁷Ní Yeesu kí-u yii: “Tin m bī ḡaán nee, aa gbīl taapu kṛḡkōnee, ama boonee a dàá dāá gbīl.”

⁸Ní Piyeer bí yii: “M yī kpataaa, a kpá kí fīntí m-taanḡ.” Ní Yeesu kí-u yii: “A yaa kaa yāntì m fīntì-si, mimmee, aa sá m-yṵu.”

⁹Ní Siimōn Piyeer kí-u yii: “An yaa sá mīn, ti-Dindaan, taa fīntí m-taanḡ ḡmanḡma, fīntí kí kpāań m-ḡalii nì m-yil!”

¹⁰Ní Yeesu kí-u yii: “Un yaa fūlee kaa ti fūul, see ataa ḡmanḡma ní u fīntí, kun puee waa ti cáá tijəkōndi. Míń ní ni mun bí circir, ama an kaa sá ni-kəkṵ.”

¹¹(Di sá yii Yeesu nìn nyí un dàá dū-u kí tī u-nannanliibee, mīn pu ní u bí yii: “An kaa sá ni-kəkṵ di bí circir.”)

¹²Yeesu fīntì bi-taanḡ ki dṵoyee, ní ki fātii dū u-wanti ki pēen, ní ki fātii kāl, ní ki bālfī-bi yii: “Tin m ḡá-ni nee, ni gbīl taapuṵ?”

- 13 Ni yî-mi yii Udakal, ki yî-mi yii ni-Dindaan, ni máań kí yíín-mi mín kun puee mín ní m lafun sá.
- 14 Míń puee, man udakal nì ni-Dindaan yaa fíntì ni-taańee, ni mun máań kí nīn fíntí tɔb taańi.
- 15 M ńá mín ki dākā-ni ni mun ń nīn ńáań mín ki tì tɔb ní.
- 16 Ibaamɔn, ibaamɔn ní m sòon nì ni, utontɔnli kaa jítiń u-kpiliu, mín ní un bi túee kaa jítiń un túnní-uee.
- 17 Kɔńkɔńnee ni bée, ni yaa ńáań mín, ni daá gbīl mmɔn.
- 18 “An kaa sá ni-kɔkɔ pu ní m sòon, kun puee m nyí bin m lútèe. Tin bí nee ń ńá kii Unimbɔti takaldau poon nín lī puee, yii: 'Un jīn m-jintee fātii bí jaań-mi.’
- 19 M tükù-ni tin bí nee ki yǒntí kɔńkɔńnee kí wàatī ní an bāń, an nín daá ńá pu tì yaa láa bāańee ní fǒǒ kí kíí yii 'man di sá un m sée'.
- 20 Ibaamɔn, ibaamɔn ní m sòon nì ni, un yaa fǒǒ un man túnnée, fǒǒ man mun dee; ní un yaa fǒǒ mamee, fǒǒ un túnní-mee mun dee.”
- 21 Yeesu lī mín ki dóoyee, ní an gbēu-pɔbil, ní u bí yii: “Ibaamɔn, ibaamɔn ní m sòon nì ni, ni-kansikin ubɔ di daá dū-mi kí tī m-nannanliibi.”
- 22 Ní u-boonooliibi fātii bí kpèe tɔb, kaa kpáaā bée un pu ní u bí sòonee.
- 23 Un Yeesu nīn nēeń u-boonooliibi kansikinee ká ki nákań-u.
- 24 Ní Siimɔn Piyeer ńá-u kudaanńu yii ú bálfi-u kí kpèe un pu ní u sòonee.
- 25 Ní u sùtì ki mōtī nákań Yeesu ní ki bálfi-u yii: “Ukpil, an sá ńma ní?”
- 26 Ní Yeesu kíí-u yii: “M daá sēekpɔnɔ tikun ni. Un m yaa dū tīyee, ún ní an sá.” Niinee ní Yeesu dū kpɔnɔ ki sēetikun ni ki fīn kí tī Juudasi, Siimɔn Iskaariyɔti jipɔn.
- 27 Juudasi fǒǒ kpɔnɔee, ní Sitaan kó u-ni. Ní Yeesu bí-u yii: “Tin a cáá ki daá ńee, á ńá-tì malaa!”
- 28 (Bin nīn ká ki jīnee, báa ubɔ kaa bée kun pu ní u lī-u mimmee.
- 29 Biba nīn dākafī yii Yeesu là ú cùú dā tin tin bi daá cáá jī jīńaalee áá u là ú tī biwɔfīb tība ní. Di sá yii Juudasi di nīn ńúb bi-nimiliń.)
- 30 Juudasi fǒǒ kpɔnɔee, ní ki nyáń malaa. Kunyeeu nīn mó.
- 31 Juudasi nyáńee, ní Yeesu bí yii: “Kɔńkɔńnee man Kinibiki fǒǒ m-nyooti dee, Unimbɔti ń ká tinyool man ni.
- 32 Unimbɔti yaa ká u-nyooti man nee, mín ní ma mun daá ká m-nyooti Unimbɔtin an kaa làá yúntí.

³³M-biyaamu, nyunti fiii di kíhín m gítí kàl̄ ni-cee. Ni dàá dāá nyàab̄-mi, an bí kii m nín nín tükū Juuda yab puee, naa láá ηmā kí cù laakin m cée. Kəŋkəŋnee, m tükū ni mun dee.

³⁴M tī-ni marapoon ubo: nín néermaan tob. Kii man nín néen nimbi puee, ni mun nín néermaan tob ubo ubo mín.

³⁵Ni yaa néen tōbee, niin di dàá dākà báà ηma yii ni lafun sá m-boonnooliibi.”

³⁶Ní Siimōn Piyeer bālfī-u yii: “Ukpil, la ní a cá?” Ní Yeesu kíí-u yii: “Aa ηūn kí nótó-mi laakin m cée kəŋkəŋnee, ama boonee, a dāa nōtí-mi.”

³⁷Ní Piyeer bí-u yii: “Ukpil, ba pu ní maa ηūn kí nótó-si kəŋkəŋnee? Báà an yaa sá ηkúm, m dàá dū m-maŋfal kí tī a-pu.”

³⁸Ní Yeesu kíí-u yii: “A dàá lafun dū a-maŋfal kí tī man puoo? Ibaamōn, ibaamōn ní m sòhò nì si, kí wātī ukooja n̄ bākèe a dàá néé yii saa nyí-mi diba dibee mita.”

Jaan 14

¹Ní Yeesu níkí ki lī yii: “Ni-pōbilih̄ n̄ taa bīl̄. Ní fōō Unimbōti kí kíí kí fōōman ma mun kí kíí.

²Ikoŋkoon tikpil bí m-Baa dumpu, m dàá cù kí bótí-i kí yóoh̄-ni. I yaa kaa bàà bí tih̄man, m bàà tükù kí cántí-ni.

³M yaa cūti ki bótí ipaan gbantee, ní m gítíh̄ kí yòoh̄-ni, an nín dàá ηá pu laakin m dàá n̄n bée, ni mun n̄ n̄n bí m-cee niinee.

⁴Ni nyí laakin m cée, ki nyí nsan mun.”

⁵Ní Toomasi bí-u yii: “Ukpil, taa nyí laakin a cée! Ti dàá ηá mana kí bée nsan?”

⁶Ní Yeesu kíí-u yii: “Man di sá nsan, ki sá ibaamōn ki sá dimaŋfal. Ubo kaa ηūn kí dī laaaba kí dāañ m-Baa Unimbōti cee, see ú dīn man pu.

⁷Ni yaa bàà nyí-mee, ni bàà nyí m-Baa mun ní. Ama kəŋkəŋnee ni nyí-u, ki ká-u mun.”

⁸Niinee ní Fiiliipi bí-u yii: “Ukpil, dākà-ti a-Baa Unimbōti ti-pōbilih̄ n̄ sòŋkì.”

⁹Ní Yeesu kíí-u yii: “Fiiliipi, m nín bí ni-cee an yúntì pu nee, ní saa nyí-maaan? Un yaa ká-mee, ká m-Baa mun dee. Kin ba pu ní sii gítí l̄ yii m̄ dākà-ni m-Baa?

¹⁰Aa nyí yii man bí m-Baa ni, ní m-Baa mun bí man naaan? Tibōti tin m sòhò nì nee, maa sòhò-tì m-ba pu, an sá m-Baa un bí m-nee di tūh̄ u-tundi.

¹¹Fōō kí kíímaan yii m bí m-Baa ni ní m-Baa mun bí man ni. Ni yaa kaa fōō m nín lī pu nee ki kííyee, kpèèmaan m-tuuh̄ŋi ηin m ηá nee pu kí fōō kí kíí.

¹²Ibaamōn, ibaamōn ní m sòhò nì ni, un yaa fōō-mi ki kííyee dàá tō atuun ηin m tūh̄ee, ún dàá tō ηin jítih̄ man yaŋ nee gba, kun puee m cá m-Baa cee ní.

- 13Ní tin kòkò ni yaa mēēm-yindi puee, m dàá ñá mín kí tī-ni, ní m-Baa ñ ká tinyool u-Jipoon pu.
- 14Ni yaa mēētiba m-yindi pu, see m ñá mín kí tī-ni.
- 15“Ni yaa néen-mee, ní ñúbmaan m-marab,
- 16ní man ñ mēè m-Baa Unimboti ú gítí tīn-ni Ututunli ubo un dàá nīn bí ni-cee kí nīn cá jaanjaanee.
- 17Ún di sá Unimboti Fām ibaamondaan, un duulnya nib kaa ñūn kí fōyee, kun puee baa wāl-uaaa kaa nyí-u mun. Ama an yaa sá nimbi, ni nyí-u kun puee u kòò ni-cee ní kí dàá dāá nīn bí ni-ni.
- 18“Maa làá dū-ni kí fá kii atanpibiilee, m dàá fātí gítí ni-cee.
- 19An kí ñ fiii duulnya nib kaa làá ti ká-mi, ama nimbi dàá ká-mi, kun puee m bí dimanjalin, mín ní ni mun dàá nīn bí dimanjalin.
- 20Dwiin gbanti yaa láā bāanee, ni dāa béetí yii man bí m-Baa ni, ní nimbi bí man ni, ní man bí ni mun ni.
- 21Un yaa cáá man marab ki ñúb-bee, udaanee di néen-mi. Mín ní m-baa dàá nīn néen un néen-mee, man mun ñ nīn néen-u, ní kí nyántí m-ba kí dākà udaan.”
- 22Ní Juudi (an kaa nín sá Juudasi Iskaariyoti) bí-u yii: “Ukpil, mana ní a dàá ñá ní kí nyántí a-ba kí dākà timbi, ní kí taa dākà duulnya nib?”
- 23Ní Yeesu kí-u yii: “Un yaa néen-mee dàá nīn ñúb m-boti. M-Baa dàá nīn néen udaan, ní man nì m-Baa ñ dāān kí nīn kòò udaan cee.
- 24Un kaa néen-mee kaa ñúb m-boti. M-boti tin m sòon nì nee nyánní m-Baa un túnní-mee cee ní, an kaa sá m-ba pu ní m sòon.
- 25“M tükū-ni tin bí nee nyunti ñun m dáá bí ni-cee nee.
- 26Ama Ututunlee, Circir Fām min m-Baa dàá dāá tōn man yindi puee, dàá dāá dākà-ni tikòkò, ní kí tétí-ni tin kòkò m sòon nì nee.
- 27“Dipòosònkil ní m dūu yāntiñ-ni, man pòosònkil ní m dūu tī-ni, maa tì kii duulnya nín tì puee. Ní taa bàkatí kí taa fāṅkì mun.
- 28Ni gbīl m nín lī yii m dàá nīn cá kí dāá fātí gítí ni-ceeyee. Ni yaa bàà néen-mee, an bàà móókìñ-ni kii m nín cá m-Baa ceeyee pu, kun puee m-Baa jitiñ man.
- 29M tükū-ni kòṅkonnee ki yóon kí wàatí ní án nín bàñ, ní nyunti ñun ní an yaa láā bāanee, ní ñmā kí mòtí fōó kí kíí.
- 30Maa làá ti sòon nì ni tikpil, kun puee duulnya botiu Sitaan dòon. Waa nín ñūn kí ñá-mi tiba,
- 31ama duulnya nib máañ kí béé yii m néen m-Baa, an pu ní min ní m-Baa yaa bí m ñée, mín ní m ñáañ. Yíkimaan, tí nīn cá.”

Jaana 15

- ¹Ní Yeesu bí yii: “Man di sá fiinyi subu tiŋman, ní m-Baa sá un ɣáŋkí-buee.
- ²Apan ɣin tókú m-pu kaa lòoŋee, u gà-ɣi ki féeŋ; ní apan ɣin lòoŋee, u ɣáŋkí-ɣi, ní ɣi mòtí lòoŋ.
- ³Tiboti tin m sòoŋ nì nee, tì ɣáŋkì nimbi.
- ⁴Ní nīn bímaan man ni, ní man mun á nīn bí ni-ni. Kii dipandi nīn kaa ɣūn kí lòoŋ abil di-baba asee dí nīn tókú busubu puee, mīn mbaantiim, ni yaa kaa bí man ni, naa ɣūn kí lòoŋ abil.
- ⁵“Man di sá fiinyi subu, ní nimbi sá apan. Un yaa bí man ni man mun bí udaan nee, lòoŋ abil ní tikpil; kun puee ni yaa kaa bí man ni, naa ɣūn kí ɣá tiba.
- ⁶Un yaa kaa bí man-nee, bi gà-u kí fá kii disupandee ní, ní ú kpā. Asupaŋkulimee bi kōontí-ɣi ní kí tō ɣɣmin, ní án wò.
- ⁷Ni yaa bí man-ni, ní man mun bōti bí ni-nee, bàlfimaan tin tin ni yaa lèe, ni dàá ká kudɔɣu.
- ⁸Tin tì m-Baa tinyoolee di sá ní lòoŋ abil tikpil ní kí nīn sá man boonnooliibi.
- ⁹Kii m-Baa nīn néeŋ-mi puee, mīn ní man mun néeŋ-ni. Nīn bímaan m-neendin.
- ¹⁰Ni yaa ɣúb m-marabee, mimmee, ni bí m-neendin dee, kii man mun nīn ɣúb m-Baa marab ki bí u-neendin puee.
- ¹¹“M sòoŋ nì ni tin bí nee an nīn dàá ɣá pu m-pɔɔpindi á nīn bí ni-ni, ní ni-pɔbiling á mòtí gítí pīlee.
- ¹²Mara un m síiŋ-nee sèe: ní nīn néeŋmaan tɔb, kii man nīn néeŋ-ni puee.
- ¹³Dineeŋkpaandi diba kaa ti bí kí bà unil á dū u-manfal kí kúntí u-bɔɔbi pu.
- ¹⁴Ni yaa ɣáaŋ min m bàlfī-nee, mimmee ni kpánti m-bɔɔbi dee.
- ¹⁵Maa ti yī-ni m-tɔntɔnliibi, kun puee utɔntɔnli kaa nyí tin u-kpiliu ɣáaŋee. M yī-ni m-bɔɔbi ní, kun puee m dākā-ni tin kɔkɔwoooo m gbīl m-baa ceeyee.
- ¹⁶Man di lēenimbi, kaa sá nimbi di lēeman. M tú-ni ní cùú lòoŋ abil, abil ɣin dàá yúntée, mimmee, m-Baa dàá tī-ni tin kɔkɔ ni yaa mēē-u man yindi puee.
- ¹⁷Tin tin m síiŋ-nee, di sá ní nīn néeŋ tɔb. “
- ¹⁸“Duulnya nib yaa ná-nee, ní béé yii man ní bi péé ki ná.
- ¹⁹Ni yaa bàà sá duulnya yabee, duulnya yab bàà néeŋ-ni, kun puee ni sá u-yab. Ama m lútì-ni ki nyánti duulnya nib kansikin, naa ti sá duulnya yab, an pu ní bi ná-ni.
- ²⁰Ní téetimaan tin tin m nīn tükū-nee, yii: 'Utɔntɔnli kaa jítiŋ u-kpiliu.' Bi yaa páb man, bi dàá dāá páb-ni mun, bi yaa bàà pílfi man-bōti bi bàà dāá pílfi ni mun yati.
- ²¹Man pu ní bi dàá ɣá-ni tin bí nee kɔkɔ, kun puee baa nyí un túnní-mee.

²²M yaa kaa bàà dómiń ki sòoń nì bi, bàà bàà cáá ikpiti; ama kɔŋkɔnnee, baa ti cáá nnaakpal bàà ɲubɔ bi-kpitii pu.

²³Un yaa ná-mee ná m-Baa mun dee.

²⁴M yaa kaa bàà ɲá maamaacib bin bin báà ubɔ kaa ɲée bi-kansikin, baa bàà cáá ikpiti; ama bi kántì m-maamaacib, ní ki gbíntì ki ná man nì m-Baa.

²⁵Too! An ɲá kii bi-marab takaldau poon nín lī ki síìh puee dee yii: 'Bi ná-mi fam, an kaa cáá taapu.'

²⁶“M yaa bàñ m-Baa ceeyee, m dàá tɔ́ń-ni Ututunli, ùh di sá Unimbɔti Fām ibaamɔndaan un nyánní m-Baa ceeyee. U yaa láā bāánee, u dàá sòòh m-pu,

²⁷ní ni mun ń dāá lēēm-pu seera, kun puee ni péēbí m-cee doooo ɲkilkaamin ní.

Jaan 16

¹“M sòoń nì ni tin bí nee an nín dàá ɲá pu ní taa láā fá ni-fookiiu m-puee.

²Bi dàá dāá jà-ni kí nyántí akpafidiin ni, ali gba, ɲyunti ɲubɔ bí ki dòòh bi dàá kpò-ni ki dākafī yii bi ɲá Unimbɔti lammi.

³Kun pu bi dàá ɲá mimmee di sá yii baa nyí m-Baayaaa kaa nyí man.

⁴Ama m tükū-ni tin bí nee, ní ti-yuntiɲu yaa láā bāánee ní dāá téetí yii m nìn péē tükū-ni-ti. “Maa tükū-ni tin bí nee doooo ɲkilkaamin kun puee m dáá bí ni-ceeyee pu.

⁵“Kɔŋkɔnnee, m dàá nīn cá un túnní-mee cee, ní ni-kansikin ubɔ kaa bālfī-mi yii: 'A cá la?'

⁶M nín sòoń-ni puee ní kunimbaau kó-ni.

⁷Ama, ibaamɔn ní m sòòh nì ni, m nín cá m-Baa ceeyee an sá ni-paatii, kun puee m yaa búntèe, m dàá tɔ́ń Ututunli ni-cee. M yaa kaa yíkì, waa làá dāāñ ni-cee.

⁸U yaa láā bāánee, u dàá yàntī duulnya nib ń bée yii bi bí ikpitin, kí yàntī bí bée kun di sá deedeeyee, kí yàntī bí bée Unimbɔti bɔsooni in dō ki cí-bee pu.

⁹U dàá yàntī bí bée yii bi bí ipkitin kun puee baa fǒǒ-mi ki kíí,

¹⁰ki dàá yàntī bí bée kun sá deedeeyee kun puee m nín jóm m-Baa cee ní naa làá ti wāl-mi,

¹¹ki dàá yàntī bí bée yii ibɔsoon dō ki cí-bi kun puee Unimbɔti kūū duulnya bɔtiu bɔti.

¹²“Tibɔti tikpil bàà bí m sòòh nì ni, ama tì jítih-ni kɔŋkɔnnee.

¹³Ama Unimbɔti Fām ibaamɔndaanee yaa láā bāánee, ùh di dàá dākà-ni ibaamɔn kəkɔ. Waa làá sòòh u-ba pɔŋɲu pu, u dàá dāá tükū-ni tin tin u gbīlee, kí dākà-ni tin bí ki dòónee.

¹⁴U dàá dāá tī-mi tinyool, kun puee u dàá dāá fǒǒ tin tin m cááyee kí tükū-ni.

15 Tin kɔkɔ m-Baa Unimbɔti cááyee sá man mun wanti ní. An pu ní m tükū-ni yii Unimbɔti Fāmee dàá dàá fɔ̃ɔ tin m cááyee kí tükù-ni.”

16 “An kíh̄n̄ fiii, naa làá ti ká-mi, ní an yaa láā tí kútì fiii, boonee, ní ni dàá fātí tí ká-mi.”

17 Niinee ní u-boonnooliibi biba bī l̄i tɔb̄ cee yii: “Taapu nín sá yii ba dee, yii: 'An kíh̄n̄ fiii naa làá ti ká-mi, ní an yaa fātì kútì fiii boonee ní ni dàá fātí tí ká-mee,' n̄i mun yii: 'M cá m-Baa cee'. Mimmee, u là kí tükù-ti yii ba dee?”

18 'An kíh̄n̄ fiii' gbanti taapu baasii nín sá yii ba dee? Taa gb̄l̄ tin u là kí sòh̄n̄ n̄i ti nee taapu!”

19 Yeesu b̄èè yii bi là kí bàlf̄i-uee, ní u bí-bi yii: “M nín bí yii: 'An kíh̄n̄ fiii naa làá ti ká-mi, ní an yaa fātì tí kútì fiii boonee, ní ni dàá fātí tí ká-mee' pu ní ni bí bàlf̄i tɔb̄ naaan?”

20 Ibaam̄n̄, ibaam̄n̄ ní m sòh̄n̄ n̄i ni, ni dàá dāā n̄n̄ sūn̄ ki t̄iminsí ní duulnya yab̄ f̄aàl̄. Ni dàá dāā n̄n̄ bí diniminaamandin̄ ama ni-niminaamandi dàá dāā kpánti-ni dipɔp̄indi.

21 Imatiŋween yaa b̄aān̄ unimpuee, u kíh̄n̄ ki bí diniminaamandin̄ ní, kun puee u-falaau yuntiŋu b̄aān̄-u. Ama u yaa m̄āl̄ ki d̄óyee ní án̄ m̄ɔkiñ-u, ú s̄untí u-falaau pu, kun puee u m̄āl̄ unil.

22 “Mín̄ mbaantiim̄ ní ni mun bí diniminaamandin̄ kɔŋkɔneee. Ama m̄ dàá dāā fātí gítì ká-ni ní ni-pɔb̄iliŋ̄ n̄ p̄iil̄. B̄aā ubo kaa dāā ŋūn̄ kí l̄ēni-pɔp̄indi gbanti.

23 “An wiŋŋu gbantee, naa dāā gítì bàlf̄i-mi tiba n̄i tiba pu. Ibaam̄n̄, ibaam̄n̄ ní m sòh̄n̄ n̄i ni, tin kɔkɔ ni yaa m̄ēm-Baa m-yindi puee, u dàá t̄i-ni kudɔŋu.

24 Ali n̄n̄ d̄iñee, naa láā m̄ēm-yindi pu tiba, m̄èemaan̄ tiba, ni dàá fɔ̃ɔ kudɔŋu, ni-pɔb̄iliŋ̄ n̄ m̄òt̄i p̄iil̄.”

25 “Alaŋkpan̄ ní m cáā b̄i sòh̄n̄ n̄i ni tin bí nee kɔkɔ. D̄yunti ŋubo d̄oñ̄ ŋun̄ ni maa làá gítì dū alaŋkpan̄ kí sòh̄n̄ n̄i nee, m̄ dàá dāā sòh̄n̄ m-Baa Unimbɔti pu kí cánti.

26 D̄wiin̄ gbanti yaa láā b̄aānee, ni dàá dāā n̄n̄ m̄èe m-Baa Unimbɔti man yindi pu, maa bí yii man di dàá dāā n̄n̄ m̄èe m-Baa ni-pu,

27 kun puee m-Baa Unimbɔti u-ba n̄eēn̄-ni. U n̄eēn̄-ni kun puee ni n̄eēn̄ man ki fɔ̃ɔ ki kí yii m nyánni Unimbɔti cee.

28 M nyánni m-Baa cee ní ki d̄ómiñ̄ duulnyan. Kɔŋkɔneee m̄ dàá fātì ȳkì duulnyan kí n̄n̄ gítì m-Baa cee.”

29 Niinee ní u-boonnooliibi bí yii: “An kaa sá n̄i alaŋkpan̄ ní a cáā b̄i sòh̄n̄ n̄i ti nee, min̄ bí nee a baasii b̄i sòh̄n̄ ki cánti-ti ní nee.

30 Kɔŋkɔneee ti nyí yii a nyí tikɔkɔ, an kaa ti páb̄ yii ubo n̄i bàlf̄i-si tiba. An pu ní ti fɔ̃ɔ ki kí yii a nyánni Unimbɔti cee.”

³¹Ní Yeesu kífí-bi yii: “Ni fǝǝ ki kífí kǝŋkǝnneeyaa!

³²Too, ŋyunti ŋubɔ dɔɔn, ŋu bāań gba, ŋun ni ni-kɔkɔ dàá sān kí yāl̄ ni-ba ni-ba kí kín man babee, ama maa bí m-baba nì m-baba, m-Baa bí m-cee.

³³M tükū-ni tin bí nee an nín dàá ŋá pu tí nīn sá ubaanti ní nīn cáá dipɔɔsɔŋkilee. Falaa dɔ ki cí-ni duulnyan doo ní jī, ama ni-wunti n̄ taa yòtī! Di sá m jáń kí jín duulnya.”

Jaan 17

¹Yeesu sòon̄ mín̄ ki dódoyee, ní ki yáatì u-nimiin ki túl kutaa ní ki bí yii: “M-Baa, kǝŋkǝnnee ŋyunti bāań! Tī a-Jipɔɔn tinyool, an nín dàá ŋá pu a-Jipɔɔn mun n̄ tī-si tinyolee.

²Kun puee sii di tī-u mpɔn binib kɔkɔ pu, yii ú tī bin kɔkɔwoooo a dūu ŋá u-ŋaanee mmanɔafɔkɔn ŋun kaa cáá dikuntilee.

³Dimanɔfal gbanti di sá bí béé sii un baba sá Unimbɔtibaamonee, kí béé Yeesu Kriisitoo un a túnné mun.

⁴M dàkā duulnya nib a-nyooti, m dódò ditundi din a tī-mi m̄ ŋée.

⁵M-baa, kǝŋkǝnnee, tī-mi tinyool a-cee, tinyool tin m n̄n cáá a-cee dooooyee, ki wāatì ní a nín náań duulnyee.

⁶“M yāntì binib bin a nyāntì duulnya nib kansikin ki tī-mee béè-si. Sii di n̄n yì-bi, ní ki dū-bi ki tī-mi, ní bi fǝǝ a-bɔti.

⁷Kǝŋkǝnnee, bi béè yii tin kɔkɔ a tī-mee nyānní a-cee.

⁸Tibɔti tin a tīn̄-mee m cáań ki tükū-bi, ní bi fǝǝ ki béè yii ibaamɔn m nyānní sii cee, ní ki fǝǝ ki kífí yii sii di túnní-mi.

⁹“Bín̄ pu ní m mèé-si nee. An kaa sá duulnya nib pu ní m mèé, m mèé-si binib bin a tī-mi nee pu ní, kun puee sii di yì-bi.

¹⁰Tin kɔkɔ m cááyee, sii di yì, ní tin kɔkɔ si mun cááyee, man di yì. Bín̄ pu ní bi tì-mi tinyool.

¹¹Man kaa ti bí duulnyan, man dɔɔn̄ sii cee ní, ní bín̄ dàá nīn gbintii bí duulnyan. M-Baa circirdaan, dū mpɔn ŋun bí a-yindi din a tī-mee nee kí ŋúb-bi, an nín dàá ŋá pu bí kpāfi ubaanti kii man n̄ si nín ŋá ubaanti puee.

¹²Man n̄ bi nín n̄n béé, m dū a-pɔŋŋu ŋun a tī-mee ki ŋúb-bi, ní ki mótí bi-pu, ní báa ubɔ bi-kansikin kaa wāŋkì, asece un baba dàá péē wōŋkì, kii a-takaldau nín n̄n péēsòon̄ ki sīn̄ puee.

¹³Kǝŋkǝnnee, m dɔɔn̄ a-cee, m nín dáá bí duulnyan ki sòon̄ tin nee, an sá kí ŋmā kí yāntī bí ká dipɔɔpindi, man pɔɔpimmontiil.

- ¹⁴M cáan-bi a-boti, ní duulnya yab ná-bi, kun puee baa sá duulnyan, kii man mun nín kaa sá duulnyan puee.
- ¹⁵Maa mèé-si yii á yòon-bi duulnyan, á núb-bi, bí taa jēetí Sitaan njan.
- ¹⁶Baa sá duulnya yab, kii man mun nín kaa sá duulnyan you puee.
- ¹⁷Á dū a-baamoní kí nà bi-ni, kí yantí bí kpántí a-yab kòkò: a-boti di sá ibaamon.
- ¹⁸Kii a nín túnní-mi duulnyan puee, mín ní man mun tú-bi duulnyan.
- ¹⁹M kúntì m-ba kòkò ki tī-si bi-pu, an nín dàá nà pu ibaamon n yantí bí mun n kúntí bi-ba kí tī-see.
- ²⁰“An kaa sá bìn baba pu ní m mēé-si, m mēé-si ki kpáan bin bin dàá dāá pīlfi bi-boti kí fōō-mi kí kíyee pu ní.
- ²¹M-Baa, m mēé yii bi-kòkò n nà ubaanti kii sii nín bí man-ni, man mun bí sii-ni puee, bi-kòkò n nà ubaanti nì ti, an nín dàá nà pu duulnya nib n lafun bée yii sii di túnní-mee.
- ²²M yantì bi fōō a-nyooti tin a nìn tī-mee an nín dàá nà pu bi-kòkò n nà ubaantee, kii man nì si nín nà ubaanti puee:
- ²³man n nīn bí bi-ni kii sii nín bí man ni puee, an nín dàá nà pu bí nà ubaanti mbaamonin, duulnya nib n bée yii sii di túnní-mi, ki nēn-bi kii a nín nēn man puee.
- ²⁴“M-Baa, m là yii laakin m bée, bin kòkòwoooo a tī-mee n nīn bí m-cee niin kí ká m-nyooti, tinyool tin a tī-mee; kun puee a nēn-mi ki wāatì ní ki nín náan yilpu nì taapu.
- ²⁵M-Baa deedeedaan, duulnya nib kaa nyí-si, ama man nyí-si, ní bin bí nee bēè yii sii di túnní-mi.
- ²⁶M yantì bi bēè-si, ki dàá yantí bí mòtí bēé-si, an nín dàá nà pu dineendi din a cáá m-puee n nīn bí bi-ni, ní man mun m-ba n nīn bí bi-nee.”

Jaan 18

- ¹Yeesu mēēmín ki dóoyee, ní u nì u-boonnooliibi búnti Seedroon bungbandi lapu pu. Bukpaa bubò nìn bí niin, ní u nì u-boonnooliibi cūti ki kó bu-poon.
- ²Juudasi un nìn nyán u-boonee mun nyí niin, kun puee Yeesu nì u-boonnooliibi nìn péēcá niin múmul.
- ³Ní bisaraanjakpilib nì Fariisab nìn tī Juudasi disoojakitil nì diplisikitil, ní u yōon-bi ki cáā nín cá bukpaayee poon, bi núb inminaapool nì fitilab nì tijanjawan.
- ⁴Yeesu nyí tin dòon-uee, ní ki sūtì ki pīl-bi, ki bālfí-bi yii: “Dma ní ni nyàab ní?”
- ⁵Ní bi kí-u yii: “Ti nyàab Yeesu Naasaareeti youee ní.” Ní u kí-bi yii “Man sèé!” Juudasi, un nyán u-boonee, sáká bi-kansikin.

- ⁶Yeesu nín kírí-bi yii: “Man sèéyee”, ní bi fātìi túlfi bi-boon ki lítì kitìŋ.
- ⁷Ní Yeesu fātìi tí bālfì-bi yii: “Ŋma ní ni nyàab̀ ní?” Ní bi bí yii: “Ti nyàab̀ Yeesu Naasaareeti yɔu ní.”
- ⁸Ní Yeesu kírí-bi yii: “Kee, m péētùkū-ni yii m sèéyaa! An yaa sá man ní ni nyàabee, ní yàntì bin bí nee n̄ n̄n cá!”
- ⁹U lī mín án ɲá min u bàà mēēyee dee, yii: “Maa fá bin a tī-mee kansikin báà ubo.”
- ¹⁰Niinee ní Siimɔn Piyeer dáal ki fófì u-jiki, ki gāa ki wúkutì usaraaŋakpil tontɔnliu ubo ɲaŋgiitafal. (Bi n̄n yì utɔntɔnli gbanti Maalkusi.)
- ¹¹Ní Yeesu bí Piyeer yii: “Gíìn a-jiki kí fúuń kujitooun! M-Baa yaa tī-mi falaa m nyòee m taa nyòoo?”
- ¹²Niinee ní disoojakitilee n̄ bi-kpiliu n̄ Juuda yab plisib cúú Yeesu ki bóob-u,
- ¹³ní ki dá láá cáá-u ki cūnnì Ana cee. Ana gbanti di n̄n sá Kaayifi un n̄n sá usaraaŋakpil dibindi gbantee coo.
- ¹⁴Kaayifi gbantee di n̄n sáŋkì Juuda yab yii: “An máań unibaanti n̄ kpú binib kòkò yil pu.”
- ¹⁵Siimɔn Piyeer n̄ Yeesu boonnooliu ubo n̄n nóó Yeesu. Uboonnoolee nóó Yeesu ki kó usaraaŋakpil cindin, kun puee usaraaŋakpil n̄n nyí-u,
- ¹⁶ní Piyeer n̄n gbíntii sí kipunyòkò boon mmɔŋki. Ní uboonnool un usaraaŋakpil n̄n nyée nyáń ki ká usapooon un n̄n cí kipunyòkòpuee ní ki kóńní Piyeer.
- ¹⁷Ní usapooon un n̄n cí kipunyòkòpuee bālfì Piyeer yii: “A mun kaa sá uninja nee boonnooliibi uboo?” Ní Piyeer bí-u yii: “Aayee, maa sá.”
- ¹⁸Tiwool n̄n bí, an pu ní bitɔntɔnliibi n̄ plisib kpāa ɲɲmi ki sí ki wùl, ní Piyeer mun yú bi-cee niin ki wùl.
- ¹⁹Niinee ní usaraaŋakpil bí bālfì Yeesu u-boonnooliibi bɔti n̄n tibɔti tin u dākèe pu.
- ²⁰Ní Yeesu kírí-u yii: “M sòoń mpaampiin pu báà ɲma nimiin, m dākā m-bɔti akpafidiin ni n̄n Kunimbɔtidiin, laakin Juuda yab kòkò kpáfée, maa n̄n sòoń tiba dibalin.
- ²¹Ba pu ní a bālfì-mi? Bālfì bin pílfì tin m sòońee, bālfì-bi tin m lēē, bí n̄ nyí tin m sòońee.”
- ²²Dyunti ɲun Yeesu lī mimmee, ní plisi ubo un yú ki kól-uee fáá-u ntampa, ní ki bí-u yii: “Mín ní bi kííkí usaraaŋakpilaaa?”
- ²³Ní Yeesu bí-u yii: “M yaa sòoń min kaa kítèe, dākà-mi min ní m yíntèe. M yaa tí sòoń min kítèe, ba pu ní a fáá-mi?”
- ²⁴Yeesu ɲalii gbíntii bóobee, ní Ana dū-u ki tī usaraaŋakpil Kaayifi.

²⁵Dyunti gbantee, Piyeer yú ki wùl ñhmi. Ní bi bālfī-u yii: “Si mun kaa sá uninja nee boonnooliuaaa?” Ní Piyeer nées yii: “Aayee, man kaa sá.”

²⁶Ní usaraañakpil tontónliu ubo un nabiki tafal Piyeer bàà gāa ki wúkutèe bí-u yii: “Maa bàà ká si nì u bukpaanaaan?”

²⁷Ní Piyeer fātii ti nées yii an kaa sá ún. Kpalaa niin ní ukooja báakì.

²⁸Ní bi yōhñí Yeesu Kaayifi cee ki cáá-u ki nín cá gōmina Piilati cee. An nìn dáá sá kutaafaau pòlpəl. Juuda yab kaa nìn là kí kó gōmina diikun kun puee bi là kí nīn bí circir kí ñmā kí jī jiñaal un bi jīn ki téetí Unimbōti nín nìn nyánti bi-naanjab Eejipitee.

²⁹Mín pu ní gōmina Piilati nyánní ki dómín bi-cee, ní ki bālfī-bi yii: “Ba ní uninja nee ñá ní ni cáán-u ní?”

³⁰Ní bi kíí-u yii: “U yaa kaa bàà sá unikpiti, taa bàà cāabiñ-u kí tī-si!”

³¹Ní Piilati bí-bi yii: “Yòommaan-u, ni-marau nín sá puee, ní sòmmaan u-bōti ni-ba!” Ní bi kíí-u yii: “Timbi kaa cáá nsan kí kpò unil.”

³²An ñá mín kí dākà Yeesu nín nìn sòon u-kúm min u dàá kpúee puee dee.

³³Ní Piilati nín kòò kudiin ki yíin Yeesu, ní ki bālfī-u yii: “Mim mee, sii di sá Juuda yab bōtiuaaa?”

³⁴Ní Yeesu kíí-u yii: “Tin tin a lī nee, sii a-ba di dākafi mín naaan ubo di tükū-si mín man pu ní?”

³⁵Ní Piilati kíí-u yii: “M sá Ujuudajaaa! A-yab nì bisaraañakpil di dū-si ki tīn-mi. Mim mee, ba ní a ñá ní?”

³⁶Ní Yeesu kíí-u yii “M-beel kaa sá taapu doo beel. M-beel yaa bàà sá duulnyan yal, m-tontónliibi bàà jáà kí mōtì m-pu ní, baa bàà kííkí bí dū-mi kí tī Juuda yab kpilib. Ama, m-beel kaa sá taapu doo yal.”

³⁷Ní Piilati bí-u yii: “Mim mee, a sá ubōti níin?” Ní Yeesu kíí-u yii: “Mín ní a lī nee, m sá ubōti ní. M dómín bi māl-mi duulnyan m dākà binib kun di sá ibaamōnee. Un kamaa sá ibaamōn yōuee pílfí tin m sòonee ní.”

³⁸Ní Piilati bālfī-u yii: “Ba di sá ibaamōn ní?” Piilati sòon mín ki dóyee, ki nyán ki tí nín cá Juuda yab cee, ní ki bí-bi yii: “Maa ká kun pu ní kijapaai nee máan ditafadaaldee.

³⁹Kii ni-marau nín péésá puee, ni-jiñaaliu nee yaa bāánee m gīntí usarkadaan ubo ní kí líí-ni. Mim mee, ni là m gīn Juuda yab bōtiú kí líí-naaan?”

⁴⁰Niinee ní bi gítí tí bíí tátí yii: “Aayee, á taa gīn ún kí líí, see Baaraabasi ní á gīn kí líí!” Ní Baaraabasi gbantee mun di sá digangandaan.

Jaan 19

¹Niinee ní Piilati dū Yeesu ki tī bí gbá-u anaalab.

- ²Ní soojab dū ikuṅkum ki lūn kibeevuulii ki dūu cíkiñ Yeesu, ní ki dū dibokutil diba di mán cínciṅ ki dūu pēn-u.
- ³Ní bi sūtíi kól-u, ní ki lì yii: “Juuda yab bōtiu, ti jáam-si!” ní ki fátí-u.
- ⁴Ní Piilati fātii tí nyánní, ní ki bí Juuda yab yii: “Kpèèmaan, m daá nyāntiñ-ni-u mmōṅki, ní bée yii man kaa ká kun pu ní kijapaai nee máan ditafadaaldee.”
- ⁵Ní Yeesu nyán ki cíki ikuṅkum fuuliiki ki pē dibokutimandi cínciṅee, ní Piilati bí-bi yii: “Kpèèmaan unil!”
- ⁶Bisaraaṅakpilib nì bi-plisibee nín péeká-uee, ní bi bī tátí yii: “Bí kpáá-u ndōpuntikaa pu! Bí kpáá-u ndōpuntikaa pu!” Ní Piilati bí-bi yii: “Yòommaan-u kí cùú kpáá-u nimbi ni-ba ndōpuntikaa pu, kun puee man kaa ká kun ní u ṅá ki máan ditafadaaldee!”
- ⁷Ní Juuda yab kíi-u yii: “Timbi marau poonee, u máan ṅkúm, kun puee u bí yii u sá Unimbōti Jipōn.”
- ⁸Piilati gbīl mimmee, ní tifaandi mōtìi gítí kó-u,
- ⁹ní u nín kòò kudiin, ki bālfí Yeesu yii: “A baasii nyánní la ní?” Ní Yeesu kaa kíi-u báà tiba.
- ¹⁰Ní Piilati bí-u yii: “Man ní saa làá kííi? Aa nyí yii m cáá mṗon kí gíiñ-si kí líí, ki cáá mṗon kí yàntí bí kpáá-si ndōpuntikaa puṵṵ?”
- ¹¹Ní Yeesu kíi-u yii: “Aa cáá mṗon ṅubō ki kútì ṅun Unimbōti tīiñ-si yilpuee, mín pu ní un dū-mi ki ṅubiñ-see kpitii wīkíñ sii yai.”
- ¹²Ki yḍoñ ṅyunti gbanti ní Piilati bī nyàab kí gíiñ Yeesu kí líí. Ama ní Juuda yab bī kūuntí ki lì yii: “A yaa gíiñ kijapaai nee ki líyee, gōmina Seesar bōo kaa ti sá sii! Un kamaa yaa yī u-ba ubōtee di sá Seesar pulincōti.”
- ¹³Piilati gbīl mimmee, ní ki nyāntiñ Yeesu mmōṅki ki dómiñ ki kāl dibōsoonjal pu laakin bi yīi ataṅkpee paṅṅuee, (Eebru soonin bi yīi Gabata).
- ¹⁴An nìn sá kuwiṅkuluu nyōkōm ní kutaa n wúntí jīṅaal. Ní u lī Juuda yab yii: “Kpèèmaan, ni-bōtiu sèé!”
- ¹⁵Ní bi bī tátí yii: “Bí kpò-u, bí kpò-u, bí kpáá-u ndōpuntikaa pu!” Ní Piilati bí-bi yii: “Mimmee, m yàntí bí kpáá ni-bōtiu ndōpuntikaa puṵṵ?” Ní bisaraaṅakpilib kíi-u yii: “Timbi kaa ti cáá ubōti ubō ki kútì Seesar pu.”
- ¹⁶Niinee ní Piilati dū Yeesu ki tī-bi bí cáá-u kí kpáá ndōpuntikaa pu. Niinee ní bi cáá Yeesu ki cáā nín cá.
- ¹⁷Ní Yeesu yḍoñ u-dōpuntikaaṅu ki nyánní kitiñin ki nín cá laakin bi yīi Kuyikpabku lanṅee, (Eebru soonin bi yīi Gōlgōta.)
- ¹⁸Niin ní soojab kpáá Yeesu ndōpuntikaa pu, ní ki gítí kpáá binib bili ki ṅāl-u, ubō u-ṅaṅgiil pú, ubō u-ṅaṅgan pú ní ún sáká kansikin.

- 19**Piilati nìn ɲmàñ tiɲmaɲmabti ki tī bí cáá nákañ Yeesu dɔpuntikaanɲu pu. U nìn ɲmàñ yii: “Yeesu Naasaareeti yɔu, un sá Juuda yab bɔtiuee.”
- 20**Juuda yab tikpil nìn kàañ tiɲmaɲmabti gbanti kun puee laakin bi nìn kpáá Yeesuee nìn pìlìn kitiɲin, ní bi nìn ɲmàñ Eebru soonin ki ɲmàñ Room soonin ní ki ɲmàñ Greeki soonin.
- 21**Ní Juuda yab saraɲakpilib bí Piilati yii: “Taa ɲmà yii: 'Un sá Juuda yab bɔtiuee', ɲmà yii: 'Uninja nee bí yii ùn dì sá Juuda yab bɔtiu.' “
- 22**Ní Piilati kíí-bi yii: “Tin tin m ɲmàñee, tíñ dee.”
- 23**Soojab bin nìn kpáá Yeesu ndɔpuntikaa puee nìn pēetì-u ki yɔòn u-wampeenkaati ki yākati minaa pu, bi-kɔkɔ yɔòn diba diba pu. An kíñ dibɔkutifɔkɔl^fc^ din bi nìn lùn dicilpu, kaa ɲál ki kpáfi kpáfèe.
- 24**Ní soojabee bí lì tɔb yii: “Tí taa cáti dibɔkutil gbanti, tí tōmaan kasi kí kpèè ɲma di dàá jī dín.” Ní bi lafun ɲá mín. Min bi ɲá nee nóó nì Unimbɔti bɔti nín nìn sòòn ki síìn puee, yii: “Bi dū m-wampeenkaati ki yākati, ní ki tó kasi m-bɔkutifɔkɔl pu.”
- 25**Yeesu na nì Yeesu nawaa, nì Maarii Kloopasi nimpuu nì Maarii un sá Magdala tiɲkinee di nìn sí ki kól Yeesu dɔpuntikaanɲu.
- 26**Yeesu ká u-na nì u-boonnooliu un u néénee yú ki kól tɔb, ní u bí u-na yii: “Unimpu, kpèè, a-jipɔɔn sèé”,
- 27**ní ki bí u-boonnooliuee mun yii: “Kpèè, a-na sèé.” Ki yɔòn ɲyunti gbantee ní u-boonnooliuee yɔòn-u u kíñ ki bí u-cee.
- 28**Mín boonee, Yeesu ká yii kɔɲkɔnnee tikɔkɔ dóòyee, ní u bí yii: “Nnyinnyoo cáá-mi.” An ɲá kii Unimbɔti takaldau nín nìn péēsòòn ki síìn puee dee.
- 29**Dibool diba nìn yú niin, ndamam min tūee kā poon, ní bi dū kuca ki bó ndaamee poon ní ki dūu túun busubu bun bi yí isɔpuee dɔɲu pu, ní ki cáá gbēē Yeesu nyɔkɔ.
- 30**Yeesu nyùnee ní ki bí yii: “Tikɔkɔ dóò”, ní ki tīntì u-yil ní ki dū u-fām ki tī ki kpíi.
- 31**Ɖwiiñ dàá jēetì ɲwiɲɲuɲfikaa ń kílee, Juuda yab kpilib kaa nìn là bin bi kpááyee wunti ń nīn lún idɔpuntikaa pu ɲwiin gbanti. Ɖwiɲɲuɲfikaa gbanti nìn sá ɲwiɲkpaan ní, mín pu ní bi nìn mēē Piilati yii bí kōfi bi-taanɲi bí kpú malaa, bí cúú-bi kí kpáatí.
- 32**Niinee soojab dómiñ ki kófi bin bin bi nìn kpáá idɔpuntikaa pu nì Yeesu dicilpuee upeepeekaa nì uliliiti taanɲi.
- 33**Bi bāañ Yeesuee, ní ki ká yii u kpíi dooooyee, mín pu ní baa ti kófi ùn taanɲi,
- 34**ama ní sooja ubɔ bi-kansikin dū kikpaɲ ki sāā u-tikindi, ní fatiku nì nnyim nyáñ.
- 35**Un bí lèekī seera tibɔti nee puee baasii ká-tì ní, ní u-seerauee sá ibaamɔn, ní u nyí yii tin u sòònee sá ibaamɔn, ni mun ń ɲmā kí fǔǔ kí kíí.
- 36**Tin bí nee ɲá mín, án ɲmā kí nóó nì Unimbɔti takaldau nín nìn lī ki síìn puee, yii: “Baa làá wī u-kpabil báà diba.”

³⁷Laaaba mun gítí lī yii: “Bi dàá dāá ká un tikindi bi s̄ā ki cílee.”

³⁸Mín boonee, Jooseefi un sá Arimatee tiŋkinee, cūti ki mēēPiilati nsan kí yòon̄ Yeesu wunti. (Jooseefi gbanti n̄n sá Yeesu boonooliu ní kaa là binib í béé, kun puee u n̄n f̄aŋki Juuda yab). Ní Piilati pú-u nsan, ní u cūti yōon̄ Yeesu wunti.

³⁹Niikooodeem un n̄n cūti dalba kunyeeu ki ká Yeesuee mun dómín, ki cáan̄ tikaliŋkpin tin bi yí miiree tì ŋmāl̄ n̄ talaalu un bi yí alooweeyee kiiloobi mmuŋku n̄ saalaa nyokom.

⁴⁰Bi yōon̄ Yeesu wunti mimmee, ní ki dū iŋaabu ki fiñ-u ki dū talaalubee ki yāan̄ u-pu, kii Juuda yab koobiliŋ nín balfi bi yaa làá síb̄ unil bí ŋá puee.

⁴¹Laakin bi n̄n kpáá Yeesuee, bukpaabubɔ n̄n bí niin, bu-poon ní dikaakupondi din ni baa láá síb̄ báa ubɔee n̄n bí.

⁴²Niin ní bi n̄n cáá Yeesu ki síb̄ kun puee án̄ n̄n sá kutaa í wúntí Juuda yab wiŋŋuŋfikaaŋuaan, ní dikaakulee mun n̄n píl̄ niin.

Jaan 20

¹Dwiŋŋuŋfikaa jíti kutaa wúnti, kutaafaa pòlpòl an dáá bōnee, Maarii un sá Magdala tiŋkinee nín cá dikaakul laŋki, ní ki ká yii ditaŋkpal din bi n̄n dū pīn̄ dikaakul nyoko puee kaa ti pī.

²Ní u fātii sán̄, ki cūti Siimōn Piyeer n̄n Yeesu boonooliu un u nēēnee cee, ní ki bí-bi yii: “Bi cúú ti-kpiliu ki lēēdikaakulin. Taa nyí laakin bi cáá-u ki ŋée!”

³Ní Piyeer n̄n uboonool un béeyee nín cá dikaakul laŋki.

⁴Bi-liitil kɔkɔ n̄n sán̄ ki cá, ní uboonool un béeyee sán̄ ki līnti Piyeer pu, ki péé ki bān̄ dikaakul laŋki malaa.

⁵U gbóonee, ki ká iŋaabu dō, ama waa kó.

⁶Boonee ní Siimōn Piyeer mun bāan̄ ki nín kòò dikaakul poon, ní ki ká iŋaabu in n̄n fiñ Yeesu wuntee dō kitiŋ

⁷n̄n ŋaabu ŋun n̄n fiñ u-yilee, ŋaabu gbanti n̄n in n̄n fiñ u-wuntee kaa n̄n dō dibɔbaantiil, ŋún̄ n̄n póob̄ ki dō ŋkpaanceeti laaaba.

⁸Niinee ní Yeesu boonooliu un n̄n péé péé ki bānee mun kó, ki ká, ní ki fōō ki kí yii u fikitì.

⁹(Ama Yeesu boonooliibi kaa n̄n dáá gb̄l̄ Unimb̄oti takaldau nín lī yii Yeesu máan̄ kí fikitì ditaŋkpiilinee.)

¹⁰Niin ní bi fātì ki nín gítí bi-dumpu.

¹¹Maarii n̄n yú ki kól̄ dikaakul ki sūn̄. U yú ki sūnee, ní ki gbóon̄ ki kpēēdikaakul poon,

12 ní ki ká Unimbòti tūuni ili kā laakin bi nìn bíl Yeesu wuntee ki pēētiwampin. Dũbo kā u-yil laŋki, ní ŋun kínee mun kā u-taani laŋki.

13 Ní itūunee bālfī-u yii: “Unimpuee, ba ŋá ní a sūh?” Ní u kí-bi yii: “Bi yōh m-Dindaan. Maa nyí laakin bi dū-u ki ŋée!”

14 U lī mimmee, ki fātèe ki ká Yeesu yú, ama waa bée yii an sá Yeesu.

15 Ní Yeesu bālfī-u yii: “Unimpuee, ba ŋá ní a sūh ní? Dma ní a nyàab ní?” Unimpuee nyí kii bukpaadaan di bí bālfī-u, mín pu ní u bí yii: “Ukpil, sii di yaa yōh-u, dākà-mi laakin a cáá-u ki ŋée, m dàá cùú yòh-u”.

16 Ní Yeesu yíh-u yii: “Maarii!” Ní u fātìi túl-u ní ki lī-u nì Eebru soonin yii: “Rabunii!” (An taapu sá yii, Ukpil.)

17 Ní Yeesu bí-u yii: “Taa gbēē-mi, di sá yii maa láá jóm m-Baa cee. Ama níh cá kí tükù m-nabiyaamu yii m nín jóm m-Baa un sá ni-Baayee, m-Nimbòtiu un sá ni-Nimbòtiuee cee.”

18 Niinee Maarii Magdala yau nín cá u-boonnooliibi cee ki tükù-bi yii: “M ká ti-Dindaan!” Ní ki dū tin u tükù-uee ki lī.

19 Dwiŋŋufikaa jíti, ku wúntèe, kujooee ní Yeesu boonnooliibi kpáfí ki kā kudii kubon ki piñ mponyomu nì saafii, kun puee bi fāŋkí Juuda yab kpilib. Ní Yeesu cíliñ, ki dómiñ ki yúl bi-kansikin, ní ki bí-bi yii: “Ni-pòbiliñ n nñ sòm!”

20 U bí sòh mimmee, ní ki dākā-bi u-ŋalii nì u-takakal. U-boonnooliibi nín ká ti-Dindaan mimmee, ní an mókiñ-bi tikpil.

21 Ní Yeesu gítì lī-bi yii: “Ni-pòbiliñ n nñ sòm! Kii m-Baa nín túnní-mi puee, man mun tú nimbi.”

22 U lī mimmee, ní ki púfi bi-pu, ní ki bí yii: “Fōōmaan Unimbòti Fām.

23 Ni yaa dū bin kpitii ki pú-bee, bi ká bi-kpitii pōtam, ni yaa kaa dū bin kpitii ki pú-bee baa ká bi-kpitii pōtam.”

24 Ama ŋyunti ŋun Yeesu dómiñee, Toomasi un nìn sá atab ki sá Yeesu kpambaliñ saalaa nì alee kansikin díbee, nìn kpá.

25 Ní u-boonnooliibi bin nìn bée bí-u yii: “Ti ká ti-Dindaan!” Ní Toomasi kí-bi yii: “M-nimiliñ yaa kaa ká u-ŋalii laakin bi kpáayee, m yaa kaa dū m-ŋambiki ki bó laakin bi kpáayee ki yaa kaa dū m-ŋal ki bó u-takakal laakin bi nìn sāayee, maa làá fōō kí kí.”

26 Iwiin inii boonee, Yeesu boonnooliibi fātìi kpáfí dibōbaantiilee ni, Toomasi mun nìn bí yaadal. Bi dū mponyomu ki piñ ki kpāl, ama ní Yeesu cíliñ bi-kansikin, ní ki bí-bi yii: “Ni-pòbiliñ n nñ sòm!”

27 Ní u bí Toomasi yii: “Dāá kpèe m-ŋalii, kí cáán a-ŋambiki kí máán! Cáán a-ŋal kí máán m-takakal, kí fōō kí kí, kí taa níh gítì kpākantí!”

²⁸Niinee ní Toomasi n̄ bí-u yii: “M-Dindaan, m-Nimbōtiu!”

²⁹Ní Yeesu kíí-u yii: “A nín ká-mee ní a nín fṵṵ ki kííyaa! Án n̄n mōn̄ bin kaa ká-mi ki fṵṵ ki kííyee.”

³⁰Yeesu n̄n ḡaān̄ maamaacib tikpil u-boonnooliibi kansikin bin ní baa ḡmān̄ ki ḡa takalda nee poonee.

³¹Bi yaa ḡmān̄ tin bí neeyee, an sá ní fṵṵ kí kíí yii Yeesu sá Unimbōti Jipōon ki sá Kriisitoo. Ni yaa fṵṵ-u ki kíí mimmee, ní ká dimaḡfal u-yindi pu.

Jaan 21

¹Boonee ní Yeesu fātii tí nyánti u-ba u-boonnooliibi ká-u Tiibeeriyaadi mṵṵḡbandi. Bi nín ká-u, tin jítèe sèé.

²Siimōn Piyeer n̄ Toomasi un bi ȳi atabee n̄ Natanayeel (un sá Kana Gaaliilee timbilikinee) n̄ Seebeedee jipōmbi n̄ Yeesu boonnooliibi biba mun bili di n̄n kpáf̄i ki bí dicilpu.

³Ní Siimōn Piyeer bí-bi yii: “M cá dilaantōl.” Ní bi bí-u yii: “Ti mun dàá nṵṵ-si kí cù.” Ní bi búnti ki cūti kó buḡalimbun, ama, yaadal nyeekuee, baa n̄n cúú báà t̄ba n̄ t̄ba.

⁴Kutaa b̄i wúntée, Yeesu dóm̄in̄ ki yú dimṵṵḡbandi, ama u-boonnooliibi kaa n̄n bée yii an sá ùn̄ di yú.

⁵Ní Yeesu bí-bi yii: “Binaacimpōmbi, naa cúú ijōmaaan?” Ní bi kíí-u yii: “Aayee, taa cúú.”

⁶Ní u bí-bi yii: “Dūmaan kulaaḡḡu kí t̄o buḡalimbu ḡaḡgiil pú, ni dàá cúú ijōm.” Ní bi dū kulaaḡḡu ki dūu tó, ní an cúú ijōm tikpil, ali gba baa ti kpáā ḡñ̄n̄ kí dáal̄ kí nyāntiñ̄.

⁷Niinee ní uboonnool un Yeesu n̄n nēēnee bí Piyeer yii: “An sá ti-Dindaan!” Siimōn Piyeer n̄n ḡb̄īl̄ yii an sá ti-Dindaanee, ní u dū u-bōkutil ki pēēn̄, (kun puee u n̄n pēeti) ní ki jēt̄i nnyimin ki wāḡk̄i dūti.

⁸Ní u-boonnooliibi bin kínee mun dāa bāaḡn̄ n̄ buḡalimbu, ki dátiñ̄ kulaaḡḡu n̄n ijōm, kun puee baa n̄n ḡt̄i dátiñ̄ dibuḡḡbandi, an n̄n kíñ̄ f̄īī kí bà meetab dilaataal.

⁹Bi kpákat̄i kitiḡee ní ki ká ijōm pá amōsiḡkoon pu, n̄n kpōn̄o.

¹⁰Ní Yeesu bí-bi yii: “Ní cáaḡn̄ ijōm in ni cúúyee iba.”

¹¹Ní Siimōn Piyeer kó buḡalimbu poon ki dáaliñ̄ kulaaḡḡu ki bíl̄ kitiḡ, ijōḡkpaan ḡb̄ī poon, i n̄n sá ijōm iluli n̄n saalaa n̄n ita. N̄n min kōkō ijōm n̄n w̄īk̄i kulaaḡḡuee poonee, kuaa n̄n cáti.

¹²Ní Yeesu bí-bi yii: “Dāaḡn̄ kí j̄imaan̄ tijin!” Ní u-boonnooliibi kansikin báà ubō kaa wāaḡn̄ ki bālf̄i-u yii: “Sii di sá ḡma?” Bi n̄n nyí yii an sá ti-Dindaan.

¹³Ní Yeesu sūt̄iñ̄, ki dū kpōn̄o ki t̄ī-bi, ní ki t̄ī-bi ijōm mun.

¹⁴Yeesu nín nìn kpì ki fikitèe, min bí nee di sá ntataatiim min u nìn nyántì u-ba ki dākā u-boonnooliibee.

¹⁵Bi jíń tijn ki dóoyee, ní Yeesu bālfì Siimōn Piyeer yii: “Siimōn, Jaan jipōon, a nééń-mi ki jíń bin bí neeee?” Ní u kíí-u yii: “Iin, m-Dindaan, a nyí m nín nééń-see.” Ní Yeesu bí yii: “Á nīn kpàá m-pibiliŋ.”

¹⁶Ní u gítī bālfì-u nliliitiim yii: “Siimōn, Jaan jipōon, a nééń-maaan?” Ní u bí yii: “Iin, m-Dindaan, a nyí m nín nééń-see.” Ní Yeesu bí-u yii: “Á nīn kpàá m-piii.”

¹⁷Ní u gítī bālfì-u ntataatiim, yii: “Siimōn, Jaan jipōon, a nééń-maaan?” An nìn kó Piyeer kunimbaau min ní Yeesu nìn bālfì-u ntataatiim yii, a nééń-maaanyee, ní u kíí Yeesu yii: “M-Dindaan, a nyí tikōkō, ki nyí m nín nééń-see!” Ní Yeesu bí-u yii: “Á nīn kpàá m-piii.”

¹⁸Ibaamōn, ibaamōn ní m sòon nì si, a nín nìn sá unaacimpōonee, a nìn gbīn a-dambalau a-ba, ní ki cá laakin a yaa lèe. Ama a yaa láā púlee, a dāa tantī a-ŋalii, ní ubō n gbīn-si dambala, ní kí cáá-si kí cunnì laakin aa bàà là kí cùee.”

¹⁹(Yeesu nìn sòon an bōti kí dākà Piyeer ŋkúm min u dàá dāá kpú kí tī Unimbōti tinyoolee.) U lī mīn ki dóoyee, ní ki bí yii: “Nīn nók-mi!”

²⁰Piyeer fātèe, ki ká uboonnool un Yeesu néénee di dōon bi-boonee. Ún di sá un, bi nìn bí jīn tijn u sùtì ki nákañ Yeesu, ki bālfì-u yii: “Ukpil, ŋma di dàá dū-si kí tī a-nannanliibee?”

²¹Piyeer ká-uee, ní ki bālfì Yeesu yii: “Ti-Dindaan, tilati di dàá bàñ unee ún ní?”

²²Ní Yeesu kíí-u yii: “M yaa là ú nīn bí kí nīn cí m-gítintam, tīn kaa ká-si. Sii dee, nók-mi!”

²³An-nyōobundi pu ní nnabiyaamu kīn ki lī yii uboonnoolee ún kaa làá ti kpú. Ama Yeesu kaa nìn lī Piyeer yii uboonnoolee kaa làá kpú. Tin tin u lēe di sá: “M yaa là ú nīn bí kí nīn cí m-gítintam, tīn kaa ká-si.”

²⁴Uboonnool gbanti di ŋmān tibōti nee, ní ti nyí yii tin kōkōwoooo u sòon Yeesu puee sá ibaamōn.

²⁵Yeesu gítī ŋáañ atuun tikpil. Bi yaa bàà làá ŋmà kí māafi u-tuunŋi ŋin u ŋáañee diba diba, maa dākafī yii duulnya bàà ŋūn takaldab gbanti kōkō.

Atuun

Atuun 1

- ¹Teeoofiil, m nìn ηmāñ m-takaldapeepeekaau poon tin kəkə Yeesu nìn kí ki ηjāáñ, ki dākèe,
- ²doooo ηkilkaam ali ki tin sāā ηwiin ηun u jóm yilpuee. U-kúm nì u-fikititam boonee, kí wàatī kí nín jōmèe, u kpáafi akpambal ηin u nìn lútèe nì Unimbōti Fām pəηηu.
- ³U nín kpīi ki fikitèe, u nyánti u-ba ki dākā u-boonnooliibi ηfunyom tikpil ali ki tin sāā iwiin immuηku ili kí dākà yii u lafun bí dimaηfalin; ní bi-nimil ká-u, ní u sòon nì bi Unimbōti beel bōti.
- ⁴U nì bi nín nìn dáá bée, u kpáafi-bi yii bí taa yīki Jeerusaleem tiηkin. U bí-bi yii: “Ní kāl kí cītī ti-Baa Unimbōti nín nìn pōon dipoondi diηyee, dipoondi din bōti m nìn sòon nì nee.
- ⁵Kun puee nì nnyim ní Jaan nìn fūul binib; ama nimbee, nì iwiηkaaηkaa nee poonee, Unimbōti dàá fāl-ni nì Circir Fām.”
- ⁶Dyuntèe, akpambal nì Yeesu nìn kpáfi ki kēe, bi bālfī Yeesu yii: “Ti-Dindaan, an sá ηyunti nee ní a dàá fātī yàntī Israyeel yab n fōō dibeelaaa?”
- ⁷Ní u kíi-bi yii: “M-Baa nín dū ún u-ba pəηηu ki síin iyunti nì iwiin iηyee kaa sá ni-yati.
- ⁸Ama Unimbōti Fām dàá kpákatiñ ni-pu kí tīi-ni mpon ηubə, mín boonee, ni dàá lēem-pu seera Jeerusaleem tiηkin nì Juudee nì Samarii timmun, kí tin sāā kutagbəηu nì kitiη kuntinyəkə.”
- ⁹U lī mín ki dódoyee, u-kpambaliη bíi kpèe-uee, ní an yōon-u ki cáā nín jóm yilpu, ní ditagbandi diba dómín ki līkiñ u nì bi kansikin, ní baa ti wāl-u.
- ¹⁰Bi dáá gbíntii yú ki kpèe yilpu u nín cá puee, kpalaayee, bininjab bili dee bi-nimiin ki pēetiwampin,
- ¹¹ní ki bí-bi yii: “Gaalilee yab, ba pu ní ni yú ki kpèe kutaa pu mín? Yeesu un ni ká u yīki ni-kansikin ki jóm yilpu nee, dàá dāá fātī tí gítin mín mbaantiim kii ni nín ká u jóm pu nee ní.”
- ¹²Niinee ní Yeesu kpambaliη yīkiñ Ōliifi sufii jool pu ki fātī nín gítin Jeerusaleem. (Dijoolèe kaa nìn dátin Jeerusaleem: an dandatiηu nìn sá ditaηkpal diba ní.)
- ¹³Bi bāáñ niinee, ki jóm diditontəkəl din-ni bi nìn péēkpāā kpáfèe. An nìn sá Piyeer nì Jaan nì Jaaki nì Andree nì Fiiliipi nì Toomasi nì Baateeleemii nì Maatiu nì Jaaki Alfee jipəon nì Siiməon un nìn là kí jān Room yabee, nì Juudi Jaaki jipəon.
- ¹⁴Bín kəkə nìn kpáfi kinyəbaantiii ki mòtī mèe ηwimmeem, bi nì binimpoobi biba, nì Maarii Yeesu na, nì Yeesu naalib mun.

¹⁵Iwiin gbanti poonee, Piyeer síl nnabiyaamu mun nèn kpáfí ki bàñ kii binib imuŋku iluuyee kansikin, ki bí-bi yii:

¹⁶“Nnabiyaamu, an máaṅ yii Unimbōti takaldau nín nèn sòoñ min Juudasi pu dooooyee, an ṅá mín. Kun puee Unimbōti Fām dī Dafiidi pu ki sòoñ Juudasi un nèn līnti nsan bi cúú Yeesuee pu.

¹⁷U nèn ṅmāl̄ ti-kansikin ki mun sá ti-tundi nee poon yəu ubə.

(¹⁸Unil gbanti dū ntoonam nimiliŋ ki dá kusaau. Niin ní u líti dicincibil, u-pool pōṣṣ, ní ina yāaṅ.

¹⁹Jeerusaleem yab kəkə nín gbīl̄ an bōti gbantee, ní bi pú kusaau gbanti diyindi bi-soonin yii: Akeeldama, an taapu sá yii: fatiku saaku).

²⁰Soom takaldaun ní ubōti Dafiidi nèn sòoñ ki síiṅ yii: 'U-kəŋkooŋŋu ṅ kprántí kudigbuŋu, ubə ṅ taa ti kó kudii gbantin,' ní ki gítí ṅmāñ yii: 'Ubo ṅ fōṣ u-tundi.'

²¹⁻²²“Mín puee an máaṅ ubə ṅ dāaṅ kí kūtí ti-pu kí nīn lèekī seera ti-Dindaan Yeesu fikititam pu. Udaan máaṅ kí nīn sá ti nì bin nèn cēentí Yeesu ṅyunti ṅun u dáá bí ti-cee ti cá ajan sá kamaayee kansikin ubə. Udaan máaṅ kí nin sá ti nì bin nèn bí kí yòoñ ṅyunti ṅun Jaan nèn fūul̄ binib Unimbōti nyimee ki dāa sāa ṅwiin ṅun Yeesu yíkí ti-kansikin ki nín jóm̄ yilpuee.”

²³Piyeer lī mín ki dóoyee, ní bi cáaṅ binib bili, Joosefí un bi yíi Baarsaabasi ki gítí páaṅ-u diyindi yii Justusee, nì Maatiyasi.

²⁴Ní bi mēēyii: “Ti-Dindaan, sii di nyí báa ṅma pəbil. Dàkà-ti un ní a lēēbi-kansikinee,

²⁵udaan ṅ kprántí a-kpambal kí nīn bí mpaan ṅun Juudasi dūu fá ki búnti u-laŋkee.”

²⁶Bi tó kasee, Maatiyasi jín, ní bi dū-u ki ṅāl̄ akpambal saalaa nì dibee pu.

Atuun 2

¹Pantikooti wiinŋu dalee, bi-kəkə nèn kpáfí ki bí dibəəbaantiil.

²Dicilpu kpalaayee, kuwoou kubə nyánní yilpu kii kubuŋkpaanŋu kubəee, ní ki dómín ki gbí kudii kun poon bi nèn kēe.

³Ní iŋmi iba bāaṅ-bi, i bí kii alimbilee, ní ki cúū yākatí təbin ní ki tókəṅ báa ṅma pu.

⁴Ní Unimbōti Fām sīntiṅ ki kó bi-kəkəṅ mməntiim, ní bi kíñ ki sòoñ isooncaan in Unimbōti Fām tī-bi bí sòoṅee.

⁵Iwiin gbantee, Juuda yab bin nóó marabee nèn dómín Jeerusaleem, ki nyánní atimbun ṅin kəkə bí duulnyanee.

⁶Kuwoou bí gèe, ní samaa sáñní ki bāaṅee, ní ki gítí bākatí, kun puee bi-kəkə nèn gbīl̄ bi-soonin binibee nín sòoñ puee.

- ⁷Ní bi bākati seeee, an ḡá-bi bitii, ní bi kíh̄ ki bī sòh̄ nì tɔb̄ yii: “Bin kɔkɔ sòh̄ nēe kaa sá Gaaliilee yabaaa?”
- ⁸Kin, an ḡá mana ní ti-kɔkɔ nēe gbìl̄ nì ti-timmu sooni poon tin bi sòh̄ nēe?
- ⁹Ti-kansikin biba sá Paati, biba sá Meedi, nì Eelam, biba mun sá Meesooootamii nì Juudee, nì Kaapaadɔsi nì Pɔnti nì Asii nì
- ¹⁰Frijii nì Paṅfilii nì Eejipiti nì Liibii jandi din pìl̄h̄ Siireenee yab, nì bin kɔkɔ nyánní Roomee.
- ¹¹Biba sá Juuda yab, ní biba mun sá binicambi bin fɔ̄ɔ̄ Juuda yab marabee, Kreeti yab nì Bilaalibub. Kin, an ḡá mana ní ti gbìl̄ bi sòh̄ Unimbɔti tunnyaanḡi bɔti timbi kɔkɔ soonin?”
- ¹²Ní bi bākati, kaa ti nyí tin poon ní bi bée, ní ki kíh̄ ki li tɔb̄ ceeni yii: “Ba bɔti nín sèé dee?”
- ¹³Ama biba nìn bí ki bèl̄-bi, yii: “Bi nyùñ ndaam ní ki gbí!”
- ¹⁴Niinee ní Piyeer yáat̄i yúl̄, u nì akpambal sala nì dibee, ní ki yɔh̄ dinyɔɔbundi ki téh̄ mpɔn ki bí-bi yii: “Nimbi Juuda yab, nì nimbi bin kɔkɔ kòd̄ Jeerusaleeme, ḡátímaan ni-tafaliḡ kí p̄l̄fi tibɔti tin m̄ dáá sòh̄ nēe.
- ¹⁵Binib nēe kaa gbí ndaam, kii nimbi nín dākaf̄i puee, kun puee an dáá sá ntaafaawiin ní.
- ¹⁶Ama tin ni wāl̄ nēe, Unimbɔti bɔnaatiliu Jooweel nín nìn l̄i puee dee yii:
- ¹⁷Unimbɔti bí yii: 'Iyuntijoolkaayee, m̄ dáá dáá yànt̄i m-Fām̄ n̄ kpákatiñ unil sá kamaa pu, ni-jipɔmbi nì ni-bisalib̄ dāa nàat̄i m-nyɔɔbuḡi, ni-naacimpɔmbi dāa wāl̄fi tin dòoñee, ní ni-jaṅkpilib̄ mun dāa dāmint̄i tidamintiil.
- ¹⁸Ibaamɔn, iwiin gbantee, m̄ dāa yànt̄i m-Fām̄ n̄ kpákatiñ m-tɔntɔnliibi bininjab nì binimpoobi pu, ní bí nàat̄i m-nyɔɔbuḡi.
- ¹⁹M̄ dāa ḡáaḡ maamaacib̄ yilpu, ní kí dākà tidaandi taapu, ní ká fatiku, ḡḡmi, nì ḡḡminyim.
- ²⁰Ɖwiiñ dāa kpánt̄i dibɔmbɔndi ní uḡmal̄ n̄ kpánt̄i kii fatikuee kí wàat̄i ní ti-Dindaan wiḡkpaanḡuee nyooti n̄ nín bāñ.
- ²¹Niinee, un sá kamaa yaa láā fɔ̄ɔ̄ ki k̄í ki mēēti-Dindaanee dāa k̄ánt̄i difiil̄.’
- ²²“Israyeel yab, p̄l̄fímaan tibɔti nēe. Unimbɔti yānt̄i Yeesu Naasaareeti yɔu ḡáaḡ maamaaci tuuḡi nì tidaandi ni-kansikin, ki dākā-ni yii ùñ di lafun túnní-u ni-cee, kii nimbi ni-ba nín nyí puee, kun puee tikɔkɔ jíti ni-nimiin ní.
- ²³Kii Unimbɔti nín nyí ki là, ki lēēki yóh̄ puee, ní ni dū-u ki t̄i binikpitib̄ kpáá-u ndɔpuntikaa pu ki k̄ū-u.
- ²⁴Ní Unimbɔti fikiti-u, ki búti-u ḡkúm kusakai. Kun puee ḡkúm kaa ḡñ̄ kí n̄n̄ ḡúb-u.

- ²⁵Ali kii Dafiidi nín nìn sòoñ min u-puee yii: 'M wāl ti-Dindaan nyunti sá kamaa m-nimiin, tiba kaa làá nǎ-mi kun puee u tǐkǐ-mi m-nǎngiil pú.
- ²⁶Míñ puee m bí dipɔɔpindin ní ki sòoñ an mɔñ-mi. Nì min kɔkɔ m-wunti bí iwɔfinee, m mǎká yii m dàá dǎá fǎtǐ kǐ kǎ dimaŋfal,
- ²⁷kun puee aa làá dǎá fá-mi ditaŋkpiilin, kaa làá yǎntǐ a-tɔntɔmmɔntiu un a lēyee wunti n sū.
- ²⁸A yǎntǐ m bée dimaŋfal sambiyaamu, a-nimiin ní a dàá dǎá gbéeñ-mi dipɔɔpindi.'
- ²⁹“Nnabiyaamu, càntǐ m mɔtǐ tükùmaan-ni ti-naanja Dafiidi bɔti. U kp̄u ní bi sǐb-u, u-kaakul gbíntǐ dáá bí ti-kansikin ali nìn dín.
- ³⁰Dafiidi nìn sá Unimbɔti bɔnaatiliu ní. U nìn nyí Unimbɔti nín p̄tǐ ki p̄oñ-u yii u dàá dū ùn Dafiidi naantiiu ubɔ kǐ kǎaŋ u-beejal puee.
- ³¹An nìn sá Kriisitoo fikitam pu ní u nìn sòoñ ki yóoñ yii: 'Waa làá dǎá gbíntǐ ditaŋkpiilin, u-wunti mun kaa làá dǎá sū.'
- ³²“Yeesu gbanti ní Unimbɔti fikiti, timbi kɔkɔ kǎ ki sá seeradambi.
- ³³Ti-Baa Unimbɔti kǎaŋ-u yilpu u-nǎngiil pú, ní ki tǐ-u u-Fām, kii u nín nìn péep̄oñ puee. Tin tin ni wāl ki gbǐl kɔŋkɔnneeyee, Unimbɔti Fām min Yeesu tǐín-tee tuuŋŋi dee.
- ³⁴Di sá Dafiidi u-ba kaa nìn jóm yilpu, ama ki mun lǐ ki sǐiñ yii: 'Ti-Dindaan tükü m-Dindaan yii: Kǎl m-nǎngiil pú
- ³⁵kǐ nìn cí nyunti ŋun m dàá dǎá yǎntǐ á nìn kǐn ki tókó a-nannanliibi puee.'
- ³⁶“Israyeel maaliŋu kɔkɔ, béemaan nì ibaamɔn poon yii, Yeesu un ni kpáá ndɔpantikaa puee, Unimbɔti dū-u ki nǎ ti-Dindaan ki lēyee ù nìn sá Kriisitoo.”
- ³⁷Bi nín gbǐl tibɔti gbantee, ní bi-pɔbiliŋ mǎl tiŋan, ní bi fǎtǐ bǎlfǐ Piyeer nì akpambal ŋin kǐñee yii: “Ti-nabiyaamu, mimmee, ti dàá nǎ mana?”
- ³⁸Ní Piyeer kǐi-bi yii: “Fámaan ni-kpitǐ, bí fǎl báà ŋma Unimbɔti nyim Yeesu Kriisitoo yindi pu, ní ní nín kǎ ni-kpitǐ p̄tam, kǐ wǎatǐ ní Unimbɔti n nín p̄-ni u-Fām.
- ³⁹Kun puee u-poondi gbanti sá ki tǐ nimbi, nì ni-biyaamu, ki kpáaŋ bin bí ndanee, nì dinikitikpaandi din kɔkɔwoooo ti-Dindaan ti-Nimbɔtiu dàá dǎá yíínee.”
- ⁴⁰Piyeer gǐtǐ ȳoñ anyɔɔbun tikpil ki sòoñ ki sǎŋkǐ-bi yii: “Nyāmaan waanee nib bin nóó isaŋkpatee kansikin, kǐ kámaan difiil!”
- ⁴¹Bin f̄s̄ Piyeer bɔti ki kǐíyee yǎntǐ bi f̄l-bi Unimbɔti nyim. Yaadal wiŋŋuee, binib bin kútǐ Yeesu boonnooliibi puee wíŋŋu bǎñ kutukub bita nyɔkɔm.
- ⁴²Bi nìn p̄oñtǐ bi-ba ki bífǐ tin akpambal dákà-bee, ki kpáfǐ kinyɔɔbaantiii nì kunabitiiun, ki j̄n ti-Dindaan jikaati, ki kpáfǐ dicilpu ki mèé Unimbɔti.

- ⁴³Tifaandi nìn kó báà ḡma maamaacib nì tidaandi tin akpambal nìn ḡáánee pu.
- ⁴⁴Bin nìn f̄ᄃ ki kíyee nìn kpáfí dibɔbibaantiil, ní báà ḡma wanti nìn sá ki tī bi-kɔkɔ.
- ⁴⁵Bi nìn nyáfí bi-sati nì bi-wammontiiti, ní ki yàkatī ki tì báà ḡma nín máaṅ puee.
- ⁴⁶Kutaa kamaayee, bi nìn dòón múmul Kunimbɔtidiin dicilpu ki nyóḡkí Unimbɔti, ki kpáfí akiti akiti adiin ni ki j̄n̄ ti-Dindaan jikaati, ki j̄n̄ tijikaal nì dipɔɔbaantiil nì dipɔɔpindi poon,
- ⁴⁷ki nyóḡkí Unimbɔti. Ní samaa kɔkɔ nìn néeṅ bi-bɔti. Ní kutaa sá kamaayee, ti-Dindaan gbēentí bin kāntí difiilee wíḡḡu.

Atuun 3

- ¹Dalba ní Piyeer nì Jaan nìn nóó ki jóm Kunimbɔtidiin tikúti tita wimmeem yuntḡu.
- ²Kunimbɔtidiyee nìn cáá kipunyɔkɔ kin bi nìn ȳn̄ ȳi Kipunyɔkɔnyaanḡee. Uninja ubɔ, u nìn sá ufaliḡfaan doooo u-biyatin, ní bi nìn cāabín-u ki kàantí kutaa sá kamaa Kipunyɔkɔnyaanḡee nyɔkɔpu, ú n̄n̄ mēé bin j̄tí ki kóò Kunimbɔtidiinee animil.
- ³Uninjee ká Piyeer nì Jaan cá kí kóee, ní u bī mēé-bi animil.
- ⁴Ní bi dū bi-nimikpeeḡu ki báaṅ u-pu, ní Piyeer bí ȳi: “Kpèè doo!”
- ⁵Niinee ní u bī kpèé-bi címmm, ki bàà cí kí f̄ᄃ tiba bi-cee.
- ⁶Ní Piyeer bí-u ȳi: “Maa cáá animil kaa cáá sindaariya ama tin m cááyee, m dàá tī-si kudḡu. Nì Yeesu Kriisitoo Naasaareeti ȳu yindi puee, ȳkí còom!”
- ⁷Ní Piyeer cúú u-ḡanḡiil ki dúkutì-u yilpu. Dicilpu niinee, u-taḡi ḡin fālee tāntì ki ḡḡkì,
- ⁸ní u yùkū ki yúl, ní ki kíñ ki bī còom̄. U nì bi kɔkɔ táá ki kó Kunimbɔtidiin, ní u còom̄ ki yùkufi ki tiintí ki nyóḡkí Unimbɔti.
- ⁹Kunipaau kɔkɔ nín ká u còom̄ín ki nyóḡkí Unimbɔtee,
- ¹⁰bi béè-u ȳi ún̄ di nìn kàal Kunimbɔtidii punyɔkɔnyaanḡee nyɔkɔpu ki mēé animilee. Ní an ḡá-bi maamaaci, bi bākatì kijapaayee nín ká dicaandi puee.
- ¹¹Uninjee gbíntì ḡúb Piyeer nì Jaan ki nóó-bee, binib kɔkɔ bākatì ki sáñní ki dómín bi-cee kadantiku un bi ȳi Saloom̄on kadantikuee taapu.
- ¹²Piyeer ká mimmee, ní ki bí samaayee ȳi: “Nimbi Israyeel yab, ba ḡá ní tin bí nee ḡá-ni maamaaci? Ba ḡá ní ni dū ni-nimikpeeḡu ki báaṅ ti-pu mín̄, ali kii timbi ti-ba pḡḡu áá ti-deedeeu Unimbɔti nimiin di yāntì uninja nee ká dicaandee?”
- ¹³Di sá Abraam, nì Isaaki nì Jaakɔb Nimbɔtiu, ti-naanjab Nimbɔtiuee, di ḡá mín̄ kí tī u-tɔntɔnliu Yeesu tinyool. Ún̄ ní ni cúú ki tī Piilati, ȳi naa là-u, bí kpò-u, ḡyunti ḡun Piilati u-ba bàà nìn là kí ḡiñ-u kí líyee.

¹⁴Ni yí, yii naa là Yeesu un sá circir ki bí deedeeyee, ama ní ki gbāam̀ yii ú gíiñ unikp̀ol ḱí tī-ni,

¹⁵ní ki kūū mmaṅfafək̀on Dindaan. Ama Unimb̀oti fikiti-u ditanṅkpiilin, timbi k̀ok̀owoooo ǹn ká ki sá biseeradambi.

¹⁶Uninja un ni wál ki nyí nee, Yeesu un ti f̄̄̄ ki kííyee yindi pu ní kijapaai nee ká dicaandi. Ti nín f̄̄̄-u ki kííyee di ỳ-̀t̀ ní uninja nee p̀ók̀i tiṅan ni-k̀ok̀o nimiin nee.

¹⁷“K̀oṅk̀onnee, m-nabiyaamu, m nyí yii naa ǹn nyí ní ki ḡáaṅ tin bí nee, ki kpáaṅ ni-yidambi mun.

¹⁸Ama Unimb̀oti nín ǹn dī u-b̀onaatiliibi k̀ok̀o nyommu pu ki s̀oñ puee, yii Kriisitoo dàá dāá jī falaayee, an lafun ḡá m̀iñ.

¹⁹M̀iñ puee, fámaan ni-kpitii ḱí gítimaan Unimb̀oti cee ḱí wàatī ní ú kp̀itī ni-kpitii k̀ok̀o.

²⁰Boonee, ti-Dindaan ḡ tīiñ-ni nsṅfi yuntiṅu, ḱí t̄̄n Yeesu un u lē̄yii ú n̄n sá Kriisitoo ki tī-nee.

²¹Kun puee u dáá ká Unimb̀oti cee ḱí n̄n cí ḡyunti ḡun Unimb̀oti dàá dāá kpántí tik̀ok̀o mp̀om, kii u nín ǹn yānti u-circir b̀onaatiliibi s̀oñ dooooyee puee.

²²Mooisi ǹn lī yii: 'Ti-Dindaan ni-Nimb̀otiu dàá dāá lē̄ni-nabiyaamu kansikin ubo, ú n̄n sá Unimb̀oti b̀onaatiliu kii mamee. Ní dāá p̄lfiñ-u tin k̀ok̀owoooo u dàá s̀oñ n̄n nee.

²³Un sá kamaa yaa kaa dāá p̄lfiñ Unimb̀oti b̀onaatiliu gbantee, bi dàá dāá nyāntí-u Unimb̀oti samaau kansikin ḱí kp̀o-u.' “

²⁴Ní Piyeer nikī ki bí yii: “Unimb̀oti b̀onaatiliibi k̀ok̀o, bin ǹn s̀oñ doooo Samueel yuntiṅu ki kpáaṅ bin dāá páaṅni u-boonee mun, ǹn nāatī tiboti gbanti wiini pu.

²⁵Nimbi di sá bin jín tin Unimb̀oti ǹn p̄oñ ki tī u-b̀onaatiliibee, ki f̄̄̄ u nín ǹn pūti ki p̄oñ tin ḱí ḡá ḱí tī ti-naanjabee mun. Dipooni gbanti poon ní u lī Abraam yii: 'A-dicaṅku pu ní m̀ dàá dāá dī ḱí biñ duulnya timbuliṅ k̀ok̀o pu.'

²⁶Nimbi pu ní Unimb̀oti ǹn fikiti u-t̀ont̀onliu Yeesu. U dū-u ki túnní ni-cee mpeepeekaam, ú dāaṅ ḱí ḡá-ni tiṅan ḱí nyāntí báà ḡma u-kpitii poon.”

Atuun 4

¹Dyunti ḡun Piyeer n̄n Jaan ǹn dáá b̄i s̀oñ n̄n kunipaauee, ní bisaraṅaliibi n̄n Saadusab n̄n bin cí Kunimb̀otidiyee kpiliu bāaṅ.

²An kaa ǹn m̀ók̀iñ-bi, kun puee bi b̄i s̀oñ n̄n samaa Yeesu b̄oti ki d̀akà yii bitanṅkpiibi dàá dāá fikiti.

³Ní bi cúú Piyeer n̄n Jaan ki cáā tó sarkan ali kutaa n̄n ku-wuntil, kun puee an ǹn sá kujoou ní.

- ⁴Nì mín kòkòee, bin nìn gbìl bi-nyòobuṅṅi gbantee tikpil nìn fṣṣ ki kíf. Ní bininjab wíṅṅu nìn bàñ kii kutukub biṅmoo nyòkòm.
- ⁵Kutaa wúntèe, Juuda yab yidambi nì bikpilib nì bimaradakaliibi kpáfi Jeerusaleem,
- ⁶nì usaraanṅakpil Ana, nì Kaayifi nì Jaan nì Aleeksandi nì bin kòkòwoooo nìn sá usaraanṅakpil dicaṅkunee.
- ⁷Ní bi nyántì Piyeer nì Jaan ki yóòn bi-kansikin ní ki bálfi-bi yii: “Ŋma pṅṅu pu nì ṅma yindi pu ní ni ṅá mín ní?”
- ⁸Niinee Unimbòti Fām kpákatiṅ Piyeer pu, ní u kíf-bi yii: “Biyidambi nì bikpilib, m ṅá-ni gaafalaa.
- ⁹Ni bálfi kí bée dín tiṅan tin ní ti ṅá uninjabunli neeyee taapu, nì an nín ṅá pu ní u ká dicaandeeeee?
- ¹⁰Mín puee, ni-kòkò n bée tiṅan, ki kpáañ Israyeel yab kòkò, yii an sá Yeesu Kriisitoo Naasaareeti yòu yindi pu ní u pòókì. An sá u-pṅṅu pu ní uninja nee yú ni-nimiin nì u-gbampṅṅu nee. Nimbi di kpáá Yeesu ndòpuntikaa pu, ama Unimbòti fikiti-u ditanṅpiilin.
- ¹¹Ūn pu ní an ṅmāñ Unimbòti takaldaun yii: 'Ditanṅpal din nimbi bidimaliibi dūu fée, di kpántì ditanṅpal din ṅúb kudii pṅṅuee.'
- ¹²Baa ṅūn kí dī ubò pu kí ká difiil see Yeesu baba pu, kun puee taapu doo Unimbòti kaa ti tī ufiil ubò un pu timbi binib máañ kí dī kí ká difiilee, see Yeesu pu.”
- ¹³Biyidambee nín ká Piyeer nì Jaan sòòn nì tininjatee, an ṅá-bi maamaaci, kun puee bi ká yii bi sá binifantantiibi, kaa nyí takalda tikpil. Ama bi bée yii bi nì Yeesu di nìn tāatí.
- ¹⁴Bi nín ká uninja un pòókèe yú bi-ceeyee, baa ti ṅūn kí lì tiba.
- ¹⁵Ní bi bí Piyeer nì Jaan n nyā kubòsoondiin kí wàatī-bi, ní ki kíñ ki bálfi tób yii:
- ¹⁶“Ti dàá nín ṅá binib nee mana dee? Kun puee Jeerusaleem yab kòkò ká yii bi ṅá maamaacikpaan ubò, timbi ti-ba kaa ti ṅūn kí néé.
- ¹⁷Ama, tibòti gbanti n taa gbìtī kí cù ndan samaa kòkò ceeyee, tí dū mpòmpiin kí pīimmaan-bi nsan bí taa ti péèsòon Yeesu yindi gbanti pu bàà ubò cee.”
- ¹⁸Niinee ní bi yíin-bi ki pīin-bi nsan bí taa ti sòòn kí dākà binib Yeesu gbanti yindi pu bàà fiin.
- ¹⁹Ní Piyeer nì Jaan fātii kíf-bi yii: “An ṅāñ Unimbòti nimiin tí pīlfiñ nimbi kí yàntī Unimbòtaaa? Kíímaan-ti!
- ²⁰Kun puee timbi kaa ṅūn kí nīn ṅmí kí taa sòòn tin tin ti kée nì tin ti gbīlee.”
- ²¹Niinee ní bi fātii tí kpīin-bi ki gīin-bi ki líi, kaa nyí bi nín dàá ṅá pu kí dáal bi-tafaliṅee, kun puee samaa kòkò nìn pākà Unimbòti tin bi nìn ṅée pu.

- ²²Uninja un nìn ká maamaaci cáantam gbantee nìn jíti abin imuŋku ili pu.
- ²³Bi gíin Piyeer nì Jaan ki líiyee, ní bi búntì bi-yab cee ní ki bàñ ki máafi-bi tin kòko bisaraanakpilib nì bikpilib līn-bee.
- ²⁴Bi gbīl mimmee, bi-kòkò kpáfi dicilpu kinyòbaantiii ki mēēUnimbòti yii: “Ti-Dindaan, sii di náán yilpu nì taapu, kitiŋ nì tiŋku nì tin kòkòwoooo péébee.
- ²⁵Sii di yāntì a-Circir Fām dī ti-naanja a-tòntòntòliu Dafiidi pu ki sòòñ yii: 'Ba ñá ní atimbun yòontí ñi-ba yilpu ki sòòñ tibòfan mín? Ba ñá ní samaa cáá ilandòkòkpiti in kaa làá ñá ditundee mín?'
- ²⁶Duulnya bòtiibi nì biyidambi kpáfi ki bóób dikòndi kí jáñ ti-Dindaan Unimbòti nì u-Kriisitoou.'
- ²⁷An lafun ñá mín, yii kitiŋ nee poon Eeroodi nì Pònsi Piilati nì binicambi nì Israyeel yab kpáfi kí jáñ a-circirtòntòntòliu Yeesu, un a lēū sá Kriisitooyee.
- ²⁸Kujaau kun bi jáañ Yeesuee yāntì bi ñáañ tin kòkòwoooo a nìn lī ki yóòñ a-pòŋŋu nì a-ciini pu dooooyee.
- ²⁹Kòŋkòñnee, ti-Dindaan, kpèè bi nín lī yii bi dàá ñá-ti ntoomee puee, kí tūtuñ timbi a-tòntòntòliibi tí nīn sòòñ a-bòti nì tininjati.
- ³⁰Á tàntī a-ŋal kí dàkà a-pòŋŋu, bibunliibi n ká dicaandi, maamaacib nì tidaandi n ñá a-deedeetòntòntòliu Yeesu yindi pu.”
- ³¹Bi mēēki dóoyee, dibòbilin niinee kitiŋ cīŋkì, ní Unimbòti Fām gbí bi-kòkò mmòntiim, ní bi kíí ki bí sòòñ Unimbòti bòti, kaa fàŋkí.
- ³²Bin kòkòwoooo nìn fōō Yeesu ki kíiyee nìn pēēkinyòkò ní bi-pòbiliŋ nìn sá diba. Ubo kaa nìn lī yii tin u cááyee sá u-baba yati, ama báà ñma wanti nìn sá ki tī bi-kòkò ní.
- ³³Nì mpòŋkpaan ní Yeesu kpambaliŋ nìn sòòñ ki lèekī ti-Dindaan Yeesu fikititam seerau, ní Unimbòti biindi nìn bí bi-pu tikpil.
- ³⁴Bi-kansikinee ubo kaa nìn bí ki sá usoodaan, kun puee bin nìn cáá tisati àá adiinee nìn nyáfí ní ki cāabìñ tin bi nyáfèe nimiliŋ ki bīl Yeesu kpambaliŋ nimiin,
- ³⁵ní bi yàkatī bi-kansikin báà ñma nín máañ miŋyee.
- ³⁶Mín ní Jooseefi un Yeesu kpambaliŋ nìn páañ diyindi yii Baarnaabasee (an taapu sá yii, un ñmēentí binib ki tìi kunyannyaabee), u nìn sá Leefii naakookun, ní bi nìn màl-u Siipil tiŋkin,
- ³⁷u nìn cáá kusaau kubò ki dūu nyáfí, ní ki cáañ animil ki bíl Yeesu kpambaliŋ nimiin.

Atuun 5

- ¹Ama, uninja ubo nìn bí, bi yī-u Ananiyasi. U nì u-nimpuu Safiira nìn kpáfi ki nyáfí kusaau kubò,

- ²ní ki bātì animil, ki kíh ñin kínee ki cáā bíl Yeesu kpambaliñ nimiin; u-nimpuu mun ñin nyí min u-cal ñée.
- ³Ní Piyeer bí yii: “Ananiyasi, ba ñá ní a yāntì Sitaan jín a-pòbil poon mpaan mín, ki móntì Unimbòti Fām ki bātì kusaau nimiliñ?”
- ⁴Sii di yì a-saaku, a ñūn kí dū-ku kí yóoñ. A nín tí nyáfi-kuee, sii di yì an nimiliñ. Kin an ñá mana ní a yāntì nlandòkòkpiti fṣṣ mpaan a-pòbil poon mín? An kaa sá binib ní a móntì, an sá Unimbòti.”
- ⁵Dyunti ñun Ananiyasi gbīl mimmee, ní u líti ki kpî. Ní tifaandi ñin kó bin kòkòwoooo gbīl an botee.
- ⁶Ní binaacimpòmbi yíkì ki dū sata ki bīin-u, ní ki yḍoñ-u ki cáā síb.
- ⁷An yúntì ki bàñ kii tikúti titee, ní u-nimpuu kóoñ, kaa kpáàà bée tin jítée.
- ⁸Ní Piyeer bālfì-u dinyòobundi yii: “Tùkù-mi, ni nín nyáfi kusaau puee nimiliñ sòò?” Ní u kíi yii: “Iiin, ti nín nyáfi puee dee.”
- ⁹Niinee Piyeer bí-u yii: “Ba ñá ní sii ñi a-cal kpáfi ki cóṅkì ti-Dindaan Fām mín? Kpèè, bin síb a-calee di dòoñ kupunyòkòpuee! Bi dàá dāá yòoñ si mun.”
- ¹⁰Kpalaa niinee, ní ú mun líti Piyeer taaji taapu ki kpî. Binaacimpòmbi kóoñee, ki ká u kpî, ní bi yḍoñ ú mun ki cáā síb ki kól u-cal.
- ¹¹Ní tifaandi ñin kó Kriisitoo nikitil kòkò ñi bin kòkò ñin péēgbīl an botee.
- ¹²Yeesu kpambaliñ ñin ñáań tidaandi ñi maamaacib tikpil samaa kansikin. Bin fṣṣ ki kííyee ñin kpáfí dicilpu dibòobaantiil Saloomon kadantikuu taapu.
- ¹³Tifaandi ñin kó bin kaa fṣṣ ki kííyee, ní bi-kansikin báà ubò kaa ti là kí sútí pīl-bi, ama ñi mín kòkòee bi ñin pàkà-bi.
- ¹⁴Bininjab ñi binimpoobi bin ñin fòoñ ti-Dindaan ki kíikée ñin wīkí tikpil, ki gbēentí iyunti kamaa, ní ki dūu ñá dinikitikpaandi.
- ¹⁵An yāntì ali gba binib cāabín bibunliibi ki bīl nlambamu ñi tikampati pu adan pu, an nín dàá ñá pu Piyeer yaa jítée, u-jiliñku kpañkpan ñi líti biba puee.
- ¹⁶Binib tikpil mun ñin nyēēn ntimu mun kaa dátin Jeerusaleemee, ki cāabín bibunliibi ñi bin pu arasiniibi ñin ká bi wáatèe, ní bi-kòkò kánti dicaandi.
- ¹⁷Niinee usaraañakpil ñi u-yab kòkò, an dākà yii Sadusab jandi, kíh ki ná Yeesu kpambaliñ,
- ¹⁸ní bi yíkii cúú Yeesu kpambaliñ ki pīin-bi kudii.
- ¹⁹Ama ní kunyeeuee ti-Dindaan tūuñgu ñubò dómiń ki pīiti kusarkadii punyommu ki nyánti-bi, ní ki bí-bi yii:
- ²⁰“Cù kí yūlmaan Kunimbòtidii poon kí dū mmañfafòkòon bòti kòkò kí sòommaan, samaa ñi gbīl.”

21Bi gbīl mimmee, ní ki péé kutaafaau ki kó Kunimbōtidiin ní ki kí kí ki bī dākà Unimbōti bōti. Niinee, usaraaṅakpil nì u-yab bāān ki yīn bibōsooṅkpaambi. Bi kpáfi ki tú bí yīn Yeesu kpambaliṅee kusarkadiin.

22Plisib bàṅee, kaa ká-bi kusarkadiin, ní ki fātì gítì ki tūkū-bi yii:

23“Ti bàṅee, kusarkadii pī kpálkpal, ní soojab yú mpunyomu nyokopui, ní ti cúū pītèe, báà ubo nì ubo kpá poon!”

24Bi gbīl mimmee, ní bin kpèe Kunimbōtidiyee kpiliu nì bisaraaṅakpilib bākati nì Yeesu kpambaliṅ nín wāṅkì puee, kun puee tiba yaa láá gítì bàñ-bi tibōti nee poon sò, baa nyí.

25Ní ubo bāān ki bí-bi yii: “Binib bin ni cúú ki tó sarkanee di yú Kunimbōtidiin ki dākà samaayee.”

26Ní bin kpèe Kunimbōtidiyee kpiliu nì u-plisib cūti ki cáān-bi soooo, kaa ṅá-bi mpōn, kun puee bi fāṅkí samaa n̄ taa tō-bi atāṅkpee.

27Bi cáān-bee, ní ki cáá-bi ki cūnnì bibōsooṅkpaambi nimiin. Ní usaraaṅakpil bāfi-bi tibōti yii:

28“Taa yī yii ní taa ti sòon diyindi din pu ni sòon nee pu kpataaa? Kpèèmaan, dín pu nee ni yāntì ni-bōti gbanti gbīti Jeerusaleem kōkō! Mimmee, ni là timbi n̄ jī kijapaai nee kpuulool deeyaa!”

29Ní Piyeer nì Yeesu kpambaliṅ ṅin kíṅee, kí-u yii: “An máān tí gbīl Unimbōti nyoko kí yāntì binib.

30Nimbi di kpáá Yeesu ndōpuntikaa pu ki kūū-u, ní ti-naanjab Nimbōtiu fikitì-u

31ki kāān u-ṅaṅgiil pú, ú n̄n sá Ubōti nì Ufiil ki tī Israyeel yab n̄ ṅmā kí fá bi-kpitii, Unimbōti n̄ dūū pō-bi.

32Timbi n̄n ká ki sá biseeradambi an bōti pu, ki kpāān Unimbōti Fām min Unimbōti tì bin tó-uee.”

33Bi gbīl an bōtee, ní ki fōō diṅuul ki là kí kpò akpambal.

34Ama Fariisab kansikin ubo n̄n bí niin, bi yī-u yii Gamaliyeel, u sá umaradakai un samaa kōkōwoooo n̄n tōee. Kijapaayee yāti yūl bibōsooṅkpaambi kansikin ki pú kinyoko yii bí dá láá nyāntì akpambalee.

35Ní u bí-bi yii: “Israyeel yab, ní kpèèman tiṅan nì tin ní ni là kí ṅá nì njapaamu nee!

36An kaa yūntì ní un bi n̄n yī Teedasee yíkì ki yī u-ba yii u sá unikpaan, ní binib bàñ kii tilaafati tili ki n̄ó-u. Ní bi kūū-u ní bin kōkōwoooo n̄n n̄ó-uee yāl, báà ubo kaa ti kíñ.

37Ún boonee, ní Juudasi ugaaliileeja mun yíkì ṅyunti ṅun bi kāān binibee, ní ki dáaliñ kunipaa ki giñ u-jandi pu. Ní bi kūū ú mun ní bin kōkōwoooo n̄n n̄ó-uee yāl.

³⁸Mín puee, tin m cáá ki dàá tükù-nee di sá yii, ní càntīmaan binib nee kí taa ḡá-bi tiba, kun puee atuun ḡin bi ḡáán nee yaa nyánní binib cee, ḡi bí kí dāá kúntí.

³⁹Ama an yaa nyánní Unimbṓti cee, naa ḡūn kí pīiñ-bi nsan. Ní kpèèmaan tiḡan kí taa ján Unimbṓti kujaau!”

⁴⁰Niinee, bi-kòkò kpáfi ki gbilīn-u ní ki yíiñ Yeesu kpambaliḡ, ní ki gbáñ-bi anaalab, ní ki bí yii bí taa ti sòòn Yeesu yindi pu, ní ki ḡíiñ-bi ki lī.

⁴¹Nì dipṓpindi ní Yeesu kpambaliḡ nìn nyáñ bibṓsooḡkpaambi nimiin, kun puee Unimbṓti ḡá-bi tinyool ki yánti bi jín falaa Yeesu yindi pu.

⁴²Ní baabadal bi bí Kunimbṓtidiin, nì binib dumpui ki sòòn ki dàkà tibṓmṓntiil tin sòòn Yeesu Kriisitoo puee, kaa gbèntí.

Atuun 6

¹Iwiin gbanti poonee Yeesu boonnooliibi wíḡḡu nìn gbéèñ, ní Juuda yab bin gbìl greeki sooniee bí gbùkuñ nì Juuda yab bin péēbí bi-dumpu dooooyee, yii baa tì bín kpiipoo bi tiwan tin bi yàkatī kutaa sá kamaayee kii bi nín tì bin béeyee puee.

²Ní Yeesu kpambaliḡ saalaa nì alee yíiñ biboonnooliibi kòkò, ní ki bí-bi yii: “An kaa máàn tí yànti Unimbṓti bṓti disoondi kí nīn kpèè tijin laḡki.

³Mín puee, nnabiyaamu, lēēmaan ni-kansikin bininjab biluli bin pu báà ḡma nyí yii bi sá binimṓntiibee nì bin ni Unimbṓti Fām gbí tiḡanee, binib bin cáá iciinee, tí dū ditundi gbanti kí ḡúbiñ-bi.

⁴Mimnee, timbi kánti mpaan kí dū ti-yuntiḡu kòkò kí mēè ḡwimmeem kí sòòn Unimbṓti bṓti tin sá ti-tundee.”

⁵Tibṓti gbanti móòkiñ samaa kòkò, ní bi lēē Eetiyeen, un nìn fṓṓ ki kí tikpil Unimbṓti Fām bí u-ni tiḡan puee, nì Fiiliipi nì Prookṓr nì Niikanṓr nì Tiimṓn nì Paameenasi nì Niikoolaa un sá Antiyoosi ki fṓṓ Juuda yab marabee.

⁶Bi cááñ-bi ki dàkà Yeesu kpambaliḡ, ní akpambalee mēēUnimbṓti ki tī-bi, ní ki dū bi-ḡalii ki páàn bi-pu.

⁷Unimbṓti nyṓbundi mòtī gbītī ajan kòkò, ní Yeesu boonnooliibi mòtī wīintí tikpil Jeerusaleem tiḡkin, ki kpáàn bisaraaḡaliibi tikpil nìn fòol Yeesu bṓti ki kíkí.

⁸Unimbṓti nìn pūñ Eetiyeen diyimṓl nì mṓn tikpil, ní u nìn ḡááñ maamaacikpaambi nì tidaandi samaa kansikin.

⁹Dikitil din bi nìn yíi iyumbu in bi líyee kitilee nib nìn yíkí ki bí kpākantí Eetiyeen. Bi nìn sá Juuda yab bin nyánní Siireen nì Aleeksandrii nì Siiliisii nì Asiiyee ní.

¹⁰Ama baa nìn ḡūn kí sòòn kí líí-u, iciin in Unimbṓti Fām nìn yánti u sòònee pu.

¹¹Mín puee bi tī njapaamu mubṓ tiba dibalin bi lī yii: “Ti gbīl u sòòn tibṓti ki bíl Mooisi nì Unimbṓti yindi.”

¹²Ní an cúú kunipaauee poon ki kūtì ki kpáàn bikpilib nì bimaradakaliibi, ní bi cūti cúuñ-u mpɔn ki cáàn bibɔsooŋkpaambi nimiin.

¹³Ní bi yānti binib biba mónti nnyimɔn u-pu yii: “Uninja nee péēsòòn kaa gbèntí ki bííl Kunimbɔtidii nee nì Mooisi marab,

¹⁴kun puee timbi gbíl u bí yii Yeesu Naasaareeti yɔu nee dàá kpìtì Kunimbɔtidii nee kí kpántí akoobil ñin Mooisi nìn tī ti-naanjabee.”

¹⁵Bibɔsooŋkpaambi bin nìn kēe kɔkɔ dū bi-nimikpɛɛŋu ki báàn Eetiyeen pu, ní ki ká yii u-nimiin kpánti kii Unimbɔti tūuŋŋu nimiinee.

Atuun 7

¹Ní usaraanŋakpil bālfì-u yii: “An sá mín tiŋmanaaan?”

²Ní Eetiyeen kíí-u yii: “Nimbi m-baabi nì m-nabiyaamu, m ñá-ni gaafalaa. Pìlfimaan! Unimbɔti tinyooldaan dómín ti-naanja Abraam cee ñyunti ñun u dáá bí Meesoopootamiyee, ki wāati ní u nín kó Kaaran,

³ní ki bí-u yii: 'Nyā a-tiŋkin nì a-dicaŋkun kí cù kitiŋ kin m dàá dākà-see ni.'

⁴Ní u nyán Saldee tiŋkin ní ki cūti ki kòò Kaaran tiŋkin. U-baa kúm boonee ní Unimbɔti cáàn-u kitiŋ kin poon ni bí nee.

⁵Waa nìn tī-u kitiŋ nee poon dijandi báà dība, ali gba waa nìn cáá tikpaatan wā ki bān u-tabɔbil. Unimbɔti pɔòñ-u yii u dàá dū kitiŋ gbanti kí tī-u, án kpántí ùn nì u-maaliŋu ñun bí u-boonee kɔkɔ wanti. Mín gbee, Abraam kaa nìn dáá cáá kibiki.

⁶Unimbɔti bí-u yii: 'A-naantiibi dàá nīn sá binicambi kitiŋ kiban, kí kpántí iyumbu, bí sààn-bi ali abin tilaafati tili.'

⁷Unimbɔti gítì lī-u yii: 'Ama kitiŋ kin yab dàá dāá sààn-bi mimmee, mama m-ba di dàá dáal bi-tafaliŋ. Boonee, a-naantiibee dàá dāá nyā kitiŋ gbantin kí dāān doo kí nīn nyóŋkí-mi.'

⁸Niinee Unimbɔti tī-u digiil marau din sá u-poondi daanŋkuee. Mín puee Abraam māl Isaakee, ní ki gí-u iwiin inii dal, ní Isaaki mun gí Jaakɔb, ní Jaakɔb gí ti-naanjab bin sá tinaakɔti saalaa nì tilee.

⁹“Ti-naanjabee nìn ná Jooseefi, ki dū-u ki nyáfì bí cáá-u kí cunnì Eejipiti. Ama Unimbɔti nìn bí u-cee

¹⁰ki nyánti-u u-falaau kɔkɔ poon, ní ki tī-u iciin ki yānti u-bɔti fáatì Faraaon Eejipiti bɔtiu, ní Faraaon dū-u ki kāān ú nin sá gɔmina Eejipiti tiŋki kɔkɔ pu, ki kpáàn ùn ubɔti cindi.

¹¹Niinee ní ñkùm miba nyán Eejipiti nì Kanaan timmu kɔkɔn. An nìn sá falaakpaan ní. Ti-naanjab kaa nìn kántí tiba kí jī.

¹²Jaakɔb nìn gbíl yii tijikaal bí Eejipitee, ní u tú ti-naanjab mpeepekaam niin.

- 13 Nlilitiimee ní Jooseefi yāntì u-nabiyaamu béè-u, ní Faraaon béè kudicaŋu kun poon ní Jooseefi sée.
- 14 Niinee ní Jooseefi tú bí cáañ u-baa Jaakob nì u-samaau kəkə: bi nìn sá binib imuŋku ita nì saalaa nì biŋmoo.
- 15 Ní Jaakob cūti Eejipitee, ní ki tin kpîi niin, mín ní ti-naanjab mun kpîi niin.
- 16 Ní bi yḏoñ bi-wunti ki cáā cūnni Siiseem, ki tin síb dikaakul din Abraam nìn dá nì animil Eeməor biyaamu cee Siiseemee.
- 17 “Dyunti ŋun an tóob Unimbəti n̄ ḡá kii u nín nìn pḏoñ pu ki tīi Abraamee, ní Israyeel yab būti ki wíiñ Eejipiti tiŋkin.
- 18 Ní ubətipəon kāl, kaa nyí Jooseefi.
- 19 U dū iciin ki ḡún ti-naanjab, ní ki cáá-bi ki sàantí, ali ki yāntì bi nyāntí bi-biyaamu ki féen mu kúu.
- 20 An yuntiŋu ní bi nìn māl Mooisi un nìn ḡāñ Unimbəti ceeyee, ní bi kpíiñ-u iŋmal ita u-baa diiku poon.
- 21 Bi dāa nyānti-u ki ḡman dūu féee, ní Faraaon bisal píi-u ki ḡúb-u kii ùn u-ba bikee.
- 22 An di yì-tì ní Mooisi bífi Eejipiti yab ciini kəkə, ki nìn pḏḏ dibəsoondin ki kpáañ atuun nì.
- 23 “U bāñ abin imuŋku ilee, ní an dómiñ u-pəbil poon yii ú cù kí mǎntì u-nabiyaamu Israyeel yab pu.
- 24 Niin ní u ká Ueejipitija ubə bí ki sàantí u-nabiki kiba, ní u móti ki kúti u-nabiki unandaan un bi bíi sàantée pu, ní ki kūu Ueejipitijee ki tōñ ipəntoon.
- 25 U baa nyí yii u-nabiyaamu dàá béee yii ùn pu ní Unimbəti dàá dī kí fī-bi, ama baa ḡún ki béee.
- 26 Kutaa wúntèe, u ká bi-ḡmaniŋma kansikin bili bíi jáà, ní u bíi sòŋkī bi-pəbiling,
- 27 ní ki sǎŋkì-bi yii: 'M-bəobi, ni sá nnabiyaamu ní. Ba ḡá ní ni sàantí təb mín?’
- 28 Ní un bíi sàantí u-jutee téee Mooisi ní ki fātii bālfī-u yii: 'Dma di kāañ-si dibeel á nīn sòoñ ti-bəti? A là kí kpò-mi kii a nín fu kūu Ueejipitija puee níiin?’
- 29 An bəti puee, Mooisi sǎñ ki cūtii kíñ ki kóò Madiyan tiŋkin. Niin ní u māl mbininjabiyaamu muli.
- 30 “Abin imuŋku ili boonee, ní Unimbəti tūuŋgu dómiñ u-cee ḡḡminaapoolin kisugbooin kupəəun, dijool din bi yíi Siinaayee caŋin.
- 31 Mooisi ká mimmee, ní an ḡá-u maamaaci. U sūtì ki pìl kí mòtíi kpèèyee, ní u gbìl Unimbəti neen lī yii:
- 32 'Man di sá a-naanjab Nimbətiu, Abraam nì Isaaki nì Jaakob Nimbətiu!' Ní Mooisi wunti kíñ ki bíi jikì, ní waa ti là kí kpèè niin.

- 33Ní ti-Dindaan bí-u yii: 'Tákatí a-naatakaŋ, kun puee kitiŋ kin pu a yú nee sá circir tiŋki ní.
- 34M ká ki gítí ká falaa un poon ní m-samaau bí Eejipitee, ki gbíl bi-yaliŋkii mun, ní m kpákatiń kí fī-bi. Kəŋkənee, nín cá, m dàá tō-si Eejipiti.'
- 35“Mooisi un Israyeel yab nìn yí ki bí yii: 'Ōma kāań-si á nīn sá ubəti nì ubəsoonlee?' ùn ní Unimbəti túnní bi-cee ú nīn sá bi-bətiu kí nīn sá bi-fiiliu, ní ntūun ŋun u nìn ká kisugbooinnee nìn bí ki tútuń-u.
- 36Ún di ŋáań maamaacib nì tidaandi Eejipiti tiŋkin ki nyánti-bi niin, ki gítí ŋáań maamaacib nì tidaandi diməmandi poon, ki kpáań kupəoun, laakin bi ŋá abin imuŋku ilee.
- 37Mooisi gbanti ubaanti tükū Israyeel yab yii: 'Unimbəti dàá dāá lēēni-nabiyaamu kansikin ubə, ú nīn sá Unimbəti bənaatiliu kii mamee.'
- 38Mooisibaanti gbanti di nìn bí Israyeel biyaamu mun nìn bí kupəounnee cee. U nìn cá Unimbəti tūuŋu ŋun sòon Siinaayi jool puee cee ki fòol tibəti ki cān ki nātī ti-naanjab. Ún di cáań tibəti tin cáá dimańfalee ki tī-ti.
- 39“Ama ti-naanjab nìn yí, kaa là kí pīlfiń-u, bi-landəkəi gítí Eejipiti watil,
- 40ní bi bí Aarəon yii: 'Mā-ti awaa ŋin dàá nīn lī ti-nyəkəpuee, kun puee Mooisi un nyántiń-ti Eejipiti tiŋkinee, taa nyí kun di bāań-uee.'
- 41Dyunti gbantee ní bi móó dinabil, ní ki tšotì-di ní ki bí ki jīn jiŋaal kun bīn bi-ba móó nì bi-ŋaliiyee pu.
- 42Niinee, Unimbəti fāti u-boon ki tī-bi, ki dū-bi ki líiń iŋmalbijaa, bí nīn tòotī-i, kii Unimbəti bənaatiliibi nín nìn ŋmāń bi-takaldau poon puee yii: 'Unimbəti bí yii, Israyeel yab, man ní ni nìn ŋá saraabi ki tī abin imuŋku ili ŋin ni nìn ŋá kupəouneeeee?'
- 43Aayee, kun puee ni nìn tūntí diwaal Mələki waadiiku kun ni gāa nì satee, nì diwaal din bi yí Rafanee ŋmalbijau, an waaji ŋin ni nìn máń ki jáamee puee, m dàá cáá-ni Babilon pú kuyunū.'
- 44Kupəounnee, ti-naanjab nìn cáá tanti un poon ataŋkpee ali ŋin pu marab nìn ŋmāń ki kēe bée. Di sá yii Unimbəti nìn tükū Mooisi yii ú gāa tanti kii un u dākā-uee nín bí puee ní Mooisi lafun ŋá mín.
- 45Boonee, ti-naanjab fšš tantee bi-baabi cee ki kpáaā nóó Joosuee ki kó ntimu mun nibuliŋ Unimbəti nìn jīn bi-nyəkəpuee poon. Niin ní tanti gbanti yúl ki dāa sāa Dafiidi yuntiŋu.
- 46Dafiidi gbanti bəti nìn fáatì Unimbəti pəbil, ní u mēēUnimbəti yii ú cāntī ú mā ŋkəŋkoon kí tī ùn, bi-naanja Jaakəb Nimbətiu.
- 47Asee Salooməon di dāa máń Kunimbətidii gbanti.
- 48“Ama yilpu Nimbətiu kaa kòò adiin ŋin binib cáá bi-ŋalii ki māāyee. Ali kii Unimbəti bənaatiliu nín nìn lī puee, yii:

49"Ti-Dindaan bí yii: Yilpu sá m-beejal, ní kitij sá m-taaji siinlan̄ki, kudii kulokó ní ni dáá gítí mā-mi, àá mpaan ñuloḡu ní m dáá dáá kál kí ñùñfi?"

50An kaa sá mama m-ba di náan̄ tin bí nee kókoo?" "

51Eetiyeen n̄k̄i k̄i l̄i yii: "Nimbi binib nee yilij p̄ōō, ni-p̄obilij dátin̄ Unimb̄oti, naa là k̄i p̄ilfin̄-u mun. Baabadal ni jáà n̄ Unimb̄oti Fām, kii ni-naanjab n̄n n̄n ñáan̄ puee.

52B̄in̄ di n̄n s̄aan̄ Unimb̄oti b̄onaatiliibi k̄ok̄o, ki k̄ūū bin n̄n s̄oōn̄ ki ȳoōn̄ yii Deedeedaan dáá dáá d̄āāñee, ní k̄on̄k̄on̄nee ni nyáfi Yeesu Deedeedaanee ki k̄ūū-u.

53Nimbi di f̄ōō Unimb̄oti t̄ūuññu cee marab ki mun di kaa là k̄i ñúb-bi."

54Bib̄osoñkpaambee gb̄il̄ mimmee, an w̄ūn̄-bi, ní bi f̄ōō Eetiyeen pu diñuul tikpil ní bi-nyin̄ñi ḡà t̄ob̄ k̄akaka.

55Ama Circir Fām gb̄i Eetiyeen, ní u d̄ū u-nimikpeeñu ki báan̄ yilpu, ki k̄á Unimb̄oti nyooti ní Yeesu yú Unimb̄oti ñañgiil p̄ú.

56Ní u bí yii: "Kp̄èèmaan, m k̄á yilpu cúū p̄it̄i, ní Yeesu Kinibiki yú Unimb̄oti ñañgiil p̄ú!"

57Ní bi ȳik̄i t̄at̄i m̄p̄on̄ ki kp̄àà bi-tafaliñ, ní bi-k̄ok̄o ȳik̄in̄ u-pu k̄ilkil,

58ki cúū-u ki dáal̄-u ki nyánti kitij kpaanceetiñu, ní ki ȳan̄k̄i-u atan̄kpee ki k̄ūū. Bin n̄n l̄ēū-pu seerakp̄itee n̄n cáan̄ bi-b̄okutiñ ki bíl̄ unaacimp̄oon̄ un bi n̄n ȳi S̄oolee cee.

59Dyunti ñun bi b̄i ȳan̄k̄i Eetiyeen atan̄kpeeyee, ní u b̄i m̄é yii: "Ti-Dindaan Yeesu, f̄ōō m-nañki!"

60Niinee ní Eetiyeen gb̄aan̄ ki t̄éñ m̄p̄on̄ yii: "Ti-Dindaan, taa d̄ū bi-k̄pitii nee k̄i dáal̄ bi-tafal!" U l̄i m̄in̄ ki d̄óoyee, ní ki s̄int̄i.

Atuun 8

1S̄ool̄ ùn̄ n̄n k̄á yii Eetiyeen lafun máan̄ ñk̄úm gbanti. D̄wiin̄ gbantee, diniminaamañkpaandi n̄n j̄éti Kriis̄itoo nikitil̄ ñin̄ bí Jeerusaleemee pu. Bi-k̄ok̄o ȳal̄ k̄i búnti Juudee n̄ Samarii t̄in̄gbammun, see Yeesu kpambaliñ baba di n̄n k̄in̄.

2Binin̄jab bin n̄n f̄an̄k̄i Unimb̄otee di n̄n s̄ib̄ Eetiyeen ní ki s̄ún̄ u-pu tikpil.

3S̄ool̄ ùn̄ là k̄i k̄unt̄i Kriis̄itoo nikitilee, ní ki k̄òò adiinni ki cúti binin̄jab n̄n binimpoobi k̄ok̄o ki c̄an̄ ki t̄òó sarkan.

4Bin n̄n ȳal̄ee n̄n cá ajan sá kamaa ki s̄oōn̄ Kriis̄itoo b̄om̄ontiiti.

5Fiiliipi n̄n s̄int̄i Samarii t̄in̄kin̄ ki b̄i s̄oōn̄ Kriis̄itoo b̄oti.

6Dyunti ñun bi gb̄il̄ Fiiliipi nȳoobundi, ki w̄al̄ maamaacib bin u n̄n ñáañee, samaa k̄ok̄o n̄n p̄ilfi tin u s̄oōnee t̄in̄an.

- ⁷Kun puee arasiniibi n̄n gbáà ibiil ki nyēē biwaatiibi tikpil pu, ní bifaliŋfaambi n̄n bideembi tikpil kánti dicaandi.
- ⁸Ní dipɔɔpiŋkpaandi n̄n jéeti kitiŋ gbanti poon.
- ⁹Uninja ubo n̄n bí kitiŋ gbantin, bi yíi-u Siimɔn. Kijapaayee n̄n sá ukpaŋkpanti ki yānti an ŋáaŋ Samarii yab maamaaci u-kpaŋkpantiiku pu, ki yíi u-ba yii unikpaan.
- ¹⁰Binikpaambi n̄n mbiyaamu kəkɔ n̄n pílfiŋ-u tiŋan, ní ki lì yii: “Unil nee di sá Unimbɔti pɔŋŋu ŋun bi yíi mpɔŋkpaanee.”
- ¹¹Bi n̄n pílfiŋ-u tiŋan kun puee u n̄n cáá u-kpaŋkpantiiku ki ŋáaŋ maamaacib an yúnti.
- ¹²Fiiliipi n̄n sòŋ dinyɔɔbummɔndi din sá Unimbɔti beel n̄n Yeesu Kriisitoo bɔtee, ní bi fɔɔ u-bɔti ki kíí, ní bininjab n̄n binimpoobi yānti bi fùl-bi Unimbɔti nyim.
- ¹³Siimɔn u-ba fɔɔ ki kíí. Bi fùl-u ki dóoyee, waa ti là kí sútí kí wàatí Fiiliipi. U nín ká Fiiliipi ŋáaŋ tidaandi n̄n maamaacikpaŋkpaambee, ní u bākatí tikpil.
- ¹⁴Yeesu kpambaliŋ bí Jeerusalem ki gbil̄ yii Samarii yab fɔɔ Unimbɔti bɔti ki kííyee, ní bi lēēPiyeer n̄n Jaan ki túnní bi-cee.
- ¹⁵Bi bāaŋ Samarii yab ceeyee, ní ki mēēki tī-bi bí ŋmā kí fɔɔ Unimbɔti Fām,
- ¹⁶kun puee Unimbɔti Fām kaa n̄n dáá kpákatiŋ Samarii yab báà ubo pu, bi n̄n péēfùl-bi nyim ti-Dindaan Yeesu yindi ŋmanijma pu ní.
- ¹⁷Ní Piyeer n̄n Jaan dū bi-ŋalii ki páaŋ Samarii yab pu, ní bi fɔɔ Unimbɔti Fām.
- ¹⁸Siimɔn nín ká yii akpambal dū bi-ŋalii ki páaŋ bi-pu bi fɔɔ Unimbɔti Fāmee, ní u tī Piyeer n̄n Jaan animil,
- ¹⁹ní ki bí-bi yii: “Tīmaan man mun an pɔŋŋu, un pu ní m yaa dū m-ŋalii ki páaŋee ú fɔɔ Circir Fām.”
- ²⁰Ní Piyeer fātí kíí-u yii: “A nín dākafi yii bi dù animil kí dā Unimbɔti pɔl puee, si n̄n a-nimiliŋee kəkɔ n̄n ŋá fam!”
- ²¹Aa péēcáá tiba n̄n tiba tin bī jītí nee poon. Kun puee a-pɔbil kaa bí deede Unimbɔti nimiin.
- ²²Fá a-landəkɔkpitiyee kí mēē ti-Dindaan, an yaa yíi min min a dākafi a-pɔbilinee u dáá dūú pō-si,
- ²³kun puee m wāl a-poon tū kii tiloolee ní ikpiti kusakai bá-si.”
- ²⁴Ní Siimɔn kíí-bi yii: “Gbàammaan ti-Dindaan ni-ba kí tī-mi, an nín dáá ŋá pu tin kəkɔwoooo ni sòŋ nee tiba n̄n taa bān-mee!”
- ²⁵Piyeer n̄n Jaan lēekì seerab ki sòŋ Unimbɔti bɔti ki dód Samariyee, ní ki fātí nín gítí Jeerusalem ki sòŋ dinyɔɔbummɔndi nsan n̄n nsan Samarii timbilimmun.

²⁶Ní ti-Dindaan tūuŋɔ ɔbɔ tükū Fiiliipi yii: “Yíkí kí túl ɔgan pú kí dī nsan ɔun sɪntī Jeerusaleem ki cá Gasaayee, nsan ɔun baa ti dèe.”

²⁷Ní u yíkí buntì. Niinee, Ueetiyoopiija ubɔ un bí Eetiyoopii nimpubɔtiu Kandaasi cee ki sá ukalinjakpaan ki kpèé unimpubɔtee pijawanti kòkòe,

²⁸nìn dómiín Jeerusaleem ki jáam̀ Unimbɔti ki dóoyee ki fàtī kùh. U nìn k̄a u-tòrkuu pu itaamu dátí-u ní ki k̄aah̀ Unimbɔti bɔnaatiliu Eesayi takaldau poon.

²⁹Ní Unimbɔti Fām tükū Fiiliipi yii: “Còom kí kintí torku nee!”

³⁰Ní Fiiliipi sàh ki bàñee, ki gbìl̀ kijapaayee bí k̄aah̀ Eesayi Unimbɔti bɔnaatiliu takaldau poon. Ní u bālfī-u yii: “A gbìl̀ a nín k̄aah̀ puee taapuɔɔ?”

³¹Ní u kífī-u yii: “M yaa kaa ká ubɔ ń tükù-mi taapu, m dàá ɔá mana kí gbìl̀?” Ní u mēēFiiliipi ń jōmín kí k̄al̀ u-cee torkun.

³²Unimbɔti takaldau jandi din u nìn bí k̄aah̀ee nín tükù-ti puee sèé: “Bi cáá-u ki cūnni kii bi nín cāh̀ upii kí kpò puee, kii bi nín cēēdipibil kuti di ɔmí kaa sūh̀ puee, mìn ní waa nìn wāh̀n tiba.

³³U sīntī u-ba taapu, baa pòñ-u. Dma di dàá dāá ɔmā kí tükù u-maaliɔu yab tin jítèe, kun puee bi lēēu-maɔfal duulnyan.”

³⁴Ní ukalinjee bí Fiiliipi yii: “M gbàam̀-si, ɔma pu ní Unimbɔti bɔnaatiliu sòñ mìn ní? Úh̀ u-ba pu ní u sòñ mimmaaan ubɔ pu ní?”

³⁵Niinee ní Fiiliipi yōh̀ dinyɔɔbundi ki kíl ki bí sòh̀ ki tókòh̀ dijandi din u k̄aah̀ee pu ki bí tükù-u Yeesu bɔmɔntiiti.

³⁶Bi còom ki cée, ki bàñ laaaba ki ká nnyim, ní ukalinjee bí yii: “Kpèè, nnyim sèe nee. Ba di gítī likintí-mi bí taa fāl̀-*mi* Unimbɔti nyim?”

[³⁷Ní Fiiliipi kífī-u yii: “An cáá nsan bí fāl̀-*si* Unimbɔti nyim a yaa fōō ki kífī nì a-pòbil kòkò”. Ní ukalinjee kífī-u yii: “M fōō ki kífī yii Yeesu Kriisitoo sá Unimbɔti Jipòon.”]

u bí yii bí yóh̀ torku, ní u nì Fiiliipi liitil nín sɪntī ɔkpin ni, ní Fiiliipi tin fūl̀-*u* Unimbɔti nyim.

³⁹Bi nyánni nnyiminee, Unimbɔti Fām yōh̀ Fiiliipi. Ní ukalinjee kaa ti ká-u, ama ní ki nikī u-saɔɔu nì dipɔɔpindin.

⁴⁰Fiiliipi, ùh̀ tin nyán Asooti. Niinee u sòñ tibɔmɔntiil ki kpáah̀ ntimbilimu mun poon u jítée ki tin bàñ Seesaaree.

Atuun 9

¹Dyunti gbantee, Sool kaa cānti ti-Dindaan boonnooliibi nnikpaakoon, ní ki cūti usaraaɔakpil cee

²ki mēē-u yii ú tī-u takaldab ú cáá cūnni Damaasi kpafidiin̄ji kpilib cee, an nín dàá ḡá pu u yaa ká biba niin bin nóó n̄san gbantee, uninjeeee, unimpueeee, ú cúú-u kí bóób kí cááñ Jeerusaleemee.

³U yíkì u-saḡkindi pu ki tóób Damaasee, kpalaayee, ḡwalfi ḡubɔ nyánni yilpu ki mānti tú-u ki jil̄iḡkī,

⁴ní u líti kitiḡ. Niinee ní u gbīl̄ nneen ḡubɔ bí-u yii: “Sɔɔl, Sɔɔl, ba ḡá ní a páb-mi mín?”

⁵Ní u bālf̄i yii: “An sá sii ḡma ní, m-Dindaan?” Ní ti-Dindaan kíí-u yii: “An sá man Yeesu un a pábee.

⁶Yíkí kó kitiḡin. Niin ní bi dàá tükù-si min sá á ḡée.”

⁷Tifaandi kó bininjab u n̄i bin n̄in nóóyee. Bi yúl, kaa ti ḡūn̄ kí wāān̄ tiba, kun puee bi gbīl̄ nneen pu ki mun kaa wāl̄ báà ubɔ.

⁸Ní Sɔɔl yáat̄i yúl̄ ki ḡúbit̄i u-nimiliḡee kaa ti wāl̄. Ní bi cúú u-ḡal̄ ki dāt̄i-u ki cáā cūnni Damaasi.

⁹Ní u kāl̄ iwiin ita, kaa wāl̄, kaa jín, kaa nyūn̄ mun.

¹⁰Ama Yeesu boonooliu ubɔ n̄in bí Damaasi, bi yî-u yii Ananiyasi. Ti-Dindaan nyánt̄i u-ba ki dākā-u, ní ki yíin̄-u yii: “Ananiyasi!” Ní u kíí yii: “M sèé, M-Dindaan.”

¹¹Ní ti-Dindaan bí-u yii: “Yíkí dī didandi din bi yî didancaalee kí nyàab̄ Juuda dumpu un bi yî Sɔɔl u sá Taarsee. Sɔɔl gbanti bí m̄èè ḡwimmeemee

¹²m yānt̄i u ká sii Ananiyasi kóoñ ki dū a-ḡalii ki páān̄ u-pu ú ḡmā kí wāl̄.”

¹³Ní Ananiyasi kíí-u yii: “M-Dindaan, m gbīl̄ binib tikpil cee tikpitil tin uninja nee ḡá a-yab bin bí Jeerusaleemee pu.

¹⁴U dómiñ doo ki cáā m̄p̄on ḡun bisaraaḡalii bi tīin̄-u ú n̄in cáā b̄ɔb̄ bin k̄ok̄wooooo nóó-see.”

¹⁵Ní ti-Dindaan bí-u yii: “Nín cá, kun puee uninja gbanti di sá un m lēēú lēēseera m-pu bin kaa sá Juuda yabee n̄i bi-b̄otiibi, n̄i Israyeel yab k̄ok̄o nimiinee.

¹⁶Ní man m-ba n̄i dāá dākà-u falaa un u dàá jī m-yindi puee.”

¹⁷Niinee, Ananiyasi búnt̄i ki bān̄ ki kó kudicaḡuee ni, ki dū u-ḡalii ki páān̄ Sɔɔl pu, ní ki bí yii: “M-nabiki Sɔɔl, ti-Dindaan di túnni-mi. Úñ di sá Yeesu un a n̄in ká nsanni a n̄in n̄in d̄oñ puee. U là á wāl̄, kí gbí Unimb̄oti Fām.”

¹⁸Dicilpu niin ní tiba nyánni u-nimiliḡin ki líti kii aj̄omp̄ok̄ee, ní u wāl̄. Ní u yíkì bi fūl̄-u Unimb̄oti nyim.

¹⁹Ní u jín̄ tijin̄ ki fāt̄i ká m̄p̄on. Ní Sɔɔl kāl̄ Damaasi iwiḡkaaḡkaa Yeesu boonooliibi cee,

²⁰ní ki kpáāá kíí ki s̄oñ̄ Yeesu pu akpafidiin̄ ni, yii u sá Unimb̄oti Jip̄oñ̄.

- ²¹An nìn ɣá bin kəkəwoooo nìn bī pílfiñ-uee bitii, ní bi lì yii: “Kaa sá un nìn bī Jeerusaleem ki páb bin nów Yeesuee deeee? Waa tí dómiñ doo kí cūti-bi kí bóob-bi kí cáá bisaraañakpilib nimiin deeee?”
- ²²Dyunti gbantee, Sool mòtīi kánti mpən, ki sòon ki pókín Juuda yab bin bí Damaasee, ki dākà-bi yii Yeesu lafun sá Kriisitoo.
- ²³Iyunti tikpil jítèe, ní Juuda yab kpáfi kinyəkə ki là kí kpò-u.
- ²⁴Ama Sool béè tin bi là kí ɣée. Ní bi dòn ki nākantí ki cītí-u Damaasi tiŋki gundi punyommu nyəkəpui ɣwiín pu nì kunyeeu kí ɣmā kí kpò-u,
- ²⁵ní kunyeeuee, bin dī Soollee dū ɣhmii ki kúl kukabiku ki dū Sool ki tākañ, ki dū-u ki nāatì digundi, ní u tin tīn kitiŋ ki nyán ki búnti.
- ²⁶Niinee, Sool cūti Jeerusaleem ki bàà là kí dū u-ba kí kón Yeesu boonooliibin. Ama bi-kəkə nìn fāŋkí-u, kaa nyí yii u kpánti Yeesu boonooliu.
- ²⁷Ní Baarnaabasi cáá-u ki cūnni Yeesu kpambaliŋ cee ki máafi-bi Sool nín nìn ká ti-Dindaan nsanni, u sòon nì u puee, nì min Sool nìn sòon Damaasi ki cánti ki pòn Yeesuee.
- ²⁸Ní u nì bi nìn kíñ ki yīn Jeerusaleem, ní u sòon ti-Dindaan pu, kaa fāŋkí.
- ²⁹Ní u nì Juuda yab bin gbìl greeki sooniee sòon ki kpākantí tɔb, ní bín nìn kíñ ki nyàab kí kpò-u.
- ³⁰Nnabiyaamu mun kínee gbìl mimmee, ní ki yòon-u ki cūnni Seesaaree, ní ki yānti u búnti Taarsi.
- ³¹Kriisitoo nikitil din nìn bí Juudee nì Gaaliilee nì Samariyee nìn kíñ ki bí nsəŋfin ki báań inyaan ki fāŋkí ti-Dindaan, kaa là kí yìntūn-u. Ní bi-wíiŋɣu nìn gbēentí mun, kun puee Unimbəti Fām nìn bí bi-cee.
- ³²Piyeer nìn yīn niin timmu kəkən ki mǎntī Kriisitoo yab pu, ní ki kpáà sīnti bin nìn kóò Lida tiŋkinee cee,
- ³³ní ki tin ká uninja ubə, bi yī-u Eenee, u nìn sá ufaliŋfaan ki dō u-lambaŋki pu abin anii.
- ³⁴Ní Piyeer bí-u yii: “Eenee, Yeesu Kriisitoo cáañ-si! Yíkí kpáb a-lambaŋki.” Ní u yáatì yúl dicilpu niin.
- ³⁵Bin kəkəwoooo nìn kóò Lida nì Saarənee nìn ká-u, ní ki kpánti bi-bimbim ki fōō ti-Dindaan ki kíí.
- ³⁶Unimpu ubə nìn bí Jopa ki nów Yeesu, bi yī-u Tabita, (Greeki sooni poonee bi yī-u Dərkasi). U nìn ɣáań binib tiŋan tikpil, ní ki pūn biwəfib animil mun.
- ³⁷Dyunti gbantee, u búŋkì ní ki kpī. Bi fūl-u ki dóoyee, ki cáá-u ki jóm diditəntəkəl pu ki bíl.

³⁸Jɔpa nì Lida kaa nìn dātìh tɔb. Ní Yeesu boonnooliibi gbìl̄ yii Piyeer bí Lidee, ní bi tú bininjab bili u-cee bí cùú gbàamìh-u yii ú dāān bi-cee malaa malaa.

³⁹Ní Piyeer yíkì dicilpu, u nì bininjabee kɔkɔ búntì. Bi bàñee, ní bi cáá-u ki jóm diditɔntɔkɔl pu. Ní bikpiipusoodambi kɔkɔ dómiñ ki mānti ki gón Piyeer ki sūn ki dākà Piyeer Dɔorkasi nín nìn dáá bí ki lù abɔkuti nì satab biŋyee.

⁴⁰Ní Piyeer nyántì binib kɔkɔ ní ki gbāān ki bī mēé, ní ki fātì utaŋkpiil pu ki bí yii: “Tabita, yīkīm!” Ní u ḡúbitì u-nimiliŋ ki kpēēPiyeer, ní ki yáatìi kāl.

⁴¹Ní Piyeer tāntì u-ŋal ki cúú-u ki yáatì-u ki yóòh, ní ki yíiñ Kriisitoo yab nì bikpiipusoodambee, ki dū un fīkitèe ki dūu dākā-bi.

⁴²Jɔpa yab kɔkɔ gbìl̄ an bɔtee, ní binib tikpil fɔ̄ɔ ti-Dindaan ki kíí.

⁴³Piyeer nìn kāl̄ Jɔpa ki yúntì ugbanjɔb un bi nìn yī Siimɔnyee cee.

Atuun 10

¹Uninja ubɔ nìn bí Seesaaree, bi yīh-u Kɔorneel. U nìn sá usoojakpil disoojakitil din bi yī Italii yalee kansikin.

²Uninja gbanti nìn nóó Unimbɔti ki sá unimɔnti, u nì u-dicaŋku kɔkɔ nìn fāŋkí Unimbɔti. U nìn pūn Juuda yab wɔfibi tiwan ní ki mēé Unimbɔti baabadal.

³Dalbee, an cá kii tikúti titee, u ká Unimbɔti tūuŋŋu kpìrrr, ḡu kóòh u-cee ní ki bí-u yii: “Kɔorneel!”

⁴Tifaandi nìn kó-u, ní u kíh ki bī kpēé Unimbɔti tūuŋŋu, ní ki bí yii: “Ba ḡá ní, m-Dindaan?” Ní ntūun bí-u yii: “A-wimmeem nì a nín pūn tiŋyee bāñ Unimbɔti, ní u tētì a-pu.

⁵Tɔ bininjab kəŋkəñnee Jɔpa bí yíiñ un bi yī Siimɔn ki páān-u Piyeeree.

⁶U bí ugbanjɔb un bi yī Siimɔnyee cee, un diiku bí tiŋku caŋinee.”

⁷Dyunti ḡun ntūun ḡun nìn dómiñ ki sòòñ nì uee búntèe, Kɔorneel yíiñ u-tɔntɔnliibi bili nì sooja ubɔ un nìn bí u-cee ki fāŋkí Unimbɔtee,

⁸ní ki máafi-bi tibɔtee ki dóòyee, ki dū-bi ki tú Jɔpa.

⁹Kutaa wúntèe, bi bí nsanni ki tóób kitiŋ gbantee Piyeer jóm kudii yilpu kuwiŋkuluu yuntiŋu kí mēè.

¹⁰Ɖkùm cúú-u, u bàà là kí jī. Dyunti ḡun bi bī ḡáān-u tijinee, ní an ḡá-u kii ḡgeemee.

¹¹Ní kutagbɔŋu pīiti, ní u ká tiwan tiba bí kii satakpaanee bi bóób ajannaatil pu ki sīntiñ kitiŋ Piyeer nimiin.

¹²Tiwan tin còom̄ ataa anaayee nì tin fūee nì nnɔmbiyaamu kɔkɔ nìn kā satee poon,

¹³ní nneen ḡubɔ bí-u yii: “Piyeer, yīkīm kí kpò kí ḡmó!”

- 14**Ní Piyeer bí yii: “Aayee, m-Dindaan! Maa láá péē jín tin kaa ḡāñee nì tin kaa bí circiree.”
- 15**Ní an gítì sòòñi-u nliliitiim yii: “Tin tin Unimbōti ḡāḡkèe, sii ḡ taa lī yii taa ḡāñ!”
- 16**Ali mín diba diba mita pu, ní tiwaneē fātii nín jóm yilpu.
- 17**Piyeer bākati ki kíñ ki bí dākafi tin tin u bàà wálee taapuee, niinee, bininjab bin Kōrneel túnnée bālfī ki bée Siimōn dumpu ki dómín ki yú kipunyōkōpu
- 18**ki yíiñ ki bālfī yii: “Doo ní Siimōn un bi yî Piyeeree kóòoo?”
- 19**Piyeer gbintii bí dākafi tin u bàà wálee taapuee, ní Unimbōti Fām bí-u yii: “Bininjab bita biba di nyàab-see.
- 20**Yíkí kpákati, taa gùgufi, si nì bi kōkō ḡ nīn cá, kun puee man di túnni-bi.”
- 21**Niinee ní Piyeer kpákatiñ, ní ki bí bininjabee yii: “Man un ni nyàabee sèe. Ba di ḡá ní ni dómín doo?”
- 22**Ní bi kíi-u yii: “Kōrneel un sá usoojakpil ki bí deedeē ki fāḡkí Unimbōti, Juuda yab kōkō sòòñ u-pu yii u sá unimōntee, Unimbōti tūuḡḡu ḡubō tükū-u yii ú yíiñ-si, á dāāñ u-dumpu ú pīlfī tin tin a cáá kí tükū-uee.”
- 23**Ní Piyeer fōō-bi ki bíl. Kutaa wúntèe, u nì bi yíkii búnti. Nnabiyaamu mun nìn bí Jōpee bíba mun nìn céeñ-u.
- 24**Ku wúntèe ní u bāñ Seesaaree. Kōrneel nìn yíiñ u-yab nì u-bōotimōntiibi ki kíñ ki ká ki cí-bi.
- 25**ḡyunti ḡun Piyeer kóòñee, ní Kōrneel túḡkí-u ki gbāāñ ki póofi-u kunōpoou.
- 26**Ama Piyeer yáati-u, ní ki bí yii: “Yíkìḡ! Ma mun sá unil ní.”
- 27**Bi bí sòòñee ní ki nín kóò, ní Piyeer bāñ ki ká kunipaau kpáfi ki ká.
- 28**Ní u bí-bi yii: “Kee, ni nyí yii an sá timbi Juuda yab dikoobil ti nì binicambi ḡ kpāfi àá tí kó bi-dumpuiaa! Ama Unimbōti dākā-mi yii ḡ taa kpèè yii ubō sá ukpiti àá waa ḡāñ.
- 29**Mín pu ní ni tú ki yíiñ-mi, m dómín kaa kpákañ. Too, m bālfī-ni yii ba pu ní ni tú bi yíiñ-mi?”
- 30**Ní Kōrneel kíi-u yii: “Iwiin inaa sèe, tikúti tita, ḡyunti ḡun bí nee deedeē, m bí mée m-dumpu. M kpēēyee, uninja ubō dee ki pēēdibōkutl diba di jìl, ki yú m-nimiin,
- 31**ní ki bí yii: ‘Kōrneel, Unimbōti fōō a-wimmeem ki téeti a nín ḡáāñ biwōfib tiḡan puee.
- 32**Tō Jōpa bí yíiñ Siimōn un bi yî Piyeeree, u kóò Siimōn ugbanjōb dumpu ki nákañ tiḡkuee.’
- 33**Dicilpu ní m tú binib a-cee, ní a ḡá tiniti ki dómín. Kōḡkōñnee, ti-kōkō bí Unimbōti nimiin kí pīlfī tin ti-Dindaan tī-si á tükū-tee.”

- ³⁴Niinee, Piyeer kíí ki bí sòòn nì bi yii: “Ibaamòn, m bée yii Unimbòti kaa gantī ubò.
- ³⁵Ntimu kòkòn, un yaa fàṅkí-u ki ḡáán min kítèe ḡān u-nimiin.
- ³⁶“Ni nyí yii Unimbòti túnní dinyòbummòndi Israyeel yab cee, kí tükù-bi yii nì Yeesu Kriisitoo puee bi dàá ká ḡsḡfi: Yeesuee di sá ti-kòkò Dindaan.
- ³⁷Jaan nín sòòñ Unimbòti nyim difaldi bòti ki dòò boonee, ni nyí tin jíti Juudee tiṅki kòkòn ki kiliín Gaaliileeyee.
- ³⁸Ni nyí yii Unimbòti nìn tíín Yeesu Naasaareeti yòu u-Fām ki yāntì u cáá mpòṅkpaan. U nìn cá ajan kòkò ki ḡáán tiṅan ki cāantí bin kòkò Sitaan pòṅḡu nìn ḡúbee, kun puee Unimbòti nìn bí u-cee.
- ³⁹Timbi kántì tin kòkò u ḡáàn Juuda yab tiṅkin ki kpáàn Jeerusaleemee mun. Ún ní bi kpáá ndò pu, ki kūū-u.
- ⁴⁰Ama Unimbòti fikitì-u winta dal, ki yāntì bi ká-u.
- ⁴¹An kaa sá samaa kòkò di ká-u, asee Unimbòti nín nìn péelēetimbi bin bin í ká-uee. Di sá u nín nìn fikitì ditanḡpiilinee, boonee, ti nì u di jíín ki nyūñ.
- ⁴²Ní u bí-ti yii tí nīn sòòn u-pu samaa cee, kí dākà-bi yii ún Yeesu baba ní Unimbòti lēe u-bòsoonliu, ú sòòn bin wālee nì bin kpíyee bòti.
- ⁴³Ún pu ní Unimbòti bōnaatiliibi kòkò lēekì seera yii un sá kamaa yaa fōō-u ki kíyee kántì u-kpitii pōtam Yeesu yindi pu.”
- ⁴⁴Piyeer bí sòòn mimmee, ní Unimbòti Fām kpákatìn bin kòkò nìn bí pílfi u-nyòbundee pu.
- ⁴⁵⁻⁴⁶Kriisitoo yab bin sá Juuda yab ki céèñí Piyeeree nín gbìl binicambi bí sòòn isooncaan ki nyòḡkí Unimbòtee, ní bi bākatì, kun puee Unimbòti tíín bin kaa sá Juuda yabee mun u-Fām. Niinee ní Piyeer bí yii:
- ⁴⁷“Binib nee fōō Unimbòti Fām kii timbee dee. Mimmee, ti ḡūñ kí yíi yii taa làá fàl-baaa?”
- ⁴⁸Ní u pú nsan yii bí fàl Unimbòti nyim Yeesu Kriisitoo yindi pu. Bi fūl-bi ki dóòyee, ní bi mēē-u yii ú kàl bi-cee iwiṅkaaṅkaa.

Atuun 11

- ¹Akpambal nì nnabiyaamu mun nìn bí Juudeeyee gbìl yii bin kaa sá Juuda yabee mun fōō Unimbòti nyòbundi.
- ²Piyeer nìn fātii bāán Jeerusaleemee, bin gífée nìn bí wòñ-u,
- ³yii u kó bin kaa gífée cee, u nì bi jíín tijin.
- ⁴Ní Piyeer bí máafi-bi tin jítee, an nín kiliín pu ki tin kúntì puee, yii:

- ⁵“M nìn bí Jɔpa tɪŋki poon ki bī mēéyee, Unimbɔti ɲúbitì m-nimiliŋ m wál tiwan tiba, ti bí kii satakpaanee ki bóob ajannaatil pu ki nyánní yilpu ki sīntiín m-cee.
- ⁶Ní m bī kpéé sata poon dímmee, ní ki ká tiwanɲkuti tin còom ataa anaayee nì ipeel, nì tin fùee nì nnɔmbiyaamu,
- ⁷ní m gbīl nneen ɲubɔ bí-mi yii: 'Piyeer, yīkí kò kí ɲmó!'
- ⁸Ní m bí yii: 'Aayee, m-Dindaan! Doooo nee tiwan tin ti kòóyee kaa láá péékó m-nyɔkɔn.'
- ⁹Nlilitiimin ní nneenee gítí lī yii: 'Tin Unimbɔti ɲáŋkèe, sii taa li yii taa ɲāñ!'
- ¹⁰Ali mín diba dibee mita, ní an wanti kɔkɔ fātii nín jóm yilpu.
- ¹¹Dicilpu niinee, bininjab bita bin bi nìn túnní Seesaaree m-ceeyee bāañ kudii kun ni m nìn kóóyee nyɔkɔpu.
- ¹²Ní Unimbɔti Fām bí yii man nì bi ń nīn cá, m taa gùgufi. Man nì nnabiyaamu muluu nee di nìn nóó ki cūti Kɔɔrneel dumpu.
- ¹³Ní ú mun máafi-ti u nín nìn kā u-dumpu Unimbɔti tūuŋɲu ɲubɔ bāañ ki tükū-u yii: 'Tɔ Jɔpa, bí yíín-si Siimɔn un bi páañ diyindi yii Piyeeree.
- ¹⁴U dàá tükù-si tibɔti tin pu sii nì a-samaau kɔkɔ dàá dī kí ká difiilee.'
- ¹⁵M kí ká bi bī sòòn nì bee, ní Circir Fām kpákatín bi-pu kii mi nín nìn kpákatín ti mun pu mpeepeekaam puee.
- ¹⁶Niinee, m tétè ti-Dindaan nyɔɔbundi nee pu, yii: 'Jaan nìn fùul binib Unimbɔti nyim, ama Unimbɔti dàá dāá fàl nimbi nì Circir Fām ní.'
- ¹⁷Unimbɔti pú bí mun u-Fām mbaantiim kii u nín nìn pú ti mun puee ní, kun puee ti-kɔkɔ fɔɔ ti-Dindaan Yeesu Kriisitoo ki kíí. Kin man mun ɲma ní m kpákañ Unimbɔti?"
- ¹⁸Bi gbīl mimmee, kaa ti bī kpákantí-u, ki kí nì ki bī nyóŋkí Unimbɔti ki bí yii: "Mimmee, Unimbɔti yānti bin kaa sá Juuda yabee mun fá bi-kpitii kí ɲmā kí ká dimaŋfal dee."
- ¹⁹Bin bin bi nìn páb bi yāl Eetiyeen kúm boonee bàñ ali Feenisii nì Siipil nì Antiyɔsi, ki sòòn Unimbɔti bɔti Juuda yab ɲmaniŋma cee.
- ²⁰Ama bi-kansikin biba bin nyánní Siipil nì Siireenee bāañ Antiyɔsi ki mun bī tükù bin kaa sá Juuda yabee dinyɔɔbummɔndi din sòòn ti-Dindaan Yeesu puee.
- ²¹Ti-Dindaan pɔŋɲu nìn bí bi-cee, ní kunipaaun nìn fɔɔ ki kí ki nóó ti-Dindaan.
- ²²Kriisitoo nikitil din bí Jeerusaleemee nín gbīl an bɔtee ní bi dū Baarnaabasi ki tú Antiyɔsi.
- ²³U bànee ní ki ká Unimbɔti nín bīn bi-pu miŋyee ní an móókí-u, ní u bī tì-bi kunyannyaau, yii bi-kɔkɔ ń nīn yú nì dipɔbil diba kí nīn nákañ ti-Dindaan.

²⁴Di sá yii u nìn sá unimonti, ki gbí Circir Fām nì fookii. Mìn pu ní binib tikpil dómiń ki nów ti-Dindaan.

²⁵Mìn boonee ní Baarnaabasi búnti Taarsi kí nyàab Sool.

²⁶U bàñ ki ká-uee, ní ki cáañ-u Antiyosi. Dibimmondi kókøee, bi nìn dūu kāl Kriisitoo nikitil kansikin ki dākà binib tikpil Unimbōti bōti. Antiyosi tiŋkin ní bi péé péé ki yíin Yeesu boonooliibi yii Kriisitoo yab.

²⁷Dyunti gbantee, Unimbōti bōnaatiliibi biba nyánní Jeerusaleem ki sīnti Antiyosi.

²⁸Bi-kansikin ubo ní bi nìn yīn Agaabusi. Unimbōti Fām yānti kijapaayee yíkii lī yii, ŋkùm miba dàá nyā kitiŋ kókø pu kí nīn pōō. (Ní mi lafun bāañ Kloodi beel yuntiŋu).

²⁹Ní Yeesu boonooliibi bī mākà báà ŋma n̄ tī u nín ŋūn puee bí dūu tūtuñ bi-nabiyaamu mun ków Juudeeyee.

³⁰Bi tīyee, ní ki yānti Baarnaabasi nì Sool yōon ki cáā cūnni Jeerusaleem Kriisitoo nikitil kpilib cee.

Atuun 12

¹Dyunti gbantee, uboti Eeroodi kí ki bī sàantí Kriisitoo yab biba,

²ní ki yānti bi lānti Jaaki un sá Jaan maanee.

³U ká yii an ŋāñ Juuda yab ceeyee, ní u yānti bi cúú Piyeer mun. An nìn sá iwiin in poon bi ŋmód kponob bin baa ŋá ŋkpononyokøee ní.

⁴Bi cúú-u ki tó sarkanee, ní uboti lēsoojab saalku nì ubo n̄ nīn cí-u tiŋan. U là yii, bi yaa jín apibil jinjaaliu ki dóoyee, ú cáañ-u samaa nimiin kí sòon u-bōti.

⁵Dyunti ŋun Piyeer nìn bí kusarkadiinee, Kriisitoo nikitil nìn bí ki mēe Unimbōti u-pu, kaa gbèntí.

⁶Kutaa n̄ wúnti Eeroodi n̄ cáá-u ibosoon samaa nimiinee, kunyeeuee, Piyeer nìn sáká soojab bili kansikin ki dō ki gēn bi bóob-u ikusaka ili, ní soojab bili yú kipunyokøpu ki cí kusarkadii.

⁷Kpalaayee, Unimbōti tūuŋu ŋubo dómiń, ní kusarkadiin wál nyákányaka. Ní ntūun fáá Piyeer takakal ki fīnti-u, ní ki bí yii: “Yīkì malaa!” Ní ikusakee cúū fófī u-ŋaliyyin ki líti.

⁸Ní ntūun bí yii: “Gbīn a-dambalau kí táká a-naatakaŋ.” Ní u ŋá mìn. Ní ŋu gītī bí yii: “Dū a-satau kí pēēn, kí nīn nów-mi.”

⁹Ní Piyeer nów-u ki nyánní kusarkadiin, kaa nyí min ntūun bī ŋáánee sá ibaamōn, an ŋá-u kii kudamintiiuee ní.

¹⁰Bi jítī soojapeekaabi pu ki tin jítī bililitiibi mun puee, ní ki bàñ tikúti punyokoki kin túl kitiŋinee. Kipunyokøee cúū pīiti ki-ba bi-nimiin, ní bi nyán ki tākān didandi diba pu. Kpalaayee, ntūunee yíkì Piyeer cee.

¹¹Niinee ní Piyeer béè ní ki bí yii: “Kɔ̀ŋkɔ̀nnee, tiŋman, m nyí yii ti-Dindaan di túnní u-tūuŋɔ̀ ɔ̀ú dāá nyāntí-mi Eeroodi ɔ̀aan nì tin kɔ̀kɔ̀woooo Juuda yab bàà cí kí ɔ̀á-mee.”

¹²U yúl ki dākafèe, ní ki nīn dōón Maarii Jaan un bi páan diyindi yii Maarkee na dumpu. Niin ní binib tikpil nīn kpáfi ki bí mēé.

¹³Ní u bān ki fáá kunaakoou punyɔ̀kɔ̀, ní usapɔ̀on ubɔ un bi nīn yīi Roodee sútiín kí pīfi.

¹⁴U béè Piyeer neenee, ní an móokīn-u, ú bàà pīti-uee, ní u sán ki cūti tūkū yii Piyeer yú kipunyɔ̀kɔ̀pu.

¹⁵Ní bi bí-u yii: “A wáati níin?” Ní u bí yii: “An baasii sá ibaamɔ̀n ní!” Niinee ní bi bí yii: “An dāá nīn sá Unimbɔ̀ti tūuŋɔ̀ ɔ̀un cí-uee ní!”

¹⁶Dyunti gbantee, Piyeer péēgbinti fáti, ní bi cúu pīti ki ká-uee, ní ki bākatī sēeee.

¹⁷Ní Piyeer dū u-ɔ̀al ki téefi-bi yii bí ɔ̀mīlee, ní u bí máafi-bi Unimbɔ̀ti nīn nyānti-u kusarkadiin puee. Ní u bí-bi yii: “Cūú tūkumaan Jaaki nī nnabiyaamu mun kínee.” Ní u nyán ki búnti laaaba mun.

¹⁸Kutaa wúntèe, soojab pɔ̀biliŋ bíl tikpil, ní bi bí bālfī tɔ̀b yii: “Ba di nīn ɔ̀á Piyeer dee?”

¹⁹Eeroodi tú bí nyàab-u, ní baa kpááa ká-u. Ní u bí yii bí bālfī soojab tibɔ̀ti, ní ki pú nsan bí kpò-bi. Niinee ní Eeroodi yíki Juudee ki cūti kòò Seesaaree.

²⁰Eeroodi nīn fōō Tiir nī Siidɔ̀n yab pu diŋuul, ní bīn kpáfi dicilpu kí cúu ká-u. U-tiŋkin ní bi nīn tūnti tījin ki cāabīn bīn cee, mīn puee, bi pīi ubɔti Eeroodi cindin kpiliu Blasitusi kubɔ̀tīi ki wāati, ní ki cūti gbāam ubɔti Eeroodi.

²¹Dwiin ɔ̀un bi nīn síinee bāanee, Eeroodi pēēn u-beebɔ̀kutiŋ ki ká u-beejal pu ki bí sòon nī bi tibɔ̀ti.

²²Ní samaa bí kūnti yii: “An sá unimbɔ̀ti ubɔ di sòon, an kaa sá unil!”

²³Dicilpu niin ní Unimbɔ̀ti tūuŋɔ̀ ɔ̀ubɔ cāan iween ki tó u-pu, kun puee waa tī Unimbɔ̀ti tinyool. Ní akoosibil aba kó u-ni ki ɔ̀mó ki kūu-u.

²⁴Dyunti gbantee, Unimbɔ̀ti nyɔ̀bundi mòtī gbīfī, ní bin fòol ki kíikée wīŋɔ̀ gbēentī.

²⁵Baarnaabasi nī Sɔ̀al dód bi-tuŋɔ̀ Jeeusaleemee, ní ki fātī gítīn, ki kpáanī Jaan un bi páan diyindi yii Maarkee.

Atuun 13

¹Unimbɔ̀ti bɔ̀naatiliibi nī bidakaliibi biba nīn bí Kriisitoo nikitil din bí Antiyɔ̀see kansikin, bīn di sá: Baarnaabasi, Siimeeyɔ̀n un bi nīn páan diyindi yii Niijeeree, nī Lusiyusi un sá Siireenee, nī Sɔ̀al nī Manayeen (un Eeroodi baa nīn kpīnee).

- ²Dyunti ɲun bi bóob kinyɔkɔ ki bī nyóŋkí ti-Dindaanee, ní Unimbɔti Fām bí yii: “Gàntīmaan Baarnaabasi nì Sɔɔl kí yóón-mi ditundi din pu m yíín-bee pu.”
- ³Bi bóob kinyɔkɔ ki mēēki dóòyee, ní bi dū bi-ɲalii ki páaɲ Baarnaabasi nì Sɔɔl pu, ní ki yānti bi búnti.
- ⁴Baarnaabasi nì Sɔɔl bin Unimbɔti Fām nìn túee nín sɪntī Seelusii ki bàñee, ki kó meela ki nín cá Siipil.
- ⁵Bi bàñ Salamiinee, ki bī sòòh Unimbɔti ɔti Juuda yab kpafidiɲɲin. Jaan-Maarki nìn bí bi-cee kí nīn tútuɲ-bi.
- ⁶Ní bi cōm Siipil timmu kɔkɔn, ali ki tin bàñ Pafɔsi. Niin ní bi tin ká ujuudaja ubɔ, u sá ukpaɲkpanti bi yíi-u Baar-Yeesu, u móntí yii u sá Unimbɔti ɔnaatiliu.
- ⁷Gɔmina Seegusi Poolusi uciɲfiti cee ní u nìn bí. Gɔminee là kí pīlfi Unimbɔti nyɔɔbundee ní ki yíín Baarnaabasi nì Sɔɔl.
- ⁸Ama Eelimasi ukpaɲkpantee (u-yindi dee greeki sooni poon) nìn móti, ki là kí pìkiliɲ gɔmina á taa fɔɔ Unimbɔti ɔti kí kíí.
- ⁹Niinee, Unimbɔti Fām bāaɲ Sɔɔl un bi yī Pɔɔl muae, ní u kpēē-u soooo,
- ¹⁰ní ki bí-u yii: “Sitaan biki, sii di gbí iciɲɲmatɲkaa nì diganɲam ki jáa nì ibaamɔn kɔkɔ. Aa làá gbēēn ki gbíntii bíí Unimbɔti sambiyaamu mun tēēneee?”
- ¹¹Too, kɔɲkɔnnee, Unimbɔti dàá yàntī á kpántí ujɔfu. Aa làá ti wāl ɲwiín iyunti iba poon.” Dɪcilpu niinee, u kpánti ujɔfu, ní u kíɲ ki bī táfi ki nyàab un dàá dàtì-uee.
- ¹²Ní gɔminee ká tin jítèe ní ki fɔɔ dinyɔɔbummɔndee ki kíí. Kun puee ti-Dindaan ɔti tin bi dākèe kó-u tiɲan.
- ¹³Ní Pɔɔl nì bin nìn cēentí-uee kó meela ki yíkì Pafɔsi ki bàñ Peeji Paɲfili watil. Ní Jaan un bi yíi Maarkee gbēēn niin ki nín gítíɲ Jeerusaleem.
- ¹⁴Bi yíkì Peeji, ki nín níki bi-saɲɲu ki tin bàñ Antiyɔsi tiɲki, Pisidii watil. Ní ɲwiɲɲuɲfikaa dalee, bi kó Juuda yab kpafidiikun ki kāl.
- ¹⁵Bin béeyee kàaɲ mara nì Unimbɔti ɔnaatiliibi takaldab poon ki dóòyee, ní kukpafidii kpilib túnní bi-cee yii: “Nnabiyaamu, ni yaa cáá isaɲki iba kí tī samaa, ní sòòh.”
- ¹⁶Ní Pɔɔl yíkì ki yóòh u-ɲal yilpu ki jáam-bi, ní ki bí-bi yii: “Nimbi Israyeel yab, nì nimbi bin fàɲkí Unimbɔtee, pīlfimaan!”
- ¹⁷Israyeel yab Nimbɔtiu nìn lēēti-naanjab ki yānti bi būti ɲyunti ɲun bi nìn bí kunicaɲ Eejipiti tiɲkinee. Ní Unimbɔti nìn dū u-pɔɲɲu ki nyánti-bi,
- ¹⁸ki jín bi-pu kimɔtii bi-bimbim pu ki ɲúb-bi abin imuɲku ili nyɔkɔm kupɔɔun,
- ¹⁹ní ki ján ki kúnti atimbun aluli Kanaan tiɲkin, ní ki dū Israyeel yab ki kàaɲ bi kpánti bitindambi.

- 20**Bi kāl niin kii abin tilaafati tili nì imuᅅku ili nì saalaa. “Boonee ní u tī-bi bikpilib bin dàá nīn kpòotī-bee ki tin sāā Unimbōti bōnaatiliu Samueel yuntiᅅu.
- 21**Dyunti gbanti ní bi bí yii bi là ubōti. Niinee, Unimbōti tī-bi Sayuul Kiisi jipōon un nyánni Benjamin naakookunee, u kāl abin imuᅅku ili.
- 22**Boonee, Unimbōti dū-u ki fá, ní ki dū Dafiidi ki kāañ. Ún pu ní u sòon yii: 'M ká Dafiidi Jeesee jipōon. Ún di fáati m-pōbil. U dàá dāá ᅅá min kəkō m lèe.' “
- 23**Ní Pōol nīkī ki lī yii: “U-maaliᅅu poon ní Unimbōti yānti bi māl Ufiil ubō ki tī Israyeel yab, kii u nín nīn pōon puee: ún di sá Yeesu.
- 24**Kí wātī ú bànee, Jaan nīn sòon nì Israyeel yab kəkō bí fá bi-kpitii kí yāntī bí fāl-bi Unimbōti nyim.
- 25**Dyunti ᅅun Jaan nīn dàá dós u-tundee, ní u bí-bi yii: 'ᅆma ní ni dākafī yii m sá ní? Maa sá un ní ni dākafī yii m sée! Ama ubō dòon man boon, maa kpánti kí búti u-naataaᅅmiii gba.'
- 26**“Nnabiyaamu, nimbi Abraam maaliᅅu biyaamu, nì nimbi binicambi bin fāᅅkí Unimbōtee, timbi ní Unimbōti dū dinyōobundi nee ki tīn, tí ká difiil.
- 27**Binib bin kód Jeerusaleemee nì bi-bōtiibi kaa nīn bée un ní Yeesu sée, kaa bée Unimbōti bōnaatiliibi bōti tin bi kāañ ᅅwiᅅᅅᅅfikaa sá kamaa dalee taapu mun. Bi nín yānti bi kūu Yeesu puee, bi ᅅá min Unimbōti bōnaatiliibi nīn sòon ki yóonee dee.
- 28**Nì min sá kamaa ní baa ká tin u ᅅá ki máañ ᅅkúmee, bi mēēPiilati yii ú kpò-u.
- 29**Bi ᅅá tin kəkōwoooo bi nīn ᅅmāñ ki sīn u-puee, ní bi kpákatiñ-u ndōpuntikaa pu, ki dū-u ki ᅅá dikaakulin.
- 30**Ama Unimbōti fikitī-u ditaᅅkpiilin.
- 31**Boonee, bin nīn nyánni Gaaliilee ki céenī-u Jeerusaleemee nīn ká-u iwiin tikpil poon. Kōᅅkōnnee, binibee gbanti di kíñ ki sá seeradambi ki lèekī seera u-pu ki tī samaa.
- 32-33**“Mīn pu ní timbi bí tükù-ni dinyōobummōondi yii, dipoondi din Unimbōti pōon ti-naanjabee, u nín fikitī Yeesuee, u ᅅá-di ki tī timbi bi-naantiibi dee. Ali kii an nín ᅅmāñ Soom takaldaliliiti poon puee, yii: Unimbōti bí yii: 'A sá m-Jipōon, m dākā dīn yii man di māl-si.'
- 34**ní ki gítī sòon u-pu yii: 'M dàá dāá ᅅá-ni tiᅅan tin m nīn pōon Dafiidi nì ibaamōnee.' An taapu sá yii, u dàá fikitī Yeesu ditaᅅkpiilin, u-wunti n taa sūu.
- 35**Mīn puee ní Dafiidi lī u-takaldau poon laaaba Yeesu pu yii: 'Aa làá yāntī a-circir tōntōnliu wunti n sūu.'
- 36**Dafiidi yuntiᅅuee u nīn sá Unimbōti tōntōnliu ní ki ᅅáañ min ní Unimbōti lēeki sīnee. U dāa kpīi, ní bi síb-u ki kól u-naanjab, ní u-wunti sūu.
- 37**Ama Yeesu un Unimbōti fikitèe, ún wunti kaa sūu.

³⁸Nnabiyaamu, béemaan yii tin tin ní ti sòòn ki tükù-ni nee di sá, ùn pu ní ni kpántí deedeedambi Unimbòti nimiin. Ni nìn nóó Mooisi marabee, naa nìn ñhùn kí kpántí deedeedambi Unimbòti nimiin;

³⁹ama un yaa fṵṵ Yeesu ki kííyee, Unimbòti dù u-kpitii kòkò ní kí pṵ-u.

⁴⁰Ní kpèèmaan tiñan, tibòti tin Unimbòti bṵnaatiliibi nìn sòòñee á taa bàñ-ni, yii:

⁴¹Unimbòti bí yii: 'Kpèefandambi kpèèmaan, bàkatīmaan kí wṵṅkìmaan! Di sá yii ni-yuntii nee poon m dàá ṅá ditundi diba din bi yaa láā bíí máafí-ni gba, naa làá fṵṵ kí kííyee.' “

⁴²Pṵol nì Baarnaabasi nyán kukpafidiinee, ní bi mēē-bi yii ṅwiñṅuñfikaa ṅun dṵoñee bí dāá gítí sòòn tibòti gbanti pu.

⁴³Binib kòkò yāañ ki nín kùñee, Juuda yab nì binicambi bin fṵṵ Juuda yab marabee tikpil nìn nóó Pṵol nì Baarnaabasi, ní bíñ bíí sòòn ki tìi-bi kunyannyaau, yii, bí nīn yú deede ki ṅúb diyimṵol din Unimbòti tī-bee.

⁴⁴Dwiñṅuñfikaa dal fātii bāañee, kitiñ yab kòkò ṅman nìn péēkóònní ní, kí dāá pīlfi Unimbòti bṵti.

⁴⁵Juuda yab ká kunipaauee, ní ki kíñ ki bíí ṅáañ Pṵol nì Baarnaabasi ipoompoon, ki bí yii Pṵol nín sòòñ tiñyee kaa sá mín, ní ki sií-u.

⁴⁶Ní Pṵol nì Baarnaabasi tükū-bi ibaamṵn, kaa fāñkì, yii: “An sá nimbi cee ní ti máañ kí péé kí sòòn Unimbòti bṵti. Ama, kii ni nín yī tibòti gbanti pu ki dàkafī yii naa máañ dimañfal din kaa cáá dikuntilee, an puee ti dàá nìn kíñ ki sòòn bin kaa sá Juuda yabee cee ní.

⁴⁷Kun puee ti-Dindaan nín bí tí ṅá miñyee dee. Ti-Dindaan bí yii: 'M lēē-si á nīn sá ṅwalfi kí cunnì difiil ali kitiñgbennyòkò.' “

⁴⁸Bin kaa sá Juuda yabee gbīl mimmee, ní ki bíí fāal ki pàkà ti-Dindaan nyṵṵbundi. Ní bin kòkò nìn sá bin dàá ká dimañfal din kaa cáá dikuntilee fṵṵ ki kíí.

⁴⁹Ní ti-Dindaan nyṵṵbundi gbīti kitiñ gbanti kòkṵn.

⁵⁰Ama Juuda yab téé binimpukpaambi bin fṵṵ Juuda yab marabee nì kitiñ poon yidambi, ní bi yíkì ki páb Pṵol nì Baarnaabasi ali ki jīñ-bi bi-tiñki pu.

⁵¹Ní Pṵol nì Baarnaabasi gbáfí bi-naatakanṅ kpṵṅkpṵm ki yāl bi-tiñki pu, án nīn sá-bi kudaanṅ yii ibṵsoon dṵ ki cí-bi, ní ki búntì Ikoonium.

⁵²Ama bin nìn fṵṵ Yeesu ki kíí Antiyṵsi tiñkinee nìn gbí dipṵṵpiñkpaandi nì Circir Fām.

Atuun 14

¹Ikoonium tiñkinee, Pṵol nì Baarnaabasi tí kó Juuda yab kpafidiikun mbaantiim, ki sòòñ tiñan, ali binib tikpil, Juuda yab nì Greeki yab kòkò, fṵṵ ki kíí.

- ²Ama Juuda yab bin kaa f̄s̄ kí kííyee téé bin kaa sá Juuda yabee bí cùú ḡá P̄ool nì Baarnaabasi tin kaa ḡāñee.
- ³Nì míñ k̄ok̄oee, P̄ool nì Baarnaabasi kāl̄ ki yúntì Ikoonium ki s̄oōñ ti-Dindaan b̄oti, kaa f̄aḡkí, ní ti-Dindaan yānti bi ḡáañ tidaandi nì maamaacib kí dākà yii bi nín s̄oōñ u-ḡanti puee, an sá ibaam̄on.
- ⁴Ní kitiḡin yab cúū yākatì mili: biba bí Juuda yab jandi pú, ní bin kíñee mun bí Yeesu kpambaliḡ jandi pú.
- ⁵Ní Juuda yab nì bin kaa sá Juuda yabee, ki kpáañ bi-b̄otiibi, kpáfì ki b̄ī b̄óntí ki là kí s̄aān-bi, kí yāḡkì-bi ataḡkpee kí kp̄ò.
- ⁶P̄ool nì Baarnaabasi béè mimmee, ní ki s̄aḡ ki búntì ki tin b̄aḡ Liista nì Deebe, ntimu mun bí Liikayoonii tiḡkinee, nì mu-kpaanceetii,
- ⁷ki bí niin ki s̄oōñ Yeesu b̄om̄ontiiti.
- ⁸Ufaliḡfaan ub̄o n̄in bí Liista, bi péēm̄ā-uee, u-taḡḡi fáká ní waa c̄oōm̄ ki ká.
- ⁹Dalba uninjee b̄ī p̄ílfì P̄ool nȳoobundee, ní P̄ool dū u-nimikp̄eeḡu ki b̄aān u-pu, ki béè yii u cáá fookii Unimb̄oti pu ki ḡūñ kí ká dicaandee,
- ¹⁰ní u téēñ m̄p̄on yii: “Ȳīk̄i yū́l mól̄m̄ol a-taḡḡi pu!” Ní u nȳī ki yíkì kr̄ub ki b̄ī c̄oōm̄.
- ¹¹Samaa n̄in ká min P̄ool ḡée, ní bi b̄ī tátí nì Liikayoonii soonin yii: “Awaa aba kp̄ántì binib ki kp̄akatìñ ti-cee!”
- ¹²Ní bi pú Baarnaabasi diyindi yii Suusi, ní ki pú P̄ool mun yii Eemasi, kun puee ùñ di n̄in s̄oōñ nì samaa.
- ¹³Ní utandaan un n̄in tòot̄i diwaal ðin bi ȳi Suusi, di-diiku yú kitiḡ kpaanceetiḡuee, dūñ nsupumpukum^{fc} ki léēñ inajaa ki cáāñ kitiḡ punȳok̄opu, u nì samaa là kí dūū tòot̄i-bi.
- ¹⁴Yeesu kpambaliḡ P̄ool nì Baarnaabasi gb̄īl̄ mimmee, an wūñ-bi, ní bi cáti bi-b̄okutiḡ ki s̄aḡ ki nín cá samaayee kansikin ki tátí yii:
- ¹⁵“Ti-yab, ba ḡá ní ni ḡáañ míñ? Ti mun péē sá binib kii nimbee ní, tiwumbaantiil. Ní ti b̄ī t̄uk̄ù-ni ðinȳoobumm̄oñdi, yii ní fá ni-waḡḡi gbanti ḡin sá famee kí n̄óó Unimb̄oti un bée. Ùñ di náāñ yilpu nì taapu nì tiḡku, nì tin k̄ok̄wooooo péēbée.
- ¹⁶Ḳyunti ḡun jítèe, u n̄in yāntì atimbun kamaa ḡáañ ḡi nín là puee.
- ¹⁷Nì míñ k̄ok̄oee, u dākā-ḡi kun ní u s̄ee, nì u-ḡáañtamin: di sá yii u yāntì utaa nì, tiwan lòoñ, tijikaal gb̄óotí ki t̄i-ni ðip̄oḡpindi.”
- ¹⁸M̄p̄on nì m̄p̄on ní Yeesu kpambaliḡ dū tib̄oti gbanti ki dūū p̄iñ samaa nsan bí taa ḡm̄ā kí tòot̄i-bi.
- ¹⁹Boonee, Juuda yab biba nyānní Antiȳosi nì Ikoonium ki ḡúñ ki ḡm̄ātiñ samaa, ki yāḡkì P̄ool ataḡkpee ki fūñ-u ki cáā bíl̄ kitiḡ boon ḡkpaanceeti, ki dākafì yii u kp̄i dee.

- ²⁰Kriisitoo yab dāa dómiín ki mǎntìi tú-u, ní Pɔɔl yíkì ki nín cá kitiñin. Kutaa wúntèe, ní u nì Baarnaabasi búntì Deebi.
- ²¹Bi sòoñ dinyɔɔbummɔɔndi kitiñ gbantin ki yǎntì binib tikpil kpántì Kriisitoo yab. Boonee ní bi nín gítíí Liista, Ikoonium nì Antiyɔsi.
- ²²Bi nìn tìi Kriisitoo yab kunyannyaau, ki sǎŋkí-bi yii bí n̄n p̄ɔntí biba Yeesu bɔtin, ní ki bí-bi yii: “An sá nì falaakpaan ní tí nín ŋmā kí kó Unimbɔti beelin.”
- ²³Ní bi lēekì bikpilil Kriisitoo nikitil sá kamaa poon, ki b́óób kinyɔkɔ ki mēēki d́òyee, ki dū-bi ki dūu ná ti-Dindaan un bi f̄ɔ̄ ki kííyee ŋaan.
- ²⁴Bi d̄ín Pisidii puee, ki bāań Pañfilii.
- ²⁵Bi sòoñ Unimbɔti bɔti Peeji ki d́òyee, ní ki nín s̄ntī Atalii.
- ²⁶Niin ní bi kó meela ki búntì Antiyɔsi, laakin Kriisitoo yab nìn mēēUnimbɔti n̄ tūtuñ-bi atuun ŋin bi ŋáań nee puee.
- ²⁷Bi bàańee, ki kpáfi Kriisitoo nikitil ní ki máafi tin kɔkɔwoooo Unimbɔti ná ki t̄i-bee, nì min ní u p̄itì nsan bin kaa sá Juuda yabee kɔkɔ n̄ f̄ɔ̄ kí kííyee.
- ²⁸Ní bi nìn kǎl̄ ki yúntì f̄iíi Kriisitoo yab cee.

Atuun 15

- ¹Bininjab biba nìn nyánní Juudee ki dómiín Antiyɔsi, ki kíí ki bíi dákà nnabiyaamu yii: “Ní yaa kaa gífi kii Mooisi marau nín l̄i puee, naa ŋùñ kí ká difiil.”
- ²Niinee, Pɔɔl nì Baarnaabasi kaa kíí, ní kunikpɔŋkpɔkɔkpaanŋu kó bi-kansikin. Ní bi bí yii Pɔɔl nì Baarnaabasi nì Kriisitoo yab biba mun n̄ j̄m̄ Jeerusaleem Yeesu kpambaliñ nì bikpilil cee, bí kpèè an bɔti.
- ³Ní Kriisitoo nikitil nyántì-bi nsanni, ní bi d̄ín Feenisii nì Samarii ki máafi bin kaa sá Juuda yabee nín kpántì bi-bimbim ki f̄ɔ̄ Yeesu ki kíí puee. Niinee ní an ḿókiñ Kriisitoo nikitil kɔkɔ.
- ⁴Bi bàñ Jeerusaleemee, ní Yeesu kpambaliñ nì bikpilil nì Kriisitoo nikitil kɔkɔ f̄ɔ̄-bi. Ní bi máafi Unimbɔti nín dū-bi ki ŋáań atuun puee.
- ⁵Niinee ní Fariisab jandi d̄in nìn f̄ɔ̄ ki kííyee yíkì, kaa kíí, yii, bi máań kí ḡfi bin kaa sá Juuda yabee kí yántì bí n̄n ŋúb Mooisi marab kí wàatī ní bí n̄n nín sá Kriisitoo yab.
- ⁶Ní Yeesu kpambaliñ nì bikpilil kpáfi kí kpèè an bɔti.
- ⁷Bi nìn kpáká ki yúntì, ní Piyeer dāa nín yíkì ki bí yii: “M-nabiyaamu, ni nyí yii, doooo ŋkilkaam ní Unimbɔti lēē-mi ni-kansikin m̄ sòoñ tibɔmɔntiil kí t̄i bin kaa sá Juuda yabee, bí gb̄l̄ kí f̄ɔ̄ kí kíí.
- ⁸Ní Unimbɔti un nyí binib p̄biliñinee t̄i-bi Circir Fām kii timbee, kí dákà yii u f̄ɔ̄-bi.
- ⁹Waa ḡántì b̄in nì timbi, bi nín f̄ɔ̄-u ki kííyee ní u f̄intì bi-p̄biliñ circir.

- 10** Ba pu ní ni cónkí Unimbɔti ki cáá diwanɔgul din ti-naanjab nì timbi ti-ba kaa ɔ́n ki túnee, ki cáá tǔntí Kriisitoo yab?
- 11** An sá nì ti-Dindaan Yeesu ɔ́nti pu ní ti máká yii ti ká difiil kii bí mucee.”
- 12** Niinee ní samaa kɔkɔ ɔ́míl, ní ki kíh ki bí pílfi Baarnaabasi nì Pɔɔl nín bí máafi Unimbɔti nín nìn dī bi-pu ki ɔ́aàn tidaandi nì maamaacib bin kaa sá Juuda yabee kansikinee.
- 13** Bi sòon ki dóoyee, ní Jaaki fɔ́ɔ́ dinyɔɔbundi ki bí yii: “M-nabiyaamu, pílfiimaan-mi!
- 14** Siimɔn bàà máafi-ni min ní Unimbɔti nìn kpēē ki lútì doooo ɔ́kilkaamin bin kaa sá Juuda yabee kansikin bin n̄ n̄n sá u-yabee.
- 15** An nóó nì Unimbɔti bɔ́naatiliibi nín nìn sòon puee, kun puee an nìn ɔ́màn Unimbɔti takaldaun yii:
- 16** Mìn boonee, m dàá dāá gítín kí fátí m̄ Dafiidi diiku kun nìn lítèe. M dàá dāá fátí m̄ u-guɔ́ɔ́ mólmal,
- 17** kí ɔ́mā kí yántí binib bin kɔkɔ kínee n̄ nyàab man bi-Dindaan, ki kpáan atimbun ɔ́n kɔkɔ m yíín ɔ́ n̄n sá m-yabee.
- 18** Man ni-Dindaan un nìn yāntì bi bée dooooyee tin tin m dàá dāá ɔ́e di lī mìn.’
- 19** “Mìn puee ní man Jaaki ká yii, an kaa máan tí n̄n páb bin kaa sá Juuda yab ki kpántì bi-bimbim ki fɔ́ɔ́ Unimbɔti ki kíyee.
- 20** Ama tí ɔ́mà kí tükùmaan-bi bí yántí kí taa ti nín j̄n tiwan tin bi dū ki tɔ́tì awaayee, kí taa ɔ́ tilaakpaal, kí taa ɔ́mó fatiku, kí taa j̄ tiwan tin baa lāntì fatiku nyánee.
- 21** Di sá yii, doooo jaanjaan ki dāa dū sāa dín, binib gbintì bí ki sòon Mooisi marab pu ntimu sá kamaa poon, ki kàan u-takaldab akpafidiin ni ɔ́wɔ́ɔ́ɔ́fikaa sá kamaa dal.”
- 22** Niinee ní Yeesu kpambaliɔ́, nì bikpilib, nì Kriisitoo yab kɔkɔ bí yii bi dàá lēēbi-kansikin biba kí t̄ Antiyosi, bi nì Pɔɔl nì Baarnaabasi. Bin bi lēēyee di sá Juudi un bi nìn ȳ Baasaabasee, nì Siilasi. Binjab bili gbanti ní nnabiyaamu kɔkɔ nìn tó.
- 23** Ní bi t̄-bi takalda un poon bi ɔ́màn yii: “Timbi ni-nabiyaamu Yeesu kpambaliɔ́ nì bikpilib jáamiñ nimbi nnabiyaamu mun kaa sá Juuda yab ki bí Antiyosi nì Siiri nì Siiliisiyee.
- 24** Ti gb̄l̄ yii ti-yab biba dómín ni-cee ki sòon nì ni tibɔ́ti, ki yāntì ni bākati nì ni-ba, ki bíl̄ ni-pɔ́biliɔ́. Ti mun kaa túnní-bi ni-cee.
- 25** Mìn pu ní ti mun sòon ki kpáfi ki lēēbinib biba ki dū-bi ki túnní ni-cee, bi nì Baarnaabasi nì Pɔɔl ti-nabineɔ́kaamu,
- 26** binib bin dū bi-ba ki t̄ ɔ́kúm ti-Dindaan Yeesu Kriisitoo yindi puee.
- 27** Mìn puee ní ti dū binib bili nee, Juudi nì Siilasi, ki túnní ni-cee, bí sòon ni-nimiin tibɔ́baantiil gbanti pu.

²⁸Min n̄ān Unimbōti Fām cee ki kpáañ ti mun ceeyee di sá tí taa ti dū awanjul aba kí tún-ni, an yaa kaa tin sá tin máañ ní n̄ée.

²⁹Tín di sá yii ni máañ kí yíi kí taa ti n̄mó tinan tin bi t̄ōtì awaayee, kí taa n̄mó fatiku, kí taa n̄mó tiwan tin kp̄ii baa lāntì fatiku nyánee, kí taa n̄á tilaakpaal. Min n̄ān ki t̄ī-nee di sá ní kòò tiwan gbanti. Ní n̄n bí tiñan!”

³⁰Niinee ní binib bin bi túee buntì Antiyōsi. Bi bànee ki kpáfi Kriisitoo yab ki dū takaldee ki t̄ī-bi.

³¹Bi k̄ān takaldee ki dóòyee, ní an m̄ókiñ báà n̄ma, kun puee takaldee cáañ-bi dip̄ōōōñkil.

³²Juudi n̄ Siilasi mun n̄n sá Unimbōti b̄onaatiliibi, ní ki s̄oñ tibōti tikpil ki s̄ñkì nnabiyaamu p̄obiliñ, ní an k̄úti-bi mp̄on.

³³An d̄āa n̄māntì n̄yunti n̄ubōee, ní nnabiyaamu mun cee bi c̄ūtèe k̄ān-bi n̄ dip̄ōōpindi, ki yāntì bi n̄n ḡitín bin túnní-bee cee.

[³⁴Ní Siilasi ùn là kí gb̄intí niin.]

³⁵P̄ool n̄ Baarnaabasi gb̄intì Antiyōsi bi n̄ binib tikpil bí ki s̄oñ ki d̄àkà ti-Dindaan b̄om̄ntiiti.

³⁶Iyunti iba j̄itì boonee, ní P̄ool bí Baarnaabasi yii: “Yāntī tí ḡití n̄timu mun p̄oon ti n̄n s̄oñ ti-Dindaan b̄otee kí m̄antì ti-nabiyaamu pu kí kp̄èè yii bi bí mana.”

³⁷Ní Baarnaabasi bàà là bí kpáañ Jaan un bi ȳi Maarkee,

³⁸ní P̄ool kaa n̄n kíi yii, baa n̄ñ kí kpáañ unil un n̄n dū-bi ki fá doooo Panfilii, bi n̄ u kaa ti n̄ó ki t̄ñ ditundee.

³⁹Ní bi n̄n kpáká ali an p̄óokì, ní ki d̄āa kpáā dū yān t̄obin. Ní Baarnaabasi ȳoñ Maarki, bi k̄ó meela ki n̄n cá Siipil.

⁴⁰Ní P̄ool mun l̄ēSiilasi. Kí w̄aat̄ P̄ool n̄ n̄n n̄n c̄ee, nnabiyaamu m̄ēēti-Dindaan n̄ b̄iñ u-boon.

⁴¹Ní u d̄i Siirii n̄ Siiliisii, ki m̄ōt̄i k̄úti Kriisitoo nikit̄ñ mp̄on.

Atuun 16

¹P̄ool bàñ Deebi n̄ Liistee, Kriisitoo ȳou ub̄o n̄n bí niin, bi ȳi-u Tiimootee, u-na n̄n sá Ujuudanimpu ní ki f̄ōō ki kíi, ní u-baa sá Greeki.

²Nnabiyaamu mun n̄n bí Liista n̄ Ikooniumee n̄n s̄oñ kijapaayee pu yii u sá unim̄nti.

³P̄ool n̄n là Tiimootee n̄ n̄n bí u-ceeyee, ní u kpáañ-u. Juuda yab bin n̄n k̄óò niinee puee ní u ḡí-u, kun puee bi k̄ok̄o n̄n nyí yii Tiimootee baa sá Greeki.

⁴N̄timu mun k̄ok̄owoooo p̄oon bi j̄it̄ee, bi s̄oñ ki t̄uk̄u Kriisitoo yab yii Yeesu kpambaliñ n̄ Jeerusaleem kpilib n̄n n̄n kpáfi ki ká tiñyee, bí n̄n n̄b̄-ti tiñan.

- ⁵An nìn yāntì Kriisitoo nikitij nìn mòtī fòol̄ ki kíkí ní bi-wíngju gbēentí kutaa sá kamaa.
- ⁶Circir Fām nìn yīi yii Pɔɔl n̄ taa sòon̄ Unimbɔti bɔti Asii tinjinee, ní bi dūu dī Friji n̄ Gaalaati timmun watil.
- ⁷Bi tóob̄ Miisii tinjee ki bàà mākafi kí cù Bitinii, ama ní Yeesu Fām tí yīi, yii bí taa dī niin.
- ⁸Niinee ní bi dūu dī Miisii ki nín s̄ntī Troowasi.
- ⁹Kunyeuee ní Unimbɔti n̄biti Pɔɔl nimilij, u ká Umaseeduaanja ubo yú ki gbàam̄-u yii, “Dīn Maseeduaan kí dāá jòon̄-ti!”
- ¹⁰Pɔɔl ká mimmee, ní ti bēè yii Unimbɔti di yī-ti tí cùú sòon̄ u-nyoobummoondi Maseeduaan. Dicilpu niinee ní ti bónti ki nín cá.
- ¹¹Ti kó meela ki yíkì Troowasi, ní ki túl̄ dicancaal ki búnti Samootrasi. Kutaa wúntèe, ti nín cá Neeyapooliisi,
- ¹²ní ki dāa yíkì niin ki búnti Fiiliipi, kitiŋkpaan̄ji kin bí Maseeduaan tinjin, ki bí Room yab ŋanee. Ti nìn kāl̄ kitiŋ gbantin iwiŋkaan̄kaa iba.
- ¹³Dwiŋŋufikaa dalee, ti nyán̄ kitiŋ kpaanceetiŋu ŋkpin ŋubo caŋin, ki nyàab̄ laakin bi kpáfí ki mèé Unimbɔtee. Ti kálee, ní ki sòon̄ n̄ binimpoobi bin nìn kpáfí niinee.
- ¹⁴Unimpu ubo nìn bí bin nìn bí pílfee kansikin, bi yīi-u Liidiya. U nìn nyán̄n̄ Tiyatiir tinjin ki sá unyampu ki nyáfí bisatamambi. U nìn fàŋkí Unimbɔti, ní ti-Dindaan p̄it̄i u-p̄obil ki yānti u f̄ɔ̄ Pɔɔl bɔti.
- ¹⁵Unimpuee yānti ti fūl̄ u n̄ u-samaau Unimbɔti nyim. Ní u mēē-ti yii: “Ni yaa lafun nyí yii tinman m f̄ɔ̄ ti-Dindaan ki kífí, ní dāan̄ kí n̄n̄ kòd̄ m-dumpu.” Ní u páb-ti ali ti lafun cūti u-dumpu.
- ¹⁶Dalba ti nìn cá ŋwimmeem paan̄ju puee, ti tú usap̄oon̄ ubo, u sá uyumbu ki nìn cáá arasini ubo u-ni ki wāl̄. An di nìn yì-ti u kánti animil tikpil ki cāab̄n̄ u-dindambi.
- ¹⁷Ní usap̄oonee kíh̄ ki n̄óó ti n̄ Pɔɔl, ki tátí yii: “Bininjab nee sá yilpu Nimbɔtiu t̄ont̄on̄liibi ní, bi bí sòon̄ n̄ ni min ní ni dàá dī kí ká difiilee ní!”
- ¹⁸U dū iwiin tikpil ki n̄óó-ti ki sòon̄ an bɔti. Pɔɔl dāa ḡyee, ní ki fāt̄i bí arasiniyee yii: “Nì Yeesu Kriisitoo yindi pu ní m bí yii á nyā usap̄oon̄ nee-ni.” Ní arasiniyee kpáā nyán̄ niin dicilpu.
- ¹⁹Uyumbuee dindambi ká yii Pɔɔl bíl̄ n̄san ŋun pu bi kánti animilee, ní bi cúú u n̄ Siilasi ki dáal̄-bi ki cáā cūnn̄i bikipilib nimiin laakin kunipaa u nìn kpáfée,
- ²⁰ní ki dāa ȳon̄-bi ki cūnn̄i biyidambi cee ki bí yii: “Binib nee di bíl̄ kitiŋ. Bi sá Juuda yab ní.
- ²¹Marab bin bi dākèe, timbi Room yab kaa ŋūn̄ kí f̄ɔ̄yaaa kaa ŋūn̄ kí dī-bi mun.”

- 22Niinee ní kunipaauee kòkò dómín ki kútì, ní bi kpáfi Pɔɔl nì Siilasi pu, ní biyidambi dáál Pɔɔl nì Siilasi bòkutiŋ ki pēeti, ní ki bí yii bí gbá-bi anaalab.
- 23Bi yāntì bi tāfi-bi mín ki dódoyee, ní bi cáá-bi ki tó sarkan, ní ki bí yii sooja un cí bisarkadambee n̄ nin kpèé-bi tiŋan.
- 24Bi kpáafi soojee mín ki dódoyee, ní u fṣṣ-bi ki cáā tó kusarkadii poon ki bá-bi abaa.
- 25Kunyataasiuu nyòkòmee, Pɔɔl nì Siilasi bī mēe ki gà ilan ki nyóŋkí Unimbòti, ní bisarkadambi bin kínee bī pílfi.
- 26Kpalaa kpalaa niinee, kitiŋ cīŋkì ki kpáañ kusarkadii. Dicilpu niinee, mpunyɔmu kòkò cúū pīiti, ní tin bi bóób bisarkadambee kòkò cúū búti.
- 27Sooja un cí bisarkadambee nín fíntì, mpunyɔmu wāāyee, u dàkafi yii bisarkadambi kòkò sàñ ki kátì dee, ní u dáál ki fófì u-jiki kí bàà kpò u-ba.
- 28Niinee ní Pɔɔl tēeñ mpon yii: “Taa kpò a-ba! Ti-kòkò sèé doo.”
- 29Ní sooja bí yii bí pōñ-u ŋŋmi. Niinee ní u tóotì malaa ki cūti gbāañ Pɔɔl nì Siilasi nimiin, tiwun jiki.
- 30Ní u cáá-bi ki nyántì mməŋki, ní ki bālfì-bi yii: “M-dindambi, m dàá ñá mana ní kí nín ká difiil dee?”
- 31Ní bi kí-u yii: “Fṣṣ ti-Dindaan Yeesu kí kíí, a dàá ká difiil, sii n̄ a-dicaŋku kòkò.”
- 32Niinee ní bi bī sòòñ n̄ u n̄ bin kòkò n̄n bí u-dumpuee ti-Dindaan nyòòbundi.
- 33Ní soojee yṣòñ-bi kunyeeu kukuluu gbanti poon ki fíntì bi-buuni. Niin dicilpu ní bi fūl̄ u n̄ u-dicaŋku kòkò Unimbòti nyim.
- 34Boonee ní u yṣòñ-bi ki cáā jóm̄ u-dumpu yilpu, ní ki ñá-bi tijin. Ní u n̄ u-dicaŋku kíñ ki bí dipòòpindin bi nín fṣṣ Unimbòti ki kííyee pu.
- 35Kutaa wúntèe ní biyidambee túnní plisib n̄ dáá tükù sooja n̄ líí binibee.
- 36Ní sooja cūti tükū Pɔɔl yii: “Biyidambi túnní yii m̄ líí-ni. Mín puee, nyā kí n̄n cámaan n̄ ngbansəŋfi.”
- 37Ní Pɔɔl bí plisibee yii: “Bi cúú timbi bin sá Room tindambiyaamuee, kaa sòòñ ti-bòti ki ká ti-bòkpil ní ki gbán-ti samaa kòkò nimiin ki cáañ-ti ki pīñ kudii. Ní kəŋkənee, bi là kí bál soooo kí nyántí-taaa? Ti yū kpataaa, see biyidambi bi-ba n̄ dāañ kí nyántí-ti!”
- 38Plisib cáá dinyòòbundee ki fātii bàñ biyidambee cee, bi nín gbīl̄ yii njapaamu gbanti sá Room tindambiyaamuee, tifaandi kó-bi.
- 39Ní bi dómín ki sōŋkì bi-pòbiliŋ ki nín nyánti-bi, ní ki gbāam̄-bi yii bí yīkì kitiŋ gbanti poon.
- 40Bi nyán kusarkadiinee, ní ki cūti kó Liidiya cee ki ká nnabiyaamu ki kútì-bi tibòti, ní ki nín yīkì niin.

Atuun 17

- ¹Pɔɔl nì Siilasi dī Aṅfipɔliisi pú ki cūti jítì Apɔloonii, ní ki nín bàñ Teesaalooniiki. Juuda yab nìn tí cáá niin kukpafidii.
- ²Ní Pɔɔl nìn kó ki bí dākà kii u nín péē ḡáán puee, ki ḡá nnyɔmu muta. Kinyɔṅ sá kamaa poonee, u nìn cá kukpafidiin ḡwiṅḡuṅfikaa dal ki sòòn nì bi,
- ³ki kààn ki dākà-bi Unimbɔti takaldau, laakin an nìn ḡmāñ yii Kriisitoo dàá dāá kpú kí dāá fikiti bitaṅkpiibi kansikinee. Ní u bí-bi yii: “Yeesu un bɔti m sòòn-ni nee, ùn di sá Kriisitoo.”
- ⁴Juuda yab kansikin biba béè mimmee, ki dū bi-ba ki nákañ Pɔɔl nì Siilasi; mìn mun ní ki kpáañ Greeki yab bin nìn tó Unimbɔti marabee tikpil, nì binimpugaakaabee tikpil mun nìn dū bi-ba ki nákañ-bi.
- ⁵Ama Juuda yab ḡá ipoompoon ki cūti kitiṅin ki nyàabīn anileen ḡin còom adan puee ní ki kpáfi kunipaau, ki cáañ fikilfikil kitiṅ poon. Dinikitilee yíkii cūti Jason dumpu kí nyàabīn Pɔɔl nì Siilasi kí cáañ samaa nimiin bí bàlfi-bi tibɔti.
- ⁶Bi bàñ Jason dumpu, kaa ká-bee, ní ki cúuñ Jason nì nnabiyaamu mubɔ ki cáañ bikpilib nimiin, ní ki tátí yii: “Binib bin bííl duulnyee dómín kitiṅ nee ni, ní Jason fṛṛ-bi bi kòò u-dumpu.
- ⁷Binib gbanti kaa fàṅkí ḡominakpaan Seesar marab, kun puee bi cáá yii ubɔti ubɔ gítí bí, bi yī-u Yeesu.”
- ⁸An bɔtee bííl samaa kɔkɔ pɔbiliṅ ki kpáañ bikpilib,
- ⁹ní bikpilibee gí Jasɔmbi dipɔṅkpaandi bí pà kí wàatí bí nín lí-bi.
- ¹⁰Kunyeeu mó kpalaayee, nnabiyaamu yānti Pɔɔl nì Siilasi búnti Beeree. Bi bàñ niinee, ní ki nín cá Juuda yab kpafidiikun.
- ¹¹Binib gbanti nìn cáá lakasimonti ki jítin Teesaalooniiki yab, kun puee bín fṛṛ Unimbɔti bɔti mmontiimin. Bi nìn kpátí Unimbɔti takaldau iwintil kɔkɔ ki kpèé yii tin Pɔɔl sòòn nì bee yaa sá ibaamɔn;
- ¹²an pu ní bi-kansikin kunipaau, ki kpáañ Greeki pijabi nì bininjab tikpil, nìn fṛṛ ki kíí.
- ¹³Ama Juuda yab bin bí Teesaalooniikee nín béé yii Pɔɔl tí bí sòòn Unimbɔti bɔti Beereeyee, ní bi dómín niin ki cáañ fikilfikil kitiṅin, ki yānti samaa pɔbiliṅ bííl.
- ¹⁴Niinee ní nnabiyaamu yānti Pɔɔl búnti tiṅku caṅin, ní Siilasi nì Tiimootee, bín nìn gbínti bí Beeree niin.
- ¹⁵Bin nìn céen Pɔɔlee nìn cáá-u ki cūnni ali Ateen ki fātí gitiínee, ní Pɔɔl bí yii bi yaa bànee bí tükù Siilasi nì Tiimootee yii bí kintiñ-u malaa.
- ¹⁶Ḍyunti ḡun Pɔɔl nìn ká Ateen ki cí-bee, an nìn páb-u tikpil, kun puee kitiṅ gbanti sá awaa ḡmanijma ní.

17Ní u kíí ki bí sòòh nì Juuda yab nì bin fṣṣ Juuda yab marabee kukpafidiin, ní ki sòòh iwintil kamaa kinyoṅin, laakin binib kpáfée.

18Anikiti ali aba nì Pṛol nìn bí sòòh. Binib gbantee nìn nyí takalda tiṅan. Dinikiti diba sá Eepikuul yab, dín kínee sá Stoowiiki yab. Ní biba bí yii: “Unifan nee kalin sòòh ba yati ní?” Ní bin kínee bí yii: “U máàn ki dàá nīn sá un sòòh inimbṛticaan bṛtee ní.” Kun pu bi lì mimmee di sá yii Pṛol nìn bí sòòh Yeesu nì difikiti bṛti pu.

19Ní bi yṣòh Pṛol ki cūnni biyidambi cee, ní ki bí-u yii: “A-dàkatam nee sá tibṛcan, mimmee, a ṅūn kí tükù-ti tibṛcan tin a dàkà nee taapuṣṣ?”

20Kun puee tin ti péēgbìl a sòònee, taa láá gbìl-ti ki ká dalba dalba. Mìn puee, ti bàà là kí béé tibṛti gbanti nín sá puee.”

(**21**Di sá yii Ateen yab nì binicambi bin bí bi-kansikinee yati di nìn péēsá bí nīn ká ki pílfi tibṛcan ṅma.)

22Ní Pṛol yáati yúl biyidambi nimiin ki bí yii: “Ateen yab, m wāl yii, binib kansikinee, nimbi di sá bin nṓó inimbṛti tiṅanee;

23kun puee, m nín jīti ni-tiṅki nee poonee, m ká tiwan tin ní ni jáamee. Ali gba, m kpáàá ká nsaraafan ṅun pu bi ṅmān yii: 'Unimbṛti un baa nyée.' Un ni jáam, kaa nyée, ún pu ní m dómīn kí sòòh-ni.

24Ún di sá Unimbṛti un náan duulnya nì tin kṛkṛwoooo péēbée, ki sá yilpu nì taapu Dindaan. Waa kóò adiin ṅin binib cáá bi-ṅalii ki māāyee ni,

25kaa nyàab binib tūtuntam báà an yaa péēsá tintee. An kaa sá ún di tìi báà ṅma dimaṅfal nì ṅfām nì tikṛkṛṣṣ?

26Ún di dī unibaanti pu ki nyánti anibul ki gbéeṅ kitiṅ kṛkṛ pu, ki síiṅ atimbun kṛkṛ nì ṅi-kṅkooni nyṛkṛm.

27U ṅá mìn ki là yii bin yaa táfi ki nyàab ún Unimbṛtee yaa táá ṅmā kí ká-u. Ama Unimbṛti gbanti kaa dátin-ti,

28kun puee 'Ún pu ní ti fṛotī ki pṛṣ ní ki bí.' Kii ni-laṅgaaliibi biba nín gāā puee, yii: 'Ti mun péēsá u-biyaamu ní.'

29Kii ti nín sá u-biyaamu puee, taa máàn kí dàkafi yii Unimbṛti sá kii awaa ṅin binib dākafi ki dū bi-ciini ki dū sindaariyab nì animil ki móóyee, áá kii tiwaṅkpítikaalee.

30Ama Unimbṛti kaa dū ṅyunti ṅun binib kaa nìn nyí tibee ki dūu ṅá tibṛti. Mìn puee ní kṅkṅṅnee u bí tükù ajan kṛkṛ nib yii bi-kṛkṛ máàn kí fá bi-kpitii.

31Di sá yii u yṣòh ṅwiin ṅubṛ ṅun ní u dàá yánti Yeesu nì sòòh duulnya kṛkṛ bṛti nì ibaamṛnee, kun puee uninja gbanti ní u fikiti bitaṅkpiibi kansikin ki dàkā-ti kudaṅṅu páaa yii ún ní u lēē.”

32Bi nín gbìl u sòòh bitaṅkpiibi fikitiitam puee, ní biba bí bèl-u, ní bin kínee bí yii: “Dalba á dáá gítī sòòh tibṛti gbanti pu.”

³³Niinee ní Pɔɔl yíkì bi-kansikin ki nyán.

³⁴Nì mín kòkòee, binib biba nìn fṣṣ ki kíí, ki dū bi-ba ki nákañ Pɔɔl. Uyidaan un bi yî Deeniyee nì unimpu ubo bi yî-u Damariisi nìn bí bi-kansikin. Biba mun nìn kútì.

Atuun 18

¹Mìn boonee, Pɔɔl dāa yíkì Ateen ki búntì Kòranti.

²Niin ní u ká uninja ubo, bi nìn yî-u Akilaasi, u sá Ujuudaja ní bi màl̄-u Pɔnti. U nìn nyánní Italii ki bāañ kpalaa u nì u-nimpuu Prisiil, kun puee gɔminakpaan Kloodi nìn bí yii Juuda yab kòkò n̄ nyā Room tiŋkin. Niinee bìn nì Pɔɔl dūu píí tɔb kubɔt̄iiu.

³Kii bi-kòkò nín nìn ḡaañ ditumbaantiil puee, ní u kó bi-cee, ní bi kpáfi ki tūn ditundi dicilpu. Bi-kòkò nìn sá bitantiluliibi ní.

⁴Ḍwiŋŋufikaa dal sá kamaayee, Pɔɔl nìn pōontí ní ki sòon kukpafidiin kí ḡmā Juuda yab nì Greeki yab.

⁵Dyunti ḡun Siilasi nì Tiimootee dāa nyánní Maseeduaan ki bàñee, ní Pɔɔl dū u-yuntiŋu kòkò ki kíñ ki cáā sòon Unimbɔti bɔti, ki tükù Juuda yab yii Yeesu di sá Kriisitoo.

⁶Ama Juuda yab kaa nìn là min u sòonee, ní ki bíí s̄i-u. Ní u gbáfi u-bòkutiŋ, ki bí-bi yii: “Ni-busuu n̄ gítí ni-pu! Man nyán ni-botin. Kòŋkonnee m dàā n̄n cá bin kaa sá Juuda yabee cee.”

⁷U nìn yíkì niin, ki cūti kó uninja un nìn fṣṣ Juuda yab marabee dumpu, bi yî-u Titiyusi Justusi, u-dumpu nìn nákañ kukpafidii.

⁸Ní Kripusi kukpafidii kpiliu nì u-dicaŋku kòkò fṣṣ ti-Dindaan ki kíí, ní Kòranti yab bin nìn gb̄l̄ Pɔɔl nyɔɔbundee tikpil nìn fòol̄ ki kíikí ki yànt̄i bi fūul̄-bi Unimbɔti nyim.

⁹Kunyeeu kubɔee ti-Dindaan nyánt̄i u-ba ki dākā Pɔɔl ní ki bí-u yii: “Á taa fāŋkì, ama n̄n sòon kí taa gbèēñ,

¹⁰di sá yii m bí a-cee, ubo kaa làá s̄utiñ kí p̄l̄iñ-si ní kaa n̄n ḡá-si tikpitil. Kun puee, m cáā binib tikpil kitij nee poon.”

¹¹Ní Pɔɔl nìn kāl̄ bi-kansikin dibindi diba nì dijandi, ki dākà-bi Unimbɔti bɔti.

¹²Bi k̄aāñ Galiyɔn gɔmina Akaayi tiŋkinee, ní Juuda yab kpáfi ki yíkii cúú Pɔɔl, ki cáā cūnni Galiyɔn nimiin,

¹³ní ki bí yii: “Unil nee yànt̄i bi n̄ot̄i Unimbɔti mbamin, min ní marab kaa lēe.”

¹⁴Dyunti ḡun Pɔɔl bàà làá wàañ u-nyòkò kí sòonee, ní gɔmina Galiyɔn bí Juuda yab yii: “Juuda yab, u yaa bàà ḡá tibòkp̄til tiba áá diganḡam ubo, m bàà ḡūn kí p̄l̄fiñ-ni.

¹⁵Ama an yaa sá yii ni yaa bíí kpákà nimbi ni-ba marab pu tibɔti tiba nì ayin aba puee, m yî, maa làá sòon an bɔti. Nimbi ni-ba n̄ kpèè-ti!”

¹⁶Ní u j̄iñ-bi ki nyánt̄i.

¹⁷Ní bi-kòkò cúú Sòsteen kukpafidii kpiliu, ki bí gbáà gòmina nimiin. Ní gòmina kaa kpáàà fàtìi tó.

¹⁸Pòol gítì kál Kòranti ki yúntì fiii. Boonee, u dāa yíkì nnabiyaamu cee ki kó meelan ki búntì Siirii, u nì Prisiil nì Akilaasi. Kí wàatì ú nín yíkì Saṅkreeyee Pòol kòol diyibaakpal kí dākà yii u pòon kí ḡá tiba kí tī Unimbòti.

¹⁹Bi bàñ Efeesee, ní bin nì Pòol nìn nóóyee gbíntì niin. Ní Pòol nìn kó kukpafidiin ki tí bí sòon nì Juuda yab.

²⁰Ní binib gbanti nìn bí mèe-u yii ú gítì kál iwiṅkaaṅkaa bi-cee. Ní waa kíí.

²¹U dàá yíkì bi-kansikinee, ní ki bí-bi yii: “Unimbòti yaa là, m dāa gítìni ni-cee dalba.”

²²U yíkì Efeesee, ki kó meelan ki kpákati Seesaaree, ní ki jóm Jeerusaleem ki jáam Kriisitoo yab, ní ki fàtìi sīntiñ Antiyòsi.

²³U kál ḡyunti ḡubòee, ní ki yíkì cūti Gaalaati nì Frijii timmu kòkòon, ki tì Kriisitoo yab kòkò kunyannaa.

²⁴Ujuudaja ubò nìn bí, bi yī-u Apooloosi, bi nìn màl-u Aleeksandrii, ní u dómīñ Efeesi. Uninja gbantee nìn sá un nyí ki sòon tiṅanee, ki nyí Unimbòti takaldau mun tikpil.

²⁵Bi nìn dākā-u ti-Dindaan bòti, ní ú mun cáā sòon deedee ki dākà Yeesu bòti nì kunyannaa. Nì mín kòkòee, Jaan nyiṅfaltam baba ní u nìn péēnyí.

²⁶Ní u mōtìi bí sòon ki cánti-bi kukpafidiin. Prisiil nì Akilaasi gbìl mimmee ní ki yòon-u ki cáā cūnni bi-cee, ki mōtìi dākā-u Unimbòti saṅṅu páaa.

²⁷Ní Apooloosi lēēyii u dàá cù Akaayi. Niinee, nnabiyaamu tī-u kunyannaa ki ḡmāñ takalda ki tī Kriisitoo yab bin bí lapúee, yii bí fōō-u tiṅan. U nín bàñ niinee, nì Unimbòti pòṅṅu puee u tútuñ bin fōō Yeesu ki kíyee tikpil.

²⁸Di sá yii, u nì Juuda yab nìn kpákà samaa nimiin, ní u nìn sòon ki líkí-bi, ki dākà-bi Unimbòti takaldau poon yii Yeesu di sá Kriisitoo.

Atuun 19

¹Dyunti ḡun Apooloosi nìn bí Kòrantee, ní Pòol dīn kitiṅ kin bí ajoon puee ki bāañ Efeesi. Niin ní u ká Kriisitoo yab biba,

²ki bālfì-bi yii: “Ní nín fōō ki kíyee, ni fōō Unimbòti Fāmaaan?” Ní bi kíí-u yii: “Timbi kaa kpáàà gbìl bi sòon Unimbòti Fām pu gba ní kaa nín fōō-mi.”

³Ní Pòol bālfì-bi yii: “Mimmee, dinyiṅfaldi dilal ní bi fūl-ni ní?” Ní bi kíí-u yii: “Jaan yal ní ti fūl.”

⁴Niinee ní Pòol kíí-bi yii: “Jaan nyiṅfaltam sá ki tī bin fá bi-kpitiyee ní, u nìn tükù samaa yii bí dāá fōō un dàá dāá dāañ ún boonee kí kíí: an dākà yii Yeesu.”

⁵Bi gbìl an botee, ní ki yānti bi fūl-bi nnyim ti-Dindaan Yeesu yindi pu.

⁶Ní Pɔɔl dū u-ɣalii ki páãn bi-pu. Niinee, Unimbɔti Fām kpákatìh̄n bi-pu, ní bi kíh̄n ki bíi sòòh̄n isooncaan ki nàatì Unimbɔti ɔti.

⁷Bininjab gbanti n̄n bàñ binib saalaa n̄n bili nyɔkɔm.

⁸Niinee ní Pɔɔl ɣá iɣmal ita ki kíh̄n ki bí kukpafidiin ki mòtìi sòòh̄n ki cántì-bi Unimbɔti beel ɔti, an nín dàá ɣá pu ní ú ɣmā-bee.

⁹Ama biba n̄n pɔɔkì bi-pɔbilih̄n, kaa là kí fɔ̃ɔ́ kí kífí, ní ki bí ki sòòh̄n ki bíil̄ ti-Dindaan ɔti samaa nimiin. Niinee ní Pɔɔl yíkì bi-cee, ki yɔ̃òh̄n Kriisitoo yab ní ki kíh̄n ki dàkà Unimbɔti ɔti iwintil kɔkɔ Tiranusi sukuluun.

¹⁰U n̄n dàkā-bi mín̄ ali abin ali. An di yāntì Juuda yab n̄n Greeki yab kɔkɔ bin n̄n kóò Asii tɩŋkinee ɣún̄ ki gbìl̄ ti-Dindaan ɔti.

¹¹Unimbɔti n̄n di Pɔɔl pu ki ɣáãn maamaacikpaambi.

¹²Di sá yii Pɔɔl ɣaabikaaa, u-wampeenkaati tiba ní bi yaa n̄n cáãn ki gbēēbibunliibee, iween n̄n càntì-bi, ní arasiniibi mun n̄n nyēēbi-pu.

¹³Binyɔɔdambi biba n̄n bí ki sá Juuda yab, ki yìih̄n ki cāantì bin cáá arasiniibee. Bí mun n̄n mākāh̄n kí yìih̄n ti-Dindaan Yeesu yindi kí jà arasiniibi. Bi n̄n lī yii: “Nì Yeesu un pu Pɔɔl sòòh̄nee yindi pu ní m bí yii ní nyā.”

¹⁴(Sikeefa Juuda yab saraaŋakpiliu ubɔ jipɔmbi biluli di n̄n ɣáãn mimmee.)

¹⁵Ní arasiniiyee fātìi kífí-bi yii: “Man nyí Yeesu ki nyí Pɔɔl mun. Kin ni mun faa, ni sá bilab?”

¹⁶Niinee, uninja un pu arasinii kēe ɣaãn̄ ki cìb̄-bi, ní ki pɔɔkìh̄n bi-kɔkɔ, ki yāntì bi sáñ mpɔn̄ ki nyáñ dicindi gbantin̄ n̄n dicancaŋbeel̄ n̄n tiweendi.

¹⁷Juuda yab n̄n Greeki yab kɔkɔ bin n̄n kóò Eefeesee gbìl̄ mimmee, ní tifaandi kó-bi ní bi mòtìi tìi ti-Dindaan Yeesu yindi tinyool.

¹⁸Bin n̄n fɔ̃ɔ́ ki kíiyee tikpil̄ n̄n dòòh̄n samaa nimiin ki bìitì tin bi n̄n ɣaãh̄nee pu.

¹⁹Bi-kansikin tikpil̄ bin n̄n ɣaãn̄ tikpaŋkpantiilee n̄n cáãn̄ bi-takaldab bin bi n̄n cáā ɣaãn̄ tikpaŋkpantiilee ki wùñ ɣɣmi samaa kɔkɔ nimiin. Bi dāa kaãn̄ ki kpēēyee, an sá animikpaan ní bi n̄n dūu dá takaldab gbanti.

²⁰Mín̄ ní ti-Dindaan ɔti gb̄tìi an kɔkɔ ki báãn̄ inyaan mpɔn̄.

²¹Tìh̄n jítèe, ní Pɔɔl bíi màkà yii u dàá dī Maseeduaan n̄n Akaayi pu kí cù Jeerusaleem. U lī mimmee, ní ki bí yii, u yaa bàñ niinee, see ú cù Room mun.

²²Ní u dū binib bili bin n̄n bí u-cee ki tútuñ-uee, Tiimootee n̄n Eerasti, ki dūu tú Maseeduaan. Ní ùh̄n u-ba n̄n gb̄ntìi kāl̄ Asii tɩŋkin fiii.

²³Ti-Dindaan ɔti puee ní ɣyunti gbanti bi yāntì dipɔɔmaldi kó Eefeesi tɩŋkin.

- 24**Di sá yii uninja ubo n̄n bí, bi ȳn-u Deemeetriyusi. Kijapaayee n̄n cáá tikúti ki móò ñwaadibiyaamu ki cáá nánt̄n̄ diwaal Aateemiisi diiku, ki n̄n t̄i u-t̄ont̄onliibi bí mun n̄ n̄n ñáān ki k̄ánt̄i ipaati tiñan.
- 25**Ní u kp̄afi u-t̄ont̄onliibi n̄ bin k̄ok̄o péē t̄ūn an tunde, ní ki bí-bi yii: “Ti-yab, kee, ni-k̄ok̄o nyí yii ti-tundi nee di ȳi ti-jimaa!”
- 26**Kee, ni ká ki gb̄l̄ Asii timmu k̄ok̄on, an kaa sá Efeesi ñman̄ñma, P̄ool gbanti n̄n ñún ki dáalín binib tikpil ki ḡiñn̄i u-jandi pueeyaa! Ní ki cáá yii, inimb̄oti in binib d̄u bi-ñalii ki ñée kaa sá inimb̄oti.
- 27**An sá mbusu ní, kun puee an dàá ȳant̄i baa làá n̄n ḡit̄i t̄o ti-tundi nee. Ali gba, baa d̄aa ḡit̄i d̄u diwaakpaandi Aateemiisi diiku kí ȳiñ t̄iba, ní diwaakpaandi gbanti ñn Efeesi tiñki n̄ duulnya timmu k̄ok̄o nóoyee dàá d̄aa ñá fam!”
- 28**Bi gb̄l̄ an b̄otee, ní ki f̄õõ aṅuu, ní ki k̄in̄ ki b̄í t̄at̄i yii: “Efeesi yab waal Aateemiisi di sá diwaakpaandi!”
- 29**Niinee ní dip̄ōbiildi k̄o kit̄iñ k̄ok̄on. Ní bi cúú Maseeduaan yab Gaayusi n̄n Aristaaki bin n̄n P̄ool n̄n ñ̄ot̄ée, ki ȳõn̄-bi ki cáá c̄ūnn̄i laakin samaa n̄n kp̄áf̄ee.
- 30**P̄ool bàà n̄n là kí c̄ū niin samaa cee, ní Kriisitoo yab ȳi.
- 31**Ali u-b̄ōbi biba bin n̄n sá Efeesi kp̄ilibee n̄n túnn̄i u-cee, bí gb̄aam̄-u ú taa d̄aañ samaayee kansikin.
- 32**Dikpafil gbanti poonee, biba n̄n t̄at̄i ki s̄ōn̄ t̄iba, ní biba mun ñúb̄ t̄iba. An ñá fik̄ilfik̄il, ní binib tikpil kaa kp̄aā nyí kun pu ní bi baasii kp̄áf̄ee.
- 33**Kunipaauee kansikinee biba n̄n c̄ūti ká Aleeksandi, ní Juuda yab téé-u ki nȳant̄iñ ú s̄ōn̄. Ní Aleeksandi ȳõn̄ ñ̄al ki téefi-bi bí ñm̄l̄ ú bàà s̄ōn̄ n̄n samaa.
- 34**Ama bi n̄n d̄aa d̄u b̄eè yii u sá Ujuudajee, ní bi-k̄ok̄o kp̄afi ki t̄at̄i dicilpu ali tikúmon̄ tili nȳok̄om, ní ki cáá yii: “Efeesi yab waal Aateemiisi di sá diwaakpaandi!”
- 35**Niinee ní ukpil ubo ȳant̄i samaa ñm̄l̄, ní u bí yii: “Efeesi yab, ñma di kaa nyí yii Efeesi tiñki yab di kp̄è diwaakpaandi Aateemiisi ñn nȳann̄i yilpu ki lít̄e n̄n di-diiku?”
- 36**Ubo kaa ñūn̄ kí kp̄akaan̄ an b̄oti. M̄in̄ puee, k̄al̄maan soooo, taa j̄ik̄imaan̄ tib̄oti nee pu.
- 37**Binib bin ni cáān nee, baa ñá digan̄gam ubo kuwaadiin, kaa ti s̄i ti-waal mun.
- 38**M̄in̄ puee, Deemeetriyusi n̄n bit̄ont̄onliibi bin bí u-ceedee, ubo yaa ñá-bi tibee, iwiin in bi s̄ōn̄ tib̄otee bí, bib̄osoonliibi mun bí! Bí ȳiñ t̄ob̄ ibeeyiin kí s̄ōn̄.
- 39**An yaa tí sá bikpilib b̄otaaa, ní bí kp̄afi kí kp̄è, kii bi n̄n péēñáān puee.
- 40**Ama tin b̄aañ ñn̄ neeyee dàá ȳant̄i bí li yii ti là kí b̄iñ̄l̄ ḡomina. Di sá yii taa ñūn̄ kí li kí d̄ak̄a kun pu ní ti kp̄afi dooyee taapu.”
- 41**U l̄i mimmee, ní ki bí yii bàà ñma n̄n k̄ūn̄.

Atuun 20

¹Fikilfikilee jítèe, ní Pɔɔl yíín Kriisitoo yab, ki tī-bi kunyannyaau, ní ki kāaṅ-bi, ní ki yíkì bi-kansikin ki búntì Maseeduaan.

²U dī Maseeduaan tɪngbammun, ki sòoṅ nì Kriisitoo yab ki sánkí-bi tikpil ki wāatì ní ki nín bàṅ Greeki tɪŋkin.

³U nìn ḡá niin iŋmal ita ní. D̄yunti ḡun u bóntì ki dàá kó meela kí n̄n cá Siiriiyee, ní u bée yii Juuda yab sòoṅ ki bóntì nsambiyaamu mun pu bi dàá dī kí kpò-uee. Niinee ní u fātì dūu dīn Maseeduaan pu.

⁴Bin nìn nóó-uee di sá: Sɔpatee Piirusi jipɔɔn un nìn sá Beereeyee, Aristaaki nì Seekundusi, bìn sá Teesaalooniiki yab, Gaayusi un sá Deebee, nì Tiimootee, Tiisiiki nì Troofiim, bìn nyánní Asii.

⁵Bìn kɔkɔ nìn l̄ntì ki cūti cītì-ti Troowasi.

⁶Iwiin in poon Juuda yab ḡmóò kpɔnɔb bin baa ḡá ḡkpɔnɔnyɔkɔee boonee, timbi kónní meela ki yíkì Fiiliipi, ki ḡá iwiin iŋmoo ní ki nín bàṅ bi-cee Troowasi, ní ki ḡá iwiin iluli niin.

⁷Kinyɔḡ wimpeepeekaṅu dalee, ti nìn kpáfí kí jī ti-Dindaan jikaati, ní Pɔɔl kí kíl ki bī sòoṅ nì bin kpáfí niinee. U nìn sòoṅ ki yúntì tikpil, ali kunyataasiiu tikúti saalaa nì tili, kun puee an nìn sá kutaa ṅ wúntí ú yíkì dal ní.

⁸Fitilab nìn wīkí diditɔntɔkɔl din poon ti nìn kpáfèe ni tikpil.

⁹Ní unaacimpɔɔn ubɔ nìn bí niin, bi yī-u Eetiiki, u nìn kā diditɔntɔkɔl tɔkɔlau nyɔɔgbandi pu. D̄yunti ḡun Pɔɔl gbíntii bī sòoṅ nì bi ki cée, ní ḡgeem dómiín ki cúú-u. U bī ḡeèṅ tikpil tikpilee, ní ki dāa kpáā nyánní diditɔntɔkɔl yilpu kuditataatiiu poon ki líti kitiḡ. Bi péeyɔḡ-uee, u kp̄ ní.

¹⁰Niinee ní Pɔɔl kpákatiṅ ki b̄oṅ ki ȳoṅ-u ní ki bí yii: “Ni-pɔbilih ṅ taa mál, kun puee u-Fām dáá bí!”

¹¹Ní u fātii nín jóm ki cūti yākati kpɔnɔb bi ḡmó, ní u fātii tí kí kíl ki bī sòoṅ nì bi ali kutaa nì ku-wuntil, ní boonee u dāa nín yíkì.

¹²Ní bi fātii ḡiṅ unaacimpɔɔnee u-dumpu nì alaafiya, ní an nìn mókìṅ báa ḡma tikpil.

¹³Ní timbi kó meela ki l̄ntì kí cúú kíntí Pɔɔl Asɔsi tɪŋkin, kii u nín nìn péēsòoṅ puee, kun puee úṅ dàá dāa còomiín ataa pu ní.

¹⁴U bāaṅ ki ká-ti Asɔsee, ní ti ȳoṅ-u ki nín cáā cá Miitileen.

¹⁵Niinee ní ti nín nìkì. Ali kutaa nì ku-wuntillee ní ti bàṅ Kiyoo. Ní ku tí wúntèe ní ti bàṅ Samosi, ní ku gītí tí wúntèe ní ti nín bàṅ Miilee.

¹⁶Pɔɔl nìn lēeyii u là kí ḡóntí Eefeesi kí taa bīl̄ ḡyunti kitiḡ gbantin, m̄iṅ pu ní u nìn túl dicancaal, án ḡá-u malaa u yaa ḡṅ ṅ ȳmā kí n̄n bí Jeerusaleem Pantikooti wiinḡu dal.

- 17Pɔɔl bí Miileeyee, ní ki tú bí cù Efeesi kí yíín niin Kriisitoo nikitil kpilib.
- 18Bi bāán u-ceeyee, ní u bí-bi yii: “Kee, nimbi ni-ba nyí doooo ηwimpeekaa ηun m kóoñ Asii tiηkinee m nín bí nì ni baabadal miηyeeyaa!
- 19Mín ní m nìn sìntìn m-ba ki tūn ti-Dindaan tundi nì nnyinnyim, ki bí falaabi kansikin kun puee Juuda yab nìn nyàab isan kí kpò-mi.
- 20Mín ní ni nyí yii maa nìn bál tin ηūn kí tūtuñ-nee báà tiba, ki sòoñ ki dàkà-ni Unimbɔti ɔti laakin binib kpáfée ki kpáañ ni-dumpui.
- 21M nìn sáηkí Juuda yab ki kpáañ Greeki yab tiηan, yii bí fá ikpiti, kí fɔɔ ti-Dindaan Yeesu kí kíkí kí nɔ́ó Unimbɔti.
- 22“Kɔηkɔnnee, m dàá nīn cá Jeerusaleem dee kii Unimbɔti Fām nín bí m ηá puee, ama kaa nyí tin dàá ηá-mi niinee,
- 23asee ntimu mun kɔkɔ poon m jítée ní Unimbɔti Fām tükù-mi yii sarka nì diniminaamandi dɔ ki cí-mi.
- 24Ama, man maηfal ɔti kaa páb-mi, ali kii an kaa sá-mi tiwammɔntiil tibee ní. Tin di páb-mee di sá m ηá ditundi din m fɔɔ ti-Dindaan ceeyee: dín di sá m sòoñ dinyɔɔbummɔndi kí tükù binib dineendi din Unimbɔti cáá ti-puee.
- 25“Mín puee, nimbi bin cee m jítì ki sòoñ Unimbɔti beel pu ɔtee, kɔηkɔnnee m nyí yii naa làá ti ká-mi.
- 26An di yì-tì ní m tükù-ni an ɔti dín kí síiñ, boonee, ubɔ yaa láá gítì wáηkèe, an kaa dāa gítì sá m-cee,
- 27kun puee m tükù-ni kaa bál-ni Unimbɔti nín là kí dāá ηá min miηyee kɔkɔ.
- 28Mín puee, ní kpèèmaan ni-ba tiηan, kí kpèèmaan dinikitil din pu Unimbɔti Fām lēē-ni yii ní nīn sá bikpilibee, kí kpòotì Unimbɔti nikitil din u dū u-ba fatikuu ki dée tiηan.
- 29M nyí yii, m-kpátam boonee, binib dàá dāá kóoñ ni-kansikin. Baa làá dāá tàañ dinikitil gbanti, ali kii agbiηgbil nín cáá ntoom, kaa tàantí dipikitil puee.
- 30Mín ní ni-kansikin bininjab biba mun dàá dāá yòoñ tinyimɔmbɔti kí sòoñ kí ηmàtìn Kriisitoo yab biba n nīn nɔ́ó-bi.
- 31Mín puee, ní nīn nyímaan nì ni-ba kí nīn téetì m nín nìn sáηkí-ni pu nì nnyinnyim ηwiíñ pu nì kunyeeu ali abin atee.
- 32“Kɔηkɔnnee, m dū-ni ki ηá Unimbɔti ηaan, ní nīn ηúb u-nyɔɔbummɔntiilee, dín di cáá mpon kí yàntì ní bée Unimbɔti ɔti tikpil kí dāá fɔɔ ipaati in u síiñ kí tī bin kɔkɔ sá u-yabee.
- 33Ni nyí yii man kaa nìn là ubɔ nimiliη, kaa nìn là ubɔ mun ɔkutìl.
- 34Nimbi ni-ba nìn nyí yii nì m-ηalii in bí nee ní m nìn cáā tūn ditundi ní man nì bin nìn nɔ́óyee jīn.

³⁵M dàkā-ni ni-kòkò n bée yii ni máan kí n̄n t̄n ditundi tikpil kí ñmā kí t̄tun biwofib, kí n̄n téetí ti-Dindaan Yeesu u-ba n̄n n̄n l̄i dinyɔɔbundi dinyee, yii: 'Á p̄o tiwane m̄o kí jítiñ bí p̄o-si.' “

³⁶P̄oal l̄i mín kí d̄òyee, ní kí gbān, ní u n̄i bi kòkò bí m̄e.

³⁷Niinee ní bi-kòkò bí s̄n, ní kí d̄u bi-ɣalii kí kp̄al̄ P̄oal.

³⁸Tin n̄n k̄n-bi kunimbaauee di sá u n̄n l̄i yii dalba dalba baa làá ti ká-uee. Niinee ní bi c̄eñ-u ali meela taapu.

Atuun 21

¹Timbi n̄i bi d̄a cúu yākatì t̄binee, ní timbi kó meela kí túl dicancaal kí búntì K̄oosi, ní ku w̄ntèe ní ti bàñ Roodi. Niinee ní ti c̄atì Patara.

²Ní kí ká meela un cá Feenisiiyee, ní ti kó ùn kí búntì.

³Ti tin gb̄itì Siipil tiŋki kin nnyim m̄antì kí túee ní kí d̄u-kí kí fá ñɔɔŋan p̄u, ní kí d̄u d̄i Siirii watil p̄u, ní kí tin bàñ Tiir, laakin meela dàá tàkatì u-wantee.

⁴Niin ní ti ká Kriisitoo yab biba, ní ti k̄al̄ iwiin iluli bi-cee. Unimb̄oti F̄am ȳantì bi b̄e kí t̄k̄u P̄oal yii ú taa j̄m̄ Jeerusaleem.

⁵Ti n̄n k̄al̄ iwiin gbanti d̄ò ti dàá ȳk̄iñee, bi n̄i bi-nimpoobi n̄i bi-biyaamu kòkò c̄eñ-n̄i-ti ali kí nȳantì kitiŋ kpaanceetiŋu. Niinee ní ti gbān dibuŋbandi kí m̄e.

⁶Ti m̄eeki d̄òyee, ní kí k̄a t̄b, ní timbi búntì kí c̄ú kó meela, ní bí mun n̄n f̄at̄i bi-dumpui.

⁷Ní ti ȳk̄i Tiir kí c̄utì T̄leemayisi, kí c̄utì j̄aam̄ nnabiyaamu, kí k̄al̄ bi-cee ñwiin ñub̄o. Niin ní ti k̄untì dim̄oal pu saŋkindi.

⁸Kutaa w̄ntèe ní ti ȳk̄i niin kí bàñ Seesaaree, ní kí kó Fiiliipi dumpu. U sá un s̄oñ Yeesu nyɔɔbumm̄oñdi kí sá binib biluli bin bi n̄n l̄ēb̄i n̄n yākatì tijinee kansikin ub̄ee.

⁹U n̄n cáá bisap̄ombi binaa bin kaa nyí bininjabee, bi n̄n sá Unimb̄oti b̄onaatiliibi.

¹⁰Ti n̄n k̄al̄ u-cee kí ȳuntì f̄iii, ní Unimb̄oti b̄onaatiliu ub̄o, bi ȳi-u Agaabusi, nȳann̄i Juudee kí d̄omiñ ti-cee.

¹¹Kijapaayee ȳoñ P̄oal dambalau ní kí d̄u b̄oób u-taani n̄i u-ɣalii, ní kí bí yii: “P̄ilfimaan Unimb̄oti F̄am n̄n l̄i puee! Uninja un di yaa ȳi dambala neeyee, Juuda yab dàá b̄oób udaan mín ní Jeerusaleem, ní kí d̄u-u kí t̄i bin kaa sá Juuda yabee.”

¹²Ti gb̄il̄ mimmee, ní timbi n̄i laakin ti k̄òyee yab bí gb̄aam̄ P̄oal yii ú taa c̄u Jeerusaleem.

¹³Ní P̄oal bí-ti yii: “Ba ñá ní ni s̄n kí bíil̄ m-p̄obil mín? B̄aà bi yaa làá b̄oób-mi kí kp̄o-mi gba Jeerusaleem niin ti-Dindaan Yeesu puɔɔ, maa móti!”

- 14Ti lī-u tikoko kaa ḡún-uee, ní ti cāntì-u, ní ki bí-u yii: “Too, ti-Dindaan yaa là miḡyee, án ḡá mín!”
- 15Iwiin gbanti boonee, ní ti bóntì ki nín jóm Jeerusaleem.
- 16Kriisitoo yab bin bí Seesaareeyee biba céeñní-ti ki cáā cūnni kijapaai kin bi nìn yīi Minaasonee dumpu. U nìn sá Siipil, ki nìn fṵṵ ki kíf dooooyee, ún cee ní bi nìn kón-ti
- 17Ti bàñ Jeerusaleemee, ní nnabiyaamu fṵṵ-ti nì dipṵṵpindi.
- 18Kutaa wúntèe ní ti nì Pṵṵl búntì Jaaki cee. Niin ní bikpilib kṵkṵ nìn kpáfì.
- 19U jáam-bi ki dóoyee, ní ki bíi sòòn ki bóbití-bi Unimbṵti nín dī u-pu ki túñ ditundi dīn bin kaa sá Juuda yabee kansikinee.
- 20Bi gbīl mimmee, ní ki nyóḡki Unimbṵti. Ní bi bí-u yii “Ti-nabiki, a ká Juuda yab kansikin binib kutukub tikpil nín kpántì Kriisitoo yab, bi-kṵkṵ ḡúb Mooisi marab tiḡan pueeyaa!
- 21Di sá bi tükū-bi yii a dàkà Juuda yab bin kòò binicambi kansikinee yii bí fá Mooisi marab kí taa ti nín ḡífí bi-biyaamu, kí fá ti-naanjab koobiliḡ mun.
- 22Bàà an ḡá pu bi-kṵkṵ dàá béé yii a dómiñ. Mimmee, ti dàá ḡá mana kṵḡkṵṵṵ?
- 23Mín puee, ti dàá tükù-si a nín dàá ḡá puee. Bininjab binaa biba bí ti-kansikin doo bin pṵṵṵ, kii Mooisi marau nín lī puee bí taa kòòl-bi bí nīn kíñ ki kòò tiwan tiba ali kí nīn cí ḡyunti ḡubṵ kí dāá nín kòotī.
- 24Yòòñ-bi kí cù si nì bi kṵkṵ n ḡá saraabi kí kòotī-bi, kí pà animil bí kòòl-bi. Niinee ní bàà ḡma dàá béé yii tin ní bi sòòn a-puee kaa sá ibaamṵn, ní kí ká yii sisi aba bí kii bin dī marabee nín bí puee.
- 25An yaa kíñ bin kaa sá Juuda yab ki fṵṵ Yeesu ki kíiyee, ti nìn ḡmāñ takalda ki tükū-bi yii timbi kpēēyīi an ḡāñ bí taa ti ḡmó tinan tin bi tṵotì awaayee, kí taa ḡmó fatiku nì tiwan tin baa lāntì fatiku nyáñee, kí taa ḡá tilaakpaal mun.”
- 26Kutaa wúntèe ní Pṵṵl yṵṵṵ bininjabee, ní u nì bi cūti ki lēekì saraabi, ní ki kó Kunimbṵtidiin. Niin ní Pṵṵl yóṵṵ ḡwiin ḡun bi dàá kòotēe nì bàà ḡma nín dàá dāá cáāñ saraabi bin biḡyee.
- 27Ḍwinluluútee cá dikuntilee, ní Juuda yab biba bin nyáñní Asiyyee ká Pṵṵl Kunimbṵtidiin. Niinee ní bi fiiñ bàà ḡma landṵkṵḡu ḡá mbaanti, ní bi cúú Pṵṵl.
- 28Bi cúú-uee, ní ki kíñ ki bíi tátí yii: “Israyeel yab, jòommaan-ti! Kpèèmaan, uninjee dee un cá an kṵkṵ ki sòòn bàà ḡma cee ki bííl Israyeel yab yindi nì Mooisi marab nì Kunimbṵtidiyyee. Ali gba, u yāntì bin kaa sá Juuda yabee kó Kunimbṵtidiin, ki bííl circir kṵḡkṵṵṵ gbanti!”
- 29(Kun yì-tèe di sá, bi nìn ká u nì Troofiim un sá Eefeesee kitiḡin, ní bi dākafì yii Pṵṵl nìn cáá-u ki kón Kunimbṵtidiin.)

³⁰Niin ní kitimmɔŋee f̄ɔ̄ ki píl dàiii, ní binib nyánní ajan kɔkɔ ki dómiín ki cúú Pɔɔl ki dáál-u ki nyánti Kunimbɔtidiin, ní ki dū mpunyɔmu ki p̄iñ dicilpu niin.

³¹Bi nín nín péēnyàab kí kpò-uee puee, an p̄tì kpááā péēbàñ Room yab soojakpikpaanu, yii fikìlfikil ubɔ kóón Jeerusaleem tiŋki kɔkɔn.

³²Dicilpu niinee, kijapaayee ȳɔñ soojab ki kpáañ bi-kpilil biba ki sán ki nín cá samaayee cee. Bi dāa ká usoojakpilee nì u-yab páañnee, ní bi gbēēñ, kaa ti bī gbáa Pɔɔl.

³³Niinee ní Room yab soojakpikpaanu dāatìi cúú Pɔɔl, ní ki bí yii bí dū ikusaka ili kí bóob-u, ní u bālfì-bi un Pɔɔl sée nì tin u ŋée.

³⁴Kunipaau kansikinee, biba tátí ki l̄i tiba, ní bin kíñee mun cáá tiba, an di nín yì-tì waa nín ŋún ki bée mbaamɔn, ní u bí yii bí cáá-u kí cunnì soojab dumpu.

³⁵Dyunti ŋun bi bāañ akɔl puee, samaayee kɔkɔ nín páb Pɔɔl mpɔn puee ní soojab nín ȳɔñ-u ki túñ, kí mōtì u-pu.

³⁶Kun puee binib nín wīkí tikpil ki pá u-boon ki tátí yii bí kpò-u.

³⁷Bi tóób kí kó soojab dumpuee, ní Pɔɔl bālfì usoojakpikpaan yii: “A kíikí m̄ sòòñ nì si tibiaa?” Ní ukpilee fātìi bālfì-u yii: “A gbìl greeki sooniaaa?”

³⁸Sii di kaa sá Ueejipitija un là kí bīl̄ kitiŋ yaadal nee, ki yíkii ȳɔñ diganḡandambi kutukub binaa ki cunnì kupɔɔneeeee?”

³⁹Ní Pɔɔl kíi-u yii: “Man sá Ujuudaja ní, ní bi màl̄-mi Taarsi, Siiliisii tiŋkpaanḡin. M baasii sá kitiŋkpaanḡi tindambiki ní, m gbāam̄-si, p̄-mi n̄san m̄ sòòñ nì samaa!”

⁴⁰Niinee ní usoojakpikpaaneee p̄u-u mpaan. Ní Pɔɔl yúl̄ akɔl pu ki ȳɔñ u-ŋal ki téefi samaa. Niinee ní báà ŋma ŋmíl̄ f̄ɔŋf̄ɔŋ. Ní u ȳɔñ dinyɔɔbundi ki bī sòòñ nì samaa nì Eebru soonin, yii:

Atuun 22

¹“M-baabi nì m-nabiyaamu, p̄l̄fimaan kɔŋkɔnnee tibɔti tin m cáá kí tükù-nee!”

²Bi nín gbīl̄ u bī sòòñ nì bi Eebru sooniee, ní bi mōtìi ŋmíl̄ díkídiki. Ní Pɔɔl bí-bi yii:

³“Man sá Ujuudaja ní, bi màl̄-mi Taarsi Siiliisii tiŋkin, ama kitiŋ nee poon ní m kāl̄ ki wíiñ. Gamaliyeel cee ní m nín bí ki bifi ti-naanjab marab kɔkɔ, ní ki nín cáá dipɔɔndi Unimbɔti bɔtin tiŋan, kii dín wiiŋgu ni mun nín cáá dipɔɔndi pu nan ní.

⁴M nín páb bin nín nóó ti-Dindaan saŋŋuee, ali ki kūū biba, ki cútì bininjab nì binimpoobi ki tó sarkan.

⁵Usaraanḡpil nì bibɔsooŋkpilil kɔkɔ nín kánti m nín nín ŋáañ puee, bín di ŋūñ kí tükù-ni mbaamɔn. Bín gba di nín tī-mi takaldab m cáá tī Juuda yab kpilil bin kóò Damaasee kí ŋmā kí cúú Kriisitoo yab bin bí niinee, kí bóobiñ-bi ikusaka kí cáañ Jeerusaleem bí dáál bi-tafaliŋ.”

- ⁶“Ki cá kuwiŋkuluuee, m nìn bí nsanni ki tóób Damaasi. Dicilpu niinee ní ŋwalfikpaŋkpaan ŋubɔ nyánní yilpu ki dómiín ki mǎntii tú-mi ki wǎl nyákányaka,
- ⁷ní m líti kitiŋ. Niinee ní m gbíl nneen ŋubɔ bí li-mi yii: 'Sɔɔl, Sɔɔl, ba ŋá ní a páb-mi mín?’
- ⁸Ní m fǎtì bǎlfi-u yii: 'An sá sii ŋma, m-Dindaan?' Ní u kíí-mi yii: 'An sá man Yeesu Naasaareeti yɔu un a pábee.’
- ⁹Bin nìn bí m-ceeyee nìn ká ŋwalfi, ama ní kaa nìn nín gbíl nneen ŋun sòoñ nì mee pu.
- ¹⁰Niinee ní m bí yii: 'Mim mee, m dàá ŋá mana, m-Dindaan?' Ní ti-Dindaan bí-mi yii: 'Yíkii nīn cá Damaasi. Niin ní bi dàá tin tükù-si tin tin Unimbɔti bí yii á ŋée.’
- ¹¹Ŋwalfee nín nìn jīliŋki m-nimiliŋ puee, maa nìn gítī wǎl, ní man nì bin nìn nóoyee cúú m-ŋal ki dǎtì-mi ki cūnnì Damaasi.
- ¹²“Uninja ubɔ nìn bí niin, bi yī-u Ananiyasi. U nìn néen Unimbɔti ki nóó ti-marab deede, ní Juuda yab bin nìn kòò Damaasee kòkò nìn pàkà-u.
- ¹³Kijapaayee dómiín ki yúl m-cee, ní ki bí yii: 'M-nabiki Sɔɔl, ŋúbitì a-nimiliŋ!' Kpalaa niinee, ní m cúú ŋúbitì, ní ki wǎl-u.
- ¹⁴Ní u bí-mi yii: 'Ti-naanjab Nimbɔtiuee di lēē-si dooooyee ki yóoñ yii á bée u nín là puee kí ká Deedeedaan un u lēēki túnnée kí gbíl u-neen.
- ¹⁵Sii di dàá nīn sá u-seeraleeliu, kí sòoñ binib kòkò nimiin tin tin a kée nì tin a gbīlee.
- ¹⁶Mín puee ba di gítī ŋúb-si kɔŋkɔnnee? Yíkīm kí kúuñ kí yíiñ ti-Dindaan bí fàl-si Unimbɔti nyim á ká a-kpitii pōtam.’ “
- ¹⁷Pɔɔl nīkī ki lī yii: “M dāa fǎtīn Jeerusaleeme, ní ki kó Kunimbɔtidiin ki bí mēe Unimbɔtee ní an fītì-mi ní m wǎl ti-Dindaan.
- ¹⁸Ní u tükū-mi yii: 'Nyā Jeerusaleem malaa, kun puee baa làá fǔǔ tiboti tin a bí sòoñ m-puee kí kíí.’
- ¹⁹Ní m fǎtì kíí-u yii: 'Ti-Dindaan, kee, bīn bi-ba nyí-mi, m nín nìn yīiñ Jeerusaleem akpafidiin ni ki cútí bin nóó-see ki gbàà-bi ki cáā tòó sarkeeyaa!
- ²⁰Kee, bi nyí, daliŋkin bi bí kù a-seeraleeliu Eetiyeenee, man di nìn bí niin ki bí yii u máaŋ ŋkúm, ní ki fǔǔ bin bí kù-uee bókutiŋ ki ŋúbeeyaa!’
- ²¹Ama ní u bí-mi yii: 'Nīn cá. Bin bí ndan kaa sá Juuda yabee cee ní m tūn-si!’ “
- ²²Samaayee pílfīn Pɔɔl ki tin sāa laakin u bí yii ti-Dindaan tú-u bin kaa sá Juuda yabee ceeyee. Niinee ní bi yíkì ki bí tátì yii: “Bí kpòmaan uninja nee, bí taa taañ-u, waa máaŋ kí nīn bí!”
- ²³Niinee ní bi bí pūlfī ki pèetī bi-bókutiŋ ki fīntí, ní ki jáfī ntam ki tòó kutaa.
- ²⁴Ní usoojakpikpaanee bí yii bí cáá Pɔɔl kí kòñ soojab dumpu kí gbá-u anaalab kí bǎlfi-u kun di yì-tì ní samaa kòkò tátì u-pu mim mee.

²⁵Bi bóob-u ki dód ki dàá gbá-uee, ní Pɔɔl bí usoojakpil un nìn bí niinee yii: “An máàn ní gbá Room tindambiki un bɔti gba baa láá sòñeeeee?”

²⁶Ukpilee gbīl an nyɔɔbundee, ní ki cūti tükū usoojakpikpaanee yii: “Á nīn nyí nì a-ba! Kijapaayee sá Room tindambiki ní.”

²⁷Niinee ní usoojakpikpaanee dómín ki bālfí Pɔɔl yii: “A sá Room tindambiki níin?” Ní Pɔɔl kí-u yii: “Iiin.”

²⁸Niinee ní usoojakpikpaanee bí yii: “Man pān animil tikpil ní ki nín kpántì Room tindambiki.” Ní Pɔɔl fātii bí-u yii: “Bi péēmāl-mee m sá Room tindambiki ní.”

²⁹Kpalaayee, bin bàà làá gbá-u kí yàntì ú sòñee kākati ki wāati-u. Usoojakpikpaanee nín dāa bée yii Pɔɔl sá Room tindambikee, ní tifaandi kó ú mun u-ba, kun puee u nìn dū ikusaka ní ki bóob-u.

³⁰Ussoojakpikpaanee là kí bée kun di yì-tì ní Juuda yab ñúb Pɔɔlee. An pu ní kutaa wúntèe u búti-u ikusaka ní ki bí yii bisaraanjakpil nì bibosoonliibi kòkò ñ kpāfi. Bi kpáfèe, ní u cáan Pɔɔl ki yóon bi-nimiin.

Atuun 23

¹Ní Pɔɔl dū u-nimikpeenu ki báan bikpilibe pu, ní ki bí-bi yii: “M-nabiyaamu, m nyí yii m ñaàn tin kòkòwoooo m máàn kí ñá kí tī Unimbotee nì dipòbil diba, ki dāa sāa dīn wiññu nee.”

²Niinee ní usaraanjakpil, un bi yí Ananiyasee, bí bin yú ki pīl-uee yii bí cūú fáá u-nyòkò.

³Ní Pɔɔl bí yii: “Unimboti dàá dāá fáá si mun, upoonnyɔñfiti! Sii ká ki cáá marab ki sòñ man bɔti, ki yintì marab gbanti a-ba ní ki cáá yii bí gbá mama!”

⁴Ní bin nìn yú ki kól Pɔɔlee bí-u yii: “Mimnee, a bī sī Unimboti saraanjakpiliu deeyaa!”

⁵Ní Pɔɔl fātii kí-bi yii: “M-nabiyaamu, maa nyí yii an sá usaraanjakpil. An yaa sá fam, maa bàà sòñ mín, kun puee Unimboti takaldau poon tükù-ti yii: 'A taa sòñ ni-bòtiu bɔfam.' “

⁶Pɔɔl nìn nyí yii bibosoonliibee jandi diba sá Sodusab ní dijandi diba mun sá Fariisab. Mín pu ní u nìn téen samaayee nimiin yii: “M-nabiyaamu, man mun sá Fariisa ní, Ufariisaja di māl-mi. Dimákal din m cáá bitaṅkpiibi fikititam puee di yì-tì ní bi cáan-mi doo kí sòñ m-bɔti!”

⁷U lī mín ki dódoyee, ní kunikpɔṅkpòkòu kó Sodusab nì Fariisab kansikin, ní samaa gbanti cūú yākatì tɔbin.

⁸(Di sá yii Sodusab, bìn bí yii bitaṅkpiibi gītī kpá kí dāá fikitī, Unimboti tūuni kpá, kinaṅ mun kpá, ama Fariisab, bìn bí yii tìn kòkò bí.)

- ⁹Niinee ní kujakpaan̄u jéetì bi-kansikin, ní bimaradakaliibi bin n̄n sá Fariisab jandi puee biba yíkì, kaa kíí, ki bí mótí yii: “Timbi kaa ká kijapaaí nee ḡá tiba. An yaa yíi, Unimbōti tūuḡu di dàá n̄n máan̄ ki sòōn̄ n̄ u.”
- ¹⁰Kunikp̄oḡkp̄oḡou mōt̄i p̄oḡkèe, ní usoojakpikpaan̄ f̄aḡki yii bí taa ḡee kí cúú P̄oḡ kí t̄ont̄i. Ní u yānt̄i soojab kp̄akat̄i cúú P̄oḡ ki nyānt̄i bi-kansikin, ki cáā cūnn̄i soojab dumpu.
- ¹¹An nyeekuee, ti-Dindaan dóm̄in̄ P̄oḡ cee, ní ki bí-u yii: “P̄oḡn̄ a-ba! Kii a n̄n̄ sòōn̄ m-pu Jeerusaleem doo puee, án̄ máan̄ á cù Room mun kí tin sòōn̄ m-pu niin̄ mbaantiim̄ m̄in̄.”
- ¹²Kutaa w̄unt̄èe ní Juuda yab kp̄af̄i kinyoḡo ki p̄ūt̄i Unimbōti yii, bi yaa kaa k̄ū P̄oḡ, baa làá jāaa kaa làá nyò mun.
- ¹³Bin n̄n̄ kp̄af̄i kinyoḡo ki p̄ūt̄i mimmee n̄n̄ jíti binib̄ imuḡku ili pu.
- ¹⁴Ní bi cūt̄i ká bisaraaḡk̄p̄ilib̄ n̄ bikp̄ilib̄, ní ki bí-bi yii: “Timbi baasii p̄ūt̄i ki t̄int̄i yii, ti yaa kaa k̄ū P̄oḡ, tí taa dáka tiba.
- ¹⁵M̄in̄ puee, nimbi n̄ bib̄soonliibi k̄oḡo, ní m̄èe usoojakpikpaan̄ ú cáan̄-ni P̄oḡ, yii nimbi là kí m̄ot̄i b̄alfi-u tin páaa ní u baasii ḡee. Mimmee, timbi ḡ b̄ont̄i, bi yaa cáá-u ki t̄obiḡee, timbi ḡ k̄int̄i kí kp̄o-u!”
- ¹⁶Niinee, P̄oḡ niisal biki gb̄l̄ bi n̄n̄ kp̄af̄i ki sòōn̄ tiḡyee, ní u búnt̄i soojab dumpu ki kó ki t̄uk̄u P̄oḡ tin jíte.
- ¹⁷Ní P̄oḡ yíin̄ bisoojakp̄ilibee ubo ní ki bí-u yii: “Cáá kinaacimp̄ombiki nee kí cūnn̄i usoojakpikpaan̄ cee, kun puee u cáá tiba ki là kí t̄uk̄u-u.”
- ¹⁸Ukp̄ilee ȳoḡn̄-u ki cáá-u ki b̄an̄ usoojakpikpaanee cee, ní ki bí yii: “Usarkadaan P̄oḡ di yíin̄-mi ki gb̄am̄ yii m̄ cáan̄-si kinaacimp̄ombiki nee, u cáá tiba ki dàá t̄uk̄u-si.”
- ¹⁹Niinee ní usoojakpikpaanee cúú kinaacimp̄ombikee ḡal ki kp̄aaā k̄akat̄i ḡkpaanceeti, ní ki bí-u yii “Tilati ní a cáan̄ ní?”
- ²⁰Ní u kíí-u yii: “Juuda yab kp̄af̄i kí m̄èe-si yii á cáan̄-bi P̄oḡ bib̄sooḡk̄p̄ilib̄ nimiin̄, bi là kí ḡá kii bi dàá ḡit̄i m̄ot̄i b̄alfi-u tibōti tiba yamee.
- ²¹Á taa p̄ilfin̄-bi! Di sá yii bi-kansikin binib̄ imuḡku ili n̄ ipaa p̄ūt̄i yii, bi yaa kaa k̄ū P̄oḡ, b̄in̄ kaa làá jāaa, kaa làá nyò mun. Bi b̄ont̄i kí b̄al̄ kí c̄it̄i-u. M̄in̄ puee, bi k̄in̄ ki cí tin sii cááyee ní nee.”
- ²²Niinee, usoojakpikpaanee bí kinaacimp̄ombikee yii: “N̄in̄ k̄un̄. Á taa sòōn̄ ubo cee yii a t̄uk̄u-mi tibōti gbanti!”
- ²³Boonee ní usoojakpikpaanee yíin̄ bisoojakp̄ilib̄ bili, ní ki bí yii bí kp̄af̄i soojab kulaafaau n̄ soojab bin cáá itaamuee imuḡku ita n̄ saalaa, n̄ soojab bin tòó ḡkpaamuee mun kulaafaau, bí b̄ont̄i kí n̄n̄ cá Seesaaree tik̄úti tiwa kunyeeu nee,
- ²⁴kí nyàab̄ itaamu kí k̄aān̄i P̄oḡ, kí cáá-u kí b̄ann̄i ḡomina Feeliikisi cee n̄ alaafiya.

- ²⁵Ní usoojakpikpaanee ñmān takalda ki tī gōmina yii:
- ²⁶“Man Kloodi Liisiyasi di jáam m-kpiliu gōmina Feeliikisi.
- ²⁷Di sá yii Juuda yab di cúú uninja nee ki là kí kpò-u. M nín gbīl yii u sá Room tindambikee, ní man nì m-soojab cūti fōón-u.
- ²⁸M nìn là kí béé kun pu ní Juuda yab ñúb-u mimmee, ní m cáá-u ki cūnni bi-bōsooŋkpilib cee.
- ²⁹Niinee ní m ká yii bi bí yii u yīnti bi-marab, ama an kaa sá tiboti tin pu u máan ñkúmeeyaaa kaa tí máan sarka mun.
- ³⁰M nín dāa béè yii Juuda yab kpáfi ki nyàab isan kí kpò-uee puee, ní m dū-u ki tīín-si malaa, ní ki bí u-nannanliibi yii bí dāān kí yīín-u a-cee ibōsoon.”
- ³¹Soojabee lafun ñá u nín lī puee, ki yōon Pōol ki cáá-u ki bānni ali Antipatriisi kunyeeu gbanti.
- ³²Ku wúntèe ní soojab bin nìn cōom ataa puee nín gítiín, ní itaamu dambee kpāan Pōol ki cáā nín cá.
- ³³Bi bān Seesaareeyee, ní ki dū takalda ki tī gōmina, ní ki dū Pōol ki dākā-u.
- ³⁴Gōmina kàān takaldee ki dóoyee, ní ki bālfī Pōol yii u sá kitiŋ kilaka ní. Ní Pōol bí-u yii u sá Siiliisii. U béè mimmee,
- ³⁵ní ki bí yii: “Si nì bin kpákèe yaa láā bāānee á dāā sōon tin a cááyee m pīlfī.” Ní u bí yii bí cáá-u kí cūnni uboti Eeroodi dumpu.

Atuun 24

- ¹Iwiin ñmoo boonee ní usaraaŋakpil Ananiyasi bāān Seesaaree gōmina cee, u nì bikpilib biba nì ubōsooŋkpil ubō un bi yī Teertulusee, ki yīín Pōol ibeyiin.
- ²Bi yīín Pōol, ní Teertulusi kí kíl ki bī kàān tiboti yii: “Ukpiṁonti Feeliikisi, sii di yì ñgbansōŋfi ñun poon ti bí, an kaa kúntí nee. A-ciŋŋu pu ní a yānti kitiŋ kpánti ní ki ñáŋkì.
- ³Ti kánti a-ŋanti gbanti an kōkō nì an kōkō. Mīn puee, ti jáam-si tiŋan.
- ⁴Maa là kí bīl a-yuntiŋu tikpilee, an di yì-tì ní m mèé-si a-laŋaŋfitiiku puee á pīlfīn-ti fiii.
- ⁵Di sá yii timbi ká yii kijapaai nee sá unil un sá asaluu daanee. Ún di yì-tì ní fikìlfikil kó Juuda yab bin bí duulnya nee nee kōkō kansikin. Ún di sá Naasaareeti yab kitil^fd^ kpiliu ubō.
- ⁶U là gba yii ú bīl Kunimbōtidii, an pu ní timbi cúú-u. [Ti bàà mākaŋfi yii tí dī ti-marab pu kí dáal u-tafal.
- ⁷Ama ní usoojakpikpaan Liisiyasi dōmīn ki cúú-u ki fōō ti-ŋaan nì mpon,

⁸ní ki bí yii u nì bin kpákèè n̄ n̄n dòn s̄i-cee.] Mìn puee, sii a-ba yaa bālf̄i-u, a bétí kun pu ní ti ḡúb-uee.”

⁹Ní Juuda yab bí yii Teertulusi n̄n l̄i puee, mìn ní an sá.

¹⁰Boonee ní ḡomina pú P̄ol n̄san yii ú mun n̄ s̄on̄. Ní P̄ol ȳon̄ dinȳobundi ki bí yii: “M nyí yii doooo abin kupaau s̄éé ní a sá kitij̄ nee poon ub̄soonli. An puee n̄ dimákal poon ní m dàá s̄on̄ tin m cááyee a-nimiin.

¹¹Sii a-ba yaa bālf̄i gba, a dàá b̄éé yii an kaa láá b̄ān̄ iwiin saalaa n̄ ili m n̄n j̄om̄ Jeerusaleem kí nȳḡk̄i Unimb̄otee.

¹²Dalba dalba baa láá ká-mi Kunimb̄otidiin man n̄ ub̄o b̄í kpákà. Baa láá tí ká-mi m bí akpafidiinaan kitij̄ poon laaaba ki s̄on̄ ki ȳontí binib p̄obilij̄.

¹³Binib nee kaa ḡūn̄ kí dākà-si yii kun pu bi ḡúb-mee baasii s̄éé.

¹⁴N̄n̄ ibaam̄on̄ poon ní m s̄on̄ n̄ si nee, m n̄óó Yeesu saḡḡu ḡun̄ b̄in̄ ȳi yii ḡuaa ḡāñee, ní ki jáam̄ ti-naanjab Nimb̄otiu. Ama man nyí yii Mooisi n̄n̄ Unimb̄oti b̄onaatiliibi n̄n̄ ḡm̄ān̄ tin takalda poonee, an sá ibaam̄on̄,

¹⁵ki cáá dimákal Unimb̄oti pu, kii bí mun bi-ba n̄n̄ cáá dimákal u-pu puee, yii binim̄ontiibi n̄n̄ binikpitib̄ k̄ok̄o bí kí d̄āá fikit̄i ditaḡkpiilin.

¹⁶Mìn pu ní man bí ki p̄ōntí m-ba kí n̄n̄ sá unim̄onti Unimb̄oti nimiin n̄n̄ binib mun cee.

¹⁷“Maa n̄n̄ ḡit̄i bí Jeerusaleem abin̄kaaḡkaa aba poon. Boonee ní m f̄at̄i ḡit̄in̄, ki cáan̄ animil kí t̄ūtun̄ m-tij̄ki nib, kí kp̄āā ḡá saraabi.

¹⁸M ḡá akoobil ki d̄óo, Boonee ní ki b̄i ḡáan̄ saraabi gbanti Kunimb̄otidiin, ní bi b̄ān̄ ki ká-mi. Biba kaa n̄n̄ kp̄afi m-cee, fik̄ilfik̄il mun n̄n̄ kp̄á.

¹⁹Juuda yab bin k̄óō Asii ki n̄n̄ ká-mee di yaa b̄ā b̄ímaan̄ bi-ba a-nimiin, kí b̄ā s̄on̄ tin ní m ḡá-bee, an b̄ā ḡāñ,

²⁰áá, bin bí nee n̄ t̄uk̄u-si, bi n̄n̄ n̄n̄ cáá-mi bib̄soonliibi nimiinee, tikpitil tilati ní bi ká m ḡá

²¹an yaa kaa sá m n̄n̄ n̄n̄ yú bi-kansikin ki t̄één̄ m̄p̄on̄ dinȳobumbaantiil yii: 'M n̄n̄ f̄ō̄ ki kí yii bitaḡkpiibi dàá d̄āá fikit̄ee puee ní m yú ni-nimiin d̄in̄, ni b̄i s̄on̄ m-b̄otaa!' “

²²P̄ol s̄on̄ mìn ki d̄óoyee, ní Feeliikisi, un di n̄n̄ nyí kun di sá Yeesu saḡḡu tiḡanee, d̄āa bí-bi yii bí n̄n̄ k̄un̄. Ní ki bí yii: “Asee usoojakpikpaan Liisiyasi yaa láā d̄ómiinee, m d̄āa b̄étí ni-b̄oti gbanti.”

²³U l̄i mimmee, ní ki bí yii usoojakpil ub̄o n̄ cáá P̄ol kí p̄iñ, ama kí ȳant̄i ú t̄ō u-ba ḡwaam pu, kí n̄n̄ p̄un̄ u-b̄obi n̄san bí n̄n̄ dòn̄ u-cee ki c̄āab̄in̄ tin tin u yaa l̄èe.

²⁴Iwiin iba boonee ní Feeliikisi, nì u-nimpuu Drusii un sá ujuudanimpuee, dómiń ní ki tú bi cūti ki yíiń Pɔɔl. Ní Pɔɔl sòoń u pílfi min di sá yii bí fḡḡ Yeesu Kriisitoo kí kíyee.

²⁵Dyunti ɲun Pɔɔl kíí ki bí sòoń unil nín máań kí n̄n bí deedee kí fá u-wunti kódeeu puee nì ibosoon in bí ki dòońee puee, ní Feeliikisi fāŋki, ní ki bí yii: “Níń cá, daliŋkin m yaa ká mpaanee m dàá tí fātí yíiń-si.”

²⁶U n̄n dākafí yii Pɔɔl dàá tī-u animil ní, m̄n pu ní u n̄n yíi-u múmul bi sòoń.

²⁷Abin ali boonee ní Pɔɔsiyusi Feestusi fḡḡ Feeliikisi yil ki k̄n ki sá ḡmina. Feeliikisi là an m̄ōkiń Juuda yabee, ní u yānti Pɔɔl gb̄nti bí sarkan.

Atuun 25

¹Feestusi n̄n bāń Juudee watil, iwiin ita boonee ní u yíkì Seesaaree ki n̄n jóm Jeerusaleem.

²Ní bisaraanakpilib n̄n Juuda yab nikpaambi dómiń ki k̄ań Pɔɔl b̄ti ki tükū-u, ní ki gb̄ań Feestusi

³yii ú j̄ kim̄t̄i kí yānti Pɔɔl n̄ d̄ań Jeerusaleem. Di sá yii bi b̄nti ki cí kí kp̄o-u nsanni.

⁴Ní Feestusi kíí-bi yii: “Pɔɔl k̄a sarkan Seesaaree, man m-ba bí b̄nti kí fātí gítí niin ní nee.”

⁵Ní u gítí bí-bi yii: “Mimmee, ni-kpilib n̄ n̄ó-mi tí cù Seesaaree bí tin sòoń kí kp̄è uninja gbanti yaa ɲá tikp̄itil tiba.”

⁶Feestusi n̄n ɲá iwiin inii kii saalaa pu bi-kansikin, ní ki fāt̄i gít̄iń Seesaaree. Kutaa wúntèe ní u kó ki k̄al̄ kub̄soondiin ní ki bí bí yíiń Pɔɔl.

⁷Pɔɔl b̄ańee Juuda yab bin nyáńńi Jeerusaleemee yú ki kól̄-u ki sòoń u-pu yii u ɲań tib̄okpaandi tikp̄il. Ama baa ɲūń kí cáań tiba bí b̄é yii tin pu bi sòońee sá ibaam̄n.

⁸Ní Pɔɔl mun ȳōońi tin u cááyee, yii: “Maa ȳnti n̄n Juuda yab marab ub̄o, kaa tí ȳnti n̄n Kunimb̄tidii, kaa ȳnti n̄n ḡminakpaan Seesaar mun.”

⁹Feestusi n̄n là án m̄ōkiń Juuda yabee, ní u b̄alfi Pɔɔl yii: “A là kí j̄m̄ Jeerusaleem bí sòoń a-b̄ti nee m-nimiinaaan?”

¹⁰Ní Pɔɔl kíí-u yii: “Ḡminakpaan Seesaar b̄soondiikun ní man sí ki bí nee, niin ní an máań bí sòoń m-b̄ti! Kun puee maa ɲá Juuda yab tikp̄itil tiba, sii a-ba gba nyí m̄n t̄jan.

¹¹M yaa sá unikpiti ní ki ɲá tin tin máań ɲkúmee, mimmee maa mótí ɲkúm pu. Ama, an yaa tí sá yii tin bi sòoń m-puee yaa sá nnyim̄n, ub̄o kaa ɲūń kí dū-mi kí tī-bi. See m̄n b̄a ḡminakpaan Seesaar nimiin!”

¹²Niinee ní Feestusi n̄n u-kpilib k̄al̄ ki sòoń ki kp̄ōt̄i t̄bee, ní ki kíí-u yii: “Kee, a bí yii a là kí b̄a ḡminakpaanaa! Ti kíí á lafun cù u-nimiin.”

- ¹³Iwiin ili boonee, ní uboti Agripa nì Beereeniisi bāań Seesaaree kí jāam Feestusi.
- ¹⁴Bi kāl iwiŋkaaŋkaa iba poonee, ní Feestusi dū Pɔɔl bɔti ki kàań ki tükū uboti yii: “Feeliikisi yānti uninja ubɔ sarkan doo.
- ¹⁵M nín nìn cūti Jeerusaleem puee, ní bisaraaŋakpilib nì Juuda yab kpilib tükū-mi yii u nìn ŋá ikpiti ní, ní ki mēē-mi yii m dáal u-tafal.
- ¹⁶Ní m kíf-bi yii Room yab, bín kaa dù unil kí tī bí dáal u-tafal asee bí pɔ-u kinyɔkɔ ú mun n sòòn u-nannanliibi nimiin kun pu ní bi bí ki jáàyee.
- ¹⁷Bi dómín doo nee, kutaa wúntèe maa nìn gítī tāań-bi, ní ki kó ki kāl m-bɔsoondiikun ní ki bí bí cáań uninja gbanti.
- ¹⁸Ní u-nannanliibi mun kàań. Ama maa ká tikpiti tin ní m bàà dàkafi yii u máań ki ŋée.
- ¹⁹An nìn sá bín bi-ba marab nì un bi yî Yeesu u kpî kin Pɔɔl bí yii u bée ŋmanɪma pu ní bi bí kpákà.
- ²⁰Maa nìn nyí m nín dàá ŋá pu kí bée tibɔti gbanti yilee, an pu ní m balfi Pɔɔl yii u yaa là kí cù Jeerusaleem m sòòn u-bɔti gbanti niin.
- ²¹Ní Pɔɔl yîi, yii bí yantī ú nīn bí sarkan kí nīn cí ŋyunti ŋun ní gɔminakpaan Seesaar dàá dāá sòòn tibɔti gbantee. Ní m bí bí dū-u kí piin kí nīn cí ŋyunti ŋun m dàá dāá dū-u kí tī gɔminakpaanee.”
- ²²Ní Agripa bí yii: “Man m-ba bàà là uninja gbanti n sòòn m pīfi.” Ní Feestusi kí-u yii: “Tin u yaa cááyee, fool a fu gbil.”
- ²³Kutaa wúntèe ní binib tikpil nìn fɔɔ Agripa nì Beereeniisi, ní bi nì bisoojakpilib nì kitiŋ poon nikpaambi táá ki kó kubɔsoondiin. Ní Feestusi yānti bi cáań Pɔɔl,
- ²⁴ní ki bí yii: “Ubɔti Agripa nì nimbi bin kəkəwoooo kpáfi doo nee, Juuda yab kəkə dómín m-cee Jeerusaleem nì doo ki yíin uninja un ni wāl nee ibeeyiin, ní ki tátí yii bi máań kí kpò-u.
- ²⁵Ama man nyí yii waa ŋá tin máań ŋkúmee, ní ún u-ba dāa bí yii gɔminakpaan n sòòn u-bɔti, ní m kpēeyii an lafun máań mimmee, ní m là kí dū-u kí tī-u.
- ²⁶Maa láá nyí u-bɔti pu tiba kí ŋmà kí tī ti-yidaanu Seesaar kəŋkənee. Mìn pu ní m cáań-u ni-cee, nì sii a-ba ubɔti Agripa nimiin, ní bi yaa bí balfi-u anyɔɔbunee m ŋmā kí ká tiba poon kí ŋmà,
- ²⁷kun puee an kaa kítí m dū usarkadaan kí tī mín, kaa lī tin pu ní bi ŋúb-uee.”

Atuun 26

- ¹Niinee ní Agripa bí Pɔɔl yii: “A ŋūn kí nīn sòòn tin a cááyee.” Ní Pɔɔl yɔòn u-ŋal ki jāam samaa, ní ki yɔònní tin u cááyee, yii:

- ²“Ubɔti Agripa, an mɔ̀n-mi dín wiiṅṅu tikpil m̄ yū́l a-nimiin kí sòòn kí nyāntí m-ba tibɔti tin kɔ̀kɔ Juuda yab cáā tūntí m-puee ni.
- ³Di sá yii a nyí Juuda yab bimbim nì bi-nikpɔ̀ṅkpɔ̀kɔku kɔ̀kɔ pu. Mìn puee m gbāam-si á jī kimɔ̀tii kí pīlfiñ-mi.
- ⁴“Juuda yab kɔ̀kɔ nyí doooo m-naacimpɔ̀ntin m nín nìn bí miṅyee. Di sá yii doooo ṅkilkaamee m nìn bí Jeerusaleem ní, m-yab kansikin.
- ⁵Bìn bi-ba nyí-mi dooooyee. Bi yaa là gba, bi ṅūh̄n kí lì yii m nìn sá Fariisa yab bin ṅúb marab tiṅanee kansikin ubɔ.
- ⁶Kun di yānti bi bí sòòn m-bɔti kɔ̀ṅkɔnnee di sá m nín māká Unimbɔti nín nìn pɔ̀on ti-naanjab puee.
- ⁷Ti-samaau tinaakɔti saalaa nì tilee māká yii bi dàá dāá ká an poondi gbanti. An pu ní bi pɔ̀ontí ki nóó Unimbɔti ṅwiín pu nì kunyeeu. Too, ubɔti, m nín māká tin pu Juuda yab ṅúb-mee dee.
- ⁸Mìn puee, ba pu ní nimbi nyí yii Unimbɔti kaa làá dāá fikiti bitaṅkpiibi ní?
- ⁹“Man m-ba nìn dākafi yii an máaṅ m̄ dū iciin kɔ̀kɔ kí já nì Yeesu Naasaareeti you yindi.
- ¹⁰Min min m nìn ṅaañ Jeerusaleemee dee. Bisaraaṅakpilib nìn tī-mi mpɔ̀n m cúti bin f̄ṣ̄ Yeesu ki kíyee tikpil ki tòó sarkan, ní ṅyunti ṅun bi yaa là kí kpò-bee man di nìn lì yii bi lafun máaṅ ṅkúm.
- ¹¹Iyunti sá kamaayee, m nìn dátí bi-tafaliṅ akpafidiin ni, ki bàà là bí yí Yeesu. M nìn f̄ṣ̄ diṅuul bi-pu an tin lákatì, ali ki nìn cá ntimu mubɔn ki tin páb-bi.”
- ¹²“Mìn pu ní bisaraaṅakpilib nìn tú-mi ki tī-mi mpɔ̀n, ní m búnti Damaasi.
- ¹³M bí nsanni kuwiṅkuluu ki cée, ní ki ká ṅwalfi ṅubɔ nyánni yilpu, ki wāl nyákányaka ki jitiñ ṅwiín, ki māntii tú man nì bin nìn nóó ki cá nsanee.
- ¹⁴Niinee ní ti-kɔ̀kɔ líti kitiṅ, ní m gbī́l nneen ṅubɔ sòon̄ nì mi Eebru soonin, yii: 'Sool, Sool, ba ṅá ní a páb-mi mìn? An p̄ṣ̄ ki tī-si á dū a-taal kí yáká ikuṅkum.’
- ¹⁵Niinee ní m bālf̄i yii: 'An sá sii ṅma, m-Dindaan?' Ní ti-Dindaan bí-mi yii: 'An sá man Yeesu un a pábee!
- ¹⁶Ama yīkìi yū́l a-taaji pu. M dómiñ kí dū-si kí ṅá m-tɔ̀ntɔ̀nliu ní. Sii di dàá tükù bin kínee tin a ká m-cee dínee, nì tin tin m dàá dāá tí yānti á kée.
- ¹⁷M dàá dāá t̄ṣ̄-si Juuda yab nì bin kaa sá Juuda yabee cee, ki dàá dāá mōti a-pu bí taa ṅá-si tiba.
- ¹⁸A dàá cù kí ṅúbiti bi-nimiliṅ, kí nyāntiñ-bi dibɔmbɔndin kí cáañ-bi ṅwalfin, kí f̄ṣ̄-bi Sitaan pɔ̀ṅṅun kí cáañ Unimbɔti cee. Bi yaa f̄ṣ̄-mi ki kíyee ní bí ká bi-kpitii p̄tam nì tipaal tin Unimbɔti dàá dāá tī bin u gānti bi sá u-yabee.’ “
- ¹⁹“Mìn pu ní, ubɔti Agripa, maa kpēetin nyánni yilpu m kée fam.

²⁰M nìn kíl ki tükū Damaasi yab ki wāatì, ní boonee ní m tükū Jeerusaleem yab, ní ki póotì Juudee tɪŋki nib kəkə, nì atimbun ɲin kəkə kínee yab, yii bí fá bi-kpitii kí gítin Unimbōti cee, kí nīn cáá lakasi un dākà yii bi lafun kpántì bi-bimbimee.

²¹Kun di yì-tì ní m nìn bí Kunimbōtidiin Juuda yab dómin ki cúú-mi ki baa là kí kpò-mee dee.

²²Ama Unimbōti móti m-pu ali ki dāa sāa dín, m gbintii bí ki lèekī m-seerau biwofib nì biyidambi nimiin. Maa ti cáá tiba ki kútì tin tin Unimbōti bōnaatiliibi nì Mooisi nìn lī ki yóonee pu,

²³yii Kriisitoo dàá dāá jī falaa ali kí dāá kpú. Ún di dāa sá upeepeekaa un dàá fikitī bitaŋkpiibi kansikin, kí cáan Juuda yab nì bin kaa sá Juuda yabee ɲwalfee.”

²⁴Pōol bí sòon tin u cááyee, ní Feestusi téen mpɔn yii: “A sá uwaati ní! A nín bífi takaldab tikpil puee di bíl a-yil.”

²⁵Ní Pōol kíf-u yii: “Ukpil Feestusi, maa wāatì. Tibōti tin m sòonee sá ibaamɔn ní ki sá tibomontiil.

²⁶Ubōti béè-tì, mín puee ní m ɲūn kí sòon u-nimiin kaa fàŋkí. M nyí yii u nyí tikəkə, kun puee an kaa nìn sá dibalin ní tibotee nìn jíti.

²⁷Too, ubōti Agripa, a fṣṣ ki kíf yii Unimbōti bōnaatiliibi nín nìn sòon puee sá ibaamɔnaaan? Man nyí yii a fṣṣ ki kíf yii an sá ibaamɔn.”

²⁸Ní Agripa bí Pōol yii: “An kìn fiii, á bàà dū-mi kí kpántí Kriisitoo yɔu!”

²⁹Ní Pōol kíf-u yii: “An yaa kìn fiiyaa an yaa làá tí yúntáaa, m bàà là Unimbōti n ɲá mín. Án taa nín sá gba sii baba, án nīn sá ki kpáan bin kəkə bí pílfin-mi dín nee, ama bí taa nín bóob nimbi nì ikusaka nee ní!”

³⁰Niinee ní ubōti nì gɔmina nì Beereeniisi nì bin kəkə nìn kā bi-ceeyee

³¹yíkì ki nyán, ní ki bí lī yii: “Kijapaai nee kaa yīntì tiba tin máan bí kpò-ueeyaaa kaa tí máan bí ɲa-u sarka mun.”

³²Ní Agripa bí Feestusi yii: “Kijapaai nee yaa kaa nìn bí yii bí cáá-u gɔminakpaan cee, ti baa ɲūn kí gíin-u kí líí.”

Atuun 27

¹Dyunti ɲun bi bí yii tí dāá kó meela kí nīn cá Italiyee, ní bi dū Pōol nì bisarkadambi biba ki tī kijapaai kin bi nìn yī Juliyusee, u sá usoojapil dikitil din bi nìn yī “gɔminakpaan kitilee”.

²Ní ti kó meela un nyán Adramiiti ki dàá nīn cá Asii timmu mun kəkə bí tɪŋku caɲinee, ní ti yíkì. Aristaaki un sá Maseeduaan Teesaalooniiki tɪŋkinee nìn bí ti-cee.

³Kutaa wúntèe ní ti bàñ Siidon. Kii Juliyusi nín nìn ɲúb Pōol tɪŋan puee, u pú-u kinyəkə ú cù u-bɔɔbi cee kí nyàabiñ tin u yaa lèe.

- ⁴Ti dāa yíkì niinee, ní ki dūu dī ki kpàkañ Siipil tiŋki kin dimɔɔl mǎntì ki túee, kun puee kubuŋu nìn pɔ̄ɔ ní ki túŋkiñ-ti.
- ⁵Ní ti dūtì tiŋku un bí ki nákañ Siiliisii nì Paŋfiliyee, ní ki dūu bàñ Miira, Liisii tiŋkin.
- ⁶Niin ní usoojakpilee nìn ká meela ubɔ nyánní Aleeksandrii ki cá Italii ní u yǎnti ti kó úh.
- ⁷Meelee nìn dū iwiin tikpil ki còom̄ soooo soooo nì falaa, ki wāatì ní ki nín bàñ ki ŋmǎntì nì Kiniidi tiŋki. Kubuŋu nín nìn páb-ti, taa ŋūn kí dī niin kí nín cá ndanee, ní ti dūu dīn̄ Salmoonee watil pu ki dūu bāañ Kreeti caŋin.
- ⁸Ti bíi kpàkañ nì falaayee, ní ki dūu bàñ kitiŋ kin bi yíi Laaseeyee caŋin laakin bi yíi Dibunŋbammontiilee
- ⁹Ti nìn cɔ̄om̄ ki yúnti tikpil ali disaŋkindee dāa dūu kpánti mbusu, kun puee Juuda yab nyɔ̄boobil wiinŋu jíti ní kitiŋ gbanti seeku mun nìn tóobiñ. Míh̄ puee ní Pɔ̄ɔl nìn bí ki kpáafí-bi yii:
- ¹⁰“Ti-yab man wāl̄ yii ti-saŋŋu nee dàá cáañ-ti diniminaamandi, kun puee meela nì u-nyɔ̄mpuwanti dàá ká falaa tikpil, an yaa yíi gba, timbi ti-ba dàá kpú.”
- ¹¹Ama usoojakpilee kaa nìn fɔ̄ɔ Pɔ̄ɔl nín sòom̄ puee ki kíi, ní ki nìn máká un nìn sá ukpil meelanee nì meeladaan pu.
- ¹²Meela sillanŋki gbanti nín kaa ŋāñ kuseeunee pu, ní binib tikpil nìn là kí yíkì niin, bi yaa ŋūn kí bà meela sillanŋki Feeniisi, Kreeti tiŋki kin nìn túliñ ŋwiin̄ jeetilaŋkee, kí kāl̄ niin kuseeu n̄ jītí.
- ¹³Kubuŋu kubɔ nyánní ŋŋaŋgan pú ki kíi ki bíi jītí fiíi fiíi. Niinee ní bi dākafi yii bi dàá ŋmā kí bà laakin bi bàà màkēe, ní ki dáal̄ dikújal̄ dín ŋúb meela nnyiminee ki cúū kúti, ní ki búnti ki kpàkañ ki pilìn̄ Kreeti bunŋbandi.
- ¹⁴An kaa yúnti, kpalaayee ní kubunŋkpaanŋu kun bi yíi Urakiloneeyee nyánní Kreeti jooŋŋin ki sīntiñ,
- ¹⁵ki dómiñ ki yɔ̄on̄ meela. Taa nìn gítí ŋūn kí ŋá tiba kí pèefi meela, asee ti nín yǎnti ku yɔ̄on̄-ti ki kpáaā búntèe.
- ¹⁶Ní ti cūti jíti kitimbilii kin bí tiŋku kansikinee bi yíi-kì yii Kooda. Nì falaakpaŋkpaan ní ti dāa nín ŋún ki cúú buŋalimbu bun nìn nòb̄ meelee kitiŋ gbanti caŋin,
- ¹⁷ki dáaliñ-bu ki kón̄ meelan, ní ki dū iŋmii ki bóob̄ ki mǎnti tú meela taapu. Bi nín nìn fàŋkí yii tí taa cùú líti Siirtii bul kpaanceetii puee, ní bi sīnti iŋaabu taapu, ní kubunŋkpaanŋuee cáá-ti ki cáā nín cá.
- ¹⁸Ku nín gbínti mōti páb-tee pu, ní kutaa wúntèe bi dū tinyɔ̄mpuwan tiba ki tó tiŋkun.
- ¹⁹Winta dalee, ní biñ bi-ba dū tin bi cáā kpòotí meelee ki tó nnyimin.

- ²⁰Iwiin tikpil poonee, taa ti ká ηwiiñ nì iηmalbijaa, ní kubuηkpaanηuee gbíntii jītí iwintil kòkò ki pōō, niinee taa ti dākafī gba yii ti dàá ηmátí.
- ²¹Ali an yúnti bin nìn kā meelanee kaa jín tiba. Niinee ní Pōol yúl bi-kansikin ki bí yii: “Ti-yab, ni yaa nìn pílfìn-mee, taa bàà yíkìñ Kreeti, taa bàà kántí falaa nì asaluu un bí nee.
- ²²Ama kəηkəñnee m mēé-ni, ní pōòn ni-ba, kun puee ni-kansikin báà ubə kaa làá wōηkì, asee meela baba di dàá bīl.
- ²³Kun puee kunyeeu nee, Unimbəti un yì-mi m nóc-uee túnní u-tūuηηu ηubə m-cee,
- ²⁴ní ηu bí-mi yii: ‘Pōol, taa fəηkì! Asee á bà gəminakpaan nimiin bí sòòn a-bəti. Mìn puee, Unimbəti dàá ηá-si tiηan kí yàntí bin kəkəwoooo kā meelanee n̄ ηmátí!’
- ²⁵An puee, pócəmmaan ni-ba, ti-yab! Kun puee m cáá dimákal Unimbəti pu, yii u nín lī puee, mìn ní an dàá ηá.
- ²⁶Ama an dàá cáá-ti kí kpàkañ kitimbilii kiba kin nnyim mānti ki túee kpaanceetiηu laaaba ní.”
- ²⁷An nìn bàñ iwiin ηubə kpá saalku nyeeku dalee, ní kubuηu gbanti gbíntii cáá-ti ki yíñ Meediteeranee tiηkuu pu. Kunyataasiuee ní bimeelaηaalliibi bí l̄ yii ti cīkìñ kitiη kiba.
- ²⁸Ní bi dū tiηmantikaal ki tó diməlin, ní ki ká yii nnyim nyoəηηu nìn sá meetab mmuηku nì sala nì biluli, ní ki gífi sùti fiiyyee, ki tí dūu tó mpəm, ní ki tí ká yii nnyim nyoəηηu sá meetab mmuηku nì binii.
- ²⁹Niinee ní bi kìn ki fəηkì yii ti-meelau nee n̄ taa ηée kí cùú yā atankee, mìn puee ní bi dū akújal anaa ki tó boon án nin ηúb meela, ní ki kìn ki kā ki pòontí yii kutaa n̄ wúntí.
- ³⁰Bimeelaηaalliibi nìn nyàab kí nyā meelanee, ní bi gíñ buηalimbu bun nìn nòb meelee ki tó nnyimin, ní ki móntí yii bìn bàà là kí cáá akújal aba kí cáá kúl nyəkəpu mun ní.
- ³¹Ní Pōol bí usoojakpilee nì u-soojab yii: “Binib nee yaa kaa kāl meelan soooo, naa làá ηmátí!”
- ³²Niinee ní soojab gíi iηmii in nòb buηalimbuee ki t̄l, ní bu gbínti nnyimin.
- ³³An kìn fiii kutaa n̄ wúntée, ní Pōol mēē bi-kòkò bí dāá jī tijn, ní ki bí-bi yii: “Iwiin ηubə kpá saalku sèe nee ni nín kā kaa jìn tibe.
- ³⁴Mìn puee, m gbàam-ni, ní jīmaan tijn, kun puee tijn bəti páb ki t̄i ni-manfal. Di sá yii ni-kansikin báà ubə yikpiliku kaa làá wāηkì.”
- ³⁵U lī mìn ki dóoyee, ní ki yōòn kpəñə ki jáam Unimbəti tijn gbanti pu bi-kòkò nimiin, ní ki gífi kpəñə ki kí ki bí ηmód.
- ³⁶Niinee ní bàà ηma ká kunyannyaau, ki kí ki bí ηmód.

³⁷Timbi bin kəkɔ n̄n kā meelanee n̄n sá binib kulaafaau n̄n imuŋku ita n̄n saalaa n̄n biluu.

³⁸Bi jín ki bálee, ki là yii meela n̄ taa n̄n gítì nyim̄ kí n̄n bí fúkúfukuee, ní bi dū ŋkɔnɔyim ki dūu tó nnyimin.

³⁹Kutaa wúntèe, bimeelaŋaalliibi kaa bée kitiŋ gbanti, ama ní ki ká dibunlɔkɔl diba, digbandi sá dibul ŋma, ní bi bí yii, bi yaa ŋūn kí bàà ŋaal meela kí cūnni niin.

⁴⁰Niinee ní bi cúu iŋmii ki cúu búti, ní akújalee gbintì nnyimin, ní bi cúu ŋmii ki cúu kúti tiwan tin kpòotì meelee, ní ki dū ŋaabu ŋun yíi kubuŋuee ki dūu ŋá meela nyɔkɔpu kubuŋu n̄ n̄n téekí meela. Kubuŋu bíi téekí meelee, ní bi dūu dī tiŋku gbandi watil pú.

⁴¹Niinee ní meela cūti sāl dibukpaandi diba kansikin ki gbintì niin, ní u-nyɔkɔpu múl dibulin, kaa ti lèekī, ní tinyingban dómíin ki fáá ki wī boon.

⁴²Niinee ní soojab bàà là kí kpò bisarkadambi, yii bí taa ŋée kí wōŋkì nnyim kí nyā kí s̄n̄ kí kátí.

⁴³Ama usoojakpilee là kí fī Pɔlee, ní ki yíi, yii bí taa ŋá mín, ní ki bí yii bin ŋūn nnyimee n̄ péé kí yúkū kí tiin̄ kí wōŋkì kí n̄n cá dibuŋbandi,

⁴⁴ní bin kínee n̄ n̄n cáá ido àa ameelakati kí n̄n wóŋkí ki pá bi-boon. Mín ní ti ŋá, ní ti-kəkɔ nyán dibuŋbandi n̄n alaafiya.

Atuun 28

¹Ti ŋmáti ki dóyee, ní ki nín bée yii bi yíi kitiŋ gbanti Malti.

²Binib bin n̄n kóò niinee baasii ŋúb-ti mm̄ontiimin. Utaa n̄n kíí ki kíin̄ ki n̄, ní tiwool bí. Mín puee bi n̄n kpāa ŋmii ní ki yíin̄-ti ní ti-kəkɔ dómíin ki kāl ki m̄anti tú ŋmee ki wùl.

³Ní Pɔl cūti báan̄ tikpaŋkpaal dibondi diba, ukoobu kā niin, ki cáan̄ ki tó ŋmin. Niinee ní ŋmifaan píi ukoobuee, ní u nyán ki jú u-ŋal ki báan̄.

⁴Binibee nín ká yii ukoobu lún Pɔl ŋal puee, ní bi bíi li tɔb cee yii: “Uninja nee máan̄ ki dàá n̄n sá unikpɔl ní. Di sá yii, min kəkɔwoooo u ŋmáti ki nyán tiŋkuee, ti-waal deedeedaan kaa pú-u mpaan̄ ú tō u-ba.”

⁵Niinee ní Pɔl gbéen̄ ukoobuee ki fiin̄ ki tó ŋmin, kaa gbīl̄ tiba.

⁶Ní bi kíin̄ ki kā ki kpée yii an̄ dàá díkáaa u dàá líti kí kpú niin niin. Ama bi kāl ki cíiti kpēeki gī, tiba kaa ŋá-uee, ní bi kpánti bi-landɔkɔi, ki kíin̄ ki bíi cáá yii an̄ sá diwaal diba ní.

⁷Niin caŋin ní kitiŋ gbanti bɔtiu un bi yíi Publiiyusee saaku n̄n bí. Kijapaayee n̄n fōō-ti mm̄ontiimin, ti dōon̄ u-dumpu iwiin ita.

⁸Publiiyusi baa n̄n dō ki būn̄ mmaŋfanyim n̄n ticɔtindi. Ní Pɔl cūti m̄anti u-pu, ní ki mēeki tī-u, ní ki dū u-ŋalii ki páan̄ u-pu, ní u pókì.

- ⁹Niinee ní bibunliibi bin bí niinee kòkò dómiń ki ká dicaandi.
- ¹⁰Binibee nèn ńá-ti tiŋan tikpil, ní daliŋkin ti dàá yíkèe, bi nèn tī-ti tin kòkò ti lèe.
- ¹¹Iŋmal ita boonee ní ti kó meela un nèn yúl kitiŋ gbantin kuseeu jítèe, ki nèn nyánní Aleeksandrii, bi kpítì awaa ali ki nántiń atab ki nákań u-puee.
- ¹²Ti bàń Sirakuusi tiŋkinee, ní ki kāl niin iwiin ita.
- ¹³Niinee ní ti yíkìi kpàkańee, ní ki dūu bàń Reejiyoo. Kutaa wúntèe, ní kubuŋu nyánní ti-boon pú ki kíí ki bī jítí, ní ti dū iwiin ili ki dūu bàń Pusol.
- ¹⁴Kitiŋ gbantin ní ti nèn ká nnabiyaamu mubò, ní bi bí yii tí kāl bi-cee kinyoŋ kiba. Ti dāa yíkì niinee, ní ki bàń Room.
- ¹⁵Nnabiyaamu mun bí Roomee nín gbīl ti-puee, ní bi yíkìi dómiń ali Apiyusi nyoŋkin nì kitimbilii kin bi yì Inicaŋkooŋkoon itee, ^{^fe^} ki túŋkì-ti. Pòol nín péeká-bi puee, ní u bī nyóŋkí Unimbòti ní ki ká kunyannyaau.
- ¹⁶Ti nín bàń Roomee, ní bi pú Pòol nsan ú nīn kòò u-baba sooja n nīn cí-u.
- ¹⁷Iwiin ita boonee, ní Pòol yíiń Juuda yab kpilib bin nèn kòò Roomee bí kpāfi u-cee. Bi dómiń ki kpáfèe, ní u bí-bi yii: “M-nabiyaamu, maa kpáàá ńá ti-samaau tiba, kaa yīntiń ti-naanjab koobiliŋ mun. Ama bi cúú-mi Jeerusaleem, ki dū-mi ki tī Room yab.
- ¹⁸Ní bīn bālfì-mi anyoobun, ní ki bàà là kí gíiń-mi kí líí, kun puee baa ká kun di yì-tì ní bi máań kí kpò-mee.
- ¹⁹Ama Juuda yab kaa nèn kíí, yii bí taa líí-mi. An di yì-tì ní m nèn bí yii gominakpaan n sòoń m-bòti. Nì mīn kòkòee, maa làá bīl m-yab.
- ²⁰Kun pu ní m là kí ká-ni kí sòoń nì nee dee. Di sá yii dipoondi din pu Israyeel yab ká ki mákèe pu ní ikusaka ká m-ŋaan nee.”
- ²¹Ní bi kíí Pòol yii: “Juudee yab kaa ńánní-ti takalda ubò ki sòoń a-bòti pu tiba, ti-nabiki kiba mun kaa tí nyánní niin ki dómiń ki tükū-ti a-faawiiu ubò, ubò mun kaa tí tükū-ti yii a ńá tikpitił tiba.
- ²²Mīn puee, ti bàà là kí béé tin tin a cááyee, kun puee ti nyí yii báà laakin, binib tikpil kaa là nnimbòtisan ŋun a nòó nee.”
- ²³Ní bi fātii yóoń-u ŋwiin, ní binib tikpil dāa dómiń ŋwiin gbanti. Pòol nèn kíí kutaafaau ki cáā sāā kujoo ki cáá Mooisi marab nì Unimbòti bōnaatiliibi takaldab ki sòoń nì bi Unimbòti beel bōti taapu, ki nyàab bí ŋmā kí fōō Yeesu kí kíí.
- ²⁴U nín nèn sòoń puee, biba nèn gbīl ki fōō ki kíí, ama biba mun nèn yī, kaa fōō ki kíí.
- ²⁵Kunikpōŋkpōkōu kó bi-kansikin, bi dàá nīn cée, ní Pòol lī-bi dinyoobundi nee yii: “Tiŋman, an sá ibaamōn ní, Unimbòti Fām dī u-bōnaatiliu Eesayi pu dooooyee ki sòoń nì ni-naanjab, yii:
- ²⁶Cù binib nee cee kí tükù-bi yii: Nì dàá dāá gbīl nì ni-tafaliŋ ní kaa nyí taapu, ki dàá dāá nīn kpèe nì ni-nimiliŋ ní kaa wāl.

²⁷Di sá yii binib gbanti pɔbiliŋ gbifi, bi kpáá bi-tafaliŋ ki ɲúb bi-nimiliŋ. Baa là kí n̄n wāl, kaa là kí n̄n gbìl, kaa là bi-landɔkɔi mun ń béé taapu, bí bàà gítin m-cee m cáan-bi! “

²⁸Ní Pɔl gítì kútì-bi yii: “Ní n̄n nyímaan yii Unimbɔti tú u-fiil nyɔɔbundi nee bin kaa sá Juuda yabee cee! Bìn dàá fɔ̄ɔ-dì.”

[²⁹Pɔl lī an nyɔɔbuŋɲee ki dóɔyee ní Juuda yab búntì ki còom̄ ki kpákà bi-ɲmaniŋma tikpil.]

³⁰Pɔl n̄n kāl abin ali amɔn kudii kun u fɔ̄ɔ ki pà ki kóɔyee poon, ki n̄n fòol̄ bin kɔkɔ dòon u-ceeyee,

³¹ní ki n̄n sòon Unimbɔti beel pu, ki dākà ti-Dindaan Yeesu Kriisitoo ɔti n̄ tininjati, ubo kaa páb-u.

Room

Room 1

- ¹Man Pɔɔl un sá Yeesu Kriisitoo tɔntɔnliu, Unimbɔti yíín-mi ki gāntì m̄ n̄n sá Yeesu kpambal kí sòòh̄ u-bɔmɔntiitee di jáám-ni.
- ²Doooyee ní Unimbɔti n̄n dī u-bɔnaatiliibi pu ki p̄sòh̄-ti u-bɔmɔntiiti gbanti ki ñá u-takaldau poon ki sīh̄.
- ³U-Jipɔɔn ti-Dindaan Yeesu Kriisitoo pu ní tibɔtee sòòh̄. Ti yaa làá kpèè tinitanee, u nyánni ubɔti Dafiidi maaliŋu poon ní.
- ⁴Ti yaa làá kpèè u-Fām min sá circiree jandi puee, Unimbɔti n̄n fikiti-u ditaŋkpiilinee, u dākā yii u sá u-Jipɔɔn mpɔndaan.
- ⁵U-pu ní ti ká diyimɔɔl kí n̄n sá u-kpambaliŋ, an n̄n dàá ñá pu tí yànti atimbun kɔkɔ nib ñ f̄s̄s̄ kí kii kí n̄n k̄n̄ ki ñáán min min Unimbɔti lèe, ní u-yindi ñ ká tinyool.
- ⁶Nimbi Room yab bin Unimbɔti yíín ní n̄n k̄n̄ ki sá Yeesu Kriisitoo yabee mun kúti poon.
- ⁷Nimbi ní m̄ ñmān takalda nee, nimbi bin kɔkɔ Unimbɔti néén ki yíín ní n̄n sá u-yabee. Ti-Baa Unimbɔti n̄n ti-Dindaan Yeesu Kriisitoo ñ ñá-ni tiŋan kí t̄i-ni ñgbansɔŋfi!
- ⁸Mpeekaaminee, m̄ dī Yeesu Kriisitoo pu ki jáám m-Nimbɔtiu ni-kɔkɔ pu, kun puee bi sòòh̄ ni n̄n f̄s̄s̄ Unimbɔti bɔti ki kii puee ajan kɔkɔ pu.
- ⁹M̄ tétí ni-pu múmul m-wimmeem poon. Unimbɔti un m̄ n̄ó n̄n m-pɔbil kɔkɔ ki sòòh̄ u-Jipɔɔn bɔmɔntiitee nyí yii tin m̄ lèe sá ibaamɔn.
- ¹⁰Baabadal m-wimmeem poonee, m̄ balfi Unimbɔti yii an yaa sá u-lammi, ú p̄-mi n̄san ñyunti nee m̄ dāān kí m̄nti ni-pu,
- ¹¹kun puee m-nimiliŋ m̄n̄ m̄ dāān ni-cee kí cáán-ni Unimbɔti Fām p̄kaati tiba tin ñūn̄ kí k̄ti-ni mp̄onee.
- ¹²M̄ n̄n dàá l̄i puee di sá tí ñmā kí dū ti-fookiiu un ti-kɔkɔ cáá Unimbɔti puee kí t̄i tɔb kunyannyaau.
- ¹³Nnabiyaamu, m̄ là ní bée yii m̄ mākafi miŋa n̄n miŋa kí bàà dāān ni-cee, ama n̄n din maa ká n̄san. M̄ bàà là yii m-tundi ñ l̄oñ abil ni-cee kii d̄i n̄n l̄oñ atimbun ñin k̄nee cee puee.
- ¹⁴An sá-mi dipɔndi ní m̄ sòòh̄ Yeesu bɔti kí t̄k̄u bàà ñma, bin nimiliŋ ñúbitèe n̄n bin nimiliŋ kaa ñúbitèe, bin nyí iciinee n̄n bin kaa nyí t̄bee.
- ¹⁵M̄in̄ pu ní m-nimiliŋ m̄n̄ ñ dāān kí sòòh̄ tibɔmɔntiil gbanti kí t̄k̄u nimbi bin bí Roomee mun.

16An kaa cáá-mi icoo m sòòn tibòmòntiil gbanti, kun puee tì sá Unimbòti pòṅṅu ki fiil bin fòòl-tì ki kíikée. Mpeepeekaamee, Juuda yab, ní boonee ki dāa nín kpáàn bin kaa sá Juuda yabee mun.

17Tibòtee dākà-ti nsan ṅun Unimbòti dī ki kpántí unil deedeedaan u-nimiinee: an sá unil n fṛṛ kí kíí ní. An kífí nì fookii ní kí tin kúntí nì fookii, kii an nín ṅmāñ Unimbòti takaldau poon puee, yii: “Deedeedaan kántí dimañfal u-fookiiu pu ní.”

18Di sá yii doooo yilpu ní Unimbòti dākà u-ṅuul nnibiyaamu lakasikpitib pu. Baa tó ùn Unimbòti ní ki ṅáañ ikpiti. Bi-tuṅkpitiṅ kaa yàntí ibaamòn n tō i-tundi bi-ni.

19Kun pu ní Unimbòti dàá dáal bi-tafaliṅee di sá bi wál kun unil ṅūn kí ká kí bée Unimbòtee, an sá Unimbòti di nyánti ki dākā-bi.

20Di sá yii, doooo Unimbòti nín náañ yilpu nì taapuee, atuun ṅin u túnee ṅūn kí yàntí unil n bée u-ban Unimbòti bimbim min baa wālee an dākà yii: u-pòṅṅu ṅun kaa kúntée nì Unimbòtiiti. Mimmee unil kaa ṅūn kí ká nnaakpal yii waa nyí-u.

21Bi nyí Unimbòti, ní kaa pākà-u, kaa jáam-u u-ṅanti pu min máañ bí jāam-uee. Bi fá-u, ki nṳ́ bi-landòkò in kaa bí deedeeyee, ki kpánti bigbaambi, ní bi-pòbiling kó dibòmbòndin.

22Bi bí ki gà bi-biṅṅi yii bi cáá iciin, kaa nyí yii bi wáati ní.

23An nín bàà sá bí nyòṅkì Unimbòti tinyooldaan un kaa kúyee puee, ní bi nyòṅkì tiwan tin bi kpítì ki nántiṅ unil un kúyee nì inoon nì tiwanṅuti nì tin fù kitiṅee mun.

24Kii bi-pòbiling poon bi nín lēēkí nīn ṅáañ tijòkòndee puee, Unimbòti dū-bi ki liīn tijòkòndi, bí nīn bíil bi-ba.

25Bi dū Unimbòti bōti tin sá ibaamōnee ki fá, ki yṳ́on inyimōn, ní ki nṳ́ ki tòotí tiwan tin Unimbòti náanee ní ki fá unaanli u-ba, un máañ bí nīn nyòṅkí-u baabadal kí nīn cée! Ameen.

26Mīn pu ní Unimbòti dū-bi ki liīn kukpeeu kun kōntí-bi icooyee. Di sá yii an nín bàà sá binimpoobi n mōn bininjabee, ní bí fātí dūú mōn bi-nimpujutiibi.

27Mīn mbaantiim, bininjab kaa ti là binimpoobi, ní ki kíñ ki là tōb ṅmaniṅma tikpil ki dō nì tōb. Bi-tuṅṅi gbanti cáañ ditafadaaldi din sá bi-paati tin máañ-bee ki tó bi-pu.

28Kii bi-landòkò nín sá yii Unimbòti kaa máañ bí bée-uee puee, Unimbòti dū-bi ki lí, ní bi-landòkò gátì, ní bi kíñ ki ṅáañ min kaa máañ bí ṅée.

29Bi kpánti binikpitib mbaamōm, ki ṅáañ min kaa ṅānee, ki cáá nnimitaataam, nì ntoom, ki cáá kināṅ nì nnikpaakoon tikpil, ki néen kujaau, ki ṅmàtín tōb, ki kíil tōb, ki sòòn ki bíil tōb,

30ki sī tōb. Bi sá Unimbòti nannanliibi, ki sókò binib, ki yòntí bi-ba yilpu, ki dākà bi-ba, ki nāantí isampōon ki dī ki ṅáañ ikpiti, ní kaa tó bi-nab nì bi-baabi.

31Baa cáá iciin, bi yaa pṳ́oṅee, baa ṅáañ tin bi pṳ́oṅee. Baa cáá dineendi, kaa sūn bin kínee saai.

³²Nì min kamaa bi baasii nyí tiŋan yii Unimbɔti bí yii bin bin ŋáán ikpiti gbantee máaŋ ŋkúmee, bi gbínti ki ŋáán ikpiti gbanti. Tin gítí lákatèe di sá bi bí yii bin ŋáán ikpiti gbantee di ŋáán min kítèe.

Room 2

¹Ɔma ní a sá, sii un sòòn bin béeyee ɔti yii bi nín ŋáán puee kaa ŋāñee, aa cáá nnaakpal ŋubɔ kí dāá kpál, kun puee, sii un bī sòòn bin béeyee ɔti yii bi nín ŋáán puee kaa ŋāñ, ní ki ŋáán mín a-bee, a bī kù a-ba ɔti dee.

²Ti nyí yii Unimbɔti nín sòòn ki kù bin ŋáán an tuuŋŋee ɔtee, u cáá ibaamɔn.

³Mimmee, sii un kù bin béeyee ɔti ki mun ŋáán mín mbaantiimee, a dàkafī yii a dàá nyā Unimbɔti ɔsooni naaan?

⁴Unimbɔti niti tin u cáá tikpilee, nì u-mɔtiiki, nì u nín ŋmí ki kpèe-ti puee ní a cáā kpèe famaaan? Aa nyí yii Unimbɔti nín ŋáán-si tiŋan puee, u là kí tūtuñ-si á kpántí a-bimbim níin?

⁵Di sá yii a nín pókí a-pɔbil pu ki yítí, kaa là kí kpántí a-bimbimee, ní a mòtī kútí a-ba ditafadaaldi din a dàá fɔ̃ Unimbɔti ŋuul wiŋŋu dalee, ŋyunti ŋun Unimbɔti dàá dū ibaamɔn kí sòòn binib ɔtee.

⁶Yaadal ní u dàá pà báà ŋma u-tundi paati.

⁷U dàá dū mmaŋfafɔkɔn ŋun kaa cáá dikuntilee kí tī bin pɔntí ki ŋáán tiŋan ki nyāab tinyool nì ipampaka nì dimaŋfal din bí kaa kúntée.

⁸Bin yū, kaa là kí nóó u-baamɔni ki là kí nīn nóó tin kaa ŋāñee, u dàá dāá fɔ̃ diŋuul bi-pu kí dáal bi-tafaliŋ.

⁹Falaa nì diniminaamandi dɔ ki cí bin kɔkɔwoooo ŋáán tin kaa ŋāñee. Juuda yab tafaliŋ ní Unimbɔti dàá péé péé kí dáal kí wàatī, ní kí dāá nín dáal bin kaa sá Juuda yabee tafaliŋ.

¹⁰Ama, tinyool nì ipampaka nì ŋgbansɔŋfī dɔ ki cí bin kɔkɔwoooo ŋáán tiŋanee. Juuda yab ní bi dàá dāá péé kí tī kí wàatī, ní kí nín tī bin kaa sá Juuda yabee.

¹¹Di sá yii Unimbɔti kaa gantī binib.

¹²Bin kaa béè marab bin Unimbɔti tī Mooisee, ní ki yaa ŋá ikpítee dàá wāŋkì, ama marabee ní baa làá dūú sòòn bi-ɔti. Ní bin kɔkɔ nyí marab gbanti ní ki ŋáán ikpítee, marabee ní bi dàá dūú sòòn bidambi ɔti.

¹³Kaa sá bin pílfi marabee di sá deedeedambi Unimbɔti nimiin, an sá bin bin ŋáán marabee nín lī puee, bīn ní bi dāa yī deedeedambi.

¹⁴Mimmee, bin kaa sá Juuda yab, kaa nyí Mooisi marab puee, bi-pɔbiliŋ yaa yānti bí ŋmā kí ŋá min nóó nì marabee, báà bi yaa kaa nyí marab, bi nyí tiŋan diŋal kii marab nín lī puee.

¹⁵An dākà yii marab tuuŋŋi taapu ŋmàñ bi-pɔbiliŋ poon. Min máaŋee dòón bi-noonin, ní bi-landɔkɔi tükù-bi ŋyunti ŋubɔee, tin bi yaa ŋá an ŋāñee, ní ŋyunti ŋubɔ muee, tin bi yaa ŋá an kaa ŋāñee.

¹⁶Ɖwiin ŋun Unimbɔti dàá yàntī Yeesu Kriisitoo n̄ biitī nnibiyaamu tuuŋŋi ŋin bí dibalinee pu kí sòoŋee, tin tin báà ŋma dàá dāá kée dee, kii tibɔmɔntiil tin man Pɔɔl sòoŋee nín lì puee.

¹⁷Ama sii un bi yî Juuda you, a máká Mooisi marab pu, ki dākà a-ba yii a nyí Unimbɔtee,

¹⁸ki nyí u nín là puee, marab dākà-si á lēē laakin ŋāñee,

¹⁹a nyí a-ba yii a ŋūñ kí kpòotī bijɔfub kí n̄n sá ŋwalfi kí tī bin bí dibɔmbɔndinee,

²⁰ki là kí n̄n dākà bin nimiliŋ kaa ŋúbitèe n̄ bin kaa nyí tiba nnimbɔtisan poonee, kun puee a bée marab ní marabee dākā-si iciin n̄n ibaamɔn kɔkɔ.

²¹Ba ŋá ní sii dākà bin kíŋee, ní kaa dākà a-ba ní? Ba ŋá ní sii un sòon ki tükù bin kíŋee yii bí taa yòee, yù ní?

²²Sii un lì yii an kaa máaŋ bí ŋá tilaakpaalee, ba ŋá ní sii ŋáaŋ tilaakpaal ní? Sii un ná awaayee, ba ŋá ní a kòò awaadiin ni ki yù tiwan ní?

²³Sii un gà a-bindi yii a nyí marabee, ŋyunti ŋun a yìntīñ marab gbantee, Unimbɔti yindi ní a bíí bíí,

²⁴kii Unimbɔti takaldau poon nín lī puee, yii: “Nimbi Juuda yab pu ní bin kaa sá Juuda yabee sòon ki bíí Unimbɔti yindi.”

²⁵A yaa tó marabee, ní digiil din a gíyee ŋāñ ki tī-si, ama, a yaa yìntī marabee, n̄n min kɔkɔ bi gíí-see, an sá fam ní.

²⁶Unil un kaa gíyee yaa kpáafí marabee, n̄n min kɔkɔ baa gíí-uee, Unimbɔti kpèé-u kii u gíyee ní.

²⁷Un baa gíí, u nóó marabee dàá dāá jīñ sii un gíí ki cáá marab takaldau ki gítī yìntī marabee ibaamɔn.

²⁸An kaa sá un bi wāl yii u sá Juuda you, bi gíí-u, u cáá kudaanŋu u-wunti puee di sá Juuda you baamɔn:

²⁹un sá Juuda you baamɔnee di sá un sá Juuda you u-pɔbil poonee. Bi gíí-u n̄n digiil din sá Unimbɔti Fām gítamee, kaa sá marab takaldau nín lī puee gítam. Unimbɔti di pàkà an niliuee, an kaa sá binib di pàkà-u.

Room 3

¹A yaa sá Juuda youee, a gítī cáá diyimɔɔl dibaaa? Àá digiil sá tiwammɔntiilaaa?

²Tiŋman, bi-yimɔɔl jítiñ bin béeyee yal kpataaa. Diyimɔɔpeepeekaal di sá Unimbɔti nín dū u-bɔti ki ŋúbiñ Juuda yabee.

- ³Ama bi-kansikin biba kaa ḡún ki yúl deedee. Mimmee, bi nín kaa yúl deedeeyee puee di dàá yàntī Unimbōti deedeeku n ḡá famaana?
- ⁴Aayee, kpataaa! Unimbōti di dàá nīn péēsá deedeedaan, ní binib kòkò dàá nīn sá binyimōndambi, kii Unimbōti takaldau nín lī puee, yii: “Binib yaa láā bālfī sii Unimbōti tin a ḡée taapuee, see á sòòn kí líí-bi, bí ká yii a cáá ibaamōn.”
- ⁵Ti nín ḡáán ikpiti iḡyee yaa dàkà yii Unimbōti sá umōntee, mimmee u nín dátí ti-tafaliḡ ti-kpitii puee, waa bí deedee deeyaa! (M sòòn nniyaamin ní).
- ⁶Aayee kpataaa! Unimbōti yaa kaa bàà bí deedee, waa ḡūn kí sòòn duulnya bōti.
- ⁷Mimmee, m-nyimōni yaan ḡūn kí yàntī Unimbōti baamōni n nyā mpaampiin pu bí wāl kí tī-u tinyoolee, ba pu ní bi dàá ḡítī sòòn kí kpò m-bōti, yii m sá unikpiti?
- ⁸Mín puee, tí líí ti sòòn yii: “Tí nīn ḡáán ikpiti, an dàá dāá kpántí tiḡanaa!” Mín ní bin móntí nnyimōn ki tūntí ti-puee lì, bin sòòn ti-pu mimmee máán ditafadaaldi.
- ⁹Mimmee, timbi Juuda yab jítiḡ binib bin kíneeee? Aayee, kpataaa! Kii m nín bàà péēlī puee, Juuda yab nì bin kaa sá Juuda yabee kòkò bí ikpitiin.
- ¹⁰Kii Unimbōti takaldau nín lī puee, yii: “Unil bàà ubò kaa bí ki bí deedee, bàà ubaanti, an kpá.
- ¹¹Ubò kaa bí ki cáá iciin. Ubò kaa bí ki nyàab Unimbōti.
- ¹²Bi-kòkò yīntiḡ-u ki wāḡkì, bàà ubò kaa bí ki ḡáán tiḡan, bàà uniseen, an kpá.
- ¹³Dikaakul din wāā ki núyee, mín ní tibōti tin bí bi-neenee bí. Bi cáá bi-limbiliḡ ki kííl binib, bi-nyinculiḡ nín tábití ki sòòn tiḡyee sá tilool kii ukoowaati lootee ní.
- ¹⁴Bi-nyōmmu poon ḡbí mbusu nì ntuntun.
- ¹⁵Bi yáb nnikpaakoon pu.
- ¹⁶Laakin kamaa bi yaa cūtèe, see bí cáá bi-timbiilii nì falaa niin.
- ¹⁷Baa nyí ḡgbansōḡfī saḡḡu.
- ¹⁸Baa fāḡkí Unimbōti bàà fiii.”
- ¹⁹Ti nyí yii marab nín sòòn tiḡyee kòkò, bi sòòn ki tì bin bin Unimbōti nīn tī u-marabee ní. Mín puee, ubò kaa dāa cáá kinyòkò kí wāān kí tī nnaakpal, kitiḡ pu yab kòkò dāa béetí yii bi sá binikpitib Unimbōti nimiin.
- ²⁰Di sá yii unil nín ḡúb marab mmōntiimin puee kaa ḡūn kí yàntī ú nīn bí deedee Unimbōti nimiin, kun puee marab tundi di péēsá bí dàkà binib kun di sá ikpitee.
- ²¹Ama kōḡkōnnee, Unimbōti dàkā min ní unil ḡūn kí dī kí kpántí deedeedaan u-nimiin kí taa dī marab puee: Mooisi takaldab nì Unimbōti bōnaatiliibi mun nīn sòōn an bōti pu.
- ²²an sá ti nín fōō Yeesu Kriisitoo ki kííyee pu ní Unimbōti kpánti-ti deedeedambi u-nimiin. Unimbōti kaa ḡántī binib, an sá ki tī bin kòkò fōō Yeesu ki kííyee,

- ²³kun puee báà ŋma ná ikpiti ki dátì Unimbòti nyooti.
- ²⁴Unimbòti nááń-ti tiŋan ki yàntì ti kpántí deedeede nib u-nimiin faalaa, Yeesu Kriisitoo nín dū u-ba ki fī-ti ki līyee pu.
- ²⁵Ún ní Unimbòti yḡon ki lē-ti saraa, u-fatikuu n pítí bin kəkōwoooo fḡḡ-u ki kííyee kpítii, bi nì Unimbòti kansikin n ṅāṅkì. Unimbòti ná mín kí dākà u nín sá deedeedaan puee ní. Di sá yii dooooyee u nìn jín kimotii kaa nìn dátí binikpitib tafaliṅ bi-kpítii pu.
- ²⁶Ama kəṅkənee, u dākā binib u-deedeede: u-deedeede di sá u dū Yeesu ki pān ti-kpítii pəndi, ní ki yī bin kəkō fòol Yeesu ki kííkée deedeedambi.
- ²⁷Mimmee, unil cáá nsan kí dākà u-baaa? Aayee, nsan kaa bí báà fiii. Ba pu ní a ká difiil? A nín nḡ Mooisi marabee puḡḡ? Aayee, an sá a nín fḡḡ ki kííyee pu.
- ²⁸Ti nyí yii unil un fḡḡ Yeesu ki kííyee di kpántí deedeedaan Unimbòti nimiin, an kaa sá marab bin u nḡyee pu.
- ²⁹An yaan sá marab puee, mimmee, Unimbòti bàà sá Juuda yab ṅmanīṅma Nimbòtiu naa! Waa bàà sá bin kaa sá Juuda yabee mun Nimbòtiu. Ama u sá báà ŋma Nimbòtiu.
- ³⁰Di sá yii u péésá Unimbòtibaanti ní, ki dàá yàntì Juuda yab bin gí ki fḡḡ Yeesu ki kííyee nì bin kaa sá Juuda yab, kaa gí, ki mun fḡḡ Yeesu ki kííyee kəkō n kpántí deedeedambi u-nimiin.
- ³¹Mimmee, an dākà yii ti yaa fḡḡ Yeesu ki kííyee, taa ti dù marab kí yíin tiba deeyaa? Aayee, an kaa sá mín. Nyunti gbanti ní ti nín tī marab mḡn.

Room 4

- ¹Mimmee, ti dàá sòon diyimḡol din timbi Juuda yab naanja Abraam nìn kée pu yii ba?
- ²An yaa sá Abraam tunnyaanṅi pu ní Unimbòti yíin-u deedeedaanee, u bàà ṅūn kí nīn dākà u-ba. Ama waa ṅūn kí dākà u-ba Unimbòti nimiin.
- ³Unimbòti takaldau poon lī yii ba ní? Yii: “Abraam nìn fḡḡ Unimbòti ki kíí, ní Unimbòti ká u-fookiiu un u cáá u-puee ní ki yíin-u deedeedaan.”
- ⁴Unil un tún ditundee, bi yaa pān-uee, baa lī yii bi pú-u fam, ama u-tundi paati ní u fḡḡ.
- ⁵Un kaa ná diba, ama ní ki fḡḡ Unimbòti un di yàntì binikpitib kpántí deedeedambee ki kííyee, Unimbòti yī udaan deedeedaan u-fookiiu pu.
- ⁶An di yāntì ní Dafidi nìn lī yii un bí dipḡḡpindinee di sá unil un Unimbòti yíin deedeedaan an kaa sá u-tuunṅi puee.
- ⁷“Bin bin Unimbòti dū bi-yìntitam ki pú-bi ki pítí bi-kpitiyee bí dipḡḡpindinaaaan!”
- ⁸Un ní ti-Dindaan kaa ti lī yii u ná ikpíteee bí dipḡḡpindinaaaan!”

⁹Mimmee, dipɔɔpindi gbanti sá ki tī Juuda yab bin gífèe ηmaniηma, kaa sá ki tī bin kíneeee? Ti dáá ká yii: “Abraam nín fɔ̃ɔ̃ Unimbɔti ki kííyee pu ní Unimbɔti yíín-u deedeedaan.”

¹⁰Dyunti ηulɔηu ní Unimbɔti yíín-u deedeedaan ní? U nín gíí ki dóòyeeyaaa u nín kaa láá gííyee? An kaa sá u nín gíí ki dóòyee ní u lī, an sá min waa láá gííyee ní u nín lī.

¹¹Boonee ní Unimbɔti bí Abraam í gíí án nīn sá kudaanηu yii u sá deedeedaan u-fookiiu pu. Mīn puee, bin kɔkɔ fɔ̃ɔ̃ Unimbɔti ki kíí, kaa gífi ki sá deedeedambi Unimbɔti nimiinee, bi-baa di sá Abraam,

¹²ní u sá bin gííyee mun baa, kaa sá bi nín gííyee ηmaniηma pu, an sá bi nín fɔ̃ɔ̃ ki kííyee pu, kii ti-baa Abraam mun nín nín fɔ̃ɔ̃ ki kíí pu, kaa láá gííyee.

¹³Unimbɔti nín pɔ̃ɔ̃n Abraam nì u-naantiibi yii u dàá dāá dū duulnya kí tī-bi. An kaa sá Abraam nín nín nóó marabee pu ní u nín pɔ̃ɔ̃n-u mīn, an sá u nín nín fɔ̃ɔ̃ Unimbɔti ki kíí Unimbɔti yî-u deedeedaanee pu.

¹⁴An yaa sá tí nīn tó marab ní kí fɔ̃ɔ̃ tin Unimbɔti pɔ̃ɔ̃n-tee mimmee fookii ηá fam dee, ní Unimbɔti poondi kaa ti bí tiban.

¹⁵Di sá yii marab cāabín ditafadaaldi ní, ní laakin marab kpée, marab yintitam mun kpá.

¹⁶Mimmee, ti ká yii ti nín fɔ̃ɔ̃ Unimbɔti ki kííyee pu ní ti fòol̄ tin u pòontí-tee. An sá Unimbɔti ηanti pu ní an bí mīn ki tī Abraam maaliηu kɔkɔ. An kaa sá ki tī bin tó Mooisi marabee ηmaniηma, an sá ki kpáan bin kɔkɔ fɔ̃ɔ̃ Unimbɔti ki kíí kii Abraam nín nín fɔ̃ɔ̃ ki kíí puee. Timbi bin kɔkɔ fɔ̃ɔ̃ ki kííyee baa di sá Abraam.

¹⁷Unimbɔti lī u-takaldau poon mīn ní yii: “M dū-si ki kpántì atimbun tikpil baa.” Unimbɔti un fikitī bitan̄kpiibi ki wāl̄ tin kaa láá bée kii tì bée, Unimbɔti un pu Abraam nín mákée yāntì u sá ti-baa.

¹⁸Abraam nín nyí yii tiba kaa bí ki dākà yii u dàá màal̄ kibiki, ama ní ki fɔ̃ɔ̃ Unimbɔti bɔti ki kíí, ki máká yii u dàá màal̄, ní ki lafun dūu kpántì atimbun tikpil baa, kii Unimbɔti nín nín péē tükū-u puee yii: “A-maaliηu nín dàá nīn wīkí min nyɔkɔmee dee.”

¹⁹U nín púl̄ ki bàñ abin dilaataal. U yaa kpēē u-bee, u-wunti pēefi, ní u yaa tí kpēēu-nimpuu Saaraayee ú mun kpántì unimpunaati, bi-liitil jítì mmaal pu, ama ní u-mákal dáá gbíntì pōō.

²⁰Waa fá u-mákal kí dākafi yii Unimbɔti kaa ηūn kí ηá tin u pɔ̃ɔ̃nee, ama u-mákal tī-u mpon ní u nyóηki Unimbɔti,

²¹ki bēē u-pobilin yii, ibaaṁn, Unimbɔti cáá mpon ki dàá ηá min u pɔ̃ɔ̃nee.

²²An pu ní Unimbɔti yíín-u deedeedaan.

²³An kaa sá ùn baba pu ní an ηmān̄ yii Unimbɔti yíín-u deedeedaan,

²⁴an sá ti mun pu, kun puee Unimbɔti kpèé-ti yii ti mun sá deedeedambi dimákal din ti cáá ùn Unimbɔti un fikiti ti-Dindaan Yeesu ditaŋkpiilinee pu.

²⁵Ti-kpitii pu ní Yeesu kpî, ní ki fikiti, ti mun n̄ ηmā kí kpántí deedeedambi Unimbɔti nimiin.

Room 5

¹Mimmee, ti ká yii ti nín fṣṣ-u ki kíyee pu ní ti kpántì deedeedambi Unimbɔti nimiin, ní ti n̄ Unimbɔti kansikin ηǎŋkì ti-Dindaan Yeesu Kriisitoo pu.

²Yeesu Kriisitoo puee ní ti ηún ki jéetì diyimool din poon ti bí nee, ti nín fṣṣ-u ki kíyee pu. Ní kun mōn-tee di sá ti cótí yii ti dàá kó Unimbɔti nyootin.

³Ali gba, ti nín j̄n̄ falaa puee, an mōn-ti, kun puee ti nyí yii falaa di yàntī unil n̄ p̄oòn u-ba,

⁴ní dip̄oondi n̄ yàntī unil n̄ ηmā kí já kí nyā diniminaamandin, ní ki kíñ ki k̄a ki cótí yii Unimbɔti nín lī puee u dàá ηá mín.

⁵Taa cótí fam, kun puee Unimbɔti pú-ti u-Fām min min gbēentí ti-p̄obiliŋ Unimbɔti neendee.

⁶Ti nín n̄n̄ dáá bí iwofin ki ná Unimbɔtee, ní nyunti ηun u yóoñee bāań, ní Kriisitoo kpî binikpitib pu.

⁷An p̄ōō unil n̄ k̄í k̄í kpú deedeedaan pu, an yaa ȳi ní ni k̄ántí ubo n̄ k̄í k̄í kpú unim̄onti pu.

⁸Ama Unimbɔti dākà-ti u nín n̄eēn-ti min bulfee di sá yii, nyunti ηun ti dáá sá binikpitibee, Kriisitoo kpî ti-pu.

⁹U nín kp̄iyyee, ní u-fatikuu yānti ti kpántì deedeedambi Unimbɔti nimiin. Kin, an dàá ηá mana ní k̄oŋk̄oñnee waa làá ηmā kí f̄i-ti tí taa kó Unimbɔti ηuulin?

¹⁰Doooyee, ti n̄n̄ dáá sá Unimbɔti nannanliibi ní, ní u-Jip̄oon kúm di ηǎŋkì ti-kansikin, ní ti kp̄íki. K̄oŋk̄oñnee, ti kp̄íki ki d̄òd, ní u-Jip̄oon bí dimaŋfalín, kin, an dàá ḡitī ηá mana ní taa làá ká difiil?

¹¹Tiba mun ḡitī sò: ti-Dindaan Yeesu Kriisitoo yānti ti n̄ Unimbɔti kansikin ηǎŋk̄e, ní ti bí ki f̄aal Unimbɔti pu.

¹²Unibaanti Adam pu ní ikpiti d̄i ki k̄ónní duulnyan, ní ikpitee cáań ηkúm, ní báa ηma k̄u, kun puee báa ηma ηá ikpiti.

¹³Doooyee, kí w̄atī Unimbɔti n̄ n̄n̄ t̄i Mooisi marabee, ikpiti n̄n̄ péēbí kitiŋ pu dee. M̄in ní marab yaa kpá, baa ηūn̄ kí l̄i yii unil ηá ikpiti.

¹⁴N̄n̄ mín̄ k̄ōk̄oee, kí ȳoñ̄ Adam yuntiŋu kí d̄āá s̄ā Mooisi yuntiŋuee, ηkúm di n̄n̄ j̄ín̄ báa ηma, ki kp̄aañ̄ binib̄ bin̄ kaa ηá ikpiti k̄i Adam n̄n̄ ηá puee. Adam n̄n̄ sá Yeesu un̄ d̄āa d̄ómiń̄ boonee naŋku ní.

¹⁵Ama Adam ỳntitam ńn cáán-ti tiyee kaa pēē nì tin Unimbɔti pūn-ti faalaayee. Tiŋman, binib kupaaú kp̄i unibaanti Adam ỳntitam pu, ama Unimbɔti ńn ɣáán binib tiŋan puee, ní u dū diyimɔl bulfi ki pú binib kupaaú unibaanti Yeesu Kriisitoo pu.

¹⁶Unimbɔti pɔl ńn tūn ditundi diyee nyán di-ba nì unibaantee kp̄itii tundi. Unibaantee kp̄itii ńn cáán-ti kun kuɣee di sá ɣkúm. Unimbɔti ɣanti tin u pú-ti faalaayee ńn cáán-ti kuɣee di sá, a-kp̄itii yaa yānti ki w̄ikí min kamaa, see ú dūú p̄-si.

¹⁷Tiŋman, unibaanti ỳntitam pu ní ɣkúm jín báà ɣma. Ama Yeesu Kriisitoo ubaanti pu ní binib f̄ɔɔ tiŋan tin bulfi Unimbɔti ɣée. U pú-bi bí n̄n bí deede u-nimiin, bidambi n̄ n̄n cáá mmaŋfafɔkɔn ḱ j̄i dibeel.

¹⁸Kii Adam baba kp̄itii ńn cáán nnibiyaamu kɔkɔ ɣkúm puee, Yeesu Kriisitoo tundi din u tún nì deedeeyee yānti nnibiyaamu kɔkɔ ɣūn ḱ kp̄ánti deedeedambi ḱ ká mmaŋfafɔkɔn.

¹⁹Kii unibaanti ỳntitam ńn kón binib tikpil ikpitin puee, mín ní unibaanti ńn tó Unimbɔti puee di cānti binib tikpil dàá kp̄ánti deedeedambi.

²⁰Mara ún dómiń ikpiti n̄ w̄iń ní. Ama ikpiti yaa yānti ki w̄ikí min kamaa, Unimbɔti ɣanti w̄ikí ki j̄itiń-i.

²¹An di ỳ-ti ní, kii ikpiti ńn n̄n jín báà ɣma ki cáán ɣkúm puee, Unimbɔti ɣanti kín ki j̄iń mpaan binib n̄ kp̄ánti deedeedambi ḱ f̄ɔɔ dimaŋfal din kaa cáá dikuntilee ti-Dindaan Yeesu Kriisitoo pu.

Room 6

¹Mimmee, tí l̄i yii ba? Tí n̄n gb̄int̄i ɣáán ikpiti ní Unimbɔti ɣanti n̄ w̄ińnaaan?

²Aayee, kpataaa! Timbi bin kp̄i ikpiti jandi puee, mana ní ti ḡit̄i ɣūn ḱ n̄n bí ki ɣáán ikpiti?

³Naa nyí yii, timbi bin kɔkɔ bi f̄ul̄ Unimbɔti nyim ti ɣá ubaanti n̄ Yeesu Kriisitooyee, ti kp̄afi ki kp̄i u-kúm min u kp̄iyee níin?

⁴Kii bi ńn f̄ul̄-ti Unimbɔti nyim puee, bi síb-ti tí n̄n bí ɣkúmin n̄ Yeesu dee, ní kii ti-Baa Unimbɔti ńn dū u-p̄ɣkpaŋɣu ki fikiti Yeesu Kriisitoo ditaŋkpiilin ki f̄ati ḡińńi-u dimaŋfalin puee, mimmee, ti n̄ u kɔkɔ di kín ki bí dimaŋfap̄ondin.

⁵Di sá yii timbi n̄ u yaa kp̄afi ki kp̄i u-kúmee, mín mbaantiim ní ti n̄ u kp̄afi ki fikiti difikitibaantiil.

⁶Tí béémaan yii, ti ńn n̄n bí min min dooooyee, ti-bimbim gbanti kp̄i n̄ Yeesu ndɔpantikaa pu. Mimmee ti-bimbikpitim kp̄i dee, tí taa ti n̄n sá ikpiti yumbui.

⁷Di sá yii un yaa kp̄iyee, ún nyán ikpiti ɣaan dee.

⁸Ti n̄ Kriisitoo yaa kp̄afi ki kp̄i, ti nyí yii ti n̄ u dàá kp̄afi ḱ n̄n tí bí dimaŋfalin.

- ⁹Ti nyí yii, Kriisitoo nín kpî ki fâtii fikitèe, waa ti bí kí kpú ñwiin dal, ñkúm kaa ti cáá u-pu mpɔn.
- ¹⁰U nín kpîyee, u kpî diba pu ki kúnti ikpiti, ní kaa ti dàá kpú jaanjaan. Kɔŋkɔnnee, u nín bí dimaŋfalinee, u bí ki t̄i Unimbɔti ní.
- ¹¹Mín mbaantiim, ni nì Yeesu Kriisitoo nín ñá ubaanti puee, ni mun á n̄n nyí yii ni kpî ikpiti jandi pu, ki kíñ ki bí ki t̄i Unimbɔti.
- ¹²Mim mee, ikpiti á taa ti j̄i ni-wunti tin bí ki dàá d̄á kpúee-ni mpaan, ní taa n̄n n̄óó ni-landɔkɔkpiti n̄n là puee.
- ¹³Ní taa ti d̄u ni-wunti jaŋŋi kí t̄i ikpiti á n̄n cáá-ŋi ki ñááñ min kaa bí deedeeyee; d̄umaan ni-ba kɔkɔ kí t̄i Unimbɔti, kii binib bin kpî ki fikitèe, ú n̄n cáá ni-wunti jaŋŋi ki t̄un atuun ñin bí deedeeyee.
- ¹⁴Di sá yii ikpiti kaa ti máañ kí n̄n j̄in ni-pu mpaan, kun puee marab kaa ti cí-ni, Unimbɔti ñanti di kíñ ki cí-ni.
- ¹⁵Mim mee, tí lì yii ba? Tí n̄n gb̄int̄i ñááñ ikpiti kun puee marab kaa ti cí-ti, Unimbɔti ñanti di kíñ ki cí-tee puɔɔ? Aayee, kpataaa!
- ¹⁶Naa nyí yii a yaa s̄intiñ a-ba taapu ki t̄i unil ki t̄un u-tundee, a kpánti uyumbu ní ki t̄i udaan un a s̄intiñ a-ba ki t̄iyeeeee? A ñun kí s̄intiñ a-ba kí t̄i ikpiti in dàá cáá-si ñkúminee, ki tí ñun kí s̄intiñ a-ba kí n̄n tó Unimbɔti kí kpánti deedeedaan.
- ¹⁷Ama tí j̄aam̄maan Unimbɔti kun puee ni n̄n sá ikpiti yumbui dooooyee, ní kɔŋkɔnnee ni s̄intiñ ni-pɔbiliŋ kɔkɔ ki t̄i ibaam̄on in bi d̄ak̄a-ni kii bi n̄n d̄ak̄a an kɔkɔ puee.
- ¹⁸Ni nyáñ ikpiti yuŋkun ki kó deede tuuŋŋi yuŋkun dee.
- ¹⁹Ni n̄n kaa gb̄il̄ tibɔti taapu malaayee pu ní m d̄u kuyun̄u bɔti tin tin binib nyée ki d̄u ñá tibɔŋmantikaal. Di sá yii, dooooyee, ni n̄n d̄u ni-wunti jaŋŋi ní ki t̄i tijɔkɔndi, ki ñááñ min kaa kítèe ní ki m̄t̄i kó diyintilin. Kɔŋkɔnnee, ní f̄at̄i d̄umaan ni-wunti jaŋŋi kí t̄i deede tuuŋŋi kí kpánti circir nib.
- ²⁰Dooyee, ñyunti ñun ni n̄n sá ikpiti yumbuiee, ni n̄n tó ni-ba tiba kaa páb-ni ní ñá min Unimbɔti lèe.
- ²¹Ba biliŋ ní ni n̄n lòon ní? Atuun ñin ni n̄n ñáañee, d̄in pu nee ñi cáá-ni icoo, atuunee di c̄ab̄in̄ ñkúm.
- ²²Kɔŋkɔnnee, ni nyáñní ikpiti ki kpánti Unimbɔti yumbui. Abil ñin ni lòon niinee di sá circir tuuŋŋi, ní boonee, dimaŋfal din kaa cáá dikuntilee d̄o ki cí-ni.
- ²³Tipaal tin ikpiti p̄ee di sá ñkúm, ama tin tin Unimbɔti p̄un faalaayee di sá á ñá ubaanti n̄n ti-Dindaan Yeesu Kriisitoo kí ká dimaŋfal din kaa cáá dikuntilee.

Room 7

- ¹Nnabiyaamu, m pàkà yii m bī sòòn nì binib bin nyí marabee ní. Ni nyí yii mara cáá mpòn unil pu nyunti ñun u dáá bí dimañfalinee ñmaninma ní.
- ²Mín ní, unimpu yaa món ticatee, mara bóób-u ki nákañ u-cal nyunti ñun u dáá bí dimañfalinee. U-cal yaa kp̄yee, mara búti-u ki nákatì u-cal un u nìn nákéee dee.
- ³Mimmee, unimpu cal yaa dáá bí, kaa kp̄ñ, u yaa yíkì món ubóee, bi ñūn kí yíín-u kinimpulaakpaai. U-cal yaa kp̄yee, mara un bóób-u ki nákañ u-calee cúū búti dee, u ñūn kí mōñ uninjapōon ubo. Niinee, baa ti yî-u kilaakpaai.
- ⁴M-nabiyaamu, mín mbaantiim, ni nín kpáfì ki kp̄i nì Kriisitoo puee, ni-kúmee yākatì ni nì marab kansikin. Kōḡkōnnee, ni kìn ki sá Kriisitoo un fikiti ditaḡkpiilinee yab ní; tí lòòn abimōnti kí tī Unimbōti.
- ⁵Doooyee, ti nín nìn dáá bí ki ḡáañ ti-ba lamme, marab nìn tútuñ ti-landōkōkpitii in téekí-ti, ti ḡáañ atuun ḡin cáñ-ti ḡkúminee.
- ⁶Doooyee, marab nìn cúú-ti kuyunū, ama kōḡkōnnee ti yākatì tōbin, baa ti cáá ti-pu mpòn, ti tó ti-ba. Mín puee, ti ñūn kí tō ditundi min ní Unimbōti Fām kpòotī-tee, an kaa ti sá min min takalda poon marab nìn kpòotī-ti doooyee.
- ⁷Mimmee, tí lè yii ba? Marab sá ikpiti deeyaaa? Aayee kpataaa! An yaa kaa sá marab pu maa bàà nyí kun di sá ikpitee. Di sá yii marab yaa kaan lī yii: “Á taa nín cáá nnimitaataam”, maa bàà nyí kun bi yii nnimitaataamee.
- ⁸Marab lī mimmee, ní tikpitil ká nsan kí kōñ-mi tiwan kōkō nnimitaataam. Di sá yii, marab yaa kpée, ikpiti kaa cáá mpòn.
- ⁹Doooo min marab nìn kpée, m nìn bí dimañfalin, ní marab nín bāánee, ikpiti dómín ki fōō mpaan,
- ¹⁰ní man kp̄ñ. Mimmee, marab bin bàà sá ukpootil kí cáá-mi dimañfalinee fātii téé-mi ki tó ḡkúmin.
- ¹¹Ní ikpiti dī marab pu ki ká nsan ki kíil-mi ki kūū-mi marab gbanti pu.
- ¹²Marab bi-ba bí circir, ní isaḡki in bi sḡkí-tee mun bí circir ki bí deedee ki ḡāñ.
- ¹³Mimmee, tin sá tiwammōntiilee di cááñ-mi ḡkúmaaan? Aayee, kpataaa. An sá ikpiti di cááñ mín, ki dūu dīñ tiwammōntiil pu ki kūū-mi, ki dākā i nín sá ikpiti inḡyee mbaamōmin. Marab puee, ti béè yii ikpiti kaa lafun sàafi.
- ¹⁴Ti nyí yii marab lafun sá Unimbōti wanti. Ama ní man sá nniwunḡban, ikpiti dá-mi, m sá i-yumbuu.
- ¹⁵Maa nyí tin m ḡáánee, kun puee maa ḡááñ tin m bàà là kí ḡée, ní ki ḡááñ tin tin m ná, kaa bàà là kí ḡée.
- ¹⁶M yaa bī ḡááñ tin tin maa là kí ḡée, mimmee m béè yii marab ḡāñ dee.
- ¹⁷Mimmee, an dākà yii an kaa sá man m-ba di bī ḡááñ tikpitil, an sá ikpiti in bí m-nee di ḡááñ.

¹⁸M nyí tiŋman yii tiŋan kaa bí m-ni, an dākà yii m-wuntin. Nì min kòkò m bàà cáá nlandòkòmònti kí ǵá tiŋanee, mpòn kpá m ǵmā kí ǵá.

¹⁹Tiŋan tin m bàà là kí ǵée, maa ǵáań tìń, tikpitił tin maa bàà là kí ǵée, tìń ní m ǵáań.

²⁰Mimmee, m yaa bí ǵáań tin tin maa bàà là kí ǵée, an kaa ti sá mama m-ba di bí ǵáań, an sá ikpiti in bí m-nee di bí ǵáań.

²¹M dáań ki ká yii m yaa làá ǵá tiŋanee, maa ǵūń, see ikpiti ní m ǵūń kí ǵá.

²²M-pòbilinee, Unimbòti marab di fáatì-mi,

²³ama m ká yii mpòn ǵubò bí m-wunti nì ti-janŋin ki ǵáań kun kun m-landòkòŋu fáatèe, ki dū-mi ki nyáfiń ikpiti pòŋŋu ǵun bí m-wuntinee.

²⁴Man niminaamandi neeee! Tiwun nee dátì-mi ki càn ǵkúmin, ǵma di dàá fī-mi kí líí?

²⁵Tí ǵāammaan Unimbòti ti-Dindaan Yeesu Kriisitoo un fiī-tee pu! Mimmee, m-landòkòŋu poonee m bàà là kí nòó Unimbòti marab, ama iwòfi in bí m-wuntinee là kí nòó ikpiti.

Room 8

¹Kòŋkòneee, bin bin nì Yeesu ǵá ubaantee, dibòkpil diba kaa ti dō ki cí-bi.

²Kun puee Unimbòti Fām min tī-ti dimaŋfal ti nì Yeesu Kriisitoo nín ǵá ubaantee pu, u-Fām gbanti pòŋŋu nyántì-ti ikpiti nì ǵkúm pòŋŋun.

³Di sá yii Mooisi marab kaa nìn ǵún ki ǵá mìn, kun puee binib bí iwòfin, kaa ǵūń kí nòó marabee. Ama ní Unimbòti dū ún u-ba Jipòon ki túnní, u dómíń ki cáá tiwumbaantiil kii timbi bikpitibee, ki ǵún ki lēīkpiti. Unimbòti ǵá mìn ki kúnti mpòn ǵun ikpiti cáá binib puee.

⁴Mimmee, timbi bin kaa nòó mbimbikpitim ama ní ki nòó Unimbòti Fām nín kpòotī-ti puee, ti kpántí deedeedambi kii marab nín là puee dee.

⁵Bin bin nòó mbimbikpitimee nyàab kí nīn ǵáań tin fáatì-bee ní, ní bin nòó Unimbòti Fāmee mun nyàab kí nīn ǵáań tin Unimbòti Fām lèe.

⁶Mbimbikpitim nín là tiwan tiŋyee di cāabín ǵkúm. Unimbòti Fām nín là kun kuŋyee di cāabín mmaŋfafòkòn nì ǵgbansòŋfi.

⁷Bin nòó bi-bimbikpitim nín là puee sá Unimbòti nannanliibi, kaa sìnṭīn bi-ba ki tì Unimbòti marab, kaa péēŋūń gba.

⁸Bin nòó bi-bimbikpitim nín là puee kaa ǵūń kí fáatì Unimbòti.

⁹Ama nimbee, nimbi kaa nòó ni-bimbikpitim nín là puee, min min Unimbòti Fām lèe, mìn ní ni nòó, kun puee u-Fām kòdò ni-ni. Un yaa kaa cáá Kriisitoo Fāmee, kaa sá u-you.

- ¹⁰Kriisitoo yaa bí a-ni, nì min kòkò ikpiti puee a-wunti dàá kpúee, Unimbòti Fām dàá tī-si mmanfáfòkòn kun puee a bí deede.
- ¹¹Unimbòti un fikitì Yeesu Kriisitoo ditanjpiilinee Fām yaa kòò a-nee, Unimbòti gbanti un fikitì Kriisitoo ditanjpiilinee dàá dàá yàntì u-Fām min kòò a-nee n tī a-wunti tin kùyyee dimanjfal.
- ¹²Mimmee, m-nabiyaamu, taa ti cáá ti-bimbikpitim dipòndi diba, kí nīn njaan mi nín là puee.
- ¹³Ni yaa gbintì ki njaaan min ni-bimbikpitim lèe, ni kùu ní. Ama Unimbòti Fām pòngju puee, ni yaa kùu tin ni-bimbikpitim là ní njee, ni kántì dimanjfal.
- ¹⁴Di sá yii bin kòkòwoooo Unimbòti Fām kpòotēe sá Unimbòti biyaamu ní.
- ¹⁵Mimmee, naa ti máan kí nīn gbintì fànkí kii iyumbuee, kun puee ni fòò Unimbòti Fām min yāntì Unimbòti fòò-ti ti yī-u yii ti-Baayee,
- ¹⁶ní Unimbòti Fām mi-ba tükù ti-pòbiliŋ poon yii ti sá Unimbòti biyaamu.
- ¹⁷Ti nín sá u-biyaamu puee, ti fòòl u-gaajawanti. Ti nì Kriisitoo di dāa fòòl-tì. Ti yaa kpāfi ki jīn falaayee, boonee ti nì u di dāa tí fòòl tinyool.
- ¹⁸M nyí yii falaa un ti bī jīn ti-yuntiŋu nee kaa wīkí ki bān Unimbòti nyooti tin u dàá dàá tī-tee.
- ¹⁹Unimbòti nín náan tiwan tin kòkòee jiki ki cí nwiin nŋun Unimbòti dàá dàá tī u-biyaamu tinyool báa nma n kée.
- ²⁰Di sá yii yilpu nì taapu njá fam, kaa sá yii bi là, Unimbòti di yāntì an njá mín. Nì min kòkò bi kpántì famee, bi máká yii
- ²¹bi dàá dàá nyā ntimbiil gbanti yuŋkun kí kpāfi nì Unimbòti biyaamu kí tō bi-ba ní kí fòò tinyool.
- ²²Ti nyí yii yilpu nì taapu kòkò bí falaan ali ki dāa sāa dīn kii upòdaan nín yáliŋkí imatiŋween puee.
- ²³An kaa sá bīn baba, ki kpáan timbi bin Unimbòti tū u-Fām min yāntì ti dáká tin bí ki dòoŋee, ti mun bí ki yáliŋkīn ti-ba ki cí nŋunti nŋun ti dàá kpántì Unimbòti biyaamu mbaamominee, an dákà yii nŋunti nŋun u dàá dàá fī ti-wunti mun kí líyyee.
- ²⁴Mimmee, ti ká difiil, ama ní an dáá nín bí dimákalin. A yaa ká kun kun a máké, an kaa ti sá dimákal, kun puee tiwan tin a fòòyyee, a gítì nŋūn kí nīn máká ti-puoo?
- ²⁵Ti yaa máká tin taa láa kée puee, see tí jī kimotii kí nīn kpèe nsan pú.
- ²⁶Mín mbaantiim ní Unimbòti Fām bí ki tútuŋ timbi biwofib, kun puee taa nyí min máan tí mèyyee, ama u-Fāmee mi-ba yáliŋkí ki jitiŋ anyoobun nín nŋūn kí sòon tiboti tiŋyee ki mèe Unimbòti ti-pu,
- ²⁷ní Unimbòti un wāl binib pòbiliŋ poonee béetì kun u-Fām lèe, kun mi mèyyee nóó nì kun Unimbòti là kí tī u-yabee ní.

²⁸Ní ti nyí yii tin kòkò péèbàń bin néén Unimbòtee, Unimbòti cáā kpántí tiŋan ní ki tì-bi. Bín ní u bóntì ki lēēki síiń yii bí nīn sá u-yab.

²⁹Bin u gāntì dooooyee ní u lēēki yóoń bí kpántí kii u-Jipōon nín bí puee, an nín dàá ŋá pu u-Jipōonee n nīn sá ukpil u-nabiyaamu mun sá kunipaauee kansikinee.

³⁰Bin bin u lēēdooooyee ki yóońee, u yíiń-bi. Bin u yíínee, ní u yāntì bi kpántì deedeedambi Unimbòti nimiin, ní bin bin u yāntì bi kpántì deedeedambee, u kòń-bi u-nyootin.

³¹Ti dàá gítì lì tibòti nee pu yii ba dee? Unimbòti yaa yú ti-boonee, ŋma di gítì ŋūń kí ŋá-ti tiba?

³²Timbi pu ní Unimbòti kaa tāań ùń u-ba Jipōon ki dū-u ki ŋá saraa, mana ní u ŋūń kí yíí kí taa tī-ti tikòkò kí kūtì u-Jipōonee pu?

³³Unimbòti bí yii bin u lútèe sá deedeedambi, kin, ŋma di gítì ŋūń kí ká tikpitil tiba bi-pu kí sòoń?

³⁴Yeesu Kriisitoo un kpìi ki kpáāā fikitì mun ki kā Unimbòti ŋaŋgiil púee bí ki mèe ki tì-ti; kin, ŋma di gítì ŋūń kí kpò ti-bòti?

³⁵Dineendi din Kriisitoo cáá ti-puee, tiba ŋūń kí yàkatì ti-kansikinaaan? Falaa di ŋūń kí yàkatì-taaa, diniminaamandaaa, disaandaaa, ŋkùmaaan, disoolaaa, mbusaaa, ŋkúm?

³⁶Kii Unimbòti takaldau poon nín lī puee yii: “Sii ti-Dindaan pu ní, kí yòoń kutaafaau kí dāā mó-kuee ti tūŋkí ŋkúm, ní bi ŋáań-ti kii ipii in bi cāń kí kpòee.”

³⁷Tiń kòkò poonee, un néén-tee tútuń-ti ti jáà ki jīń ki kúntí tikòkò.

³⁸M nyí ibaamōn poon yii tiba kaa ŋūń kí yàkatì dineendi din bí timbi nì ti-Dindaan kansikinee: ŋkùmaaan, dimaŋfalaaa, Unimbòti tūuniaaaa, an yaa tí sá abeedambi bin baa wāleeyaaa, tin tin poon ti bí kōŋkōnneeyaaa, tin bí ki dòońeeyaaa, mponđambaaa,

³⁹an yaa sá tin bí yilpuee nì tin bí taapueeyaaa, an yaa tí sá tiwannáaŋkaal tin kòkò kíneeyaaa, bàà tiba nì tiba kaa ŋūń kí yàkatì timbi nì dineendi din Unimbòti dī ti-Dindaan Yeesu Kriisitoo pu ki dākā-tee.

Room 9

¹M sòoń ibaamōn kii Kriisitoo you nín máań kí sòoń puee ní, maa móntí, Unimbòti Fām mun sòoń m-pòbil poon yii an sá tiŋman,

²yii m-pòbil poon gbí kunimbaakpaanŋu ní m yálinjí baabadal,

³m yaan ŋūń Unimbòti n ŋá-mi fam, man nì Kriisitoo n yàkatì tōbin, m-nabiyaamu man nì bin pēemmaalee n ŋmā kí ká difiilee, m bàà là.

⁴M-nabiyaamu gbanti di sá Israyeel yab bin Unimbòti lútì bí nīn sá u-biyaamuee, ní u nì u-walŋiŋu nìn kòd bi-kansikin, ní u ŋá nnyōopee nì bi, ki tī-bi marab ki dākā-bi min ní bi dàá nīn jáań-uee, ki pōoń-bi ipoon.

⁵Bi-naanjab sá Jaakob biyaamu saalaa nì mulee ní, a yaa kpēētinitanee, Kriisitoo mun sá bi-maaliṅu poon, Kriisitoo un di tókó tikokó nì tikokó pu ki sá Unimbōti un máan inyōṅki baabadal kí nīn péécá jaanjaanee! Ameen.

⁶Israyeel yab nín kaa fṣṣ Yeesu ki kíyee, an kaa dākà yii Unimbōti poondi ṅá fam. Di sá yii an kaa sá bin kókó nyánní Israyeel maaliṅunee di sá Israyeel yab páaa,

⁷ní bin kókówoooo nyánní Abraam maaliṅunee kaa sá u-biyaamu páaa, kii Unimbōti nín nìn sòōn nì Abraam puee, yii: “See Isaaki biyaamu baba di dàá fṣṣ a-yindi.”

⁸An dākà yii an kaa sá mmaal ṅun ti nyí nee di màal Unimbōti biyaamu. Abraam naantiibi bin Unimbōti nìn pṣōn ki tīyee baba di sá bimōntiibi,

⁹kii Unimbōti nín nìn pṣōn-u puee yii: “Ḍyunti ṅun m yóoṅee yaa bāaṅee, m dàá dāān, ní a-nimpuu Saaraa í màal kibininjabiki.”

¹⁰⁻¹²Tibōṅmantikaal tiba mun gítī sò: di sá ti-naanja Isaaki nimpuu Reebeeka nìn cáá atab ní. Kí wàatī ú màal mbiyaamu gbantee, baa láá nyán ki ṅá tiṅanaaan, kaa láá ṅá ikpiti, ní Unimbōti tükū Reebeeka yii: “Ukpil di dàá dāá nīn bí kiwaai taapu,” án ṅmā kí nóó nì Unimbōti nín lēēki síiṅ u-ban puee. Mìn ní u yii binib, kaa kpée bi-tūntotam pu,

¹³kii an nín ṅmān puee, yii: “M néeṅ Jaakob, kaa néeṅ Eesayu.”

¹⁴Ti yaa kpēēan bōti, ti dàá lì yii Unimbōti kaa sá ibaamōndaanaaan? Aayee, kpataaa!

¹⁵Di sá u nìn tükū Mooisi yii: “M dàá sō un m là kí fīyee saai, ní kí ṅá tiṅan bin m là kí ṅá tiṅanee.”

¹⁶Mimmee, an kaa nyēēn unil nín là pueeyaaa kaa nyēēn u-póōntam pu, Unimbōti di sūn unil saai kí fīi udaan.

¹⁷Unimbōti takaldau poonee, ti kánti yii Unimbōti tükū Eejipiti bōtiu yii: “Kun pu m baasii kāān-si dibeelee di sá m dī a-pu kí dākà m-pōṅṅu kí yànti ntimu kókó í bée m-yindi.”

¹⁸An dākà yii Unimbōti yaa là kí fīi binibaaa, u yaa tí là kí nyiṅfi bi-pōbiliṅaaan, an bí ùn cee ní.

¹⁹An yaa yīi, ubo ṅūn kí bàlfi-mi yii: “Kin mimmee, ba pu ní Unimbōti gítī wòon nnibiyaamu? Di sá ubo kaa yíití min Unimbōti lèe.”

²⁰M dàá kii udaan yii: “Unil, a sá ṅma ní ki kpākantí Unimbōti? Tiwan tin bi mánee kaa ṅūn kí tükū un mán-tèe yii: 'Ba pu ní a mán-mi yéè?' “

²¹Uyōōmaati ṅūn kí dū kuyokou kí mā kun kun u yaa lèe: u ṅūn kí dū kí mā dibōmōntiil, kuyokōbaantiiuee, u tí ṅūn kí dū mā kinyinsaṅ.

²²Kin, Unimbōti faa? U cáá nsan kí gíi diṅuul kí dākà binib u-pōṅṅu. U jín kimōtii tikpil bin bàá máan ditafadaaldi ki ṅmānti bí kúnti-bee pu,

²³ní ki kpáàà là kí dàkà u-nyooti nín wīkí pu tikpil tikpil ki tī bin bin u fī ki bónti ki yóòh bí kó u-nyootinee,

²⁴timbi bin bin u lúti ki yíín Juuda yab nì bin kaa sá Juuda yabee kansikinee kòkò.

²⁵Mín ní u lī Oosee takaldau poon yii: “Bin kaa nìn sá m-nikitilee dàá dàá nīn sá m-nikitil, ní m dàá nīn kíh ki nééh bin maa nìn néééh,

²⁶ní laakin bi nìn tükū-bi yii baa sá man nikitilee, niin ubaanti ní bi dàá yíín-bi man Unimbōti un bée biyaamu.”

²⁷Ní Unimbōti bōnaatiliu Eesayi mun báakì ki sòòh Israyeel yab bōti, yii: “Báà Israyeel naantiibi yaa wīkí kii dibul din bí tīnku gbandee, bi-kansikin binib fihi di dàá kíh kí ηmátí,

²⁸kun puee ti-Dindaan dàá ηá tin tin kòkò u sòòh ki síh yii u dàá ηá kitiη puee malaa.”

²⁹Eesayi gbanti di nìn gítī sòòh tibōti nee ki yóòh doooyee, yii: “Ti-Dindaan ipōn kòkò daan yaa kaa bàà kíh-ti ti-maaliηu poon binib bibee, ti bàà kpánti kii Soodom tīnki nín nìn bí puee, ki bàà nááh nì Goomōr tīnki mun nín kúnti puee.”

³⁰Tibōti tin ti sòòh, ti dàá kúnti-ti yii ba? Bin kaa sá Juuda yab, kaa nìn nyàáb kí nīn bí deedeeyee, di kpánti deedeedambi Unimbōti nimiin, kun puee bi fōō-u ki kíí;

³¹ní Juuda yab bin nìn nyàáb kí nóó marab kí ηmā kí kpánti deedeedambee kaa ηún ki ηúb marab gbanti.

³²Ba yì-ti? Kun puee bi dàkafī yii bi-tuunηi pu ní bi ηūh kí nīn bí deedee, kaa nyàáb kí fōō Unimbōti kí kíí kí nīn bí deedee. Bi gbéeti ditaηkpal

³³din pu Unimbōti takaldau nìn ηmānee, yii: “Kpèè, m bìl ditaηkpagbéetikaal Siiyōn, ditaηkpal din líkí binibee. Un yaa fōō-u ki kííyee, icoo kaa làá jī udaan.”

Room 10

¹Nnabiyaamu, m-pōbil poon nín là miηyee nì tin tin m mée Unimbōti Israyeel yab puee di sá bí ká difiil.

²M ká bi-póòntam dinimbōtinoolin, ama, bi-póòntam gbantee, baa bée ki dód.

³Di sá yii baa bée min ní Unimbōti di ki kpánti binib deedeedambi u-nimiinee, ní ki bí nyàáb bi-ba saηηu ηun bi dàá dī kí kpánti deedeedambee. Bi yíi, kaa sīnti bi-ba taapu Unimbōti n kpánti-bi deedeedambi.

⁴Kriisitoo di dómín ki kúnti marab dītam. Kōhōnnee, bin kpánti deedeedambee di sá bin kòkò fōō Kriisitoo ki kííyee.

⁵Mooisi nìn ηmān marab dītam nín cāabiín deedee uηyee, yii: “Un yaa nóó marab deedeeyee kánti difiil bi-pu.”

⁶Ama deede un nyēén fookiinee nín sá puee sèé. Unimbōti takaldau sòòn yii: “A-pòbil poonee, taa lì yii, ñma di ñūn kí jōm yilpu?” (Taapu sá yii bí jōm kí cáán Kriisitoo),

⁷kí taa tí lì yii: “Ōma di ñūn kí sintī taapu ditan̄kpiilin?” (Taapu sá yii bí nyāntiñ Kriisitoo ditan̄kpiilin.)

⁸Mim mee, tí lì yii ba? Unimbōti takaldau lī yii: “Dinyōbundi gbanti bí ki kól-si, ki bí a-nyōkōn nì a-pòbilin.” Dinyōbundi gbanti di sá fookii bōti tin ti sòōnee, yii,

⁹a yaa lī binib cee yii Yeesu sá a-Dindaan ki yaa fōō ki kíí a-pòbilin yii Unimbōti fikiti-u ditan̄kpiilinee, a dàá ká difiil.

¹⁰Di sá yii un kamaa yaa fōō Yeesu ki kíí u-pòbil poonee, kpántí deedeedaan u-nimiin, ní un yaa lī u-nyōkōn yii u fōō-u ki kííyee, udaan kántí difiil,

¹¹kii Unimbōti takaldau poon nín lī puee, yii: “Un kamaa yaa fōō ti-Dindaan ki kííyee, icoo kaa jīn udaan.”

¹²Mim mee, digàntil kaa bí un sá Juuda yōuee nì un kaa sá Juuda yōuee kansikin. Bi-kōkō Dindaan sá ubaanti ní, ùn ñáán bin kōkō yī u-yindi ú fī-bee tiñan tikpil,

¹³kii an nín ñmāñ puee, yii: “Un kamaa yaa yīñ ti-Dindaan yindee kántí difiil.”

¹⁴Ama, bi yaa kaa fōō-u ki kíí, bi dàá ñá mana kí yīñ-u? Bi yaa kaa gbīl u-pu, mana ní bi dàá fōō-u kí kíí? Ubo yaa kaa bī sòòn u-pu, mana ní bi dàá gbīl?

¹⁵Unimbōti yaa kaa túnní binib, mana ní bi dàá sòòn-ti? Kii an nín ñmāñ puee, yii: “Bin sòòn tibōmōntiilee nín dòon bi-taan̄i ñānní puee.”

¹⁶Ama bi-kōkō kaa fōō tibōmōntiilee ki kíí, kii Eesayi nín lī puee, yii: “Ti-Dindaan, an kaa sá binib fiil di fōō ti-bōti ki kííi?”

¹⁷Mim mee bi gbīl ní ki nín fōō ki kíí ní tin bi gbīl ki fōō ki kííyee sá Kriisitoo bōti.

¹⁸Mín puee, Israyeel yab kaa gbīl tibōmōntiilee naaan? Bi gbīl-ti. An nós nì min an ñmāñee dee, yii: “Kitiñ kōkō gbīl bi-neeni pu, ní tibōti tin biñ^{1/2}

²⁰sòōnee bāñ kitiñgeennyōkō.”

¹⁹Mim mee, Israyeel yab kaa gbīl tibōtee taapu naaan? Mooisi nín nìn péé ki sòōn min bi-puee sèé: “Man Unimbōti dàá yāntī binib bin kaa bí tibanee í nīn jīn mmōn, ní án nīn wù nimbi, kí yāntī ní fōō diñuul binib bin kaa nyí iciinee pu.”

²⁰Ní Eesayi mun sòōn ki cánti yii: “Bin bin kaa nìn nyàab man Unimbōtee ká-mi, ní m cáá m-ba ki dākā bin kaa bālfī m-puee.”

²¹Ama tin u sòōn Israyeel yab puee sèé: “M tānti m-ñalii kutaafaau ali kujoou ki yīñ bin kaa tó-mi, bi-yiliñ pōōyee.”

Room 11

- ¹Mimmee, Unimbɔti fá Israyeel yab naaan? Aayee, kpataaa! Kun puee man m-ba sá Israyeel ní, ki sá Abraam naantuu, ní ki sá Beenjamin maaliḡun.
- ²Unimbɔti kaa fá u-nikitil din pu u péēnyí dooooyee. Naa kalin nyí Unimbɔti takaldau nín sòòn min ní Eelii nìn bī kókó Israyeel yab Unimbɔti nimiineeee? U bí yii:
- ³“Ti-Dindaan, bi kūū a-bōnaatiliibi ki wī a-saraafani, an péēkín man baba ní, ní bi nyàab kí kpò man mun!”
- ⁴Unimbɔti nìn kíf-u yii ba ní? U bí yii: “M kpáafi binib kutukub biluli, bi sá m-yab, bidambi tabiḡyiliḡ kaa gbāan diwaal Baal nimiin.”
- ⁵Mín mbaantiim, ti-yuntiḡu nee, an kíñ binib fiii bin Unimbɔti ḡá tiḡan ki lútì-bee.
- ⁶U ḡá bidambi tiḡan ní ki lútì-bi, an kaa sá bi-tunnyaanḡu pu. An yaan sá bi-tunnyaanḡu puee, mimmee Unimbɔti kaa ti ḡá-bi tiḡan dee.
- ⁷Tibɔti nee taapu sá yii ba dee? Israyeel yab nín nyàab kuḡyee, baa ká kudḡu, see bin Unimbɔti lútèe baba di ká kudḡu, ní u yāntì bin kíñee kaa ḡūn kí gbīl taapu,
- ⁸kii an nín ḡmān puee, yii: “Unimbɔti tātì bi-lam, ki yāntì bi-nimiliḡ kaa wāl, bi-tafaliḡ kpáá, ali ki dāa sāa dín.”
- ⁹Dafiidi mun lī yii: “Bi-jinti n̄ kpántì-bi kutaliḡu, kí n̄n sá-bi kulaanḡu, bí lítí ikpitin kí ká ditafadaaldi din máañee,
- ¹⁰bi-nimiliḡ n̄ jòb kí taa n̄n wāl! Yāntì bí n̄n péēbōō baabadal.”
- ¹¹Mín puee, Juuda yab nín gbéetèe, bi lítì kókó? Aayee, kpataaa! Ama bi-lítitamee di yāntì atimbun ḡin kókó kíñee ká difiil, an nín dāá ḡá pu bi yaa ká bin béeyee, bí mun n̄ nyàabee.
- ¹²Bi-yintitam yaa cáan kitiḡ kókó nib tiwammontiilee, ní bi nín wāḡkì puee yaa cáan bin kaa sá Juuda yabee tiwammontiilee, kin Juuda yab kókó yaa fātíñ Unimbɔti ceeyee, kun an dāá cáañee dāá n̄n bí mana dee?
- ¹³Kḡkḡnnee, m sòòn n̄ nimbi bin kaa sá Juuda yabee ní. Man sá Yeesu kpambal din u tú bin kaa sá Juuda yabee ceeyee ní, ní an mōñ-mi ditundi din u tī-mee pu,
- ¹⁴m-landḡḡu sá yii m̄ téé m-nabiyaamu Juuda yab bí nyàab kí ká kun bin béeyee cááyee, m̄ ḡmā kí fī bi-kansikin biba.
- ¹⁵Unimbɔti nín yī Juuda yab bí taa n̄n gítí sá u-yabee di ḡāḡkì binib bin kókó kíñee n̄ Unimbɔti kansikin. Mimmee, u yaa lāa fātii fōō Juuda yabee, an dāá n̄n bí mana dee? An dāa sá bin nìn kpíyee dimaḡfal ní.
- ¹⁶Bi yaa nìn cáan tijimpeepeekaal fiii ki tī Unimbɔtee, tin kíñee kókó, ún̄ di yì tìn mun dee. Unimbɔti di yaa yì busubu n̄ bu-nyaanee, ún̄ di yì asupan mun.
- ¹⁷Bi yaa gāa oliifi bumḡḡkisubu paḡḡi aba ní ki gāan sii kumooun subu pandi ki cáan ki túkuñ ḡin béeyee paani, ní a kíñ ki fōō busumontiibuee nyaani nyimee,

- 18**sii n̄ taa n̄n̄ lámintí ki dákà apan n̄n̄ bi gāa ki fée. A yaa bíi lámintí, á bée yii an kaa sá sii di tú inyaan, inyaan di tú sii.
- 19**A dāá tükù-mi yii: “Bi gāa apanee ki fá ní ki cáań man ki túkuń.”
- 20**Tiņman bi lafun gāa-ņi ki fá kun puee baa fōō Unimbōti ki kíi ní sii n̄n̄ fōō Unimbōti ki kíiyee pu ní a tókú niin. M̄n̄ puee, á f̄ańki kí taa n̄n̄ lámintí.
- 21**Di sá yii Unimbōti yaa kaa t̄aan̄ bumōņkisubu paņņee, á n̄n̄ nyí yii waa làá dāá t̄aan̄ si mun.
- 22**N̄n̄ nyí Unimbōti ŋanti n̄ u-tafadaaldi pu! U dáal̄ bin bin lítèe tafaliņ, ní ki ŋá sii tiņan. Á n̄n̄ gb̄intii bí u-ņanti gb̄antin, an yaa kaa sá m̄n̄, see ú dāá gāa-si kí fá.
- 23**B̄in̄ yaa kp̄ánti bi-bimbim ki fōō Yeesu ki kíiyee, u ŋūn̄ kí f̄at̄íi ḡīn̄n̄i-bi kí túkuń laakin u n̄n̄ gāa-bee. Di sá yii Unimbōti cáá mp̄on̄ kí ḡīn̄-bi kí túkuń mp̄om̄.
- 24**Kp̄èè, sii kumooun supandi din bi gāāyee, bi cáań-si ki túkuń bumōņkisubu bun kaa sá a-suyilee pu; mimmee, an kaa pōō bí ḡīn̄n̄i asupan n̄n̄ bi gāāyee kí túkuń disuyil̄ din pu ŋi n̄n̄ bí, bi gāa-ņee.
- 25**M-nabiyaamu, m là ní bée ibaamōn̄ iba i bí dibalin, an n̄n̄ dāá ŋá pu ní taa n̄n̄ ȳi ni-ba yii biciņf̄itiibe. Di sá yii Israyeel yab dijandi kaa ŋūn̄ kí gb̄il̄ tibōti nee taapu, kí dāá s̄ā ŋyunti ŋun̄ n̄timu mun k̄ok̄o k̄inee yab n̄ dāá kó difiilinee.
- 26**Min ní Israyeel yab k̄ok̄o dāá ká difiileee dee, kii an n̄n̄ péēņm̄ań puee, yii: “Ufiil̄ dāá nyān̄n̄i Siiyōn̄ ní kí l̄ēēikp̄iti in bí Jaakōb yab kansikinee kí fá.
- 27**Man Unimbōti yaa làā l̄ēēbi-kp̄itii ki fée, an di dāá sá dipoondi din m̄ pōōn̄-bee.”
- 28**A yaa kp̄ēēbi n̄n̄ fá tibōm̄ontiil̄ puee, bi kp̄ánti Unimbōti nannanliibi nimbi n̄ ká difiil̄. A yaa kp̄ēēUnimbōti n̄n̄ lút̄i-bi puee, bi sá bin u n̄eēnee bi-naanjab pu.
- 29**Di sá yii Unimbōti yaa pú ubō diyimōol̄ dibaaa, u yaa tí ȳīn̄-uaaa, waa kp̄ánti u-landōkōņu.
- 30**Doooyee, naa n̄n̄ tó Unimbōti, ama, Juuda yab n̄n̄ n̄n̄ ȳi, kaa fōō u-bōti puee ní u sún̄ ni-saai kōņkōn̄nee ki f̄ī-ni.
- 31**M̄n̄ mbaantiim, Juuda yab kaa tó Unimbōti kōņkōn̄nee ní Unimbōti sún̄ ni-saai, ama an sá bí mun n̄ ŋm̄a kí ká kōņkōn̄nee Unimbōti saasol̄ ní.
- 32**Mimmee, Unimbōti yānti binib k̄ok̄o gb̄int̄i bi-ȳint̄itam poon, ú ŋm̄a kí dákà bi-k̄ok̄o u n̄n̄ sūn̄ binib saai puee dee.
- 33**Óo, Unimbōti ciini n̄ u-nyítam̄ n̄ u-ņanti w̄īk̄éee, an kaa cáá bi l̄i! U n̄n̄ ŋáań u-bōti miņyee, unil̄ kaa ŋūn̄ kí bée, ní min̄ min̄ u l̄ēēki dāá ŋee, unil̄ kaa ŋūn̄ kí gb̄il̄ taapu,
- 34**kun puee, kii Unimbōti takaldau poon n̄n̄ l̄i puee yii: “Ŋma di ŋūn̄ kí bée ti-Dindaan landōkōņu. Ŋma di ŋūn̄ kí s̄ańki-u mun?”
- 35**Ŋma di péé ki t̄ī-u tiba ní an sá yii ú f̄at̄íi t̄eēn̄ udaan?”

³⁶Ún di náan tikokɔ, ún di ɲúb tikokɔ, ní an kɔkɔ bí ki tī-u. Unimbɔti gbanti ń ká tinyool kí nīn cá jaanjaan! Ameen.

Room 12

¹Nnabiyaamu, kii Unimbɔti nín dākā-ti u-saasol puee, m mēé-ni yii ní dū ni-wunti kí tī Unimbɔti kii saraa un bí circir kaa kp̄i, ki fáatì-uee. An di dàá nīn sá-ni dinimbɔtinoobaamondi din máań ní nóóyee.

²Taa dūmaan ni-ba kí nántiń waanee bimbim, ama ní yánti Unimbɔti ń pō-ni ilandokɔpɔɔn kí kpánti ni-bimbim. Míń ní ni ɲūn kí bée min ní Unimbɔti lèe, min ɲāń ki fáatì-u ki sá mmɔntiimee.

³Diyimɔɔl din Unimbɔti pú-mee puee ní m ɲūn kí tükù ni-kɔkɔ yii ní taa nīn yòontí ni-ba yilpu min kaa máańee, ama nīn cáámaan ilandokɔ in kítì ki nóó nì fookii un Unimbɔti yākatì ki pú báà ɲmee.

⁴Kii tiwun nín sá tibaantiil ki cáá ajan tikpil, ɲi-tuɲɲi kaa pēepuee,

⁵míń mbaantiim, ti nín wīkí min nee, Kriisitoo di kpáfì-ti tiwumbaantiil, ní báà ɲma tükú u-laŋki u-laŋki.

⁶Unimbɔti pú-ti diyimɔɔl ki yākatì báà ɲma u-pɔl, tí nīn cáā tūn atuun ɲin bí aba abee. Míń puee, sii un u-Fām tì tibɔti a nàatēe, nīn nàatī án nīn nóó nì u nín tī-si fookii ɲyee.

⁷Sii un u yaa tī á nīn sá bin kíńee tɔntɔnliuee, á nīn tūn ki tì-bi. Sii un dākèe, á dū a-ba kí tī a-dàkatam.

⁸Sii un tì binib kunyannyaauuee, a mun ń dū a-ba kí tīń kunyannyaau ditiil. Sii un pūń tiwane, á nīn pūń nì dipɔbil diba. Sii un kpòotēe, á nīn kpòotī nì difaŋgiil. Sii un tūtuń bifalaadambee, á tūtuń-bi nì dipɔpindi.

⁹Ni-neendi ń taa nīn cáá mpoonnyoon. Ní nīn ná ikpiti, kí dū ni-ba kí nákań tiŋan mmɔntiim.

¹⁰Nīń néermaan tɔb tiŋan kii nnabiyaamu nín néeń tɔb puee, kí péé kí nīn tómaan tɔb.

¹¹Ní nīn tūmmaan atuun kí taa nīn sá biwutijoodambi, kí nīn pōontí ki tūmmaan ti-Dindaan tundi nì ni-pɔbiliŋ kɔkɔ.

¹²Án nīn mōń-ni dimákal din ni cááyee pu, kí jīmaan kimɔtii falaa poon, kí nīn mēe múmul.

¹³Tūtuńmaan biwɔfib bin nóó Unimbɔtee kí nīn fòol binicambi bin kòò ni-puee nì mmɔn.

¹⁴Mēemaan yii Unimbɔti ń ɲá bin sàantí-nee tiŋan: yii, ú ɲá-bi tiŋan kí taa tō-bi mbusu.

¹⁵Bin yaa bí dipɔpindinee, ní kūtì bi-pu, ni-kɔkɔ ń faalmaan, bin yaa tí bí sūńee, ní kūtì bí mun pu, ni-kɔkɔ ń sō.

¹⁶Níñ mōmaan tɔb ceeni. Ní taa níñ sá bin néén timonee, níñ sìntīmaan ni-ba taapu, kí taa dàkafimaan yii ni sá biciŋfitiibi.

¹⁷Ubo yaa ɣá-ni tikpitilee, ní taa dū tikpitil kí téen-u. Póommaan kí ɣá min kítèe binib kɔkɔ nimiin.

¹⁸Ni yaa ɣūh, ni nì báà ɣma á nīn bí dipɔɔsɔŋkilin, tiba á taa nyānńi ni-cee.

¹⁹M-nabineenkaamu, ní taa tōmaan ni-ba ipɔntoon, yāntīmaan Unimbɔti ɣuul á tō di-tundi, kun puee an ɣmān yii: “Ti-Dindaan bí yii: Man di dàá dāá tò ipɔntoon, man di dàá dāá pà bi-tuuŋŋi paati.

²⁰Ama, ɣkùm yaa cáá a-nannanliu, á tī-u tijin ú jī, nnyinnyoo yaa tí cáá-u, á tī-u nnyim ú nyò. A yaa bí ɣáán mimmee, an bí kii amɔsuŋkoon ní a cáā pāantí u-yil puee.”

²¹Ní taa yāntī tikpitil á pōɔkiñ-ni, nimbi dūman tiŋan kí pōɔkiñ tikpitil.

Room 13

¹Báà ɣma á nīn tó biyidambi bin cáá mpɔn ki kpòtī kitiŋee, kun puee uyidaan ubo kaa bí Unimbɔti kaa kāañ-u, Unimbɔti di yānti ní biyidambi kɔkɔ bí.

²Mín puee, un yaa yī biyidambee jáañ mara un Unimbɔti yóonee dee. Bin yītí biyidambee dátiñ ditafadaaldi ki tòó bi-ba pu ní.

³Di sá yii bin bin ɣáán tiŋanee kaa fāŋkí biyidambi, bin ɣáán tikpitilee di fāŋkí-bi. A yaa là biyidambi á taa níñ cáá-si tifaandee, níñ ɣáán tiŋan, bi dàá pàkà-si.

⁴Bi bí tūh Unimbɔti tundi ní, ki téekí-si á ɣá tiŋan. Ama a yaa ɣá diganŋam, see á fāŋkí, kun puee an kaa sá fam ní bi cáá mpɔn ki dátí binib tafaliŋ. Bi yaa bí dátí ubo tafalee, bi bí tūh Unimbɔti tundi ki dākà u-ɣuul dīn u cáá diganŋandambi puee dee.

⁵Mín pu ní an máañ yii tí nīn tó biyidambi, kí taa fāŋkí ditafadaaldi ɣmaniŋma pu, tí nīn nyímaan yii mín di ɣān.

⁶An pu ní ni pà lampoobee, bí ɣmā kí tō ditundi gbanti mbaamɔmin, kun puee bi sá Unimbɔti tɔntɔnliibi.

⁷Pàmaan un sá kamaa kun ni máañ kí pà-uee: pàmaan lampoo kí tī un an sá ní pà lampoo kí tīyee, kí tī bin gífí patanti bi pèe bi-nimiliŋ, kí fāŋkí bin bin sá ní fāŋkèe, kí nīn tó bin bin sá ní nīn tóee.

⁸Ní taa níñ jīn báà ubo nì ubo apɔɔn, dipɔndi dīn ni cááyee di sá ní nīn néén tɔb. Sii un néén a-jutiibee, sii ɣá min mara lèe kɔkɔ dee.

⁹Di sá yii marab bin lì yii: “Á taa ɣá tilaakpaal, á taa kpò unil, á taa yò, á taa níñ cáá nnimitaataamee” nì marab bin kínee kɔkɔ taapu sá marabaanti nee ní yii: “Á nīn néén a-juti kii sii a-bee.”

¹⁰A yaa néén a-jutee, aa ɣáañ-u tikpitil. A yaa néén binibee, a bí ɣáañ min mara lèe kɔkɔ dee.

¹¹Mín puee, ní n̄n néerímaan t̄ob mín, kun puee ni nyí nyunti ñun poon ti bí nee nín sá ñunye. Ñyunti ñun ti máan kí fintí ñgeeminee b̄aán, di sá yii Yeesu gítintam s̄utí ki p̄lín-ti ki jítiñ min min ti n̄n péé péé ki f̄õõ ki kííyee.

¹²Kunyeu mó ki síiti, kutaa t̄ob diwuntil. Mimnee, tí fá dib̄omb̄ondi poon tuuñi kí n̄n cáá mbimbim̄ntiim kí ján ikpiti.

¹³Tí c̄oõmmaan min kítèe, kii bi nín c̄oõm̄ ñwiín pu puee, kí taa j̄i kí lákatí ti-ba pu, kí taa gbí ndaam, kí taa ñá tilaakpaal, kí taa ñá tij̄ok̄ondi, kí taa n̄n jáà, kí taa n̄n cáá t̄ob pu kudòju.

¹⁴Ní d̄umaan ti-Dindaan Yeesu Kriisitoo bimbim kí p̄eñ kii tijanjawanee, kí taa f̄at̄i t̄õ ni-bimbikpitim kí ñá mi nín là puee.

Room 14

¹Ní f̄õõmaan ni-kansikin bin kaa láá ká mp̄on Unimb̄oti sanju poonee, kí taa n̄n kp̄akantí bi-land̄ok̄oi.

²Ubo máká yii u yaa j̄iñ tik̄ok̄o an kaa ñáań-u tiba, ama un kaa láá ká mp̄on nnimb̄otisan poonee kaa là, ní ki j̄iñ nnyim ñma.

³Sii un j̄iñ tik̄ok̄o n̄i tik̄ok̄ee ñ taa kp̄èè un ḡant̄i ki j̄iñee fam, ní sii un ḡant̄ee ñ taa b̄iil un j̄iñ tik̄ok̄o n̄i tik̄ok̄ee, kun puee Unimb̄oti f̄õõ-u.

⁴Sii di sá ñma ní ki s̄oñ ubo t̄ont̄onliu b̄oti ní? U yaa yúõõõ, u yaa tí lít̄àaa, an sá u-kp̄iliu b̄oti, an kaa sá a-yati. Ama u dàá n̄n yú, kun puee ti-Dindaan cáá mp̄on kí tikiń-u.

⁵Biba d̄akaf̄i yii iwiin iba sá ikpaan ki jítiñ iba, ní biba mun d̄akaf̄i yii iwiin k̄ok̄o sá ibaanti ní. Báà ñma ñ n̄n nyí u-ban yii min u ñáańee di máan.

⁶Un ḡant̄i iwiin iba yii i sá ikpaanee ñáań mín ti-Dindaan pu ní, ní un j̄iñ tik̄ok̄o n̄i tik̄ok̄ee mun j̄iñ mín ti-Dindaan pu, kun puee u jáam̄ Unimb̄oti tijin gbanti pu ní kí nín j̄i. Un mun j̄iñ nnyimee, ti-Dindaan pu ní u j̄iñ mín, ní ki jáam̄ Unimb̄oti.

⁷Ubo kaa bí dimañfalin ki t̄i u-ba, ubo kaa tí kúu ki t̄i u-ba mun.

⁸Ti yaa báaa, ti bí ki t̄i ti-Dindaan ní; ti yaa tí kp̄iyyaaa, ti kp̄i ki t̄i ti-Dindaan ní. Ti yaa báaa, ti yaa tí kp̄iyyaaa, ti sá ti-Dindaan yab ní.

⁹Di sá yii Kriisitoo kp̄i ki f̄ikiti kí ñm̄a kí n̄n sá bin kp̄iyyee n̄i bin b̄ee k̄ok̄o Dindaan.

¹⁰Kin ba pu ní sii s̄oñ ki b̄iil a-nabiki? Ní si mun, ba pu ní a kp̄èè a-nabiki fam? Tik̄ok̄o dàá d̄áà c̄u Unimb̄oti nimiin ib̄soon,

¹¹kii an nín ñm̄añ puee, yii: “Ti-Dindaan bí yii: Man Unimb̄oti bí. Báà ñma dàá d̄áà gb̄aañ man nimiin, alimbil kamaa dàá d̄áà nȳõñk̄i man Unimb̄oti.”

¹²Mín ní ti-k̄ok̄o dàá d̄áà s̄oñ ti-ba yil pu b̄oti Unimb̄oti nimiin.

- ¹³Tí gbèèñ kí taa ti nín sòòmmaan tɔb ɔti, ama á dàkafi min ní a dàá ɔ́a a-nabiki ń taa gbéetáaa kí taa líti ikpitinee.
- ¹⁴Ti-Dindaan Yeesu yánti m bée ki nyí ibaamon yii tijin tiba kaa bí ki kɔntí unil tijokɔndi Unimbɔti nimiin. Sii ubɔ yaa dàkafi yii tiba kaa ɔ́a, ti lafun kpánti tin kaa ɔ́a sii cee ní.
- ¹⁵Tijin tiba pu ní a yaa yánti an páb a-nabikee, mimmee, aa ti yánti dineendi kpòotí-si dee. Tijikaal tin a jìnee puee, taa yánti un pu Kriisitoo kpíyee ń wāŋkì.
- ¹⁶Tin ɔ́a a-ceeyee ń taa gítí pɔ nsan bí nín sòon tikpiti.
- ¹⁷Di sá yii Unimbɔti beel kaa sá tijikaal nì tinyɔkaal ɔti, an sá deede nì nsɔfi nì dipɔpindi din u-Fām tiiyee ní.
- ¹⁸Un yaa nɔ́o Kriisitoo mimmee, fáatí Unimbɔti, ní binib mun lèekí u-móɔŋu.
- ¹⁹Mimmee, tí nyàabmaan tin dàá cáan dipɔɔɔŋkil ti-kansikinee nì tin dàá tūtuñ ti-nabiyaamu bí báan inyaan nnimbɔtisan poonee.
- ²⁰Tijin puee, taa gbá kí kpiti Unimbɔti tundi. Tikɔkɔ ɔ́a ki tī bí jī, ama an kaa ɔ́a tijikaal tin a jìnee ń yánti a-nabiki ń líti.
- ²¹Tin ɔ́a di sá á taa ɔ́a tinan kí taa nyò ndaam kí taa ɔ́a tiba min ɔ́a kí yánti a-nabiki ń lítee.
- ²²Sii nín fɔ́ ki kí ki nyí tiyee, dūú kpāfi a-ban Unimbɔti nimiin. Án nín mɔn un yaa lēemin ɔ́a u-cee u-pɔbil kaa máfée.
- ²³Ama un yaa bí jīn tiba ní u-pɔbil máfée kó tibɔtin, kun puee u-pɔbil tükù-u yii min u ɔ́a kaa maañ ú ɔ́a. A yaa ɔ́a tiba ní u-pɔbil máfée, an sá ikpiti ní.

Room 15

- ¹Timbi bin ká mpɔn Unimbɔti saŋu poonee, ti maañ kí tūtuñ bin kaa láa ká mpɔnee kí jī kimotii bi-pu, kí taa nín nyàab min dàá nín fáatiñ-tee.
- ²Báa ɔ́a ń nyàab min dàá tūtuñ u-jutee mmɔntiim ú báan inyaan.
- ³Di sá yii Kriisitoo kaa nín nyàab kí ɔ́a min fáatiñ-tee, ama, kii an nín ɔ́a puee yii: “Asiibil ɔ́a bi nín sī sii Unimbɔtee, líti man pu.”
- ⁴Di sá yii tin kɔkɔ bi nín ɔ́a Unimbɔti takaldau poon doooyee sá kí dàkà-ti tí nín cáá kimotii nì kunyannyaau, kí nín máká Unimbɔti pu.
- ⁵Unimbɔti un di tì kimotii nì kunyannyaau ń tūtuñ-ni ní ɔ́a ubaanti kii Yeesu Kriisitoo nín là puee,
- ⁶ni-kɔkɔ ń ɔ́a kí kpāfi kinyɔbaantiii kí nyɔŋkì Unimbɔti un sá ti-Dindaan Yeesu Kriisitoo Baayee.
- ⁷Mín puee, kii Kriisitoo nín fɔ́-ni puee, ní nín fòolmaan tɔb án tī Unimbɔti tinyool.

- ²⁴M yaa làá cù Eespanyee, see m̄ dīn̄ ni-cee, man n̄ ni n̄ kàl̄, ní kpáàā tūtuñ-mi m̄ cù kitiŋ gbantin. Mimmee m̄ dàá ḡmā kí kàl̄ ni-cee ḡyunti ḡubɔ̄ fiii an m̄ɔ̄kiñ-mi.
- ²⁵Kɔŋkɔnnee, m̄ dá láá cá Jeerusaleem kí t̄ɔ̄ ditundi diba kí t̄i Unimbɔ̄ti yab bin bí niinee.
- ²⁶Kun puee Kriisitoo yab bin bí Maseeduaan n̄ Akayee kpáfí ki tó animil kí tūtuñ Unimbɔ̄ti yab bin bí Jeerusaleem ki sá bisoodambee.
- ²⁷Bín bi-ba di lēēyii bi dàá ḡá mín, ní an lafun máaḡ bí ḡá-bi mín, kun puee Kriisitoo yab bin bí Jeerusaleemee dū tibɔ̄mɔ̄ntiil ki yākati n̄ bi, mín puee, an máaḡ bí mun n̄ dū bi-wanti kí tūtuñ-bi.
- ²⁸M yaa dū inannakan in bi nākañní-mee ki dūu t̄i-bi, ki kpēētibɔ̄ti gbanti ki dóòyee, m̄ dàá dīn̄ ni-cee, ní kí n̄n̄ nikī Eespanyi.
- ²⁹M nyí yii Kriisitoo dàá biñ m-dāantam ni-cee an n̄n̄ m̄ɔ̄ tikpil.
- ³⁰Ama, nnabiyaamu, m̄ mèé-ni ti-Dindaan Yeesu Kriisitoo n̄ dineendi din Unimbɔ̄ti Fām t̄iyyee pu, ni-nimiliŋ n̄ n̄n̄ máḡ ḡwimmeem pu, ní n̄n̄ mèé Unimbɔ̄ti ki tūtuñ-mi,
- ³¹m̄ ḡmā kí nyā Juudee yab bin kaa f̄ɔ̄ ki kíyyee ḡaan, Unimbɔ̄ti yab bin bí Jeerusaleemee mun n̄ f̄ɔ̄ n̄ dipɔ̄bil diba ditutundi din m̄ cān̄ kí t̄i-bee.
- ³²Mín ní, Unimbɔ̄ti yaa kíí, m̄ dàá ḡmā kí bàḡ ni-cee n̄ dipɔ̄pindi man n̄ ni n̄ kàl̄ m̄ ḡùḡfi.
- ³³Unimbɔ̄ti un t̄i nsɔ̄ḡfee n̄ n̄n̄ bí ni-kɔ̄kɔ̄ cee. Ameen.

Room 16

- ¹M dū ti-niisal Fooyibee un tūñ ditundi Kriisitoo nikitil din bí Saŋkreeyee kansikinee ki ḡá ni-ḡaan.
- ²F̄ɔ̄ɔ̄maan-u ti-Dindaan pu kii Unimbɔ̄ti nib n̄n̄ máaḡ kí n̄n̄ f̄òl̄ tɔ̄b puee, ní ajan ḡin kɔ̄kɔ̄ poon an bálfi ní tūtuñ-uee, ní tūtuñmaan-u. Mín ní ú mun j̄oñ binib tikpil, ki kpáaḡ man m-ba.
- ³Ní jāam̄ Prisiil n̄ Akilaasi, m-tɔ̄ntɔ̄njutiib Yeesu Kriisitoo tundin,
- ⁴bin kíñ fiii kí kpú kí ḡmā kí f̄i-mee. An kaa sá man baba di dàá jāam̄-bi an pu, Kriisitoo nikititiŋ ḡin kaa sá Juuda yabee kɔ̄kɔ̄ mun dàá jāam̄-bi.
- ⁵Ní jāam̄ Kriisitoo yab bin kpáfí bi-dumpuee mun. Ní jāam̄ Eepayineeti, m-bɔ̄ un m̄ nēénee, un péé péé ki f̄ɔ̄ ki kíí Asii tiŋkinee.
- ⁶Ní jāam̄ Maarii un tún ditundi tikpil ki t̄i-nee.
- ⁷Ní jāam̄ Androoniku n̄ Juniyasi, man n̄ bin pēē kubaabinaatoou ki pēēsarka muee. Yeesu kpambaliŋ kansikinee, bi tó-bi tikpil. Bín péen̄ man ki f̄ɔ̄ Kriisitoo ki kíí.
- ⁸Ní jāam̄ Ampiliyatu, m-bɔ̄ un m̄ nēén̄ ti-Dindaan puee.

- ⁹Ní jām̀ Urbanu, ti nì un kpáfi ki tū̀n ditundi Kriisitoo puee, kí jām̀ m-bòom̀nti Sitaku mun.
- ¹⁰Ní jām̀ Apeelesi, un jín falaa Kriisitoo pu, kaa lítèe. Ní jām̀ Ariistoobul diiku poon yab.
- ¹¹Ní jām̀ Eeroodiyoon, man nì un pēēyee. Ní jām̀ Naasiisi diiku poon yab bin sá ti-Dindaan yabee.
- ¹²Ní jām̀ Triifeeni nì Triifoosi, bin tū̀n ditumm̀ntiil ki tū̀ ti-Dindaanee, kí jām̀maan ti-niisalm̀nti Peersiidi un tún atumm̀nti tikpil ki tū̀ ti-Dindaanee.
- ¹³Ní jām̀ Rufusi un ti-Dindaan lútì ú tō u-tundee, kí kpááa jām̀ u-na un kpánti man mun nee.
- ¹⁴Ní jām̀ Asin̄kilitu, Fleegon, Eermeesi, Patrooba, Eermasi, nì ti-nabiyaamu mun bí bi-ceeyee.
- ¹⁵Ní jām̀ Filooloogu nì Julii, nì Neeree nì u-niisal, Oolimpa nì Unimb̀ti yab bin k̀k̀k̀ bí bi-ceeyee.
- ¹⁶Ni-k̀k̀k̀ n̄ jām̀maan t̀b kí tū̀ t̀b tijan kii nnabiyaamuee. Kriisitoo nikitij k̀k̀k̀ jáamiń-ni.
- ¹⁷Nnabiyaamu, m kpáafi-ni ní n̄n nyí nì ni-ba nì bin fá tib̀m̀ntiil tin bi d̀k̀k̀-nee ki c̀ab̀n̄ diyakatil, ki yánti binib lítèe. Sútí kí ẁatĩmaan bidambi.
- ¹⁸An nibee kaa ǹó ti-Dindaan Kriisitoo, bi nyàab bi-ba jim ní, ní ki s̀on̄ anỳobumm̀on̄ ki kiíl binib, ki yánti bin nyil kaa náańee líti.
- ¹⁹Báa ŋma nyí ni n̄n t̀ t̀ ti-Dindaanee, an puee, m-p̀bil s̀m̀ ni-pu. Ama m là ní n̄n sá bin nyí ki ŋań tijanee, kí n̄n sá bin bí circir, kaa là ikpitee.
- ²⁰An kaa làa yúnti, Unimb̀ti un t̀ ns̀ŋfee dáa yánti ní t̄a kí mátí Sitaan. Ti-Dindaan Yeesu ŋanti n̄ n̄n bí ni-pu!
- ²¹M-t̀nt̀njuti Tiimootee jáamiń-ni. Lusiyusi, Jason, nì Soosipatee, man nì bin pēēyee, mun jáamiń-ni.
- ²²Man Teetiyu un ŋm̄n̄ takalda neeyee mun jáamiń-ni ti-Dindaan pu.
- ²³Gaayusi un dumpu m k̀ódyee, nì un dumpu Kriisitoo nikitil k̀k̀k̀ kpáfèe, jáamiń-ni. Elasitu un ŋúb bi-tijki nimilijee, nì ti-nabiki Kaartusi, jáamiń-ni.
- [²⁴Ti-Dindaan Yeesu Kriisitoo ŋanti n̄ n̄n bí ni-k̀k̀k̀ pu. Ameen.]
- ²⁵Tí nỳŋkĩmaan Unimb̀ti! N̄n tib̀m̀ntiil tin m s̀on̄ Yeesu Kriisitoo puee, Unimb̀ti cáa m̀on̄ kí báań-ni inyaan nnimb̀tisan poon. Doooo ŋyuntikpikèe, tib̀tee n̄n bí dibalin, Unimb̀ti kaa n̄n dáa b̄iti ti-pu,
- ²⁶ama k̀ŋk̀n̄nee u nyánti-ti mpaampiin pu. U d̄i takaldab bin u-b̀naatiliibi ŋm̄n̄ ki n̄aati u-b̀tee pu ki yánti atimbun kamaa nib b̀e ti-pu an n̄n dáa ŋa pu bí f̄s̄ kí kí kí n̄n kí n̄n ki t̀ Unimb̀tee. Jaanjaan Nimb̀tiu n̄n là puee dee.

²⁷Mín puee, Unimboti un baba sá uciñfitee n ká tinyool Yeesu Kriisitoo pu kí nīn péēcá jaanjaan! Ameen.

1 Kɔranti

1 Kɔranti 1

- ¹An sá man Pɔɔl un Unimbɔti là ki yíín-mi m̄ n̄n sá Yeesu Kriisitoo kpambalee n̄ ti-nabiki Sɔsteen di jáám-ni.
- ²Nimbi Unimbɔti nikitil din bí Kɔranti, Unimbɔti yíín-ni ní n̄n sá u-yab, ki kpánti-ni circirdambi Yeesu Kriisitoo puee, ni n̄ bin kɔkɔ bí báà laakin ki mèé ti-Dindaan Yeesu Kriisitoo bi-Dindaan un sá ti mun Dindaanee,
- ³ti-Baa Unimbɔti n̄ ti-Dindaan Yeesu Kriisitoo n̄ n̄á-ni tiŋan kí t̄i-ni n̄gbansɔŋfi.
- ⁴M jáám m-Nimbɔtiu múmul ni-pu, tiŋan tin u n̄á-ni Yeesu Kriisitoo puee.
- ⁵Di sá Kriisitoo pu ní u n̄á-ni tiŋan kɔkɔ, ki yánti ni gbíl ki béè u-bɔti taapu kɔkɔ ki n̄ŋn̄ kí sòon-ti mbaamomin.
- ⁶Kriisitoo bɔti tin ti cáán ki sòon̄ n̄ nee ni f̄ɔ̄-ti ki n̄úb tiŋan pu.
- ⁷Mín pu ní nimbi bin k̄a ki cí ti-Dindaan Yeesu Kriisitoo n̄n̄ dàá d̄áá gítin̄ n̄yunti n̄yɔyee, Unimbɔti pú-ni u-p̄tam kɔkɔ, báà miba kaa lóò-ni.
- ⁸Unimbɔti gbanti di dàá n̄úb-ni mm̄ntiimin̄ kí tin cáá kátí-ku an n̄n̄ dàá n̄á pu ti-Dindaan Yeesu Kriisitoo yaa láá gítin̄ee, bí taa láá ká ni-pu ikpiti ibee.
- ⁹Unimbɔti yaa p̄on̄ puee see ú n̄á mín̄, an di sá u yíín-ni yii ni n̄ u-Jip̄on̄ ti-Dindaan Yeesu Kriisitoo n̄ n̄á ubaantee.
- ¹⁰Nnabiyaamu, n̄ ti-Dindaan Yeesu Kriisitoo yindi puee, m gbàám-ni ní n̄n̄ p̄ēmaan kinyɔkɔ, digantil n̄ taa n̄n̄ bí ni-kansikin, n̄n̄ p̄ēmaan kinyɔkɔ mm̄ntiimin̄, ni-kɔkɔ bɔti n̄ n̄n̄ sá tibaantiil, ni-land̄kɔi mun n̄ n̄n̄ p̄ē.
- ¹¹Di sá yii m-nabiyaamu, Kloowee diikun yab biba dómín̄ ki t̄ukū-mi yii kujaaú bí ni-kansikin.
- ¹²Kun pu m l̄i mimmee di sá m gbíl̄ yii ni-kansikin biba l̄i yii b̄in̄ n̄óó Pɔɔl ní, ní biba mun l̄i yii b̄in̄ n̄óó Apooloosi ní, ní biba mun l̄i yii b̄in̄ n̄óó Piyeer, ní biba mun l̄i yii b̄in̄ n̄óó Kriisitoo ní.
- ¹³Mimmee, ni d̄akaf̄i yii Kriisitoo ȳakat̄i u-ba ajan kupaauaaa? Àá Pɔɔl ní bi kpáá nd̄ɔp̄untikaa pu ki t̄i-ni ní? Àá Pɔɔl yindi pu ní bi f̄ul̄-ni Unimbɔti nyim ní?
- ¹⁴M jáám Unimbɔti m n̄n̄ kaa f̄ul̄ ni-kansikin báà ubɔ nnyimee, asee Kripusi n̄ Gaayusi baba,
- ¹⁵an puee ni-kansikin ubɔ kaa n̄ŋn̄ kí l̄i yii man yindi pu ní bi f̄ul̄-u nnyim.
- ¹⁶(M t̄étí yii m n̄n̄ t̄i f̄ul̄ Steefanasi n̄ u-dicaŋku yab mun nnyim. M yaa gít̄i f̄ul̄ biba muɔɔ maa ti nyí.)

¹⁷Di sá yii Kriisitoo kaa túnní-mi m̄ n̄n fùul̀ binib Unimbṓti nnyim, ama u túnní-mi m̄ sòòh̄ u-bòmṓntiiti ní. Maa làá dū binib ciini ní kí sòòh̄ an bṓti, m̄ yaa ḡá mimmee m̄ dàá yàntī kun pu Yeesu Kriisitoo kp̄i ndṓpuntikaa puee ḡá fam dee.

¹⁸Kun puee ti nín sòòh̄ yii Kriisitoo kp̄i ndṓpuntikaa pu kí fī binibee an sá tiwaatibṓti ní ki tī bin bí diwan̄kil saḡḡu poonee. Ama ní ki sá Unimbṓti pṓḡḡu ki tī timbi bin bí difiil saḡḡunee,

¹⁹kii an nín ḡmān̄ puee yii: “M̄ dàá kúntí biciḡḡfitiibi ciini ní kí n̄aān̄ binyiliibi nyil.”

²⁰Niinee uciḡḡfiti, àá unyil ḡtī cáá tilati? Bin bí duulnya poon ki kp̄akantée bí la? Unimbṓti dàkā yii duulnya yab ciḡḡḡu sá kuwaatiiu ní.

²¹Di sá yii duulnya n̄ u-ciḡḡḡuee, waa ḡúḡ ki bée Unimbṓti n̄ u-ciḡḡḡu. An pu ní an fáatī Unimbṓti ḡ dī tibṓti tin ti sòòh̄ bi cáá yī tiwaatibṓti nee pu kí fī bin fṓṓ-u ki kíyee.

²²An yaa sá Juuda yabee bín̄ nyàab̄ bí ḡá maamaacib bí ká án̄ n̄n sá-bi kudaḡḡu, ní Greeki yab bín̄ nyàab̄ iciin,

²³ama ní timbee Kriisitoo un bi kp̄áá ndṓpuntikaa puee bṓti ní ti sòòh̄. An bṓtee di làkantí Juuda yab, ní ki sá bin kaa sá Juuda yabee cee tiwaatibṓti.

²⁴Ama Kriisitoo di sá Unimbṓti pṓḡḡu n̄ u-ciḡḡḡu ki tī binib bin Unimbṓti yíínee, bin sá Juuda yabee n̄ bin kaa sée.

²⁵Di sá yii tin tin Unimbṓti ḡá binib cáá yī tiwaatibṓtee jítiḡ binib ciini, ní tin u ḡá binib kp̄éé yii an sá iwṓṓfee pṓṓ ki jítiḡ binib.

²⁶Nnabiyaamu, kp̄èèmaan̄ nimbi dikitil din Unimbṓti yíínee, bin binib yī biciḡḡfitiibee, n̄ biyidambi, n̄ agaajabil kaa wīkí ni-kansikin.

²⁷Ama Unimbṓti lēēkun ní duulnya yī kuwaatiiuee ní ki dū kón̄ biciḡḡfitiibi icoo, ní ki lēēkun duulnya yī iwṓṓṓfee ní ki dū kón̄ bipṓṓbi icoo.

²⁸U lēētiwan̄ tin bi kp̄éé ki s̄ḡk̄iḡ kaa dū yíiḡ tibee, tin kaa péēbí tibanee ní u dū s̄ntiḡ tin bi wāl̄ yii ti bí tibanee taapu taapu,

²⁹an nín dàá ḡá pu unil ubṓ ḡ taa ḡā u-bindi Unimbṓti nimiinee.

³⁰Di sá yii ún̄ Unimbṓti di yānti ní ni n̄ Yeesu Kriisitoo ḡá ubaanti. U yānti Yeesu kp̄ánti timbi ciḡḡḡu. Kriisitoo pu ní ti kp̄ánti deedeedambi Unimbṓti nimiin ki bí circir, u fṓṓ-ti ki lī.

³¹An pu ní an ḡmān̄ Unimbṓti takaldau poon yii: “Sii un yaa làá ḡā a-bindee ḡ ḡā ti-Dindaan nín ḡá tḡyee pu.”

1 Kṓranti 2

¹Nnabiyaamu, m̄ nín̄ n̄n dóm̄iḡ ni-cee ki sòòh̄-ni Unimbṓti bṓti tin bí dibalinee, maa n̄n̄ dū anyṓṓbuḡkpaanaaan, an kaa n̄n̄ tí sá binib ciini ní m̄ dū ki sòòh̄ n̄ ni.

- ²M lēeyii maa làá sòòn ni-kansikin báà tiba nì tiba, an yaa kaa sá Yeesu Kriisitoo un bi kpáá ndòpuntikaa puee bōti.
- ³An pu ní m kāl ni-kansikin kii uwofee nì tifaandi yókóyókó.
- ⁴Unimbōti bōti tin m nìn cááñ-nee nì min min m nìn sòòñ-ni tēe kaa nìn nyánní binib ciini soontamin, ama an nìn sá Unimbōti Fām pəŋŋu tundi ní,
- ⁵an nín dàá ɲá pu ni-fookiū n̄ taa n̄n̄ cò binib ciini pu ama án n̄n̄ cò Unimbōti pəŋŋu puee.
- ⁶An puee bin béè nnimbōtisan mməntiiminee, iciin ní ti dākā-bi. An kaa nìn sá duulnya yab ciini, kaa tí sá bipəndambi bin jín abee duulnyan ki dàá dāá kúntée ciini.
- ⁷Ama an sá Unimbōti ciini in nìn bí dibalinee pu ní ti sòòn, Unimbōti nìn péélēē-i ki yóòn-ti án n̄n̄ sá ti-nyooti ki wāatì ní ki n̄n̄ nááñ duulnya.
- ⁸Duulnya bōtiibi báà ubo kaa ɲún ki béè Unimbōti ciini gbanti, bi yaa bàà nìn béè-i, baa bàà nìn kpáà ti-Dindaan tinyooldaan ndòpuntikaa pu.
- ⁹An bí kii Unimbōti takaldau poon n̄n̄ ɲmāñ puee yii: “Tin unil nimil kaa kée, nì tin u-tafal kaa gbīlee, nì tin unil kaa dākafi ki kée, t̄n̄ ní Unimbōti bōntì ki yóòn bin nééñ-uee.”
- ¹⁰Di sá yii timbi ní Unimbōti dī u-Fām pu ki dākā-ti tibəbalkaal gbanti, kun puee Unimbōti Fām gbanti di ɲūn k̄í béé tin Unimbōti cááyee, ki kpáañ tin bí dibalin poon poon kábuee.
- ¹¹Ulanil ni-kansikin di ɲūn k̄í béé u-juti landəkəŋu? See ún̄ u-ba Fām min bí u-nee di ɲūn k̄í béé kun u sée, m̄n̄ mbaantiim ní ubo kaa ɲūn k̄í béé Unimbōti landəkəŋu see Unimbōti Fām di ɲūn k̄í béé u-landəkəŋu.
- ¹²Ama timbee, an kaa sá duulnya fām ní ti f̄ōō, an sá Unimbōti di t̄n̄-ti u-Fām, an n̄n̄ dàá ɲá pu tí béé t̄ŋan tin kəkə Unimbōti ɲá-ti n̄ dipəbil dibee.
- ¹³An puee, anyəəbun ɲin ti cáā sòòñee kaa sá binib n̄n̄ dākà iciin ɲyee nyəəbuŋŋi, ama an sá anyəəbun ɲin Unimbōti Fām t̄n̄-tee ní ti cáā sòòñ ki bóbítí ibaaməñ in nyēēñ Unimbōti Fām nee ki t̄kù bin cáá Unimbōti Fāmee.
- ¹⁴Unil un kaa cáá Unimbōti Fāmee kaa ɲūn k̄í f̄ōō ibaaməñ in u-Fām gbanti sòòñee. Ún̄ ceeyee an sá tiwaatibōti ní. Waa ɲūn k̄í f̄ōō-ti kun puee Unimbōti Fām di yaa bí a-puee ní a nyí ki gāntī.
- ¹⁵Unil un cáá Unimbōti Fāmee di ɲūn k̄í n̄n̄ nyí tikəkə ki gāntī, ama ubo kaa gbìl ún̄ bōti taapu k̄í gāntī.
- ¹⁶Kii Unimbōti takaldau poon n̄n̄ l̄i puee yii: “Ŋma di nyí ti-Dindaan landəkəŋu? Ŋma di ɲūn k̄í s̄ŋk̄i-u?” Ama timbee, ti cáá Kriisitoo landəkəŋu ti-ni.

1 Kəranti 3

- ¹Nnabiyaamu, m nín dómiín ni-ceeyee maa ḡún ki sòòñ nì ni kii m nín sòòñ bin cáá Unimbòti Fāmee puee, ama m sòòñ nì ni kii binib bin dī duulnyee ní, kii bin sá mbiyaapõmu Kriisitoo saṅṅu poonee.
- ²An puee m tī-ni nnaabiim, an kaa sá tijin tin pōō naa ḡūñee; ali gba ki dāa sāa nìn díñee, naa ḡūñ tin pōōyee,
- ³kun puee ni dáá bí kii duulnya nib nín bí puee ní. Di sá ḡyunti ḡun ní ipoompoon nì kunikpõḡkõkõu dáá bí ni-kansikinee, an dākà yii ni sá duulnya yab dee ki ḡááñ min fáatì ni-wuntee.
- ⁴Ni-kansikin biba lì yii bíñ sá Pōol yab ní, ní biba mun lì yii bíñ sá Apooloosi yab, naa bí ḡááñ kii duulnya nib nín ḡááñ puee deeee?
- ⁵Øma di sá Apooloosi? Ní ḡma di sá Pōol ní? Ti sá Unimbòti tontõnliibi bin pu ni dī ki fōō Unimbòti ki kíyee ní. Unimbòti di yākatì min sá tí ḡee ki tī-ti.
- ⁶Man búl ní Apooloosi yāañ nnyim, ní Unimbòti yāntì an nyáñ ki wíiñ.
- ⁷An puee, an kaa sá un búlee di sá tiba, kaa tí sá un yāañ nnyimee di tí sá tiba, ama Unimbòti un yāntì an nyáñ ki wíiñee baba di sá tiba.
- ⁸Un búlee nì un yāañ nnyimee ḡmà ní, Unimbòti dāa pà-bi bi-tundi din bi túñee nín máañ puee ní.
- ⁹Kun puee ti nì Unimbòti di pēēki tūñ ditundi. Nimbi di sá u-saaku, ní ki sá u-diiku.
- ¹⁰Diyimōol din Unimbòti pú-mi m nīn sá udimakpaan un cáá iciinee puee, m bíl kudiyyee nyeel ní ubo ñ dāá mā kí tókõñ, ama báa ḡma ñ nín béé u nín dàá mā kí cáá puee.
- ¹¹Di sá ubo kaa ti ḡūñ kí cõõñ kudipõḡu asee kun bi péēcõõñ ki bílee, an di sá Yeesu Kriisitoo.
- ¹²Biba dàá dū sindaariya ní kí mā, ní biba ñ dū animil kúti kí mā, ní biba ñ dū ataḡkpee ḡin jìlee kí mā, ama biba mun dàá dū idõ, biba ñ dū ikpaḡkpaan, biba ñ dū timool kí dū mā.
- ¹³Un yaa dū kun ní ki máñ kudiyyee, daliḡkin Unimbòti dàá sòòñ binib bõtee, yaadal ní báa ḡma tuuḡḡi dāa nyēēmpaampiin pu. Di sá bi dàá dāá dū báa ḡma tuuḡḡi ní kí ḡa ḡḡmin. Øḡmi ní bi dàá dū cõḡki báa ḡma tundi kí béé di nín sá diḡyee.
- ¹⁴Sii un di yaa dū kun ní ki máñ kudiyyee ní ḡḡmi kaa wūñee dàá dāá fōō a-paati.
- ¹⁵Ama un cee ní ḡḡmi yaa wūñee asaluu gbáñ udaan dee, u dàá dāá ká difiil, ama an dāa sá kii unil diiku nín fõõ pu ú sãñ kí nyā kaa báb tiba puee ní.
- ¹⁶Naa nyí yii ni sá Unimbòti diiku ní u-Fām kòò ni-naaan?
- ¹⁷An puee, unil yaa kón Unimbòti diiku tijõkõndee, see Unimbòti ñ dāá dáal udaan tafal, kun puee Unimbòti diiku bí circir ní, nimbi di sá kudii gbanti.

¹⁸Ubo ń taa ɲmàtìh u-ba, un yaa bí ni-kansikin ki dākafi yii u cáá duulnya ciinee, ú kpántí ugbaan kí ɲmā kí ká iciin in nyēēn Unimbōti ceeyee.

¹⁹Kun puee duulnya ciini sá Unimbōti cee digbaandi ní. Míh ní an ɲmān Unimbōti takaldaun yii: “Unimbōti gīntí biciɲfitiibi ciini ní ki fātí cáā cútí-bi.”

²⁰An gītí tí lī yii: “Ti-Dindaan nyí biciɲfitiibi landokoi, ki nyí i nín sá famee.”

²¹An puee, an kaa sá ubo pu ní ni dàá nīn gā ni-biɲɲi, kun puee nimbi di yì tikokɔ:

²²an yaa sá Pɔɔlaaa, Apooloosaaa, Piyeeraaa, an yaa tí sá duulnyaaa, dimaɲfalaaa, ɲkúmaaan, an yaa tí sá tiwan tin bí kɔɲkɔnneeyaaa, tin bí ki dòoŋeeyaaa, nimbi di yì tikokɔ,

²³ní Kriisitoo yì nimbi, ní Unimbōti yì Kriisitoo.

1 Kɔranti 4

¹Míh puee ní nīn nyí yii ti sá Kriisitoo tɔntɔnliibi bin bin ní Unimbōti dū u-bɔbalkaati ki ɲá ti-ɲaan tí sòoŋee.

²Bi yaa dū ditundi ki ɲá a-ɲaanee, tin bi kíh ki kpèè a-ceeyee di sá á ɲá ditundi bí bée a-baamɔni.

³Mamee, nimbi di yaa bí sòoŋ m-bɔtaaa, an yaa tí sá bibɔsoonliibaaa, tìh kaa ká-mi. Man m-ba kaa tí bí sòoŋ m-ba bɔti.

⁴Ibaamɔn, m-pɔbil poonee maa gbìl yii m ɲá tiba, ama míh kaa dākà yii maa ɲá tiba ni tiba. Ti-Dindaan di sá un sòoŋ man bɔtee.

⁵An puee ní taa sòoŋ ubo bɔti kí nīn cí ɲyunti ń bàh. Ní taa sòoŋ ubo bɔti kí nīn cí ɲyunti ɲun ti-Dindaan dàá bàŋee. U yaa láā bāaŋee, u dàá yàntí ɲwalfi ń ɲmíntí tin bál dibɔmbɔndinee kí nyāntí binib landokoi mpaampiin pu, niin ní báà ɲma dāa fòol kupampakau kun u máaŋee Unimbōti cee.

⁶Nnabiyaamu, m dū man nì Apooloosi bɔti tin m sòoŋee ki dūu dākā kí cántí-ni tibɔti ní. Ní bífi man nì Apooloosi cee min ni máaŋ kí nīn bée kí taa lákatí tin bi ɲmān Unimbōti takaldau poonee pu. Ní taa ɲá dilambil kí lēēti-kansikin ubo, kí bí yii ún di sá tiba kí kpèè un kíŋee fam.

⁷Ɖma di yɔoŋ-si yilpu ní a jítiŋ a-juti ní? Tin a cááyee Unimbōti di kaa tī-saaa? Kin Unimbōti di yaa tī-si ní, ba pu ní a cáá dilambil kii ubo di kaa tī-see?

⁸Ni pūti kpáāā ká tin kɔkɔ ni lèe! Ki pūti kpáāā kpántì bigaajab ki kpántì bibɔtiibi timbi boon! Ni yaa bàà lafun kpántì bibɔtiibi ti mun ń bàà dāā kūtí ni-pu, an bàà ɲān!

⁹An bí-mi kii Unimbōti gíiŋ timbi akpambal boon binib kansikinee. Ti bí kii binib bin bi dàá kpò kunipaa nimiinee kun puee ti kpántì tinimikɔntiwan ní duulnya nì itūun nì binib kpèé.

- ¹⁰Kriisitoo puee timbi kpántì biwaatiibi ní, ní nimbi nín fṛṛ-u ki kíf puee ni kpántì bicinḡitiibi. Míñ ní timbi sá ḡwṛṛṛṛṛṛṛ ní nimbi sá bipṛṛṛṛ. Binib kpèé timbi fam ní ki tì nimbi jilma.
- ¹¹Ali ki dāa sāa ḡyunti ḡun poon ti bí nee ti gbíntì ki bí ki jīn ḡkùm nì nnyinnyoo falaau. Taa cáá abṛkuti kíf pèēñ, ní bi gbáà-ti ní ti tú ki yīn ajan kṛkṛ pu.
- ¹²Míñ boonee ti tūn atuun ki ḡì kíf ḡmā kíf ká tiba kíf jī. Bi yaa síi-tee timbi mèé Unimbṛti n̄ bīn bi-pu. Míñ ní bi yaa sàantí-tee ní timbi jīn-bi kimṛtīi.
- ¹³Bi kúnḡi ti-boon ní timbi sòṛn-bi tin mṛee, ali n̄n díñee bi kpèé-ti kii duulnya tampummootee ní, ali kii tiwanḡpitiil tin kaa bí tibanee.
- ¹⁴Maa ḡmāñ tibṛti nee kíf kṛn-ni icoo, ama kíf kpāafi-ni kii ni nín sá m-biyaamu m nēēñ-ni puee ní.
- ¹⁵Báa binib kutukub saalaa di yaa làá kpṛṛṛṛ-ni nnimbṛtisan poon, ni-baa dàá n̄n péēsá ubambaanti ní. Ní n̄n nyí yii man di sá ni-baa, kun puee man di cáan tibṛmṛntiil ki sṛṛn̄ n̄n, ní ni fṛṛ ki kíf.
- ¹⁶An puee, m bālfī-ni yii ní fṛṛ man bimbim kíf n̄n ḡáaṇ man nín ḡáaṇ puee.
- ¹⁷An pu ní m dū m-jipṛṛn Tiimootee un sá m-bineeḡkaaki ki yú deede ti-Dindaan sanḡunee ki túnni ni-cee. U dàá téetí-ni man nín dī Kriisitoo sanḡu miḡyee, kii m nín dākà Kriisitoo nikitḡ kṛkṛ kansikin puee.
- ¹⁸Ni-kansikin biba nín dākafi yii maa ti làá ḡitīn ni-ceeyee puee bi bí ki yṛṛntí bi-ba yilpu.
- ¹⁹Ama ti-Dindaan yaa là an kaa làá ti yúntí m dàá dāaṇ ni-cee. M yaa láa bāaṇee an kaa dāa sá bi-nyṛṛṛṛṛṛṛ ní m dàá pīlfi, ama bi-pṛḡḡu ní m dàá kpèè.
- ²⁰Di sá yii Unimbṛti beel kaa sá n̄n anyṛṛṛṛṛṛṛ ḡmaniḡma, an sá mpṛn di bí poon.
- ²¹Ni là m̄ dāaṇ ni-cee n̄n mbambaanaaan? Àá m̄ dāaṇ n̄n dineendi n̄n nsṛḡfi ní?

1 Kṛranti 5

- ¹M gbīl bi sṛṛn̄ tijṛkṛndi tin bí ni-kansikinee pu. An jṛkṛntee bin kaa fṛṛ Yeesu ki kífyee kaa kífí kíf ḡá m̄n gba. M gbīl yii ni-kansikin ubṛ cáá u-baa nimpuaa!
- ²Ni ḡáaṇ m̄n ní ki ḡitī cáá dilambil kaa bí kunimbaaun kíf nyāntí un ḡá an tundi gbantee ni-kansikinaaan?
- ³Maa bí ni-cee ni wāl-mi ama m-landṛkṛḡu bí ni-cee, n̄n ti-Dindaan Yeesu Kriisitoo puee m pūti kpāāa kūu un ḡá an tuḡkpitiilee bṛti ali kii m bí ni-kansikinee.
- ⁴Ni yaa làá kpāfèe, m-landṛkṛḡu dàá dāa n̄n bí ni-kansikin, ti-Dindaan Yeesu pṛḡḡu dàá dāa n̄n bí ti-cee.
- ⁵Ní dāa dū an niliuee kíf tī Sitaan n̄n sàan u-wunti ní u-naḡki n̄n dāa ḡmā kíf ḡmátí ti-Dindaan ḡítintam.

⁶Kun pu ní ni dàkafí ki cáá dilambilee kaa ḡāñ. Naa nyí yii nnyokò fiiyee ní bí dū kí ḡá bukpònṣaa ní án jōmāaan?

⁷Nyāntímaan nnyòkpiki gbanti ḡun sá ikpítee kí nīn sá circirdambi kii bukpònṣaa bun kaa cáá nnyokòee. Ni kpánti mín ki dòò, kun puee Kriisítooo un sá timbi pibiliḡ jijaaliuee dū u-ba ki ḡá saraa ipii yil pu ki tī timbi.

⁸An puee, tí jīmaan ti-jijaaliu gbanti nì kpònòb bin poon baa ḡá kpònò nyòkòḡu ḡun sá kii ikpiti nì tijòkòndee, ama án nīn sá kii kpònòb bin kaa cáá nnyokòee, ki sá circir nì ibaaṃnee.

⁹M nìn ḡmāñ-ni takalda ki tükū-ni yii ní taa yàntī ni nì bin ḡáañ tilaakpaalee n̄ nīn kpáfí.

¹⁰Maa nìn lì bin bí duulnyan ki ḡáañ tilaakpaalee nì nnimitaataandambi nì biyipòdambi nì biwaatootiliibi, an yaa bàà sá bìn pu ní m lèe, m bàà lì yii ní nyā duulnya poon ní.

¹¹M nín baasii là kí lì min takalda gbanti poonee di sá: unil un bí yii u nòó Yeesu ama ní ki ḡáañ tilaakpaal àá ki cáá nnimitaataam àá ki sá uwaatootil àá ki sìi binib àá udanyògbil àá uḡmatinlee, ni nì an niliuee n̄ taa kpāfí, ní taa jī tijin u-cee gba.

¹²⁻¹³Man di kaa làá sòòn bin kaa nòó Yeesuee bōti, kun puee tàa sá m-bōti, Unimbōti di dàá sòòn bi-bōti. Ama ni ḡūn kí sòòn ni-kansikin nimbi bin nòó Yeesuee bōti. An puee, nyāntímaan unikpiti ni-kansikin.

1 Kōranti 6

¹Ba pu ní ni-kansikin ubò nì ubò yaa cáá tòb tibeetee ni ḡūn ki cáā cān bin kaa nòó Yeesuee cee, kaa cáā cān bin nòó Yeesuee cee?

²Naa nyí yii bin fṣṣ Yeesu ki kíyee di dàá dāá sòòn duulnya yab bōtaaa? Nimbi bin dàá dāá sòòn duulnya yab bōtee di kaa ḡūn kí sòòn tibōti tin bí sòkòmiyeeeee?

³Naa nyí yii timbi di dàá dāá sòòn itūun bōtaaa? Kin ataa aḡa pu ní taa ḡūn kí sòòn binib bōti.

⁴Di sá yii nimbi kansikinee, ni yaa cáá tòb tibeetee, bin Kriisítooo nikitil kaa dūu yíin binibee, bìn ní nimbi cāabín bí nīn sá bibòsoonliibi.

⁵Mimmee ni-kansikin ubò kaa bí ki cáá iciin kí nīn ḡāḡkí ni-kansikin bōtaaa? Ni-cooi ní m bí lì nee.

⁶Nimbee, ni nì ni-nabiki yaa cáá tòb tibeetee, see bin kaa nyí Unimbōtee cee ní ni tin sòòn-tì.

⁷Kòḡkònnnee ni yīnti kpataaa ni nì ni-nabiyaamu nín cáá tòb tibōtee pu. Ba pu ní bi yaa ḡá-ni tin kaa kítèe naa jīn kimōtii ní? Ba pu ní naa yānti un yūñ-nee n̄ nīn cáā cá?

⁸Ama nimbi gba di ḡáañ tin kaa kítèe ní ki yù. Ni-nabiyaamu mun nòó Kriisítooyee ní ni ḡáañ mimmee!

⁹Naa nyí yii bin ḡáán tin kaa kítèe kaa làá dāá kó Unimbṓti beelinaaan? Uḡó ḡ taa mōntì u-ba. Bin ḡáán tijṓkōndee nì biwaatootiliibi nì bilaakpaadambi nì bin dò nì bininjajutiibee,

¹⁰nì binaayub nì nnimitaataandambi nì bidanyṓgbiliibi nì bin sìí binibee nì biyipṓṓdambi, an nibee kaa làá dāá kó Unimbṓti beelin.

¹¹Mín poon ní ni-kansikin biba nìn bí. Ama Unimbṓti fùl-ni ki lēēni-kpitii, ki ḡāntì-ni ki yṓoñ ní nīn sá u-yab. Ti-Dindaan Yeesu Kriisitoo nì Unimbṓti Fām puee ni kpánti deededambi.

¹²“M cáá nsan kí ḡá tikṓkṓ,” ama tikṓkṓ di kaa ḡāñ ki tī-mi. Báà m yaa cáá nsan kí ḡá tikṓkṓ, an kaa sá báà kuṡyee ní m dū m-ba kí tī kuyunṡu.

¹³“Tijin bí ki tī dipool ní, ní dipool mun bí ki tī tijin,” ama Unimbṓti dàá dāá kúnti tīn liitil. Tiwun tīn kaa bí ki tī dijṓkōntundi, tì bí ki tī ti-Dindaan ní, ní ti-Dindaan mun bí ki tī tiwun.

¹⁴Ní Unimbṓti un fikiti ti-Dindaanee ḡ dāá dū u-pṓḡṡuee kí fikiti ti mun.

¹⁵Naa nyí yii ni-wunti sá Kriisitoo wunjaṡṡi níin? M kíikí kí yṓoñ Kriisitoo wunjaṡṡi kí dūu kpāfi nì kilaakpaai yṓṡuṓṓ? Aayee, báà fiíi.

¹⁶Naa nyí yii un nì kilaakpaai yaa kpáfèe, udaan wunti nì kilaakpaai yati ḡá tibaantiilaa? Kun puee Unimbṓti takaldau poon lī yii: “Bi-liitilee ḡá ubaanti dee.”

¹⁷Ama un nì ti-Dindaan yaa kpáfèe, udaan nì ti-Dindaan ḡá ubaanti ḡfāmin dee.

¹⁸Ní fámaan dijṓkōntundi, di sá yii ikpiti in kíñ binib ḡááñee kaa ḡbèetī tiwun ama un ḡáán dijṓkōntundee, ún u-ba wunti ní u ḡáán ikpiti.

¹⁹Àá naa nyí yii ni-wunti sá Unimbṓti Fām min u tī-nee diiku ní naa yì ni-ba?

²⁰Unimbṓti dá-ni nì kudapṓṓu ní, an puee ní kpáañ ni-wunti kí tī-u tinyool.

1 Kṓranti 7

¹Tí kpèè takalda un ni ḡmāñee ḡṓti: Tin m dàá kíí-nee di sá yii: An ḡāñ ki tī unil ḡ taa bàà cáá unimpu.

²Ama, án taa láā yàntī ní kó tilaakpaal poonee, an máañ uninja kamaa ḡ nīn cáá u-nimpuu, ní unimpu kamaa ḡ nīn cáá u-cal.

³Uninja ḡ ḡá u-tundi nín sá puee kí tī u-nimpuu, unimpu mun ḡ ḡá mín mbaantiim kí tī u-cal.

⁴Di sá yii an kaa sá unimpu di yì u-wunti u-ba, an sá u-cal di yì-u. Mín mbaantiim an kaa sá uninja di yì u-wunti u-ba, an sá u-nimpuu di yì-u.

⁵An puee, ubṓ ḡ taa ḡmìntī u-juti báà tiba, asee ni yaa sṓoñ ki ḡbīl nì tṓḡ kí dū ḡyunti ḡubṓ kí taa ḡbēētṓḡ kí ḡmā kí mèe. Ni nín mēēmín ki dóyee, ní ní fàtíí kpāfi. An yaa

kaa sá mín, ni nín kaa ḡūn kí nīn gbíntì ki ḡúb ni-ba ki ḡmèéyee puee, Sitaan ḡūn kí dī mín kí cōḡkì-ni.

⁶Tin m sòòh-ni nee, kaa sá mara ní m síìh-ni, m sáḡkí-ni ní.

⁷M bàà là yii bininjab kòkò ñ bàà nīn bí kii man nín bí pu nee ní, ama bàà ḡma ni Unimbòti nín tīìh-u puee ní, u tī ubò tiba ní ki tī un kínee mun tiba.

⁸Ama, m tükù bijaakpaatiibi nì bisapòmbi nì bikpiipoobi yii an bàà ḡāñ bí gbíntí mín kii man nín bí pu nee.

⁹Ama bi yaa kaa ḡūn kí cúú bi-ba kí kàl̄ mín, bí mōh àà bí cáá binimpoobi, kun puee an só á cáá unimpu àà á mōh ki jítiñ á nīn kā ki wù fòrrr fam.

¹⁰Nimbi binimpoobidambi ní m tìi mara nee, (ti-Dindaan di yóòh mara gbanti, kaa sá man) yii: Unimpu ñ taa yīkì u-cal cee.

¹¹U yaa tí cāntì u-calaaa, ú nīn kā mín kí taa mōh ubò, àà u nì u-cal ñ ḡāḡkì bi-kansikin ú fātī gítìh-u. Mín mbaantiim, uninja mun ñ taa jà u-nimpuu.

¹²Nimbi bin kínee, tin m dàá tükù-nee sèé, (an kaa sá ti-Dindaan di sòòh mín, man di l̄.) M l̄ yii: a yaa cáá unimpu ní ki dāa fōō Yeesu ki kíí ní a-nimpuu kaa fōō Yeesu ki kíí, ama ní ki kíí kí nīn gbíntì ki sá a-nimpuuee, á taa yàntì-u.

¹³Mín ní unimpu mun yaa tí nóó Yeesu ní u-cal kaa nóó Yeesu ama ní ki kíí ú nīn gbíntìi sá u-nimpuuee, ú taa yīkì u-cee.

¹⁴Uninja un kaa nóó Yeesuee nimpuu nín nóó Yeesuee puee u ḡá circir dee. Ní unimpu un kaa nóó Yeesuee mun ḡá circir u-cal un nóó Yeesuee pu. An yaa kaa sá mimmee, bi-biyaamu kaa bàà bí circir. An nín sá mimmee puee, bi-biyaamu bí circir.

¹⁵Ama a yaa nóó Yeesu ní a-cal àà a-nimpuu kaa nóó Yeesu ní ki là kí càntì-see, pō-u nsan ú nīn cá, mara ubò kaa bóob-si á cúú-u mpon kí kàāñ. Di sá yii Unimbòti yíiñ-ti tí dāāñ kí nīn bí ḡgbansḡfin ní.

¹⁶Di sá yii unimpu, a nyí yii sii nì a-cal yaa làá nīn gbíntì ki bí, a dàá ḡmā kí fī-uaaa? Àá uninja, a nyí yii sii nì a-nimpuu yaa làá nīn gbíntì ki bí a dàá ḡmā kí fī-u?

¹⁷Tin bée di sá yii bàà ḡma ñ nīn ḡúb min ti-Dindaan tī-u ki wāatì ní u nín fōō Yeesu ki kííyee. An marau ní m síìh Kriisitoo nikitij kòkò kansikin.

¹⁸Sii un yaa gíí ní ki nín fōō Yeesu ki kííyee ñ taa nīn yáliḡkí yii a dàá gítī ḡá mana. Sii un kaa gíí ní ki fōō Yeesu ki kííyee ñ taa gíí.

¹⁹A yaa gííyaaa a yaa kaa gííyaaa tìh bōti kaa páb, tin péēpábee di sá á nīn ḡúb Unimbòti marab.

²⁰Bàà ḡma ñ nīn gbíntì ki bí min ní u nīn péēbí ní ki nín fōō Yeesu ki kííyee.

²¹A yaa nīn sá uyumbu ní ki nín fōō Yeesu ki kííyaaa, á taa nīn yáliḡkí, ama a yaa tí ḡūn kí fōō a-baaa, á pòòh kí fōō a-ba.

- 22**Uyumbu un f̄ōō ti-Dindaan ki kííyee, ti-Dindaan nyántì-u ikpiti yuṅkun, mín ní un yi u-ba ki f̄ōō Yeesu ki kííyee sá Kriisitoo yumbuu.
- 23**Unimbōti dá-ni nì kudapōōu ní, an puee ní taa gítì dū ni-ba kí ḡá binib yumbui.
- 24**Nnabiyaamu, ni nín n̄n péēbí min dooooyee ki wāati ki nín f̄ōō Yeesu ki kííyee, ní n̄n gbíntii bí mín kí dū ni-ba kí t̄i Unimbōti.
- 25**Bijaakpaatiibi n̄n bisapōmbi bōtee, ti-Dindaan kaa t̄i-mi mara m̄ yóón-bi, ama man nín dàkaf̄i puee ní m̄ dàá lì kii m̄ nín sá unil un ti-Dindaan pú diyimōol bi cáá m-pu dimákalee pu.
- 26**Man ká yii, kii diniminaamandi din bí kōṅkōnnee puee, an ḡān unil n̄ taa cáá unimpu.
- 27**A yaa gítì dàá cáá unimpuee, taa ti nyàab̄ n̄san yii a dàá nyāntí-u. A yaa kaa láá tí cááyaaa, á taa ti cáá.
- 28**Ama n̄n mín kōkōee, uninja yaa cáá unimpu, waa ȳntì, mín ní unimpu mun yaa mōh̄ waa ȳntì. Ama, digiṅkpaandi di dàá bà binimpucaaliibi n̄n bicamōnliibi, an pu ní m̄ bàà là kí nyāntí-bi digiṅdin.
- 29**Nnabiyaamu, tin m̄ dàá lèe di sá yii: ḡyunti kaa ti náan̄, an puee bin cáá binimpoobee n̄ n̄n bí kii bin kaa cááyee nín bí puee,
- 30**bin sūñee n̄ n̄n bí kii kunimbaau kaa cáá-bee, bin lāāyee n̄ n̄n bí kii an kaa mōh̄-bee, binyampoobi bin dāāyee n̄ n̄n bí kii baa cáá tibe.
- 31**Bin bí ki j̄n̄ duulnya puee n̄ n̄n bí kii baa bí páatí tibe. Kun puee, ni nín wāl̄ duulnya bí min nee u dàá dāá kúntí.
- 32**M̄ bàà là yii ní n̄n tó ni-ba kí taa n̄n̄ n̄n̄, di sá ti-Dindaan tundi ḡmaniḡma pu ní un kaa cáá unimpuee nimiliḡ mán̄ ki nyàab̄ kí fáatí ti-Dindaan.
- 33**Ama un cáá unimpuee nimiliḡ mán̄ duulnya tuuḡḡi pu ní u nyàab̄ kí fáat̄n̄ u-nimpuu.
- 34**Niinee u-landōkōi ḡá ili dee. Mín ní unimpu àá usapōōn un kaa mōh̄ee nimiliḡ mán̄ ti-Dindaan tundi pu, an nín dàá ḡá pu u-wunti n̄n̄ u-pōbil n̄ n̄n̄ bí circiree. Ama unimpu àá usapōōn un mōh̄ee nimiliḡ mán̄ duulnya tuuḡḡi pu ní u nyàab̄ kí n̄n̄ fáat̄n̄ u-cal.
- 35**Ni-ḡanti pu ní m̄ sōōn̄ tin bí nee, an kaa sá kí bàkañ-ni, m̄ là ní n̄n̄ ḡáan̄ min ḡān̄ ki kítèe ní, kí dū ni-ba kōkō kí ḡá ti-Dindaan ḡaan̄ kí taa kí kín̄ bàà laaaba.
- 36**Unaacimpōōn un di yaa bàà lēēyii waa làá cáá u-bōōn̄ ní ki dāa gítì ká yii waa ḡūn̄ kí cúú u-ba, an dàá n̄n̄ péēpáb̄-u mín̄ kí n̄n̄ cée, ú cáá u-bōōn̄, waa ḡá ikpiti.
- 37**Ama, un di lēēu-pōbil poon kaa ti bí kí gítì u-boon̄ ki yì u-ba ki nyí min u lēēnee, u nín baasii lēēu-pōbil poon̄ kí ḡá miḡyee deeyee, udaan lēēmin ḡānee.

³⁸Un kaa ḡún ki cúú u-ba ki cáá u-bòonee cee ḡāñ. Ama un ḡún ki cúú u-ba kaa cáá u-bòonee cee ḡāñ ki lákatì.

³⁹Unimpu un móñee máañ kí nīn péēnáká u-cal ní bí nīn bí iyunti kòkò. Ama u-cal yaa kp̄iyee, u tó u-ba kí mōñ un u yaa lèe. Ama un fōō Yeesu ki kíiyee ní an sá ú fātī mōñ.

⁴⁰Man ceeyee, u yaa gbíntì mín kaa móñ, u-pòbil dàá nīn sòm ki jítiñ u yaa móñ. M nyí yii man mun cáá Unimbòti Fām ní.

1 Kòranti 8

¹Tiwanḡuti tin bi tōtì awaayee nanti bòtee, ti nyí yii báà ḡma nyí, ama dinyil cāabìñ dilambil ní, ní dineendi yàntī binib cá nyòkòpu nnimbòtisan poon.

²Un dàkafī yii u nyí tibee kaa láá bèè min sá ú bééyee.

³Ama un yaa néēñ Unimbòtee, Unimbòti bèè udaan dee.

⁴Ni nín bālfī yii ti ḡūñ kí ḡmó tiwaananaaayee: ti nyí yii diwaal kaa sá tiba duulnya poon, mín ní báà unimbòti ubò gítī kpá see Unimbòtibaantee.

⁵Báà binib nín dàkafī yii inimbòti wīikí, iba bí yilpu iba bí taapuee,

⁶timbi cáá Unimbòtibambaanti ní, ùñ di sá Ubaati un náañ tikòkòee. Úñ pu ní ti bí. Ní ti-Dindaan sá ubaanti, ùñ di sá Yeesu Kriisitoo, ùñ pu ní tiwan kòkò bí, u-pu ní ti mun bí.

⁷Ama bi-kòkò kaa nyí mín. Di sá awaatuun mántiñ biba, ní bi gbíntì ki ḡmóò tiwaatootinan alii diwaal di lafun baasii yì tinan gbantee, ní bi-pòbiliḡ nín kaa pōō puee ní bí ḡá ikpiti.

⁸Di sá yii tijin di kaa làá yàntī tí sùtí kí pīl Unimbòti. Ti yaa jínaaan, an kaa làá bàtī-ti tiba, ti yaa kaa jínaaan, an kaa làá gbéeñ-ti tiba.

⁹Ama, ní nīn nyíñ ni-ba nì ni nín tó ni-ba ki ḡáañ miḡyee, án taa yàntī bin kaa pōō nnimbòtisan poonee n lítí.

¹⁰Un kaa pōō nnimbòtisan poonee yaa ká sii un nyí Unimbòti bòti tiḡanee yaa ká ditangbandi diba taapu ki jíñee, an kaa téekí-u ú ḡmó tiwaananaaan?

¹¹Ní sii nyítam puee kinabiki kin kaa láá bèè ki dóòyee, kinabiki kin pu Kriisitoo kp̄iyee n wāḡkàaa?

¹²Ni nín bí ki ḡáañ ni-nabiyaamu ikpiti min ki kōntí bin kaa láá bèè ki dóòyee landòkò iweenee, an sá Kriisitoo ní ni ḡáañ ikpiti gbanti.

¹³An puee, tijin jítam di yaa làá yàntī m-nabiki n lítée, m kpá kí ḡmó tinan an nín dàá ḡá pu m-nabiki n taa lítée.

1 Kòranti 9

- ¹Maa tó m-baaa? Maa sá Yeesu kpambalaaa? Maa ká Yeesu ti-Dindaanaaan? M nín tún ti-Dindaan tundi ki nyánti kunyee di kaa sá nimbaaa?
- ²Báà bin kínee yaa bí yii maa sá bíh cee Yeesu kpambal, nimbi máaà kí nīn nyí-mi yii m sá dikpambal. Ni nì ti-Dindaan nín ñá ubaanti puee di dàkà yii m sá dikpambal.
- ³M nín sòòh tin ki tükù bin kpākantí-mee dee.
- ⁴Man kaa cáá nsan kí jī kí nyò m-tundi puóóó?
- ⁵Maa cáá nsan ki mun ñ yòòh unimpu un nóó Yeesuee kí ñá m-nimpuu ú nīn táá-mi kii akpambal ñin kínee nì ti-Dindaan nabiyaamu nì Piyeer nín ñáaà pueeee?
- ⁶Áá an sá yii man nì Baarnaabasi baba ní ñ tō ditundi ní kí nín ká kí jī ní?
- ⁷Dma di kóò tisoojati baa pà-u? Áá unil kaa ñmòò busubu bun u còònee biliñaaan? Áá unaakpaal kaa nyù inaa in u kpàáyee naabiimaaan?
- ⁸An kaa sá min binib nyí ki ñáaà dín nì foolee pu ní m sòòh, Mooisi marau mun lī mín ní.
- ⁹An ñmàñ Mooisi marab poon yii: “Á taa bóób unaa un gbàà idee nyòkò.” Mimmee inaa bōti páb Unimbōtaaa?
- ¹⁰An kaa sá timbi pu ní an sòòh mimmaaàn? Tiñman, an sá timbi pu ní bi sòòh mín. An máaà un kù idee nì un gbàáyee ñ nīn cáá dimákal yii bi dàá ká bi-paatii poon.
- ¹¹Unimbōti bōti ní timbi búl ni-pòbiliñin, mimmee ni-wanti tin ni cáá duulnyanee ti yaa fōō tiba poonee ti fōō ki lákatì deeyaaa?
- ¹²Biba yaa cáá nsan ki jīh ni-puee, timbi kaa máaà kí jī ni-pu kí jítiñ bidambaaa? Ama mín bàà máaà ní ñá kí tī-tee, ti ñmēētaa bālfī-ni an pu, an nín dàá ñá pu tiba ñ taa líkiñ-ni Kriisitoo bōmōntiiti saññunee.
- ¹³Ni nyí yii bin tūh ditundi Kunimbōtidiinee, niin jinti ní bi jīh, ní bin ñáaà saraabee mun cáá bi-jandi saraabee poon.
- ¹⁴Mín ní ti-Dindaan pú kinyòkò yii bin sòòh tibōmōntiilee ñ nīn jīh bin cee bi sòònee ñaan.
- ¹⁵Ama maa bālfī tin an sá ní ñá kí tī-mee tiba nì tiba pu, maa tí bí ñmà yii ní ñá kí tī-mi. M yaa gbíntì mín ki kpī an só ki jítiñ ubò ñ bàtī m-nyooti.
- ¹⁶Tibōmōntiil soontamee kaa sá-mi dilambitundi ama an páb-mi yii m sòòh ní, kun puee an sá-mi mbusu ní m yaa kaa sòòh tibōmōntiil gbantee.
- ¹⁷M yaa ñáaà ditundi gbanti nì dipòbil dibee m cáá ipaati, m yaa kaa tí ñáaà-dì nì dipòbil dibaaa ditundi din Unimbōti tī-mee dee.
- ¹⁸Mimmee, m-paati di sá ba? M-paati di sá m sòòh tibōmōntiil kí tī binib faalaa kí taa fōō tiba, ama ki mun bàà cáá nsan kí fōō tiba.

¹⁹M sá unil un yì u-bee ní, maa sá uyumbu. Ama kí ñmā kí dáaliñ kunipaau kí cáañ Kriisitoo ceeyee, see m nín dū m-ba ki gíiñ báà ñma yumbuuee.

²⁰M yaa bí Juuda yab ceeyee, m gīntí m-ba kii Juuda yab nín bí puee ní, kí ñmā kí cáañ-bi Kriisitoo cee. M yaa bí bin dī Mooisi marabee ceeyee, m gīntí m-ba kii bí mun nín bí puee ní, kí ñmā kí cáañ-bi Kriisitoo cee. Ama ní kaa bí m-ba marabee taapu.

²¹M yaa tí bí bin kaa nóó Mooisi marabee ceeyee, m tí gīntí m-ba kii unil un kaa nóó marabee ní, kí ñmā kí cáañ-bi Kriisitoo cee. Míñ kaa dākà yii maa tó Unimbōti marab, m tó-bi, Kriisitoo marab taapu ní m bí.

²²M yaa bí bin kaa pōō nnimbōtisanee ceeyee, m gīntí m-ba kii bí mun nín bí puee ní, kí ñmā kí cáañ-bi Kriisitoo cee. Míñ ní m gīntí m-ba báà ñma nín bí miñyee kí ñmā kí fī bíba tiñman pu.

²³Tibōmōntiil pu ní m péēbí ki ñáañ míñ kōkōee kí ñmā kí dāá ká tiwammōntiil an poon.

²⁴Naa nyí yii bin kōkō cá ki sán kpañkpakantikuee, ubaanti di lītī ní kí fōō tipaalaaa? Ni mun nín sāmmaan min máañ ní sān kí lītī kí fōō tipaalee.

²⁵Bin bin cá ditaatandi kpañkpakantikuuee kòó tiwan tikpil, ñfuulimu mun kúyee pu ní bín ñáañ kpañkpantikubee. Ama timbee, ti sán kí fōō kifuulii kin dāá nīn bí jaanjaanee ní.

²⁶An pu ní m sán m-nimiliñ bá kun m sán ki nyàabee pu, ní m yaa làá mōee m bōntí ní kí nín bō, maa bōtí fam fam.

²⁷M sàantí m-wunti ní ki ñúb-tì. M pōōntí ní an nín dàá ñá pu m taa sōòn nì bin kínee Unimbōti bōti kí wāñkì m-bee.

1 Kōranti 10

¹Nnabiyaamu, m là ní téetí ditagbandi din nìn cōm ki dī ti-naanjab ki ñmíntí-bee, nì bi-kōkō nín nìn dūti dimōmandi puee bōti.

²Ditagbandee nì dimōlee poon ní bi fūl-bi bí nīn nóó Mooisi,

³ní bi-kōkō jín tijikaal tin nyēēñ Unimbōti ceeyee.

⁴Bi-kōkō di tí nyūñ nnyim min nyēēñ Unimbōti ceeyee, di sá yii bi nìn nyūñ ditañkpakpaandi din nyánní Unimbōti cee ki cēentí-bee nyim ní, ditañkpalee nìn sá Kriisitoo ní.

⁵Ama, nì míñ kōkōee, bi-kansikin tikpil nìn ñáañ min kaa fáatiñ Unimbōtee, an pu ní bi nìn kpū kupōoun.

⁶Tin nìn ñá-bi nee sá kudaanñu ki tī timbi tí taa nīn cáá ilandōkōkpiti kii bín nín nìn cáá ilandōkōkpiti puee.

- ⁷Ni mun ń taa ti nń́ awaa kii bi-kansikin biba nń́n nń́n nń́́ puee, ali kii an nń́n ńmàń Unimbɔti takaldau poon puee yii: “Kunipaau kāl ki jín ki nyũn ní ki yíkì ki ńđđ ki gón diwaal.”
- ⁸Ti mun ń taa ńá tilaakpaal kii bi-kansikin biba nń́n ńá puee, an di nń́n yānti binib kutukub mmun̄ku nì bita lítì ki kpíi ńwimbaanti.
- ⁹Tí taa ti cōńkĩmaan ti-Dindaan kii bi-kansikin biba nń́n nń́n cōńkì-u pu kin ikoobu dāa jũnti ki kũ-*bee*.
- ¹⁰Ni mun ń taa gbũkum̄ kii bi-kansikin biba nń́n nń́n gbũkum̄ pu ńkũm̄ tũun̄pu dómĩn ki kũ ki cēeti-*bee*.
- ¹¹Ditafadaaldi gbanti nń́n jéeti bi-pu kí nń́n sá kudaan̄pu ní, bi ńmàń tibɔti gbanti kí kpāfi timbi bin bí ńyuntijoolkaa nee poon nan ní.
- ¹²An puee sii un dākafĩ yii a nń́n yú pu nee a yú deedeeyee, á nń́n nyí nì a-ba kí taa lítì.
- ¹³Icōńki in bān ni-puee péēńmàntĩ unil pōńpu nyókōm ní, kun puee Unimbɔti yaa pōon̄ puee see ú ńá mĩn̄, waa kíikí tin lákatiñ ni-pōńpu puee ń bān-ni, di sá ńyunti ńun ní icōńki yaa bāan̄-nee, u dàá tĩ-ni mpon̄ ní ńmā kí ńmèè, ní kí dākà-ni nsan ní dī kí nyā.
- ¹⁴An puee nnabiyaamu, ní sān awaa.
- ¹⁵M sòon̄-ni kii bi nń́n sòon̄ binib bin cáá nlandókōee puee ní, nimbi ni-ba ń dākafi tin m sòon̄ nee pu kí kpèè.
- ¹⁶Ndaam min pu ti jáam̄ Unimbɔti ti yaa làá jĩ ti-Dindaan jikaatee di kaa kpáfí-ti nì Kriisitoo fatikuu ubaantaaa? Kpon̄o un ti gífí ki yàkatē, an di kaa kpáfí-ti nì Kriisitoo wunti kí ńá ubaantaaa?
- ¹⁷Kpon̄obambaanti ní an sá, ní bi gífí, mĩn̄ ní ti mun nń́n kpáfí ki sá kunipaau nee ti kpánti tiwumbaantiil, kun puee ti-kōkō ńmó kpon̄obaanti gbanti.
- ¹⁸Kpèèmaan Israyeel yab ɔti: bin nń́n jĩn̄ tin bi cāabiń ki ńáan̄ Unimbɔti saraayee bi nì Unimbɔti un bi ńáan̄ saraayee ńá ubaanti dee.
- ¹⁹M nń́n lì pu nee dākà yii diwaal bí tiban deeyaaa? Áá tiwan̄kuti tin bi tōotì-dee nanti di bí tiban ní?
- ²⁰Aayee, kpataaa! Di sá tin bi tōotēe bi tìi arasiniibi ní, an kaa sá Unimbɔti, an puee maa là ni nì arasiniibi ń kpāfi ubaanti.
- ²¹Naa ńũn̄ kí nyò ti-Dindaan daam kí gítĩ nyò arasiniibi mun yam; naa tí ńũn̄ kí jĩ ti-Dindaan jikaati kí gítĩ jĩ arasiniibi mun yati.
- ²²Ti là kí táká ti-Dindaan tibɔti kí yòon̄ u-ńuul náaan? Ti pōon̄-uaaa?
- ²³Biba li yii: “M cáá nsan kí ńá tikōkō,” ama tikōkō mun kaa ńān̄ ki tĩ-ni. “Ti cáá nsan kí ńá tikōkō,” ama an kaa sá tikōkō di tútuñ-ti nnimbɔtisan poon.
- ²⁴Uɔ ń taa nń́n nyàab̄ ùn̄ u-ba ńanti, ama ní nyàab̄ ni-jutiibi ńanti.

²⁵Ni ɲū̀n kɪ̀ dā́ tinan tin bi nyáfi kinyɔɲinee kɪ̀ ɲmó̀ nì dipɔɔsɔɲkil kɪ̀ taa bàlfi yii tì sá ba yati.

²⁶Kun puee Unimbɔ̀ti takaldau poon lɪ̀ yii: “Kitiɲ nì tin kɔ̀kɔ̀ péebí ki-puee, ti-Dindaan di yì.”

²⁷Un kaa nɔ́o Yeesuee yaa yíiín-ni ní jī̀ tijinee, ní ni yaa là ki cū̀tèe, tin u yaa cáan ki yóò̀n-nee, jī̀maan, ní taa lì yii ni là ni-pɔ̀biliɲ n̄ n̄n sòmee puee ni dàá bàlfi-u yii u-nanti gbanti sá ba yati.

²⁸Ama, ubɔ̀ yaa tükū̀-ni yii an sá tiwaatootinane e taa ɲmó̀maan an taa páb un tükū̀-nee pɔ̀bil.

²⁹An kaa sá nimbi ní án taa páb, un tükū̀-nee ní án taa páb. Ubɔ̀ ɲū̀n kɪ̀ bàlfi yii: “Ba pu ní an sá yii, an taa páb m-juti puee, man batɔ̀l cáá kigbeennyɔ̀kɔ̀ ní?”

³⁰M yaa làá jī̀ tijin ní ki yaa jáam Unimbɔ̀ti ti-pu ní ki nín jínee, ba pu ní bi gítí kpākantí-mi tijin tin pu m jáam ki nín jínee?”

³¹An puee, an yaa sá tijin ní ni bí ki jī̀naaan, an yaa tí sá ndaam ní ni yaa tí bí ki nyùɔ̀ɔ̀, tin kɔ̀kɔ̀ ní ni bí ɲáánee, ní yàntí án n̄n tìi Unimbɔ̀ti tinyool.

³²Ni-bimbim n̄ taa yàntí bin sá Juuda yabee nì bin kaa sée, nì bin nɔ́o Yeesuee, n̄ líti.

³³Ní ɲáammaan kii man nín ɲáan puee: m péē pɔ̀ɔ̀ntí m-ba kɪ̀ n̄n fáatìn báà ɲma tikɔ̀kɔ̀ poon, maa nyàab man m-ba ɲanti, ama báà ɲma ɲanti ní m nyàab, an nín dàá ɲá pu bí ká difiilee.

1 Kɔ̀ranti 11

¹Ní n̄n dīmaan man tabɔ̀biliɲ kii ma mun nín dī Kriisitoo tabɔ̀biliɲ puee.

²M pākā-ni kii ni nín tétí m-pu ɲyunti kamaa pu, ki ɲúb tibɔ̀ti tin m dàkā-nee kii m nín péē dàkā-ni-tì puee.

³Ama nì mín kɔ̀kɔ̀ee, tibɔ̀ti tin m là ní bééyee sèe: Kriisitoo sá uninja kamaa yidaan, ní unimpu yidaan sá u-cal, ní Kriisitoo yidaan sá Unimbɔ̀ti.

⁴Uninja di yaa bí ki mèe àà Unimbɔ̀ti tī-u dinyɔ̀ɔ̀bundi diba ní u bí nàatí ní ki cíki tiba u-yil puee kpèe Kriisitoo fam.

⁵Ama unimpu di yaa bí ki mèe Unimbɔ̀ti àà Unimbɔ̀ti tī-u dinyɔ̀ɔ̀bundi diba ú nàatí ní tiba kaa bī u-yil puee u kpèe u-cal un sá u-yidaanuee fam, an bí kii u tú diyibaakpalee ní.

⁶Ama, unimpu yaa kaa là kɪ̀ dū tiba kɪ̀ bīiñ u-yil puee ú cā àá ú kòòl. Diyikpical àà dikooldi yaa tí cáá-u icooyaaa ú n̄n bīintí tiba u-yil pu.

⁷Uninja kaa máan kɪ̀ bīiñ tiba u-yil pu, di sá yii ún sá Unimbɔ̀ti naɲku, ní ki sá u-nyooti. Ní unimpu sá uninja nyooti.

- ⁸Di sá yii an kaa sá unimpu pu ní Unimbōti lēētiba ki náán uninja, ama an sá uninja pu ní u lēētiba ki dūu náán unimpu.
- ⁹An kaa tí sá unimpu pu ní u náán uninja, ama an sá uninja pu ní u náán unimpu.
- ¹⁰An pu ní an sá yii itūun puee unimpu máan kí n̄n yíl tiba kí bìñ u-yil pu min dākà yii waa yì u-bee.
- ¹¹Ti-Dindaan saṅṅu poonee uninja kaa yì u-ba unimpu cee, mìn ní unimpu mun kaa yì u-ba uninja cee. Ubo kaa ṅūn kí n̄n bí ubo n̄ nín kpá.
- ¹²Di sá uninja pu ní bi lēētiba ki náán unimpu, ní unimpu mun di màal̄ uninja, ama bìn kəkōee nyánní Unimbōti cee ní.
- ¹³Nimbi ni-ba, ní dākafi kí kpèè yii an ṅān unimpu n̄ n̄n mèè Unimbōti kaa yíl tiba u-yil puɔɔɔ?
- ¹⁴Duulnya u-ba dākà yii an kaa ṅān uninja n̄ n̄n tú tiyikpiti sūuu.
- ¹⁵Ama unimpuee, tiyikpiti yaa fòkòee di sá u-nyooti kun puee tiyikpiti nín fòkò puee di fòol̄ ṅṅaabu ṅun u bàà làá yílee paṅṅu.
- ¹⁶Ubo yaa cáá tiba kí kpákañ an puɔɔɔ, timbi n̄ Unimbōti nikitij̄ nín ṅúb mimmee dee.
- ¹⁷Koṅkōnee m nín gbīl̄ tiṅyee puee m dàá wòon̄-ni ní, di sá yii ni nín kōontí ikoon in an bàà sá án tūtuñ-ni kin an púntí-nee.
- ¹⁸Mpeepeekaamee, m gbīl̄ yii ni yaa kpáfí kí jāam̄ Unimbōtee, ni kpákà ní ki gantí tob. Man m-ba m fōō yii an máan ki sá mìn.
- ¹⁹(An lafun máan digantil̄ n̄ n̄n bí ni-kansikin, bí ṅmā kí béé bin yú deedeeyee.)
- ²⁰Ni nín kpáfí ki jāam̄ Unimbōtee, an kaa sá ti-Dindaan jinti ní ni jīñ.
- ²¹Di sá yii nimbee, bàà ṅma ṅáan malaa ní kí yòon̄ u-jinti ki bí jīñ u-baba, ni nín ṅá mimmee ní ṅkùm dàá kpò biba ní bin kínee n̄ gbí ndaam.
- ²²Naa cáá idumpu kí jī kí nyò niinaaan? Unimbōti nikitil̄ ní ni kpèé fam naaan, bin kaa cáá tibee ní ni kōntí icoo ní? Ni cí yii m̄ li-ni tiba ní naa! M̄ pākā-naaan? Aayee, maa làá pākā-ni bàà fiii!
- ²³⁻²⁴Ní kpèè tibōti tin ti-Dindaan dākā-mi m dū ki nāatì-nee: di sá kunyeeu kun bi dū ti-Dindaan Yeesu ki ṅúbìñ u-nannanliibee, u n̄n yōon̄ kpōn̄o ki jāam̄ Unimbōti an pu ní ki cúū gífi, ní ki bí yii: “Doo di sá man wunti tin m dūu tī ni-puee, nín ṅáammaan mìn ki téetí m-pu.”
- ²⁵Bi jín tijikaal ki dódoyee ní u tí yōon̄ ndaam ní ki bí yii: “Ndaam nee di sá m-fatikuu un dàá nyēe, an di sá dipoompōndee daaṅku. Ní n̄n ṅáan mìn ki nyù ki téetí m-pu.”
- ²⁶Di sá yii, iyunti in kamaa ní ni yaa bí ṅmóò kpōn̄o nee ki nyù ndaam neeyee, ni bí ki sòon̄ ti-Dindaan kúm pu dee kí dāá sāa ṅyunti ṅun u dàá fātí gítínee.

- ²⁷An puee, ubo yaa kaa bàà máàn kí ñmó kpɔnɔ kí nyò ndaam gbanti ní ki yaa ñmó ki nyùnee u yĩntiñ ti-Dindaan wunti nì u-fatikuu.
- ²⁸Mín puee, báà ñma ñ cɔŋkì u-ba kí wàatĩ ní kí nín ñmó kpɔnɔ kí nyò ndaam gbanti.
- ²⁹Kun puee un di yaa ñmó kpɔnɔ ki nyùñ ndaam kaa nyí ti-Dindaan wunti bɔti taapuee, u nín ñmó ki nyùñ mimmee, ditafadaaldi ní u dáal ki tó u-ba pu.
- ³⁰An pu ní ni-kansikin biba sá bibunliibi nì bideembi, ní tikpil mun kpî.
- ³¹Ti yaa cɔŋkì ti-bee, Unimbɔti kaa dátí ti-tafal.
- ³²Ama ti-Dindaan yaa dátí ti-tafalee an sá kí sãŋkì-ti, an nín dàá ñá pu tí taa láá n̄n bí ditafadaalkpaandi din poon duulnya nib dàá dāá kóee nee.
- ³³An puee nnabiyaamu, ni yaa kpáfi kí jī ti-Dindaan jikaatee, cīitímaan tɔb.
- ³⁴Un ní ñkùm yaa cááyee, udaan ñ jīn u-dumpu, an nín dàá ñá pu ní taa n̄n kpáfi kí dátí ditafadaaldi ki tòó ni-ba puee. An yaa sá tibɔti tin kínee m yaa láá dómiínee ní m dāa dākà-ni.

1 Kɔranti 12

- ¹Nnabiyaamu, m là ní béé Unimbɔti Fām nín pūn dipɔl diŋyee bɔti.
- ²Ni téetí yii ni nín kaa n̄n dáá nóó Yeesuee, an n̄n dátí-ni ní ki càn awaa ñin bi mán ñaa gbìl kaa sòoñee cee.
- ³An pu ní m là ní béé yii unil un Unimbɔti Fām kpòotēe kaa ñūn kí li yii mbusu ñ jēetí Yeesu pu, mín ní ubo kaa tí ñūn kí li yii: “Yeesu sá ti-Dindaan” Unimbɔti Fām yaa kaa kpɔtì udaan.
- ⁴Unimbɔti Fām nín pūn dipɔl^{fc} diŋyee bí u-ba u-ba, ama Unimbɔti Fām mbaantiimee di tìl mín.
- ⁵Ní báà ñma tundi nyēēdi-ba di-ba ama ní ti-kɔkɔ tūn ki tìl ti-Dindaan ubaanti.
- ⁶Ní báà ñma cáá min ní u ñáań u-tundee, ama Unimbɔtibaanti di yantĩ ti-kɔkɔ ñūn ki ñáań mín.
- ⁷Unimbɔti Fām tìl binib dipɔl ní bi ñáań atuun an tútuñ báà ñma.
- ⁸Unimbɔti Fām pūn ubo iciin ú sòoñ tibɔti, mín mbaantiim ní mi tí pūn ubo mun dinyil ú sòoñ tibɔti.
- ⁹Unimbɔti Fāmee mbaantiim di pūn ubo fookii, ní ki pūn ubo mun ú n̄n ñūn ki cāantí iween.
- ¹⁰Unimbɔti Fām pūn ubo mpɔn ú n̄n ñáań maamaacib, ní kí pō ubo mun ú n̄n nàatĩ Unimbɔti nyɔɔbundi, kí pō ubo mun ú n̄n nyí kí gantĩ Unimbɔti Fām tundi nì arasiniibi tuuŋŋi, ní kí pō ubo ní ùn sòoñ isooncaan kupaau, ní kí pō ubo ùn ñ gbìl isooncaan taapu kí nàatĩ.

- 11**Unimbōti Fām mbaantiimee di ḡáán an tuuḡḡi gbanti kòkò. Mi nín lēēmiḡyee ní mi yàkatī mi-pòl ki tìi bàà ḡma.
- 12**Kii tiwun nín sá tibaantiil ki cáá ajan kupaaupuee, nì min kòkò ajan gbanti bí a-ba a-ba, ḡi kòkò kpáfi ki ḡá tiwumbaantiilee, mín ní ti nì Kriisitoo sá.
- 13**Mín ní bin sá Juuda yabee nì bin kaa sée, nì bin sá iyumbuee nì bin kaa sée, Unimbōti Fām mbaantiim ní bi fūl ti-kòkò ti kpánti tiwumbaantiil, mín ní Unimbōti tī ti-kòkò u-Fām gbanti mbaantiim.
- 14**Tiwun kaa sá mbaantiim an yākatī ajan kupaaupuee ní.
- 15**Ditaal yaa bí yii dín kaa sá ḡḡal, an puee dàá sá tiwun, mimmee dàá lafun sá tiwun dī nín kaa sá ḡḡalee puɔɔ?
- 16**Àá ditafal yaa bí yii dín kaa sá dinimil mín puee dàá sá tiwun, mimmee dàá lafun sá tiwun dī nín kaa sá dinimilee puɔɔ?
- 17**Tiwun kòkò yaa sá dinimilee tì bàà ḡáán mana kí nīn gbìl? Àá tiwun kòkò yaa bàà sá atafalee, mana ní tì bàà ḡáán kí nīn gbìl nsɔnsɔfi?
- 18**Ama min Unimbōti lèe ní u kāàn tiwun jaḡḡi tiwun pu.
- 19**Ajan kòkò yaa bàà sá dijambaantiilee la ní tiwun tìn bàà làá kāl?
- 20**Unil wunti jaḡḡi bí kupaaupuee ama ní ki sá tiwumbaantiil.
- 21**An puee, dinimil kaa ḡūn kí lè ḡḡal yii: “Maa là-si,” mín ní diyil mun kaa tí ḡūn kí lè ataa yii: “Maa là-ni.”
- 22**Unil wunti jaḡḡi ḡin bi kpèe yii ḡaa pōyee, ḡin di nín kèetī.
- 23**Ní ḡin ti kpèe ki ḡèeḡee, ḡin ní ti tìi tinyool, ní ḡin bōti taa lèe ḡin ní ti kpèe tiḡan.
- 24**Ama ajan ḡin sá amōntee, kaa nyàáb bí tī-ḡi tinyool, Unimbōti ḡá tiwun mín kí tī dijandi din lód tinyoolee tinyool ní,
- 25**an nín dàá ḡá pu digàntil n taa nīn bí tiwun jaḡḡi kansikin ḡi-kòkò n nīn sūn tɔb puee.
- 26**Falaa yaa cúú dijandi dibee, an cúú ki kpāàn ajan kòkò dee, bi yaa tí bíi pàkà dijandi dibee, ḡin kòkò kíḡee fāal ní.
- 27**Ni-kòkò sá Kriisitoo wunti ní, ní ni-kansikin bàà ḡma sá tiwun jandi diba.
- 28**Mín ní Unimbōti péé péé ki kāàn akpambal Kriisitoo nikitil kansikin; nlilitiimee, Unimbōti bōnaatiliibi, ntataatiimee, bidakaliibi, boonee ní u dū bin kíḡee ki páàn. U pú biba bí nīn ḡáán maamaacib, ki pú biba bí nīn cāantí bibunliibi, ní ki tī biba ḡḡmam bí nīn tútuḡ binib, ní ki pú biba bí nīn kpòotī binib, ní ki pú biba bí nīn sòḡn isooncaan kupaaupuee.
- 29**Bi-kòkò di sá akpambalaaa? Bi-kòkò di sá Unimbōti bōnaatiliibaaa? Bi-kòkò di sá bidakaliibaaa? Bi-kòkò di ḡáán maamaacibaaa?

³⁰Bi-kòkò ní Unimbòti pú bí nīn cāantí bibunlibaaa? Bi-kòkò di sòòn isooncaanaaan? Bi-kòkò di gbìl isooncaan taapu ki nàatāaa?

³¹An puee, ní nyàab Unimbòti ń p̄-ni dip̄l din jítiñ ñin kíñeeyee. M dàá gítí dākà-ni nsan ñun jítiñ i-kòkòee:

1 Kòranti 13

¹Bàa m yaa sòòn isooncaan, binib nì itūun sooni, ní kaa cáá dineendee, tin m sòònee sá fam ní kii dawula àá diwaṅkilindi nín sūñ pu fam an kaa cáá taapuee ní.

²M ñūñ kí f̄ṣ̄ dip̄l kí nīn nàatī Unimbòti nyòobundi, ki ñūñ kí nīn cáá dinyil kòkò nì di-nyòkòm kí béé tin kòkò bí dibalinee, kí nīn cáá fookii tiṅan án nīn kpikití ajoon, míñ kòkòee m yaa kaa cáá dineendee, m sá fam ní.

³Bàa m yaa dū tiwan tin m cááyee kòkò ki yākatì bifalaadambi ki yaa dū m-ba gba ki tī bi wūñ, ama ní kaa cáá dineendee, tin kòkò m ḡee sá fam ní maa cáá ipaati.

⁴Un cáá dineendee cáá kimotii ní ki cáá tiniti, waa cáá nnimitaataam, kaa dākà u-ba, kaa cáá dilambil.

⁵Un cáá dineendee kaa ḡaañ min kaa kítèe, kaa cáá ikummunti, kaa cáá diṅuul, kaa díkì unil pu.

⁶Tin kaa bí deedeeyee kaa tì un cáá dineendee dipòopindi, see tin bí deedeeyee.

⁷Ūñ pūñ binib yìntitam kòkò ní, ki cáá fookii nì dimákal, nì kimotii ḡyunti kamaa.

⁸Unimbòti nyòobundi nàatitam dàá dāá gbèēñ, isooncaan sòontam dàá dāá gbèēñ, dinyil dàá dāá kúntí ama dineendi kpá kí kúntí jaanjaan.

⁹Di sá ti-nyil din ti nyée cáá di-gbeennyòkòm ní, míñ ní Unimbòti nyòobundi nàatitam mun cáá mi-gbèenlanḡi, kun puee taa nyí ki dòò, kaa ñūñ kí sòòn kí dóó tikòkò mun.

¹⁰Timòntiil tin dóntèe yaa láā bāaḡee, tin cáá digbèendee dàá dāá wāḡkì.

¹¹M nín nìn dáá sá kibikee, m nìn sòòn kii kibikee, ní ki dākafī kii kibikee, ní ki kítí m-bòti kii kibikee. Ama, m nín wíiñ ki kpánti ukpaanee m fá m nín nìn sá kibiki ki ḡaañ min miṅyee.

¹²Kòḡkòñnee, ti nín dáá wāl puee bí pūuu kii bi nín kpèé digitikpil poon ki wāl puee ní, ḡyunti dòòñ ti dàá dāá wāl bóiii. Díñ pu nee maa nyí ki dóò, ama ḡyunti dòòñ, m dàá dāá béé nyíkínyiki kii Unimbòti nín nyí-mi pu nan ní.

¹³Kòḡkòñnee tiwan tita di bí: fookii, dimákal nì dineendi, ama tiwan titee kansikinee dineendi di lī.

1 Kòranti 14

¹An puee ní péé péé kí nyàab dineendi, kí nyàab dip̄l din Unimbòti Fām pūñee, cilinjee: nyàabmaan Unimbòti nyòobundi nàatitam p̄l.

- ²Un sòòn isooncaanee kaa bī sòòn nì binib, u sòòn nì Unimbòti ní, kun puee binib kaa gbìl tin u sòònee taapu. Unimbòti Fām pəŋɣu di yàntī u sòòn tin bí dibalinee.
- ³Ama un nàatī Unimbòti nyɔɔbundee sòòn nì binib ní, ní bi-nimbòtinootam mòtī cá nyɔkɔpu ki tū-bi kunyannyaau ki sɔŋkī bi-pɔbiliŋ.
- ⁴Un sòòn isooncaanee, ún baba ní an tútuñ, ama un nàatī Unimbòti nyɔɔbundee tútuñ Kriisitoo nikitil kəkɔ dí cù nyɔɔpu ní.
- ⁵M là báà ŋma ń nīn sòòn isooncaan, ama tin m baasii nyàab ní nīn cááyee di sá Unimbòti nyɔɔbundi nàatitam. Di sá un nàatī Unimbòti nyɔɔbundee jítiñ un sòòn isooncaanee, asee u yaa sòòn isooncaan kí fātī kí nàatī taapu án tútuñ báà ŋma ń cù nyɔkɔpuee baba.
- ⁶Nnabiyaamu, m balfi-ni: M yaa dómín ni-cee ní ki bí ki sòòn nì ni isooncaan in naa gbìlee, mana ní an dàá tútuñ-ni? Ɖyunti ŋun ní tin m sòònee poonee naa gbìl tin Unimbòti lēēkí dākà-nee, kaa bēē tiba poon, kaa gbìl Unimbòti nín tī dinyɔɔbundi diŋyee, kaa fɔɔ didakal diba poon nee.
- ⁷Tí dū kí ŋmàntī nì tigbiŋgbiiłwan diwul àá kubeeu, miliitil siim yaa kaa nyēēu-ba u-bee, mana ní bi ŋūn kí gàntī kí bēé yii diwul di sūn nee àá kubeeu di sūn nee?
- ⁸Sooja yaa kaa búñ dijanjakantáandi ki cánti, mana ní bin kínee dàá bēé kí bóntí kujaa?
- ⁹Mín mbaantiim, ni yaa bī sòòn isoon in baa gbìlee bi dàá ŋá mana ní kí gbìl taapu? Mimmee ni sòòn ki féēn dee.
- ¹⁰M nyí yii isoon nín bí i-ba i-ba puee wīkí duulnya poon ama isoon iba kpá kaa cáá taapu.
- ¹¹Ama, ubɔ yaa bī sòòn nì m isooncaanee, udaan sá man cee unicaan ní ma mun sá ún cee unicaan.
- ¹²Kii ni nín bí ki nyàab Unimbòti Fām pɔl puee, ní nyàab din dàá yàntī Kriisitoo nikitil ń cù nyɔkɔpu nnimbòtisan poonee tikpil.
- ¹³An puee un sòòn isooncaanee ń mēè Unimbòti ń pɔ-u ŋŋmam ú nīn nàatī tin u sòònee taapu.
- ¹⁴Di sá m yaa bī mēè nì isooncaanee an sá m-fām di mēé, ní m-landɔkɔŋu kaa bī ŋáań diba.
- ¹⁵Mimmee, an máań m mēè mana? M dàá mēè nì m-fām ní kí mēè nì m-landɔkɔŋu mun binib ń gbìl taapu; kí gāā ilan nì m-fām ní kí tí dū m-landɔkɔŋu kí gāā binib ń gbìl taapu.
- ¹⁶M yaa bī mēè ki pàkà Unimbòti nì ŋfāmin ŋmaniŋma mana ní ubɔ un kaa gbìl taapuee ŋūn kí kī yii “Ameen”, ŋyunti ŋun ní waa gbìl tin a sòònee taapuee?
- ¹⁷Tiŋman a-wimmeem gbanti bàà ŋāñ, ama an kaa tútuñ a-juti.

- 18**M jáam Unimbɔti, di sá yii m sòòn isooncaan ki jítiìn ni-kòkò.
- 19**Ama Kriisitoo nikitil kansikinee, an yaa sá anyɔɔbun aŋmoo ní m sòòn binib ń gbìl taapu án tūtuñ-bee, m néeñ mín ki jítiìn m sòòn isooncaan poon anyɔɔbun kutukub saalaa.
- 20**Nnabiyaamu, ní taa nīn dākafi kii mbiyaamu nīn dākafi puee, nīn cáamaan binicikitikaabi landòkɔŋu. Ama ikpiti jandi puee, ní nīn bí kii mbiyaawaamuee kí taa nīn ńáán ikpiti.
- 21**An ɣmāñ Unimbɔti takaldau poon yii: ti-Dindaan lī yii: “M dàá dàá dī binicambi biba pu ní bí sòòn nì m-samaau nee inicansoon, ama nì mín kòkòee baa làá pīlfiñ-mi.”
- 22**An puee Unimbɔti Fām nīn tì isooncaan iŋyee sá Unimbɔti daaŋku kubɔ ní ki tī bin kaa nókó Yeesuee, an kaa sá ki tī bin nókó Yeesuee. Ama kí nàatī Unimbɔti nyɔɔbundee di sá Unimbɔti daaŋku ki tī bin nókó Yeesuee, ní kaa sá ki tī bin kaa nyí Yeesuee.
- 23**An yaa sá yii Kriisitoo nikitil kòkò yaa kpáfi kí jām Unimbɔti ní báà ɣma bí ki sòòn isooncaanee, un kaa nyí Yeesuee àá un péékóón kí pīlfèe yaa gbìl ni nīn sòòn miŋyee, waa yīn-ni biwaatiibaaa?
- 24**Ama ni-kòkò yaa bí ki nàatī Unimbɔti nyɔɔbundee, án dàá gbēēun kaa nyí Unimbɔtee àá un péē kóón kí pīlfèe pɔbil ní ú béé yii u sá ukpiti kun puee u gbìl tin ni sòònee taapu,
- 25**ní ki wál u-landòkò in bál u-pɔbilinee, niinee ní ú lítí dicincibil Unimbɔti nimiin nì ijaam ní kí bí yii: “Tiŋman, Unimbɔti lafun bí ni-kansikin.”
- 26**Mimmee nnabiyaamu, an sá tí ńá mana ní? An sá ni yaa kpáfi kí jām Unimbɔtee, ubɔ ń gāā ilan, ubɔ ń dākà Unimbɔti bɔti, Unimbɔti yaa dākā ubɔ tiba, ú sòòn, ní ubɔ ń sòòn isooncaan, ní ubɔ ń nàatī isooncaanee taapu; tin báà ɣma dàá ńéé ń tūtuñ Kriisitoo nikitil ń cù nyòkɔpu nnimbɔtisan poon.
- 27**Ni yaa làá sòòn isooncaanee, án nīn sá binib bili kii bita, bí nīn sòòn ubɔ ubɔ, boonee ubɔ ń nàatī tin bi sòònee taapu.
- 28**Ubo yaa kaa bí kí nàatī tin bi sòònee taapuee, un bī sòòn isooncaanee ń ɣmīl kí nīn kíñ ki sòòn ùn nì Unimbɔti kansikin ɣmaniŋma.
- 29**Bin nàatī Unimbɔti nyɔɔbundee máan kí nīn bí bili kii bita ní bin kínee ń nīn pīlfi ki dāantí tin bi sòònee.
- 30**Ama Unimbɔti yaa nyánti tibɔti tiba ki dākā ni-kansikin ubɔee, un bī sòònee ń ɣmīl.
- 31**Ni ɣūñ ni-kòkò ń nīn nàatī Unimbɔti nyɔɔbundi ubɔ ubɔ an nīn dàá ńá pu ní béé kí ká kunyannyaauuee.
- 32**Unimbɔti Fām min bí u-bɔnaatiliibi puee kaa páb-bi bi tó bi-ba ní.
- 33**Kun puee Unimbɔti kaa sá fam fam Nimbɔtiu, ama ɣgbansɔŋfi Nimbɔtiu ní u sá. Kii Unimbɔti nikitij kòkò poon an nīn péēsá puee,

³⁴binimpoobi máań Kriisitoo nikitil kansikinee bí n̄n k̄a ki ŋmí ní, baa cáá nsan kí sòoń tiba. Bi máań kí s̄nt̄n̄ bi-ba taapu kii Unimbōti takaldau poon n̄n l̄i puee.

³⁵Bi yaa kaa gb̄l̄ tiba taapuee bí tin bàlf̄i bi-calib mm̄oŋki. An kaa ŋān̄ binimpoobi ń sòoń tiba Unimbōti nikitij kansikin.

³⁶Nimbi cee ní Unimbōti bōti nyááaaan? Áá nimbi baba cee ní Unimbōti bōti dóm̄iń ní?

³⁷Un yaa nyí yii u sá Unimbōti bōnaatiliu àá Unimbōti Fām t̄i-u dip̄ol dibee máań kí béé yii tibōti tin m ŋm̄ān̄ nee sá ti-Dindaan marau ní.

³⁸Un kaa béè yii an sá ti-Dindaan marauee, ní yānt̄i udaan bōti.

³⁹An puee nnabiyaamu, nyàab̄maan Unimbōti Fām ń t̄i-ni Unimbōti nyōobundi n̄aatitam p̄ol, ama kí taa p̄iĩn̄ bin sòoń isooncaanee nsan.

⁴⁰Ní n̄n ŋáań tik̄ok̄o án n̄n k̄it̄i ki d̄i n̄i nsan.

1 K̄oranti 15

¹Nnabiyaamu, m t̄et̄i-ni tibōm̄ontiil tin m n̄n sòoń n̄i ni, ni f̄ōō ki k̄í ki sí ti-puee bōti.

²Tibōm̄ontiil gbanti pu ní Unimbōti f̄i-ni. An puee ní n̄n gb̄nt̄i ki ŋúb̄-t̄i kii m n̄n n̄n sòoń n̄i ni puee, an yaa kaa sá mimmee ni f̄ōō ki k̄í fam dee.

³Tin bi dākā-mee, t̄iń ní m cáań ki dākā-ni, tibōti gbanti poonee tin páb̄ tikpilee di sá yii Kriisitoo kp̄ũ timbi kpitii pu ní, kii Unimbōti takaldau n̄n l̄i puee,

⁴yii bi síb̄-u ní iwiin ita dalee ní Unimbōti fikiti-u, kii an n̄n ŋm̄ān̄ pu Unimbōti takaldau poonee.

⁵Piyeer ká-u ní u-kpambaliŋ saalaa n̄i alee mun ká-u.

⁶Boonee u-boonooliibi tili n̄i iŋmoo mun ká-u dicilpu, bi-kansikin tikpil dáá bí kaa kp̄ũ, ama biba mun kp̄ũ.

⁷Boonee ní Jaaki mun ká-u, ní akpambal k̄ok̄o mun dāa ká-u.

⁸Bĩn̄ k̄ok̄o ká-u, boon kpataaayee ní u yānt̄i man un bí kii m-ŋmalii kaa bàń ní bi m̄āl̄-mee mun ká-u.

⁹Man di sá kiwaai akpambal kansikin, maa máań bí yíiń-mi Yeesu kpambal báa f̄iĩ, kun puee m s̄ań Unimbōti nikitil.

¹⁰Unimbōti ŋanti pu ní m sá kun m sá dínee, tiŋan tin u ŋá-mee cáá m̄p̄on ki yānt̄i m ŋá ditundi ki jítiń akpambal ŋin kínee. An kaa sá man m-ba di ŋá an tuuŋŋi, an sá Unimbōti ŋanti tin bí m-nee di ŋá ditundi gbanti.

¹¹An puee an yaa sá maaaaan, an yaa tí sá bin kíneeyaaa, tin pu ti sòońee dee, tin ni mun f̄ōō ki kíyee dee.

- 12Ti yaa sòon̄ ki tükū-ni yii Unimbɔti fikiti Kriisitoo ditaŋkpiilinee, mana ní ni-kansikin biba li yii bitaŋkpiibi kaa bí kí fikiti?
- 13Bitaŋkpiibi yaa kaa fikiti ditaŋkpiilinee, mimmee Kriisitoo mun kaa fikiti dee.
- 14Kriisitoo yaa kaa bàà fikitee, tibomontiil tin ti sòon̄ nee bàà sá fam ní, ní ni mun nín fɔ̄ɔ ki kii miyee n̄a fam.
- 15Ali gba ti bàà sá binyimondambi, kun puee ti mónti ki tún̄ Unimbɔti pu yii u fikiti Kriisitoo ditaŋkpiilin, kin ú mun kaa fikiti-u, an yaa lafun sá tiŋman yii bitaŋkpiibi kaa fikitee.
- 16Bitaŋkpiibi yaa kaa fikitee, mimmee Kriisitoo mun kaa fikiti dee.
- 17Kriisitoo yaa kaa fikiti ditaŋkpiilinee, mimmee ni-fookiu sá fam dee, ni dáá gbinti ki bí ni-kpitii poon dee.
- 18An yaa sá mimmee, bin nóó Kriisitoo ki kp̄iyee wán̄ki.
- 19An yaa sá dimaŋfal din poon ti bí nee ŋmaniŋma pu ní ti yaa máká Kriisitoo puee, mimmee timbi falaau jitiñ binib kɔkɔ you.
- 20Ama Kriisitoo fikiti ditaŋkpiilin tiŋman, bitaŋkpiibi bin dàá dāá fikitee, ún̄ di sá upeepeekaa ki fikiti.
- 21Di sá yii unibaanti pu ní ŋkúm dī ki jéeti binib pu, mín̄ mbaantiim ní bitaŋkpiibi fikititam tí dīñ unibaanti pu kí fikiti bàà ŋma.
- 22Kii Adam puee ti-kɔkɔ nín kúu puee, mín̄ mbaantiim, Kriisitoo puee bi dàá dāá tī binib kɔkɔ dimaŋfal.
- 23Ama an sá bàà ŋma n̄ u-yuntiŋu ní, Kriisitoo di sá upeepeekaa ki fikiti ditaŋkpiilin, ní bin nóó Kriisitooyee mun n̄ dáá fikiti ŋyunti ŋun u yaa láā fāti gitiínee.
- 24Boonee ní duulnya kúntitam n̄ nín bāñ; ŋyunti ŋun u yaa láā kúnti ipon kɔkɔ n̄ i-nyokomee ní ú dū dibeel kí tī u-Baa Unimbɔti.
- 25Kriisitoo dáá jī dibeel mín̄ ní kí tin sāā ŋyunti ŋun u dáá já kí jī n̄ u-nannanliibi kí dū-bi kí n̄a u-taaji taapuee.
- 26U-nannanliu un u dáá kúnti kántanjooliyee di sá ŋkúm.
- 27Kun puee an lī Unimbɔti takaldau poon yii: “U dū tikɔkɔ ki n̄a u-taaji taapu.” Unimbɔti nín lī yii u dū tikɔkɔ ki n̄a u-taaji taapuee, kaa sá ki kp̄aāñ ún̄ Unimbɔti u-ba ní u kp̄aā dū n̄a u-taapu.
- 28Ŋyunti ŋun ní tikɔkɔ yaa láā s̄intiñ ti-ba ki tī Kriisitooyee, niinee ní ún̄ Unimbɔti Jipoon mun u-ba n̄ dáá sintiñ u-ba kí tī Unimbɔti un s̄intiñ tikɔkɔ taapu ki tī-uee, ní Unimbɔti n̄ n̄n̄ yì tikɔkɔ n̄ tikɔkɔ.
- 29Kp̄èemaan bin yantī bi fūul̄-bi Unimbɔti nyim bin kp̄iyee yil puee: bin kúyee yaa kaa bàà fikitee, ba pu ní bi yantī bi fūul̄-bi Unimbɔti nyim bitaŋkpiibi yil pu?

- ³⁰Bi yaa kùù kaa fikitī ní, ba pu ní nyunti kamaayee timbi bí diniminaamandin ní?
- ³¹Nnabiyaamu, baabadalee ñkúm tà ki kíbití-mi ní. Ni nín nóó ti-Dindaan Yeesu Kriisitoo puee nín tì-mi disindi diyyee di yì-tì ní m lì mín.
- ³²An yaa sá yii unil yaa kpíi waa ti fikitēe, mimmee m nín ján nì kumooun peeli in bí Efeesee ba paatii ní m ká? An yaa sá yii bi-taṅkpiibi kaa fikitēe, mimmee càmaan tí ñá kii dilanṅkpandi nín lī puee yii: “Tí jī kí nyòmaan, kun puee fool ti dàá fu kpú.”
- ³³Ní taa yàntī ubo ñ ñmàtì-ni: “Ni yaa nóó binib bin bimbim kaa ñāñee, see ni mun ñ dāá bīl.”
- ³⁴Ní gítimmaan ni-ban kí nīn cáá ilandokomonti kí taa ti ñá ikpiti. Ni-kansikin biba kaa nyí Unimbōti. M nín lī pu nee, an sá ni-cooi ní.
- ³⁵Ama ubo dàá lì yii: “Mana ní bin kpíyee dàá fikitī? Tiwun tilati ní bi dàá dāá nīn cáá dee?”
- ³⁶Ugbaan, a yaa búl ṅwamboolee, ṅwamboolee yaa kaa kpíyee, ṅuaa nyēē.
- ³⁷Kí kūtèe, kun a búlee sá idi àá iwambool iba ní an nyā ki sá tifaal an kaa ti sá ṅwambool ṅun a búlee.
- ³⁸Unimbōti di tìi ṅwamboolee u nín là ṅú nyā kí nīn bí miṅyee, ùn di tìi iwambool kòkò nín máaṅ kí nyā kí nīn bí miṅyee.
- ³⁹Tiwan tin kòkò cáá kufoouee wunti kaa sá tibaantiil, binib wunti bí ti-ba, ipeel yati bí ti-ba, nnombiyaamu yati bí ti-ba, ijòm mun yati bí ti-ba.
- ⁴⁰Tiwun tin sá yilpu yatee bí, ní tin mun sá taapu dooyee yati bí. Tin sá yilpuee nyaanṅku nyán ku-ba nì tin sá taapu dooyee.
- ⁴¹Ḍwiiṅ nyaanṅku bí ku-ba ní uṅmal mun yòkò bí ku-ba, ali gba iṅmalbijaa kansikinee i-nyaanṅku bí ku-ba ku-ba ní.
- ⁴²Mín mbaantiim ní bitaṅkpiibi yaa láā fikitèe, an dāa bí. Tiwun tin kúyee ní bi dù kí síb, ní tí dāá fikitī nì tiwun tin kaa kúyee.
- ⁴³Kí wàatī bí dū-tì kí síbee tàa ṅāñ, kaa pōō mun. Ama ní tí dāá fikitī nì kunyaanṅu nì mpon.
- ⁴⁴Taapu doo wunti ní bi dùú síb ní tí dāá fikitī nì yilpu wunti. Taapu doo wunti bí ní yilpu mun yati bí.
- ⁴⁵Kii Unimbōti takaldau poon nín lī puee, yii: “Adam unipeepeekaayee Unimbōti náaṅ-u ní ki tī-u dimaṅfal,” ama Adamjoolkaayee ùn sá Unimbōti Fām min tìi dimaṅfalee ní.
- ⁴⁶An kaa sá un nyánní Unimbōti ceeyee di péetí kí dāāñ, an sá un nyánní taapu dooyee di péetí, ní un nyēēñ Unimbōti ceeyee ñ páanní boon.
- ⁴⁷Ntam ní Unimbōti dūu náaṅ Adampeepeekaa ní u sá taapu doo, ama Adamliliitee nyánní Unimbōti cee ní.

⁴⁸Binib bin sá taapu doo yabee náán nì un Unimbɔti dū ntam ki náánee ní, ní bin sá yilpu yabee náán nì un nyánní yilpuee.

⁴⁹Ti nì un sá taapu dooyee nín náán pu nee, mín mbaantiim ní ti nì un sá yilpuee dàá dāá nīn tí náán.

⁵⁰Nnabiyaamu, tin m là kí tükù-nee sèé: tiwun nì fatiku kaa ḡñ kí kó Unimbɔti beelin, mín ní tin kúyee kaa ḡñ kí fṣṣ tin kaa kúyee.

⁵¹M dàá tükù-ni tibɔti tin nìn bí dibalinee: di sá yii ti-kəko kaa làá dāá kpú kí dós kí wàatí ní Yeesu n nín gítíh, ama ti-wunti di dàá dāá kpántí.

⁵²Dikantánjoolkaal yaa láā búnee, niin niin dicilpu kii dinimil nín péékábití puee, bitaḡkpiibi kpáāá fikitì nì tiwun tin kaa ti kúyee, ní timbi bin kíh kaa kpíyee wunti n cúú kpántí.

⁵³Di sá yii tiwun tin bíílee dāá kpántí tin kaa bíílee, mín ní tiwun tin kúyee dāá kpántí tin kaa kúyee.

⁵⁴Dyunti ḡun ní tiwun tin bíílee yaa láā kpántì tin kaa bíílee, ní tiwun tin sùee yaa láā kpántì tin kaa ti sùee, ḡyunti gbantee an ḡá kii an nín ḡmāñ Unimbɔti takaldau poon puee dee, yii: “Bi kúntì ḡkúm, dijajil ḡá dimṓndi.”

⁵⁵“Too, ḡkúm, a-jajil bí la? Too, ḡkúm, a-looti bí la?”

⁵⁶Dkúm looti di sá ikpiti, ní ikpiti pṓḡḡu sá mara.

⁵⁷Tí jāmmaan Unimbɔti u nín diḡfí ti-Dindaan Yeesu Kriisitoo pu ki tì-ti dijajil diḡyee pu.

⁵⁸An puee, m-nabineeḡkaamu, ní nīn ḡúb an píkí, kí báán inyaan kí nīn tūmmaan ti-Dindaan tundi kí taa gbèēñ, kí nīn nyí yii ni-tundi kaa làá gbíntí fam.

1 Kṓranti 16

¹Tibɔti tin m cáá kí tükù-ni tootoo un ni ḡáán kí tī Kriisitoo yab bin bí Jeerusaleemee sèé: Ni mun n nīn ḡáán kii m nín dàkā Kriisitoo nikitiḡ ḡin bí Gaalaati tiḡkinee puee.

²Kṓsil kamaayee, báā ḡma n lēēmin u kée dijandi din u dàá tīyee kí yóóh, án taa nīn sá yii man m bān ní ní nín kíí animil ditɔl.

³Ní lēēbinib biba, m yaa láā bāānee m tī-bi takalda, kí tṓ-bi bí cáá ni-tootoou kí tī Jeerusaleem yab.

⁴An yaa tí sá yii m cù m-baaa, man nì bi n nós kí cù.

⁵M yaa làá dāāñ ni-ceeyee, m dàá dīn Maseeduaan tiḡkin ní kí nín bān-ni kun puee m là kí dī Maseeduaan ní.

⁶An yaa yī m dàá kāl ni-cee fiii, ni yaa kaa kpēēgba, ni-cee ní m dàá kāl ní tiwool yuntiḡu n jītí, an nín dàá ḡá pu ní tūtuñ-mi m nikī m-saḡḡu laakin sá m cùee.

⁷Maa ti là kí dāá kāl ni-cee fiii, ti-Dindaan yaa kíyee, m là kí kāl ni-cee kí yúntí ní.

- ⁸Ama m dàá n̄n bí Eefeesi tiŋkin ní kí tin s̄ā Pantikooti jiŋaaliu dal.
- ⁹Di sá yii nsan ŋubɔ p̄iti ki d̄oñ m̄ dī kí ŋá dituŋkpaandi, n̄i min kɔkɔ m-nannanliibi w̄iki tikpilee.
- ¹⁰Tiimootee yaa b̄āñ ni-ceeyee, ní f̄ɔ̄-u mm̄ontiimin u-pɔbil n̄ n̄n s̄òm, kun puee ú mun t̄uñ ti-Dindaan tundi kii mamee ní.
- ¹¹Uɔ n̄ taa kpèè kí s̄iŋk̄iñ-u, ama ní t̄utuñ-u ú f̄at̄i kí ḡitiñ m-cee n̄i dipɔɔsɔŋkil, di sá man n̄i nnabiyaamu mun bí dooyee k̄ā ki cí-u.
- ¹²M bàà t̄i ti-nabiki Apooloosi kunyannyaau u n̄i nnabiyaamu mubɔ bí bàà d̄āñ ni-cee, ama waa là kí d̄āñ k̄oŋkonnee, ŋyunti ŋun sá ú d̄āñee yaa láā b̄āñee, u d̄ā d̄oñ.
- ¹³Ní n̄n nyí n̄i ni-ba kí n̄n ŋúb ni-fookiiu Kriisitoo ni án p̄íkí, kí n̄n cáá dipɔbil, kí n̄n p̄ɔ̄.
- ¹⁴Tin kɔkɔ ni yaa làá ŋée, ní n̄n ŋāñ n̄i dineendi.
- ¹⁵Nnabiyaamu, m dàá ḡit̄i k̄ut̄i-ni tiba: Kee ni nyí Steefanasi n̄i u-dicaŋkuɔɔ, ni t̄et̄i yii b̄iñ di sá bin péé péé ki f̄ɔ̄ Yeesu ki k̄íí Greeki tiŋkin ki t̄utuñ Unimbɔti yabee.
- ¹⁶An puee, ní d̄ū ni-ba kí t̄i an nibe jutiibi n̄i bin kɔkɔ bí bi-cee ki t̄uñ ditundi n̄i dipɔbil dibee.
- ¹⁷Steefanasi n̄i Fɔtunatoo n̄i Akayikusi d̄āantam m̄ókiñ-mi, di sá ni n̄n kpá m-ceeyee, b̄iñ di t̄eñ ni-yil ki ŋāñ tin ni yaa bàà bí ni bàà làá ŋá kí t̄i-mee.
- ¹⁸Bi t̄i-mi kunyannyaau kii bi n̄n t̄i ni mun puee. Binim̄ontiibi bin bí mimmee máañ bí p̄àkà-bi.
- ¹⁹Kriisitoo nikitij ŋin bí Asii timmune j̄áám-ni. Akilaasi n̄i Prisiil n̄i bin kɔkɔ k̄oñt̄i bi-dumpu ki j̄áám Unimbɔtee j̄áám-ni tiŋan ti-Dindaan pu.
- ²⁰Nnabiyaamu mun kɔkɔ bí dooyee j̄áám-ni. Ní j̄āam t̄ɔb n̄i kunabitiiu jaamii.
- ²¹Man P̄ɔl m-ba di d̄ū m-ŋal ki ŋm̄āñ ijaam nee kí j̄āam-ni.
- ²²Un kaa là ti-Dindaanee, udaan n̄ ŋá fam. “Ti-Dindaan d̄oñ!”
- ²³Ti-Dindaan Yeesu ŋanti n̄ n̄n bí ni-pu.
- ²⁴M n̄eñ ni-kɔkɔ Yeesu Kriisitoo pu.

2 Kɔranti

2 Kɔranti 1

¹Man Pɔɔl un Unimbɔti là m sá Yeesu Kriisitoo kpambalee, nì ti-nabiki Tiimootee di ñmàñ takalda nee kí tī nimbi Unimbɔti yab bin kóò Kɔranti tiŋkinee nì bin kɔkɔ sá Unimbɔti nikitil ki kóò Akaayi timmu mun kínee nee.

²Ti-Baa Unimbɔti nì ti-Dindaan Yeesu Kriisitoo ñ ñá-ni tiŋan kí tī-ni ñgbansɔŋfi.

³Tí nyɔŋkìmaan Unimbɔti ti-Dindaan Yeesu Kriisitoo Baa un di sūn ti-saai ki ñmēentí-ti tikɔkɔ poonee.

⁴Falaabi bin kɔkɔ jēetí ti-puee, ùn di ñmēentí-ti, an nín dàá ñá pu ti mun ñ dū diŋmeendi din ti fòol u-ceeyee kí ñmēen bin mun bí bàà falaa un kamaa poonee.

⁵Kii Kriisitoo pu ti nín jīn falaa tikpil tikpil puee, mín mbaantiim ní u-puee ti tí fòol diŋmeendi tikpil tikpil.

⁶Timbi yaa bí ki jīn falaayee, an sá nimbi ñ ká diŋmeendi nì difiil pu; ní timbi yaa ká diŋmeendee an sá yii ni mun ñ ká diŋmeendi kí ñmā kí ñmèè nì kimɔtii falaabi bin timbi bí jīnee jutiibi yaa làà bàan-nee.

⁷Ti máká ni-pu mbaamomin kun puee ti nyí yii ni mun bí ki jīn falaa kii ti mun nín bí ki jīn pu nan ní, an puee ní ni ñūn kí fɔɔ diŋmeendi din bí ki tī-tee mun.

⁸Nnabiyaamu, ti là ní béé falaa un ti jín Asii tiŋkinee. Falaa gbanti nìn cúú-ti ki lákatì ti-pɔŋɔ pu, taa nìn gítí máká yii ti dàá nīn bí dimaŋfalin.

⁹Timbi ti-ba nìn péeká yii tiba kaa ti bí see ñkúm ní ti dàá kpú. Tin bí nee nìn bàan ti-pu an nín dàá ñá pu tí taa dū ti-mákal kí ñá timbi ti-ba pu, ama tí nīn máká Unimbɔti un fikití bitaŋkpiibee pu.

¹⁰Ún di nyánti-ti diniminaamandi kúm gbanti poon, ní ki dàá dāá nyántí-ti. Ní ti cáá dimákal u-pu yii ùn di dàá dāá gítí nyántí-ti,

¹¹kun puee ti nyí yii ni bí tútuñ-ti ñwimmeem poon. Di sá yii kunipaau yaa mēeti-pu ní Unimbɔti fɔɔ bi-wimmeemee kunipaau dàá dāá pàkà-u u nín ñá tiŋan tin ki tī-tee pu.

¹²Kun pu an mōn-tee di sá yii ti-pɔbiliŋ poonee ti nyí yii ti dū dipɔbil diba nì mbimbimontiim min bí circir ki nyánní Unimbɔti ceeyee ní ki kāl duulnyan, cilinjee ni-kansikin.

¹³⁻¹⁴Taa ti ñmàñ tibɔti tiba ki kútì tin ni kàañ ki gbīl nee pu. Kɔŋkonnee naa láá baasii béè-mi ki dóò. Ama ti-Dindaan Yeesu gítintam dalee, ni dàá dāá béé-mi mmontiimin. Yaadalee, timbi puee, an dàá dāá mōkiñ-ni, ní ni mun puee an dàá dāá mōkiñ ti mun.

¹⁵Tín pu ní m máká ki bàà là kí dīn ni-cee an nín dàá ñá pu ní ká tiŋan mili puee.

- ¹⁶M bàà dākafī yīi m̄ dīn ni-cee ní kí nín càatī Maseeduaan tiŋkin, ní boonee kí fātī tī dīn ni-cee, ní bàà tūtuñ-mi m̄ nīkī m-saŋkindi kí nīn cá Juudee tiŋkin.
- ¹⁷M nín bóntì kí còom̄ m-saŋŋu puee, an sá man di gāā m-bindi ki là kí cù-ŋu naaan? Àá m sá unil un nyɔkɔ kaa bī tiboti kí li yīi iin kí fātī li yīi aayeeyee ní?
- ¹⁸Ibaam̄on Unimbōti sá m-seeradaanu, m-saŋŋu ŋun bōti ti sòon̄ nee kaa sá “Iin” nì “Aayee” ŋmāl̄.
- ¹⁹Di sá yīi Unimbōti Jip̄on̄ Yeesu Kriisitoo un bōti man nì Siilaasi nì Tiimootee sòon̄ ni-cee niinee kaa sá “Iin” nì “Aayee” ŋmāl̄, ama, u-nee, an péēsá “Iin” ŋmaniŋma ní.
- ²⁰Kun puee Unimbōti nín p̄on̄ tiŋyee Yeesu pu ní an sá “Iin” tiŋman. An puee Yeesu Kriisitoo pu ní ti li “Ameen” ki nyóŋkí Unimbōti.
- ²¹Unimbōti di báan̄ timbi nì nimbi inyaan Kriisitoo ni. Ún̄ di sītì ti-pu Circir Fām.
- ²²Ún̄ di dū u-daaŋku ki ŋá ti-pu, ní ki dū u-Fām ki ŋá ti-pōbilin kí dākà-ti yīi ti sá u-yab u kpáafi tiwamm̄ntiil ki yóon̄ kí dāá tī-ti fool boon.
- ²³Unimbōti pu ní m sòon̄ ibaam̄on. Kun pu maa dīn ni-cee K̄oranti tiŋkinee di sá maa là kí yòon̄ ni-pōbiliŋ, m yaa móntì ú kpò-mi.
- ²⁴Di sá yīi taa là kí dū m̄on̄ kí dākà-ni ni nín máan̄ kí f̄ōō kí kīí puee. Ama ti là kí jòò-ni ní nīn cáá dip̄op̄indi ní, kun puee ni-fookiiu p̄ōō.

2 K̄oranti 2

- ¹An pu ní m ká yīi an ŋān̄ m̄ taa dāan̄ ni-cee kí fātī tī kón̄-ni kunimbaau.
- ²Kun puee nimbi di t̄i-mi kunyannyaau, kin m yaa kón̄-ni kunimbaauee, bilab di dàá gītī tī-mi dip̄op̄indi?
- ³Kun yì-ti m ŋmān̄-ni takaldee, di sá maa là kí bān̄ kí ká bin bàà làá tī-mi dip̄op̄indee n̄ kón̄-ni kunimbaaun, di sá m nyí yīi man p̄op̄indi sá nimbi yal ní ni mun p̄op̄indi sá ma yal.
- ⁴An n̄n̄ sá-mi kunimbaau n̄ dip̄op̄biildi n̄ nsiim ní m ŋmān̄-ni takalda, kaa sá kí kón̄-ni kunimbaau pu ní m ŋmān̄-ni, ama an sá ní ŋmā kí bée dineendi din bulfi m cáá ni-puee ní.
- ⁵Unil un di yaa cáan̄ kunimbaau neeyee, an kaa sá man baba ní u kón̄ kunimbaau, u kón̄ ki kpáan̄ ni-kɔkɔ ní. Ama kí taa sòon̄ kí càatēe ni-kansikin biba ní u kón̄ kunimbaau,
- ⁶ni-kansikin kupaau nín kpáfi kinyɔkɔ ki dáal̄ udaan tafal miŋyee ŋmāntì.
- ⁷Koŋk̄onnee ni máan̄ kí dūú p̄ō-u kí tī-u kunyannyaau ú taa gītī kó kunimbaakpaŋkpaŋŋun.
- ⁸An puee m gbāan̄-ni ní dākàmaan̄ ni-neendi udaan pu.
- ⁹M n̄n̄ ŋmān̄-ni tibotee kí cōŋk̄i-ni kí kpèè yīi ni tó-mi tiŋman puōō!

¹⁰Ni yaa dū unil un kpitii ki pú-uee, ma mun dàá dūú pō-u. Tiba yaa bí ki sá ní dūú pō-uee, nimbi puee man dūu pú Kriisitoo nimiin,

¹¹an nín dàá ḡá pu tí taa yàntī Sitaan ḡ jī ti-puee, kun puee ti nyí u-landokḡu.

¹²⁻¹³M nín bàñ Troowasi tiḡkin kí sòòñ Kriisitoo bómòntiitee, nì min kòkò ti-Dindaan pīiti-mi nshan m sòòñ-tèe, m nín kaa ká m-nabiki Tiiti niinee, m-pòbil kaa sòm m kàl niin, an pu ní m yíkì bi-cee ki búntì Maseeduaan.

¹⁴Tí jāam Unimbòti Kriisitoo pu, u nín cáá ti mun ki ḡáañ u-jajil faalii poon puee, ti nì Kriisitoo nín ḡá ubaantee puee u di ti-pu ki gbīti ajan kòkò Kriisitoo bòti kii talaaluae.

¹⁵Ti sá kii talaalu un sòfèe ní Kriisitoo cáā tì Unimbòti. Mìn ní ti tí sá ki tī binib bin ká difiilee nì bin mun wáḡkèe.

¹⁶Bin ká difiilee ceeyee an sá bìn nsònsòfi ḡun tì dimaḡfalee ní, ama ní ki sá bin wáḡkèe cee nnuun ḡun tì ḡkúmee. Òma di bàñ kí ḡá an tundi gbanti?

¹⁷Timbi kaa sá kii binib tikpil bin dū Unimbòti bòti ki kpántì dibantilee, ti sá ibaamòñ nib ní, Unimbòti di lēē-ti ki tú. Ti nín ḡá ubaanti nì Kriisitooyee pu ní ti sòòñ Unimbòti nimiin.

2 Kòranti 3

¹Mimmee ti fātì tí bī dākà ti-ba yii ti ḡá tiba deeyaaa? Àá an bàlfi yii tí cáañ takaldab bin bi ḡmāñ ki pākā-tee kí dākà-ni naaan? Àá an sá yii tí bàlfi-ni ní ḡmà takalda kí pākà-ti ní, ali kii biba nín ḡáañ puee?

²Nimbi Kòranti yab di sá takalda un báà ḡma wāl ki kàañee ní takaldee ḡmāñ ti-pòbilin.

³Báà ḡma wāl yii ni sá takalda un Kriisitoo dī ti-pu ki ḡmāñee ní. Waa ḡmāñ nì ntakaldamamòñ. Ama Unimbòti un bí dimaḡfalinee Fām di ḡmāñ. Waa ḡmāñ ataḡkpee pu, u ḡmāñ binib pòbiliḡin ní.

⁴Kriisitoo puee dimákal din ti cáá Unimbòti puee dee.

⁵Di sá taa bí yii ti ḡūñ kí ḡá tiba ti-ba pḡḡu pu, tin ti yaa ḡúñ ki ḡée an sá Unimbòti pḡḡu di cānti ti ḡúñ ki ḡá.

⁶Kun puee ún di tì-ti ḡḡmam ní ti sòòñ dipoompòndi din u ḡée bómòntiiti. Dipòndi gbanti kaa sá mara un nìn sá nì tiḡmaḡmabtee, ama di sá nì Unimbòti Fām tundi ní. Di sá mara kù ní, ama Unimbòti Fām mìn tì binib dimaḡfal ní.

⁷Unimbòti nín nìn ḡmāñ u-marab ataḡkpee puee bi nìn ká u-nyooti. Ní Mooisi mun nimiin nìn kìn ki jìl, ní Israyeel yab kaa nìn gítì ḡūñ kí kpèè-u. An nyootee sá tin jítée ní. Marab bin bi yaa yīnti an cāabìñ ḡkúmee yaa nìn dómín nì kunyaḡḡu mìn,

⁸kin ataa aḡa pu ní Unimbòti Fām min tì dimaḡfalee nyooti kaa máañ ki jítìn mìn.

⁹An yaa sá yii marab bin dàá cáan ñkúmee pu ní Unimbɔti nyooti dómiín ki jìl mimmee, mana ní Unimbɔti Fām tundi din dàá yànti binib n kpánti deedeedambi Unimbɔti nimiinee nyooti dàá nān jìl dee?

¹⁰Taa ñūn kí dū tinyool tin nìn jítèe kí ñmàntīn tin bí nee báa fiii. Kun puee tínee sá tikpaandi ní.

¹¹Tin bí ki dàá jítèe di yaa cáá tinyool mín nee, kin tin dàá nān péebí kí nān cée faa!

¹²Ti nín cótí tin pu tikpilee dee. An pu ní ti cáá dipɔbil ki sòon ki cánti tikɔkɔ.

¹³Timbi kaa làá ñá kii Mooisi nín nìn dū ññaabu ki bīn u-nimiin Israyeel yab n taa kpèè-u kí nān cí ñyunti ñun ní ñwalfèe dàá dāá lēēyee.

¹⁴Bi-landɔkɔi kaa cútí tibɔti malaa, ali kii ññaabuee dáá gbínti ki likī bi-nimiinee. Di sá yii bi yaa kàan dipoonkpikil takaldau poonee baa gbìl taapu, ali ki dāá sāá dínee bi-landɔkɔi kaa cútí tibɔti. See unil un fōō Kriisitoo ki kíyee baba nimiin ní ññaabu biitī.

¹⁵Ali ki dāá sāá díh bi yaa bī kàan Mooisi takaldabee an bí kii ññaabuee likī bi-landɔkɔi ní baa gbìl taapu.

¹⁶Unil un yaa fōō ti-Dindaan ki kíyee nimiin ní ññaabuee lèekī.

¹⁷Di sá yii ti-Dindaanee, Unimbɔti Fām dee, laakin ti-Dindaan Fām yaa bée, niin ní dibatɔl bí.

¹⁸Timbi bin kɔkɔ nimiin ññaabuee lēēyee di sá bin pu ní bi wāl ti-Dindaan nyootee. Ní Unimbɔti Fām bí ki tūn ti-ni ditundi ní u-nyooti mun wīinti ti-ni ki cá. Unimbɔti Fām nín ñá ditundi diyee dee.

2 Kɔranti 4

¹An sá tiñan ní Unimbɔti ñá-ti ní ki dū ditundi nee ki ñúbiñ-ti. An pu ní ti-wunti kaa yòtī di-pu.

²Ti fá dibɔmbɔndi nì icoo tuuñi, taa ñmàtīn binib, kaa kpánti Unimbɔti bɔti, ama Unimbɔti nimiin ní ti sòon ibaamɔn ki cánti ki tükù binib ki nyàab báa ñma n bée yii tin ti sòonee sá ibaamɔn.

³An puee bin wáñkèe ceeyee Unimbɔti bɔti tin ti sòon nee sá dibɔmbɔndi ní ki tī-bi.

⁴Kun pu baa fōō-ti ki kíyee di sá Sitaan un sá duulnya nee bɔtiuee jòb-bi ki yānti baa wāl tibɔmɔntiilee nín ñmínti ki dākà-bi Kriisitoo un sá Unimbɔti nañkuee nyooti.

⁵Taa bī sòon-ni timbi ti-ba bɔti, Yeesu Kriisitoo bɔti ní ti sòon nì ni yii ùn di sá ti-Dindaan, ùn pu ní timbi sá ni-tɔntɔnliibi.

⁶Di sá Unimbɔti un bí yii: “Dwalfi n ñmínti dibɔmbɔndinee,” ùn u-ba di ñmínti ti-pɔbiliñ poon ki yānti ti ká Kriisitoo nimiin Unimbɔti nyooti nín jìl miyee.

- ⁷Timbi bin u dū tibomontiil tin sá tigaajawanee ki núbinee, ti sá kii aboonee ní taa p̄ōō, ní tigaajawan kā ti-ni, an nín dàá n̄á pu binib n̄ bée yii mp̄oŋkpaan n̄un bí ti-ni ki n̄áán ditundee nyánní Unimbōti ceeyee, an kaa nyánní timbi cee.
- ⁸Falaabi k̄ok̄o n̄i bi-nyok̄om nyiit̄i-ti, ama ti mun kaa wiil̄; tiwan tikpil b̄akant̄i-ti, ama ti mun kaa páat̄i ti-mákal Unimbōti pu.
- ⁹Bi j̄i-ti, ama Unimbōti kaa yant̄i bí cúú-ti; bi líkí-ti kit̄iŋ, ama ti mun kaa kúú.
- ¹⁰Baabadalee bi d̄i-ti kí kp̄ò-ti kii bi nín n̄in d̄i Yeesu puee an nín dàá n̄á pu bí ká dimaŋfal din Yeesu cááyee ti mun nee.
- ¹¹Yeesu puee nyunti kamaayee n̄kúm péēkp̄akaŋ-ti ní. Báà ti yaa j̄ín falaa ní ki dāa kp̄i, binib dàá bée yii Yeesu bí ti-ni.
- ¹²Timbi bí n̄kúmin, ama ní ki cāabiŋ nimbi dimaŋfal.
- ¹³Ali kii Unimbōti takaldau poon nín l̄i puee yii: “M f̄ōō ki k̄í an pu ní m s̄oōn̄.” Nland̄ok̄o gbanti mbaanti ní ti mun cáá, ti mun f̄ōō Unimbōti ki k̄í, an pu ní ti s̄oōn̄.
- ¹⁴Ti nyí un fikiti ti-Dindaan Yeesu ditaŋkpiilinee dàá dāá fikiti ti mun kii u nín fikiti Yeesu puee, ní kí dāá cáá ti n̄i ni-k̄ok̄o kí k̄aān u-cee.
- ¹⁵Nimbi pu ní ti j̄iŋ falaa gbanti an nín dàá n̄á pu Unimbōti nín t̄i diyim̄ool diŋyee n̄ b̄a báa n̄ma, bí kp̄afi kunipaau kí j̄aam̄ Unimbōti tinyooldaan u-ŋanti puee.
- ¹⁶An pu ní ti-wunti kaa yot̄i, báa an yaa sá yii ti-wunti tin poon ti bí nee yaa b̄i n̄ant̄i ki sint̄āaa dimaŋfap̄ondi din bí ti-nee dàá n̄in péēp̄ont̄i ní ki cá.
- ¹⁷K̄oŋk̄onnee ti nín b̄i j̄iŋ falaa un fiŋi nee di b̄i b̄ont̄i tinyookpaandi tin kaa cáá dikuntil taa n̄ūn kí dūú n̄mant̄iŋ tibe ki ȳoŋt̄i-ti.
- ¹⁸An puee timbi nimikpeeŋu bá tin baa w̄álee pu ní kaa sá tin bi w̄al̄ nee pu, di sá tin bi w̄álee kaa yúnt̄i, ama tin baa w̄álee t̄iŋ dàá n̄in péēbí ní kí n̄in cá jaanjaan.

2 K̄oranti 5

- ¹Ti nyí yii tiwun tin poon ti k̄òò duulnya nee poonee yaa kp̄iŋyaaa, Unimbōti kp̄aafi-ti tiwump̄on tiba yilpu, tin sá kii kudii kun ún̄ u-ba mánee ní t̄i n̄in k̄òò poon jaanjaan.
- ²Ama k̄oŋk̄onnee ti bí ki yáliŋk̄i ki bàà nyàab̄ kí f̄ōō yilpu wunti tin sá kii kudii kun Unimbōti u-ba mánee.
- ³Kun puee taa làá tin n̄in bí yilpu kaa cáá tiwun.
- ⁴Tiŋman timbi bin dáá k̄òò tiwun nee poonee, ti bí digiŋdi n̄i falaabi poon ní. Ama taa là kí nyā tiwun tin sá taapu doo yatee poon, ti là kí dū yilpu wunti ní kí dūú biŋn̄ tin béeyee pu an nín dàá n̄á pu ní tiwun tin kúuyee n̄ n̄in f̄uúŋ tin kaa kúuyee poon kí ká dimaŋfalee.
- ⁵Unimbōti u-ba di bí yii ti-wunti n̄ dāá kp̄ant̄i mín̄, u-Fām min u t̄i-tee di d̄ak̄a yii u kp̄aafi tiwamm̄ontiil ki ȳoŋ-ti ti dàá dāá f̄ōō.

- ⁶An puee ní ti cáá kunyannyaau baabadal. Ti nyí yii ti nín dáá kóò tiwun tin poonee ti dá láá dátiñ ti-Dindaan.
- ⁷Ti fṣṣ Unimbṓti nín lī puee ní ki kíí, taa láá ká nì ti-nimiliṅ.
- ⁸Ti cáá kunyannyaau an júkufí-ti ti bàà là kí yīkì ti-wunti tin bí nee poon kí cù kí nīn bí ti-Dindaan cee.
- ⁹Ama tin ti nyààbēe di sá bàà ti yaa bí tiwun nee poonaaan, ti yaa nyán ti-naaan, tí fáatí-u.
- ¹⁰Kun puee an sá yii ti-kṓkṓ n̄ dāá kpāfi Kriisitoo nimiin ní ú sòòñ ti-bṓti ti nín kāl duulnya poon ki dū ti-yuntiṅu ki ṅá diṅyee, an yaa sá ikpitaana, an yaa tí sá tiṅanaaan, ní ú pà bàà ṅma u nín máaṅ tipaal tiṅyee.
- ¹¹Ti nín fāṅkí Unimbṓti puee ní ti bí ki nyààb binib n̄ fṣṣ-u kí kíí. Unimbṓti wāl-ti mín pílpiil, m nyí yii ni mun nyí ti-pu mín ni-pṓbiliṅ poon.
- ¹²Kaa sá ti là kí fātíí tí pākà ti-ba ni-cee, ti là kí pṓ-ni nsan ní nīn mòòñ ti-pu ní. Mín ní ni ṅūñ kí ká tiba kí kíí bin di bí ki sòòñ bi-nyṓmmu poon tibṓti fam ki kāntí tinyool ama ní bi-pṓbiliṅ poon kūñee.
- ¹³Bi yaa yī-ti biwaatiibaaa, an sá Unimbṓti pu ní bi yī-ti mín. Bi yaa tí yī-ti binimṓntiibaaa, an sá nimbi paatii ní.
- ¹⁴Kriisitoo neendi di jín mpaan timbi pu, timbi bin nyí yii unibaanti di kp̄i ti-kṓkṓ puee, mimmee ti-kṓkṓ kp̄i dee.
- ¹⁵Úñ di kp̄i ti-kṓkṓ pu an nín dàá ṅá pu bin bí dimaṅfalinee n̄ taa nīn bí ki tī bi-ba, ama bí nīn bí ki tī un kp̄i ki fikiti bi-puee.
- ¹⁶An puee taa ti kpèé ubṓ nniyaamin. Ki kpāaṅ doooyee ti yaa nīn kpèé Kriisitoo nniyaaminaan, kṓṅkṓnee taa ti kpèé-u mín.
- ¹⁷Un nì Kriisitoo ṅá ubaantee kpánti unipṓon dee, tin sá tikpikilee jíti, tipṓn di kíñ ki bí.
- ¹⁸Unimbṓti di ṅá mín kṓkṓ. U dī Kriisitoo pu ki yānti ti nì u kp̄iikì ní ki dū ditundi nee ki ṅá ti-ṅaan yii tí cáaṅ binib u nì bi n̄ kp̄iikì.
- ¹⁹Di sá yii Kriisitoo pu ní Unimbṓti dī ki cáaṅ binib ní u nì bi kp̄iikì, kaa fātii tó bi-kpitii in bi ṅee pu. U dū dikp̄iikil gbanti tundi ki ṅúbiiñ-ti tí sòòñ nì binib.
- ²⁰An puee Kriisitoo nyṓkṓpu ní ti dàá sòòñee ali kii Unimbṓti u-ba di dī timbi pu ki yī-nee. Ti dū Kriisitoo ki gbāam-ni, ní kíí kí yānti ni nì Unimbṓti n̄ kp̄iikì.
- ²¹Timbi kṓkṓ puee, Unimbṓti yānti Kriisitoo un kaa ṅá ikpiti ki kée fṣṣ timbi kpitii, an nín dàá ṅá pu, u-puee tí kpánti deedeedambi Unimbṓti nimiinee.

2 Kṓranti 6

- ¹Di sá yii timbi nì Unimbōti di bí ki tūh ditundi, an pu ní ti mēe-ni yii ní taa yàntī diyimōol din ni fōō u-ceeyee n̄ n̄á fam.
- ²Unimbōti lī u-takaldau poon yii: “M-niti yuntiŋuee m n̄n p̄lfiñ-si, m n̄n tútuñ-si difiil wiinŋu a ká difiil.” An puee Unimbōti niti yuntiŋu sēe, difiil wiinŋu sēe.
- ³Taa là kí bàkañ-ni báà tiba n̄n tiba poon, an n̄n dàá n̄á pu ubo n̄n taa ká ibokpiti iba ti-tundi nee pu kí lèe.
- ⁴Ama ti péedàkà ti-bimbim kòkò poon yii ti sá Unimbōti tontonliibi ní, ní ki j̄n̄ kimōtii tikpil, falaabi n̄n kunimbaau n̄n diniminaamandi poon.
- ⁵Bi gbàà-ti ki càh-ti ki p̄intí sarka, ki mēe tijáti ki tòó ti-pu, ki yàntī ti tūh atuun ŋin pōōyee, taa k̄ántí n̄geem, kaa j̄n̄ tijin.
- ⁶⁻⁷Ti-nyan̄kanti n̄n ti-nyil n̄n kimōtii n̄n ti-niti n̄n Circir Fām p̄ŋŋu n̄n dineembaamōndi, n̄n Unimbōti bōti tin sá ibaamōnee n̄n u-p̄ŋŋu ní ti cáā dàkà-bi yii ti sá Unimbōti tontonliibi. Ti-deedeeu di sá tijanjawan tin ti cáā jáàyee, n̄n tin ti cáā cí ti-bee.
- ⁸Dyunti ŋubōee bi t̄i-ti tinyool, ní ŋyunti ŋubōee bi kōntí-ti icoo; ŋyunti ŋubōee bi sòh̄n ti-pu tin ŋāñee, ní ŋyunti ŋubōee bi sòh̄n ti-pu tikpitiil mun. Bi kp̄é-ti kii binyimōndambee ama ní ti mun sòh̄n ibaamōn.
- ⁹Bi kp̄é-ti kii báà ubo kaa nyí-tee, ama ní báà ŋma nyí-ti; bi kp̄é-ti kii bin dàá kp̄úee, ama ní ti mun kaa kúù. Bi dátí ti-tafaliŋ, ama ní kaa kù-ti.
- ¹⁰Bi kōntí-ti kunimbaau ní timbi bí dipōpindin. Bi kp̄é-ti yii ti sá bisoodambi ama timbi di t̄i binib tikpil Unimbōti gaajati, bi kp̄é-ti yii taa péecáá tiba n̄n tiba, ama ní ti mun di cáá tikòkò n̄n tikòkò.
- ¹¹Nimbi K̄oranti yab, ti sòh̄n-ni ti-poon bōti kòkò ki p̄it̄i ti-p̄obilij ki t̄i-ni.
- ¹²Timbi p̄it̄i ti-p̄obilij ki t̄i-ni, nimbi di kaa p̄it̄i ni-yaŋ.
- ¹³M bí sòh̄n-ni kii ubaati n̄n sòh̄n n̄n u-biyaamu puee ní, kii ti n̄n n̄eēñ-ni miŋyee puee, p̄lit̄imaan ni-p̄obilij kí t̄i-ti.
- ¹⁴Ni n̄n binib bin kaa nyí Unimbōtee n̄n taa kp̄āfi kí n̄á ubaanti. Nnyōp̄ee ŋulōŋu di bí tin bí deedeeyee n̄n tin kaa bí deedeeyee kansikin? Mana ní dibōmbōndi n̄n ŋwalfi ŋūh̄n kí kp̄āfi?
- ¹⁵Mana ní Kriisitoo n̄n Sitaan ŋūh̄n kí p̄eēñ kinyòkò? Àá ba nyōp̄eeŋu di bí unimbōtinool n̄n un kaa nyí Unimbōtee kansikin ní?
- ¹⁶Mana ní Unimbōti n̄n awaa ŋun kí p̄eēñ kudii? Timbi sá Unimbōti un bí dimaŋfalinee diiku ní, ali kii Unimbōti u-ba n̄n lī puee, yii: “M dàá n̄n kòò m-nikitil cee, ní kí n̄n cōom̄ bi-kansikin, man di dàá n̄n sá bi-Nimbōtiu, ní b̄h̄n n̄n sá man nikitil.”
- ¹⁷An pu ní Unimbōti lī u-nikitil yii: “Ní nyā binib nee kansikin kí ḡant̄imaan ni-ba, kí taa gbēēt̄in sá tijòkōndee, ní man n̄n n̄n fōō-ni,

¹⁸Kí n̄n kíh̄n ki sá ni-Baa, ní ni mun ń n̄n kíh̄n ki sá man jipɔmbi n̄ m-bisalib. Ti-Dindaan ipɔn kɔkɔ daan di l̄i m̄n̄.”

2 Kɔranti 7

¹Nnabiyaamu, an n̄n sá yii timbi ní Unimbɔti p̄ɔn̄n apoon gbantee, tí fámaan atun̄kpiti ŋin kɔkɔ bííl̄ tiwun n̄i kinan̄ee, kí f̄an̄k̄i Unimbɔti kí nyāntí ti-pɔbilih̄n poon tikpiil kɔkɔ kí n̄n bí circir.

²Ní dū ni-pɔbilih̄n kí t̄iimaan-ti, di sá taa ȳintiñ ubɔ ni-kansikin, kaa bííl̄ ubɔ ni-kansikin, kaa jíñ ni-kansikin ubɔ.

³Kaa sá m là kí wòon̄-nee pu ní m l̄i m̄n̄, di sá m péēl̄i dooooyee yii ni kó ti-pɔbilih̄njin tiñan, báà diman̄falinaaan, ŋkúminaaan, ti dàá n̄n gbinti ki bí m̄n̄ ní.

⁴M cáá dimákakpaandi ni-pu, ni-bɔti m̄n̄-mi tikpil. Ti-falaabi poonee, dipɔɔpiñkpaandi din m cáá ni-puee t̄i-mi kunyannyaau.

⁵Di sá yii ti n̄n b̄aan̄ Maseeduaanee, taa gb̄l̄ mm̄on, ti kánti aḡn̄ kɔkɔ n̄i ŋi-bul ní timbi ti-ba bí kujaaun ní ti-pɔbilih̄n poon gb̄i tifaandi.

⁶Ama Unimbɔti un t̄i bin wunti ȳɔt̄ee kunyannyaau t̄iñ-ti kunyannyaau ŋyunti ŋun ní Tiiti b̄aan̄ ti-ceeyee.

⁷Kaa sá u n̄n d̄omiñ ti-ceeyee ŋman̄iñma pu ní ti ká kunyannyaau, ama u n̄n máafi-ti nimbi ni-ba n̄n t̄i ú mun kunyannyaau kuñyee pu. U máafi-ti ni n̄n m̄ò ki nyàab̄ kí bàà ḡit̄i ká-mee, n̄i ni n̄n bí ki yálin̄k̄i m-pu miñyee, an di ḡit̄i m̄ókiñ-mi ki lákat̄i.

⁸An puee takalda un m n̄n ŋm̄añ-nee yaa n̄n kón̄-ni kunimbaauaaa, an kaa ti páb̄-mi k̄oñk̄on̄nee, tin bàà làá páb̄-mee di sá m ká yii takalda gbanti n̄n kón̄-ni kunimbaau ŋyunti ŋubɔ poon f̄iñyee.

⁹Ama k̄oñk̄on̄nee an m̄ókiñ-mi, an kaa sá an n̄n kón̄-ni kunimbaauuee, ama an n̄n kp̄ant̄i ni-bimbimee pu, mimmee timbi kaa ŋá-ni ikpiti iba dee, an sá Unimbɔti di d̄i ni-nimbaaku pu ki ḡiñn̄i-ni u-cee.

¹⁰Kun puee kunimbaau kun Unimbɔti k̄ont̄i binibee c̄abiñ dibakpant̄il ní, ní unil ń ká difiil, ní kunimbaauuee kaa ti páb̄-u. Ama kunimbaau kun kaa nyānní Unimbɔti ceeyee c̄abiñ ŋkúm ní.

¹¹Ni ká Unimbɔti n̄n kón̄-ni kunimbaau kuñyee n̄n cáañ-ni tiñan tiñyee yaa! Ni kíh̄n ki ŋúb̄ Unimbɔti b̄oti mm̄ont̄iimin, ki kíh̄n ki bí gb̄aam̄ ni-bɔkpil pu. Tikpitil tin ŋee kaa m̄ókiñ-ni, ni kíh̄n ki f̄an̄k̄i Unimbɔti, ní an júkuf̄i-ni ní ká-ti; ní ni kíh̄n ki cáá difan̄giil, ki kíh̄n ki w̄al̄ yii an máañ bí dáal̄ ikpitidaan tafal. Tin ni ŋá nee puee ni d̄ak̄ā yii naa bí tib̄oti gbantin.

¹²An puee m yaa n̄n ŋm̄añ-ni takaldee, an kaa sá un ŋá ikpatee pu, kaa tí sá un bi ŋá ikpatee mun pu. Ama ti là ní ká difan̄giil din ni cáá ti-puee Unimbɔti n̄iñn̄i ní.

¹³An di tī-ti kunyannyaau. Tiiti nín bāānee an kaa sá kunyannyaau ηmaniηma ní ti ká, ama ti ká dipɔɔpiηkpaandi mun, kun puee an móɔkiñ-u tikpil kunyannyaau kun ni-kɔkɔ tī-u ni-cee niinee.

¹⁴Kí wàatī ú dāāñ ni-ceedee, m nìn tī-ni disindi u-cee, ní naa kòh-mi icoo kii m nín péē sòòh-ni ibaamɔn baabadal puee. Mìn ní disindi din m tī-ni Tiiti ceeyee an cūti ki kāl deedee.

¹⁵U yaa tētì ni-kɔkɔ nín nìn tó-u min min, ki pílfin-u, ki fōō-u min min nì tifaandi yókóyɔkɔee, ní dineendi din u cáá ni-puee mòtī wīntí.

¹⁶An móɔkiñ-mi tikpil kun puee kɔηkɔnnee m kíñ ki cáá ni-pu dimákal tikɔkɔ poon.

2 Kɔranti 8

¹Nnabiyaamu, ti là ní béé Unimbɔti nín ηá tiηan tin ki tī Kriisitoo nikitij ηin bí Maseeduaanee ηi túñ ditundi diηyee.

²Bi nìn bí agiñ tikpil poon, ama ní bi-pɔɔpindi nìn gítī lákatì; an yāntì ní min kɔkɔ bi sá bisoodambee bi dākā bi-niti an nyāηkì.

³M lēēbi-móɔηηu yii bi tī nì dipɔbil diba min bi ηúnee ali ki jítiñ min bi ηūnee pu kpataaa.

⁴Bi gbāam-ti tikpil, yii tí péēpō bí mun diyimɔl bí tō tootoo kí tūtuñ Kriisitoo yab bin bí Juudeeyee.

⁵Bi tī ki jíti min pu timbi bàà dākafēe, di sá yii bi dá láá péé ki dū bi-ba ki tī ti-Dindaan ki wāatì ní ki ηá Unimbɔti nín là puee, ki dū bi-ba ki tī ti mun.

⁶An pu ní ti gbāam Tiiti yii ú gítíñ ni-cee kí tī-ni kunyannyaau ní púntí ni-tootoou un u nìn tī-ni kunyannyaau ni kílee kí tō nì tiniti.

⁷Ni cáá tikɔkɔ nì tikɔkɔ: ni cáá fookii, ki nyí disoondi, ki cáá dinyil, ki cáá difaηgiil tikɔkɔ pu, nì dineendi ti mun pu, an puee ti là yii ní dū tin kɔkɔ ni cááyee kí dākà tootoo nee poon ni-niti.

⁸Kaa sá kí páb-ni pu ní m bī lì mín, ama m bī máafi-ni biba faηgiil ní, ni mun n̄ ηmā kí dākà ni-neendi nín sá ibaamɔn puee.

⁹Kun puee ni nyí ti-Dindaan Yeesu Kriisitoo yimɔl din u pú-tee. Úñ un sá ugaajee gíiñ u-ba usoodaan, timbi n̄ kpántí bigaajab úñ soodaηku pu.

¹⁰Man nín ká tin tibɔti nee poonee ní m là kí tükù-ni: m ká yii an ηāñ ní nikī ni-tundi dín ni nìn kí jīlee, kun puee nimbi di nìn péé péé ki kánní an landɔkɔηu ní ki nìn péé ki tó mun.

¹¹An puee kɔηkɔnnee ní púntímaan ni-tundi gbanti, an nín dàá ηá pu bí dāá ká min ni lēēni-pɔbilih poon yii ni dàá ηee, ní púntí kí ηá ni-pɔηηu nyɔkɔm.

¹²Ni yaa làá tī tiba nì dipɔbil dibee, an kaa sá ni nín dàá tī kuηyee wíiηηu di sá tiba Unimbɔti cee, ní tī min nyɔkɔm ni ηūnee di sá.

- ¹³An kaa sá yii ní dū tin ni cááyee kòkò kí jòón bin kínee kí ñmìntī ni-ba, ama an máaṅ un bi tútuṅnee nì un tútuṅ-uee kòkò ṅ nīn ṅmà ní.
- ¹⁴Kòṅkòṅnee ni cáá tikpil kí ṅmā kí tútuṅ bin kaa cááyee, ní daliṅkin ní ni mun yaa lóḍyee ní bí mun ṅ jòón nimbi, mīn di dàá yàntī ni-kòkò ṅ ṅmàntī.
- ¹⁵Ali kii Unimbòti takaldau poon nín lī puee yii: “Un fāā tikpilee kaa cáá ki lákatī, ní tiba kaa lóò un fāā fiiyee.”
- ¹⁶M jáam Unimbòti un di tī Tiiti difaṅgiil ni-pu kii ti mun nín cáá ni-pu miṅyee.
- ¹⁷Ti nín bālfī-u yii ú cù ni-ceeyee, u kíí-ti yii u dàá cù, ali gba ùṅ u-ba nīn péēbòntī yii u dòón ni-cee.
- ¹⁸Ti dū u nì kinabiki kin ṅá dituṅkpaandi Unimbòti bòti sòontam poon, Kriisitoo nikitīṅ kòkò pàkà-uee, ki túnní ni-cee.
- ¹⁹Kriisitoo nikitīṅ mun gítī lēē-u yii ú céēṅ-ti tí cáá tootoo un ti ṅá nì tinitee kí cùnni Jeerusaleem. An di dàá dākà ti nín néēṅ kí tútuṅ ti-jutiibi puee ní kí tī ti-Dindaan tinyool.
- ²⁰Taa là biba ṅ nīn bí ki sòòṅ ki bííl-ti kunimigbaau kun ti yòòṅ kí cáá yàkatī binib nee pu.
- ²¹Ti là yii tin ti ṅááṅee ṅ nīn ṅān ti-Dindaan ceeyaaa kí nīn ṅān binib mun cee.
- ²²Ti túnní-bi ni-cee bi nì ti-nabiki kiba kin ti cóṅkì ṅfunyòm tikpil ki ká yii u cáá difaṅgiil tikòkò poonee. Ama kòṅkòṅnee, u gítī mōtī ká difaṅgiil dimákakpaandi din u cáá ni-puee pu.
- ²³Tiiti ùṅ sá man tontòṅjuti ní ni-cee, bin kínee, Kriisitoo nikitīṅ di túnní-bi ní bi-bimbim tì Kriisitoo tinyool.
- ²⁴Dākàmaan-bi ni-neendi, Kriisitoo nikitīṅ ṅ béé ibaamòṅ yii ti cáá nsan kí nīn fāal ni-pu.

2 Kòranti 9

- ¹An kaa bālfī m gítī ṅmà-ni takalda kí tükù-ni ti nín máaṅ kí tútuṅ Kriisitoo yab bin bí Juudeeyee puee.
- ²M nyí ni-landòkòmòntī pu, m tī-ni disindi Maseeduaan yab cee ki tükū-bi yii doooo jiil ní nimbi nnabiyaamu Akaayi yab bónti, ní ni-faṅgiil tī binib tikpil kunyannyaau.
- ³An pu ní m dū nnabiyaamu nee ki túnní ni-cee, an nín dàá ṅá pu disindi din m tī-nee, bí lafun ká yii ni máaṅ-dee, kí lafun bónti tikòkò kii m nín tükū-bi yii ni bónti miṅyee.
- ⁴An yaa sá fam, man nì Maseeduaan yab biba yaa táaṅ ki bāaṅ ní naa láá bónti ki dóḍyee, ti-mákal din ti cáá ni-puee dàá kpánti-ti icoo ní, icoo gbanti dàá jī kí kpáaṅ ni mun.

⁵An puee ní m mēēnnabiyaamu nee bí péen timbi kí dāān ni-cee. Ní bóntí kí ǵá ni-niti tin ni p̄oñ kí ǵée, man dāa bànee, an bónti dee. Mìn di dàá dākà yii ni tī nì dipobil diba, naa tì ki yáliṅkí.

⁶Téetímaan yii un yaa búl fiiyee dāa tí cēē fiii ní, ní un búl tikpilee mun dāa tí cēētikipil.

⁷An puee báà ǵma ń tī min u-pobil fáati ú tīyee, án taa nīn sá nì kunimbaauaaa dipabil bōti, kun puee Unimbōti néen un tì nì dipōpindēe ní.

⁸Unimbōti cáá mp̄on kí tī-ni tiṅan kōkō nì ti-nyōkōm tikpil tikpil, an nín dàá ǵá pu ní nīn cáá baabadal tin kōkō ni yaa lèe án lákatí ní nīn cáā tūn atummōnti kōkōee.

⁹Ali kii Unimbōti takaldau poon nín lī puee yii: “Un ǵáán biwōfib tinitee, Unimbōti dàá bīn u-boon ní u-niti ń nīn péebí ki cá.”

¹⁰Unimbōti un tì ukpaal iwambool, ki tì tijikaalee, dàá tī-ni iwambool kōkō nì i-nyōkōm kí yàntī í lòoñ, an nín dàá ǵá pu ni-niti ń lòoñ abimōntee.

¹¹U dàá yàntī ní nīn sá bigaajab kí ǵmā kí nīn ǵáán tiniti, an nín dàá ǵá pu binib tikpil ń nīn jáaán Unimbōti tin ni ǵáán ki tì-bi ti cāabīn-bee pu.

¹²An kaa sá Kriisitoo yab bin lóò tibee ǵmaniṅma ní ni-tundi din ni ǵáánee tútuñ, ama an yàntī binib tikpil jáaán Unimbōti múlmul.

¹³Ni-tundi din ni ǵáánee di dākà binib bin ní ni sée, ní ki yàntī binib nyōṅkí Unimbōti ni nín tó Kriisitoo bōmōntiiti puee, ní ki nyōṅkí Unimbōti ni-niti tin ni ǵáán ki tì bīn nì bin kōkō kaa cááyee.

¹⁴Bi dàá mēè ni-pu nì dineeṅkpaandi, kun puee Unimbōti bīn ni-boon an kaa cáá bí māafī.

¹⁵Tí jāammaan Unimbōti u-pōtam nín kaa cáá jutee pu!

2 Kōranti 10

¹Man Pōl m-ba, m dū Kriisitoo basintil nì u-niti ki sǵnkí-ni, man un ni lī yii m yaa bí ni-cee m-nyōkō pōfī, ama ní m yaa bīn ndan m sōoñ nì mpōnee.

²Tin m mēè-nee di sá, m yaa láā bāán ni-ceeyee, ní taa láā yàntī m tāa kí bīkì ni-kansikin biba pu, kun puee m nyí yii m yaa láā bāán, see m dàá tāa kí bīkì bin lī yii ti-bimbim nì ti-bōti tin ti dākèe sá nniyaaminee pu.

³Tiṅman ti lafun sá binib, ama dikōndi din poon ti bí nee, taa jáà nniyaamin.

⁴Di sá tijanjawan tin ti cáā jááyee kaa sá binib nín móò tiṅyee, ama an sá mp̄on ǵun nyánní Unimbōti ceeyee ní, ní ki bīl ip̄on in pu binib mákée. Ní ti cáā kp̄itī bi-nyimōmbōti,

⁵nì alambil ǵin kōkō bi cáá kaa là kí béé Unimbōtee, an ní ti cáā cútí binib landōkōi ki ǵīintiñ-bi bí nīn tó Kriisitoo.

⁶Ti bóntì ki cí nyunti ñun nimbi yaa láā dū ni-ba kòkò ki tī Unimbòtee ní tí dāá dáal bin bin kaa tó Unimbòtee tafaliṅ.

⁷Ní nīn kpèémaan tiwan ti-pú, un yaa nyí u-ba pu yii u sá Kriisitoo yóuee, ú bée tiṅan yii ti mun sá mín ní.

⁸Báa m yaa bí mòòh ki lákatí yii ti-Dindaan tī-ti mpòn tí dū kí tūtuñ-ni nnimbòtisan poon an kaa sá kí ḡá-ni tikpiilee, an kaa cáá-mi icoo!

⁹Kaa sá m nyàab kí nīn ḡmà takaldab ki fàantí-ni,

¹⁰kun puee binib lì yii man Pòol m yaa bí ndanee, takaldab bin m ḡmèe poonee, m sòòh-ni an pòò kàṅkaṅ, ama ní m yaa bāaṅ ni-ceeyee ní m-nyòkò ḡ pòfiñ, ní m-bòti kaa ti bí tiban.

¹¹Bin bin dàkafí an landòkòṅuee ḡ bée yii ti nín yaa bí ndan ti sòòh ti-takaldau poon an pòò miṅyee, mín ní ti yaa péetí bí ni-nimiinee, ti dáá sòòh.

¹²Taa là kí dū ti-ba kí ḡmàntīn kii biba nín pàkà bi-ba min ki càh bi-ba ki ḡmàntīn min bi lèe, an sá digbaandi ní.

¹³Timbi kaa càh ti-ba min taa bàñee. Unimbòti nín yóòh tí tō kí gbèèñ nimbi nyòkòmee di sá ti túh ki bàñ ni-cee nee.

¹⁴Timbi kaa lákatí laakin an sá tí sòòh kí gbèèñee pu. Mín ní taa tí ḡñh kí gbèèñ nsanni kí taa bàñ-ni. Mín pu ní ti péé ki dómíh ni-cee ki sòòh nì ni Kriisitoo bòmòntiiti.

¹⁵An puee taa lákatí ti-gbeennyòkòm pu, taa tí pàkà ti-ba biba tuuṅṅi pu. Ama ti-mákal di sá yii ni-fookiiu yaa bí wīintée, ti nín túh ditundi ni-cee ki gbèèñ laakiṅyee an nìkí kí cù nyòkòpu tikpil.

¹⁶Boonee ní ti dāa ḡñh kí cáá tibòmòntiilee kí cunnì ntimu mun bí ni-nyòkòpu ubò kaa láá cūtèe, kí taa nīn fòol̄ atuun ḡin biba túh laan sá bí tōee nyooti ki ḡa ti-biṅṅi.

¹⁷An ḡmāñ Unimbòti takaldau poon yii: “Un pàkèe ḡ pàkà ti-Dindaan.”

¹⁸An kaa sá a yaa bí ki pàkà a-bee di dàkà yii a lafun máaṅ kupampakau, see sii un Unimbòti pàkèe.

2 Kòranti 11

¹M yaa gbíntì ki sòòh kii uwaatee, ní jīmaan m-pu kimòtii, ní lafun jīman-mi kimòtii!

²Maa mō ni-pu kii Unimbòti nín kaa mō ni pu puee. Ni sá kii usapòonee ní m mònni-ni ki yòontí ní nīn bí circir kí mōh uninjabaanti, ùh di sá Kriisitoo.

³Ama ní m fàṅkí, ubò ḡ taa láā dāá cúú ni-landòkòí kí lábití kí yàntí ní fá Kriisitoo un ni nóó ibaamòn nì dipòbil dibee, kii ukoobu nín nèn kíil̄ Eefa puee.

- ⁴Kun puee ni jīn kimōtii ki fòol̄ bin dōon ki sòon-ni Yeesu ubo pu, kaa sá un timbi sòon-ni nee, ki fòol̄ ḡfām miba min kaa sá Unimbōti yam min ni fōōyee, mín ní ni tí fòol̄ tibocan tiba mun ki kííkí.
- ⁵M pākā yii bīn bin ni yii akpambamōntee kaa jítiñ-mi.
- ⁶Ni min kōkō ní maa ḡñ kí sòonee, m nyí Unimbōti bōti. Ti dākā-ni mín ḡfunyom kupaaunimbi ni-ba ká mín.
- ⁷Mimmee, m nín cáán Unimbōti bōti ki sòon ni-cee faalaa ki sīnti m-ba taapu nimbi n̄ yīkí yilpuee, m yīntāaa?
- ⁸M nín dōmín ni-cee ki sōon Unimbōti bōtee, Kriisitoo nikitij ḡjiba di pà-mi, m n̄n fūkuł bīn ní ki cáā tútuñ nimbi.
- ⁹M nín n̄n bí ni-ceedee, maa n̄n báká ubo pu, animil nín n̄n lóð-mee nnabiyaamu mun n̄n nyánni Maseeduaanee di n̄n cáán-mi tin kōkō n̄n lóð-mee, ní m ḡúb m-ba kaa báká ubo pu báa tiba poon, ki dáa n̄n péēgbínti ḡúb m-ba mín kí n̄n cá.
- ¹⁰M sòon-ni Kriisitoo baamōni in bí m-nee ní yii: Akaayi tiḡki kōkō poon ubo kpá kí lēēan nyandee m-pu.
- ¹¹Maa néēn-ni naaan, ba pu ní m lī mín? Unimbōti nyí yii m néēn-ni.
- ¹²Min m ḡáán nee, m dáa n̄n péēgbínti ki ḡáán mín ní, kí kp̄it̄i biḡmatinliibi bin mun là kí n̄n pākà bi-ba ki l̄i yii bi sá akpambal kii timbee dākatam.
- ¹³Binib gbantee kaa sá akpambal, bi mōnti yii bi tūñ Unimbōti tundi ní ki ḡiintí bi-ba Kriisitoo kpambaliḡ yam.
- ¹⁴Tinee kaa sá maamaaci bōti kun puee Sitaan u-ba ḡñ kí kpánti ḡwalfi tūuḡḡu.
- ¹⁵An puee an kaa sá atulum yii u-tōntōnliibi mun ḡñ kí ḡiñ bi-ba kii bitōntōnliibi bin bí deedeeyee. Unimbōti dáa dáal̄ bi-tafal bi-tuḡḡi nín sá miḡyee ní.
- ¹⁶M ḡit̄i būs̄i ki tükù-ni yii ní taa dākafi yii m sá uwaati, ni yaa tí dākafi yii m sá uwaataaa, ní jī-mi kimōtii an pu, kí yant̄i man mun m̄ pākā m-ba fiii.
- ¹⁷M nín bī l̄i pu nee an kaa sá ti-Dindaan di bí yii m̄ n̄n sòon ki pākā m-ba mín, m bī sòon kii unil un yil lābitèe ní. Kun puee m cáā tin pu ní m dáa sòon kí pākà m-bee.
- ¹⁸Binib bí ki pākà bi-ba duulnyan doo wanti pu, an pu ní man mun bī pākà m-ba.
- ¹⁹Nimbi di bí yii ni cáā iciin ama ní ki jīn kimōtii biwaatiibi pu an mōñ-ni.
- ²⁰Bi cáā-ni ki sàantí kii iyumbuee, ki jīn ni-pu, ki kííl̄-ni ki kpèé-ni fam, ki fátí-ni itampa, ní ni jīn-bi kimōtii.
- ²¹An sá icoo ní yii timbi kaa cáā mpon kí ḡmā kí ḡá-ni mín. Ubo yaa ḡñ kí pākā u-ba tiba puee, man mun ḡñ kí pākà m-ba, m bī sòon ḡwaatiyaamin dee.

²²Di sá an nibee yaa dákà bi-ba yii bi sá Eebruyaaa, man mun sá Eebruja ní, bi yaa bí yii bi sá Israyeel yabaaa man mun sá Israyeelja ní. Bi yaa bí yii bi sá Abraam naantiibaaa man mun sá Abraam naantiiu ní.

²³Bi yaa bí yii bi sá Kriisitoo tǝntǝnliibaaa, man di nín sá ki jítiǝ-bi, m bí sǝǝn ƚwaatiyaamin dee. M tún ditundi ki jítiǝ-bi. Bi piǝntí-mi sarka múlmuł ki jítiǝ-bi, bi gbáǝn-mi ki jítiǝ-bi, m jǝetí nnaabu ƚun sá ƚkúmee ni múlmuł ki jítiǝ-bi.

²⁴Juuda yab gbáǝn-mi anaalab diba kpá imuƚku ili ƚfunyǝm miƚmoo.

²⁵Bi gbáǝn-mi ndǝ ƚfunyǝm mita, bi yáƚki-mi ataƚkpee kí bàǝ kpǝ-mi diba, ƚfunyǝm mita ní ƚƚaliƚfi múł nnyimin nnyim bàǝ làǝ yǝǝn-mi, ki gbínti dalba nnyimin ƚwiǝn pu nǝ kunyeeu.

²⁶M-saƚkiƚƚi ƚin m cǝǝm tikpilee poonee, m kánti diniminaamandi imǝnyingbeen ni, ki kánti diniminaamandi biyipǝǝdambi cee, ki kánti diniminaamandi m-jutiibi Juuda yab nǝ bin kaa sá Juuda yabee cee, ki kánti diniminaamandi ntimu poon nǝ kupǝun, m kánti diniminaamandi tiƚku pu, nǝ bin mónti yii bi sá Kriisitoo yabee cee.

²⁷M tún atuun ki gǝ, ki ká diniminaamandi ki jíni falaa, kaa gǝǝn, ƚkúm nǝ nnyinyoo cúú-mi, m gbínti ƚkúm múlmuł, tiwool cúú-mi tiwampeeƚkaal kpá m pǝǝn.

²⁸Falaabi tikpil kíni maa lí; baabadalee Kriisitoo nikiƚi kǝkǝ bǝti sá-mi diwaƚgul ní ki nyǝm m-pu.

²⁹Un kaa pǝǝyee puee see man mun n nǝn bí kii ún-uee kí taa nǝn pǝǝ; ubǝ yaa líti ikpitinee, man ní an wǝ pǝlpǝl.

³⁰An yaa sá m pǝkǝ m-bee, m-wǝfi pu ní m bàǝ pǝkǝ m-ba.

³¹Unimbǝti ti-Dindaan Yeesu Baa yindi n ká inyǝƚki kí nǝn péǝcá, di sá u nyí yii tin m sǝǝn nee maa mónti.

³²M nín nǝn bí Damaasee, gǝmina un nǝn bí ubǝti Areetaasi yuntiƚuee nǝn yánti u-sooƚab yǝłfi kitiƚi gundi punyǝmmu caƚin ki nyǝǝb kí cúú-mi,

³³ní m-bǝǝbi dǝ-mi ki ƚǝ kukabikun ki dǝu nǝatǝn nǝ ƚƚmii digundi tǝkǝrǝu pu, ní m ƚmátǝ.

2 Kǝranti 12

¹Mǝn puee m nǝn lámintáa! An kaa tútuǝn-ni. M dàǝ túkǝ-ni ti-Dindaan nín yǝnti m ká tiƚyee.

²M nyí kijapaai kiba u nǝǝ Kriisitoo an nǝn yǝǝn-u ki jómiǝ kutagbǝƚu yilpu yilpu fǝƚƚƚ Unimbǝti cee abin diba kpá saalku sǝǝ, (ama maa nyí yii u nǝn jóm nǝ u-wuntaaa, an kaa sá nǝ u-wunti, Unimbǝti baba di nyí.)

³Tiƚman m nyí yii kijapaayee nǝn jóm ali yilpu beelin, (ama maa nyí yii an yaa nǝn sá nǝ u-wuntaaa, an yaa kaa sá nǝ u-wunti see Unimbǝti di nyí.)

- ⁴Niin ní u gbìl̄ tiboti tin unil kaa ṅūn kí fàtíí gíìh-tì kí lèe, kaa máaṅ kí dū-tì kí tükù ubo muee.
- ⁵An japaakee pu ní m máaṅ kí nīn lámintí, kaa sá man m-ba pu, m yaa làá tí lámintàaa, see m-wófii pu.
- ⁶M yaa bàà là kí pàkà m-bee, maa bàà sámaan uwaati, m bàà sòòh̄ ibaam̄on ní, ama maa là kí pàkà m-ba kun puee maa là binib̄ n̄ dākafi m-pu ṅkpaammin bi nín wāl̄ m ṅáaṅ tiṅyee n̄ tin bi gbìl̄ m sòòh̄ee pu.
- ⁷Kí wàatī m̄ taa dū tin Unimb̄oti nyánti ki dākā-mi an kaa cáá bi máafée kí ṅá dilambilee, u dū iween iba ní ki ṅá m-wunti pu, i sá kii Sitaan tūuṅṅuee ki gbáa-mi an nín dàá ṅá pu m̄ taa nīn cáá dilambilee.
- ⁸Dfunyom̄ mita ní m mēēti-Dindaan iween gbanti pu, yii ú lēē-i m-pu.
- ⁹Ní u kíí-mi yii: “M-ṅanti tin m ṅáaṅ-see ṅmānti kí tíkiín-si a-weenin, kun puee sii wófii pu ní man di ki dākà m-pṅṅu.” M̄n̄ puee an mōh̄-mi m̄ nīn pàkà m-ba m-wófii pu, an nín dàá ṅá pu Kriisitoo pṅṅu n̄ nīn tūh̄ m-pu ditundee.
- ¹⁰An pu ní m-wófii b̄oti mōh̄-mi. Bi nín s̄i-mi puee, n̄ falaa un m j̄h̄ee, n̄ bi nín páb-mi puee, n̄ diniminaamandi din m k̄ántée, Kriisitoo pu ní t̄h̄ k̄ok̄o b̄an̄ m-pu m̄n̄, kun puee iwōfi yaa kó-mee, m̄n̄ ní m k̄ánti m̄p̄on.
- ¹¹M yaa b̄i sòòh̄ kii uwaatee, nimbi di yānti m sòòh̄ m̄n̄, di sá yii nimbi di bàà máaṅ kí pàkà-mi. Báà m yaa kaa bí tibanaaan, ni-kpambam̄ontiṅee kaa jítiñ-mi tiba n̄ tiba poon.
- ¹²Maamaacib̄ n̄ tidaandi tin Unimb̄oti pṅṅu yānti m ṅá n̄ kim̄otii ni-ceeyee dākà yii m sá Yeesu kpambal.
- ¹³Ba ní m ṅá ki t̄i Kriisitoo nikitij̄ ṅin k̄ínee ní kaa ṅá ki t̄i nimbi. Tin baba maa yānti ní ṅá kí t̄i-mee di sá ni nín kaa kp̄iñ-mee, an puee ní dū m-ȳintitam kí p̄o-mi!
- ¹⁴M tí b̄ont̄i kí dāaṅ ni-cee ntataatiim, nimbi di kaa làá nīn ȳi m-j̄itam, di sá yii nimbi ní m là, kaa sá ni-nimiliṅ. Kun puee an kaa sá mbiyaamu di kp̄iñt̄i bibaatiibi, ama bibaatiibi di kp̄iñt̄i mbiyaamu.
- ¹⁵Mamee, an mōh̄-mi m̄ dū tin k̄ok̄o m cááyee kí kúnti ni-pu kí kp̄aaṅ m-ba kí tūtuñ-ni, man yaa néeh̄ nimbi m̄n̄ tikpilee, nimbi kaa làá nīn néeh̄-maaan?
- ¹⁶Nimbi ni-ba ni dàá ká yii maa sá diḡíndi ki t̄i-ni, ama biba l̄i yii an sá nciin ní m ṅá kí ṅm̄atiñ-ni kí j̄i.
- ¹⁷M d̄i bin m t̄unn̄i ni-ceeyee ubo pu ki j̄ín-ni tibaaa?
- ¹⁸Man di dū Tiiti n̄ kinabiki kiba ki tú bí c̄u ni-cee, bi j̄ín ni-wanti tibaaa? Man n̄ Tiiti land̄ok̄oṅu sá mbaanti ní, ní ti-ṅáaṅtam mun mbaantiim.
- ¹⁹An yaa ȳi ni péēk̄í ki dākafi dooooyee yii ti là ní nīn ȳi-ti binim̄ontiibee pu ní m sòòh̄ m̄n̄? Aayee, kaa sá m̄n̄. Ti sòòh̄ min̄ Kriisitoo lèe ní Unimb̄oti nimiin.

Nnabiyaamu, tin kòkò ti sòòn-nee, an sá kí tūtuñ-ni ní cù nyòkòpu nnimbòtisan poon ní.

²⁰M fàṅkí yii m̄ taa láā bàñ ni-cee kí ká-ni min maa lèe ni mun n̄ ká man min naa lèe. Maa là kí bàñ kí ká-ni kujaau n̄ kináṅ n̄ diṅuul n̄ timòn n̄ asiibil poon. Maa tí là kí bàñ kí ká ni sòòn fam fam n̄ dilambil ki bí fikilfikil poon.

²¹M fàṅkí yii m-dāantam ni-ceeyee m-Nimbòtiu n̄ taa sintīn̄-mi taapu ni-cee m̄ s̄ bin n̄n ḡá ikpiti ki gbínti ki ḡúb bi-bimbikpitim, tijòkòndi n̄ tilaakpaalee pu.

2 Kòranti 13

¹Ntataatiim ní m dòón ni-cee nee. An ḡmāñ Unimbòti takaldau poon yii: “Binib bili kii bita seerau di cáá mbaamòn.”

²M kpáafi bin bin n̄n ḡá ikpatee n̄ bin kòkò kínee, m n̄n n̄n dómiñ ni-cee nlilitiimee m n̄n lī-tì ní ki gítī bí b̄s̄i ki lì dín m-kpátam ni-cee. M n̄n dàá dāañ min nee, m dàá ḡá an n̄n máañ puee ní, maa láá kpèè ubò nimiin.

³Kun puee ni là kí ká kudaanḡu yii Kriisitoo di yaa di m-pu ki sòòn, ni dàá lafun ká, u dàkà u-pḡḡu ni-kansikin, waa sá kiwòfii.

⁴Tiḡman, u dū u-ba ki ḡá kii uwòfee ní bi kpáá-u ndòpuntikaa pu, ama Unimbòti pḡḡu yānti u bí dimaḡfalin. Ti n̄n u n̄n ḡá ubaanti puee, ti mun bí iwòfin ní, ama u-puee ti cáá dimaḡfal. N̄n Unimbòti pḡḡu puee ti bí dimaḡfalin ki tī-ni.

⁵Ní cōḡkimaan ni-ba kí kpèè yii ni lafun f̄s̄s̄ Yeesu Kriisitoo ki kí tiḡmanaaan? Ní kpèè ni-ban tiḡan, naa ká yii u bí ni-naaan? U bí ni-ni, asee ni yaa kaa f̄s̄s̄-u ki kí mmòntiimin baba.

⁶Mín ní ni dàá béé yii ti mun cōḡkì ti-ba ní ki béè yii ti sá Kriisitoo tontònlīibi tiḡman.

⁷Ti mèé Unimbòti ni-pu ní taa ḡá ikpiti iba, an kaa sá kí dàkà ti-ba yii ti ḡá ditummòntiil ama ti là ní n̄n ḡáañ tiḡan báà bi yaa bí sòòn ki bíil timbi.

⁸Kun puee taa cáá mpòn kí dūú já n̄n ibaamòn, ti cáá mpòn kí dūú tūtuñ ibaamòn ní.

⁹An mōñ-ti iyunti kamaa timbi yaa bí iwòfin, nimbi n̄n p̄s̄yee. Ti mèé Unimbòti ni-pu yii ní n̄n sá binimbòtinooliibi tiḡman pu yab.

¹⁰Kun pu m bí ndan ki ḡmà-nee di sá maa là m̄n dàá bàñ ni-cee kí dū mpòn ḡun ti-Dindaan tī-mee kí wób-ni. Mpòn gbantee sá m̄n dūú tūtuñ-ni ni-nimbòtinootam n̄ cù nyòkòpu ní, an kaa sá kí dūú bíil-ni.

¹¹Nnabiyaamu, tin m dàá dū kí kàañ nee sèè: ní n̄n cáámaan dipòpindi, ni-nimbòtinootam n̄n sá tiḡman pu yal kí n̄n t̄i tòb kunyannaaau, kí n̄n pēēkinyòkò n̄n ḡgbansḡfi poon. Unimbòti un sá dineendi n̄n ḡgbansḡfidaanee dàá n̄n bí ni-cee.

¹²Ní jāam̄maan tòb nnabiyaamin. Unimbòti nikitil din bí dooyee jáam̄-ni.

¹³Ti-Dindaan Yeesu Kriisitoo ḡanti n̄n Unimbòti neendi n̄n u-Fām n̄n cāabiñ nnyòppee ḡḡyee n̄n bí ni-kòkò cee.

Gaalaati

Gaalaati 1

¹Ti-Baa Unimbɔti nì Yeesu Kriisitoo un u nìn fikitì ditanḡkpiilinee di lēēman Pɔɔl m nīn sá bi-kpambal, kaa sá binib di lēē-mi, kaa tí sá unil di yì-tì ní m sá dikpambal.

²Man nì ti-nabiyaamu mun kɔkɔ bí m-ceeyee di jáám Kriisitoo nikitij ḡin bí Gaalaati tiḡkinee.

³Ti-Baa Unimbɔti nì ti-Dindaan Yeesu Kriisitoo n ḡá-ni tiḡan kí tī-ni ḡgbansɔḡfi.

⁴Yeesu di dū u-ba ki ḡá saraa ti-kpitii pu kí ḡmā kí nyāntí-ti ḡyuntikpiti ḡun poon ti bí nee. Mīn ní Unimbɔti un sá ti-Baayee là.

⁵Ūn di máan tinyool kí nīn péēcá jaanjaan! Ameen.

⁶M bākatì tikpil yii ni pūtì kpáàā bí fēén Unimbɔti un dī Kriisitoo ḡanti pu ki yíín-nee, ki póotí tibɔpɔn tiba.

⁷Ama tibɔmɔntiil tiba kaa ti bí ki kútì Yeesu bɔmɔntiiti pu. An sá binib biba di là kí lábití ni-landɔkɔi kí cúú Kriisitoo bɔmɔntiiti kí kpántí.

⁸Un di yaa tí dómiínee, báà an yaa sá timbaaa, an yaa tí sá Unimbɔti tūuḡḡu di yaa nyánní yilpu ki cáañ-ni tibɔpɔn tin nyán ti-ba nì tibɔmɔntiil tin ti nìn péé péé ki sòon nì nee, Unimbɔti n ḡá udaan fam.

⁹Ti péētùkū-ni dooooyee, ní m gítī bí būsī-ni dín, yii ubɔ yaa sòon nì ni tibɔti tin nyán ti-ba nì tin tin ni nìn fǔyee, Unimbɔti n ḡá udaan fam!

¹⁰Tin m sòon nee, m là binib n pàkà-mi níin? Unimbɔti pampakaku ní m nyàab. M nyàab kí fáatìn binib níin? M yaa nyàab kí fáatìn binibee, maa bàà sámaan Kriisitoo tontɔnliu.

¹¹Nnabiyaamu, m là ní béé yii tibɔmɔntiil tin m sòon nì nee, kaa sá unil di náañ-tì,

¹²kaa sá m ká-tì unil ubɔ cee, ubɔ mun kaa tí dàkā-mi-tì, an sá Yeesu Kriisitoo di nyánti-tì ki dàkā-mi.

¹³Di sá yii ni gbīl m nín nìn ḡáañ min dooooyee, m nín nìn ḡúb Juuda yab marabee, m nìn sàantí Unimbɔti nikitil an gítī lákatì, ki nyàab kí kúntí-u.

¹⁴M nìn ḡúb Juuda yab marab ki jítiñ m-jutiibi tikpil man nì bin ḡmèe, ní ki nìn néén m-naanjab koobiliḡ ki jítiñ-bi.

¹⁵⁻¹⁶Ama Unimbɔti nìn péēḡánti-mi ki yóon doooo m-na poon ní ki yíín-mi u-ḡanti pu. Dyunti ḡun u lēēyee ní u dū u-Jipɔon ki dàkā-mi m bēè-u, an nín dàá ḡá pu m sòon u-Jipɔonee pu kí tī bin kaa sá Juuda yabee. Niinee, maa bālfí báà ubɔ isaḡki,

¹⁷kaa tí búntì Jeerusaleem kí cúú nyàab bin péen-mi ki kpánti akpambalee. M péébúnti Bilaalibub tiḡkin dicilpu ní, boonee m nìn fātín Damaasi.

¹⁸Ní abin ata boonee m nìn jòm Jeerusaleem kí bée Piyeer, ní ki kál u-cee iwiin saalku.

¹⁹Maa ti ká Yeesu kpambal diba ki kúti see Jaaki ti-Dindaan naal.

²⁰Tin tin m ηmāñ-nee, m ηmāñ-tì Unimbōti nimiin ní, maa móntí.

²¹Boonee ní m búntì Siirii tiŋkin nì Siiliisii.

²²Dyunti gbantee, Kriisitoo nikitij ηjin bí Juudee tiŋkinee kaa láá bée-mi,

²³bi péēgbīl yii m nìn sàantí Kriisitoo yab dooooyee ki kíñ ki bí sòòn kəŋkənee fookii bəmōntiiti tin m nìn nyàab kí kúntée,

²⁴ní bi kíñ ki bí pàkà Unimbōti m-pu.

Gaalaati 2

¹Abin diba kpá saalku boonee, man nì Baarnaabasi gítì Jeerusaleem ki kpáan Tiiti mun.

²M nín cūti puee Unimbōti di dākā-mi m cù. Ní m gāntì Kriisitoo nikitil kpilib ki kaañ ki tūkū-bi tibōmōntiil tin m sòòn bin kaa sá Juuda yabee kansikinee. Maa là ditundi dín m túnee nì din m bí tūnee n̄ ηá fam.

³Ní baa páb Tiiti un sá Greeki, m-təntənjutee yii ú gíí.

⁴Ama biba dómín ki ηmālim ti-kansikin ki móntì yii bi sá ti-nabiyaamu ní kaa sá, bín di bàà là ú gíí. An nibee ηá soooo ki kó ti-kansikin kí cōŋkí kí kpèè dibatəl din ti cáá Yeesu Kriisitoonee, kí ηmā kí gíñ-ti kuyujun.

⁵Taa péēpú-bi mpaan ηyunti ηubə poon bàà fiii, tibōmōntiil baamōni n̄ n̄n bí ki tī-ni.

⁶An yaa kíñ bin bi yī binikpaambee (bi yaa sá biŋyee, man ceeyee an kaa páb, kun puee Unimbōti kaa gāntì binib), binikpaambi kaa kúti tibōti tiba m-bəmōntiiti tin m sòònee pu.

⁷Ali gba, bi ká yii Unimbōti dū bin kaa sá Juuda yabee ki ηúbìñ-mi m sòòn nì bi tibōmōntiil, kii u nín dū bin sá Juuda yabee ki ηúbìñ Piyeer puee.

⁸Di sá yii Unimbōti un yāntì Piyeer kpántì Yeesu kpambal Juuda yab kansikinee di yāntì man mun kpántì u-kpambal bin kaa sá Juuda yabee kansikin.

⁹Ní Jaaki nì Piyeer nì Jaan, bin pu bi nyí yii bi sá Kriisitoo nikitil kpilibee, bée yii Unimbōti di pú-mi an pəŋŋu, ní bi tī man nì Baarnaabasi kuboou ki dākā yii ti-kəko ηá ubaanti, timbi n̄ cù bin kaa sá Juuda yabee cee, bín n̄ cù Juuda yab cee.

¹⁰Ama tin baba bi mēē-tee di sá yii tí taa súntí bisoodambi pu, tibōti tin mun bí m-pobilin m ηáanee dee.

¹¹Ama, ηyunti ηun Piyeer nìn dómín Antiyəsee, m nìn wòñ-u u-nimiin, kun puee u yīntì.

¹²Di sá yii, kí wàatī ní binib biba n nyānní Jaaki cee kí dāān Antiyōsee, u nì bin kaa sá Juuda yabee nìn kpáfí ki jīn tijin. Binib bin là báà ŋma n gīfèe bāānee, ní u fāŋkì-bi, ní ki kíñ ki bāal, kaa ti là u nì bin kaa sá Juuda yabee n kpāfi.

¹³Ní Juuda yab bin kínee mun fōō u-biibiiu gbanti, ali gba ki téé Baarnaabasi mun ki kón biibii gbantin.

¹⁴M nín ká yii baa ti bī cōom deede kii tibōmōntiil baamōni nín sá puee, ní m lī Piyeer báà ŋma nimiin, yii: “Sii un sá Juuda yōuee yaa kaa nóó Juuda yab bimbim, ní ki yaa fōō bin kaa sá Juuda yabee bimbimee, ba ŋá ní a là bin kaa sá Juuda yabee n fōō Juuda yab bimbim?”

¹⁵Bi māl timbi ti sá Juuda yab, kaa sá biniyaŋyambi bikpitib,

¹⁶nì mín kōkōee, ti nyí yii ti nín fōō Yeesu Kriisitoo ki kíiyee di yāntī ti kpánti deedeedambi Unimbōti nimiin, an kaa sá Mooisi marab ŋúbitam pu. Ti mun fōō Yeesu Kriisitoo ki kíí ní ki kpánti deedeedambi dimákal din ti cáá Kriisitoo puee, kaa sá marabee ŋúbitam pu. Di sá yii báà ubō kaa ŋūn kí kpánti deedeedaan Unimbōti nimiin nì u-marab ŋúbitam pu.

¹⁷Ti nín nyàab kí kpánti deedeedambi Kriisitoo puee, ti béè yii timbi mun sá binikpitib dee; mimmee Kriisitoo yāntī tikpitiil wīntáaa? Aayee, kpataaa!

¹⁸Ama, m yaa fātī mán kun m nìn gbán ki wīyee, m kpánti uyintil dee m-ba.

¹⁹Di sá yii marabee yānti m kpūi ki nyán marab taapu, kí ŋmā kí nīn bí ki tī Unimbōti. Man nì Kriisitoo di kpáá ndōpuntikaa pu.

²⁰M nín bí nee, kaa ti sá man di bí, Kriisitoo di bí m-ni. M nín bí dimaŋfalinee, Unimbōti Jipōon ní m fōō ki kíí, ùn di néeñ-mi ki dū u-ba ki tī man pu.

²¹Maa kpèé Unimbōti ŋanti fam. An yaa bàà sá Mooisi marab ŋúbitam pu ní unil di kí kpánti deedeedaan Unimbōti nimiinee, mimmee, Kriisitoo kpūi fam dee.

Gaalaati 3

¹Gaalaati yab bigbaambi, ŋma di gátì ni-nimiliŋ ní? Di sá yii bi nìn kàān Yeesu Kriisitoo kúm ndōpuntikaa pu bōti, ní ni wál mín kii foota ní bi dākā-nee.

²M là kí bàlfi-ni tibōbaantiil ní kíí-mi: ni nín ŋúb Mooisi marabee ní ni fōō Unimbōti Fām naaan ni nín fōō tibōmōntiil ki kíiyee ní?

³Ni sá bigbaambi níiin? Ni kíí nì Unimbōti Fām ki dī u-saŋŋu ní ki là kí kúnti nì ni-ba pōōntamaaan?

⁴Mimmee, tin kōkō ni kántèe ŋá fam deeyaa! An kaa ŋūn kí ŋá fam.

⁵Unimbōti nín tīl-ni u-Fām ki ŋáaŋ maamaacib ni-kansikinee, an sá ni nín ŋúb Mooisi marabee pueeyaaa ni nín fōō tibōmōntiilee puee ní?

⁶Mín ní, “Abraam nìn fōō Unimbōti ki kíí, ní Unimbōti ká u-fookiiu un u cáá u-puee, ní ki yíiñ-u deedeedaan.”

- ⁷Ní béé yii bin f̄õõ Unimbɔti ki kííyee di sá Abraam biyaamu.
- ⁸An lī Unimbɔti takaldau poon dooooyee ki síiñ, yii anibul ŋin kaa sá Juuda yabee nín f̄õõ Unimbɔti ki kíí puee ní Unimbɔti kpántí-bi deedeedambi. An pu ní u nìn tükū Abraam tibɔmɔntiil nee dooooyee, yii: “Unimbɔti dàá dī sii pu ní kí biñ anibul kamaa pu.”
- ⁹Mimmee, bin kɔkɔ f̄õõ Unimbɔti ki kííyee kántí dibiindi kii Abraam nín nìn f̄õõ kí kíí ki ká dibiindi puee ní.
- ¹⁰Ama, mbusu bí ki tī un là kí dī Mooisi marab pu kí ŋmátée, kun puee an ŋmāñ yii: “Tin kɔkɔwoooo bi ŋmāñ marab takaldau poon bí nīn ŋáánee, un sá kamaa yaa kaa ŋúb mimmee, mbusu bí ki tī udaan.”
- ¹¹Ní an cánti ki tükū-ti yii ubɔ kaa ŋūñ kí ŋúb marab kí kpántí deedeedaan Unimbɔti nimiin, yii: “Deedeedaan kántí dimaŋfal u-fookiiu pu ní.”
- ¹²Marab nì fookii kaa sá ubaanti: di sá Unimbɔti takaldau poon lī yii: “Un yaa ŋáán min Mooisi marab lēe kɔkɔee di ŋmátí.”
- ¹³Ama Kriisitoo kpánti mbusudaan timbi pu ní ki nyánti-ti mbusu un marab cáánee poon, kii an nín ŋmāñ puee, yii: “Un kamaa bi yaa lúnti busub puee n̄ nīn sá-ni mbusudaan.”
- ¹⁴An di yì-tì ní Yeesu Kriisitoo puee bin kaa sá Juuda yabee kántí dibiindi din Abraam nìn kée, ní ti nín f̄õõ Unimbɔti ki kíí puee ní ti fòol̄ u-Fām min u nìn p̄õñee.
- ¹⁵Nnabiyaamu, tí dū binib nín ŋáán puee kí ŋmàntīn tibɔti nee. Unil yaa bónti u-bɔti ki ŋmāñ ki ŋá takaldan ki nyī u-ŋal kii mara nín síiñ puee, nì min kamaa an sá kinibiki di ŋée, ubɔ kaa ŋūñ kí kpitàaa kaa ŋūñ kí gbéèñ tiba.
- ¹⁶Ní tin tin Unimbɔti nìn p̄õñ Abraamee, u nìn p̄õñ ki tī u nì u-maaliŋu ní. Unimbɔti takaldau poon kaa ŋmāñ yii, u nìn p̄õñ ki tī Abraam biyaamu kupaa, u péel̄ yii, u-maaliŋu, an dàkà yii u-maaliŋu poon unibaanti. Ún di sá Kriisitooyee.
- ¹⁷Tin tin m là kí lèe taapu sèé: Unimbɔti nìn bónti u-bɔti ki sòon̄ ki síiñ. Abin tilaafati tili nì mmuŋku nì saalaa boon ní Mooisi marab bāáñ. Marabee kaa ŋūñ kí kpiti Unimbɔti poondi kí yànti dí ŋá fam.
- ¹⁸An yaa sá marab pu ní Unimbɔti di ki tì-ti u-gaajatee, mimmee an kaa sá u-poondi pu dee. Ama an sá Unimbɔti nín nìn p̄õñ Abraam yii u dàá tī-u tigaajatee ní u tī-u.
- ¹⁹Mimmee, ba pu ní bi yóon̄ marab? Unimbɔti dū marab ki kúti dipoondi pu binib n̄ béé ikpiti nín sá kuŋyee, ní marabee n̄ nīn bí ki cí ŋyunti ŋun Abraam maaliŋu poon yɔu un pu u p̄õñ dipoondée n̄ dāá bāñ. Unimbɔti tūuni di cáán marab ki dūu tī Mooisi, ní ún̄ dūu nāatì Israyeel yab.
- ²⁰Unil yaa bí u-baba nì u-baba ki ŋá u-botee, unāatil kaa bí, mín ní Unimbɔti u-baba di p̄õñ dipoondi.

²¹Mimmee, Mooisi marab jáà nì Unimbṓti poondi deeyaaa? Aayee, kpataaa! Unimbṓti yaa nèn tī marab bin pu binib ḡñ kí dī kí ḡmátée, binib bàà ḡñ kí kpántí deedeedambi Unimbṓti nimiin marab pu.

²²Ama Unimbṓti takaldau poon bṓti tūkū-ti yii kitij kəkəwoooo nib pī ikpitin, mimmee bin yaa fṓṓ ki kíyee ḡñ kí fṓṓ tin Unimbṓti pṓṓnee, bi nín fṓṓ Yeesu Kriisitoo ki kíyee pu.

²³Kí wàatī fookii yuntiṅu n̄ bànee, ti nèn pī marab sarkaun ki cí fookii n̄ bàñ.

²⁴Marab di nèn cí-ti ki tin s̄ā ḡyunti ḡun Kriisitoo d̄ā b̄ānee an nín dàá ḡá pu tí ḡmā kí kpántí deedeedambi Unimbṓti nimiin fookii puee.

²⁵Fookii nín b̄ānee, marab kaa ti cí-ti.

²⁶Kun puee ni nín fṓṓ Yeesu Kriisitoo ki kí puee, ni-kəkə kpánti Unimbṓti biyaamu.

²⁷Di sá yii nimbi bin kəkə bi fūl Unimbṓti nyim, ni ḡá ubaanti nì Yeesu Kriisitooyee, ni kpánti kii Kriisitoo nín bí puee dee.

²⁸Digàntil kaa ti bí Juuda yab nì bin kaa sá Juuda yabee kansikin, kaa bí bin sá iyumbuee nì bin tó bi-bee kansikin, kaa ti bí bininjab nì binimpoobi mun kansikin, nimbi kəkə kpáfi ubaanti Yeesu Kriisitoo pu.

²⁹Kii ni nín sá Kriisitoo yab puee, ni kpánti Abraam maaliṅu poon yab ki ḡñ kí fṓṓ tigaajati tin Unimbṓti nèn pṓṓnee.

Gaalaati 4

¹M dàá tí yòṓn tibṓḡmantikaal tiba. Di sá yii un dàá fṓṓ u-baa gaajawantee yaa dáá sá kibikee, baa ḡñ kí gánti u nì uyumbu, ama ú mun di yì tikəkə.

²U dáá bí binib bin ḡúb-u ki kpèè u-wantee taapu ní ki cí ḡyunti ḡun u-baa yóṓnee n̄ d̄ā bàñ.

³Mìn mbaantiim, ḡyunti ḡun taa láá bée Kriisitoo saṅṅuee ti nèn sá duulnya marab yumbui ní.

⁴An s̄ā ḡyunti b̄ānee, ní Unimbṓti túnní u-Jipṓṓn ní ki yānti unimpu màl-u, ní ú mun bí Juuda yab marab taapu,

⁵an nín dàá ḡá pu ú fī timbi bin bí mara taapuee kí dū-ti kí kpántí Unimbṓti biyaamuee.

⁶Kun dākà yii ni lafun sá u-biyaamuee di sá Unimbṓti túnní u-Jipṓṓn Fām ti-pṓbilingin, mìn di yì-ti ti yî-u yii: “Ti-Baa.”

⁷Mìn puee, aa ti sá uyumbu, a kìn ki sá u-biki ní. A nín sá u-bikee puee, ní u tì-si u-gaajawanti.

⁸Doooyee, naa nèn nyí Unimbṓti ní ki nèn sá awaa yumbui, awaa ḡin kaa sá Unimbṓti, kaa máaṅ bí nṓṓ-ḡee.

- ⁹Kɔŋkɔnnee, ni bɛ̀ Unimbɔti, an d̀k̀k̀ yii Unimbɔti di bɛ̀-ni. Ba ɲ́ ní ni gítí là kí gítí duulnya marab bin kaa cáá mpɔn, kaa bí tibanee taapu kí n̄n sá bi-yumbui kii dooooyee?
- ¹⁰Ni g̀ntí iwiiin iba yii i sá ikpaan, ki g̀ntí iɲmal n̄ iyunti n̄ abin mbaantiim.
- ¹¹An puee, m f̀ŋkí yii digiɲdi din m ḡi ni-puee ń taa ɲ́ fam.
- ¹²Nnabiyaamu, m m̀é-ni yii ní n̄n bímaan kii mamee, ali kii man mun n̄n n̄n ḡiɲ m-ba kii nimbee. Ama naa ɲ́-mi tibeeee!
- ¹³Ni nyí yii m-weeni di n̄n ỳntí m s̀oñ n̄ ni tibɔm̀ntiil mpeepeekaam.
- ¹⁴N̄ min kamaa m-weeniee bàà n̄n ɲ̀n kí ỳntí ní ḡiɲ-mee, naa kp̄ē-mi famaana kaa núutiɲ-mi. Ali gba, ni n̄n gítí f̄ṣṣ-mi kii Unimbɔti t̄uɲɲuaaa Yeesu Kriisitoo u-bee.
- ¹⁵Ba ɲ́ ní an kaa ti m̀n̄-ni kii dooooyee? Di sá yii m ɲ̀n kí s̀oñ ni-pu yii, ni yaan ɲ̀n, ni bàà l̀ekí ni-nimiliɲ kí t̄i-mi.
- ¹⁶Ibaamɔn in m s̀oñ n̄ nee puee ní naa ti là m-bɔtaaa?
- ¹⁷Binib nee n̄n cáá bi-ba ki n̄kántiɲ-ni dinakáandi diɲyee, dàá sá dim̀ntiil, bi là kí ỳkatí man n̄ ni kansikin ní, kí dáaliɲ-ni kí nákaɲ bi-ba.
- ¹⁸An máaɲ tin ɲ́ānee pu ní unil ń d̄u u-ba kí nákaɲ-si kí n̄n cá jaanjaan, kaa sá m yaa bí ni-kansikinee baba.
- ¹⁹M-bineeɲkaamu, an tí ẁ-mi tikpil kii imatiɲweenee kí n̄n cí ɲyunti ɲun ni dàá d̄ā kpántí kii Kriisitoo n̄n bí puee.
- ²⁰M yaan bímaan ni-kansikin ɲyunti nee kí ɲm̄a kí b́e m n̄n dàá s̀oñ-ni puee! Kɔŋkɔnnee, m b̄i yáliɲkí ni-pu.
- ²¹Nimbi bin là kí n̄n bí Mooisi marab taapuee, t̀k̀umaan-mi, naa gb̄l marab takaldau poon bɔtaaa?
- ²²Di sá yii an ɲm̄ā yii Abraam n̄n m̀l̄ mbiniɲabiyaamu muli, kiba sá unimpuyumbu biki ní kin kínee sá unimpu un ỳ u-bee biki.
- ²³U m̀l̄ uyumbu biki nniyaamin, ama ní unimpu un ỳ u-bee biki m̀altam sá Unimbɔti p̀ontam.
- ²⁴Tibɔti nee ɲ̀n kí n̄n sá-ti tibɔɲmantikaal: binimpoobi bili gbanti ɲ̀n kí d̀k̀k̀ min ní Unimbɔti n̄n bóob u n̄ binib kansikinee. Bi n̄n n̄n bóob tin Siinaayi jool puee di sá Agaar ní ki m̀al ɲyumbubiyaamu.
- ²⁵Agaar gbanti sá Siinaayi jool din bí Bilaalibub tiɲkinee, ní ki sá Jeerusaleem n̄ u-biyaamu mun bí kuyun̄un d̄iɲ pu nan ní.
- ²⁶Ama Jeerusaleem un bí yilpuee sá un ỳ u-bee, ̀n̄ di sá timbi na.

²⁷Kun puee an ηmāñ yii: “Unimpuymanjanti un kaa ηún ki màl̄ ki kée, án n̄n mōñ-si! Sii un kaa n̄n nyí imatiŋween ki kée, á n̄n k̄untí n̄n dipɔɔpindi! Kun puee unimpu un bi cāntèe màl̄ mbiyaamu ki jítiñ unimpu un cáá calee.”

²⁸Nnabiyaamu, mín ní nimbi sá Unimbɔti p̄ontam biyaamu, kii Isaaki n̄n n̄n sá puee.

²⁹Doooyee, kibiki kin bi màl̄ nniyaaminee n̄n páb kibiki kin Unimbɔti Fām yānti bi màlee, ní ali n̄n d̄in an gb̄intii sá mín ní.

³⁰An ηmāñ Unimbɔti takaldau poon yii ba ní? An ηmāñ yii: “Jà unimpuyumbu n̄n u-biki, u-biki n̄n unimpu un yì u-bee biki kaa máañ kí yàkatī bi-baa gaajawanti.”

³¹Mín puee, m-nabiyaamu, timbi sá unimpu un yì u-bee biyaamu ní, taa sá unimpuyumbu biyaamu.

Gaalaati 5

¹Kriisitoo nyánti-ti kuyun̄un tí n̄n tó ti-ba ní. Mín puee, ní n̄n bímaan dibatolee ni, kí taa gítī kó kuyun̄un.

²Ní p̄lfimaan-mi! Man Pɔɔl bí tükù-ni yii, ni yaa yānti bi gíí-nee, naa ti bí pátí tiba Kriisitoo pu.

³M dàá gítī bùsì kí tükù uninja sá kamaa un yaa yānti bi gíí-uee, yii an bàlfī ú n̄n ηúb Mooisi marab kəkə ní.

⁴Nimbi bin kəkə nyàab kí n̄n bí deedee Unimbɔti nimiin n̄n marab ηúbitam puee, ni n̄n Kriisitoo yākatī t̄obin, ni nyán Unimbɔti b̄intamin.

⁵An yaa sá timbee, ti máká ní ki k̄a ki cí kí kpántí deeedambi Unimbɔti nimiin, kun puee ti f̄ɔ̄ Kriisitoo ki kí ní Unimbɔti Fām bí ti-ni.

⁶A yaa kpánti Yeesu Kriisitoo ȳuee, a yaa gííyaaa a yaa kaa gííyaaa, an kaa páb, kun di pábee di sá a-fookiu n̄n t̄un ditundi n̄n dineendi.

⁷Ni n̄n còom̄ tiŋan. Ŋma di líkiñ-ni ní gb̄eēn kí taa ti gb̄il̄ kí t̄iñ ibaam̄on ní?

⁸An kaa sá un di ȳiñ-ni ní n̄n n̄ó-uee cee ní t̄in nyánní.

⁹Kp̄on̄ nȳok̄on̄u fīi di yānti kp̄on̄ saabu kəkə jóm.

¹⁰Ama man máká ni-pu yii ti-Dindaan puee naa làá kpántí ni-landək̄oi. Un di yaa cáan fik̄il̄fik̄il̄ ni-kansikinee, báa udaan yaa yānti ki sá un, ditafadaaldi d̄o ki cí-u.

¹¹Nnabiyaamu, m yaan bí tükù binib yii an máañ bí gííyee, ba pu ní bi bàà gítī páb-mi? M yaan l̄i mín, Kriisitoo d̄opuntikaan̄u b̄oti kaa bàà sá tib̄oti tin páb binibee.

¹²M bàà là bin páb-ni ní gííyee n̄n cù bí f̄aatī-bi.

¹³Mín puee, nnabiyaamu, ni ká yii Unimbɔti yíin̄ nimbi ní n̄n bí dibatolin. Ní taa lákatí dibatolee pu kí n̄n ηáañ min ni-bimbikpitim sée, ama ní n̄n n̄eēn t̄ob kí n̄n t̄utuñ t̄ob.

- ¹⁴Di sá yii marab kòkò taapu di sá unee, yii: “Á n̄n n̄eéh a-juti kii sii a-bee.”
- ¹⁵Ní kpèè tiŋan: ni yaa bí ki júntí tɔb ki cátikí tɔbee, ni dàá kúntí tɔb dee.
- ¹⁶Tin m tükù-nee di sá yii ní yàntī Unimbɔti Fām n̄ kpòotī-ni, kí taa n̄n n̄óó min ni-bimbikpitim bàlfēe.
- ¹⁷Di sá yii, ti-bimbikpitim n̄n là min miŋyee, Unimbɔti Fām kaa là mín, ní min min Unimbɔti Fām lèe, ti-bimbikpitim mun kaa là mín. Tiwan tilee jáaŋ tɔb ní. An di yì-tì ní taa ŋūn kí ŋá min ti bàà là kí ŋée.
- ¹⁸Ama Unimbɔti Fām yaa kpòotī-nee, naa ti bí Mooisi marab taapu.
- ¹⁹An kaa p̄ōō á béé mbimbikpitim n̄n tūn atuun ŋiŋyee: mín di sá tilaakpaal, tijòkòndi, bimaramontiibi fátam,
- ²⁰diwaatootil, dinyɔɔjil, kinánj, kujaau, kudòŋu diŋuul, ikummunti, diyakatil, digàntil,
- ²¹nnimidiki, ndanyoon, mpoo, n̄ tin kòkò náaŋ n̄ tibɔti neeyee. Kii m n̄n n̄n tükū-ni puee, m tí bí kpáafī-ni yii bin ŋáaŋ an bɔti gbantee kaa dāa kòdò Unimbɔti beelin.
- ²²Ama, dibil din Unimbɔti Fām yàntī unil n̄ l̄oŋee di sá dineendi, dipɔɔpindi, ŋgbansɔŋfi, kimɔtii, á n̄n sūn binib saai, kí n̄n ŋáaŋ tiŋan, kí n̄n bí deedee,
- ²³kí n̄n m̄ō, kí ŋúb a-ba. Mara ubɔ kaa bí ki jáà n̄ an bɔti gbanti.
- ²⁴Di sá yii Yeesu Kriisitoo yab dū bi-bimbikpitim n̄ tin mi n̄eéh ki lèe ki kpáá ndɔpantikaa pu.
- ²⁵Unimbɔti Fām n̄n tī-ti dimaŋfalee, tí yàntī u-Fāmee n̄ kpòotī ti-bimbim mun.
- ²⁶Tí taa n̄n yòontí ti-ba yilpu, kí taa n̄n tákà tɔb tibɔti, kí taa n̄n cáá ipoompoon tɔb pu.

Gaalaati 6

- ¹Nnabiyaamu, ni yaa cúú ubɔ bí ŋáaŋ ikpítee, nimbi bin Unimbɔti Fām kpòotēe n̄ ŋá soooo kí giin̄-u nsammonti poon, ní kí n̄n kpèe ni-ba tiŋan ki mun n̄ taa líti ni-ba.
- ²Ní n̄n tútuŋ tɔb ni-gìŋji poon, mimmee, ni bí ŋáaŋ min Kriisitoo marau lèe dee.
- ³Ubo yaa dākafi yii u bí tiban ní kaa bée, udaan kííl u-ba ní.
- ⁴Bàà ŋma n̄ cōŋkì u-ba kí kpèè u-tuŋŋi, ní u yaa làà n̄n gāā u-bindaaa ú gāā an n̄n sá a-ba ŋmaniŋma tuŋŋi pu, ú taa dū kí ŋmàntīn u-jutiibi yaŋ pu.
- ⁵Di sá yii bàà ŋma máaŋ kí kpèè u-ba bɔti ní.
- ⁶Un bi yaa dākà Unimbɔti bɔtee, udaan máaŋ kí lēu-wanti tin kòkò u cááyee poon kí tī un dākà-uee.
- ⁷Taa n̄n kíílmaan ni-ba: baa gbíilīn Unimbɔti. Di sá yii kun unil yaa búlee, kún ní u dāa cēē.

⁸Un ɲáań min u-bimbikpitim lèe búl u-bimbikpitim dee, ní kí dāá cā ɲkúm; ama un ɲáań min Unimbɔti Fām lèe búl Unimbɔti Fām dee, ní kí dāá cā mmaɲfafaɔkɔn ɲun kaa kúntée.

⁹Tí taa ḡī kí gbèēn tiɲan diɲal; ti-wunti yaa kaa yōti, ɲyunti yaa láā bāań, ti dàá dāá f̄ōō tipaal.

¹⁰Mín puee, ɲyunti ɲun poon ti cáá mpaan nee, tí n̄n ɲáań báà ɲma tiɲan, ama cilinjee tí n̄n ɲáańmaan timbi n̄i bin pēēnimbɔtisanee tiɲan.

¹¹Kpèèmaan, m n̄n dū m-ɲal ki ɲmān tiɲmaɲmabti an gb̄ifi puee!

¹²Bin téekí-ni ní gíyee là binib ń n̄n nyí bi-pu dee. Kun pu bi ɲáań mimmee di sá baa là kí ká diḡíndi Kriisitoo dɔpuntikaaɲu pu.

¹³Di sá yii bin gífèe bi-ba kaa ɲúb Mooisi marab. Kun pu bi là ní gíyee di sá bi là kí gāā bi-biɲɲi yii, ni-wunti daaɲku nee, b̄in di páb-ni ní ni ɲá.

¹⁴Maa là kí gāā m-bindi tiba pu kpataaa an yaa kaa sá ti-Dindaan Yeesu Kriisitoo dɔpuntikaaɲu baba pu. Man ceeyee duulnya kp̄i ndɔpuntikaa pu, ní duulnya ceeyee man mun kp̄i ndɔpuntikaa pu.

¹⁵A yaa gíyaaa a yaa kaa gíyaaa, an kaa páb, tin pábee di sá á kpántí unipɔɔn.

¹⁶Bin kɔkɔ dàá nóó min m l̄i nee, Unimbɔti ń t̄i-bi ɲgbansɔɲfi kí sō bi-saai, ki kpáań bin sá Israyeel yab k̄iɲkiɲ Unimbɔti nikitilee.

¹⁷Kí péeyòōn d̄in kí n̄n cá, ubɔ ń taa ti ɲá-mi diḡíndi, kun puee m-wunti buɲwati di sá Yeesu daanti.

¹⁸Nnabiyaamu, ti-Dindaan Yeesu Kriisitoo ɲanti ń n̄n bí ni-pu! Ameen.

Efeesi

Efeesi 1

¹Man Pɔɔl un Unimbɔti lēēm nīn sá Yeesu Kriisitoo kpambalee, di ŋmān takalda nee kɪ tī nimbi Unimbɔti yab bin kóò Efeesi tiŋkin ki yú deede, ni nì Yeesu Kriisitoo ŋá ubaantee.

²Ti-Baa Unimbɔti nì ti-Dindaan Yeesu Kriisitoo n̄ ŋá-ni tiŋan kɪ tī-ni ŋgbansɔŋfi.

³Ti jáam Unimbɔti un sá ti-Dindaan Yeesu Kriisitoo Baayee u nín ŋá-ti tiŋan tin, ki dī u-Fām pu ki tī-ti yilpu wammontiiti kɔkɔ ti nì Yeesu Kriisitoo nín ŋá ubaantee puee.

⁴⁻⁵Di sá yii, kɪ wàatī Unimbɔti n̄ náan duulnyee, u péelúti-ti ki yóon tí nīn sá u-yab, ti nì Kriisitoo n̄ ŋá ubaanti, tí nīn bí circir, ú taa ká ti-pu ikpiti iba. Unimbɔti nín néen-ti puee, ní u nín péelēeki yóon dooooyee yii, Yeesu Kriisitoo puee, u dàá dāá dū-ti kɪ kpántí u-biyaamu kun puee an nín ŋān u-cee ú ŋá mín,

⁶án nīn sá-u tinyool, tiŋanƙpaandi tin u dī u-Jipɔnneɛŋkaau pu ki ŋá ki tī-tee pu.

⁷Kun puee, Yeesu Kriisitoo kúm pu ní u fī-ti ki líi, ní ki dū ti-kpitii ki pú-ti; u ŋá mín kɪ dākà-ti u-neendi nín wīkí min bulfee.

⁸U-neendi gbanti nín wīkí tikpil puee, ní u yānti ti bée iciin nì dinyil,

⁹⁻¹⁰di sá yii u yānti ti bée u nín là kɪ dī Kriisitoo pu kɪ ŋá tin nín bí dibalin dooooyee. Tin u lēeki ŋee di sá, ŋyunti yaa láa sāayee, ú dāá kóon tin bí yilpuee nì tin bí taapuee kɔkɔ kɪ kpāfi, Kriisitoo baba n̄ nīn sá ubɔti.

¹¹Unimbɔti ŋáan tikɔkɔ kii u nín là kɪ ŋá miŋyee ní, di sá yii u lúti-ti ki yóon dooooyee tí nīn sá u-yab, kun puee ti nì Yeesu Kriisitoo ŋá ubaanti.

¹²Mimmee, timbi bin sá bipeepeekaabi ki máká Kriisitoo puee, tí nīn pākà-u u-nyooti pu.

¹³Nimbee, ni gbīl ibaamɔn bɔti tin sá Yeesu Kriisitoo bɔmontiiti ki cáan-ni difiilee. Ni nín fɔɔ kɪ kɪ puee, ní Unimbɔti dū u-Fām min u nín pɔon̄ee ki dáan-ni.

¹⁴U-Fām min u tī-tee di dākà yii difakal din u pɔon̄ kɪ tī-tee dáá bín boon ki dòon ti dàá fɔɔ-dì. Mi tī-ti dimákal yii ti dàá dāá fɔɔ difakalee ŋyunti ŋun Unimbɔti yaa láa nyānti u-yab kɔkɔ doo ki cáá u-ceeyee. U ŋá mín tí pākà-u u-ŋanti pu.

¹⁵An puee, m nín gbīl bi sòon ni-fookiiu un ni cáá ti-Dindaan Yeesu puee, nì dineendi din ni cáá Unimbɔti yab kɔkɔ puee,

¹⁶m yaa bī mèeyee m jáam Unimbɔti ni-pu múmul.

¹⁷M mèe ti-Baa tinyooldaan un sá ti-Dindaan Yeesu Kriisitoo Nimbɔtiuee ú tī-ni iciin ní ŋmā kɪ bée-u, kɪ nīn nyí un Unimbɔti sée.

¹⁸M gítī mèe-u yii ú ŋmíntí-ni ní wāl̄ tiwammontiil tin pu u yíin-nee, ní bée tigeajati tin u kpāafi ki yóon nimbi bin sá u-yabee nín wīkí ki cáá tinyool puee,

- ¹⁹ní béé u-pɔŋkpaanɔŋu ɔun jítìh tikɔkɔ u cáā tūh timbi bin fɔɔ-u ki kíyee pu atuunee. U-pɔŋkpaanɔŋu gbanti mbaantee ní u dākā,
- ²⁰ɔnyunti ɔun u nìh fíkìtì Kriisitoo ditanɔkpiilin ki yāntì u cūtì kāl u-ɔnɔŋgiil pú yilpuee.
- ²¹Niin ní Kriisitoo tókó tikɔkɔ pu ki jīh dibeel biyidambi nì bibɔtiibi nì bipɔndambi kɔkɔ pu. Báà an yaa yāntì ki sá ɔnyee, ùh dí jítìh báà ɔma duulnya un poon ti bí nee, nì un dáá bín ki dòónee mun poon.
- ²²Unimbɔti dū tikɔkɔ ní ki ɔá Kriisitoo taapu, ní ki dū-u ki ɔá bin kɔ nók-uee yil,
- ²³ní bīh sá u-wunti ní Kriisitoo gbí bi-kɔkɔ nì tiwan kɔkɔn.

Efeesi 2

- ¹Doooyee ni nín nìh yìntì ki ɔáah ikpiti ɔnyee puee, ni nìh kpí Unimbɔti nimiin.
- ²Ni nìh ɔáah kii duulnya yab nín péɔɔáah puee ní, ki nók arasiniibi bɔtiu un bí kutaa pu ki yāntì nnibiyaamu kaa tó Unimbɔtee.
- ³Ti-kɔkɔ mun nìh péébí mīh ní doooyee, ki nók timbi ti-ba nín là puee ní ki ɔáah min ní ti-pɔbilih nì ti-landɔkɔi fáatèe, ní ti nín bí mīnyee, Unimbɔti tafadaaldi nìh dō ki cí-ti kii an nín dō ki cí bin béeyee puee.
- ⁴⁻⁵Ama, Unimbɔti sūh binib saai tikpil. U-neeɔkpaandi din u cáá ti-puee yāntì, nì min kɔkɔ ti nìh bí ɔkúmin ti-kpitii puee, u fātì tī-ti dimanɔfal ti nín kpáfì nì Yeesu Kriisitooyee. An sá u-ɔanti pu ní ni ká difiil.
- ⁶Ti nì Kriisitoo nín ɔá ubaantee pu ní Unimbɔti fíkìtì ti nì u, ki yāntì ti nì u kāl yilpu.
- ⁷U dī Yeesu Kriisitoo pu ní ki ɔá-ti tīɔan gbanti, kí dākà bin dàá dāá dāān boonee u-ɔanti nín wīkí ki jítìh tikɔkɔ puee.
- ⁸Di sá yii Unimbɔti ɔanti pu nì ni nín fɔɔ Kriisitoo ki kíyee pu ní ni ká difiil. Difiil gbantee, naa ɔá tiba ní ki ká-dì, u pú-ni-dì faalaa ní.
- ⁹An kaa tí sá ditundi pu, ní ubɔ ñ nīh cáā gà u-bindì.
- ¹⁰Kun puee ti sá Unimbɔti wannaanɔkaati ní. Ti nín ɔá ubaanti nì Yeesu Kriisitooyee ní u fātì náah-ti mɔm, tí ɔmā kí nīh ɔáah atummɔnti ɔin u nìh bóntì ki yóh tí nīh ɔáah.
- ¹¹An puee, ní téetímaan doooyee ni nín nìh bí mīnyee. Naa sá Juuda yab maalinun, nimbi ní Juuda yab bin gífée yīh yii bin kaa gífée. (Ama digiil gbantee, an sá kudaanɔ kun unil péɔɔáah u-wunti pu famee ní.)
- ¹²Téetímaan yii, ɔnyunti gbantee, naa nìh dáá nyí Kriisitoo, ni nìh sá binicambi ní, naa nìh sá Israyeel tindambiyaamu. Unimbɔti nín nìh ɔá nnyɔɔpee nì u-yab ki pɔh-bi dipoondee, ni nìh kpá poon, ni nìh bí duulnyan kaa nyí Unimbɔti, kaa cótì tiba mun pu.

- ¹³Ama nimbi bin nìn dátìh-uee, kòh-kòhnee ni nì Yeesu Kriisitoo nín nà ubaantee ni sùtìh ki pìl-u Kriisitoo kúm pu.
- ¹⁴Kun puee ùh pu ní nḡbansòhfi dómìh ti-kansikin. Doooyee, Juuda yab nì bin kaa sá Juuda yabee nìn yākatì ní, ùh dí yāntì ní bi nà unibaanti. Di sá yì kinàh nìn pìti ti-kansikin kii digundee, ní u dū u-ba ki tī ki wī digundee,
- ¹⁵ní ki kpìti Juuda yab marab nì tin bi nìn péē nàanee kòkò. Ti nì u nín nà ubaantee pu ní u dū atimbun alee ki nà dinikitibaantiil dìn sá dipòndee, ní ki cáah-ti nḡbansòhfi.
- ¹⁶Kriisitoo kúm ndòpuntikaa pu di kùntì kinàh, ki cāntì Juuda yab nì bin kaa sá Juuda yabee kpántì tiwumbaantiil, bi nì Unimbòti kpíki.
- ¹⁷U dómìh duulnyan ki sòoh dipòsòhkil bòti ki tī nimbi bin kaa sá Juuda yab ki dátìh Unimbòtee, nì timbi bin sá Juuda yab ki pìlìh-uee mun.
- ¹⁸Di sá yì Kriisitoo pu ní timbi bin sá Juuda yabee nì nimbi bin kaa sée kòkò nūh kí bà ti-Baa Unimbòti nì u-Fām mbaantiim tūtuntam pu.
- ¹⁹Mìh puee naa ti sá binicambi, kaa ti sá bin nyánní laaabee, ni kpántì ntindambiyaamu kii bin sá Unimbòti yabee nín sá puee ní, ní ki sá Unimbòti dicaḡkun yab.
- ²⁰Ni sá kudii ní, ní kudiiyee nín tókò ataḡkpee nḡn puee di sá Yeesu Kriisitoo kpambaliḡ nì Unimbòti bənaatiliibi, ní Yeesu sá ditaḡkpal dìn yì kudiiyee pòhḡuee.
- ²¹Ùh di yì-tì ní kudiiyee yú ki pòò ní ki wīntí ki jóm ki kpántí circir diiku ti-Dindaan pu.
- ²²Ni nì Yeesu Kriisitoo nín nà ubaanti puee, nimbi nì timbi di kpáfi ki nà kii kudii kun ni Unimbòti kòò nì u-Fāminee.

Efeesi 3

- ¹An puee ní man Pòol un bí sarkan m nín sòoh Yeesu Kriisitoo bòti ki tī nimbi bin kaa sá Juuda yabee puee ...
- ²Ni nyí yì Unimbòti nà-mi tiḡan ki tī-mi ditundi m nà kí tī-ni,
- ³u bīti tibòbalkaal tin nìn bí doooyee, ki dākā-mi ní m bée, (tìh ní m nḡmān-ni anyòbunḡkaaḡkaa nee.
- ⁴Ni yaa bī kàah tin m nḡmān nee, ni dàá ká yì m bée Kriisitoo bòti tin nìn bí dibalinee.)
- ⁵Doooyee, Unimbòti kaa nìn nyántì an botee ki dākā binib, kòh-kòhnee u dī u-Fām pu ki yāntì u-circir kpambaliḡ nì u-bənaatiliibi bée-tì.
- ⁶Tìh di sá tigaajati tin Unimbòti tì Juuda yabee, ni mun dàá fòò-tì, ni nì Juuda yab kòkò kpántì unibaanti ní, Unimbòti nín pòoh tin kí tī bin sá Yeesu Kriisitoo yabee, u dàá tī ni mun kudòh, tibòmòntiil tin ni fòò ki kíyee pu.

- ⁷Unimbōti ḡá-mi tḡan ki tī-mi ditundi din sá m̄ n̄n sòòn tìbòmòntiil ki tì binibee, n̄ u-pòḡḡu ní u ḡá m̄n̄.
- ⁸Unimbōti yab kòkò kansikinee, man di sá bin sá ḡwaamuee waaki. N̄ m̄n̄ kòkòee, Unimbōti pú-mi diyimòol m̄ sòòn n̄ bin kaa sá Juuda yabee Kriisitoo gaajati tin sá tikpaḡkpaandi, kaa cáá dikuntilee bōti.
- ⁹U pú-mi diyimòol m̄ dākà binib ḡ bée tin Unimbōti n̄n lēēkí ḡá an n̄n dáá bí dibalin dooooyee. Unimbōti un náán tikòkòee di dū-tì ki bál ali ki dāa s̄ā nyunti ḡun bí nee.
- ¹⁰Ama kòḡkònee Unimbōti yānti Kriisitoo nikitil puee itūun n̄ bin kòkò sá bipòndambi ki bí yilpuee kòkò bée Unimbōti ciini n̄n wīkí ki bí tōbin puee.
- ¹¹M̄n̄ ní u dī ti-Dindaan Yeesu Kriisitoo pu ki ḡá kii dooooyee u n̄n kaa n̄n dáá náán duulnya ki lēē yii u dàá dáá ḡá miḡyee.
- ¹²Ti n̄n f̄ōō Yeesu Kriisitoo ki kí ti n̄ u ḡá ubaantee puee, ti ḡūn kí s̄utí kí p̄l̄ Unimbōti sòkòmii n̄ dimákal poon.
- ¹³M̄n̄ puee, m̄ mèé-ni yii m̄ n̄n b̄i j̄n̄ falaa ni-puee, ni-wunti ḡ taa yòtī, m-falaauee sá-ni tinyool ní.
- ¹⁴An pu ní m̄ gbàantí ti-Baa Unimbōti nimiin ki mèé ni-pu.
- ¹⁵Ún̄ cee ní bin bí yilpuee n̄ bin bí taapuee k̄n̄ ki nyí kubaatiiu.
- ¹⁶Ún̄ di sá tinyooldaan ki cáá tikòkò, an puee ní m̄ mèé-u an n̄n dàá ḡá pu u-Fām ḡ tī-ni m̄p̄on tikpil ni-pòbiliḡinee,
- ¹⁷ki ḡitī mèé-u yii Kriisitoo ḡ n̄n bí ni-pòbiliḡin kun puee ni f̄ōō ki kí, ki mèé-u yii ú yānti ní n̄n n̄eēn̄ tōb kí báán inyaan, kí n̄n yú ki p̄ōō,
- ¹⁸n̄i ni n̄ Unimbōti yab kòkò ḡ ḡmā kí ká m̄p̄on kí gb̄l̄ Kriisitoo neendi n̄n lālim̄ ki gb̄ ilaan kòkò miḡyee.
- ¹⁹N̄i min kòkò u-neendi wīkí tikpil ki j̄it̄n̄ unil n̄n ḡūn kí gb̄l̄ miḡyee, m̄ mèé-u yii ú yānti ní bée, an n̄n dàá ḡá pu tin kòkò bí Unimbōtinee ḡ n̄n bí ni mun nee.
- ²⁰Ún̄ Unimbōti di ḡūn̄ n̄ u-pòḡḡu ḡun bí ti-ni ki tūn̄ ditundee, kí ḡá tikòkò án j̄it̄n̄ min ti mèé-uee n̄ min ti dākafēe pu.
- ²¹Tí nyōḡk̄i Unimbōti timbi bin sá u-yabee Yeesu Kriisitoo pu kí n̄n péēcāá cá jaanjaan! Ameen.

Efeesi 4

- ¹An puee, man Pòol un bí sarkan m̄ n̄n n̄ó ti-Dindaanee puee, m̄ mèé-ni yii ní n̄n bí mbimbim min poon Unimbōti yíiḡ-ni ní n̄n bée.
- ²Ní n̄n s̄int̄n̄ ni-ba taapu kí n̄n m̄ō, kí n̄n cáá kimōtii tōb pu, kí n̄n ḡúbmaan tōb n̄ dineendi poon.

- ³Ní pòòh ni-ba kí n̄n ńúǎ nnyɔɔpee ɲun Unimbɔti Fām t̄i-nee, ɲgbansɔɲfi ń n̄n bí ni-kansikin ní ɲá ubaanti.
- ⁴Yeesu wunti sá tibaantiil ní, ní Unimbɔti Fām mun sá mbaantiim, m̄n ní ti-kɔkɔ máká kuwambaantiu kun pu Unimbɔti yíi-nee.
- ⁵Ti-kɔkɔ Dindaan sá ubaanti ní, tibɔbaantiil ní ti-kɔkɔ f̄ɔɔ ki kíí, ní bi f̄ul̄ ti-kɔkɔ Unimbɔti nyim mbaantiim.
- ⁶Unimbɔti sá ubaanti, ki sá ti-kɔkɔ Baa, ki tókó ti-kɔkɔ pu, ki bí ti-kansikin n̄ ti-kɔkɔn.
- ⁷Ti-kɔkɔ f̄ɔɔ apɔl kii Kriisitoo n̄n yākat̄i-ɲi a bí a-ba a-ba ki t̄i báà ɲma puee,
- ⁸Kii an n̄n ɲmān̄ Unimbɔti takaldau poon puee yii: “U n̄n jóm̄ yilpuee, u kpāan̄ iyumbu ní ki pú binib apɔl.”
- ⁹Mimmee, dinyɔɔbundi din l̄i yii “u jóm̄ yilpuee” là kí l̄i yii ba dee? An taapu di sá yii u n̄n dáá s̄intīn̄ taapu doo nee ní.
- ¹⁰Yeesu Kriisitoo un s̄intīn̄ taapu dooyee, ùn ubaantee di tí jóm̄ yilpu f̄ɔɲɲ kí n̄n bí an kɔkɔ.
- ¹¹Ún di yākat̄i atuun ki t̄i u-nib, biba ń n̄n sá u-kpambaliɲ, biba ń n̄n sá Unimbɔti bɔnaatiliibi, biba ń n̄n yíīn̄ ki sòh̄n̄ u-bɔti, biba ń n̄n sá paastab ki dàkà binib Unimbɔti bɔti.
- ¹²U yākat̄i atuun m̄n̄ ki t̄i Unimbɔti nib ń ɲmā kí ɲá Unimbɔti tundi mm̄ntiim an n̄n dáá ɲá pu Kriisitoo wuntee ń n̄n cá nyɔkɔpuee.
- ¹³M̄n̄ di dáá yānt̄i ti-kɔkɔ ń kpánt̄i ubaanti ti n̄n f̄ɔɔ Unimbɔti Jipɔon Yeesu Kriisitoo ki kííyee pu, ní kí béé-u mbaam̄m̄. Mimmee, ti cíkit̄i Unimbɔti bɔtin ní kí kpánt̄i binijmambi, kii Kriisitoo u-ba n̄n bí puee.
- ¹⁴Dyunti gbantee, taa ti sá kii camp̄ontibee biɲmatinliibi cáá bi-bɔti ki ɲm̄at̄īn̄-ti kii nnyim n̄n̄ kubuɲu n̄n̄ téek̄i buɲalimbu pu bu yíīn̄ ajan kɔkɔee.
- ¹⁵Ama ti máan̄ kí n̄n cáá dineendi ki sòh̄n̄ Yeesu bɔti n̄n̄ ibaam̄on, kí n̄n w̄īnt̄i kí tin ɲm̄ant̄īn̄ Kriisitoo un sá u-nik̄it̄il yilee.
- ¹⁶Ún di kpáf̄i u-nik̄it̄il din sá u-wuntee, bi ɲá ubaanti, kii unil wunti jaɲɲi n̄n̄ kpáf̄i ki nòb̄ tɔb̄ puee. Ajan kɔkɔ yaa t̄un̄ ɲi-tundi n̄n̄ sá puee tiwun w̄īnt̄i ní tiɲan. M̄n̄ ní dineendi yaa bí Kriisitoo nik̄it̄il kansikinee di cá nyɔkɔpu ní tiɲan.
- ¹⁷Tibɔti tin m̄ dáá sòh̄n̄-ni nee, ti-Dindaan nyɔkɔpu ní m̄ dáá sòh̄n̄-t̄i. Ni-bimbim ń taa n̄n̄ bí kii bin kaa nyí Unimbɔtee n̄n̄ bí puee, b̄īn̄ n̄ó bi-landɔkɔkulimii ní.
- ¹⁸Bi-pɔbiliɲ n̄n̄ gb̄ifi baa nyí nnimbɔtisanee pu ní bi dáá bí dibɔmbɔndin ki lánt̄i dimaɲfal din Unimbɔti t̄i yee.
- ¹⁹Baa nyí icoo, ki dū bi-ba ki t̄i atuɲkp̄iti ní ki ɲáan̄ tijok̄ondi kɔkɔ n̄n̄ ti-bul ki cá, kaa gb̄èent̄i.

- ²⁰Nimbee, kaa sá mín ní Kriisitoo dākā-ni.
- ²¹Nimbi bin sá u-yabee, u sòon̄ ki dākā-ni u-baamoni, ni máan̄ ki gbīl̄.
- ²²An puee, fámaan ni-bimbim min kaa ḡāñee, min cāabln̄-ni nnimitaataam ki bííl̄-nee,
- ²³kí yàntī Unimbōti n̄ kpántí ni-pōbiliḡ n̄ ni-landəkōi mpōm.
- ²⁴Ní n̄n̄ n̄óomaan mbimbipōm min Unimbōti náan̄ ki nántiḡ u-yam min sá deedee n̄ circir ki nyán̄n̄ ibaamōn̄ nee.
- ²⁵An puee, ní fá inyimōn̄, báà ḡma n̄ sòon̄ u-juti ibaamōn̄, kun puee ti-kəkō kpáfi ki ḡá tiwumbaantiil ní.
- ²⁶Ni yaa f̄ōō diḡuulee, ní n̄n̄ nyí n̄ ni-ba kí taa kó ikpitin, kí taa n̄n̄ díkí diḡuul mín̄ ali kunyeeu n̄ tin m̄ó.
- ²⁷Ní taa pōmaan Sitaan̄ nsan.
- ²⁸Un n̄n̄ sá unaayuuyee n̄ taa ti yò, ú p̄ōōn̄ u-ba kí ḡá ditundi min máañee kí kp̄iḡn̄ u-ba kí ká kí tūtuḡ uwōfi.
- ²⁹Tibōkp̄itil n̄ taa n̄n̄ nyēēni-nyōmmun, ama ni yaa làá sòñee, n̄n̄ sòom̄maan tin dàá ḡmàntīn̄ bin f̄ōō Yeesu ki kíiyee n̄ cù nyōkōpu, kí k̄ētī bin bí ki p̄ílf̄ee mun.
- ³⁰Ní taa k̄ōn̄ Unimbōti Fām kunimbaau, u-Fāmee ní u dūu dáan̄-ni ki síḡn̄ yii ḡwiin ḡubō dòon̄ u dàá dāá f̄ī-ni kí lí kəkō.
- ³¹Ní nyāntīmaan ni-kansikin ntuntun n̄ kināḡ n̄ diḡuul tōb pu, n̄ kujaau, n̄ tōb boon disambiil, kí k̄untīmaan ntoom n̄ mi-yalii kəkō.
- ³²Ama n̄n̄ sámaan binimōntiibi, kí n̄n̄ sūn̄ tōb saai, kí n̄n̄ pūn̄ tōb kp̄itii, kii Kriisitoo puee, Unimbōti n̄n̄ dū ni mun kp̄itii ki pú-ni puee.

Efeesi 5

- ¹Ni n̄n̄ sá Unimbōti biyaamu mun u n̄eēnee puee, n̄n̄ bímaan kii ùn̄ n̄n̄ bí puee,
- ²Ní n̄n̄ ḡáañmaan tikōkō n̄ dineendi poon, kii Kriisitoo n̄n̄ n̄eēn̄-ti pu, ki dū u-ba ki ḡá saraa ki tī Unimbōti ti-pu u-saraauee fáatī Unimbōtee.
- ³Kōḡkōn̄nee ni sá Unimbōti yab ní, an puee, an yaa sá tilaakpaal n̄ tin kəkō péēsá dijōkōntundi n̄ nnimitaataamee, ní taa sòon̄ an bōti pu gba ni-kansikin.
- ⁴An kaa ḡāñ ní n̄n̄ sòon̄ anyōōbuḡkp̄il n̄ tibōfan n̄ icoo bōti ama an ḡāñ yii ní n̄n̄ pākà Unimbōti ní.
- ⁵Ní n̄n̄ nyí yii bin ḡáañ tilaakpaal n̄ tin péē sá dijōkōntundee, n̄ bin cáá nnimitaataamee: kun puee nnimitaataam sá kii iwaatootee ní; an nibee kəkō kaa làá dāá kó Kriisitoo n̄ Unimbōti beelin.
- ⁶Ní taa yàntī báà ubō n̄ dū tibōfan kí ḡmàtiḡ-ni. An tuḡkp̄itiḡ pu ní Unimbōti dàá dāá f̄ōō diḡuul bin kaa tó-uee pu.

- ⁷An puee, ní taa cèèh bi-ni.
- ⁸Doooooyee, ni nìn dáá bí dibòmbòndin ní, ama kòhkonnee ni kó ñwalfin kun puee ni kpántì ti-Dindaan yab, mín puee ni-bimbim ñ n̄n bí kii bin bí ñwalfinee bimbim n̄n bí puee.
- ⁹Kun puee ñwalfi n̄n t̄i t̄iñyee di sá t̄iñan kamaa n̄n deedee n̄n ibaam̄n.
- ¹⁰Póòm̄maan ni-ba kí béé min fáat̄i ti-Dindaanee.
- ¹¹Ní taa dū ni-ba kí cèèh bin sá dibòmbòndi yab ki ñáān atuun ñin kaa cáá ipaatee poon, ama ní nyānt̄i bi-tuñkpitiñ mpaampiin pu.
- ¹²(An cáá icoo gba tí sòh̄n bi n̄n ñáān tin dibalinee.)
- ¹³Bi yaa nyānt̄i tin bi ñáānee mpaampiin puee ní ni béet̄i tin ní an baasii sée.
- ¹⁴Kun puee tin kòkò nyān ñwalfinee ní bi wāl, an puee ní an l̄i yii: “Sii un gèènee, fint̄i, fint̄i bitañkpiibi kansikin, Kriisitoo ñ ñm̄nt̄i-si.”
- ¹⁵An puee, ní n̄n nyí n̄n ni-ba kí taa f̄ȭ bin kaa nyí tibe bimbim, ama ní n̄n sá binib bin cáá iciinee.
- ¹⁶Ní taa n̄n biíl iyunti kun puee, iyunti in poon ti bí nee, ikpiti wíh̄n tikpil,
- ¹⁷kí taa n̄n sá bigbaambi, ama béémaan ti-Dindaan n̄n là ní n̄n ñáān miñyee.
- ¹⁸Ní taa n̄n nyù idafi ki gbéè, kun puee an di bííl unil, ama ní n̄n gbéemaan Unimb̄oti Fām,
- ¹⁹kí n̄n gà ni-kansikin ilan in bí Soom takaldau poonee n̄n Kriisitoo nikitil lani, n̄n ilan in Unimb̄oti Fām t̄i-nee, kí n̄n cáamaan an lani ki gà ki t̄i ti-Dindaan, kí n̄n nyóñk̄i-u n̄n ni-pòbiliñ kòkò.
- ²⁰Níñ jáam̄maan ti-Baa Unimb̄oti ti-Dindaan Yeesu Kriisitoo yindi pu ñyunti kamaa n̄n tikòkò pu.
- ²¹Nimbi bin tó Kriisitooyee, sint̄imaan ni-ba taapu kí t̄i man t̄òb.
- ²²Nimbi binimpoobee, sint̄imaan ni-ba taapu kí t̄i ni-calib kii ni n̄n f̄àñk̄i ti-Dindaan puee.
- ²³Kun puee uninja di sá unimpu yidaan, kii Kriisitoo n̄n sá uyidaan ki sá Ufiil ki t̄i u-nikitil din sá u-wuntee puee.
- ²⁴Mín puee, binimpoobi máān kí sint̄iñ bi-ba taapu tikòkò poon kí t̄i bi-calib, kii Kriisitoo nikitil n̄n s̄intiñ di-ba ki t̄i-u puee.
- ²⁵Nimbi bininjabee, n̄n néem̄maan ni-nimpoobi, kii Kriisitoo n̄n nééñ u-nikitil pu ki kp̄i di-puee.
- ²⁶U ñá mín u-nikitil ñ n̄n bí circir ní, di sá u f̄ùl̄-bi nnyim ní ki dū u-nyòòbundi ki ñáñk̄i-bi,

²⁷kun puee u gāntì-bi bí dāān Unimbōti nimiin nì kunyaanḡu, kí nīn jòm pólpol kí nīn bí circir, bí taa ká bi-pu tiba.

²⁸Mín mbaantiim ní bininjab mun máaḡ kí nīn néeḡ bi-nimpoobi kii bi nín néeḡ bín bi-ba wunti puee, un yaa néeḡ u-nimpuee néeḡ u-ba dee.

²⁹Kun puee ubo kaa bí ki ná u-ba wunti, ama u kpīntí-tì, ní ki kpèé-tì tiḡan, kii Kriisitoo nín kpèé u-nikitiil puee,

³⁰kun puee ti-koko túkú u-wunti pu ní,

³¹kii an nín ḡmān Unimbōti takaldau poon puee yii: “An pu ní uninja dāa nyēēu-baa nì u-na cee, ní u nì u-nimpuu ḡ nīn kíḡ ki bí, ní bi-liitilee ḡ kpántí unibaanti.”

³²An sá tibokpaandi ní dijandi nee dākà-ti. M dàā tükù-ni yii an sòḡn Kriisitoo nì u-nikitiil pu ní.

³³Ama tin kíḡee di sá yii nimbee báā ḡma ḡ nīn néeḡ u-nimpuu kii ùḡ u-bee. Unimpu, si mun ḡ nīn tó a-cal.

Efeesi 6

¹Mbiyaamu, ni nín sá ti-Dindaan yabee puee, ní nīn tó ni-baabi nì ni-nab, kun puee mín di ḡān.

²Unimbōti marau lī yii: “Á nīn tó a-baa nì a-na.” Ùḡ di sá marapeepeekaa un pu Unimbōti kútì dipoondēe,

³yii: “Sii un yaa tó a-baa nì a-nee a dàā ká dipooḡḡkil ki dàā kàl kitiḡ pu kí yúntí.”

⁴Nimbi bibaatiibee, ní taa nīn kōntí ni-biyaamu aḡuu, ama nīn ḡúbmaan-mu, kí nīn dākà-mu, ki sáḡkí-mu kii ti-Dindaan nín dākà miḡyee.

⁵Nimbi iyumbuee, nīn tómaan ni-dindambi nì ni-pobiliḡ koko kí nīn fāḡkí-bi. Ni yaa ḡáān mimmee, ni tó Kriisitoo dee.

⁶An kaa sá bi yaa bée ḡmaniḡma ní ní nīn ḡáān atuun, bí wāl kí pākà-ni. Ama ni nín sá Kriisitoo yumbuiee puee ní nīn ḡáān min fáatì Unimbōtee nì dipobil diba,

⁷kí tómaan ditundi mín mbaantiim kí tī ni-dindambi kii ti-Dindaan u-ba ní ni tūḡ ki tìyee, an taa nīn sá kii binib ní ni tūḡ ki tìyee,

⁸kí nīn nyí yii uyumbuḡḡ, un yì u-beeyaaa, ti-Dindaan dàā dāā pà báā ḡma tummōntiḡ ḡin u ḡée paati ní.

⁹Nimbi iyumbu dindabee, ni mun ḡ nīn ḡáānmaan ni-yumbui tiḡan mbaantiim kí taa nīn yòontí i-pobiliḡ, kí nīn nyí yii nimbi nì ni-yumbuiee ni-koko kpiliu sá ubaanti ní ki bí yilpu, ùḡ kaa gāntí binib.

¹⁰Tibojoolkaal tin m dàā dūú kaaḡ-nee sèé: ní fōḡmaan ti-Dindaan pḡḡkpaanḡu kí pōkì.

- 11 Ní dū tìjanjawan tin kòkò Unimbòti tìyee kí pèēn kí ñmā kí sīl deedeē ñyunti ñun Sitaan yaa yíkìin ni-pu nì u-kīiltamee.
- 12 Kun puee an kaa sá ti dàá ján binib ní, an sá ti nì arasiniibi nì bi-bòtiibi, nì bin kòkò jīn abee dibòmbòndin, duulnyan dooyee, nì arasiniibi bin bí kutaa puee ní ti dàá ján.
- 13 An puee, fǔǔmaan tìjanjawan tin kòkò Unimbòti tìyee, an nín dàá ñá pu ní an yaa láa píil kí pòókèe, ní ñmā kí yūl kí já kí pòókèe. Ni yaa ján kí pòókèe, ní báaán kí yūl.
- 14 An puee ní bóntí ni-ba kí dū ibaamòn in sá-ni dambalee kí gbìn ni-cammu, ni-deedeē n̄ n̄n sá-ni dijanjabòkutil ní dūú pèēn.
- 15 Difanjiil din ni cáá ki sòòn tibòmòntiil tin tì binib ñgbansòñfee n̄ n̄n sá-ni anaataka ní táká,
- 16 ni-fookiiu un ni cáá Unimbòti puee n̄ n̄n sá-ni digbampòol ní dūú gbíntí Sitaan ukpiti piini in u tòón i sá ññmee.
- 17 Ní fǔǔ difiil dí n̄n sá-ni kijanjafuulii ní cíkiín, kí yòòmmaan kijiki kin Unimbòti Fām tìyee mun, an dākà yii Unimbòti nyòòbundi.
- 18 Ní n̄n mèémaan Unimbòti múlmlul nì ni-pòbiliñ kòkò, kí n̄n gbàam̄-u nì u-Fām pòññu. Ní fintīmaan an bòti pu, kí n̄n ñúbmaan mín kí n̄n cá, kí n̄n mèémaan múlmlul ki tì Unimbòti yab kòkò.
- 19 Mèémaan Unimbòti man mun pu, ú tī-mi tibòti tin máaàn m̄ sòòñee, m̄ ñmā kí sòòñ tibòmòntiil tin n̄n bí dibalineē nì tininjati.
- 20 Nì min kòkò m bí sarka poonee man di sá un Yeesu Kriisitoo túnní, m̄ n̄n sòòñ tibòmòntiil gbantee, an puee, ní mèè Unimbòti an nín dàá ñá pu m̄ sòòñ-tì ti-pú nì tininjatee.
- 21 Ti-nabineenkaaki Tiisiiki, un ñáaán ti-Dindaan tundi nì ibaamònee, dàá m̄afi-ni min ní m bí dooyee, ní ñmā kí bée tin kòkò m bí doo ki ñáaánee.
- 22 Kun pu m dū-u ki túnní ni-ceeyee di sá ní ñmā kí bée tin poon ti bée, ú kpáaā tī-ni kunyannyaau.
- 23 Ti-Baa Unimbòti nì ti-Dindaan Yeesu Kriisitoo n̄ tī n̄nabiyaamu kòkò ñgbansòñfi, kí yàntí bí n̄n néén tòb, kí n̄n gbíntii cáá fookii Unimbòti pu.
- 24 Unimbòti ñanti n̄ n̄n bí bin kòkò cáá ti-Dindaan Yeesu Kriisitoo pu dineendi kaa gbèentée pu.

Fiiliipi

Fiiliipi 1

¹Man Pɔɔl nì Tiimootee, timbi bin sá Yeesu Kriisitoo tɔntɔnliibee, di ɲmàñ takalda nee kí tī nimbi bin sá Unimbɔti yab ki kóò Fiiliipi tiŋkin ki fɔ̄s̄ Yeesu Kriisitoo ki kííyee, ki kpáañ bin kpòotī Kriisitoo nikitilee nì bin tútuñ ditundi Kriisitoo nikitil kansikinee.

²Ti-Baa Unimbɔti nì ti-Dindaan Yeesu Kriisitoo ń ɲá-ni tiŋan kí tī-ni ɲgbansɔŋfi.

³Dyunti sá kamaa, m yaa bī dākafī ni-bɔtee, m jáam Unimbɔti ni-pu.

⁴Dyunti kamaa m yaa bī mèé ni-kòkò puee, m mèé nì dipɔɔpindi poon

⁵ni nín tútuñ-mi min, kí yòon ɲwimpeepeekaa ɲun ni fɔ̄s̄ Yeesu ki kííyee ki dāa dūu sāa dín, tí ɲmā kí sòon tibɔmɔntiil ajan kòkòee pu.

⁶M nyí yii Unimbɔti un kíí ki bī ɲáañ ditummɔntiil nee ni-pɔbiliŋ poonee kaa làa gbèeñ, u dàa nīn péēgbíntii tūn mīn ní kí nīn péēcí Yeesu Kriisitoo gítintam wiŋɲu.

⁷An kítì m nīn dākafī ni-kòkò pu mīn ní, kun puee ni-bɔti kó-mi tiŋan; di sá yii, m yaa bí sarkanaaan m yaa tí bí ki dākà ki cántí tibɔmɔntiilee baamɔni nín sá pueeyaaa, ni-kòkò kútí m-pu ki fòol diyimɔbaantiil din Unimbɔti tī-mee.

⁸Unimbɔti u-ba nyí yii m néen ni-kòkò nì dineemmɔntiil din nyánní Yeesu Kriisitoo ceeyee ní.

⁹M nín mèé ni-pu tiŋyee di sá yii Unimbɔti ń yántī ni-neendi ń nīn wīntí ki cá baabadal, ní nīn mòtī béetí ibaamɔn ki gántī tiŋan nì tikpitiil,

¹⁰an nín dàa ɲá pu ní ɲmā kí lēetin kítè. Ní Kriisitoo gítintam wiŋɲu dalee ní dāa nīn bí circir, bí taa ká ni-pu tiba;

¹¹ní Yeesu Kriisitoo puee, ni dàa lòon abil tikpil ɲin sá deedee tuuŋɲi ɲin tì Unimbɔti tinyool nì inyɔŋkee.

¹²Nnabiyaamu, m là ní bée yii sarka un bi cúú-mi nee di yánti ní Yeesu bɔti sòontam cūti nyòkɔpu malaa.

¹³Mīn ní soojab bin cītí gɔminakpaanee kòkò nì binib ajan kòkò bée yii an sá Kriisitoo un m nóyee pu ní m bí sarkan.

¹⁴Ali gba, man sarkau nee pu ní ti-nabiyaamu tikpil mòtī dù bi-mákal ki ɲáañ ti-Dindaan ni, ki kántí kunyannyaau ki sòon Unimbɔti bɔti, kaa fàŋkí.

¹⁵Ama bi-kansikin bibee, an sá kináŋ kin bi cáá m-puee di yì-tì ní bi sòon Kriisitoo bɔti ki kpākantí-mi, ní bin kínee, bīn baasii sòon Unimbɔti bɔti nì nlandòkɔmɔnti.

¹⁶Bin sòon Unimbɔti bɔti nì nlandòkɔmɔntee, bīn néen-mi ní ki nyí yii Unimbɔti lēe-mi m nīn dākà yii Kriisitoo bɔti sá ibaamɔn.

¹⁷Ama bin béeyee, bín sòòn Kriisitoo bɔti nì ilandəkəkɔpiti ki là kí kpákañ-mi, ki nyàab bí gítī kòn-mi digíndi kí kùti sarka un poon m bí nee.

¹⁸Bi yaa sòòn Unimbɔti bɔti ki là kí kpákañ-maaan an yaa tí sá nì dipɔɔmɔntiilaaa, tìn kaa wù-mi, an sá man dipɔɔpindi ní ki dàá nīn péēmōh-mi ki cá, kun puee Kriisitoo bɔti ní bi kəkɔ sòòn.

¹⁹Di sá m nyí yii, nì ni-wimmeem pu, nì Yeesu Kriisitoo Fām tūtuntam puee m dàá ká difiil.

²⁰M nín là tiwan tin ki cí tikpil ki cótí ti-puee di sá icoo n̄ taa cúú-mi tiba pu. Ama kɔŋkɔnnee kí dū kí nīn cá, m yaa làá kpúɔɔ, m yaa làá nīn tí báaa, m̄ m̀tí nīn cáá dipɔbil, m-wunti n̄ tī Kriisitoo tinyool.

²¹Ama mamee, Kriisitoo di sá man maŋfal, ŋkúm ŋān ki jítiñ kii ba.

²²An yaa tí sá m̄ nīn bí dimaŋfal poon kí ŋmā kí ŋá atummɔnti abaaa, maa nyí laakin m dàá lēēyee.

²³Ajan gbanti liitil bí ki dátí-mi, m bàà là kí kpú kí cùú nīn k̄ Kriisitoo cee, m̄n̄ di bàà ŋān tikpil.

²⁴Ama, nimbi puee, an gítī páb ki lákatì yii m̄ nīn dáá bí dimaŋfalin.

²⁵M nín bèè yii an sá mimmee, ní m nyí yii m dàá nīn bí dimaŋfalin, man nì ni-kəkɔ dàá nīn bí, m̄ tūtuñ-ni ní ŋmā kí cù nyɔkɔpu, kí nīn bí dipɔɔpindin Unimbɔti saŋgu poon.

²⁶Mimmee m yaa fātii tí gítīn̄ ni-kansikinee, ni dàá pàkà Yeesu Kriisitoo tikpil m-gítintam pu.

²⁷Tin pábée di sá ni-bimbim n̄ nīn táá nì Kriisitoo bɔmɔntiiti, ní báà m yaa dómín̄ ni-ceeyaaa, m yaa kaa dómínaaan, m̄ nīn gbìl bi sòòn ni nín pēēkinɔkɔ pu ki báan̄ inyaan, ki jáà nì dipɔɔbaantiil tibɔmɔntiilee n̄ cù nyɔkɔpuee.

²⁸Ní taa yàntī ni-nannanliibi n̄ fàan̄-ni tiba poon, ni nín bí miŋyee di dàá dākà bín̄ yii bi wáŋkì, ní kí dākà nimbi yii ni yú difiil saŋgu pu. Unimbɔti di dàá yàntī bí bée m̄n̄.

²⁹Di sá yii u pú-ni diyimɔl ní nīn n̄ó Kriisitoo kí taa fōō-u kí k̄í ŋmaniŋma, ama ní j̄i falaa mun u-pu.

³⁰Kɔŋkɔnnee, man nì ni kəkɔ di kpáfi ki bí dimool poon. Doooyee ni n̄n̄ ká yii m bí dimool gbantin, ní ni gbìl̄ yii m dàá gbíntii bí ki mò ali n̄n̄ dín̄.

Fiilipi 2

¹Yeesu Kriisitoo cee ní ni ká kunyannyaau ní u-neendi tī-ni dipɔɔsɔŋkil, ni nì Unimbɔti Fām ŋá ubaanti, ni n̄eēn̄ tɔb ki sūn̄ tɔb saai, kaa sá mimmaaan?

²An puee, m m̄é-ni yii ní ŋámaan ubaanti kí nīn cáá tɔb pu dineendi, ni-pɔbiliŋ n̄ ŋá dibaantiil, ni-landəkɔi mun n̄ nīn sá mbaanti. Dámaan m̄n̄, man pɔbil n̄ p̄iil̄ tiŋan.

- ³Ní taa nín ɲáaán tiba ki là ni-ba jandi pu ɲmaniɲma, kí taa nín nyaab kupampakakuliɲɲu, ní nín sɪntɪn ni-ba taapu ki tì tob, kí nín kpèé ni-jutiibi yii bi jítiñ-ni.
- ⁴Báa ɲma ń nín nyaab min ɲāñee ki tì u-juti kí taa nín dàkafi u-baba ɲmaniɲma ɲanti pu.
- ⁵Ní nín cáá Yeesu Kriisitoo landokɲu.
- ⁶Ún un sá Unimbɔti u-bee, waa nyaab yii u nì Unimbɔti ń nín ɲmà.
- ⁷Ama u yānti tin kəkɔ u nìn cááyee, ní ki fɔɔ uyumbu bimbim, ní ki dū u-ba ki nántiñ binib, ki dómiñ nniyaamin,
- ⁸ní ki sɪnti u-ba taapu, ní ki pílfɪn Unimbɔti ali ki tin kpíi ɲkúm min sá ndɔpuntikaa kúmee.
- ⁹An puee ní Unimbɔti yɔon-u ki kāaɲ mpaan ɲun bí yilpu ki jítiñ ipaan kəkɔee, ní ki pú-u diyindi din jítiñ ayin kəkɔee,
- ¹⁰an nín dàá ɲá pu bin bí yilpuee nì bin bí kitiɲ puee nì bin gítí bí kitiɲ taapuee, báa ɲma ń gbàaɲ bi-tabɲiyiliɲ pu kí nín tó Yeesu yindi,
- ¹¹ní báa ɲma kəkɔ ń lì nì u-nyəkɔn yii Yeesu Kriisitoo di sá ti-Dindaan, ní ti-baa Unimbɔti ń ká tinyool.
- ¹²An puee, m-bɔɔbi, kii m nín bí ni-cee ki ká ni tó Unimbɔti ɲyunti kamaa miɲyee, kɔɲkɔnnee m nín kpá ni-cee pu nee, ní nín gbɪntii tó-u mìn gbim gbim. Kii Unimbɔti nín fɪ-ni puee ní nín fɔɲkí-u, kí nín tūmmaan ditundi.
- ¹³Kun puee Unimbɔti di bíi ɲáaán ni-ni ditundi ki yànti ni néé u nín là miɲyee ki ɲáaán mìn.
- ¹⁴Tin kəkɔ ni yaa bíi ɲáaánee, ní taa nín gbùkuɲ kí taa nín cáá kunikpɔɲkɔkɔu,
- ¹⁵an nín dàá ɲá pu bí taa ká ni-pu tiba, ní nín bí circir ki sá Unimbɔti biyaamu mun kaa cáá ikpiti iba duulnya nib binikpitib nì bikiilliibi kansikinee. Ní nín wál duulnyan kii iɲmalbijaayee,
- ¹⁶kí nín báakí Unimbɔti ɔti tin sá dimaɲfalee. Ni yaa ɲá mimmee, daliɲkin Kriisitoo dàá gítínee, m dāa mòon ní, an di dàá dākà yii m-tundi nì m-póon tam kaa ɲá fam.
- ¹⁷Ni-fookiiu sá kii saraa un ni tì Unimbɔtee ní. An yaa yíi, bi yaa kūu-mee, m-fatikuu di dāa kútí ni-saraa ɲbanti pu. An yaa lafun sá mimmee, an dāa móokín-mi, ní ni mun ń dāá kūtí m-pu tí fàal.
- ¹⁸Mìn mbaantiim, ni mun dāa bí dipɔɔpindi poon ní man mun ń kūtí ni-pu tí fàal.
- ¹⁹Ti-Dindaan Yeesu yaa lèe, m máká yii an kaa làá yúntí m dàá tōh Tiimootee ni-cee an nín dàá ɲá pu, u yaa láa fātii gítin ki máafi-mi ni nín bí lapu miɲyee, ń ká kunyannyaauuee.

- ²⁰Kun puee ubo kaa ti bí, ùn baba di kùtì m-pu ti cáá nlandokobaanti ki dàkafì ni-pu tikpil.
- ²¹Bin kòkò kínee dàkafì bin bi-ba boti pu ní kaa fātìi tó Yeesu Kriisitoo yati.
- ²²Nimbi ni-ba nyí min ní Tiimootee gbanti nèn dàkā u-bimbimontim, nì man nì u nín ñáan ditundi ki sòòn Unimboti boti kii kibiki nì ki-baayee.
- ²³M yaa láā bée tin poon m bée, m dàá tōn-u ni-cee malaa.
- ²⁴M máká ti-Dindaan pu yii, an kaa làà ti yúntí, mama m-ba dàá dāān kí màntì ni-pu.
- ²⁵M ká yii an máan m tōn ni-cee m-nabiki Eepafloðiiti m-tontonjuti man nì un bōō dikondi puee, un nì nèn túnní m-cee, u cáan-mi tin nèn lóò-mi ni tútuñní-mee.
- ²⁶U nyàab kí dāān kí ká ni-kòkò ní. U nín bée yii ni gbīl yii u búñkèe, an páb-u tikpil.
- ²⁷U lafun búñki tikpil, ali ki tóob ñkúm, ama ní Unimboti sún u-saai, kaa sá ùn baba saai, u sún ki kpáan man mun saai, kunimbaau n taa dāān kí gítì kùtì kunimbaau pu.
- ²⁸An puee m jìkì kí dū-u kí tōn ni-cee malaa, an nín dàá ñá pu, ni yaa gítì fātìi ká-uee, ni-pòbiliñ n fātìi tí sòñkèe, ní man mun nimbaaku n bàtì.
- ²⁹Mín puee, u yaa bāanee, ní fōō-u nì dipòpñkpaandi ti-Dindaan pu. Binib bin bí kii un-uee, ni máan kí nīn tó-bi ní,
- ³⁰kun puee Kriisitoo tundi puee fiii di péēkpá ú bàà kpú. Waa fāñki ñkúm ki tútuñ-mi ditutundi din, ni yaa bàà bí doo, an bàà sá ní tútuñ-mee.

Fiilipi 3

- ¹M-nabiyaamu, tin kínee di sá yii ní nīn fāalmaan ti-Dindaan pu. An kaa sá-mi digíndi m fātìi kùbitì kí lì tin m nèn péēñmān-ni dooooyee, an mun sá nimbi difiil ní.
- ²Nīn nyímmaan ni-ba nì binib bin bimbim bí kii ibooyee, bi tūn atunjpiti ki gífi ki lèekì binib wunti laaaba famee.
- ³Timbi di sá bin gí digiil tiñman yalee, kun puee Unimboti Fām di kpòotì timbi ní ti nòó-u. Yeesu Kriisitoo pu ní timbi fāal, kaa máká nisaal tundi pu.
- ⁴Ama m bàà ñūn kí nīn máká nisaal tundi pu. Ubo yaa dàkafì yii u ñūn kí dū u-mákal kí ñá nisaal tundi puee, man bàà cáá nsan kí dàkafì mín kí jítì udaan pu.
- ⁵Bi nín màl-mee, iwiin inii dal ní bi gí-mi, m baasii sá Israyeel nibul ní, ki sá Beenjamin maaliñun, ki sá ujuudajabaamōn. Juuda yab marab nótamee, m nèn sá Fariisab kitilin ní,
- ⁶ní ki cáá difañgiil ali ki sàantí Kriisitoo nikitil. A yaa kpēem nín ñúb Juuda yab marab puee, m nèn bí deede, kaa yīntì báà tiba.
- ⁷M bàà nèn nyí yii an sá-mi tiñan ní, ama kōñkōnee, Kriisitoo puee, m kpèé-tì kii tiwan tin kaa cáá ipaatee ní.

⁸M nín bée yii m-Dindaan Yeesu Kriisitoo sá-mi tiŋan tin jítiñ tikokooe, an puee, tin kəkə m nín péē kpée yii an sá-mi tiwammontiilee, m kíñ ki kpée-tì kii tiwan tin kaa cáá ipaatee ní. U-puee m fá tikokə, ní ki kíñ ki kpée-tì kii titampummoolee kí ŋmā kí ká Kriisitoo,

⁹man nì u ń ḡá ubaanti. Maa ti máká yii m nín ḡúb marabee pu ní m kpántì deedeedaan, see m nín fṵṵ Kriisitoo ki kíí puee ní m kpántì deedeedaan, kii Unimbṵti nín yāntì bin fṵṵ-u ki kííyee kpántì deedeedambi puee.

¹⁰Tin m nyàabee di sá ḿ bée Kriisitoo nì u-fikititam pəŋŋu, man nì u ń kpāfi kí jī u-falaau, m-bimbim ń kpú, ḿ nántiñ Yeesu nín nín kpíi puee,

¹¹ki cótí yii Unimbṵti dàá dàá fikiti man mun ditaŋkpiilin.

¹²An kaa sá yii m fṵṵ tipaal, maa láá kpántì umonti ki dṵṵ, ama, Yeesu Kriisitoo u-ba nín cúú-mi puee, m bīi pṵṵntí kí sān kí cúú m-taatandi paati.

¹³Nnabiyaamu, m nyí yii maa láá bāñ kí cúú-tì, tiba ní m ḡáań: di sá yii m súntí tin pu m jíṭeē, ní ki pṵṵntí kí bà tin bí nyəkəpuee,

¹⁴ki sán kí bà kigbèenlaŋ, ní kí tin fṵṵ tipaal tin pu Unimbṵti yíiñ-ti yilpu Yeesu Kriisitoo puee.

¹⁵Timbi bin bīiñ nnimbṵtisan poonee, ti-kəkə ń nīn cáámaan nlandəkə gbanti. Ama ní ni-kansikin biba landəkəi yaa tí nyáń ibaaa, Unimbṵti dàá dākà-ni ní bée an nín sá miŋyee.

¹⁶Tin pábee di sá yii, nsan ŋun ti péēkíí ki nóóyee, tí nīn gbíntì ki nóó-ŋu ki cá.

¹⁷Nnabiyaamu, nīn nóómaan m-tabṵbiliŋ kí dū ni-nimikpeeŋu kí báań bin cṵṵm kii ni nín ká timbi cṵṵm miŋyee pu.

¹⁸M nín tükū-ni, ki dàá gítí bṵsì kí tükù-ni nì nsiim, yii binib biba bí, bi-saŋkindi dākà yii bi ná Kriisitoo un kpíi ndṵpuntikaa puee.

¹⁹Tin dṵ ki cí-bee di sá ditafadaaldi, kun puee bi nóó tin bi-pooŋŋi lèe, kaa nóó Unimbṵti. Tin kṵntí-bi icooyee di mṵñ-bi, ní taapu doo wanti pu ní bi dākafí.

²⁰Ama timbi sá yilpu tindambiyaamu ní, ti kā ki cí ti-Dindaan Yeesu Kriisitoo ń nyānní niin kí dāań kí fī-ti.

²¹U dàá dàá dū mpəŋ ŋun u cáá kí sīntiñ tiwan kəkə u-taapuee kí cúú ti-wunti tin bí iwəfinee kí kpántí yilpu wunti kii u-yəŋu nín bí puee.

Fiiliipi 4

¹An puee, m-nabineeŋkaamu mun m mò ki bàà là kí gítí kée, nimbi bin tìi-mi dipṵṵpindi ki sá-mi tinyoolee, m-bṵṵbi, ni nín sá ti-Dindaan yab puee, ní nīn gbínti bá ki pṵṵ mīn.

²M mèe ki gbāam Eefoodii nì Sintikee, bí ḡá ubaanti mmontiim ti-Dindaan pu.

- ³Mín puee, sii m-tòntònjutimònti, m mèé-si yii á tūtuñ-mi binimpoobi gbanti liitil, kun puee, dikòndi din poon m bí ki sòòñ Unimbòti bòtee, binimpoobee mun tūtuñ-mi, bi nì Kleeman nì m-tòntònjutiibi bin kínee, Unimbòti ñmāñ bi-yiññi dimañfal takaldaun.
- ⁴Ni nín bí ti-Dindaan ñaan puee, nín fàalmaan ñyunti sá kamaa. M gítí búsí ki tükù-ni yii, nín fàalmaan.
- ⁵Ní nīn mō bāà ñma cee, ti-Dindaan tóobiñ.
- ⁶Ní taa nín yáliñkí tiba nì tiba pu, ama, tin kamaa di yaa bāañ-nee, ní dū ñwimmeem nì igbaam kí mèè Unimbòti tin lóò-nee pu, kí nīn jáam-u u-ñanti pu,
- ⁷ní Unimbòti gbansòññu ñun wīkí ki jítiñ unil nyítamee, dàá ñúb ni-pòbiliñ nì nìlandòkò ni nín sá Yeesu Kriisitoo yabee pu.
- ⁸Nnabiyaamu, m-bòjoolkaati sèé: ní nīn dākafí tin máañ tinyoolee pu, an dākà yii tin kòkò sá tiñmanee, tin kòkò sá bí nyòñkèè, tin kòkò bí deedeeyee, tin kòkò bí circiree, tin kòkò kíti dineendee, nì tin kòkò bi pàkèè.
- ⁹Ní nīn ñáammaan tin ni bífi ki fōō m-ceeyee nì tin ni gbīl m sòòñee nì tin ni ká m ñáánee, ní Unimbòti ñgbansòñfidaan ñ nīn bí ni-cee.
- ¹⁰M jáam ti-Dindaan, an móòkiñ-mi tikpil kii m nín ká ni fātii tí bí dākafí m-pu ki tūtuñni-mi miñyee. Ni nìn péécáá nlandòkò gbanti m-pu an yúnti, ní mpaan kaa nìn bí ní ñá ni nín dākafí m-pu miñyee.
- ¹¹M nín bí ki sòòñ-ni pu nee, an kaa sá tiba di lóò-mi. M yaa cááyaaa, m yaa kaa tí cááyaaa, an kòkò mōñ-mi ní.
- ¹²M bífi kí nīn bí disoolin ki tí bífi kí nīn bí digbil mun poon. M yaa díkáaa, m yaa bí ñkùminaaan, m yaa cáá ki lákatáaa, m yaa kaa tí cááyaaa, m bífi kí ñmèè tin kamaa di yaa péè bāañ-mee.
- ¹³M ñūñ tikòkò Kriisitoo un tì-mi mpònee pu.
- ¹⁴Ama, nì mín kòkòee, ni ñá waayu ni nín jōō-mi m-falaau poon puee.
- ¹⁵Fiiliipi tiñki yab, nimbi ni-ba nyí, m nín kí Unimbòti bòti sòontam Maseeduaan tiñkin ki dāa yíkèè, Kriisitoo nikitil báa diba kaa ti tūtuñ-mi, see nimbi ñmanñma di kí ki tīñ-mi tin m bàà làá lóóyee.
- ¹⁶Di sá yii, doooo, min m nìn bí Teesaalooniikee, nimbi di nìn tūtuñni-mi mili kòkò.
- ¹⁷M nín sòòñ tin nee, kaa sá m nyàab ní pō-mi tiba, m nyàab ní nīn ñáañ atummònti kí ká ipaati tikpil ní.
- ¹⁸Tin kòkò ni tīñ-mee, m fōō, m kíñ ki bí digbil poon ní. Ni nín tīñ ni-tūtuntam puee, kòñkònee m cáá tikòkò nì tikòkò. Ni-tūtuntam min Eepafloodiiti cáañ-mee sófi fiñfiñ kii talaaluae, ní ki bí kii saraa un fáati Unimbòti u fòòlee.
- ¹⁹Kii m-Nimbòtiu nín cáá tigaajawan tikpil nì tinyool puee, u dàá tī-ni tin kòkò yaa lóò-nee Yeesu Kriisitoo pu.

²⁰Ti-Baa Unimbɔti ń ká tinyool kí nīn péēcá jaanjaan! Ameen.

²¹Ní jāam̄ bin kɔkɔ péēsá Yeesu Kriisitoo yabee. Ti-nabiyaamu mun bí man cee dooyee mun jáam̄-ni.

²²Bin sá Unimbɔti yabee kɔkɔ jáam̄-ni, kí bántée, gɔminakpaan Seesar dicaŋkun yab jáam̄-ni.

²³Ti-Dindaan Yeesu Kriisitoo ŋanti ń nīn bí ni-cee.

Kooloosi

Kooloosi 1

- ¹Man Pɔɔl un Unimbɔti là m̄ n̄n sá Yeesu Kriisitoo kpambalee n̄ ti-nabiki Tiimootee di jáam̄
- ²Unimbɔti yab bin bí Kooloosi, ki kpántì ti-nabim̄ntiimu Kriisitoo puee. Ti-Baa Unimbɔti n̄ n̄á-ni tijan kí t̄i-ni n̄gbaɲsɔŋfi.
- ³Dyunti sá kamaa, ti yaa péeb̄í m̄èe ki t̄i-nee, ti jáam̄ Unimbɔti ti-Dindaan Yeesu Kriisitoo Baa ni-pu.
- ⁴Di sá yii ti gb̄l̄ ni n̄n cáá dimákal Yeesu Kriisitoo pu ki n̄eé Unimbɔti yab kɔkɔe,
- ⁵kun puee ni dákaf̄ tipaal tin d̄ɔ ki cí-ni yilpuee pu. Ni béè an paati pu nyunti n̄un bi n̄n péé péé ki s̄oñ n̄n ni ibaam̄n b̄otee.
- ⁶Tibɔm̄ntiil gbanti tin bi cáá-n̄e b̄í gb̄t̄i ki lòon abim̄nti ajan kɔkɔ nib cee, kii t̄i n̄n t̄un atunnyaan ni-cee niin puee, ki kí doooo nyunti n̄un ni n̄n péé péé ki f̄ɔ-t̄i ki lafun béè Unimbɔti n̄n n̄áá nnibiyaamu tijan puee.
- ⁷T̄in ní Eepafrasi n̄n dákā-ni. Ún di sá ti-t̄ont̄njuti un ti n̄eé, ki t̄un Kriisitoo tundi deede ki t̄út̄un-ni.
- ⁸U máaf̄-ti dineendi din Unimbɔti F̄am̄ ȳant̄i ni cáá Unimbɔti yab puee.
- ⁹M̄in puee, kí ȳoñ daliŋkin ti n̄n gb̄l̄ ni-puee, ti mun péeb̄í ki m̄èe kaa gb̄ent̄i ki t̄i-ni yii Unimbɔti n̄ ȳant̄i ní béé mm̄ntiim̄ tin u là ní n̄e, kí t̄i-ni iciin kɔkɔ n̄n dinyil din Unimbɔti F̄am̄ t̄iye ní gb̄l̄ u-b̄oti taapu.
- ¹⁰Ú ȳant̄i ni-bimbim̄ n̄ n̄n n̄ó n̄n bi sá ti-Dindaan yabee bimbim̄ kí n̄m̄ kí fáat̄i-u nyunti sá kamaa. M̄in ní ni dàá n̄n lòon abim̄nti n̄in sá ní n̄n t̄un atumm̄nti kɔkɔe, kí n̄n m̄ot̄i béet̄i Unimbɔti,
- ¹¹ú n̄n t̄i-ni m̄p̄on nyunti sá kamaa, kii u n̄n sá ip̄on n̄n tinyool daan puee. M̄p̄on gbanti dàá ȳant̄i ní n̄n j̄n̄ kim̄t̄i ki p̄ont̄i nyunti sá kamaa.
- ¹²Ní n̄n jáam̄ ti-Baa Unimbɔti dip̄op̄indi poon u n̄n ȳant̄i ní dàá n̄m̄ kí ká tin u s̄iñ kí t̄i u-yab u-dumpu, n̄walfi laŋkee.
- ¹³Di sá yii u nȳant̄i-ti dibɔmb̄ondi p̄n̄n̄un ki cáá-ti u-Jip̄on̄neen̄kaau beel poon.
- ¹⁴U-Jip̄on̄nee di ȳant̄i Unimbɔti f̄i-ti ki lí, ki d̄u ti-kp̄it̄i ki p̄u-ti.
- ¹⁵Ún di sá Unimbɔti un baa w̄álee naŋku, ní ki lí tin kɔkɔwoooo Unimbɔti náánee nyɔkɔpu.
- ¹⁶Di sá yii tiwan tin kɔkɔ bí yilpuee n̄n tin bí taapuee, tin bi w̄álee n̄n tin baa w̄álee, an yaa sá it̄un in j̄n̄ abeeyee n̄n in sá bikp̄ilibeeeyeee an yaa tí sá in cáá m̄p̄oneeyeee, Unimbɔti n̄n d̄i u-Jip̄on̄nee pu ní ki náá t̄in kɔkɔ, u-Jip̄on̄nee di náá tikɔkɔ ki ȳi an kɔkɔ mun.

- ¹⁷Ún di nìn bí ní boonee tiwan kəkə dómiń, ún di yàntī tiwan kəkə bí ti-laŋki.
- ¹⁸Ún di sá u-nikitil yil ní u-nikitil sá u-wunti. Ún di tìi dimaŋfal. Bin fikitì ditanŋkpiilinee kansikinee, ún di sá ukpil, an nín dàá ńá pu ú kpántí upeepeekaa tikəkə puee.
- ¹⁹Di sá yii Unimbəti bóob yii Yeesu ń nńn cáá ún bimbim kəkə,
- ²⁰ki bóob kí dī u-pu ún nì tiwan tin bí yilpuee nì tin bí taapuee kəkə ń kpīkì. Ọyunti ńun Yeesu nyánti u-fatikuu ki kpī ndəpuntikaa puee, ní u cááń nnyəəpee gbanti.
- ²¹Ni nín nìn cáá tilandəkəkpiil ki tūń atunŋkpiti puee, ni nì Unimbəti kansikin nìn bíl, ní ni nìn sá u-nannanliibi.
- ²²Ama kəŋkənee, Yeesu nín nìn kpánti unil ki kpī puee ní Unimbəti yānti ni nì u kpīkì. Mimme, u dàá cááń-ni u-nimiin, ní nńn sá u-yab kí nńn bí circir, báà ubə ń taa ká ni-pu tikpiti kí lì.
- ²³Ama, ni máań tibəti tin ni nìn fǝǝ ki kíyee, ní nńn ńúb-tì mməntiimin, kí nńn sí deede kí báań inyaan kí taa lēēdimákal tibəməntiil tin ni gbīlee pu. An bətee di sá tin bi sòon ki tī báà ńma ajan kəkəe. Man mun Pəol kpánti un kíń ki sòon an bəti gbantee.
- ²⁴Kəŋkənee an mókíń-mi m nín bí jīń falaa ni-puee, an dəkà yii m púntí falaa un Kriisitoo tī-mee m-wuntin kí tī u-nikitil din sá u-wuntee.
- ²⁵Kii Unimbəti nín tún-mi ditúndi m tō ditundi kí tī nimbi Kriisitoo nikitil puee, man kpánti utəntənlì ki tī-ni: m-tundi di sá m sòon u-bətee kəkə mməntiim.
- ²⁶Tibətee di sá tin nìn bí dibalin doooo abin abin, báà ubə kaa bée ti-puee, ní kəŋkənee Unimbəti bíti ti-pu ki tī u-nib.
- ²⁷U nín là puee di sá bí bée tibəbalkaalee nín cáá kunyaaŋŋu tikpil ki tī bin kaa sá Juuda yabee puee yii: Kriisitoo bí ni-pəbilińin ki yànti ni nyí yii ni dàá dāá jī Unimbəti nyooti.
- ²⁸An puee, ti sòon Yeesu Kriisitoo gbanti bəti ki tìi unil sá kamaa, ki dù ti-ciini kəkə ki dəkà ki kpáafi báà ńma, bí ńmā kí nńn sá binib bin bínee kun puee bi nì Yeesu Kriisitoo ńá ubaanti.
- ²⁹Mín pu ní m gì ki dù mŋəŋkpaan ńun Kriisitoo tìi-mee, mŋəŋ ńun tūń ditundi man nee, ki cáá mò dimool ni-pu.

Kooloosi 2

- ¹M nyàab ní bée yii m bí mò dimool an pǝǝ, nimbi nì Lawoodisee yab nì bin kəkə kaa láá péeká-mi dalbee pu.
- ²Di sá yii m là bí ká kunyannyaau bi-pəbilińin, kí nńn néen təb kí nńn cáá nnyəəpee, bí nńn nyí an kəkə taapu kí nńn cáá dimákal mməntiim, mimme, bi dàá bée tin tin Unimbəti nìn ńúb dibalinee mbaaməm, an dəkà yii Yeesu Kriisitoo,

- ³un ni ní iciin nì dinyil kòkò bál ki kēe.
- ⁴M tükù-ni tiboti nee ní kpèè tiŋan, ubo ń taa dū kinyɔɔmɔɔi kí ɲmàtiɲ-ni.
- ⁵Bàà m yaa kaa bí ni-kansikin, m-landòkɔŋu bí ni-cee, ní an mɔ̀n-mi m nín ká yii ni kpáfi mbaantiim ki sí deedee ki gbínti cáá dimákal Yeesu Kriisitoo puee.
- ⁶Kii ni nín nìn fɔ̃ɔ ti-Dindaan Yeesu Kriisitoo puee, ní n̄n gbínti nɔ́-u mín,
- ⁷kí báan inyaan u-ni kí n̄n w̄intí, kí n̄n ɲúb tin bi nìn dākā-ni ni fɔ̃ɔ ki kíyee mɔ̀n, kí n̄n jáam-u u-ɲanti pu tikpil.
- ⁸Ní kpèè tiŋan ubo ń taa dū u-nyil nì u-bɔfanti tin tókó binib koobiliŋ nì duulnya marab pu kaa tókó Kriisitoo puee kí ɲmàtiɲ-ni.
- ⁹Di sá yii Unimbɔti bimbim kòkò bí Kriisitoo wuntin,
- ¹⁰ní nimbi kánti tikòkò u-cee, kun puee ún di sá uboti tin kòkò cáá iponee pu.
- ¹¹Dyunti ɲun ni nì Yeesu Kriisitoo ɲá ubaantee, u gíi-ni nì digiil din kaa sá tiwun gítamee, ki gíi ki lēēni-bimbikpitim.
- ¹²Kii bi nín síb bin kúyee puee, mín ní ni nì Kriisitoo nìn kp̄i, bi síb-ni ɲyunti ɲun bi nìn fūl-ni Unimbɔti nyimee. Boonee, ni nì u fikiti, kun puee ni fɔ̃ɔ ki kí yii Unimbɔti cáá mɔ̀ŋkpaan ki ɲún ki fikiti Kriisitoo.
- ¹³Doooyee, ni-kpitii pu, nì ni nín kaa sá Juuda yab, kaa gíyee puee, naa nìn cáá dimaŋfal. Kɔ̀ŋkɔ̀nee, ni nì Kriisitoo nín kpánti ubaanti puee, Unimbɔti fikiti-ni, ní ki dū ni-kpitii kòkò ki pú-ni,
- ¹⁴ki fɔ̃ɔ takalda un poon bi nìn ɲmàn ti-kpitii ki bóob yii bí dáal ti-tafalee, ki kp̄i ki dū ki kpáa Yeesu dɔ̀puntikaan pu.
- ¹⁵Ali kii Kriisitoo nín sá ujanjapil ki ján ki jín arasiniibi bin cáá iponee pu, ki fɔ̃ɔ bi-janjawanti, ki cáan-bi ki dākā báà ɲma ń kpèè bin pu u jín dinyandee, u-dɔ̀puntikaan puee di sá u-nyandi gbanti.
- ¹⁶Mimnee, bi yaa bí sòon ni-pu yii naa kòó tijikaal tiba, kaa kòó tinyòkaal tiba mun, nì ni nín kaa kàal iwiin in bi nìn yóonee, kaa kàal iɲmapɔ̀n nì iwiɲɲɲfikaa puee, ní taa yànti án n̄n páb-ni.
- ¹⁷Di sá yii akoobilee di nìn dākà tin dáa bí boon ki dòonee, an dākà yii Kriisitoo.
- ¹⁸Ubo ń taa ɲmàtiɲ-ni yii ni ȳinti ni nín kaa là kí sinti ni-ba taapu kí n̄n mée Unimbɔti tūunee. Di sá bi là kí li yii bín wál ní. Ama baa máan kí dākà bi-ba kii bi nín yònti bi-ba yilpu min nee, kun puee bi-landòkɔi nyēēn bi-bimbikpitimin ní ki sá nniyaamin.
- ¹⁹Baa ɲúb Yeesu Kriisitoo bɔti. Ún di sá diyil ki t̄i tiwun kòkò, ki tükuntí akpab ní ki nòb igiin, ki kp̄inti tiwun ki yànti tí n̄n w̄intí kii Unimbɔti nín là puee.
- ²⁰Ni nì Kriisitoo nín kp̄i, u f̄i-ni ki nyánti-ni duulnya marabinee ba ɲá ní ni bí kii ni gítí sá taapu doo yabee? Ba ɲá ní ni gbínti di akoobil ɲin sá yii:

²¹“Taa cúú doo, taa dáká tinee, taa gbēētín kínee.”

²²An bōti gbantee sá binib marab nì bi-dàkatam ní. Ni yaa gítī dáá dū tijin gbanti ki jínee, ti bíil dee, an kaa cáá yii an dáá ḡá-ni tiba.

²³Ibaamōn, a yaa kpēēmarab gbantee, a dáá lì yii bi cáá iciin ḡyunti ḡun bi bí yii binib ḡ dī dipōondi saḡḡu, kí s̄ntī bi-ba taapu, kí yàntī án píl bi-wuntee, ama, marabee kaa cáá mpōn kí cúú tiwun ḡ taa ḡá min kaa kítèe.

Kooloosi 3

¹Ama ni yaa nyí yii Kriisitoo kpáañ-ni ki kp̄i ki fikitèe, nīn nyàabmaan tin bí yilpuee, laakin ùn bí ki k̄a Unimbōti ḡaḡiil púee.

²Dūmaan ni-landōkōi kí dūú tō yilpu wanti pu, kí taa dūú tō taapu yati pu.

³Di sá yii ni kp̄i, ní ni-maḡfal bál Kriisitoo ni Unimbōti cee.

⁴Kriisitoo un sá ni-maḡfalee yaa láā páañnee, ni mun dāa pāantiḡ ní ki cáá tinyool kii un-uee.

⁵Mimmee, kp̄ōmaan taapu doo bimbikpitim min bí ni-nee, tin sá tilaakpaal nì tijōkōndi, ilandōkōkpiti nì nnimitaataam min nì iwaatooti sá tiwambaantiilee.

⁶Ikpiti gbanti pu ní Unimbōti dáá dáal bin kaa tó-uee tafaliḡ.

⁷Mīn ní ni n̄n ḡáañ dooooyee, ḡyunti ḡun ni n̄n dáá bí ikpitinee.

⁸Ama kōḡkōnee, ní fámaan ikpiti kōkō, kí taa nīn f̄oōl̄ mbiim, kí taa nīn cáá diḡuul nì tilandōkōkp̄iil. Ní taa yàntī asiibil nì tibōfan ḡ n̄n nyēēni-nyōmmun.

⁹Ní taa nīn m̄ontímaan tōb. Di sá yii ni fá ni-bimbikpitim nì atuun ḡin ni n̄n ḡáañ dooooyee kōkōwoooo,

¹⁰ní ki ȳōh̄ mbimbipōm min p̄ontī baabadal ki cá ki nántīn̄ Unimbōti un náañ-mèe n̄n bí puee; mimmee, an dáá yàntī ní bée ni-Nimbōtiuee mbaamōm.

¹¹Mīn puee, a yaa sá Juuda yōuaaa, a yaa kaa sáaa, a yaa gíyaaa a yaa kaa gíyaaa, a yaa sá unicanaaan a yaa tí sá umōnilaaa, a yaa sá uyumbuōōō a yaa tí tó a-baaa, t̄n̄ kaa páb. Un baba bōti pábee di sá Kriisitoo un bí báa ḡmanee.

¹²Nimbi bin Unimbōti lútì, ni kpántì u-yab bin u nēeēe, ní n̄n sūmmaan tōb saai kí n̄n ḡáañ tōb tiḡan kí n̄n s̄nt̄n̄ ni-ba taapu ki t̄i tōb, kí n̄n cáá kimōt̄i.

¹³Ní n̄n ḡúbmaan tōb, ni-jutiibi yaa ȳintiñ-nee, ní n̄n cáā p̄ñ-bi. Kii ti-Dindaan n̄n dū ni-kpitii ki p̄ú-ni puee, ni mun ḡ n̄n cáā p̄ñmmaan tōb m̄iñ mbaantiim.

¹⁴Tin páb ki jítiñ an kōkōee di sá ní n̄n nēeñ tōb, m̄iñ ní ni dáá ḡmā kí n̄n cáā nnyōpee tiḡman pu.

¹⁵Yàntímaan ḡgbansōḡfi ḡun Kriisitoo t̄iyyee ḡ n̄n kp̄oōt̄i ni-pōbiliḡ, di sá yii ḡuñ pu ní Unimbōti ȳiñ-ni ki kp̄afi kii tiwumbaantiilee. Ní n̄n jáam̄ Unimbōti tiḡan tin u ḡáañ ki t̄i-nee pu.

- ¹⁶Kriisitoo botee n̄ n̄n bí ni-cee mm̄ontiimin nyunti sá kamaa. Ní n̄n dākà t̄ob u-botee kí n̄n kpáafimaan t̄ob n̄n iciimm̄onti, kí n̄n ḡa Soom takaldau poon lani n̄n Kriisitoo nikitil lani n̄n ilan in Unimb̄oti F̄am t̄i-nee kí n̄n cáá p̄akà Unimb̄oti u-ḡanti pu n̄n ni-p̄obilij k̄ok̄o.
- ¹⁷Tin kamaa ni yaa làá lèe n̄n tin kamaa ni yaa làá ḡee, ḡámaan an k̄ok̄o n̄n ti-Dindaan Yeesu pu, kí n̄n ðimaan u-pu ki jáam̄ ti-Baa Unimb̄oti.
- ¹⁸Nimbi binimpoobee, n̄n t̄ómaan ni-calib, min máan̄ ti-Dindaan yab n̄n ḡee dee.
- ¹⁹Nimbi bininjabee, n̄n néem̄maan ni-nimpoobi, kí taa n̄n cáá bi-pu ntoom.
- ²⁰Nimbi mbiyaamuee, an sá ni-tundi yii ní n̄n gb̄ilim̄maan ni-baabi n̄n ni-nab nȳommu nyunti sá kamaa, m̄in ði sá min fáat̄in̄ ti-Dindaanee.
- ²¹Nimbi bibaatiibee, ní taa n̄n p̄áb̄ ni-biyaamu tikpil, mu-wunti n̄n ȳot̄i.
- ²²Nimbi iyumbuee, ní n̄n gb̄ilim̄maan bin sá ni-dindambi taapu dooyee nȳommu iyunti k̄ok̄o, kí taa n̄n t̄un̄ ditundi min fáat̄i-bee nyunti ḡun bi kp̄éé-nee ḡmaniḡma, ama ní n̄n t̄un̄ bi-tuuḡḡi n̄n ðip̄obil diba kii ni n̄n f̄an̄k̄i ti-Dindaan puee.
- ²³B̄aa ditundi ðin ní an yaa ȳant̄i ki s̄ee, ḡámaan n̄n ni-p̄obilij k̄ok̄o, a l̄i kii ti-Dindaan ní ni ḡáan̄ ki t̄i, an kaa sá nnibiyaamuee.
- ²⁴Ní n̄n nyí yii ti-Dindaan dàá d̄áá p̄a-ni tipaal tin sá kutindaḡuee. Di sá yii ni-Dindaan un ni baasii t̄un̄ ditundi ki t̄iyeec di sá Kriisitoo.
- ²⁵Un yaa ḡá ikp̄itee dàá ká ikp̄iti paati, kun puee ti-Dindaan gbanti kaa ḡant̄i binib.

Kooloosi 4

- ¹Nimbi bin cáá iyumbuee, ní n̄n ḡúb̄-i mm̄ontiimin, kí n̄n ḡáan̄-i tiḡan, kí n̄n nyí yii ni mun cáá ukpil ub̄o u bí yilpu.
- ²Ní n̄n m̄éé múl̄mul kí taa gb̄eēn̄, kí n̄n w̄álf̄i kí n̄n jáam̄ Unimb̄oti u-ḡanti pu.
- ³Ni yaa b̄i m̄ééyee, ní n̄n m̄éé ki t̄i ni mun, yii Unimb̄oti n̄n p̄iit̄i-ti nsan tí ḡm̄a kí s̄oñ̄ u-b̄oti kí biit̄i tib̄obalkaal tin sá Kriisitoo yatee. Tib̄oti gbanti pu ní m bí sarkan nee.
- ⁴Ní n̄n m̄éé yii m̄ ḡm̄a kí n̄n s̄oñ̄ ki cánt̄i-ti kii an n̄n máan̄ puee.
- ⁵Ni-bimbiminee, ní n̄n cáá iciin bin kaa láá f̄ōō ki kííyee cee, kí taa d̄ū iyunti in ni k̄ant̄i bi-ceeyee kí b̄iil̄.
- ⁶Ní n̄n s̄oñ̄ anȳōbumm̄ōn ḡi n̄n cáá taapu, kí n̄n nyí min ní ni dàá n̄n kíik̄i b̄áa ḡma an n̄n k̄it̄èe.
- ⁷An yaa sá m-botee, ti-nabineeḡkaaki Tiisiiki, un sá ti-t̄ont̄on̄juti ki t̄un̄ ditundi mm̄ontiim ki t̄i ti-Dindaanee, dàá s̄oñ̄ n̄n ni tin k̄ok̄o m cááyee.
- ⁸An pu ní m túnn̄i-u ni-cee ní b̄éé ti-gbamp̄oḡḡu pu kí ká kunyann̄yaaau.

⁹Ún nì ti-nabineenkaaki Oneesiim un sá deedeedaan ki sá ni-you uboee dàá dāá nīn táań, kí dāá tükù-ni tin kəkə bí jī́tí dooyee.

¹⁰Aristaaki man nì un bí sarkan dooyee jáamiń-ni, ní Maarki Baarnaabasi naal mun tiiń-ni ijaam. (Doooyee, bi tükū-ni Maarki gbanti bōti ki yóòh; mimmee, u yaa láā bāań ni-ceeyee, ní dāá fǒǒ-u mmōntiim.)

¹¹Yeesu un bi yíi Justusee mun jáamiń-ni. Juuda yab kansikinee, binib bita nee baba di sá man nì bin tūn ditundi Unimbōti beel ń cù nyokopuee, biń di tii-mi kunyannyaau.

¹²Ni-you Eepafrasi, Yeesu Kriisitoo tōntōnliuee, mun tiiń-ni ijaam, u mēé ni-pu tikpil nyunti sá kamaa, kaa gbēentí, yii ní nīn gbíntii ńú́b Yeesu Kriisitoo bōti mmōntiim kí wíiń kí kpántí binińmambi, kí ńmā kí ńá tin kəkə Unimbōti là ní ńéé.

¹³Mama m-ba ńūn kí lì u-pu yii u gí nimbi nì Lawoodisee yab nì Eerapooliisi yab pu digińdi.

¹⁴Luuki, ti-nabineenkaaki un sá dəkotee, nì Deemasi jáamiń-ni.

¹⁵Ní jāam̄ nnabiyaamu mun bí Lawoodiseeyee, nì Nińfasi, kí kpáań Kriisitoo nikitil dín kpáfí u-dumpuee.

¹⁶Ni yaa kaań takalda nee ki tīi ni-yab ki dōoyee, ní dūú tīi Kriisitoo nikitil dín bí Lawoodiseeyee mun ń kaań; mīn ní, Lawoodisee yab yaa tiiń-ni bi-youee ní kaań ú mun.

¹⁷Ní tükù Arkiipi yii ú kpèè sooo kí tō ditundi dín ti-Dindaan tīi-uee tińan.

¹⁸Man Pōol di dū m-ńal ki ńmāń anyoobun nee ki jáań-ni. Taa súntímaan yii m bí sarkan. Kriisitoo ńanti ń nīn bí ni-pu.

1 Teesaalooniiki

1 Teesaalooniiki 1

¹Man Pɔɔl nì Siilaasi nì Tiimootee di ɲmàñ takalda nee kí t̄i nimbi Kriisitoo nikitil din bí Teesaalooniiki ki sá ti-Baa Unimbɔti nì ti-Dindaan Yeesu Kriisitoo yabee. Unimbɔti ń ɲá-ni tiɲan kí t̄i-ni ɲgbansɔŋfi.

²Ti pàkà Unimbɔti ní baabadal ni-kəkɔ pu, ní ti-wimmeem poonee ti tétí ki mèé ni-pu múlmul.

³Ti-wimmeem poon ti-Baa Unimbɔti nimiinee ti tétí atuun ɲin ni ɲáań ni-fookiiu nì ni-neendi puee nì ni-mákal din ni cáá ti-Dindaan Yeesu Kriisitoo puee nín pɔɔ miɲyee.

⁴Nnabiyaamu, ti nyí yii Unimbɔti nééń-ni ní ki lútì-ni ní n̄n sá u-yab.

⁵Kun puee tibɔmɔntiil tin ti sòoń nì nee kaa sá nì kinyɔkɔn ɲmaniɲma, ama ti n̄n sòoń nì Unimbɔti pɔŋɲu nì u-Fām tūtuntam ki tókó ibaamɔn pu páaa ní. Ni nyí ti-pu ti n̄n n̄n dómiń ki bí ni-kansikin nì mbimbim min kí tūtuń-nee.

⁶Ni nín fɔɔ Unimbɔti bɔti ki kíí nì falaabi tikpil poon nì dipɔɔpindi din Unimbɔti Fām t̄iyee puee ni kpánti bin fɔɔ timbi nì ti-Dindaan didandee dee.

⁷Min ni ɲá nee dākà Maseeduaan nì Akaayi yab bin fɔɔ ki kííyee mun ń fɔɔ mín dee.

⁸Kun puee nimbi cee ní ti-Dindaan bɔti gb̄tì, ki bàñ Maseeduaan nì Akaayi yab cee. Kaa sá b̄n baba, ajan ɲin kəkɔ kínee yab mun gb̄l̄ ni nín fɔɔ Unimbɔti ki kíí miɲyee, an kaa ti bàlf̄i yii timbi ń māafi-bi gba.

⁹Báa ɲma máafi ti nín dómiń ni-cee ni fɔɔ-ti pu, ki fá ni-waaji ki kíń ki nók ibaamɔn Nimbɔtiu un bí dimaɲfalinee,

¹⁰n̄n ni nín kā ki cí u-Jipɔɔn Yeesu un u fikiti ditaɲkpiilin, u daá nyānni yilpu kí f̄i-ti kí nyānti Unimbɔti ɲuul din bí ki dòońee poonee.

1 Teesaalooniiki 2

¹Nnabiyaamu, kii nimbi ni-ba nín péēnyí puee, kaa sá yii ti dómiń ni-dumpu fam.

²Ni nyí yii bi s̄ań-ti ki s̄i-ti Fiiliipi tiɲkin ní ti nín b̄ań ni-cee Teesaalooniiki. Ama ní Unimbɔti t̄i-ti kunyannyaau tí sòoń-ni u-bɔmɔntiiti nì dikɔndi poon.

³Ti-bɔti tin ti sòońee kaa sá tinyimɔmbɔti, kaa sá ilandəkək̄piti bɔti, kaa tí sá tibɔɲmatiɲkaal.

⁴Ama Unimbɔti cóɲk̄i-ti ní ki dū u-bɔmɔntiiti ki ɲúb̄n-ti tí sòoń, an puee ní ti sòoń min daá n̄n fáatiń Unimbɔti un wāl ti-pɔbiliɲinee, an kaa sá kí fáatiń binib.

⁵Nimbi ni-ba nyí yii taa sòoń-ni tibɔkiilkaal ki ká jaanjaan, taa tí sòoń ki nyàab ni-cee animil yam, Unimbɔti nyí ti-pu mín.

- ⁶Taa nyàab ubo ñ tī-ti tinyool, taa nyàab nimbi nyootaaa, kaa nyàab bin kínee mun yati.
- ⁷Ama ti bàà cáá nshan kii ti nín sá Kriisitoo kpambaliŋ puee kí tükù-ni yii nimbi di máan kí nīn kpèé-ti, ama taa ŋá mín, ti kāl ni-cee ki mō kii ubinaati nín mō pu ki ŋúb u-biyaamuee ní.
- ⁸Ti nín néen-ni puee ti là yii án taa nīn sá Unimbōti bōti ŋmanigma ní tí tī-ni, ama tí dū ti-manfal kí kūtí kí tī-ni, kun puee ni kó-ti tiŋan tiŋan.
- ⁹Nnabiyaamu, nimbi ni-ba ká ti nín tún atuun pu ŋwiiŋ pu nì kunyeeu ki gū kí ŋmā kí ŋúb ti-ba kí nīn sòon Unimbōti bōti, án taa nīn sá yii ni-kansikin ubo ní ñ nīn tú ti-gíndee.
- ¹⁰Nimbi ni-ba ká, Unimbōti mun ká yii ti-bimbim min ti dūu kāl nimbi bin fōō Unimbōti bōti ki kífyee kansikinee bí circir ki bí deedee. Taa yīntì bàà tiba nì tiba poon.
- ¹¹Min ní ni nyí yii ubaati ŋáan u-biyaamuee, mín ní ti ŋá ni-kansikin ubo ubo.
- ¹²Ti sánkì-ni ki tī-ni kunyannyaau ki páb-ni yii ní nīn còom min fáatiŋ Unimbōtee, ún un yíiŋ-ni ní dāá kó u-beel nì u-nyootinee.
- ¹³Kun pu ti gítí pàkà Unimbōti kaa gbèentée di sá ti nín cáan Unimbōti bōti ki sòon nì nee, ni pílfí-ti ki fōō-ti kaa dūu yíiŋ binib bōti, ama ki fōō-ti yii tì sá Unimbōti bōti tiŋman. Tibōti gbantee di ŋáan nimbi bin fōō ki kífyee pōbiliŋ poon atuun.
- ¹⁴An puee, nnabiyaamu, ni dī Unimbōti nikitil din bí Juudee ki sá Yeesu Kriisitoo yabee tabōbiliŋ dee, kun puee falaabi bin ni jín ni-jutiibi ceeyee, falaayee ubaanti ní bí mun jín Juuda yab ŋaan.
- ¹⁵Bín di kūu ti-Dindaan Yeesu nì Unimbōti bōnaatiliibi ki sāan ti mun, Unimbōti kaa gèetìŋ-bi ní bi sá binib kəkə pulincōtiibi,
- ¹⁶ní ki pìintí-ti nshan tí taa sòon nì bin kaa sá Juuda yabee Unimbōti bōti tin ŋūn kí cáan-bi difiilee. Bi mòtī gbēentí bi-kpitii pu iyunti kamaa. Ama Unimbōti fōō bi-pu diŋuul ki dōd.
- ¹⁷An yaa sá timbee, nnabiyaamu, doooo ŋyunti ŋun ti yāan tōbin nì tiwun yāantam, kaa sá nì ti-pōbiliŋee, ti nyàab nì diniminaamandi kí bàà fātī ká ni-nimiin ti-pōbiliŋ ñ bàà sòŋkì.
- ¹⁸Ti mòŋ yii tí gítíŋ ni-cee, man Pōol m mākaŋ mili kí bàà gítíŋ ni-cee, ama Sitaan pīiŋ-ti nshan.
- ¹⁹Nimbi di sá bin pu timbi cótée, ki sá ti-pōpindi nì ti-jajil daaŋku kun pu ti-Dindaan Yeesu yaa láa gítínee, ti dāa gbàntī u-nimiinee.
- ²⁰Tiŋman nimbi di sá timbi nyooti nì ti-pōpindi.

1 Teesaalooniiki 3

- ¹Ti nín kaa nìn gítī ḡūn kí nīn kā mín kaa gbīl̄ ni-puee ní timbi lēēyii ti dàá gbíntí kí kàl̄ Ateen ti-baba,
- ²ní ki dū ti-nabiki Tiimootee ti nì un tūn̄ Unimbōti tundi ki sòon̄ Kriisitoo bōmōntiitee ki túnní ni-cee ú tī-ni kunyannyaau kí kūti-ni mpōn ni-fookiiu poon,
- ³ni-kansikin ubó n̄ taa yàntī falaa un poon ni bée n̄ ḡmā-u. Kun puee ni nyí yii an sá falaa di péēdō ki cí-ti tí jī.
- ⁴Ti nín nìn dáá bí ni-ceeyee, ti nìn péē tūkū-ni ki yóon̄ yii falaa dō ki cí-ti, an di bāań nee kii ni nín nìn gbīl̄ puee.
- ⁵M nín kaa ti ḡūn kí nīn gbínti ki kā ki cée puee ní m túnní Tiimootee n̄ dāá kpèè ni-fookiiu nín bí puee, kun puee m fāḡkí yii Sitaan n̄ taa láā cōḡkì kí lí-ni ti-tundi din ti ḡée n̄ ḡá fam.
- ⁶Ama kōḡkōnnee Tiimootee nín nyánní ni-cee ki fātī bāańee, u cáań-ti faawiimōnti ni-fookiiu nì ni-neendi pu. U máafi-ti yii ni tétí ti-pu múl̄mul̄ mmōntiimin ki nyàab̄ kí bàà ká-ti kii ti mun nín nyàab̄ kí ká ni mun puee.
- ⁷Mín̄ puee nnabiyaamu, ni-puee ti kāntí kunyannyaau ti-falaabi kōkō poon, ni-fookiiu di tī-ti dipōōsōḡkil.
- ⁸Dín̄ pu nee timbi ḡmátī ní, kun puee ni gbínti ki bí ti-Dindaan ni ki ḡúb an píkí.
- ⁹Dipōōpiḡkpaandi din ti cáá ni-pu ki fāal̄ Unimbōti nimiinee, taa ti nyí gba ti nín dàá pākà-u kí gbèēn̄ miḡyee.
- ¹⁰Ti mèè ki páb̄-u ḡwiin̄ pu nì kunyeeu yii ú péēyàntī tí gítī ká-ni an nín dàá ḡá pu ní kun naa cááyee tí tī-ni ní dūú gbèēn̄ ni-fookiiu puee.
- ¹¹Ti-Baa Unimbōti u-ba nì ti-Dindaan Yeesu n̄ ḡāḡkì ti-saḡḡu tí ḡmā kí dāá ká-ni.
- ¹²Ti-Dindaan n̄ yàntī dineendi din ni cáá tōb pu nì binib kōkō puee n̄ wíin̄ ní mòtī nīn nēēn̄ tōb mín̄ tikpil̄ kí nīn péēcāá cá, án̄ nīn bí kii ti mun nín nēēn̄-ni puee.
- ¹³Ú yàntī ni-pōbiliḡ n̄ nīn tókó ibaamōn pu an nīn pōō, kí nīn bí circir bí taa ká ni-pu ikpiti iba ti-Baa Unimbōti nimiin ḡyunti ḡun ti-Dindaan Yeesu yaa láā gítín̄ nì bin kōkō sá u-yabee.

1 Teesaalooniiki 4

- ¹Kí kúntí tibōtee, nnabiyaamu, ti dākā-ni min ní ni máań kí nīn cōom̄ Unimbōti n̄ nīn fáatī ni-bōtee. Ibaamōn, ni bí cōom̄ min fáatī Unimbōtee, ama ti dū ti-Dindaan Yeesu ki gbāam̄-ni yii ní nīn gbínti ki ḡaań min jítin̄ mimmee ki cá.
- ²Ni nyí ti nín nìn dākā-ni tibōti tin ti-Dindaan Yeesu yindi puee.
- ³Unimbōti nín là kunyee di sá ní nīn bí circir kí nīn ḡúb ni-ba kí taa ḡá tilaakpaal.
- ⁴Ni-kansikin báa ḡma nimpucaatam n̄ nīn sá circir ki cáá tinyool,
- ⁵kí taa dū ni-ba kí tī ajōkōntuun kii bin kaa nyí Unimbōtee nín ḡaań puee.

⁶Tiboti nee poonee ni-kansikin ubo ń taa ńá u-nabiki min kaa kítèeyaaa kí taa mùl-u. Ti nìn tükū-ni an bōti dooooyee ki gítī kpáafi-ni-tì tiŋan yii ti-Dindaan dāá dāá dáal bin ńáán an kpitiyee tafaliŋ,

⁷kun puee Unimbōti kaa yíín-ti tí dāá nīn bí tijokōndi poon, ama u yíín-ti tí dāá nīn sá circirdambi ní.

⁸An puee un di yaa dū ti-dàkatam nee ki féé, an kaa sá unil bōti ní u fá, ama Unimbōti un tī-ni u-Circir Fāmee bōti ní u fá.

⁹An yaa kíh ni nì ni-nabiyaamu kansikin neendee, an kaa ti bàlfī yii tí ńmà-ni an pu gba, kun puee Unimbōti dākā-ni ni nín máàn kí nīn nēén tōb puee.

¹⁰An neendee gba ní ni cáá nnabiyaamu mun kōkō bí Maseeduaan tiŋki kōkōnee pu. Ama ti bàlfī-ni yii ní gítī ńá min jíitìh min ni nìn ńáán dooooyee.

¹¹Ní pōòh ni-ba kí nīn bímaan ńgbansōŋfi poon kí nīn tūh atuun kí kpíih ni-ba, kii ti nín nìn péētükū-ni dooooyee puee.

¹²Ni yaa ńá mimmee, an di dāá yàntī bin kaa nyí Unimbōtee ń nīn tó-ni, ní naa báká ubo pu.

¹³Nnabiyaamu, ti là yii ní nīn nyí bin kpíyee bōti nín dāá jíitī puee mbaamōmin. Taa là ní nīn bí kunimbaaun kii bin kaa cáá ti-Dindaan pu dimákalee nín bí puee.

¹⁴Kun puee ti nyí yii Yeesu kpíi ki fātīi fikitī, mīh ní ti nyí yii Unimbōti dāá fātīi tí gíihni bin nōó Yeesu ki kpíyee dimaŋfalin kii u nín fikitī Yeesu puee.

¹⁵Ní pīlfi ti-Dindaan bōti tin u nìn sōòhee ní ti dāá sōòh-ni nee. Ti-Dindaan yaa láā bāánee, timbi bin dāá bí dimaŋfalinee kaa làá dāá péeh bin kpíyee kí lintī.

¹⁶Di sá yii ti-Dindaan u-ba dāá dāá pō kinyokō ní itūun kpiliu ń téeh ní Unimbōti kantāndi ń búh, niinee ní ti-Dindaan ń nyānni yilpu kí sintīh, ní bin fōō-u ki kíi ki kpíyee ń péé péé kí fikitī.

¹⁷Ní timbi bin dāá kíh kaa kpíyee mun ń yīki kí kūtī bi-pu ní án yòòh-ti kutaa pu tí tūŋki ti-Dindaan atagban ni, ní ti nì ti-Dindaan ń nīn kíh ki bí baabadal.

¹⁸Ní dū tiboti nee kí nīn cáá sōŋkīmaan tōb pōbiliŋ.

1 Teesaalooniiki 5

¹Nnabiyaamu, an kaa ti bàlfī yii tí ńmà kí tükū-ni iyunti in ní an bōtee dāá bànee,

²kun puee nimbi ni-ba ni nyí ti-Dindaan dāantam bōti tiŋan yii u dāá bàh kii unaayuu nín dōòh kunyeeu puee ní.

³Dyunti ńun binib yaa láā bí ki lì yii: “Dgbansōŋfi, ti ńmátī dee”, dicilpu kpalaa niin ní nnaabu ń jēetī bi-pu kí nāān-bi. Bāà ubo kaa dāa ńmátī, an dāa bí kii imatiŋween nín bàh upōdaan puee ní.

- ⁴Ama nimbee, nnabiyaamu, naa ti bí dibombòndin ñwiin gbanti ñ dāá túuñ-ni kii unaayuu nín tūntí binib puee.
- ⁵Di sá yii nimbi kòkò sá ñwalfi biyaamu ní ki bí ñwiiñ pu, naa sá kunyeeu yabaaa kaa sá dibombòndi yab.
- ⁶Mín puee tí taa nín gèèñ kii bin kíñee nín gèèñ puee, ama timbi ñ fintí kí nín ñúb ti-ba.
- ⁷Kunyeeu ní bin gèèñee gèèñ, ní bin nyù ki gbèèyee nyù kunyeeu.
- ⁸Ama timbi bin sá ñwalfin yabee, ti máań kí nín ñúb ti-ba tiñan, ti máań kí dū ti-fookiiu nì ti-neendi kí dūú pèēñ kii digbampòolee ní, ní kí dū ti-fiil din pu ti mákée kí cíkiń kii kifuuliyee,
- ⁹kun puee Unimbòti kaa lēē-ti ki yóon tí nín sá bin pu u dàá dāá fōō diñjuulee, ama tí nín sá bin dàá ká difiil ti-Dindaan Yeesu Kriisitoo puee.
- ¹⁰Kun puee ùñ di kpíi ti-pu an nín dàá ñá pu báà ti yaa láā bí dimañfalinaaan, ti yaa láā kpíiyaaa, u yaa láā gítíñee ti nì u ñ kpāfi kí nín bí mbaantiiminee.
- ¹¹Mín puee ní nín tiimaan tób kunyannyaau ki kútí tób mpòn kii ni nín péēñáań puee.
- ¹²Nnabiyaamu, ti mēé-ni yii ní nín tó bin bí ni-kansikin ki tūñ ditundi, ki cáá ti-Dindaan bòti ki dākà-ni, ki kpòotí-nee.
- ¹³Nín cáamaan bi-pu dineeñkpaandi atuun ñin bi bí ni-kansikin ki tūñee pu, ñgbansoñfi ñ nín bí ni-kansikin.
- ¹⁴Ti mēé-ni, nnabiyaamu, yii ní kpāafi biwutijoodambee, kí tī bifaantidambee kunyannyaau, kí tūtuñ bin wunti yōtèe, kí nín cáá kimotii báà ñma pu,
- ¹⁵kí nín nyíñ ni-ba a-juti yaa ñá-si ikpítee, á taa dū ikpiti kí téen-u, ama nín nyàabmaan tiñan diñal baabadal ki ñáań ni-jutiibi nì binib kòkò.
- ¹⁶Ní nín fāalmaan baabadal,
- ¹⁷kí nín mēé Unimbòti múlmul.
- ¹⁸Báà tin kamaa di yaa péēbāańee, ní nín jáań Unimbòti. Min Unimbòti là bin sá Yeesu Kriisitoo yabee ñ nín bée dee.
- ¹⁹Ní taa kpò Unimbòti Fām tuuñi ni-ni,
- ²⁰kí taa kpèè Unimbòti bōnaatiliibi bōti tin bi sòońee fam.
- ²¹Ama, ní kpèè tiwan kòkò kí lēētín ñāńee,
- ²²kí nín nyíñ ni-ba nì tikpitil kòkò nì ti-bul.
- ²³Unimbòti un tii ñgbansoñfee u-ba ñ yàntí ní dū ni-ba kòkò kí tī-u, ú ñúb ni-fām nì ni-nammu nì ni-wunti kòkò an nín dàá ñá pu ti-Dindaan Yeesu Kriisitoo bāntamee ní nín bí circir bí taa láā ká ni-pu ikpiti ibee.

²⁴Un yíín-nee dàá ɲá mín kí tī-ni kun puee u sá ibaamɔndaan ní.

²⁵Nnabiyaamu, ní nīn mée ki tì-ti.

²⁶Ní jāam ti-yab nì kunabitiiu jaamii kí tī-mi.

²⁷Nì ti-Dindaan yindi puee, m tükù-ni yii ní dūmaan takalda nee kí kààn nnabiyaamu kòkò nimiin.

²⁸Ti-Dindaan Yeesu Kriisitoo ɲanti ń nīn bí ni-pu.

2 Teesaalooniiki

2 Teesaalooniiki 1

¹Man Pɔɔl nì Siilaasi nì Tiimootee di ηmān takalda nee kí tī nimbi Kriisitoo nikitil din bí Teesaalooniiki ki sá ti-Baa Unimbɔti nì ti-Dindaan Yeesu Kriisitoo yabee.

²Unimbɔti ti-Baa nì ti-Dindaan Yeesu Kriisitoo n̄ ηá-ni tɪŋan kí tī-ni ηgbansɔŋfi.

³Nnabiyaamu, ti ηmānti kí n̄n jáam Unimbɔti ni-pu múmul. An lafun máan mín kun puee ni-fookiiu mòtī wīntí ki cá, ní dineendi din ni cáá tɔb puee mun mòtī wīntí.

⁴Nimbi pu ní timbi mòɔn Unimbɔti nikitɪŋ cee, ni n̄n gbínti ki pɔɔntí ki ηúb ni-fookiiu falaabi kɔkɔ n̄ agín ηin poon ni bée.

⁵Mín di dàkà Unimbɔti bɔsooni n̄n bí deedeē miŋyee, kun puee an di dàá yàntī ní ηmā kí kó Unimbɔti beel din pu ni bí ki j̄n falaayee.

⁶Kun puee Unimbɔti sá deedeedaan ní, falaa ní u dàá dāá gín̄ kí tēn̄ bin yàntī ni j̄n falaayee,

⁷ní kí kàān nimbi bin j̄n falaayee n̄ timbi nsɔŋfin ηyunti ηun ti-Dindaan Yeesu yaa láā nyánní yilpu n̄ u-tūuni ipɔndambee.

⁸U dàá dāān n̄ ηηmi kí dáal̄ bin kaa nyí Unimbɔti, kaa f̄ɔ̄ ti-Dindaan Yeesu bɔmɔntiitee tafaliŋ.

⁹Bi-tafadaaldi di dāa sá bí n̄āān-bi kí n̄n cá jaanjaan bí taa n̄n dàbiñ ti-Dindaan n̄ u-nyooti n̄ u-pɔŋŋu.

¹⁰Daliŋkin u yaa gítin̄ bin sá u-yabee cee bí tī-u tinyoolee n̄ bin kɔkɔ f̄ɔ̄-u ki kíyee n̄ pàkà-uee, ni mun dāa bí niin kun puee ni f̄ɔ̄ ti-bɔti tin ti sòon̄ n̄ nee ki kíí.

¹¹An puee ti mèé Unimbɔti ni-pu baabadal ki bàlfī yii ú yàntī ní n̄n sá binib bin máan dimaŋfal din pu u yíin̄-nee, ki mèé-u yii u-pɔŋŋu n̄ yàntī ní ηmā kí ηá tɪŋan tin ni dàkafi kí h̄ee, kí yàntī ni-fookiiu tuuŋŋi n̄ còom̄ mmɔntiim,

¹²an n̄n dàá ηá pu ni-puee ti-Dindaan Yeesu Kriisitoo yindi n̄ ká tinyoolee, ní ú mun puee ni mun n̄ ká tinyool n̄ ti-Nimbɔtiu n̄ ti-Dindaan Yeesu Kriisitoo ηanti pu.

2 Teesaalooniiki 2

¹⁻²Nnabiyaamu, an yaa sá ti-Dindaan Yeesu Kriisitoo gítintam kí dāá kóon̄-ti kí kpāfi u-ceeyee bɔtee, ti mèé-ni yii ní taa yàntī ni-pɔbiliŋ n̄ b̄il̄ binib n̄n l̄i yii ti-Dindaan gbanti p̄tī kpáāā bāānee pu. Báa ubɔ di yaa bí yii Circir Fām di sòon̄ n̄ uaaa, ubɔ di yaa tí b̄i sòon̄ Unimbɔti bɔti ní ki l̄i mimmaaan, an yaa tí sá ubɔ di t̄kū-ni yii ti-takaldab bin ti ηm̄e ubɔ poon ní ti ηmān̄ mimmaaan, ní taa f̄ɔ̄ kí kíí.

³Ní taa péeyàntī ubɔ n̄ dī tiba pu kí ηm̄at̄n̄-ni. See binib n̄ dāá fá Unimbɔti ní utɔŋfiti un ti-Dindaan dàá dāá n̄āānee n̄ nyā kí j̄i mpaan, kí wàatī ní ti-Dindaan wiŋŋu n̄ n̄n b̄ān̄.

⁴Utɔŋfitee kaa dāa kíikí binib ń nóó Unimbɔtaaa, kaa dāa kíikí bí jāam̄ tiba nì tiba. U dāa dāa yíí kí mōti mín ní kí tin kpáā kó kí kǎl̄ Kunimbɔtidiin ní kí dū u-ba kí gíin̄ Unimbɔti.

⁵Naa tétí yii m nín nìn dāá bí ni-ceeyee, m nìn tükū-ni an ɔtaaa?

⁶Ama tiba di dāá ḡúb-u ní an ɔtee kaa láá bí ḡáaḡ kɔŋkɔnnee. Ni mun nyí kudɔŋu kun dāá ḡúb-uee. An puee, see utɔŋfitee yuntiŋu yaa láā bāaḡee ní ú nín nyā kí jī mpaan.

⁷U-pɔŋŋu bí dibalin ki bí tūn ditundi dooooyee, ama un ḡúb-uee yaa láā búntèe,

⁸niinee ní utɔŋfitee ń nyā, ní ti-Dindaan ń dāá púfí-u ní ú kpú, ní u-dāantam nín dāa jīl̄ puee ń nāaḡ-u.

⁹Utɔŋfitee dāa dāa dāaḡ nì Sitaan pɔŋŋu ní ki ḡáaḡ maamaacib kɔkɔ nì tidaandi nì tinyimɔŋkpaŋkpaḡtiil,

¹⁰ní ki dāa cáá tin péésá ikpítee ki kíil̄ bin wáŋkèe kun puee bi yíi kaa nééḡ ibaam̄on in bàà ḡūn̄ kí fī-bee.

¹¹An pu ní Unimbɔti dū mɔŋon ḡun dāá yàntí bí gáatée ki tīin̄-bi an nín dāa ḡá pu bí nīn nóó tinyimɔmbɔtee.

¹²Mín puee Unimbɔti dāa dāa dāal̄ bin yíi kaa fōō ibaam̄on ki kíí ki nééḡ ikpítee tafaliŋ.

¹³Nnabiyaamu, ti dāa nīn péējāaḡ Unimbɔti ni-pu ní baabadal, nimbi bin ti-Dindaan nééḡee, kun puee Unimbɔti péé ki lútí-ni ki fī-ni nì u-Fām min yānti ni kpánti u-yabee nì ni nín fōō ibaam̄on ki kí puee.

¹⁴Mín pu ní Unimbɔti dī tibɔmɔntiil tin ti sòon̄ nì ni nee pu ki yíin̄-ni ní nīn cáá ti-Dindaan Yeesu Kriisitoo nyooti.

¹⁵Mín puee nnabiyaamu, tibɔti tin ti cáaḡ ki dākà-ni nee ní nīn ḡúb-ti an píki, an yaa sá tin ti sòon̄ kinyɔkɔneeyaaa, an yaa tí sá tin ti ḡmāḡ-neeyaaa, ní kpāafimaan-ti tiŋan.

¹⁶Ti-Dindaan Yeesu Kriisitoo u-ba nì ti-Baa Unimbɔti un nééḡ-ti ki ḡá-ti tiŋan ki tī-ti dipɔɔɔŋkil̄ din kaa cáá dikuntilee nì dimákamɔntiilee,

¹⁷ń gbéèḡ ni-pɔbiliŋ kunyannyaau kí tī-ni mɔŋon ní ḡmā kí nīn ḡáaḡ tin ḡāḡee ni-tuuŋŋi nì ni-bɔsoontam poon.

2 Teesaalooniiki 3

¹Nnabiyaamu, m-bɔjoolkaati sèe: ní nīn mée ti-pu an nín dāa ḡá pu Unimbɔti ɔti ń gbítí kí bà ntimu poon malaa malaa, kí nīn cáá tinyool kii an nín ḡá ni-cee miŋyee.

²Ní mée ti-pu an nín dāa ḡá pu Unimbɔti ń nyāntí-ti binikpitib nì bitɔŋfitiibi ḡaane, kun puee an kaa sá binib kɔkɔ di fòol̄ Unimbɔti ɔti ki kíikí.

- ³Ama ti-Dindaan sá ibaamɔndaan ní, u dàá yàntī ní nīn ɣúb an pɔ̄ɔ, kí mɔ̄tì ni-pu Sitaan ukpiti ń taa ɣmā-ni.
- ⁴Ti-Dindaan puee ti cáá ni-pu dimákal ki béè mbaamɔn yii tin ti dàkā-nee ni bí ɣáán mín, ki dàá nīn gbíntì ki ɣáán ki cá.
- ⁵Ti-Dindaan ń yàntī ní béé ni-pɔbiliɣ poon Unimbɔti neendi nì Kriisitoo nín tì kimɔtii kínyee.
- ⁶Nnabiyaamu, nì ti-Dindaan Yeesu Kriisitoo yindi puee, ní gàntīmaan nnabiyaamu mun di sá biwutijoodambi kaa là kí ɣá min ní ti dàkà-nee.
- ⁷Nimbi ni-ba nyí ni nín máàn kí fɔ̄ɔ min timbi ɣáánee, kun puee ti nín nìn bí ni-ceeyee taa nìn sá biwutijoodambi.
- ⁸Taa dómín ki ká ubɔ pu u kpīntí-ti fam, ama kí taa nīn ká ubɔ pu udaan ń nīn kpīntí-tee puee, ti nìn tūn ditundí ní, ɣwīn pu nì kunyeeu ki gì.
- ⁹Ti nín nìn bí ki ɣáán mimmee an kaa sá yii taa nìn cáá nsan kí fɔ̄ɔ ni-jikaati, ama ti ɣá mín ki dàkā-ni ní fɔ̄ɔ min timbi ɣáánee ní.
- ¹⁰Di sá ti nín nìn bí ni-ceeyee, ti nìn tükū-ni tibɔti tiba, yii un kaa là kí tɔ ditundee kaa máàn kí jī mun.
- ¹¹Kun puee ti gbīl yii ni-kansikin biba sá biwutijoodambi ki ká kaa ɣáán diba ní ki càn bi-ba ki kōntí bi-jutiibi bɔtin.
- ¹²Nì ti-Dindaan Yeesu Kriisitoo yindi puee, ti tükū ki kpáafí an nibee yii bí tɔ ditundi nì dipɔɔsɔŋkil poon kí kpīn bi-ba.
- ¹³Ama nimbee, nnabiyaamu, ní taa yàntī tiŋan diŋal.
- ¹⁴Un di yaa kaa tɔ tibɔti tin ti ɣmān-ni takalda nee poonee, ní dáán-u, ni nì u ń taa ti nīn nɔtí, icoo ń kó-u.
- ¹⁵Ní taa nín dū-u kí kpántí ni-nannanliu, ama ní sǎŋkì-u kii unil nín sǎŋkí u-nabiki tibɔti puee.
- ¹⁶Ti-Dindaan un tì ɣgbansɔŋfee u-ba ń tī-ni ɣgbansɔŋfi ɣyunti kamaa nì tikɔkɔ poon. Ti-Dindaan ń nīn bí ni-kɔkɔ cee.
- ¹⁷Ijaam nee, man Pɔ̄l m-ba ɣal di ɣmān. M-takaldab kɔkɔ poonee m nín nyiitī m-ɣal puee dee, kpèèmaan m-ɣmaŋmabiti dee.
- ¹⁸Ti-Dindaan Yeesu Kriisitoo ɣanti ń nīn bí ni-kɔkɔ pu.

1 Tiimootee

1 Tiimootee 1

- ¹Man Pɔɔl, un sá Yeesu Kriisitoo kpambal din Unimbɔti ti-Fiiliu nì Yeesu Kriisitoo un pu ti mákée túnnée,
- ²di ñmàñ takalda nee kí tī sii Tiimootee un sá m-ba bindi pu jipɔɔn a nín fɔɔ Yeesu Kriisitoo ki kíyee puee. Ti-Baa Unimbɔti nì ti-Dindaan Yeesu Kriisitoo n̄ ñá-si tiñan, kí sɔ a-saai, kí tī-si ñgbansɔñfi.
- ³Dyunti ñun m dàá n̄n yīki kí n̄n cá Maseeduaanee, m n̄n tükū-si yii á n̄n k̄a Efeesi kí piñ bin bí niin ki dākà tinyimɔmbɔtee nsan bí taa ti dākà. Á n̄n ñáań m̄n,
- ⁴ki dākà-bi bí taa n̄n k̄a ki máafi mmaam ki k̄ań atĩkpikiyin ñin kaa dótée. An c̄abiñ kunikpɔñkpɔkɔu, kaa tútuñ unil n̄ bée Unimbɔti n̄n yóon puee: an dākà yii tí fɔɔ-u kí k̄í.
- ⁵Kun pu ní a kpáafi-bi mimmee di sá a là bí n̄n cáá dineendi din nyēñ dipɔɔnyaandinee ní, bi-landɔkɔjaatiñu n̄ n̄n sá mm̄nti bi-fookiiu n̄ n̄n bá ki pɔɔ.
- ⁶Biba dū an sanñuee ki fá, ní ki cūti ki kó tibɔfan tin kaa cáá taapuee ni.
- ⁷Bi bàà là kí n̄n dākà binib Unimbɔti marab, ama n̄n min kɔkɔ bi dākà n̄n mpɔnee, b̄in biba kaa gb̄laaa kaa nyí tibɔti tin bi sòon̄ee taapu.
- ⁸Ti nyí yii marab sá tiwamm̄ntiil ní, a yaa dū marab gbanti ki ñá min sá á dūu ñée.
- ⁹Ti nyí yii an kaa sá binim̄ntiibi pu ní bi yóon marab, an sá bin gáatée, n̄n bin yiliñ pɔɔyee, n̄n bin kaa tó Unimbɔtee, n̄n bikpitiñaliibi, n̄n binib bin kaa là Unimbɔtee, n̄n bin bíil Unimbɔti wantee, n̄n bin kù bi-baabi n̄n bi-nabee, n̄n binikp̄liibi,
- ¹⁰n̄n bin ñáań tilaakpaalee, n̄n bin dò n̄n bi-ninajutiibee, n̄n bin nyáfi binibee, n̄n binyim̄ndambi, n̄n bin p̄t̄i fam famee, n̄n bin kɔkɔ ñáań tin jáa n̄n ibaam̄on b̄oti tin bi dākà-tee pu ní bi yóon marab.
- ¹¹Tinyool Nimbɔtiu un bí mm̄nnee b̄m̄ntiiti tin u dū ki ñá m-ñaaanee poon ní tin m sòon̄ ki tī-ni nee k̄a.
- ¹²M jáań ti-Dindaan Yeesu Kriisitoo un di tī-mi mp̄on ki cáá m-pu dimákal yii m̄ ñá u-tundee.
- ¹³N̄n min kɔkɔ m n̄n sòon̄ u-pu min kaa k̄t̄ee ki s̄antí u-yab ki wób-bee, Unimbɔti sún m-saai, kun puee maa n̄n fɔɔ Yeesu ki k̄í, kaa n̄n nyí yii m bí ȳnt̄i.
- ¹⁴Ti-Dindaan ñá-mi tiñan tikpil ki ȳnt̄i m fɔɔ ki k̄í, ní ki tī-mi dineendi din nyēñ Yeesu Kriisitoo ceeyee.
- ¹⁵Tibɔti nee sá mbaam̄on ní ki máań báa ñma n̄ fɔɔ-ti kí k̄í mm̄ntiimin; di sá yii Yeesu Kriisitoo dóm̄iñ duulnya nee ni kí f̄i binikpitib, binikpitibee kansikinee man di sá unikpitikpaan.

¹⁶Ama ní Unimbɔti sún m-saai ki yāntì Yeesu Kriisitoo dī man unikpitikpaan pu ki dākā u-mɔtiiki nín wīkí min bulfee, án nīn sá kudaanḡu kí tī bin dàá dāá fṣṣ-u kí kīí fool boon kí ká mmaḡfafɔkɔn ḡun kaa kúntée.

¹⁷An puee, bí pàkà kí nyṵḡkì Ubɔti un bí jaanjaan kaa kùù, baa wālfì-uee. Ún baba di sá Unimbɔti, kí nīn cá abin abin! Ameen.

¹⁸Sii m-biki Tiimootee, m dū tibɔti nee ki ḡá a-ḡaan. Kii Unimbɔti bɔnaatiliibi nín nīn sòṵn min a-pu ki yóṵn dooooyee, á tókɔn bi nín nīn sòṵn puee pu kí já kujamontiiu,

¹⁹kí nīn gbíntì ki ḡúb tin a fṣṣ ki kííyee kí nīn cáá nlandɔkɔmɔnti. Biba fá nlandɔkɔmɔnti ní bi-fookiiu ḡá fam.

²⁰Ti kántí binib gbanti kansikinee Imeenee nì Aleeksandi, bin m dū ki tī Sitaan an nín dàá ḡá pu án cíñ-bi bí béé kí taa nīn ḡítí sòṵn ki bííl Unimbɔtee.

1 Tiimootee 2

¹Tibɔpeepeekaal tin m kpáafi bí ḡée di sá bí nīn mèé ki gbàam̄ ki jáam̄ Unimbɔti binib kɔkɔ pu.

²Bí nīn mèé bibɔtiibi nì biyidambi kɔkɔ pu, an nín dàá ḡá pu tiba n̄ taa páb-ti, tí nīn bí nsɔḡfin kí nīn nóó Unimbɔti mmontiiimin kí lafun nīn sá binimontiiibee.

³Á mèè kí tī binibee ḡāñ Unimbɔti ti-Fiiliu cee,

⁴kun puee u là yii binib kɔkɔ n̄ ká difiil kí béé ibaam̄n.

⁵Di sá yii Unimbɔti sá ubaanti, ní ugbaamil un yú timbi binib nì Unimbɔti kansikinee mun sá ubaanti, ùn di sá Yeesu Kriisitoo un kpánti unilee.

⁶Dyunti bāañ ní u dū u-ba ki tī ki pāñ ti-kɔkɔ pu ki fṣṣ-ti ki líì. U ḡá mín ki dākā yii Unimbɔti là binib kɔkɔ n̄ ká difiil.

⁷Ní Unimbɔti dū-mi ki ḡá un sòṵn u-bɔtee nì u-kpambal, m̄ nīn dākà bin kaa sá Juuda yabee u-bɔti tin sá ibaam̄nee bí fṣṣ kí kīí. Tin m l̄i nee sá ibaam̄n ní maa móntí.

⁸An puee, m là yii, báà laakiḡyee, bininjab n̄ yòṵn bi-ḡalii yilpu kí nīn mèé, bi-pɔbiliḡ poon n̄ nīn bí circir, bí taa nīn cáá diḡuul nì kunikpɔḡkpɔkɔu.

⁹M là yii binimpoobi mun n̄ nīn pèntí tiwan min kítèe, kí taa nīn nyāantí bi-ba ki ḡítí lákatí, kí taa nīn dākà bi-ba, bi-yikpiboobitam n̄ taa nīn nyēēmbamin, bí taa nīn cáá sindaariya nì abeedimbil wanti ki nyāantí bi-ba, kí taa nīn pèntí tiwan tin pṵṵ kudaauuee,

¹⁰ama bí nīn tūn atumm̄nti ḡin máañ binimpoobi bin bí yii bi nóó Unimbɔtee tuuḡḡi.

¹¹Bi yaa bí dākà Unimbɔti bɔtee, binimpoobi n̄ s̄ntí bi-ba taapu kí nīn ḡmí.

¹²Maa pūn nsan yii binimpoobi n̄ nīn dākà bininjab, kí taa nīn wòb̄ bininjab, bi máañ kí nīn k̄a soooo.

¹³Di sá yii Adam ní Unimbɔti péé péé ki náañ, boonee ní ki nín náañ Eefa mun.

¹⁴An kaa tí sá Adam ní Sitaan ɲmātiɲ, u-nimpuu ní Sitaan ɲmātiɲ, ní u yīntì Unimbɔti marau.

¹⁵Ama ní u-maalɲu puee, u yaa gbínti kɪ pɔ̄ɔntí u-fookiiu poon nì dineendi kɪ nīn bí circir kɪ taa nīn dākà u-bee, u dàá dāá ká difiil.

1 Tiimootee 3

¹Tibɔti tin m dàá sòònee sá ibaamɔn ní: di sá yii unil un là kɪ nīn kpòotí Kriisitoo nikitilee lēē ditummɔntiil.

²An máaɲ bí taa ká un kpòotí Kriisitoo nikitilee pu tikpitiil tiba. Ú nīn cáá unimpubaanti, kɪ ɲúb u-ba, kɪ nīn cáá iciin, kɪ nīn sá unimɔnti, kɪ nīn fòol binicambi, kɪ nīn ɲūn kɪ dākà binib Unimbɔti bɔti.

³Ú taa nīn sá udanyɔl nì kilkil niliu, ama ú nīn sá unil un mōee, kɪ taa nīn cáá kunikpɔɲkpɔkɔu kɪ taa nīn néen animil tikpil.

⁴U máaɲ kɪ ɲmā kɪ kpòotí u-ba dicaɲku tiɲan, kɪ yàntí u-biyaamu n̄ nīn tó-u kɪ cáá tibulcin,

⁵kun puee unil yaa kaa ɲūn kɪ kpòotí u-ba dicaɲku tiɲanee, mana ní u dàá ɲmā kɪ kpòotí Unimbɔti nikitil?

⁶Udaan n̄ taa nīn sá un fɔ̄ɔ Yeesu kɪ kɪí mpɔmee, an yaa sá fam, u dù kɪ ɲá dilambil, ní kɪ kó Unimbɔti bɔtin kii Sitaan nín kó puee.

⁷Bin kaa nóó Unimbɔtee mun máaɲ kɪ nīn nyí udaan pu yii u sá unimɔnti, an nín dàá ɲá pu bí taa nīn kpèé-u fam, ú taa láá jēetí Sitaan talintinee.

⁸Mín mbaantiimin, bin tútuɲ Kriisitoo nikitil kansikin ditundee máaɲ kɪ nīn cáá mbimbimɔntiim, kɪ taa nīn bí mili mili, kɪ taa nīn gbèè ndaam, kɪ taa dī isaɲkpiti pu kɪ nyàab animil.

⁹Bi máaɲ kɪ nīn ɲúb Unimbɔti saɲɲu ɲun nìn bí dibalin u nyántì kɪ dākā-tee nì dípɔɔbaantiil.

¹⁰Kí wàatí bí lēē-bee, bí cɔ̄ɲkɪ kɪ kpèè bi-bimbim nín bí puee, bi yaa kaa ká bi-pu tibee, ní bí ɲmā kɪ nīn sá bin tútuɲ Kriisitoo nikitil kansikin ditundee.

¹¹Mín mbaantiim, binimpoobi mun máaɲ kɪ nīn cáá mbimbimɔntiim, kɪ taa nīn sòòn kɪ bíil binib, kɪ nīn ɲúb bi-ba, kɪ nīn bí deedee tikɔkɔ nì tikɔkɔ poon.

¹²Bin tútuɲ Kriisitoo nikitil kansikin ditundee máaɲ kɪ nīn cáá unimpu ubɔ ubɔ, ní kɪ ɲmā kɪ kpòotí bi-biyaamu nì bi-dicaɲɲi mmɔntiimin.

¹³Bi yaa tūn bi-tuɲɲi mmɔntiiminee, binib tó-bi ní, ní bi sòòn Yeesu Kriisitoo bɔti, kaa gùgufi kpataaa.

¹⁴M dá láá ɲmān-si takalda nee kɪ máká yii an kaa làá ti yúntí m dàá dāān a-cee.

¹⁵M yaa kaa tí ɲún ki dómiń malaayaaa, takalda nee ɲūn kí tūtuń-si á bée a nín máań kí nīn bí min Unimbɔti dican̄ku poonee, an dākà yii Unimbɔti un kaa kúyee nikitil dín sá kii jaantalku ki tíkí ibaamōnee.

¹⁶Tiɲman, dinimbɔtinool ɔti tin nīn bí dibalin Unimbɔti nyánti ki dākā-tee sá tiwan̄kpaandi ní! Yeesu kpánti unil ní ki dómiń ti-cee, Unimbɔti Fām dākā yii u sá deedeedaan, Unimbɔti tūuni ká-u. Bi sòōn u-pu atimbun kōkōn, kitiɲ pu nib fōō-u ki kíkí ní Unimbɔti yōōn-u ki jóm̄ yilpu tinyool lan̄ki.

1 Tiimootee 4

¹Unimbɔti Fām lī ki cánti yii, iyuntijoolkaa poonee, binib biba dàá dāá fá nnimbɔtisan ní ki kín̄ ki tó arasiniibi bin kiil̄ binibee, ní ki nók bi-dakatam.

²Mpoonnyoondambi bin móntí binib, bi-pɔbiliɲ t̄ilfèe, di dàá dāá yánti bí gáatí,

³ní kí dāá nīn yíití yii an kaa ɲān̄ unil ń cáá unimpu, ní ki kòó tijn̄ tiba, tijaal tin Unimbɔti nyánti yii bin fōō Yeesu ki kíkí ki nyí ibaamōn kōkōee ń mēe kí jāam̄ Unimbɔti ní kí jēe.

⁴Tin kōkō Unimbɔti náanee ɲān̄ ní, tiba kaa sá tí dūú fá; tí fōō tin kōkō bée kí jāam̄ Unimbɔti.

⁵Unimbɔti ɔti nì ɲwimmeem yánti tijn̄ ń kpántí timontiil ní u-nimiin.

⁶A yaa dū tibɔti nee ki dākā ti-nabiyaamuee, a kpántí Yeesu Kriisitoo tontōmmontiu, ní ki cáá nnimbɔtisan ɔti nì didakamontiil dín a nók tiɲanee ki kp̄intí a-ba.

⁷Á fá mmaam min nyáń mi-ba nì nnimbɔtisan ɔti ki sá tibɔfanee, kí pōōn̄ a-ba kí mōtí nók Unimbɔti mbaamōmin.

⁸A yaa sán̄ ki kp̄atí a-giini, an tūtuń-si fiii, ama á nók Unimbɔti mmontiiminee di tūtuń-si tikōkō poon, kun puee an pōontí-si diman̄fal kōɲkōnee ki kp̄aan̄ fool boon.

⁹Tibɔti nee di sá ibaamōn ki máań báà ɲma ń fōō-ti kíkí.

¹⁰Kun pu ti tūn̄ ditundi ki ḡi ki bí kujaau poonee di sá ti dū ti-mákal ki ɲá Unimbɔti un kaa kúyee ni, Unimbɔti un fiil̄ binib kōkōee: kí cánté, bin fōō Yeesu ki kíyee ní an sá.

¹¹Á dākà binib tibɔti nee kōkō kí yánti bí ɲá mín̄.

¹²Á taa yánti bí kp̄èe kí s̄iɲkiń-si yii a nín sá kinaacimpōmbikee pu, ama nīn sá un bin fōō Yeesu ki kíyee nín dàá nīn kp̄éé un ki ɲáań min a ɲáanee, kí fōō a-sòontam nì a-bimbim nì a-neendi nì a-fookiiu nì a-circir bitam.

¹³Kí wàatí m̄ nín dāanee, á nīn kàań Unimbɔti takaldau binib cee, kí nīn sòōn̄ ki t̄i-bi kunyannyaau, ki dākà-bi Unimbɔti ɔti.

¹⁴Mpōn̄ ɲun Unimbɔti nīn pú-si ɲyunti ɲun u-Fām nīn yánti u-bōnaatiliibi sòōn̄ a-pu, Kriisitoo nikitil kp̄ilib dū bi-ɲalii ki pāań a-puee, ɲu bí a-ni, á dū-ɲu kí ɲá ditundi.

¹⁵Á taa gbīlīn ditundi gbanti, á dū a-ba kəkə kí kúntí di-poon, an nín dàá ǵá pu báà ǵma ń ká a nín cá nyəkəpu miŋyee.

¹⁶Á nīn nyí nì a-ba bítam nì tin a dākèe, kí cúú an píkí. A yaa lafun ǵá mīn, a dàá fī a-ba, kí kpáàā fī bin pílfin-see mun.

1 Tiimootee 5

¹Á taa wòòn utikpil mpən, á sòòn nì u soooo kii a-baayee, kí nīn sòòn nì binaacimpombi kii a-naalibee,

²kí nīn sòòn nì binimpukpaambi kii a-nabee, nì binimpusapombi kii a-niisalibee, kí taa ǵá tijəkəndi báà fīi.

³Á nīn ǵúb bikpiipoobi bin kaa cáá báà ubə nì ubəee kí nīn tó-bi.

⁴Ama ukpiipu ubə yaa cáá mbiyaamu, an yaa tí sá u-naantiibaaa, bīn di máàn kí béé nnimbətisan tundi bi-ba dicaŋku poon kí wàatī ní kí ǵúb bi-nab nì bi-naambi kí téen; min fáatī Unimbotee dee.

⁵Unimpu un yaa lafun sá ukpiipu, kaa cáá ubə ń kpèè-uee dù u-mákal kí ǵá Unimbətin ní, kí mèé kí gbàaŋ Unimbəti ǵwiin pu nì kunyeeu.

⁶An yaa sá ukpiipu un ǵáań min kaa kítèe, u bí dimaŋfalin ama ní kí kpíi.

⁷Tin tin a máàn kí dūú dākà-bee dee, an nín dàá ǵá pu ubə ń taa ká ikpiti iba bi-puee.

⁸Un kaa ǵúb u-dicaŋku tiŋanee, m lì kí bántí u-diiku poon nib kíŋŋ ní, mimmee u fá nnimbətisan, ní bin kaa nóó Yeesuee só nì u.

⁹Bí taa ǵmà ukpiipu ubə yindi kí kūtī bikpiipoobi takaldau poon, asee ukpiipu un yaa cáá abin jíti abin imuŋku ita puee baba. Kí wàatēe, ú nīn sá un nīn món uninjabaantee,

¹⁰kí nīn sá unimpu un bi pàkà yii u tūn atummənti kí ǵún kí ǵúb u-biyaamu tiŋan, kí fòol binicambi mməntiimin, kí fíntí Unimbəti nib taarj,^fc^ kí tútuñ bifalaadambi, kí péēǵáań atummənti ǵmaniŋmee.

¹¹An yaa sá bikpiipusapombi, bí taa ǵmà bi-yiŋŋi takalda poon, kun puee nninjaneel ǵūn kí cúú-bi bí dū Kriisitoo kí fá, kí cùú mōn,

¹²ní kí kó Unimbəti bətin, kun puee bi nín nīn pōon yii bi dàá ǵá miŋyee, baa ti ǵún kí ǵá.

¹³An bí mimmee, ní bi néen kí bīl bi-yuntiŋu, kí yiin acin kəkən. Tin gítī púntèe di sá bi kíń kí cáá kubəcaau ní kí sòòn icoo bəti, nì tin tin kaa bàà máàn bí sòonee.

¹⁴An pu ní m là yii bikpiipoobi bin dáá pòonee ń mōn kí màal mbiyaamu kí nīn kpèe bi-ciŋŋi, an nín dàá ǵá pu bí taa pō unannanli nsan bí sòòn kí bīl-tee.

¹⁵Kun puee bikpiipoobi biba pūti kpáàā dū nsammənti kí fá, kí kíń kí nóó Sitaan.

- ¹⁶Uninja kii unimpu di yaa n'ó Yeesu ní ki cáá bikpiipoobi u-dumpuee, u máàn kí tūtuñ-bi, kí taa dū ditúndi gbanti kí tūn Kriisitoo nikitil, an nín dàá ñá pu Kriisitoo nikitilee ñ ñmā kí nīn tūtuñ bikpiipoobi bin kaa péēcáá báà ubo ñi uboee.
- ¹⁷Bin kpòotī Kriisitoo nikitil mmòntiiminee máàn kupampakau mili pu, cilinjee, bin pu m sòoñee di sá bin p'òntí ki sòoñ Unimb'oti b'oti ki d'akà muee.
- ¹⁸Di sá Unimb'oti takaldau poon lī yii: “Á taa bóob unaa un tà ki gbátí adibilee ny'ok'o” ní ki gítí lī yii: “Utònt'oni máàn u-paati.”
- ¹⁹Ubo yaa d'omiñ ki t'ukū-si yii bin kpòotī Kriisitoo nikitilee ubo ñá tibe, á taa f'òó kí k'í, see binib bili kii bita di yaa ká ní ki t'ukū-si.
- ²⁰Á nīn w'òoñ bin ñáań ikp'itee binib k'ok'o nimiin, an nín dàá ñá pu bin kíñee ñ f'anj'èe.
- ²¹M kp'áafí-si Unimb'oti ñi Yeesu Kriisitoo ñi Unimb'oti tūuni in u lútèe nimiin, yii á ñ'úb t'ib'oti tin m sòoñ ñi si nee kí taa nīn cáá dinig'antil, kí taa l'ēēbiba kí nīn ñáań b'ín t'ijan.
- ²²Á taa ñá kujinjikilaapaau kí dū a-ñalii kí páań ubo pu kí m'èè u-pu kí t'ī-u ditundi diba Kriisitoo nikitil kansikin, kí taa k'ó biba kp'itii ni. Nīn nyí ñi a-ba kí nīn bí circir.
- ²³Á taa ti nīn nyù nnyim ñmaniñma, nīn nyù ndamam f'iii ipooñween ñi a-wunti nín ny'àngf'í múlmulee pu.
- ²⁴Bi w'alf'í biba kp'itii kí w'at'í gba ní kí nín sòoñ bidambi b'oti, ama bibee, ib'osoon poon ní bi d'āa nín b'it'í b'ín kp'itii pu.
- ²⁵M'ín ní bi tí k'ántí atumm'onti mun; ñin ní baa k'ántí malaayee gba mun kp'á kí gb'íntí dibalin.

1 Tiimootee 6

- ¹Iyumbu máàn kí nīn t'ó i-dindambi ñi i-p'obiliñ k'ok'o, an nín dàá ñá pu binib ñ taa sòoñ kí b'it'í Unimb'oti yindi ñi t'ib'oti tin ti d'ak'èe.
- ²Iyumbu in dindambi n'óó Kriisitooyee, í taa kp'èè-bi fam, yii bi nín sá i-nabiyaamuee pu, m'ín gba ní i máàn kí nīn tūñ ditundi mmòntiimin, kun puee bin i tūñ ditundi ki t'iyee sá i-nabineeñkaamu mun n'óó Kriisitooyee ní. Min a máàn kí nīn d'akà binib ki kp'áafí-bee s'èé.
- ³Ubo yaa b'ī d'akà tinyim'omb'oti tiba, ki y'ī, kaa n'óó ti-Dindaan Yeesu Kriisitoo baam'omb'oti ñi bi nín d'akā-ti unil nín máàn kí nīn bí min Unimb'oti nimiinee,
- ⁴udaan lámintí, kaa nyí tiba, ki b'ūñ t'ib'oti weeni ní ki kp'ákà any'òobun pu. An di c'āab'ín nnimidiki, kuj'aa, asiibil, ñi iland'ok'ok'piti bi-jutiibi pu.
- ⁵Baa ti d'ak'af'í nnim'ontiyaamin, baa ti nyí ibaam'ón, ki kp'ākantí t'òb, an kaa k'úntí. Bi nyí kii nnimb'otisan sá laakin bi dàá d'ī kí ká tigaajatee ní.
- ⁶T'ijman, nnimb'otisan lafun sá tigaajakpaandi ní, ñyunti ñun tin a cááyee yaa m'òñ-see.

- ⁷Ti dómiń duulnya nee ni nì iṅaṅkulim ní, mìn ní ti dàá dāá fātī tí gítí nì iṅaṅkulim.
- ⁸Mìn puee, ti yaa cáá kun ti dàá jēe nì kun ti dàá pèēēe, án ḡmàntīn-tee.
- ⁹Ama bin nimiliṅ mán tigaajati puee dàá kó icōṅkin kí lítí, ní nnimitaataam tiwan tikpil pu min kaa cáá taapu ki cāabiń diwaṅkilee sātī-bi kii kutaliṅpuee, an di téekí binib ki cān asaluun ki nàantí-bi,
- ¹⁰kun puee nnimineel di cāabiń mbusub kōkō. Biba nín nēēn animil puee, bi dū nnimbōtisan ki fá ki dū bi-ba ki kōn diniminaamandin tikpil.
- ¹¹Ama sii Unimbōti niliu, nyā tīn kōkōn, kí nyāab kí nīn bí deedeē, kí ḡúb dinimbōtinool, kí nīn cáá fookii kí nīn cáá dineendi nì kimōtii, kí nīn mō.
- ¹²Á já kujamōntiiu kí nīn nōó nnimbōtisan, kí cúú mmaṅfāfōkōn ḡun kaa kúntēe, ḡun pu ní Unimbōti yīiń-si á béé-ḡu ḡyunti ḡun a nīn sōōn a nín fōō tibōmōntiilee ki kíi miṅyee kunipaau nimiinee.
- ¹³Unimbōti un tīi tiwan kōkō dimaṅfalee nimiin, nì Yeesu Kriisitoo un nīn sōōn ibaamōn Pōnsi Piilati cee mmōntiimee mun nimiin ní m kpāafí-si.
- ¹⁴Á kpèè tibōti tin m ḡúbiń-si nee tiṅan kí taa yìntī, kí nīn cí ḡyunti ḡun ti-Dindaan Yeesu Kriisitoo dàá dāá páannēe.
- ¹⁵ḡyunti ḡun Unimbōti yōōneē yaa láā bāānēe, ní ú yàntī Yeesu n páanní, Unimbōti un baba sá ukpaan, tiba kaa lóotí-uee, bibōtiibi kōkō Bōtiu nì bidindambi kōkō Dindaan,
- ¹⁶un baba di kaa kúyēe, ki kōò ḡwalfi ḡun ubō kaa ḡūn kí sūtí kí pīlēe ni, báà ubō kaa láá ká-u, ubō mun tí kpá kí ká-u, ún di máan tinyool nì mṗōn kí nīn cá jaanjaan! Ameen.
- ¹⁷Á kpāafi bin cáá tigaajati duulnya nee nee yii bí taa nīn cáá dilambil kí taa nīn māká bi-gaajati pu, kun puee tì ḡūn kí fu dōó fool. Ama bí dū bi-mākal kí ḡá Unimbōti un di pūn-ti tikōkō nì tikōkō tikpil gbib tí nīn bí mmōnnee.
- ¹⁸Bí nīn ḡáań tiṅan, bi-gaajawanti nín wīkí puee, bi-tummōntiṅi n nīn wīkí mìn, bí nīn cáá tiniti ki yàkatī tin bi cááyee nì bin kínee.
- ¹⁹Bi yaa ḡá mimmee, bi kōōntí tigaajamōntiil tin kaa bíiīlee án nīn dō ki cí-bi fool boon dee, ní bí ḡmā kí ká ibaamōn maṅfal.
- ²⁰Sii Tiimootee, kpāafi tin Unimbōti tī-see tiṅan, kí ḡóntí tibōfan tin kaa nāań nì nnimbōtisaneē, kí taa cēēn a-nyōkō bin bí yii bi cáá iciin kin kaa cááyee nikpōṅkpōkōku poon.
- ²¹Di sá biba nīn bí yii bīn di nyí dinyil gbanti ní ki dāa dū nnimbōtisan ki fá. Kriisitoo ḡanti n nīn bí ni-pu.

2 Tiimootee

2 Tiimootee 1

- ¹Man Pɔɔl di ɲmàñ takalda nee, man un Unimbɔti là m̄ n̄n sá Yeesu Kriisitoo kpambal ki sòòn dimaɲfal din u p̄sòñ Yeesu Kriisitoo tì bin f̄s̄-u ki kííyee bɔtee.
- ²M ɲmàñ takalda nee ki t̄i sii Tiimootee m-bineeɲkaaki. Ti-Baa Unimbɔti n̄ ti-Dindaan Yeesu Kriisitoo ń ɲá-si tiɲan, kí s̄o a-saai, kí t̄i-si ɲgbansɔɲfi.
- ³M jáam̄ Unimbɔti un m n̄óó n̄ dipɔɔm̄ontiil, kii m-naanjab mun n̄n n̄n n̄óó-u puee. M jáam̄-u tikpil ɲyunti ɲun m t̄et̄í a-pu ki m̄éé múlmul ɲwiín pu n̄ kunyeeuee.
- ⁴Di sá yii m t̄et̄í a-nyinnyim pu, ki mò ki nyàab̄ kí ká-si, m-pɔbil ń p̄īl.
- ⁵M dáá gb̄nt̄i ki nyí fookiibaam̄on un a cáá Yeesu puee, fookii un a-naan Loowiisi n̄ a-na Eeniisi n̄n péē cááyee, m nyí n̄ ibaam̄on yii a mun cáá fookii gbanti.
- ⁶An pu ní m t̄et̄í-si yii á mòt̄í nyàat̄i m̄p̄on ɲun Unimbɔti t̄i-si ɲyunti ɲun m d̄u m-ɲalii ki páān a-pu a f̄s̄yee.
- ⁷Kun puee Unimbɔti n̄n t̄i-ti Df̄am̄ miɲyee kaa sá Df̄am̄ min t̄i tifaandee ama an sá Df̄am̄ min t̄i m̄p̄on, n̄ dineendi kí yànt̄i á ɲm̄a kí ɲúb a-bee ní.
- ⁸M̄in puee á taa n̄n cáá icoo kí sòòn ti-Dindaan pu, kí taa n̄n cáá icoo man mun pu, n̄ min k̄ok̄o m sá usarkadaan ti-Dindaan puee. Ama tibɔm̄ontiil puee á j̄i falaa un man b̄i j̄iñee n̄ Unimbɔti p̄ɲɲu.
- ⁹Ún di f̄i-ti ní ki d̄u-ti ki kpánt̄i u-yab, an kaa sá atuun aba ní ti ɲá ní u f̄i-ti, an sá ún u-ba di l̄ēk̄í ɲá-ti tiɲan gbanti doooo jaanjaan Yeesu Kriisitoo pu.
- ¹⁰Kɔɲkɔñnee u nyánt̄i u-ɲanti gbanti mpaampiin pu ɲyunti ɲun ti-Fiiliu Yeesu Kriisitoo d̄ómiñee. Ún di d̄ómiñ ki kúnt̄i ɲkúm p̄ɲɲu, ní ki cáān dimaɲfal din kaa kúnt̄éé tibɔm̄ontiil tin u cáānee pu.
- ¹¹An b̄om̄ontiiti gbanti ní Unimbɔti d̄u ki ɲúb̄iñ-mi m̄ n̄n sá u-kpambal ki báakí tibɔtee ki d̄ak̄à-t̄i binib.
- ¹²An pu ní m b̄i j̄iñ falaa un m j̄iñ nee. Ama an kaa cáá-mi icoo, kun puee m nyí un m f̄s̄ ki kííyee n̄n sá uɲyee, m̄in ní m nyí yii u cáá m̄p̄on kí kp̄aafi tin u ɲúb̄iñ-mee kí d̄áá s̄ā u-gítintam dal.
- ¹³Á n̄n ɲúb̄i ibaam̄on b̄oti tin m sòòn ki t̄uk̄ù-see, kí n̄n sòòn-t̄i kii a n̄n gb̄ī-t̄i m-cee puee, kí n̄n cáá fookii n̄ dineendi ti n̄n ɲá ubaanti n̄ Yeesu Kriisitoo puee,
- ¹⁴á kp̄aafi tibɔm̄ontiil tin Unimbɔti ɲúb̄iñ-see n̄ u-F̄am̄ min k̄òd̄ ti-nee t̄utuntam pu.
- ¹⁵Kii a n̄n nyí puee, bin k̄ok̄o sá Asiiyee d̄u-mi ki fá ki kp̄āān Fiijeel n̄ Eem̄oogeni.
- ¹⁶Ti-Dindaan ń s̄o Òneesiiƒɔɔr dicaɲku saai, kun puee u n̄n ɲm̄ēnt̄i-mi múlmul, kaa cáá man usarkadaan pu icoo.
- ¹⁷Ali gba u n̄n d̄ómiñ Roomee, u nyàab̄-mi n̄ diniminaam̄andi, ní ki tin ká-mi.

¹⁸Ti-Dindaan gítintam dalee, ú dāá yàntī Ōneesiifōor n̄ dāá ká disaasol u-nimiin. Tin kòkò u n̄á ki tī-mi Eefeesi tiŋkinee, a nyí ki jítìn báà ŋma.

2 Tiimootee 2

¹Mìn puee sii man biki, póòn a-ba n̄ tiŋan tin ti ká ti n̄ Yeesu Kriisitoo n̄n n̄á ubaanti puee.

²A n̄n gbìl m sòon tin diniwul nimiinee, dū-tì kí n̄ubiñ binib bin yú deedeeyee ki n̄n̄ ki dākèe, bí mun n̄ n̄n̄ dākà bin kínee.

³Jī falaa man yam kii Yeesu Kriisitoo soojamontiuee.

⁴Sooja un là kí tō ditundi kí fáatí u-kpiliuee kaa ti yì u-ba kí n̄á kii bifantantiibi n̄n̄ tó bi-ba kí n̄áan̄ miŋyee.

⁵Kí wàatī un cūti ditaatandi kpaŋkpakantikuuee n̄ ŋmā kí s̄an̄ kí jītí bin kínee pu kí n̄n̄ sá upeepeekaa kí f̄ōō tipaalee, see ú n̄n̄ sán̄ ki táá n̄ kpaŋkpakantiku marau.

⁶Ukpaal un di kùn̄ u-saaku n̄ digiñdee di dāa tí sá upeepeekaa kí lēēñ tijin u-saakun.

⁷Á dākafi tiboti tin m sòonee pu, kun puee ti-Dindaan dāá tūtuñ-si á gbìl ti-taapu kòkò.

⁸Á téetí Yeesu Kriisitoo un fikiti ditaŋkpiilinee pu, ki sá Dafidi naantiiu kii tibomontiil tin m sòonee n̄n̄ tükū-ti puee.

⁹Tibomontiil gbanti sòontam pu ní m bí ki jīn̄ falaa bi bóob-mi n̄ ikusaka kii m sá unikpatee, ama baa bóob Unimboti bōti tīn̄.

¹⁰An pu ní m ŋmèe tikòkò an n̄n̄ dāá n̄á pu bin Unimboti lútèe n̄ ŋmā kí ká difiil din bí Yeesu Kriisitoonee, n̄ tinyool tin dāá n̄n̄ bí jaanjaanee.

¹¹Tiboti tin m dāá sòonee sá ibaamōn̄ ní: “Ti yaa kp̄i ki dī-uee, see ti n̄ u n̄ dāá n̄n̄ tí bí dimaŋfalin,

¹²ti yaa póòn ki tin kátì-kuee, ti n̄ u di dāa tí jīn̄ dibeel, ti yaa n̄eē yii taa nyí-u, ú mun dāá dāá n̄eē yii waa nyí-ti,

¹³ti yaa kaa yúliñ-u deedee, ún̄ dāá n̄n̄ yú deedee, kun puee waa n̄n̄ kí n̄eē kí kpántí u-deedeebitam.”

¹⁴Á téetí bi-kòkò kí tükù-bi yii n̄ Unimboti pu, bí taa n̄n̄ kpākantí tōb anyoobun aba pu, an n̄kpōŋkpòkòkuee kaa cāabiñ tiŋan see an bíil̄ bin p̄l̄f̄ee ní.

¹⁵Póòn a-ba Unimboti n̄ ká-si kii utōntōnli un tuuŋŋi kaa cāabiñ icooyee, kí sòon̄ ibaamōn̄ bōmōntiitee n̄n̄ sá puee deedee.

¹⁶Taa cēēn̄ a-nyòkò tibofan n̄kpōŋkpòkòku tin nyán̄ tiba n̄ Yeesu Kriisitoo bōti tin a f̄ōōyee, di sá bin n̄úb an bōtee mòtī gáatí Unimboti nimiin̄ ní.

¹⁷Binib gbanti dākatam bí kii mbuunee ní ki ŋmòò ki lòtī tiwun. Imeenee n̄ Fiileeti mun bí binib gbanti kansikin.

¹⁸Bi nyán ibaamɔn saŋɔ poon ki yānti bi-jutiibi bin fɔ̄s̄ Yeesu ki kíyee fá bi-fookiiu bi nín li yii dooooyee ní bitaŋkpiibi fikitèe pu.

¹⁹Ama nì mín kəkəe, Unimbɔti bɔnyeel din u dū ki tíl taapuee péēpɔ̄s̄ ní ki yú dilan̄ki, an bɔnyeelee di sá yii: “Ti-Dindaan nyí bin sá u-yabee,” ní “Un kamaa nyí yii u sá ti-Dindaan yɔuee máań kí fá ikpiti.”

²⁰Diciŋkpaandinee an kaa sá sindaariya nì animil kúti booŋɔi baba di bí, ama aboon ŋin bi máń nì kuyəkəuee nì itúun mun bí. Sindaariya nì animil kúti booŋɔi yú ki cí iwiŋkpaan dal ní, ní itúun nì aboon ŋin bi máń nì kuyəkəuee sá báa ŋma n̄ n̄n cáa ŋáań min u lèe.

²¹Un yaa fá ikpiti in bɔti m sòoŋee kpánti umɔnti dee ki sá kii sindaariya booŋɔi ŋin yú ki cí iwiŋkpaanee, kun puee u bí ki t̄i u-kpiliu an kəkə pu ú dū-u kí ŋá atummɔnti.

²²Á fá tinaacimɔn landəkəkpitii kí nyàab deedeebitam nì fookii nì dineendi nì ŋgbansɔŋfi sii nì bin kəkə pɔbiliŋ p̄iń bi jáań ti-Dindaanee.

²³Kí fá fam fam nikpɔŋkpəkəku kun sá tibɔfanee, kun puee sii a-ba nyí yii an nikpɔŋkpəkəuee péékúnti nì kujaa ŋma ní.

²⁴An mun kaa máań yii ti-Dindaan tɔntɔnliu nì binib n̄ n̄n jáa, ama u máań kí n̄n néeń báa ŋma, kí n̄n ŋūn ki dākà binib nì kimɔtii.

²⁵U máań kí n̄n sá unil un mōee kí ŋmā kí dākà bin kpākantí-uee, an yaa yî Unimbɔti táa yànti bí kpánti bi-bimbim kí ŋmā kí bée ibaamɔn,

²⁶kí gítin̄ nsammɔnti poon kí ŋmátí Sitaan taliŋku kun sàl̄-bi ki yānti bi ŋáań min u lèe.

2 Tiimootee 3

¹Á n̄n nyí yii iyuntijoolkaa poonee an dàa dāa pɔ̄kì.

²Di sá yii binib dāa k̄in̄ ki cáa ikummunti, ní ki néeń animil, ní ki gà bi-biŋɔi, ki cáa alambil, ki sòoń ki bíil̄ Unimbɔti, kaa tó bi-baabi nì bi-nab, kaa dāa nyí tiŋan, kaa tó tin bí circiree.

³Baa dāa cáa dineendi, kaa dāa sūn̄ binib saai, ki dāa kúŋfi binib boon, kaa ŋūn̄ kí cúu bi-ba, ki dāa sá bitɔŋfitiibi, ki dāa ná tin ŋānee.

⁴Bi dāa sá bin nyēēbinib boon ki nyáfi-bee, bi dāa sá binib bin an yòontée, ki dāa néeń timɔn, ki dāa néeń tin fáatí-bee ki jítiń Unimbɔti.

⁵Bi dāa ŋúb̄ nnimbɔtisan bɔti ní kí yí kaa là mbaamɔn pɔŋɔ ŋun bí tibɔti gbanti poonee. Á fá an nibe.

⁶Bi-kansikin̄ biba kóò binimpoobi bin landəkəi pátí bi ŋáań ikpiti ki cáa kədeebi kupaauee dumpui ní ki yànti bi fòol̄ tin bi sòoŋee ki kííkí.

⁷An nimpoobee pílfí tibɔti ní baabadal, ama doooo kii nee baa ŋūn̄ kí bée ibaamɔn.

- ⁸Kii Jaaneesi nì Jambree nín kaa nìn là Mooisi bōti puee, mìn mbaantiim ní an nibece kaa là ibaamōn, an sá binib bin landōkōi gábitèe, baa nóó Unimbōti.
- ⁹Ama baa làá nīn bí kí cù ndan, kun puee báà ŋma dàá dāá béé bi-pu yii bi sá bigbaambi ali kii Jaaneesi nì Jambree cee nín nìn jíti puee.
- ¹⁰Ama sii ká m-dàkatam, m-bimbim, m-landōkōi nì m-fookiiu, m-mōtiiki, m-neendi nì m-póòntam
- ¹¹nì bi nín páb-mi puee, nì m-falaau. A nyí tin nìn jíti m-pu Antiyōsi nì Ikoonium nì Liistee, falaa ulou ní maa jíin niin? Ama ti-Dindaan nyánti-mi tikōkō poon.
- ¹²Di sá yii bin di yaa fōō Yeesu Kriisitoo ki kíi ki là kí nīn yú deedee Unimbōti nimiinee see bidambi n ká digìndi.
- ¹³Ama bitōŋfitiibi nì bikiilliibee dàá nīn mòtīi m̀l ki kóò tin kaa ŋānee poon ní baabadal, bi wāŋkì, ní ki bíi kíil bi-jutiibi mun n wāŋkì.
- ¹⁴Mìn puee, sii n ḡúb tibōti tin a bífi ki fōō ki kíi tiŋanee kun puee sii nyí bin di dākā-si an bōtee.
- ¹⁵Doouo a-biyatin ní a péēnyí Unimbōti takaldau poon bōti, an di ḡūh kí tī-si iciin in cañ unil difiilinee nì fookii un a cáá Yeesu Kriisitoo puee.
- ¹⁶Unimbōti di yānti bi ḡmān tibōti gbanti kōkō ki sá bí dūú dākà binib n béé ibaamōn, kí dākà unil yintitam, kí kpòotī-u, kí dākà unil n béé deedee bimbim,
- ¹⁷an nín dàá ḡá pu kí bóntí Unimbōti niliu mmōntiimin ú kítí kí ḡá atummōnti kōkōee.

2 Tiimootee 4

- ¹Unimbōti nì Yeesu Kriisitoo un dàá sòon bin wālee nì bitaŋkpiibi bōtee, nì u-dāantam nì u-beel puee,
- ²á sòon Unimbōti bōti, báà ḡyunti yaa pōōyaaa ḡu yaa pòfàaa, á nīn péēcō tibōti gbanti pu, kí dākà binib bi-yintitam kí wòon-bi bi-kpitii pu; kí tī-bi kunyannyaau. Á nīn cáá kimōtii tikpil a-dàkatam poon.
- ³Kun puee iyunti iba dòon binib kaa dāa gítī là kí pīlfi ibaamōn dākatam, ama ní ki dāa nōotí bīn bi-ba nín fáati miŋyee ní ki dāa kpáfí bidakaliibi kupaau bi-cee, ní bīn dākà-bi tin bi là kí nīn pīlfée.
- ⁴Baa dāa gítī là kí pīlfi ibaamōn, see bitiŋkpikib nín nìn ḡáaán tiŋyee ní bi dāa néeñ ki pīlí.
- ⁵Ama sii n ḡúb a-ba an kōkō ní kí ḡmèè falaa kí tō a-tundi din sá tibōmōntiil sòontamee; ḡá ditundi din sá Unimbōti tōntōnliu tundee.
- ⁶Ama an yaa kíh mamee, ḡyunti bāaán m dū m-ba kí ḡá saraa, man kúm yuntiḡu bāaán.
- ⁷M ján kujamōntiiu, m sán ki bàñ ditaatandi kúntilaŋki ki gbínti ki ḡúb m-fookiiu.

⁸Koḡkōnnee dijajil paati tin bi tì deedeedambee dō ki cí-mi. Ti-Dindaan un sá ibaamōn bōsoonliuee di dàá dāá tī-mi-tì ḡwiin dal, an kaa dāa sá man baba ní u dàá tī, ama bin bin kōkō néeh ki cí u-gítintamee.

⁹Á pōōn kí dāān m-cee malaa,

¹⁰di sá yii Deemasi dū-mi ki fá ki búntì Teesaalooniiki kun puee u néeh duulnya un poon ti bí nee tikpil. Kriiseensi búntì Gaalaati, ní Tiiti mun búntì Dalmasii.

¹¹Luuki baba di péēkìñ m-cee. A yaa dòoḡee, á kpáañní-mi Maarki kí cáañ-mi, kun puee u ḡññ kí dāá tūtuñ-mi m-tundi poon.

¹²M dū Tiisiiki ki tú Efeesi.

¹³A yaa dòoḡee, á taa súntí kí kpáañní-mi m-bōkutifōkōl din m nìn yāntìñ Troowasi tìḡkin Karpusi ceeyee, kí kpáañní-mi m-takaldab, cilinjee takaldab bin sá tigbanee.

¹⁴Ucaa Aleeksandi ḡá-mi inikpiti tikpil, ti-Dindaan dàá dāá pà-u atuun ḡin u ḡee paati.

¹⁵A mun ḡ nīn nyīñ-u, kun puee u nìn yī kpataaa kaa là tibōti tin ti sōoḡee.

¹⁶Bi nín péé péé ki cúú-mi ki cáá ibōsoonee, báà ubō kaa yúl m-boon, bi-kōkō dū-mi ki fá ní. Unimbōti ḡ taa dū kí ḡá-bi tibōti.

¹⁷Ama ti-Dindaan yúl m-boon ki tī-mi mpōn m ḡún ki sōōñ Unimbōti bōti mmōntiimin ki yāntì bin kaa sá Juuda yabee kōkō gbīl tibōti gbanti, ní m nyáñ gbikinti nyōkōn.

¹⁸Ti-Dindaan dàá nīn péēnyāntí-mi tibōkpitiil kamaa poon mín ní kí dāá cáá-mi kí kōñ yilpu beelin nì alaafiya. Úñ di sá tinyooldaan kí nīn péē cá jaanjaan! Ameen.

¹⁹Á jāām Prisiil nì Akilaasi nì Ōneesiifōor dicaḡku.

²⁰Eerasti gbíntì Kōranti ní Troofiim būñ m yāntì u gbíntì Miilee.

²¹Á pōōn a-ba kí bàñ-mi kí wàatī tiwool yuntiḡu ḡ nín bàñ. Eebulusi nì Pudansi nì Liinusi nì Kloodia nì nnabiyaamu kōkō jáaḡ-si.

²²Ti-Dindaan ḡ nīn bí a-cee. Unimbōti ḡanti ḡ nīn bí ni-pu.

Tiiti

Tiiti 1

- ¹Man Pɔɔl un sá Unimbɔti tɔntɔnliu ki sá Yeesu Kriisitoo kpambalee di ηmàñ takalda nee kí tī sii Tiiti. Ún di túnní-mi m yàntī bin Unimbɔti lúti bí nīn sá u-yabee n fɔɔ-u kí kíí, kí béé nnimbɔtisan baamɔni,
- ²ní bí ηmā kí nīn kíñ ki máká mmanɣafɔkɔn ηun kaa cáá dikuntilee pu. Doooo jaanjaan ní Unimbɔti un kaa móntée pɔɔn yii u dàá tī-ti dimanɣfal gbanti.
- ³Dyunti bāañee, ní ti-Fiiliu Unimbɔti dī u-nyɔɔbundi pu ki nyánti tin u nīn pɔɔneee ki dākā-ti. Dinyɔɔbundee di sá din u ηúbiñ-mi ki bí yii m nīn sòonee.
- ⁴Sii Tiiti un kpánti m-ba bindi pu jipɔɔn ti-kɔkɔ nín fɔɔ Yeesu ki kííyee puee ní m ηmàñ takalda nee kí tī. Ti-Baa Unimbɔti nì Yeesu Kriisitoo ti-Fiiliu n ηá-si tiñan, kí tī-si ηgbansɔñfi.
- ⁵M yánti-si Kreeti tiñkin yii á púntí kí bóntí ditundi din kíñ niinee, kí kaañ bikpilib Kriisitoo nikitij kansikin kitiñ sá kamaa poon, kii m nín nīn péé tükū-si puee.
- ⁶Kriisitoo nikitil kpiliu máañ bí taa ká u-pu ibɔkpiti iba, kí nīn cáá unimpubaanti, u-biyaamu n nīn sá bin fɔɔ Yeesu ki kíí ki sá mun pu binib kaa sòon yii mu-bimbim kaa ηāñ, muua tó binibee.
- ⁷Di sá yii un kpòotī Kriisitoo nikitilee tundi di sá ú nīn kpéé Unimbɔti tundi n còom, an puee waa máañ bí ká u-pu ikpiti iba, ú taa nīn sá ulambidaan nì uñuudaan nì udanyɔgbil, kí taa nīn sá kílkil niliu nì un dī isanɣpiti pu ki kántí animilee.
- ⁸Ama ú nīn fòol binicambi tiñan, kí nīn nééñ tin ηāñee, kí nīn cáá iciin, kí nīn bí deedee ki sá circir, kí nīn ηūn ki ηúb u-ba.
- ⁹U máañ kí nīn kpáafi tibɔñmanee án píki kii bi nín dākā-ti puee, an nín dàá ηá pu ú ηmā kí nīn cáá tibɔñman gbantee ki tii binib kunyannyaauuee, kí kpááa dākà bin mun kaa là tibɔti gbantee bi-yìntitamee.
- ¹⁰Di sá yii binib tikpil bí ki gáatì ki cáá tibɔfan ki kííl binib, bin péeyi diyilee di sá Juuda yab kansikin biba.
- ¹¹Á pìiñ-bi nsan bí taa ti sòon, kun puee bi dākà tin kaa máañ bí dākèe, ki bííl adicammɔn, ki dī icoo sani mín kí ηmā kí ká animil.
- ¹²Bi-bɔnaatiliu ubɔ, u sá ukreetija di nīn lī yii: “Kreeti tiñki yab péésá binyimɔndambi ní, ki cáá ntoom kii ipecuncutee, ki sá biwutijoodambi, ki sá bipoofub.”
- ¹³Kijapaayee nín lī puee, waa mónti. An puee, á kpìiñ-bi tiñan an nín dàá ηá pu bi-fookiiu n nīn sá ibaamɔn yɔuee,
- ¹⁴bí yànti titiñkpikibɔti tin Juuda yab cáá ki máafée, nì binib bin fá ibaamɔn sañju ki yɔon bíñ bi-ba marabee bɔti.

¹⁵Binib bin bí circiree, tikòkò sá circir ní ki tī-bi, ama bin kaa fōō Yeesu ki kí ki kó tijòkòndee, tiba kpá ki bí bín cee circir, kun puee bi-landòkoi nì bi-ciini kó tijòkòndi.

¹⁶Bi gà bi-biŋŋi yii bi nyí Unimbòti, ní bi-tuuŋŋi ŋin bi ŋáaŋee dākà yii baa nyí-u. Bi sá bikpitib ní ki gáati, kaa ŋūn kí ŋá ditummòntiil báà diba.

Tiiti 2

¹Ama sii n̄ dākà tibòŋman kii tì nín sá puee,

²kí tükù bijaŋkpilib n̄ ŋúb bi-ba binib n̄ n̄n tó-bi, bí n̄n cáá iciin, bi-neendi nì bi-mòtiiki nì bi-fookiiu n̄ n̄n pōō.

³Mìn ní kí tükù binimpucikitikaabee yii bi-bimbim n̄ n̄n sá binib bin bí circiree bimbim. Baa máaŋ kí n̄n sòòŋ ki bííl binib, kí taa n̄n sá ndaam yumbui; ama bí n̄n sá bin tì isaŋkimòntee,

⁴an nín dàá ŋá pu bí ŋmā kí dākà binimpupòmbèe bí béé bi nín máaŋ kí n̄n nééŋ bi-calib nì bi-biyaamu miŋyee,

⁵kí n̄n cáá iciin kí n̄n ŋúb bi-ba, kí n̄n nyí kudii poon tundi tiŋan, kí n̄n sá bilaŋŋfitiibi, kí n̄n tó bi-calib, binib n̄ taa ká bi-pu ikpiti iba kí n̄n cáá sòòŋ ki bííl Unimbòti bòti.

⁶Mìn mbaantiim, á sàŋkì binaacimpòmbi yii tikòkò poonee bí n̄n cáá mbimbimòntiim.

⁷Sii a-ba n̄ ŋá atummònti kí dākà báà ŋma bí mun n̄ n̄n ŋáaŋ mìn, a-dàkatam n̄ n̄n sá mbaamòŋ ki kítì.

⁸Á n̄n sòòŋ anyòòbummònti ŋin pu baa ŋūn kí kpákaŋ-see, ní icoo n̄ cúú ti-nannanliibi, kun puee baa làá ká ti-pu ikpiti iba kí sòòŋ.

⁹Á sàŋkì iyumbu í n̄n tó i-dindambi tikòkò poon, kí n̄n ŋáaŋ tin ŋān i-dindambi ceeyee, kí taa n̄n l̄ min kaa fáati-bee.

¹⁰Í taa yò i-dindambi wanti báà tiba, ama i máaŋ kí n̄n dākà i-deedeebitam mmòntiimin iyunti kòkò, kí ŋmā kí tī Unimbòti ti-Fiiliu bòti tin bi dākèe tinyool an kòkò pu.

¹¹Unimbòti ŋanti tin cáaŋ binib kòkò difiilee nyáŋ mpaampiin pu.

¹²U-ŋantee di dākà-ti tí fá ti-bimbikpitim nì duulnya doo nimitaataam, ŋyunti ŋun poon ti bí nee, tí ŋmā kí n̄n ŋúb ti-ba, kí n̄n bí deedee ki nòó Unimbòti mmòntiimin,

¹³kí n̄n cí dipòòpindi wiŋŋu ŋun pu ti còté, ŋwiin ŋun ni Yeesu Kriisitoo, ti-Nimbòtiu un sá-ti upkaan ki sá-ti ufiilee, dàá dāá nyánti u-nyootee.

¹⁴Ūn di dū u-ba ki tī ki dá-ti ki nyánti ikpiti kòkò poon, ní ki dū-ti ki kpánti dinikitil din sá ūn baba yal, ki bí circir, ki cáá difaŋgiil, ki ŋáaŋ atummòntee.

¹⁵A nín máaŋ kí dākà miŋyee dee, kí tī-bi kunyannyaau, kí kp̄iñ-bi nì mpòŋ, kí taa yànti ubò n̄ kpèè kí s̄ŋkiñ-si.

Tiiti 3

¹Á téetí-bi yii bi máań kí sɪntɪn bi-ba kí tɪ bɪkpilib bin sá gɔmina nì biyidambee, bí nɪn tó-bi, ki yáb atummɔnti kɔkɔ pu.

²Bí taa nɪn sòon ki bííl binib, kí nɪn sá ŋgbansɔŋfɪ nib, kí nɪn ŋáań tiŋan, kí nɪn mɔ baa ŋma cee.

³Kun puee, doooyee ti mun nɪn sá bin kaa nyí tibee, ní kaa nɪn tó Unimbɔti, ki yɪntɪ, ní ti-nimitaataam nì min ti fáatèe nɪn cúú-ti kuyunɔ. Ti nɪn cáa ntoom nì inimidiki, ki ná ti-jutiibi ní bí mun ná-ti.

⁴Ama Unimbɔti ti-Fiiliu dákā-ti tiŋan nì dineendi din u cáa timbi binib puee,

⁵ki fɪ-ti, kaa sá yii ti ŋá atunnyaan aba, an sá isaa ní u sún ti-pu. Bi nɪn fùul-ti Unimbɔti nyim puee di dákà min u-Fām fātɪ ki māl-ti mpɔm ki tɪ-ti dimaŋfapɔndi diŋyee.

⁶Yeesu Kriisitoo ti-Fiiliu puee, Unimbɔti tɪɪn-ti u-Fām tikpil tikpil,

⁷tí ŋmā kí kpántí deededambi Unimbɔti nimiin u-ŋanti pu, kí fɔɔ dimaŋfal din pu ti máká, dàá cáá dikuntilee.

⁸Tibɔti tin m sòon nee sá ibaamɔn ní. M là á nɪn có tibɔtee pu tikpil, an nɪn dàá ŋá pu bin fɔɔ Unimbɔti ki kííyee n̄ dū bi-ba kí tɪ atummɔntee. Tin ŋān ki kèetɪ binibee dee.

⁹Ama bí taa nɪn kpákà tibɔfan pu ki kàań bi-naanjab yiŋŋi an kaa kúntí, kí taa nɪn kpákà ki jáa Juuda yab marab pu. Tɪn sá tibɔfan ní kaa kèetɪ.

¹⁰Á kpāafi un cāabɪn ni-kansikin kunikpɔŋkpɔkɔuee mili, boonee, u yaa kaa gbìlee, á nyāntí-u;

¹¹kun puee a nyí yii an niliuee fá nsammɔnti ki ŋá unikpiti, ní u-kpitiyee dákà yii u gáatɪ.

¹²M yaa láā dū Arteemasi áá Tiisiiki ki túnní a-cee u bāań-see, á pɔɔn a-ba kí kintɪn-mi Nikoopoolii, kun puee niin ní m là kí dāá nɪn bí kuseeun.

¹³Á pɔɔn a-ba kí tūtuń Seena un sá umaranyilee nì Apooloosi, an nɪn dàá ŋá pu tiba n̄ taa lóó-bi bi-saŋkindi poonee.

¹⁴Án máań ti-yab mun n̄ dū bi-ba kí tɪ atummɔnti ŋátam, an nɪn dàá ŋá pu tiba yaa bāań ki pábee, bí ŋmā kí tūtuńee; bí taa nɪn kā, kaa kèetɪ diba.

¹⁵Man nì bin kɔkɔ bí dooyee jáam-si. Á jāam bin fɔɔ Yeesu ki kíí ki néen-tee. Kriisitoo ŋanti n̄ nɪn bí ni-kɔkɔ pu.

Fiileemɔn

Fiileemɔn 1

- ¹Man Pɔɔl un sá usarkadaan Yeesu Kriisitoo puee nì ti-nabiki Tiimootee di ηmàn takalda nee kí tī sii Fiileemɔn ti-tɔntɔnjuti un ti néeńee,
- ²nì ti-niisal Apiya nì Arkiipi ti-janjajuti, nì Kriisitoo nikitil din kpáfí a-diikunee.
- ³Ti-Baa Unimbɔti nì ti-Dindaan Yeesu Kriisitoo n̄ ηá-ni tiɲan kí tī-ni ηgbansɔŋfi.
- ⁴Baabadal, m yaa bí ki mèé m-Nimbɔtiuee, m téetí a-pu ki jáam-u a-pu,
- ⁵kun puee m gbìl bi sòòh a-fookiiu un a cáá ti-Dindaan Yeesu puee nì dineendi din a cáá Unimbɔti yab kɔkɔ mun puee.
- ⁶M mèé-u yii fookii un yāntì ti nì si ηá ubaantee n̄ mòtí yàntì á béé tiɲan tin Unimbɔti ηáań-ti Kriisitoo puee.
- ⁷M-nabiki, a-neendi din a cáá nnabiyaamu puee móɔkiñ-mi ki tī-mi kunyannyaau tikpil, kun puee a tī Unimbɔti yab kunyannyaau.
- ⁸Mín puee, nì min kɔkɔ Kriisitoo pú-mi nsan m ηūh kí dākà-si min sá á ηée,
- ⁹man kaa làá dī mín, ama nì dineendi puee m dàá gbàam-si ní, man Pɔɔl un sá utikpil ki gítí tí sá usarkadaan Yeesu Kriisitoo puee.
- ¹⁰M gbàam-si m-biki Ōneesiim pu, sarkan dooyee, man di kpántì u-baa nnimbɔtisan poon.
- ¹¹Doooyee, waa n̄n kèetī-si, ama kɔŋkɔnnee u kèetī man, ki dàá kèetī-si mun.
- ¹²Kɔŋkɔnnee, u kpántì kii man m-ba wunti jandi dibee ní, ama m dū-u ki gíín ki tīín-si ú n̄n bí a-cee.
- ¹³Kii tibɔmɔntiil sòontam n̄n yāntì m bí sarkan puee, m bàà là yii ú fɔɔ a-yil kí n̄n bí m-cee kí tūtuñ-mi kii sii n̄n bàà làá n̄n tūtuñ-mi puee,
- ¹⁴ama maa là kí ηá mín kaa bālfí-si, kaa tí là kí páb-si yii á ηá tiɲan nee kí tī-mi, m là yii á ηá min a-pɔbil lèe ní.
- ¹⁵An yaa yíi, Ōneesiim yíkì a-cee ηyunti ηubɔ fiii an n̄n dàá ηá pu, u yaa láā fātì ki gítínee, si nì u n̄ ηmā kí n̄n kíñ ki bí jaanjaanee.
- ¹⁶Kun puee waa ti sá uyumbufantanti, kɔŋkɔnnee u jítì uyumbu pu, u kíñ ki sá kinabineeŋkaai ní. Man néeń-u tiɲan, ama sii dàá n̄n gítí néeń-u tikpil, kun puee u sá sii yumbuu ní, ní ki sá a-nabiki mun ti-Dindaan pu.
- ¹⁷Mín puee, a yaa nyí yii m sá a-bɔoyee, á fɔɔ-u kii a n̄n bàà làá fɔɔ man puee.
- ¹⁸U yaa bíl-si tibaaa, u yaa tí jín-si dipɔndaaa, man fɔɔ ki ηá m-ba.

¹⁹Man Pɔɔl m-ba di dū m-ɲal ki ɲmàñní-si tibɔti nee, yii, man di dàá pà-si u-pɔndi din u yaa jíń-see. (An taa nín sá yii a nín sá m-pɔnliu kun puee a ká difiil man puee pu ní m tòñ-si.)

²⁰Mín puee, m-nabiki, m cíkitì-si kifuulii, ti-Dindaan puee á fɔ̃ɔ m-gbaamii gbanti kí yàntì m-pɔbil ń sòŋkì, Kriisitoo un yāntì ti ɲá ubaantee pu.

²¹M nyí m-pɔbilin yii tin m bí ɲmà-si yii á ɲá kí tī-mi nee, a dàá ɲá án jītí mín pu gba.

²²Á kpáàá bóntí-mi kudii kubɔ, kun puee m nyí yii Unimbɔti dàá fɔ̃ɔ ni-wimmeem m ɲmā kí fātī gítín ni-cee.

²³Eepafrasi man nì un bí sarkan Yeesu Kriisitoo puee jáam-si.

²⁴M-tɔntɔnɲutiibi Maarki nì Aristaaki nì Deemasi nì Luuki mun jáamiñ-si.

²⁵Ti-Dindaan Yeesu Kriisitoo ɲanti ń nīn bí ni-pu.

Eeburu

Eeburu 1

- ¹Doooyee, Unimbɔti n̄n dī u-bɔnaatiliibi pu n̄n nsambiyaamu tikpil pu ki s̄oñ n̄n ti-naanjab ŋfunyom tikpil.
- ²Ama iyunti in sá ijoolkaa nee poonee, u dī u-Jipɔɔn pu ní ki s̄oñ n̄n ti. Unimbɔti dī u-Jipɔɔn gbanti pu ní ki náán duulnya n̄n tin kɔkɔ bí duulnyanee. Ún̄ ní Unimbɔti lēn̄i ki dū tikɔkɔ ki ŋá u-ŋaan.
- ³U-pu ní ti k̄ánti Unimbɔti nyooti n̄n j̄il miŋyee, ún̄ di sá Unimbɔti naŋku, ní ki cáá u-nyɔɔbundi din sá mponee ki ŋúb duulnya kɔkɔ. U f̄int̄i ti-kpitii. Boonee ní u n̄n jóm̄ yilpu ki c̄üt̄ii k̄āl Unimbɔti mpɔŋkpaandaan ŋaŋgiil pú.
- ⁴Kii Unimbɔti Jipɔɔn n̄n j̄itiñ itūun puee, m̄in̄ ní u-yindi mun tí j̄itiñ itūun yiŋŋi.
- ⁵Di sá yii Unimbɔti kaa l̄i ntūun ŋubɔ dalba yii: “A sá m-Jipɔɔn, binib̄ n̄ bée d̄in̄ yii man di m̄āl-si.” Waa láá s̄oñ ntūun ŋubɔ pu yii: “Man di dàá n̄n sá ŋu-Baa ní ŋú n̄n sá man Jipɔɔn.”
- ⁶Dyunti ŋun u dū u-Jipɔŋkpiliu gbanti ki túnni duulnya poonee, u bí yii: “Unimbɔti tūuni kɔkɔ n̄ gbàán k̄i nyɔŋki-u.”
- ⁷Kpèè Unimbɔti n̄n s̄oñ itūun pu yii i sá kuŋyee s̄éé, yii: “Itūun yáb̄ kii kubuŋyee, ní ki tūn̄ ún̄ tundi, ní ki tūn̄ kp̄aŋkpam kii ŋm̄ee ki ŋáán u-tundi.”
- ⁸Kpèè u n̄n s̄oñ u-Jipɔɔn pu miŋyee s̄éé, yii: “Unimbɔti, a-beejal pééb̄i ní k̄i n̄n cá jaanjaan. A dàá j̄i a-beel n̄n deedee ní.
- ⁹A n̄eéñ tin bí deedeeyee ní ki ná tin kaa ŋāñee, an pu ní Unimbɔti, a-Nimbɔtiu, lúti-si, ki s̄iti a-pu dipɔɔpindi, ki k̄ān̄-si tinyool kakaanu, a j̄itiñ a-jutiibi kɔkɔ.”
- ¹⁰Ní Unimbɔti ḡiti bí yii: “D̄kilkaaminee, sii ti-Dindaan di n̄n náán kitiŋ, a-ŋalii ní a dūu náán kutagbɔŋu.
- ¹¹Tin̄ kɔkɔ dàá d̄áá púl̄ ní k̄i s̄at̄i kii dibɔkutilee ní k̄i kp̄ú, ama sii dàá n̄n pééb̄i ní.
- ¹²A dàá d̄áá kp̄áb̄ yilpu n̄n taapu kii kukampeeuee, ní k̄i cáán tipɔn k̄i kp̄ánti kii bi n̄n p̄et̄i dibɔkutikpikil k̄i dū dipɔndi k̄i p̄eñ puee. Ama sii dàá n̄n péēgb̄inti ki bí min a b̄ee ní, aa làá púl̄ jaanjaan.”
- ¹³Unimbɔti kaa láá l̄i ntūun ŋubɔ dalba dalba yii: “K̄āl̄ m-ŋaŋgiiliŋu pú yéè k̄i n̄n cí ŋyunti ŋun m̄ dàá dū a-nannanliibi k̄i bíl̄ a-tapu á t̄ā-bee.”
- ¹⁴Unimbɔti tūuni di kaa sá bin kɔkɔ sá ŋf̄am ki bí ki tūn̄ Unimbɔti tundeeee? U túnni-bi ní bi d̄oñ ki tútuñ bin dàá k̄a difiilee.

Eeburu 2

- ¹An puee, an máan̄ yii tí ŋúb̄ ibaamɔn b̄oti tin ti gb̄ilee tiŋan an n̄n dàá ŋá pu tí taa w̄aŋk̄èe.

- ²Kun puee Unimbɔti nín nìn yāntì itūun sòon̄ tibɔti tiŋyee bi ká ti-baamoni. Di sá yii bin nìn yīntì kaa tó itūunee nín lī puee nìn ká ditafadaaldi din máaṅ-bee.
- ³Ti mun yaa yū kaa fɔ̄ɔ̄ difiil dikpaandi din bí neeyee, mana ní ti dàá ḡá kí ḡmátí ditafadaaldin? Ti-Dindaan Yeesu di péé ki sòon̄ difiil gbanti bɔti ní bin gbīl-tèe tükū-ti tì nín sá ibaamɔn miŋyee.
- ⁴Ní Unimbɔti ḡaaṅ tidaandi nì maamaacib ki dū u-pɔḡḡu ki ḡá atuun kupaau kí dākà yii tin bi sòon̄ee sá mbaamɔn, ní ki yākatì u-Fām pɔḡḡu min fáatì-uee ki tī binib.
- ⁵Di sá duulnya un bí ki dòn ti bí ki sòon̄ nee, an kaa sá itūun di dàá dāā nīn kpòotī-u.
- ⁶Uḡ lī Unimbɔti takaldau poon laaaba yii: “Unil sá ba ní a tétí u-pu ní? Kinibiki bí tilatin ní a kpèé-u ní?”
- ⁷A sīntiṅ-u taapu ḡyunti ḡubɔ fiii itūun ṅ jītīṅ-u. Ama kɔḡkɔṅnee a tī-u tinyool nì kupampakau poon,
- ⁸ní ki tī-u mɔṅn tiwan kɔkɔwoooo pu.” Unimbɔti nín tī-u mɔṅn tikɔkɔ puee dākā yii tiba kaa kíṅ kaa bí u-taapu, nì mín kɔkɔee taa láá wāl tiwan kɔkɔ nín bí u-taapu kɔḡkɔṅnee puee.
- ⁹Ama Yeesu un ní Unimbɔti sīntiṅ taapu itūun jítiṅ-u ḡyunti ḡubɔ poon fiiyee, kɔḡkɔṅnee ti wāl-u tinyool nì kupampakau poon ní. Ōkúm min u jíṅ falaa ki kpīyee pu ní Unimbɔti yḡon̄-u yilpu mín. Unimbɔti ḡanti pu ní Yeesu kpī an kúm binib kɔkɔ pu.
- ¹⁰Unimbɔti un náaṅ tikɔkɔ nì tikɔkɔ nì un pu tikɔkɔ bée, ki là inibool tikpil ṅ kpántí u-biyaamu kí kó u-nyootinee ká yii an máaṅ Yeesu ṅ jī falaa ní kí kpántí ubɔti un dàá kpòotī binib kí cáaṅ difiilinee.
- ¹¹Un kpántí binib circiree nì bin kpántì circiree kɔkɔ Baa sá ubaanti ní, an pu ní an kaa cáá Yeesu icoo ú yíiṅ-bi u-naalib.
- ¹²U lī yii: “Unimbɔti, m dàá sòon̄ nì m-nabiyaamu a nín sá uḡyee, kí gāā ilan kí pākà-si kunipaau kansikin.”
- ¹³Ní ki gítī lī yii: “Sii pu ní m dàá nīn péēmáká.” Ní ki gítī kūbitì ki lī yii: “Kpèè, man nì mbiyaamu mun Unimbɔti tī-mee sèé.”
- ¹⁴Mbiyaamu gbantee nín sá binib tiwun nì fatiku puee ní Yeesu gíiṅ u-ba tiwun nì fatiku kii bín nín bí puee. U ḡá mín kí ḡmā kí kpú, u-kúmee ṅ náaṅ Sitaan un ḡúb ḡkúm pɔḡḡuee,
- ¹⁵kí nyāntí bi nín péēmāl bin bi bí kuyun̄u poon kun puee bi fāḡkí ḡkúmee.
- ¹⁶Bàà ḡma ká yii an kaa sá itūun ní u dómíṅ ki tútuṅ, an sá Abraam biyaamu ní u dómíṅ ki tútuṅ, kii Unimbɔti takaldau poon nín péēsòon̄ ki yòon̄ puee.
- ¹⁷An pu ní an sá yii ú nántiṅ u-nabiyaamu tikɔkɔ poon kí ḡmā kí nīn sá bi-saraaḡakpiliu ki cáá disaasɔl ki ḡaaṅ u-tundi deedee Unimbɔti nimiin, an nín dàá ḡá pu bí ká bi-kpitií pōtamee.

¹⁸U nín jín falaa icɔŋki poon ki kée di yì-tì ní u ɣūn kí jòon bin bí icɔŋkinee.

Eeburu 3

¹An puee m-nabiyaamu, nimbi bin Unimbɔti yíin ni sá u-yab ki dàá dāá kó u-beelinee, ní nīn nyí yii Yeesu di sá un Unimbɔti túnní ú nīn sá nnimbɔtisan ɣun ti nóó nee saraaŋakpiliuee.

²Di sá u yúliñ Unimbɔti un lēē-u ú ɣá an tundee deedee, kii Mooisi nín nīn tún Unimbɔti dicaŋkun ditundi deedee miŋyee.

³Bi pàkà un mán kudiiyee ki jítiñ kudii ku-ba, mīn mbaantiim ní Yeesu nyooti jítiñ Mooisi yati.

⁴Mīn ní bidimaliibi wīikí ki mǎā, ama Unimbɔti di mán tikɔkɔ.

⁵Mooisi ún-uee, u sá utɔntɔnli ní ki tún ditundi nī deedee Unimbɔti dicaŋkun, u-tundee nīn sá kí dākà tin tin Unimbɔti dàá dāá sòon fool boonee ní.

⁶Ama Kriisitoo ún sá Unimbɔti Jipɔon ní ki yì Unimbɔti dicaŋku. Timbi di sá Unimbɔti dicaŋkuee ti yaa gbínti ki máká ki cótí u-pu kí tin kátí-kuee.

⁷An puee, kii Unimbɔti Fām nín lī yii: “Ni yaa gbīl Unimbɔti ɔti dín,

⁸ní taa ɣá mpɔɔgbifin ali kii ni-naanjab nín nīn ɣá mpɔɔgbifin ki cɔŋkì Unimbɔti kupɔɔun puee.

⁹Kupɔɔun niin ní ni-naanjab nīn cɔŋkì-mi kí kpèè m nín sá uŋyee, ní m dākā-bi m nín sá uŋyee, ali abin imuŋku ili.

¹⁰An pu ní m gíi binib gbanti pu diŋuul, ki bí yii: ‘Binib nee mòtī gáatí baabadal ní, baa dī m-sambiyaamu.’

¹¹An di yì-tì ní m nīn gíi diŋuul ki pūti yii baa làá ti kó mpaan ɣun m bónti bí bàà kó kí kāl kí ɣùŋfèe ni.”

¹²An puee m-nabiyaamu, ní nīn nyíñ ni-ba, ubɔ ń taa nīn cáá dipɔɔkpitiñ dīn kaa cáá fookiiyee kí cúú u-ba kí nákatīñ Unimbɔti mmaŋfafɔkɔndaan.

¹³Ama ní nīn tīmaam tɔb kunyannyaau baabadal ɣyunti nín dáá bí pu nee, an nín dàá ɣá pu ikpiti ń taa kīl ubɔ ni-kansikin udaan ń pɔɔkì u-pɔbilee.

¹⁴Ti nín kíí ki cáá dimákal dīn Kriisitoo puee, ti yaa gbínti ki ɣúb mīn ki tin kátí-kuee di dākà yii ti sá Kriisitoo yab.

¹⁵Ali kii Unimbɔti takaldau poon nín lī puee yii: “Ni yaa gbīl Unimbɔti ɔti dín, ní taa ɣá mpɔɔgbifin ali kii ni-naanjab nín nīn ɣá mpɔɔgbifin puee.”

¹⁶Bilab di nīn gbīl Unimbɔti ɔti ní ki pɔɔkì bi-pɔbiliŋ ní? An sá bin kɔkɔ Mooisi nīn nyántiñ Eejipiti tiŋkinee.

¹⁷Bilab pu ní Unimbɔti nīn gíi diŋuul ali abin imuŋku ili? An sá bin nīn ɣá ikpiti ki kpī kupɔɔunee.

¹⁸Bilab pu ní Unimbɔti nìn pūti yii: “Bi kpá kí kó mpaan ɲun m bónti bí bàà kó kí kàl̄ kí ɲùɲfèe ni?” An sá bin nìn ɲá mpɔɔgbifinee ní u nìn lī mín.

¹⁹Ti lafun ká yii baa nìn ɲún ki kó diɲuɲfil laŋki kun puee baa fɔ̄ɔ Unimbɔti ki kíí.

Eeburu 4

¹Kii dipoondi din sá tí kó Unimbɔti ɲuɲfilinee nín dáá bí pu nee, tí fàŋkimaan, ni-kansikin ubɔ́ ń taa ɲá u-ba kí dāá gbíntí boon.

²Kun puee bi sòoñ tibɔmɔntiil ti gbìl̄ kii bi nín nìn péétí sòoñ nì ti-naanjab bí mun gbìl̄ puee. Di sá bi nìn gbìl̄ tibɔtee kɔkɔ, ama ní kaa fɔ̄otii yīkiñ, kun puee bi nín nìn gbìl̄-tè, baa fɔ̄ɔ-tì ki kíí.

³Timbi bin fɔ̄ɔ ki kííyee, ti dàá kó diɲuɲfil laŋki, laakin ní Unimbɔti lī yii: “M nìn gíí diɲuul ki pūti yii mpaan ɲun m bónti bí bàà kó kí kàl̄ kí ɲùɲfèe bi kpá kí kó.” U nìn lī mín, nì min kɔkɔ u nìn bónti u-tundi ki síiñ ki wāatì ní ki nín náań duulnyee.

⁴Di sá Unimbɔti takaldau poon sòoñ ɲwinluluúti pu yii: “Unimbɔti ɲūɲfi u-tuuyɲi kɔkɔ pu ɲwinluluúti dal.”

⁵Ní an dāa nín sòoñ doo yii: “Unimbɔti bí yii: 'Bi kpá kí kó mpaan ɲun m bónti binib ń kó kí ɲùɲfèe ni.' “

⁶Bin bi nìn péé péé ki sòoñ tibɔmɔntiilee ki tīyee nìn ɲá mpɔɔgbifin, an puee baa nìn ɲún ki kó diɲuɲfil gbanti poon, ama dipoondèe dáá gbínti ki bí, biba dàá ɲmā kí kó.

⁷Kun puee Unimbɔti gítí yóoñ ɲwimpɔɔn ɲun binib dàá kó u-ɲuɲfil laŋkee. Di sá yii abin kupaau boonee, u nìn gítí yānti ubɔti Dafiidi sòoñ an pu, kii ti nín dáá kàańńí-ti pu nee yii: “Ni yaa gbìl̄ Unimbɔti bɔti dín, ní taa ɲá mpɔɔgbifin.”

⁸Di sá laakin Joosuee nìn cáá Israyeel yab ki cūnnèe di yaa nìn sá diɲuɲfil laŋki laakin Unimbɔti bée, Unimbɔti kaa bàà nìn gítí sòoñ diɲuɲfil diba pu.

⁹An puee, ɲwiɲuɲfikaa mmɔnti ɲubɔ́ gítí bí nyɔkɔpu ki cí bin sá Unimbɔti yabee.

¹⁰Un yaa kó laakin Unimbɔti ká ki ɲùɲfèe mun ɲùɲfi ní. Kii Unimbɔti u-ba nín náań duulnya ki dòò ki ká ki ɲùɲfi puee, mín ní udaan mun yànti u-tuuyɲi kí ɲùɲfi.

¹¹An puee, timbi ń póoñ ti-ba kí kó diɲuɲfil gbanti poon, kí taa fɔ̄ɔ ti-naanjab yaɲyam kí lántí difiilee.

¹²Di sá Unimbɔti botee, tì cáá dimaɲfal ní, ní ki ɲáań ditundi ki jítí ki jítin bɔlfi un jítí ajan liitil puee, ki gífi malaa, kí cúú kinaɲ nì ɲfām kí yàkatī tɔbin, ki kóò dikpabilin ki bà ncoom, ki béetí unil nín màkà kí ɲá puee nì u-pɔbil poon landɔkɔi.

¹³Tiwannaanɲkaal tiba kaa bí Unimbɔti kaa wāl̄-tì, tin kɔkɔ péébí duulnyanee dɔ́ mpaampiin pu ní ùñ cee, u-nimiin ní ti dàá dāá sòoñ ti-nyɔkɔpu yai.

¹⁴Yeesu Unimbɔti Jipɔɔn di sá usaraanɲkpil un sá ukpaan ki jóm̄ doooo yilpu fɔ́ɲɲɲ kí nīn tútuñ-tee, an puee tí mòtí nīn ɲúb fookii un ti cáá u-puee gbīm gbim.

¹⁵Kun puee timbi saraañakpiliuee sá un nyí ti-wófii ki sūn ti-saayee; di sá u giín u-ba kii timbee ní, nniyaamin, ní ki béè iwósófi, ní Sitaan cóŋki-u ama waa líti ikpitin.

¹⁶Mín puee, kámaan kunyannyaau kí sútiín kí pílmaan Unimbōti beejal nì dimákal, niin ní u-ŋanti bí. Niin ní ti dàá ká disaasol nì tiŋan tin dàá tūtuñ-ti ŋyunti ŋun an máaṅee.

Eeburu 5

¹Binib kansikin ní bi lèekī ubó n̄ n̄n sá usaraañakpil kí n̄n ḡaañ bin kòkò kínee yil pu saraabi Unimbōti nimiin, ní u ḡaañ saraabi binib kpitii pu.

²Usaraañakpil gbanti nyí kí jī bin kaa nyí tibee nì bin yīntèe pu kimōtii kun puee ú mun sá unil kii bímbèe ní, mín mbaantiim ḡūn kí bàñ ú mun pu.

³Kii an nín ḡūn kí bàñ ú mun pu mbaantiim kii bin béeyee puee, ní an sá yii ú ḡá u-kpitii pu saraa ní kí nín ḡá bin kínee kpitii pu saraau.

⁴Ubo kaa ḡūn kí ḡā u-bindi yii u dàá ḡá disaraatundi. Unimbōti di lèekī kii u nín n̄n lēe Aarōn puee.

⁵Mín mbaantiim an kaa sá Kriisitoo u-ba di ḡā u-bindi ki là jilma ní ki kpánti usaraañakpil, un tī-uee di sá un bí-u yii: “Sii di sá man Jipōon, bàà ḡma n̄ béé d̄n̄ yii man di màl̄-see,”

⁶An ḡí tī lī laaaba mun yii: “Bi lēe-si á n̄n sá usaraañakpil kii Meelkiseedeeki nín n̄n sá puee kí n̄n cá jaanjaan.”

⁷Yeesu nín n̄n dáá bí duulnyanee, u n̄n mēe Unimbōti un ḡūn kí fī-u ḡkúminee ki gbāam̄-u n̄ ikun̄kuunti n̄ nnyinnyim. Ní Unimbōti n̄n p̄lfiñ-u kun puee u s̄intiñ u-ba taapu.

⁸N̄i min kòkò Yeesu sá Unimbōti Bikee, u bífi kí n̄n tó Unimbōti falaabi bin kòkò u jínee poon.

⁹An pu ní u sá uniŋman umōnti un pu baa kánti tikpitiil tibee, ki kpánti un t̄i difiil din kaa cáá dikuntilee bin kòkò tó-uee.

¹⁰Unimbōti di lēe-u ú n̄n sá usaraañakpil kii Meelkiseedeeki nín n̄n sá puee.

¹¹Ti bàà cáá tibōti tikpil kí sòon̄-ni an pu, ama ní an pōō t̄i bóbiti taapu kí t̄ukù-ni, kun puee ni sá binib bin bi yaa kaa bóbiti tibōti taapu nyíkinyiki ki t̄ukū, naa ḡūn kí gbīlee ní.

¹²Ni bàà máaṅ ki kpánti doooo nee bin dàkà bin kínee Unimbōti bōtee, ama nimbi di ḡí t̄i bí ki nyàab bí dàkà-ni Unimbōti bōti tin bi péet̄i kí dàkà bin f̄ōō ki kíí mpōmee. An nín bàà sá ní n̄n j̄n̄ binicikitikaabi jintee, ní ni dū mbiim ki ḡá ni-jinti kii mbiyaamu mun ḡaaṅee.

¹³Un ní mbiim sá-u tijinee, udaan dáá sá kii kibiki kin ḡaaṅee dee, waa ḡūn kí béé min ḡāñ Unimbōti nimiinee.

¹⁴Ama tijin tin nyìmee sá ki tī binicikitikaabi bin cáá nlandoko ki dákafi ki nyí ki gánti tin sá tñanee nì tin sá tikpitilee.

Eeburu 6

¹An puee tí jītímaan tibopeepeekaal tin unil yaa fṣṣ Kriisitoo ki kíí mpom bi dákà-uee pu, kí nyàab kí kpántí binicikitikaabi. An kaa máan tí gbíntín tibopeepeekaal tin un fṣṣ ki kíí mpomee nyée pu, tin sá: unil n fá atuun ñin kaa cáá ipaatee nì unil n fṣṣ Unimboti kí kííyee,

²nì bi nín dákà Unimboti nyinjfaltam bōti puee, nì bi nín pāantí ñjal binib pu ki mée ki tii-bee, nì bitaṅkpiibi fikititam, nì ditafadaaldi din kaa cáá dikuntilee nín dō ki cí binikpitib puee.

³An puee tí yàntímaan tñ, Unimboti yaa lèe, tí pótí tipon.

⁴Di sá bin fṣṣ tibomontiil ki kíí ki wál ibaamon, ki dáká diyimool din bí yilpuee mōṅṅu, ki fṣṣ Unimboti Fām,

⁵ki gbīl tibomontiilee taapu ki béè Unimboti pōni in bí ki dōoñee,

⁶ní boonee bidambi lítèe, baa ti ṅñ kí fātí gíññi-bi nsammonti poon, kun puee bidambi fātii bí ki kpáa Unimboti Jipoon ndopuntikaa pu nliliitiim ki bí ki bíí-u kunipaaau kansikin dee.

⁷Kitij yaa bí ní ki fōol ntaanyim múmul ní ki lòon tijin tin bi kùñ ki-puee, Unimboti bñntí ki-pu ní.

⁸Ama kitij gbanti yaa nyēēikuṅkum nì abojanaakunee, mimmee bi ká-kì yii kaa bí tiban dee, mbusu kaa pṣṣ an tñkee dikól, kun puee ṅṅmi di dāa dōon kí wà-kì.

⁹Nnabineenkaamu, nì min kōko ti bí ki sōon-ni mín nee, ti cáá ni-pu dimákal yii naa bí mín, ni tókó difiil saṅṅu pu,

¹⁰kun puee Unimboti sá deedeedaan ní, waa làá súntí dineendi din ni dákà binib u-puee nì atummonti ñin ni ṅá nì ñin ni gbínti ki niki ki ṅáań ki tii bin sá u-yabee pu.

¹¹Tin ti nyàabee di sá báa ṅma n dákà difaṅgiil mín kí tin kátí-ku, an nín dàá ṅá pu ní dāá fṣṣ kun pu ni máká ki ṅáań an tuuṅṅee.

¹²An puee ní taa bátí ni-faṅgiil pu, ama ní táá bin dū bi-fookiiu nì bi-mōtiiki ki fṣṣ tin Unimboti pṣṣoñee tabōbiliṅ.

¹³Dyunti ṅun Unimboti dàá nín pōon Abraamee, kí dákà-u yii u dàá lafun ṅá min u pṣṣoñ-uee, Unimboti nín pūti ní. Tiba kaa bí ki jitiñ-u ú yíñ kudōṅu yindi kí pūtēe puee ní Unimboti dūu pūti u-ba.

¹⁴U bí Abraam yii: “M pūti m-ba yii m dàá bññ a-boon kí bññ a-maaliṅ.”

¹⁵Abraam nín gbīl mimmee, u jín kimōtii ní ki cíti ali ṅyunti dāa bāań ní u fṣṣ tin Unimboti pūti ki pṣṣoñ yii u dàá tī-uee.

¹⁶Binib bili yaa kpákèe, kun jítiñ-bi bi fàṅkée ní bi pùtì; bi nín pùtì mimmee ní bi-nikpɔŋkpɔkɔkuee n kúntí.

¹⁷Míñ mbaantiim ní Unimbɔti nín là kí dākà u-yab yii u-poondee kaa bí kí kpántí jaanjaanee pu ní u pùtì.

¹⁸U tī-ti tiwan tili tí ḡmā kí nīn māká ti-pu, dipoondi nì dipùtil. Tiwan tili gbanti puee, Unimbɔti kpá kí kpántí u-nyɔkɔ, u kpá kí mōntì-ti, an puee timbi bin sàñ ki dómíñ ki kó-uee, tí kámaan kunyannyaau kí mòtí dū ti-mákal kí báañ tin u p̄oñ-tee pu tijan.

¹⁹Dimákal din ti cáá yii ti dàá dāá ká tin Unimbɔti p̄oñee di yì-tì ti bá ki yú ki ḡúb an p̄ō. Dimákalee di jīti yilpu punyɔkɔki kí kó laakin bí circir tikpilee.

²⁰Niin ní Yeesu līntì ti-nyɔkɔpu ki dī ki kó ki kpánti usaraṅakpil kii Meelkiseedekee, ki gbàam ti-pu kí nīn cá jaanjaan.

Eeburu 7

¹Dyunti ḡun ní Abraam nīn cūti ki ján ki jín bibɔtiibi ki fātī kunnée, Meelkiseedeeki di nīn tūṅki-u nsanni ki bīñ u-puee. Meelkiseedeeki gbanti di sá Saleem yab bɔtiu, ní ki gítí sá Unimbɔti un bí kutaa fōṅṅee saraṅaliu.

²Ùn ní Abraam nīn lēu-wanti tin u cááyee saalaa kamaa puee kubɔ kubɔ ki tī. Meelkiseedeeki taapu sá yii: Ubɔtikpaan un bí deedeeyee; ní boonee u gítí sá Saleem yab bɔtikpaanu, an taapu sá yii ḡgbansōṅfi bɔtikpaanu.

³Meelkiseedeeki gbantee kaa cáá baa, kaa cáá na, kaa cáá nnyéen, an kaa cáá yii bi māl-u, kaa cáá yii u kúu ali kii Unimbɔti Biki ní, u dàá nīn péésá usaraṅal ní kí nīn cá jaanjaan.

⁴Ní kpèè u nín sá ukpaan miṅyee. Ti-naanja Abraam u-ba nīn tī-u tiwan tin u nīn ján ki f̄ōō kujaaunee saalaa kamaa puee kubɔ kubɔ ní.

⁵Mara poonee, Leefii naakookun yab bin sá bisaraṅaliibee di cáá nsan kí f̄ōō bi-nabiyaamu mun sá Abraam maaliṅunee cee bi-wanti saalaa kamaa poonee kubɔ kubɔ.

⁶Ama Meelkiseedeeki gbanti kaa sá Leefii naakookun yab ubɔ ní ki f̄ōō Abraam wanti saalaa kamaa puee kubɔ kubɔ, boonee ní ki bīñ Abraam un Unimbɔti nīn lī dipoondèe pu.

⁷Ti-kɔkɔ péenyí yii un jítiñ-see di bīntí a-boon.

⁸Juuda yab saraṅaliibi bin fòōl bi-wanti saalaa kamaa pu kubɔ kubɔee sá binib ní, ki kúu, ama ti ká yii Meelkiseedeeki ùn péēbí ní kí nīn cá jaanjaan.

⁹Ti ḡñn kí lì yii Juuda yab saraṅaliibi bin bi-jutiibi nīn tū bi-wanti saalaa kamaa pu kubɔ kubɔee naanja Leefii u-ba dī Abraam pu ki tī Meelkiseedeeki u-wanti saalaa kamaa puee kubɔ kubɔ.

- ¹⁰Dyuntée, baa nìn dáá màl̄ Leefii, ama u nìn kā u-naanja Abraam poon nyunti gun Meelkiseedeeki nìn tũ̀kĩn-u nsanni, u dāa pān tin tin u f̄ońee saalaa kamaa puee kubɔ kubɔ ki t̄i-uee.
- ¹¹Bi yaa ḡún ki d̄i Leefii yab saraaḡatam pu ki ḡá atumm̄onti ḡin ḡũ̀n kí f̄i binib kun puee an d̄i sá mara un bi t̄i Israyeel yab bi tókó an puee, ba pu ní Unimbɔti bàà ḡít t̄ĩn̄i usaraaḡal ubɔ Meelkiseedeeki yam kaa sá Aarɔn yam?
- ¹²Mim mee, bi yaa kpánti bisaraaḡaliibee, see bí kpánti marab mun.
- ¹³Ama ti-Dindaan un pu ní tibɔti nee sòoń ki dákèe sá kunaakoou kun yab kaa péḡḡá disaraatundi nsaraafan cee ki ká jaanjaanee ní.
- ¹⁴Bàà ḡma nyí u-pu yii u sá Juuda naakookun ní, Mooisi kaa nìn t̄i kunaakoou gbanti disaraatundi bàà f̄i.
- ¹⁵Tin bí nee ḡít dákà ki cánti tibɔti taapu, di sá usaraaḡal ubɔ ḡít nyán ki náán n̄i Meelkiseedeeki.
- ¹⁶Ún saraaḡatam nyán u-ba, kun puee an kaa sá marab bin binib ḡmān ki yóońee pu ní u d̄i ki kpánti usaraaḡal, ama u nín cáá m̄pɔn kí n̄n bí jaanjaanee pu ní u kpánti usaraaḡakpil.
- ¹⁷Di sá Unimbɔti takaldau sòoń u-pu yii: “Sii di dàá n̄n péēsá usaraaḡal kí n̄n cáá cá jaanjaan, Meelkiseedeeki yam.”
- ¹⁸Mpeepeekaamee, bimarakpikib kp̄ti, kun puee baa p̄o kaa tútuñ binib.
- ¹⁹Nlilitiimee marabee kaa ḡún ki k̄iti-ti tí kpánti binin̄mambi bim̄ontiibi bin pu baa k̄ánti ikpiti ibee, ama Kriisitoo sá-ti dimákabaam̄ondi din pu ti ḡũ̀n kí d̄i kí s̄utí kí kól Unimbɔtee.
- ²⁰Kí wàat̄ee, Unimbɔti baasii p̄ti ní ki bí yii Kriisitoo n̄n sá usaraaḡal,
- ²¹ama bisaraaḡaliibi bin kínee waa p̄ti ki l̄ēubɔ mín, see Yeesu pu ní u p̄ti ki l̄i yii: “Man Unimbɔti di p̄ti yii sii di dàá n̄n sá usaraaḡal kí n̄n péēcáá cá jaanjaan, m kpá kí kónti m-nyɔkɔ.”
- ²²An puee Yeesu di sá dipoom̄ontiilee daaḡku kun dákà yii an dàá lafun ḡá mim mee.
- ²³Tin ḡít nyán u-ba n̄i Kriisitoo saraaḡatam n̄i bin kínee yamee di sá binib tikpil nìn túñ disaraatundi kun puee bi nìn p̄l ní ki k̄uú ní biba f̄oól.
- ²⁴Ama Kriisitoo ùn péēbí ní jaanjaan, an puee ubɔ kaa f̄oól u-saraatundi.
- ²⁵An pu ní u ḡũ̀n kí f̄i bin di u-pu ki nyàab Unimbɔtee an kɔkɔ pu, kun puee u péēbí ní, waa sá un k̄uúyee, ní ki m̄eé Unimbɔti bi-pu.
- ²⁶Usaraaḡakpil un ti máańee dee, u bí circir, waa ḡá ikpiti iba, ikpiti iba kaa bí u-pu, Unimbɔti cúú-u ki l̄ē bikpitib kansikin ki jóm̄ yilpu f̄oḡḡḡ.

²⁷Waa bí kii bisaraaṅakpilib bin kínee nín bí puee, ki ḡaań bi-yil pu kpitii saraau baabadal kí wàatī kí nín ḡá samaa yōuee. Dyunti ḡun u dū u-ba ki ḡá saraayee ní u kúnti saraabi ḡátam kòkò.

²⁸Mooisi marab nín yóon bin bí nīn sá bisaraaṅakpilibee nīn sá binib ní, baa cáá mpōn bi-ba, ama ní boonee ní Unimbōti sōon ki pūti ki lēē u-Jipōon ki kāan ú nīn sá usaraaṅakpil un sá uniḡman umōnti un pu ikpiti iba kpée, kí nīn pēē cáā cá jaanjaan.

Eeburu 8

¹Tibōti tin kòkò ti sōon nee dibōyil di sá yii, an saraaṅakpiliu juti ní ti cáá u kā yilpu Unimbōti ḡaḡiiliḡu pú dibeelin tinyool laḡki.

²Ún sá usaraaṅakpil un tūn ditundi laakin ti-Dindaan Unimbōti u-ba máń an sá circiree ní, an kaa sá tanti un binib ḡāyee poon kii bisaraaṅaliibi bin kínee nín ḡaań puee.

³Bi kāan bisaraaṅakpilib bí nīn ḡaań saraabi ki jáań Unimbōti ní kí nīn ḡaań saraabi binib kpitii pu, an puee u máan kí nīn cáá tin tin u dàá dū kí ḡá saraayee.

⁴U yaa bàà bí duulnyan doo, waa bàà ḡūń kí nīn sá usaraaṅal kpaḡkpan, kun puee bisaraaṅaliibi bí ki ḡaań saraabi kii Juuda yab marab nín lī yii bí nīn ḡaań miḡyee.

⁵Saraabi bin bisaraaṅaliibi ḡaańee sá tin bí yilpuee naḡku ní, ali kii Unimbōti nín nīn dū yilpu diiku bítam kòkò ki dàkā Mooisi ḡā-u tanti taapu doo puee. Unimbōti bí-u yii: “Á kpèè kí ḡā-mi tanti ú nīn bí kii un m nīn dàkā-si dijool puee deede.”

⁶Ama kōḡkōnee ditundi din Kriisitoo bí yilpu ki ḡaańee jítiń Juuda yab saraaṅaliibi nín ḡaań ḡiḡyee, di sá Kriisitoo kúm di yì-tì ní Unimbōti pōon-ti dipoondi din sá dimōntiil ki jítiń dikpikilee.

⁷Dipoompepeekaal din Unimbōti nīn pōon ti-naanjabee yaa nīn sá dimōntiilee, an kaa bàà ḡítī bàlfī yii bí kpántí diba.

⁸An pu ní Unimbōti nīn bí wōon-bi ki tükù-bi yii: “Man ni-Dindaan di lī yii iwiin bí ki dòon in poon m dàá fātī pōon Israyeel yab nì Juuda yab dipoompōndee.

⁹Dipoondi gbanti kaa dāa sá kii din m nīn pōon bi-naanjab daliḡkin m nīn nyántiń-bi Eejipiti tiḡkinee, boonee baa dū dipoondede ki ḡá nì ditundi, ní ma mun kaa ti fātī tó bi-bōti.

¹⁰Ti-Dindaan bí yii: M nín dàá dāá lí Israyeel yab dipoondi diḡyee sèé: Dyunti gbantee, m dàá dāá ḡmà m-marab kí ḡá bi-landòkōin bí ḡmā kí nīn nyí min m lèe, ní kí dūú ḡmà bi-pōbiliḡin bí ḡmā kí nīn ḡúb-bi kí taa ti sún-tí. Míń ní m dāa sá bi-Nimbōtiu ní bí mun dāa sá man samaau.

¹¹Ubo kaa dāa ḡítī dàkà u-kōḡkōnaato àá u-nabiki yii ú nīn nyí ti-Dindaan. Kí yōon bi-kansikin mbiyaawaamu kí tin cáá sāa bikpaambi, bàà ḡma dàá dāá béé-mi.

¹²Kun puee m dàá dāá sō bi-saai kí dū bi-kpitii kí pō-bi, kaa làá ti péētéetí bi-kpitii gbanti pu.”

¹³Unimbɔti nín sòòñ dipoompɔndi bɔtee, mimmee din béeyee ñá dikpikil dee; tiwan yaa ñá tikpikilee ti púl dee, ki dàá kúntí mun.

Eeburu 9

¹Dyunti ñun Unimbɔti nìn p̄sòñ dipoompeepeekaalee, u nìn yóòñ marab bin binib dàá dī kí jāam̄-uee nì tanti un poon bi dàá jāam̄-uee.

²Bi nìn gāā tanti ní, ní ki dū sata ki pītì poon adiin ali, ní ki yî kudipeepeekaau ee circir laŋki, niin ní fitila nìn tókó bi tūtī, ní teebil yú ní bi cāabín kponɔb bin bi ñáañ Unimbɔti saraayee ki pāantí.

³Sataliliiti boonee, kudii kubɔ mun dee, niin ní bi yî circir páaa laŋki.

⁴Niin ní sindaariya saraafañɲu nìn yú ní bi sètī talaalub an pu, ní dipoondi dakaau yú bi dū sindaariya ki nyūntì u-kòkò. Dakaayee poonee kibaŋ kiba yú ki sá sindaariya ñma, niin ní tijin tin bi yî máanee nìn kā. Dakaa ubaantee poon ní Aarɔn kponɔɲu ñun nìn púkum̄ nsupumpukumee nì ataŋkpee ñin pu Unimbɔti nìn ñmāñ dipoondi marabee kā.

⁵Ní bi dū sindaariya ki mósó itūun in sá Unimbɔti nyootee ili ki tókòñ dakaayee pu kí dākà yii Unimbɔti u-ba bí niin, ní itūunee feeni tēñ laakin bi yaa ñá ikpiti saraau bi cáá fatiku ki yàantée pu. Taa ñūñ kí sòòñ dakaa gbanti bɔti nì u-tuunɲi nín sá puee kɔŋkɔnnee.

⁶Bi nìn ñá mín kòkò ki dóyee, kudipeepeekaau ee poon ní bisaraañaliibi kóò baabadal ki ñáañ bi-saraatuunɲi.

⁷Ama poon diiku laakin bi yî yii circir páaa laŋkee, usaraañakpil baba di kóò niin dibindi poonee diba ja kí cáá tiwanɲuti tin u kūū ùn u-ba kpiti puee fatikuu nì tin bi kūū samaa kòkò nín ñá ikpiti in kaa nyée fatikuu kí kón kí ñá Unimbɔti saraa.

⁸Unimbɔti Fām nìn dākà yii, ñyunti ñun ní nsan pú diiku dáá bée, nsan nìn kpá unil ñ jītí kí kó circir páaa laŋki.

⁹An saraabee cántí tibɔti taapu ní ki dākà timbi dín: an dākà yii saraabi bin binib nìn ñáañ ki jáam̄ Unimbɔti nì bin bi nìn ñáañ bi-kpiti puee kòkò kaa nìn ñūñ kí lēbin ñáañ saraabi gbantee pɔbiliŋin ikpiti bí kpántí deedeedambi Unimbɔti nimiin.

¹⁰An sá marab bin bi yóòñ bi sá tijin nì tinyòkaal nì tiwun difintilee bɔti ní. An marabee kòkò sá tiwun pu marab ní kí tin sāā ñyunti ñun Unimbɔti dàá dāá cáañ tiponee.

¹¹Kriisitoo dómiñ ki sá-ti usaraañakpil un cáañ-ti tiŋan tin poon ti bí nee. Ún di kó kusaraadim̄ntiiu kun sá kukpaañɲu kaa sá binib di máñee, an dākà yii kuua sá duulnya doo diiku.

¹²U kó diba pu kusaraadiin ki dū u-ba ki ñá ki kúntì saraabi, an kaa sá nì inɔjaa nì anabil fatikuu, an sá ùn u-ba fatikuu; mín ní u ñá ní ki cáañ-ti difiil din kaa cáá dikuntilee.

¹³Di sá iṅṅjaa nì inajaa fatikuu nì unasal un bi nìn wù ṅṅmi kòkò kí fāā ṅfantam kí ṅá nnyimin kí yāān bin ṅá ikpítee pu án nyāntí ikpiti bi-wunti puee, mín yaa ṅūn kí fíntí unil kpitiyee,

¹⁴kin ataa aṅa pu ní Kriisítooo un Unimbòti Fām tútuṅ u dū u-ba ki ṅá saraamònti ki tī Unimbòtee fatikuu kaa ṅūn kí fíntí atuṅkpiti ti-pòbiliṅ poon tí ṅmā kí nòó Unimbòti un bí dimaṅfalinee.

¹⁵Kriisítooo di cáān-ti dipoompòndi, an nín dàá ṅá pu ní bin Unimbòti fīyee n ṅmā kí fṅṅ tìgaajawan tin Unimbòti pṅṅn taa cáá dikuntilee. Kun pu bi dàá ṅmā kí fṅṅ tìgaajawan gbantee di sá Kriisítooo kpṅ ki nyāntí-bi bi nín nìn bí dipooṅkpikil poon ki ṅáān ikpiti iṅyee poon.

¹⁶Unil yaa bí yii a dàá jī u-fakalee, u yaa kaa láá kpṅ saa yòntí.

¹⁷Daliṅkin u sòṅn ki tükū-si yii sii di dàá jī u-fakalee, tibòtee kaa láá tūn ditundi, see u yaa láá kpṅyee ní á nín yīkì kí tókòṅ difakalee pu kii u nín nìn péètükū-si puee.

¹⁸An pu ní tiwaṅkuti fatikuu nìn nyān ki wāatì ní dipoompeepeekaal nín ṅún ki ṅá ditundi.

¹⁹Di sá Mooisi nín kàān marab bin kòkò Unimbòti ṅmānee ki tükū samaa kòkò ki dṅṅyee, ní u yṅṅn anabil, nì iṅṅjaa fatikuu ki dū nnyim ki ṅmālim ní ki dū tipikuti tin bi mántèe nì tifaal tiba ti bí kii kinunnuuyee ki cáā sèetī fatiku poon ki yāantí takalda un poon bi ṅmān marabee nì samaa kòkò pu.

²⁰ní ki lì yii: “Fatiku nee di sá dipoondi din Unimbòti lī-nee daaṅku.”

²¹U ṅá mimmee ní ki yāān Unimbòti tantiu un bi gāāyee nì tiwan tin bi cáā ṅáān saraabee kòkò pu.

²²Kii mara nín lī puee, yii fatiku ní bi ṅman nìn péēcāā yāantí tiwan kòkò pu ní tí kpántí circir, an puee fatiku yaa kaa nyānee, unil kaa kántí u-kpitii pṅtam.

²³Bi nín máān kí dī nsan ṅun kí ṅá saraa un, Kunimbòtidii kun bi mán taapu doo ki nántiṅ kun bí yilpuee nì tin kòkò yú ku-poonee n nīn bí circiree dee. Ama yilpu saraadiiku kun sá kumòntiuee ku-ba nì tin kòkò yú ku-poonee, an bàlfī yii bí ṅá-ku saraamònti un jítiṅ taapu doo diiku saraauee.

²⁴Kun puee an kaa sá yii Kriisítooo kó kusaraadii kun binib mán ki nántiṅ yilpu yòkṅee poon ní ki ṅá saraa, ama yilpu, Unimbòti cee ní u kó, ki bí Unimbòti nimiin kṅṅkṅnee ki gbāām ti-pu.

²⁵Kí kūtèe, dibindi sá kamaayee, usaraaṅakpil nìn kòò kusaraadiin circir páāa laṅki nì tiwaṅkuti fatikuu ní kí ṅá saraabi. Ama Kriisítooo ún kaa kó ṅfunyòm kupaau kí dū u-ba kí ṅá saraa.

²⁶An yaa sá mimmee, doooo duulnya nín kí kí ki dāa sāā dínee, u bàā làá jī falaabi ṅfunyòm kupaau. Ama duulnya nín tóób dikuntil pu nee ní u dómiṅ ki dū u-ba ki ṅá saraa diba pu kí kúntí ikpiti.

²⁷An péēsá yii báà ŋma ní kpú diba ja ní, ní ŋkúm boonee Unimbɔti ní sòòn báà ŋma ɔti.

²⁸Mín mbaantiim ní Kriisitoo mun dū u-ba ki ŋá saraa diba ja ki nyánti binib tikpil ikpiti poon, u dàá dāān nliliitiim ama an kaa dāa gítí sá kí nyāntí binib ikpiti poon, ama u dāa dòón kí fī bin kí k̄ ki k̄a ki cí-uee ní.

Eeburu 10

¹Juuda yab marab kaa n̄n baasii dākà tiŋan tin Yeesu dàá cáán-tee mbaam̄min, an n̄n péēsá kunaŋu ní. Di sá yii bi n̄n péēŋáán saraabi gbanti mín ní abintil sá kamaa an kaa kúntí, ama ní an kaa ŋūn kí yántí bí kpántí bim̄ntiibi páaa kí sútí kí p̄l̄ Unimbɔti.

²Bin bin n̄n ŋáán tiwaŋkuti saraabi ki t̄i Unimbɔtee yaa n̄n ŋá saraa mín diba pu bi-kpitii lēēyee, k̄nampu bi báà n̄n gbēēn disaraaŋal dooooyee, kun puee baa ti nyí yii bi cáá ikpiti iba bi-pu.

³Ibaam̄nee, an saraabee sá kí n̄n t̄etí binib abintil kamaa bi-kpitii pu ní.

⁴Kun puee inajaa n̄ in̄jaaa fatikuu kaa ŋūn kí lēē ikpiti jaanjaan.

⁵An pu ní ŋyunti ŋun Kriisitoo dàá n̄n dòón duulnyanee, u bí Unimbɔti yii: “Aa là saraabi bin bi ŋáán ki t̄i-si á dū bi-kpitii kí p̄-see, kaa là saraabi bin bi ŋáán ki jáám-see. Man ní a t̄i tiwun m̄ dū-ti kí ŋá saraa kí t̄i-si.

⁶Saraabi bin bi ŋáán kí dū tiwaŋkuti tin bi k̄ūyee kí wò ŋŋmi k̄k̄see kaa fáatí-si, saraabi bin bi ŋáán ki t̄i-si á dū bi-kpitii kí p̄-see kaa fáatí-si.

⁷An pu ní m̄ bí yii: Unimbɔti, m̄ s̄é, m̄ dàá cùú ŋá min dàá fáatí-see, Kii an n̄n péēŋm̄n m-pu min ki yóòn a-takaldaunee.”

⁸Yeesu dá láá péé ki l̄i yii: “Aa fáatí saraabi bin bi ŋáán ki jáám-see, kaa fáatí saraabi bin bi ŋáán ki t̄i-si á dū bi-kpiinti kí p̄-see.” U n̄n l̄i mín n̄ min k̄k̄ mara di pú n̄san yii bí n̄n ŋáán saraabi gbanti mimmee.

⁹Boonee ní ki n̄n l̄i yii: “An pu ní man bí yii: M̄ s̄é, Unimbɔti, m̄ dàá cùú kí ŋá min fáatí-see.” Ní u lafun dóm̄n ki kp̄t̄i nsan̄kpiki ŋun binib n̄n d̄i ki n̄ó Unimbɔtee ní ki náán mp̄on.

¹⁰Yeesu Kriisitoo dóm̄n ki ŋá min fáatí Unimbɔtee. U n̄n dū u-ba ki ŋá saraa diba pu ki kúnti saraabee pu, u-saraauee di f̄nti ti-kpitii.

¹¹Baabadalee usaraaŋal yú u-tundi laŋki ní, ní ki ŋáán bisaraabaantiibi múl̄mul, ama ní an saraabee kaa ŋūn kí lēēunil kpitii.

¹²Ní Kriisitoo ùn dū u-ba ní ki ŋá saraa un bí kí n̄n cá jaanjaanee diba pu timbi kpitii pu. Boonee ní ki cūti k̄l̄ Unimbɔti ŋaŋgiil pú.

¹³U k̄a niin ki cí ŋyunti ŋun Unimbɔti dàá dāá dū u-nannanliibi kí ŋá u-tapu ú tāāyee.

¹⁴Di sá yii saraabambaanti ní u ŋá ní an f̄nti binib kpitii ní saraa gbantee cáá mp̄on kí n̄n cá, kí ḡnti-bi kí yóòn bí n̄n ŋān Unimbɔti n̄miin.

- 15**Unimbɔti Fām lī yii mín ní an lafun sá. Mpeekaamee mi bí yii:
- 16**“Ti-Dindaan bí yii dipoondi din m dàá dāá líí-bi nyunti gbantee sèé: M dàá dāá dū m-marab kí ǵá bi-pɔbiliŋin ní bí ǵmā kí nīn nyí min m lèe, ní kí tí ǵmà marab gbanti bi-landɔkɔin bí ǵmā kí nīn ǵúb-bi kí taa suntuí.”
- 17**Ní nliliitiimee mi ǵítí bí yii: “Maa làá dāá ǵítí tétí bi-kpitii nì bi-yìntitam pu dalba dalba.”
- 18**Di sá bi yaa dū unil kpitii ki pú-uee, an kaa ti cáá saraa ubɔ ú ǵítí ǵá ikpíteee pu.
- 19**An puee nnabiyaamu, Yeesu nín kpî ki nyánti u-fatikuee ní nsan dɔɔn tí jítí kí kó circir páaa laŋki laakin Unimbɔti bée.
- 20**An sá nsampɔɔn ǵun tìi dimaŋfalee ní Yeesu pītì-ti. Dɔɔabu ǵun nìn pītì circir laŋki nì circir páaa laŋkee ní u cúū cáti an nín dàá ǵá pu tí jítí kí kó circir laŋki Unimbɔti nimiinee. Dɔɔabuee di sá u-wunti.
- 21**Ti nín cáá usaraaŋkpil un Unimbɔti kāaŋ u-dicaŋku puee,
- 22**tí suntuí kí pīl Unimbɔti nì dipɔbil diba nì dimákabaamondi, kí fíntí ti-pɔbiliŋ poon ilandɔkɔkpiti án nyā dándan, kí dū nnyim min ǵān circiree kí fàl ti-wunti ń nyā circir,
- 23**kí nīn gbínti ki ǵúb ti-mákal din ti lèe yii ti cááyee gbīm gbim, kun puee u nín pɔɔn yii u dàá ǵá miŋyee, u dàá lafun ǵá mín ní.
- 24**Tí nīn ǵúbmaan tɔb tiŋan kí nīn nyàatī tɔb, ti-neendi ń mòtí nīn wīntí, kí nīn ǵāaŋ atummonti,
- 25**kí taa fá Kriisitoo nikitil kpafil kii biba nín dū ki fá pu kaa ti dɔɔŋee, ama nīn tūmaan tɔb kunyannyaau kun puee nimbi ni-ba nyí yii ǵwiin ǵun ti-Dindaan dàá ǵítínee tóbií.
- 26**Ti yaa bée ibaamɔn ní ki fɔɔ-i, ní boonee ti gbínti ki níki ki ǵāaŋ ikpiti ti nín là puee, tí bée yii saraa ubɔ ǵítí kpá bí ǵá án lēe ti-kpitii.
- 27**Ama tin kíŋ tí nīn cée di sá ditafadaalkpaandi din sá ǵɔmi ki ǵà liblib ki dàá wò Unimbɔti nannanliibee.
- 28**Un yaa nìn yīntiŋ Mooisi marab, ní binib bili kii bita yaa lēeseera yii bi ká u nín yīnti puee, bi kù-u ní baa sūn u-saai.
- 29**Ní kpèè ditafadaaldi dilar ní un kpēēUnimbɔti Jipɔɔn fam kaa dū fatiku un Unimbɔti dū ki lí-ti dipoondee ki yííŋ tibee máaŋ? Ama fatikuee ní bi dūu fínti u-kpitii, ní boonee u kíŋ ki kōntí Unimbɔti Fām min min pú-u an yimɔlee diŋuul.
- 30**Ti nyí, an sá Unimbɔti di lī yii: “An sá man Unimbɔti di dàá dāá tò ipɔntoon, man di dàá dāá pà tipaal,” ní ki ǵítí bí yii: “Man di dàá dāá sòɔn m-samaau bɔti.”
- 31**Sii un yaa kó Unimbɔti un bí nee bɔtinee, an dɔɔo sii pu!
- 32**Téetímaan ǵkpikim ni nín nìn fɔɔ Kriisitoo ki kíí ki ká ǵwalfi ǵuŋyee, nì falaabi bin ní ni nìn jín tikpil kaa fātii tóee.

³³Iyunti ibee bi sɪ́-ni, iyunti ibee bi càn-ni diniwul nimiin ki sàantí, iyunti ibee ni bí ki sūn bin bi sàantée saai.

³⁴Míñ ní ni nì bisarkadambi yākatì bi-falaau, bi yaa cúú ni-wanti ki f̄oɔl an kaa páb-ni, ni-pɔ̀biliŋ sòm kun puee ni nyí yii ni cáá tiguaajamontiil tin dàá n̄n bí jaanjaanee an d̄o yilpu.

³⁵An puee ní taa páatí ni-mákal, ipaatikpaan d̄o ki cí-ni.

³⁶An máaṅ ní n̄n cáá dipɔ̀ɔndi ní kí ḡmā kí ḡá min Unimbɔ̀ti lèe kí wàatī ní kí nín ká tin u p̄oṅhee.

³⁷An bí kii an nín ḡmāñ Unimbɔ̀ti takaldau poon puee yii: “An kíñ ḡyunti fiii n̄anyɔ̀kɔ ní un dàá d̄āānee ṅ b̄añ, an kaa láá ti yúntí.

³⁸Un bí deede m-nimiinee fookiiu pu ní u dàá ḡmátí, ama u yaa gítì u-boonee, maa d̄āa gítí fáatí u-bɔ̀ti.”

³⁹Taa sá bin gítí bi-boon ki wáŋkée, ama ti sá bin f̄oɔ ki kíí ki cáá dimañfalee ní.

Eeburu 11

¹Á n̄n cáá fookiiyee taapu sá yii: á n̄n cótí tiwan tin pu a mákée, ama aa wāl-tì ní ki nyí yii tì bí.

²Fookii un Unimbɔ̀ti nib dooooyee yab n̄n cááyee pu ní bi ká disindi Unimbɔ̀ti cee.

³Fookii un ti cáá Unimbɔ̀ti puee di yì-tì ní ti nyí yii an sá n̄n u-nyɔ̀ɔbundi ní u d̄u ki náaṅ duulnya, di sá duulnya wanti tin kɔ̀kɔ ti wāl nee nyánní dinyɔ̀ɔbundi din taa wālee poon ní.

⁴An sá fookii un Abeel cáá Unimbɔ̀ti puee di yì-tì saraa un u ḡá ki t̄ī-uee ḡāñ ki jítiñ Kayeen yɔ̀u. U-fookiiu gbanti pu ní u kpántì deedeedaan Unimbɔ̀ti cee, kun puee Unimbɔ̀ti f̄oɔ u-saraau. U-fookiiu puee, n̄n min kɔ̀kɔ u kp̄yee, u-bɔ̀ti bí bi sòṅ d̄iñ.

⁵Eenɔ̀ki fookiiu un u cáá Unimbɔ̀ti puee di yì-tì ní waa kp̄ñ, Unimbɔ̀ti ȳoṅ-u ki cáá-u ki jóm̄iñ u-cee ubɔ̀ kaa ti ká-u. Unimbɔ̀ti takaldau poon l̄i yii Eenɔ̀ki n̄n péēfáati Unimbɔ̀ti dooooyee ní ki wāatì u d̄āa nín ȳoṅ-u.

⁶Unil yaa kaa f̄oɔ Unimbɔ̀ti ki kííyee, udaan kpá kí fáatí-u. Di sá yii un là kí sútíñ kí p̄l̄ Unimbɔ̀tee máaṅ kí n̄n nyí yii Unimbɔ̀ti bí, ki t̄i bin nyàab-u n̄n dipɔ̀bil dibee ipaati.

⁷Fookii un Noowee cáá Unimbɔ̀ti puee di yì-tì ní Unimbɔ̀ti nín kpáafi-u yii nnyingbeen d̄oṅee, u f̄oɔ ki kíí kaa láá ká-mì, ní ki kíí ki b̄i kpáa meela un poon u n̄n u-dican̄ku dàá kó kí ḡmátée; u-fookiiu un u cáá Unimbɔ̀ti puee di d̄ākā duulnya yab b̄ɔ̀kpil ní ùn kpántì deedeedaan Unimbɔ̀ti nimiin.

⁸Fookii un Abraam cáá Unimbɔ̀ti puee ní Unimbɔ̀ti nín yíiñ-u ki bí ú ȳkì u-tiŋkin kí n̄n cá kitij kin u dàá pòṅ kí t̄ī-uee nee, ní u lafun ȳkì m̄iñ kaa nyí laakin pú ní u túl ki cée.

⁹Nì fookii un u cáá Unimböti puee ní u bàñ kitimpoonkaain ki gāā tanti ki kóò kii unicaanee, mín ní Isaaki nì Jaakob bin mun nìn yíkì ki tókòn dipoondi gbanti puee nìn gāā tantib ki kóò.

¹⁰Di sá Abraam nìn ká ki cí kitiŋkpaanŋi kin diiŋŋi Unimböti u-ba kítì ki mán, ŋi yú ki pōōyee ní.

¹¹Fookii un Saaraa cáá Unimböti puee di yì-tì ní nì min kəkə u nìn púl ki jíti mmaal puee, u ŋún ki màl̄ ki kpánti ditimbundi na, kun puee u nìn fōō ki kíf yii Unimböti nín pōon miŋyee, u dàá ḡá mín.^{^fc^}

¹²Mín ní Abraam unibaanti un púl ki jíti mmaal puee màl̄, u-naantiibi bütì nnibiim an kpáti kii iŋmalbijaayee, baa ḡūñ kí kàañ-bi ali kii bi nín kaa ḡūñ kí kàañ dibul din dō tiŋku gbandee puee.

¹³Nì fookii poon ní an nibee kəkə dūu kpíi kaa kpáàā fōō tin Unimböti nìn pōonee, ama bi ká tì nín páaàñí ndan ki dōonee, ní bi jáaà-tì, ní ki bí yii bìn sá binicambi ní ki kóò duulnyan.

¹⁴Bi nín sòon miŋyee dākà ki cántí-ti yii bi bí nyàab kitiŋ ní kí n̄n kóò.

¹⁵An yaa nìn sá kitiŋ kin poon bi nìn yíkèe pu ní bi yaa nìn bí yáliŋkée, bi bàà nìn ḡūñ kí fātí n̄n gítí niinaa!

¹⁶Ama ibaamonee, bi nìn baasii nyàab kitimmontiii ní, an dākà yii yilpu tiŋki. An pu ní bi nín yî Unimböti yii bi-Nimbötiuee, an kaa cáá-u icoo kun puee u bónti-bi kitiŋ ki yóon yilpu.

¹⁷⁻¹⁸Fookii un Abraam cáá Unimböti puee di yì-tì ŋyunti ḡun Unimböti nìn cóŋkì-u ki bí yii ú dū u-jipombaabil Isaaki kí ḡá-u saraayee, waa nìn ḡmó mmóon ki là kí dū-u kí ḡá saraa, nì min kəkə ún Abraam ní Unimböti nìn pōon yii: “Isaaki di dàá bütì amaaliŋu ḡun dàá dāá fōō a-yindee.”

¹⁹U nìn fōō ki kíf yii u yaa dū u-biki ki ḡá saraa ki tī Unimböti, Unimböti dàá fātí fikiti-kì, mín ní an lafun ḡá kii u fikiti-kèe. Unimböti gíiñ u-biki ki tī-u kun puee Abraam ḡman nìn péēkū-kì ní.

²⁰Fookii un Isaaki cáá Unimböti puee di yì-tì ní u nìn mēēUnimböti ki bīñ Jaakob nì Eesayu pu, án n̄n ḡāñ kí tī-bi fool boon.

²¹Fookii un Jaakob cáá Unimböti puee di yì-tì u nín púl ki cikiñ ḡkúmee, u mēēUnimböti ki bīñ Jooseefi biyaamu liitil pu ki nyī u-kpōndōŋu pu ki nyóŋkí Unimböti.

²²Fookii un Jooseefi cáá Unimböti puee di yì-tì ní u nìn nyí yii Unimböti dàá dāá nyāntí Israyeel yab Eejipiti tiŋkin, an pu ní u nín púl ki tóob ḡkúmee u tükū-bi ki siñ yii bi yaa láā nyánti-bi bi kùnee, bí dāá kpáañ u-kpabiŋ.

²³Fookii un Mooisi baa nì u-na nìn cáá Unimböti puee di yì-tì ní bi nín màl̄ Mooisee, bi dū-u ki bál ali iŋmal ita, kun puee bi nín ká kibiki nín ḡāñ miŋyee baa ti fāŋkì uböti marau un u yóon yii bí kpò mbiyaamuee.

- 24**Fookii un Mooisi cáá Unimböti puee di yì-tì ní u nín wíñee, u yìi yii waa là kí n̄n sá uböti Faraaon bisal jipöon,
- 25**ki là kí n̄n bí Unimböti nikitilin bí kpāfi bi-kökö kí sàañ. M̄n̄ mōn̄-u ki jítin̄ ú n̄n bí ikpitiin ki j̄n̄ mm̄on̄ n̄un kaa làá yúntée.
- 26**U ká yii, ú j̄i falaa kii Kriisitoo nín dàá dāá j̄i unyee n̄ān̄ ki jítin̄ Eejipiti gaajawanti kökö, kun puee u n̄n wāl̄ ipaati in bí nyököpuee ní.
- 27**Fookii un Mooisi n̄n cáá Unimböti puee di yì-tì ní u n̄n yíkì Eejipiti tin̄kin, kaa f̄an̄kì diñuul din uböti f̄ōyee pu, ní ki n̄úb̄ Unimböti un baa wālee bōti an píkì gb̄im̄ gbim̄ kii u wāl̄-uee.
- 28**Fookii un u cáá Unimböti puee di yì-tì u n̄n f̄ōō Unimböti nyökö ki j̄ín̄ apibil jin̄aaliu, ki yāntì bi dū ipiiyee fatikuu ki n̄m̄it̄i mpunyömu pu, an nín dàá n̄á pu ntūun n̄un dàá kpò Eejipiti yab jipōn̄kpilibee n̄ taa gbēēIsrayeel yab báà uböee.
- 29**Fookii un Israyeel yab cáá Unimböti puee ní bi dūt̄i dimōmandi kii kitiñkuliñee, ama Eejipiti yab mun m̄akañ̄ kí dūt̄i ní dimōol dū-bi ki n̄ál̄.
- 30**Fookii un Israyeel yab cáá Unimböti puee di yì-tì bi n̄n cūt̄i ki cōom̄ ki m̄anti Jeeriikoo tin̄ki, iwiin iluli dalee agun cúū kp̄ikit̄i ki lít̄i.
- 31**Fookii un Raabi kinimpulaakpaayee n̄n cáá Unimböti puee di yì-tì ní baa n̄n kūū-u ki kp̄aan̄ binikpitib kun puee u n̄n n̄á tiniti ki f̄ōō binib bin bi n̄n tú bí cù kí cōñkì kitiñee.
- 32**M dàá gít̄i l̄i yii ba? Mpaan kaa bí-mi r̄n̄ sòon̄ Geedeeon, Baraaki, Sams̄on, Jeefitee, Dafiidi, Samueel n̄n Unimböti bōnaatiliibi pu.
- 33**Bi fookiiu un bi cáá Unimböti puee di yì-tì ní bi n̄n j̄áà ki j̄n̄ bibotiibi bin kíñee n̄n bi-tim̄mu. Biba mun fookiiu pu ní bi yāntì binib n̄áañ tin̄ bí deedeeyee, ní biba mun fookiiu pu ní bi f̄ōō tin̄ Unimböti p̄ōon̄-bee. Bi cúú biba ki tó laakin bi kp̄áá igbikintee ní iaa n̄ún̄ ki tábit̄i i-nyömmu ní kaa nín n̄ún̄ ki n̄á-bi tiba bi-fookiiu pu.
- 34**Ŋ̄m̄i ḡà liblib bi téé biba ki tó poon, an kaa n̄á-bi tiba bi-fookiiu pu. An bàà sá bí kpò biba n̄n̄ njimu ama fookii un bi cáá Unimböti puee bi n̄m̄át̄i. Biba n̄n̄ b̄ūn̄ ki p̄ók̄i, biba n̄n̄ sá n̄w̄s̄ofimu bi-fookiiu puee bi kp̄ánt̄i bibaatandambi. Biba fookiiu puee bi cúú bi-nannanliibi.
- 35**Binimpoobi fookiiu un bi cáá Unimböti puee di yì-tì bi fikiti bi-yab bin kp̄iyyee ki t̄i-bi. Bi cúú biba, bi-fookiiu puee, bi kíí bí gbá kí kpò-bi, kun puee bi nyí yii bi dàá dàá fikiti kí n̄n̄ kíñ̄ ki bí dimanjfal din kaa cáá dikuntilee ní.
- 36**Bi bēel̄ biba ki gb̄án̄-bi anaalab, ki gúl̄ biba n̄n̄ ikusaka ki cáā tó sarka.
- 37**Biba fookiiu un bi cáá Unimböti puee, bi ȳan̄k̄i-bi atan̄kpee ki kūū, ki sēek̄i n̄ābit̄i biba agin̄ ali, ki dū njimu ki kūū biba. Biba kaa n̄n̄ cáā tiba kí p̄eēn̄ see ipii n̄n̄ iñoobu gbani ní bi p̄ēē, biba mun sá bisoodambi, ní bi p̄áb̄ biba ki s̄ant̄i-bi ní bi s̄án̄ ki p̄ót̄i ajan kökö.

- 14Ní pòwò ni-ba ngbansoŋfi n̄ n̄n bí ni n̄ b̄aà ŋma kansikin, kí n̄n bímaan circir. Kun puee un yaa kaa bí circiree kpá kí ká ti-Dindaan.
- 15Ní n̄n nyíh̄ ni-ba ubo n̄ taa fá diyimool din Unimboti t̄i-tee, kí n̄n nyíh̄ ni-ba ubo n̄ taa kpántí kii kisubiki kin cáá tiloolee kí dū u-lootee kí b̄iil kunipaau;
- 16kí n̄n nyíh̄ ni-ba ubo n̄ taa ŋá tilaakpaal, kí taa kpèè Unimboti fam, kii Eesayu nín n̄n ŋá pu, tijin puee u dū u-kpiti ki nyáfèe.
- 17Kee, ni nyí yii boonee u n̄n là kí f̄õõ ujipòŋkpil nín f̄oõl u-baa cee difakal puee waa ti káà? N̄i min kòkò u dū nnyinnyim ki nyàab̄ u nín dàá d̄i pu kí kpántí min u n̄n l̄ee, waa ká.
- 18An kaa sá dijool kii Siinaayi joolee ní ni s̄ut̄in ki p̄il: laakin ŋŋmi wù, dibombondi dómiñ, kubuŋkpaan̄ŋu j̄iti,
- 19ní dikant̄andi búh̄ ki p̄õõ kp̄an̄kpam, ní nneen ŋubo s̄oõnee. Israyeel yab nín gb̄il̄ nneenee puee ní bi gb̄aam̄ yii ŋú taa ti s̄oõn.
- 20Kun puee tiboti gbanti p̄õõ tikpil bi f̄an̄ki Unimboti nín s̄oõn yii, un yaa gb̄eēdijool neeyee, báà an yaa sá kuwaŋkuluuuaaa, bí ȳan̄ki-ku ataŋkpee kí kpòee.
- 21An n̄n cáá dipòw̄biildi kaa bí ŋkpèé, ali Mooisi u-ba bí yii: “M f̄an̄ki ki yókó.”
- 22Ama nimbi dómiñ Siiyon̄ jool taapu ní, n̄ Unimboti un bí dimaŋfalinee dumpu Jeerusaleem un bí yilpuee, laakin itūun cutimaanyi kp̄at̄i ki bí mm̄on nee.
- 23Nimbi dómiñ laakin bin sá Unimboti biyaamu mun u péé péé ki m̄al̄ bi yiŋŋi ŋm̄an̄ yilpuee kpáfée ní. Ni dómiñ Unimboti u-ba cee ní, ùh̄ di s̄oõn binib kòkò b̄oti n̄ binib bin bí deede Unimboti ȳant̄i bi-nammu kp̄ant̄i mm̄ont̄iimu baa k̄ant̄i mu-pu tikpitil tibe.
- 24Nimbi dómiñ Yeesu un cáan̄-ti dipoomp̄ondi ki dū u-ba ki t̄i u-fatikuu f̄int̄i-tee cee ní, u-fatikuuee s̄oõn tiŋan ki j̄itiñ Abeel[^]fd[^] you.
- 25An puee ní n̄n nyíh̄ ni-ba kí taa yíi un bí ki s̄oõn n̄ ni nee nyòkò. Bin n̄n ȳi kaa f̄õõ un n̄n bí bi-cee taapu doo ki s̄oõn n̄ bee nyòkòee, bi n̄n dáal̄ bi-tafaliŋ ní, kin ataa aŋa ní ti yaa yíi kaa f̄õõ un nyánní yilpu ki s̄oõn n̄ tee nyòkòee, taa k̄ant̄i ditafadaaldi!
- 26U nín n̄n s̄oõn dijool puee, kitiŋ n̄n c̄iŋki ní, ama kòŋkòneee u p̄oõn yii u dàá d̄ā ḡit̄i c̄iŋki kitiŋ, niinee an kaa d̄ā sá kitiŋ ŋmaniŋma, u dàá d̄ā c̄iŋki kí kp̄aan̄ yilpu mun.
- 27An d̄akà yii u dàá c̄iŋki tin kòkò u náaŋee, ní tin kaa bá ki p̄õõyee n̄ lítí kí w̄an̄ki kí kíin tin bá ki p̄õõyee.
- 28Kii Unimboti nín k̄aan̄-ti dibeel din bá ki p̄õõyee poon puee, tí j̄aam̄-u u-ŋanti gbanti pu kí n̄n ŋáan̄ min fáat̄i-uee kí n̄n tó-u n̄ tifaandi poon kí d̄akà-u yii ti nyí tiŋan tin u ŋá ki t̄i-tee.
- 29Kun puee ti-Nimboti sá ŋŋmi ŋun wù ki céetée ní.

Eeburu 13

- ¹Ní nīn nēemmaan tɔb kii nnabiyaamu nīn nēen tɔb puee án taa gbèen,
- ²kí tēetí yii ni máan kí nīn fòol binicambi, kun puee biba nīn fòol binicambi mín ní kí dāa kpáàā fǔǔ Unimbɔti tūuni kaa bēè.
- ³Ní tēetí bisarkadambi pu kí jī bi-falaaui kii ni nī bi kɔkɔ di kpáfi kí bí sarkanee, kí tēetí bin bi sàantée pu kii ni nī bi kɔkɔ ní bi kpáfi kí sàantée.
- ⁴Un sá kamaa n nīn tó uninja nī unimpu nīn máan kí cáá tɔb miŋyee nī bi nīn máan kí nīn bí tɔb miŋyee, kun puee Unimbɔti dàá dāá dáál tilaakpaal nī tijɔkɔndi dambi tafaliŋ.
- ⁵Ní taa yàntī nnimineel n jī ni-pɔbiliŋ poon mpaan, ama ní yàntī án nīn mōn-ni fiii un ni cááyee pu, kun puee Unimbɔti lī yii: “M kpá kí yàntī-si fam, maa làá dū-si kí fá mín jaanjaan.”
- ⁶An pu ní ti cáá dimákal kí lī kí tókɔn dinyɔɔbundi nee pu yii: “Unimbɔti di jòon-mi, an puee maa fàŋkí tiba, unil dàá ŋmā kí ŋá-mi mana?”
- ⁷Tēetímaan ni-kpilib bin nīn dākā-ni Unimbɔti botee pu, kí dākafi kí kpèè min ní bi nīn nóó Unimbɔti kí dāa kpíyee, kí mun n bīfi bi-fookiiu un bi cáá Unimbɔti puee.
- ⁸Kun puee Yeesu Kriisitoo kaa kpántí u nīn nīn péē bí puee, mín ní u gbínti kí bí dīn, kí dàá nīn péebí mín kí nīn cá jaanjaan.
- ⁹Binib nyánti tibɔpɔn tin nyán tibee kí dākà ní taa yàntī bí dū an botee kí dākà-ni ní gáatí. An ŋān yii diyimɔl din Unimbɔti pú-tee pu ní tí nīn kánti mɔn, án taa nīn sá marab bin binib ŋúb kí kòó tijin tibee pu, bin ŋúb an marab gbantee kaa ká ipaati iba poon.
- ¹⁰Timbi saraafanŋu ŋun ti cááyee, Juuda yab saraaŋaliibi kaa ŋūn kí jī nsaraafan gbanti pu jinti.
- ¹¹Di sá Juuda yab saraaŋakpiliu nīn kù tiwaŋkuti ní kí lēefatiku kí kón circir páaa diikun kí ŋá saraa binib kpitii pu, ní kí yòon tiwaŋkutee kí nyánti kitiŋ kpaanceetiŋu kí dūú wò ŋmi.
- ¹²Mín mbaantiim ní bi ŋá Yeesu, bi nyánti-u kitiŋ kpaanceetiŋu ní kí kūu-u. An ŋá mín u-fatikuu n fínti binib kpitii.
- ¹³An puee ti mun n nyā kitiŋ kpaanceetiŋu kí cù u-cee bí bèèl-ti kii bi nīn bèèl-u puee.
- ¹⁴Kun puee duulnya kaa sá-ti kitiŋ kin dàá nīn bí kí cá jaanjaanee, an pu ní ti bí kí nyàab yilpu tiŋki kin dàá nīn bí jaanjaanee.
- ¹⁵Yeesu puee ti-nyɔŋkii n nīn sá saraa ti tì Unimbɔti múmul, an dākà yii tí nīn pàkà u-yindi kí taa gbèen.
- ¹⁶Ní taa súnti tiŋan diŋal pu, kí nīn tútuñ tɔb, mín di sá saraabi bin ŋān Unimbɔti ceeyee.

¹⁷Ní n̄n tó bin kpòotī-nee kí s̄ntī ni-ba taapu kí tī-bi, kun puee b̄n di mótí ni-nammu pu, Boonee bi dāa cáá kí kààn Unimbōti nimiin bi n̄n kpēē ni-nammu ki ḡīn̄ mīnyee. An puee, ni yaa tó-bee, bí mun ḡáān bi-tundi n̄n sá puee n̄i dip̄ōp̄indi ní, ama bi yaa ḡáān ni-pu ditundi bi-p̄obiliḡ kaa s̄òm̄ee, nimbi ní an ḡīntí boon.

¹⁸Ní n̄n gb̄int̄i ki m̄èé ti-pu. Ti nyí ti-p̄obiliḡ poon yii ti ḡá tin máān tí ḡéé, ti là ḡyunti k̄ok̄o poonee tí n̄n ḡáān min bí deedeeyee.

¹⁹M là ní baasii m̄èé m-pu, Unimbōti ḡ p̄ō-mi nsan ḡ ḡmā kí ḡīt̄īn̄ ni-cee malaa.

²⁰⁻²¹Unimbōti un t̄ī ḡgbans̄ḡfi ki fik̄it̄ī ti-Dindaan Yeesu ditaḡkpiilinee ḡ t̄ī-ni mp̄on ní ḡmā kí n̄n ḡáān tin k̄ok̄o fáat̄i-uee. Yeesu di kp̄ánt̄i unaakpaakpil u-fatikuu un Unimbōti l̄ī-ti dipoondi din kaa cáá dikuntilee pu. Yeesu Kriis̄itoo puee ú d̄ū-ni kí ḡá min fáat̄i-uee. Ú̄n̄ Yeesu Kriis̄itoo ní bí n̄n péē t̄ī tinyool kí n̄n cáā cá jaanjaan! Ameen.

²²Nnabiyaamu, tibōti tin m ḡmā̄n-ni nee kaa f̄òk̄ò, m m̄èé-ni ní j̄ī kim̄ot̄ii kí p̄ilfi m-saḡkii gbanti.

²³M là ní kp̄áā̄ b̄éé yii bi l̄ī ti-nabiki Tiimootee sarkan. U yaa b̄āān ti-cee malaayee, man n̄i u di dàá táá kí d̄āá mànt̄i ni-pu.

²⁴Ní j̄āām̄ ni-kpootiliibi bin kpòotī-ni nnimbōtisan poonee n̄i bin k̄ok̄o n̄óó Unimbōtee. Ti-nabiyaamu mun bí Italīi t̄iḡkinee j̄āām̄-ni.

²⁵Kriis̄itoo ḡanti ḡ n̄n bí ni-k̄ok̄o pu.

Jaaki

Jaaki 1

- ¹Man Jaaki un sá Unimbɔti n̄ ti-Dindaan Yeesu Kriisitoo tɔntɔnliuee di ηmān takalda nee. M jaań nimbi tinaakɔti salaa n̄ tili tin yāl ki kó duulnya jan̄ni kɔkɔnee.
- ²M-nabiyaamu, diniminaamandi n̄n bí puee n̄ di-nyɔkɔm yaa bāań ni-puee, ní yàntī án n̄n mōn̄-ni tikpil,
- ³kun puee ni nyí yii diniminaamandi gbanti yaa bāań ki cɔŋkì ni-fookiiu ní ni yaa gbínti ki yú, kaa lítèe, kimɔtii ní an cāabíń-ni.
- ⁴Ama ní n̄n cáá kimɔtii mín kí tin kátí-ku, an n̄n dàá ηá pu ní kpántí biniŋmambi bimɔntiibi, ni-bimbim poon, tiba n̄n tiba n̄n taa lóó-nee.
- ⁵Mín puee, ni-kansikin ubɔ yaa lóò iciinee, udaan n̄ mēè Unimbɔti un mō ki pūn bāa ηma n̄n dipɔbil diba, kaa wòoñee, u dàá tī-u.
- ⁶Tin bée di sá yii udaan n̄ n̄n māká yii u dàá fɔɔ kun u bí mēéyee kí taa gùgufi, kun puee un mēè ki gùgufēe náań n̄n kii dimɔol nyim min kubuŋu téekí ki càn ajan kɔkɔe ní.
- ⁷An niliuee n̄n taa dàkafi yii u dàá ηmā kí fɔɔ tiba ti-Dindaan cee,
- ⁸kun puee u cáá ilandɔkɔ ili ili, kaa diŋfi nsambaanti.
- ⁹Án n̄n mōn̄ kinabiki kin di sá usoodaane e kun puee Unimbɔti yɔoñ-u yilpu.
- ¹⁰Mín ní án n̄n mōn̄ kinabiki kin di sá ugaajee kun puee Unimbɔti s̄intiñ-u taapu: di sá u dàá dāá gbátí kí lítí kii mpumpukumee ní.
- ¹¹Ōwiiń yaa nyáń ki píł s̄insiŋee, ní mpumpukum n̄n kpā ní kí gbátí kí lítí, ní mi-nyaaŋku n̄n wāŋkì. Mín mbaantiim ní ugaaja dāa bí u-tuuŋŋi poon ní kí kpāā wāŋkì.
- ¹²Án n̄n mōn̄ sii un di yaa bí diniminaamandin ní ki pōntí ki ηmēéyee, kun puee a yaa ηmēēmín ki tin kátí-kuee, Unimbɔti dàá pà-si tipaal tin sá mmanŋfafɔkɔn ηun u pōoñ ki yóoñ bin nééń-uee.
- ¹³Sii un yaa bí diniminaamandinee n̄n taa lì yii: “Unimbɔti di bí cɔŋkí-mi.” Kun puee tiba kaa ηūn kí yàntī Unimbɔti n̄n ηá tikpitil, ní ùn u-ba mun kaa yàntī ubɔ n̄n ηá tikpitil.
- ¹⁴Ama an sá a-nimitaataam di kííl-si ki téekí-si ki càn ikpiti.
- ¹⁵Nnimitaataam yaa kó-see, ní mí màal ikpiti, ní ikpiti yaa wíiñee ní í cáań ηkúm.
- ¹⁶M-nabineenkaamu, ní taa ηmàtimmaan ni-ba.
- ¹⁷Tiwannyaandi n̄n tiwammontiil tin kɔkɔ ti fòol faalaayee nyēēń yilpu ní, ti-Baa Unimbɔti iwalfi in bí yilpuee naanliu cee ní an nyēēń. Ùn kaa kpántáaa, kaa fātí ki ηmíntí dijandi diba, din kíñee dō dibɔmbɔndin.

- ¹⁸Ún di là ní ki dī dinyɔɔbundi din sá ibaamɔnee pu ki tī-ti dimaɲfal, an nín dàá ɲá pu timbi n̄ n̄n lī tiwan tin kɔkɔ u náánee nyɔkɔpuee.
- ¹⁹M-nabineenkaamu, ní n̄n nyímaan tin bí nee: báà ɲma n̄ kpòon̄ u-tafal malaa kí p̄lfi u-juti, kí taa n̄n jìkì dibɔsoondi pu, kí taa n̄n fòol̄ diɲuul malaa malaa,
- ²⁰kun puee sii un yaa f̄ɔ̄ diɲuulee, tin a ɲáánee kaa kítì Unimbɔti cee.
- ²¹Mín̄ puee, ní fámaan tin kɔkɔ bííl̄ unilee n̄ atuɲkpiti kɔkɔ, kí s̄nt̄n̄ ni-ba kí f̄ɔ̄ dinyɔɔbundi din Unimbɔti dū ki búl̄ ni-pɔbiliɲinee, kun puee dín̄ di ɲūn̄ kí f̄i-ni.
- ²²N̄n̄ ɲáaɲmaan dinyɔɔbundee nín̄ bí yii ní ɲá miɲyee. Sii un yaa p̄lfi Unimbɔti bɔti, kaa ɲáaɲ tì nín̄ lī puee, kííl̄ a-ba ní.
- ²³Sii un p̄lfi dinyɔɔbundee fam, ní kaa ɲáaɲ min di l̄i yii á ɲée, náaɲ n̄ un kp̄éé digitil ki w̄al̄ u-nimiinee ní.
- ²⁴U nín̄ kp̄ēeki d̄ò ki búnt̄e, ní ú kp̄áá̄ s̄nt̄í u nín̄ bàà kp̄ēedigitil poon ki bí miɲyee kɔkɔ.
- ²⁵Ama sii un di yaa kp̄éé bimaram̄ntiibi bin t̄i dibat̄lee tiɲan ní ki yaa cáá a-ba ki t̄i-bi, kaa p̄lfi fam boonee kí s̄nt̄í, ama ki ɲáaɲ min marabee bí yii á ɲée, Unimbɔti dàá b̄īn̄ a-boon a-tuɲɲi poon.
- ²⁶Sii un yaa nyí yii a sá unimbɔtinool, ní kaa ɲúb̄ a-nyɔkɔee, kííl̄ a-ba ní, a-nimbɔtinool sá fam ní.
- ²⁷Dinimbɔtinool din ɲān̄ ki bí circir ti-Baa Unimbɔti ceeyee di sá: á kp̄éé ataɲkpiibil n̄ bikpiipoobi bin bí falaa poonee, kí n̄n nyí n̄ a-ba kí taa j̄ēt̄í duulnya kpitii poon.

Jaaki 2

- ¹M-nabiyaamu, kii ni nín̄ bí ti-Dindaan Yeesu Kriisitoo tinyooldaan saɲɲun puee, an kaa máaɲ ní n̄n cáá diniḡantil.
- ²Tí l̄i yii ni-kpafil poon ní ugaaja ubɔ yaa kóon̄ ki f̄uún̄ sindaariya b̄ombiki ki p̄ēdib̄okutinyaandi, ní usoodaan ubɔ mun kóon̄ ki p̄ēikpalcati,
- ³ní ni yaa t̄i ugaaja un p̄ētiwamm̄ntiilee jilma ki bí-u yii: “Sii d̄āá k̄al̄ mpaamm̄nti nee pu.” Ama ní ki bí usoodaane yii: “Sii n̄n̄ yú, a yaa tí là kí k̄al̄ kitiɲ m-taɲi caɲin yéèyaaa.”
- ⁴Mimnee, naa ḡant̄i-bi deeee? Iland̄ok̄kpiti ní ni d̄akafi ní ki ɲá mín̄.
- ⁵M-nabineenkaamu, ní p̄lfiimaan: Unimbɔti l̄úti duulnya nee poon bisoodambi bí f̄ɔ̄ Yeesu Kriisitoo kí k̄í, ní kí ká t̄igaajam̄ntiil̄ kí kó Unimbɔti beel̄ din u p̄ɔon̄ ki yóon̄ bin néen̄-uee ni.
- ⁶Ama ní nimbi kp̄éé bisoodambi fam. An kaa sá bigaajab di s̄ant̄í-ni ki cút̄í-ni ki c̄an̄ ib̄sooneeee?
- ⁷B̄īn̄ di kaa bííl̄ Yeesu Kriisitoo yinnyaandi din u p̄ú-neeee?

- ⁸Tinjan, ni yaa nóó Unimbɔti un sá ubɔtee marau kii an nín ɲmàñ puee, yii: “Á n̄n n̄eēn a-juti kii sii a-bee,” mimmee, ni ɲáań min ɲāñee dee.
- ⁹Ama ni yaa kpèé ki gant̄i binibee, an sá ikpiti ní ni ɲáań, maree cúú-ni, kun puee ni ȳintiñ-u.
- ¹⁰Di sá yii, a yaa ɲúb marab kɔkɔ ní ki yaa ȳintiñ ubambaanti bi-kansikinee, a ȳinti bi-kɔkɔ dee,
- ¹¹kun puee Unimbɔti un l̄i yii: “Á taa ɲá tilaakpaalee” ùn ubaanti di tí l̄i yii: “Á taa kpò unil.” M̄in puee, a yaa kaa ɲá tilaakpaal, ama ní ki yaa k̄ū unilee, a ȳinti mara dee.
- ¹²M̄in puee, ni-bɔsooni n̄i ni-ɲáantam kɔkɔnee, ní n̄n ɲáań ki nyí yii ni sá binib bin Unimbɔti dàá d̄ū mara un cāab̄in dibatɔlee ní kí sòon ni-bɔtee.
- ¹³Sii un kaa sún a-jutiibi saayee, ibɔsoon dalee, Unimbɔti kaa làá dāá s̄ō a-saai. A nín sún binib saayee di dàá yant̄i Unimbɔti mun n̄ s̄ō a-saai.
- ¹⁴M-nabiyaamu, an kaa ɲāñ unil n̄ bí yii ùn f̄ōō Yeesu ki k̄íí, ama ní kaa b̄í ɲáań atumm̄onti, an fookiiuee kaa ɲūn k̄í f̄ī-si.
- ¹⁵Kii ti-nabiki kiba, uninja kii unimpu, di yaa bí, kaa cáá tiwampeɲkaalaaa kaa cáá tijikaal baabadal k̄í j̄i,
- ¹⁶ní ni-kansikin ubɔ yaa t̄uk̄ū udaan yii: “Án ɲá k̄í k̄ūt̄i, á n̄n bí tinjan! Taa yant̄i tiwool n̄ cúú-si, á n̄n j̄īn tijin ki d̄ík̄i!”, ama ní kaa t̄ī-u ú j̄i, kaa t̄ī-u ú p̄eēn k̄í ɲmátée, an ɲāñ lapu?
- ¹⁷M̄in mbaantiim ní un yaa f̄ōō Yeesu ki k̄íí ɲmaniɲma, ní kaa ɲáań fookii tundi nín sá puee, mimmee udaan fookiiu kp̄ñ dee.
- ¹⁸Uɔ ɲūn k̄í l̄i yii: “Sii cáá fookii, ama ní man ɲáań atumm̄onti.” M̄ ɲūn k̄í k̄íí udaan yii, ú d̄àk̄à-mi u nín f̄ōō ki k̄íí min min, kaa ɲáań atumm̄ontee, ní man mun n̄ d̄àk̄à-u m-tumm̄ontij ú b̄éé yii m̄ f̄ōō ki k̄íí.
- ¹⁹A nín f̄ōō ki k̄íí yii Unimbɔtibaanti di b̄éé, an ɲāñ: ama m̄in ní arasiniibi mun f̄ōō ki k̄íí, ní ki f̄an̄k̄í yókóyɔkɔ.
- ²⁰Ugbaan, aa là k̄í b̄éé yii a yaa f̄ōō ki k̄íí ní kaa ɲáań atumm̄ontee, a-fookiiu sá famaanan?
- ²¹An ɲá mana ní ti-naanja Abraam dāa kp̄ant̄i deedeedaan Unimbɔti nimiin ní? An sá ditundi d̄in u ɲée pu, an d̄àk̄à yii u n̄in d̄ū u-jip̄ɔɔn Isaaki ki p̄aan nsaraafan pu ki dàá ɲá saraa k̄í t̄ī Unimbɔtee.
- ²²A k̄áà, u f̄ōō ki k̄íí ní ki ɲá ditundi mun, u-fookiiu n̄i u-tuun̄ɲi nín kp̄áf̄i mbaantiim ki táá t̄ɔb puee ní u-fookiiu kp̄ant̄i um̄onti.
- ²³An ɲá kii Unimbɔti takaldau poon nín l̄i puee dee, yii: “Abraam f̄ōō Unimbɔti ki k̄íí, ní Unimbɔti k̄á u-fookiiu un u cáá u-puee ní ki ȳiñ-u deedeedaan,” ní ki k̄in̄ ki ȳi-u u-bɔɔ mun.

²⁴Ni káà, unil tuuŋŋi pu ní u kpántí deedeedaan Unimbɔti cee, an kaa sá fookii un u cááyee ŋmaniŋma pu.

²⁵Mín mbaantiim ní an nín tí jíti Raabi kinimpulaakpaayee cee, ú mun nín nín ŋá atuun ŋin ki kpánti deedeedaan Unimbɔti ceeyee di sá u nín fɔ̃ɔ̃ binib bin Juuda yab nín túee ki dākā-bi nsan ŋubɔ bi dī ki ŋmátèe.

²⁶Kii ŋfām yaa nyán tiwun nín kpántí utaŋkpiil puee, mín ní unil yaa fɔ̃ɔ̃ ki kíí ní kaa ŋáań atummɔntee, u-fookiiu kúù.

Jaaki 3

¹M-nabiyaamu, ni-kɔkɔ ń taa yíkì bìlku yii ni là kí nīn dākà Unimbɔti ɔti, kun puee ni nyí yii timbi bidakaliibee bɔsooni dāa pɔ̃ɔ̃ ki jítiń bin kínee yai.

²Ti-kɔkɔ yintī ajan tikpil poon, ama sii un yaa kaa yintī a-bɔsooni poonee di sá uniŋman ki ŋūń kí cúú a-ba kɔkɔ.

³Ti kpàl itaamu nyɔmmu tikúti í nīn tó-ti ní ki kpáaā kpòotī i-wunti kɔkɔ.

⁴Kpèèmaan, meelab mun nín sá bikpaambi miŋyee, ama báa kubuŋu yaa yānti ki téekí-bi min kamaa, kipimbiwaŋwaa ní un ŋàalee cáā kpòotī-bi ki cān laakin u lèe.

⁵Mín mbaantiim ní unil wunti puee dilimbil sá kijaŋwaa ní, ní ki ŋáań tibɔkpaandi. Kee, ni nyí yii kiŋmibilii fiii yèe di gbátí kí wò kupɔɔuaa!

⁶Dilimbil sá kii ŋmeee ní. Duulnya ɔkpitii kɔkɔ bí dilimbilin ní di kā ti-wunti pu ki bííl tiwun kɔkɔ, ní kí cáań Sitaan ŋmiŋu kí tō ti-pu.

⁷Unil ŋūń kí ŋúb ipeel nì inoon nì tin fù ti-pooŋŋi puee, nì ijɔm kɔkɔ, í ŋá u nín là puee, ní binib lafun ŋúb-i mín.

⁸Ama doooo nee, ubɔ kaa láa ŋún ki ŋúb dilimbil: di sá kuwaŋkpituu kun baa ŋūń kí cúúyee, ki gbí tilool tin cáá ŋkúmee ŋmaniŋma.

⁹Dín ní ti cáā jáam ti-Baa Unimbɔti, dín ní ti tí cáā bííl binib bin Unimbɔti náań ki nántiń u-bee.

¹⁰Kinyɔkɔn ní ijaam nyēē, kíń kibaantiii poon ní mbusu tí nyēē. M-nabiyaamu an kaa máań kí nīn bí mín.

¹¹Nnyimbul ŋubɔ kaa bí ki nyēēinyiŋfi ili: min túee nì min mōee dicilpu.

¹²M-nabiyaamu, kɔŋki subu kaa lòon tikpasampiil, ní nunufi mun kaa lòon kɔŋki. Mín mbaantiim, nnyimbul ŋun nyēēnyim min túee kaa nyēēmin mōee.

¹³Ni-kansikin ubɔ bí ki cáā iciin ki nyáaan? Ú nīn sìntiń u-ba taapu kí nīn ŋáań atummɔnti min dàá dākà yii u lafun cáā iciinee.

¹⁴Ama a yaa ná a-jutiibi, a-poon tū, ki sá unil un mò kí nīn jítiń báa ŋmee, á taa nīn gá a-bindi yii a tókó ibaamɔn pu, kí taa mōnti a-ba.

¹⁵An ciinee kaa nyēēń yilpu, i sá taapu doo ní, nniyaamin, i nyēēń Sitaan cee ní.

¹⁶Kun puee laakin ní binib ná tɔb ní ki mò kí n̄n jítīn tɔbee, niin ní ni k̄ántí tin kaa kítèe n̄i tibɔkpiil kɔkɔ n̄i ti-bulfi.

¹⁷Ama iciin in nyēēn yilpuee, mpeepeekaamee i bí circir, ní boonee i cāabīn ḡgbansɔŋfi binib kansikin, ní ki m̄ɔ, ki bí soooo, ní ki cáá tinití tikpil, ki tūn atumm̄onti, ní kaa ḡantī binib, kaa cáá mpoonnyoon.

¹⁸Bin cāabīn ḡgbansɔŋfi bi-jutībi kansikinee b̄uul̄ nsɔŋfin dee, ní kí dāá k̄itī abil ḡjin sá yii bi bí deedee Unimbɔti nimiinee.

Jaaki 4

¹Ba di cāabīn kunikpɔŋkpɔkɔu n̄i kujaau ni-kansikin ní? An sá ni-kpɔkɔsib bin bí ni-wuntin ki jáá baabadalee di cāabīn t̄in̄ kɔkɔ.

²Ni cáá nnimitaataam tiba pu, ní kaa ḡūn̄ kí ká kudɔŋu, m̄in̄ puee ní ni yaa ká unilee, ní ní kpò. Ni-nimiliŋ m̄án̄ tiba pu ní naa ḡūn̄ kí ká kudɔŋu, ní kujaau n̄i kunikpɔŋkpɔkɔu k̄òð. Kun di ȳi-tī ní naa k̄ántí kun ní ni nyàabee di sá naa mèe Unimbɔti un t̄ī kudɔŋu gbantee.

³M̄in̄ ní ni yaa tí mēēUnimbɔti, naa k̄ántí, kun puee ni d̄akafī ilandɔkɔkpiti ní. Kun ni mèe ki nyàabee, ni là kí d̄ūú ḡjá min fáati-nee ní.

⁴Nimbi bin fá Unimbɔti kii kinimpulaakpaai n̄in̄ fēēn u-cal puee, naa nyí yii un nēēn duulnyee sá Unimbɔti pulinc̄onti n̄iin̄? Sii un p̄í duulnya kubɔɔtiuee kpántī Unimbɔti pulinc̄onti dee.

⁵Ni nyí fam ní Unimbɔti takaldau poon s̄oñaaan? yii: “D̄fām min bí unilinee cáá nnimitaataam tiwan tikpil pu.”

⁶Ama u ḡjáān-tī tiŋan tin w̄ikí ki lákatèe, kii an n̄in̄ ḡm̄ān̄ u-takaldau poon puee, yii: “Unimbɔti kaa ḡet̄in̄ bilambidambi, ama ní ki ḡjáān̄ bin s̄int̄in̄ bi-ba taapuee tiŋan.”

⁷M̄in̄ puee, s̄int̄imaan̄ ni-ba taapu kí t̄ī Unimbɔti, kí já n̄i Sitaan, see ú s̄ān̄ kí w̄atī-ni.

⁸S̄útimaan̄ kí p̄il̄ Unimbɔti, ní ú mun̄ n̄ s̄útīn̄ kí p̄il̄-ni. Ikp̄itidambi, f̄int̄imaan̄ ni-ḡaliī ikp̄itī n̄ nyā, mili mili dambi, f̄int̄imaan̄ ni-p̄obil̄iŋ poon n̄ nyā circir.

⁹Ni-kpitii puee, n̄in̄ bímaan̄ kunimbaaun kí n̄in̄ s̄ūn̄ ki ȳaliŋkí, ni-laati n̄ kpántī nsiim, ni-p̄ɔɔp̄indi n̄ kpántī-ni kunimbaau.

¹⁰S̄int̄imaan̄ ni-ba kí t̄ī Unimbɔti, ní ú ȳoñ-ni yilpu.

¹¹Nnabiyaamu, ní taa n̄in̄ s̄oñ̄ ki biil̄maan̄ tɔb. Sii un di yaa s̄oñ̄ ki bíil̄ a-nabikee àá a s̄oñ̄ ki k̄ūū u-b̄otee, mara ní a s̄oñ̄ ki bíil̄ ki k̄ūū. A yaa s̄oñ̄ ki bíil̄ maree, aa ti t̄ó-u dee, a s̄oñ̄ ki k̄ūū-u dee.

¹²Unimbɔti baba di t̄ī marab ní ki sá ub̄osoonli, ùn̄ baba di ḡūn̄ kí f̄ī binib, ùn̄ di tí ḡūn̄ kí kpò-bi. Sii ȳī a-ba ḡma ní ki s̄oñ̄ a-jutī b̄otī ní?

¹³Ní p̄il̄fimaan̄ k̄ɔŋk̄onnee, nimbi bin l̄ī yii: “D̄in̄ àá fool, ti d̄áá ȳikí kí cù kitiŋ kinee ni, kí tin ḡjá niin̄ dibindi diba, kí b̄ant̄ī kí ká animilee.”

¹⁴Ni nyí kun dàá fu bàñ ni-pu fooleeee? Ni péē bí kii dipòndi nín nyēēkí páań pu, án kūtì fiii, dí wāńkèe ní.

¹⁵An nín bàà máań ní lì puee sèé, yii: “Unimbòti yaa là ní ti yaa bí ki pōōyee, ti dàá ńá tinee nì tinee.”

¹⁶Ama nimbee, ni sá bilambidambi ní ki dākà ni-ba, an nì an lambilińee kaa ńāń.

¹⁷Sii un di nyí tińan tin bàà sá á ńá ní kaa ńée, ńá ikpiti.

Jaaki 5

¹Nimbi bigaajabee, ní pīlfimaan tibòti nee: Ní sō kí yālińkìmaan nnaabu ńun dàá bàñ ni-puee.

²Ni-gaajawanti sūū, ní akòtuu mó ni-wampeeńkaati.

³Ni-sindaariyab nì ni-nimiliń dāmintì, ní an nín dāmintì puee di dàá dāā lēēmmóon yii ni nín ńá mińyee kaa ńāń, ní kí dāā wò ni-wunti kii ńńmee. Di sá yii ni báá tiguaajati ńyuntijoolkaa poon ní.

⁴Bipaadambi bin kùń ni-sati naa pāń-bee, pīlfimaan, bíń di tíminsée. Bin cáń ni-jikaatee biilii bàñ Unimbòti ipon kòkò daan cee.

⁵Ni kāl duulnya poon ki jín mmøn ki ńá min fáati-nee, ní ki jín ki ńá ńkpam ki cíiti ńwiin ńun bi dàá cáá-ni kí kpòee.

⁶Ni tún bin kaa ńá tibee pu abògaan ki kūū-bi, baa kpákań-ni.

⁷Mín puee, nnabiyaamu, nín cáamaan kimòtii kí nīn cí ti-Dindaan gítintam. Kpèèmaan ukpaal nín jīń kimòtii pu ki cíiti u-wambòlkaati ń bī puee. U jīń kimòtii ní ki cíiti utaapeekaa ń nì, ní utaaajoolkaa mun ń dāā nì, ní ú nín cā u-jimmòntiiti.

⁸Ni mun ń nīn cáamaan an mòtiiki juti, kí nīn pōōntí kun puee ti-Dindaan tóób kí bàń.

⁹Nnabiyaamu, taa nīn gbùkuńmaan tób pu, an nín dàá ńá pu Unimbòti ń taa yíiń-ni ibòsoonee. Úń ubòsoonlee kaa dátìń-ti, u yú kipunyòkòpu ki dàá kí íbòsoon.

¹⁰Nnabiyaamu, téetímaan Unimbòti bōnaatiliibi bin nèn sòoń u-puee falaabi nì bi-mòtiiki pu, kí nīn bímaan mín.

¹¹Ti pàkà-bi kun puee bi yúl deedee. Ni gbīl bi sòoń Jòobi mòtiiki pu, ki nyí u nín jín kimòtii ki kátì, ti-Dindaan ńá-u mińyee, kun puee ti-Dindaan sá usaasòl ní ki ńāń.

¹²M-nabiyaamu, tin kaa péēmáań ní ńée di sá ní taa pùtì, ní taa pùtì yilpu kí taa pùtì taapu, kí taa pùtì bàà tiba nì tiba poon. An yaa sá Iińyee, kíimaan “Iiń,” an yaa tí sá Aayeyyaaa, kíimaan “Aayee,” an nín dàá ńá pu ní taa kó Unimbòti bòtinee.

¹³Ni-kansikin ubò yaa bí falaa poonee, ú nīn mèé Unimbòti. Ubò yaa tí bí ni-kansikin dipòopindi poonaaan, ú nīn gà ilan ki nyóńkí Unimbòti.

¹⁴Ubò yaa tí bí ni-kansikin ki būńee, ú tō bí yíiń Kriisitoo nikitil kpilib ń dāań kí dū ńkpam kí jōō u-yil pu kí yíiń ti-Dindaan yindi kí mèé kí tī-u.

¹⁵Bi yaa máká Unimbɔti pu ki mēē-u, see ubunlee n̄ ḡmátí, ti-Dindaan dàá tī-u ḡgbampɔn. Báà u yaa ḡá tikpitil tiba, Unimbɔti dàá dūú pō-u.

¹⁶An puee, n̄n̄ biitī ni-kpitii pu ki tükùmaan tɔb, kí n̄n̄ mèé ki tìlmaan tɔb, kí ḡmā kí n̄n̄ kántí dicaandi. Di sá yii unil un yú deedee Unimbɔti nimiinee yaa dū u-pɔbil kɔkɔ ki mēē-uee, an ḡáá atun̄kpaan ní.

¹⁷Eelii mun n̄n̄ péētí sá unifutifoo kii ti n̄n̄ bí pu nan ní, ní ki n̄n̄ mēēUnimbɔti n̄ u-pɔbil kɔkɔ, yii utaa n̄ taa ti n̄, ní utaa kaa lafun ḡítí jǔǔ kitij pu ali abin ata n̄ dijandi.

¹⁸Boonee ní u fātii tí mēē, ní utaa n̄n̄, ní kitij lòon̄ tijikaal.

¹⁹M-nabiyaamu, ni-kansikin ubɔ yaa dū Unimbɔti saḡḡu ki fá ní ubɔ yaa fātii ḡíinn̄í-uee,

²⁰udaan n̄ n̄n̄ nyí yii un di yaa nyántín unil nsan̄kpitin ki ḡíinn̄í-u nsamm̄nti poonee yàntí udaan nan̄ki n̄ ḡmátí, ní kí yàntí u-kpitii yaa wīkí min kamaayee Unimbɔti n̄ dūú pō-u.

1 Piyeer

1 Piyeer 1

¹Man Piyeer un sá Yeesu Kriisitoo kpambalee di jáam̄-ni. M̄ ḡmān̄ takalda nee kí tī̄ nimbi bin Unimbōti lútì ni yāl̄ ki bín̄ kunicaṅu Pōnti, Gaalaati, Kapadōsi, Asii n̄ Bitinii timmuneē ní.

²Ti-Baa Unimbōti lútì-ni n̄ u-Fām̄ puee ní n̄n̄ sá u-yab. U n̄n̄ péēlī m̄n̄ ki yōon̄ dooooyee ní. Kun puee u là ní n̄n̄ tó Yeesu Kriisitoo u-fatikuu ḡ fintí-ni ní nyā. Unimbōti ḡ ḡá-ni tiṅan̄ kí tī̄-ni ḡgbansōṅfi tikpil.

³Tí nyōṅkì Unimbōti ti-Dindaan Yeesu Kriisitoo Baa, kun puee u sún̄ ti-saai tikpil. U n̄n̄ fikitì Yeesu Kriisitoo ditaṅkpiilinee ní u pú-ti nsan̄ tí kó dimaṅfapōndin. Kōṅkōnnee ti cáá dimákal̄ tiṅman̄ pu yal.

⁴An pu ní ti cí ú tī̄-ti difakal̄ din u yōon̄ kí dāá tī̄ bin sá u-yabee. Difakal̄ gbantee kaa bíil̄, kaa jòontí, kaa dōotí. Unimbōti dū-dì ki kpáafī yilpu ki yōon̄ nimbi ní.

⁵Ni n̄n̄ fōō̄ Unimbōti bōti ki kíiyee ní u ḡúb̄-ni taapu doo n̄ u-pōṅṅu, an n̄n̄ dàá ḡá pu ḡwiin̄ dalee ú dāá tī̄-ni difiil̄ din u bōntì ki yōon̄ee, báa ḡma ḡ dāá wāl̄.

⁶M̄n̄ puee ní yàntī̄ án̄ n̄n̄ mōn̄-ni báa ḡyuntī fiii ḡun̄ poon̄ ti bí nee gba ní icōṅki n̄n̄ bí puee n̄ i-nyōkōm̄ yaa cāabín̄-ni kunimbaau.

⁷An falaabee sá kí cōṅkì kí kpèè̄ yii ni-fookiiu, u pōōyaaa waa pōō. Kpèè̄maan, sindaariya un bí ki dàá wāṅkì ḡwiin̄ dalee, bi ḡáān̄-u ḡḡmin̄ ní kí kpèè̄ yii u sá umōntaaa waa sá. M̄n̄ mbaantiimin̄ ní falaa sá kí cōṅkì ni-fookiiu un jítin̄ sindaariya kpataaayee kí kpèè̄ yii u pōōyaaa waa pōō. Ni-fookiiuee cáá kudapōōu ki jítin̄ sindaariya kpataaa. Ni yaa ján̄ ki nyáan̄ icōṅki poonee ní Yeesu Kriisitoo ḡ dāá pākà-ni kí tī̄-ni tinyool̄ n̄ jilma u-gítintam̄ dal.

⁸Yeesu Kriisitoo gbantee naa ká-u n̄ ni-nimiliṅ̄ ama ni n̄eēn̄-u. Ni fōō̄-u ki kí kaa wāl̄-u, ki fāal̄ n̄ dipōōpiṅkpaandī din baa ḡḡn̄ kí māafèe.

⁹Kun puee ni dàá dāá fōō̄ ni-fookiiu paati tin sá ni-nammū fītamee.

¹⁰⁻¹¹Unimbōti bōnaatiliibi n̄n̄ nyāab̄̄ mmōntiim̄ kí b̄ee ḡyuntī n̄ min̄ poon̄ ní Unimbōti dàá dāá fī̄-nee ní ki dāa n̄n̄ sōōn̄ tiṅan̄ tin Unimbōti dàá dāá ḡá kí tī̄-nee pu. Kriisitoo Fām̄ di n̄n̄ bí bi-ni ní ki dākà-bi falaa un u dàá dāá j̄ee n̄ tinyool̄ tin dàá dāá páann̄i falaayee boonee.

¹²Dfāmee di dākā u-bōnaatiliibi yii tibōti tin bi bí ki sōōnee, b̄in̄ kaa làá ká ti-poon̄ tiba, ama nimbi di dāa yì. Kōṅkōnnee bin sōōn̄ Kriisitoo bōmōntiitee sōōn̄ n̄ ni tibōbaantiil̄ gbantī ní, kun puee Unimbōti Fām̄ min̄ nyánn̄ī yilpuee di dākā-bi. Ali gba Unimbōti tūuni mun̄ bàà là kí b̄ee min̄ ní an bōtee dàá j̄t̄ee.

¹³M̄n̄ puee, ní bōntí̄ ni-ba ni-nimiliṅ̄ ḡ n̄n̄ có̄ tiṅan̄ tin pu ni māká̄ yii Yeesu Kriisitoo yaa làá gítin̄ ni dàá fōō̄yee pu, kí n̄n̄ ḡúb̄ ni-ba,

¹⁴kí n̄n̄ tó Unimbōti, kí taa n̄n̄ gítī̄ n̄ó̄ ni-bimbikpitim̄ min̄ naa n̄n̄ dàá nyí ki ḡáānee.

- ¹⁵Ní n̄n bí circir ni-bimbim k̄k̄o poon kii Unimb̄oti un yíín-nee nín bí circir puee.
- ¹⁶Ali kii Unimb̄oti nín lī u-takaldau poon puee yii: “Nín bímaan circir kun puee man bí circir ní.”
- ¹⁷Ni-wimmeem poonee ni ȳi Unimb̄oti yii ni-Baa. Ama ní t̄et̄í yii ùn̄ di s̄oñ b̄áa ḡma b̄oti ki n̄óó n̄i min udaan ḡee, kaa ḡant̄i, an puee iyunti in k̄ín ní dū kí k̄āl̄ duulnyanee, d̄àk̄amaan-u ni-bimbim poon ni nín t̄ó-u puee.
- ¹⁸Nimbi ni-ba nyí Unimb̄oti nín dī min ki nyánt̄ín-ni ni-naanjab sani in ni n̄n n̄óó fam tiba kpá poonee. An kaa sá tiwan tin bííl̄ kii animilee áá kii sindariyee ní u dū ki nyánt̄i-ni.
- ¹⁹Ama an sá n̄i Kriis̄itoo fatikuu un jítiñ tik̄k̄o n̄i tik̄k̄oee ní u dū ki nyánt̄i-ni. Kriis̄itoo di sá kii dipibim̄ontiil̄ din pu baa k̄ant̄i tik̄pitil̄ tiba n̄i tibee.
- ²⁰Unimb̄oti l̄ēēKriis̄itoo ki w̄aati ní ki nín náán̄ duulnya, ni-puee ní u nyánt̄i-u ḡyuntijoolkaa nee poon.
- ²¹U-pu ní ni f̄ōō Unimb̄oti un fikiti-u ditaḡk̄piilin ki t̄i-u tinyoolee ki kíí, an nín dàá ḡá pu ni-fookiiu n̄i ni-mákal̄ n̄ n̄n c̄ó Unimb̄oti puee.
- ²²Ni n̄óó mbaam̄on saḡḡu ní ni-p̄obiliḡ ḡáḡk̄i, ní ki n̄eeñ ni-nabiyaamu bin mun f̄ōō ki kííyee mbaam̄omin. M̄iñ puee n̄iñ gb̄int̄i ki n̄eeḡmaan t̄ob tik̄pil̄ n̄i ni-p̄obiliḡ k̄k̄o.
- ²³Di sá yii Unimb̄oti un t̄i dimaḡfal, ki bí jaanjaanee di t̄i-ni dimaḡfap̄ondi. Dimaḡfal gbantee kaa nyán̄ní ubaati un k̄úyee cee, ama di nyán̄ní Ubaati un kaa k̄úyee cee ní.
- ²⁴Kii Unimb̄oti takaldau poon nín lī puee yii: “Binib k̄k̄o bí kii timoolee ní, ní bi-nyooti bí kii mpumpukumee, kumoou k̄ōō ní mpumpukum̄ n̄ gb̄at̄i.
- ²⁵Ama ti-Dindaan b̄oti t̄iñ p̄éeb̄i ní kí n̄n cá jaanjaan.” Tib̄oti gbanti di sá Kriis̄itoo b̄om̄ontiiti tin bi c̄áán̄ ki s̄oñ̄ n̄i ni nee.

1 Piyeer 2

- ¹M̄iñ puee, ní fá tib̄ok̄pitil̄ k̄k̄o n̄i inyim̄on k̄k̄o n̄i mpoonnyoon n̄i ipoompoon n̄i tib̄ofan disoondi.
- ²Ní n̄n n̄eeñ Unimb̄oti b̄oti kii mbip̄omu nín n̄eeñ mbiim puee kí ḡm̄a kí c̄ù nȳok̄oḡu Unimb̄oti saḡḡu poon kí tin k̄at̄i-ku.
- ³An bí kii Unimb̄oti takaldau poon nín lī puee yii: “Ni d̄áká ki ká ti-Dindaan nín m̄ō puee.”
- ⁴S̄utiñ kí p̄il̄maan ti-Dindaan Yeesu un t̄i dimaḡfalee. U sá kii ditaḡk̄pal̄ din binib d̄ū f̄ee, ama Unimb̄oti ká yii di jítiñ tiwan k̄k̄oee pu ní u l̄ē-d̄i.
- ⁵Nimbi bin mun ká u-cee dimaḡfalee, s̄utiñmaan kí n̄n sá kii ataḡk̄peeyee Unimb̄oti n̄ d̄ū m̄a u-k̄oḡkoḡḡu. Ní ȳant̄i Unimb̄oti F̄ām̄ n̄ d̄ū-ni kí kp̄ant̄i bisaraḡaliibi bin bí circiree, kí d̄ū ni-ba kí t̄i Unimb̄oti, Yeesu Kriis̄itoo puee ní n̄n sá saraa un fáati-uee.

⁶Kpèèmaan Unimbɔti nín lī u-takaldau poon puee yii: “M lēēditaŋkpal din jítiñ atañkpee kəkəe ki dū-dì ki tíl kii ditampinjalee m-diiku kun bí Siiyɔn jool puee. Un kamaa di yaa fǔǔ-di ki kííyee, icoo kpá kí jī udaan.”

⁷Dipoondi gbantee sá ki tī nimbi bin fǔǔ ki kííyee ní, nimbi bin nyí yii ditaŋkpalee sá-ni tiwaŋkpaandi ki jítiñ tikəkə nì tikəkəe. Ama bin kaa fǔǔ ki kííyee pu ní Unimbɔti takaldau sòon ditaŋkpalee pu yii: “Ditaŋkpal din bidimaliibi nìn dūu fée di dāa kpánti ditaŋkpal din ɲúb kudii pɔŋɲuee.”

⁸An gítí lī laaaba yii: “Ditaŋkpal din binib gbéetée dee, dín di yàntí binib lítí.” Kun pu bi lítée di sá baa là kí pīlfi Unimbɔti ɔti. An di yì-tì Unimbɔti yóon yii an bàñ-bi mín.

⁹Ama nimbee, ni sá dinibul din Unimbɔti lúti ní nīn sá u-yabee ní. Nimbi di sá Unimbɔti saraañaliibi ní ki sá ditimbundi din nóó ún Unimbɔti babee. U yíiñ-ni ní nyānni dibɔmbɔndin kí kó u-walfimɔntiŋun kun puee u là ní lēēseera u-tunnyaañɲi pu.

¹⁰Doooyee, naa nìn sá Unimbɔti yab, ama kəŋkənee ni kpánti Unimbɔti yab. Doooyee, naa nìn nyí yii Unimbɔti sūn binib saai, ama kəŋkənee u sún ni-saai ni béè.

¹¹M-nabineenkaamu, m mēé-ni kii ni nín sá binicambi duulnya nee poon puee, ní cúúmaan ni-ba nì bikədeekpitib kun puee an di jáaŋ kinaŋ.

¹²Ní nīn cáá mbimbimontiim bin kaa nyí Unimbɔtee kansikin, báà biba yaa bàà bí kúŋfi ni-boon yii ni sá binikpitibaaa, bi yaa ká ni-tunnyaañŋee, Unimbɔti ń yàntí bí béé yii an tunnyaañɲi nyānni ún-cee ní, ní bí pàkà-u ɲyunti ɲun u yaa láa dómiŋee.

¹³Ti-Dindaan puee, nīn tómaan biyidambi, kí nīn tó gɔmina un cáá mpon ki kpéé kitiŋ kəkəe,

¹⁴kí nīn tó bibɔtiibi bin bi kaaŋ bí nīn dátí diganɲandambi tafaliŋ, kí nīn pàkà bin ɲaaŋ tiŋanee.

¹⁵Unimbɔti nín là puee di sá ní nīn ɲaaŋ tiŋan án piñ bigbaambi bin kaa nyí tibe nyɔmmu, bí taa ká tiba kí sòon ni-pu.

¹⁶Ní nīn bímaan kii binib bin Kriisitoo tī dibatolee, ní taa nīn sá binib bin dī dibatol pu ki kánti inaakpal ki ɲaaŋ ikpatee, ama dūmaan ni-batolee kí nīn ɲaaŋ kii Unimbɔti tontɔnliibee.

¹⁷Nīn tómaan binib kəkə, kí nīn néen Kriisitoo yab, kí fəŋkimaan Unimbɔti, kí nīn tó gɔmina.

¹⁸Nimbi bin ká binib ceeyee, ní sintīn ni-ba taapu kəkə kí tī ni-kpililbí kí nīn tó-bi mmontiimin, an kaa sá bidambi yaa sá binib ki mōee baba ní ní nīn tó-bi, báà bidambi ɔti yaa pōyaaa, ní nīn tó-bi.

¹⁹Ni nín ɲaaŋ Unimbɔti lammee puee ní bidambi yaa bí sàantí-ni fam an ɲān, Unimbɔti dàá biñ ni-boon.

²⁰Bi yaa bī gbàà-si digangam pu ní a jīn kimōtiyee, ipaati ilai ní a dàá ká poon? Ama a yaa ná tin nānee ní bi yaa bī sàantí-si ní a jīn kimōtiyee, mín di nān Unimbōti nimiin.

²¹Kun pu Unimbōti là ní nīn bí mimmee di sá Kriisitoo u-ba jín falaa mín ni-pu, ní ki bí yii ni mun í nókó u-tabōbiliŋ kí jī falaa gbanti.

²²Waa ná ikpiti báà iba, baa gbīl u-nyōkōn nnyimōn n̄ubō.

²³Bi nín bí ki sī-uee, waa sī ubō ki téen, bi nín sān-uee waa tó-bi mbusu, ama u dū ki ná Unimbōti un sōn tibōti n̄i deedeeyee n̄aan ní.

²⁴Ún Kriisitoo di fōō ti-kpitii ki ná u-ba pu ní ki fōō ti-kpitii tafadaaldi ndōpuntikaa pu, an nín dàá ná pu tí nyā ikpiti poon kí nīn kíh ki bí deede manfal poonee. Bi nín gbán-u u-wunti léetì puee di cāantí ni-weeni.

²⁵Kun puee dooooyee ni n̄n wāŋkì kii ipii in kaa cáá ukpaalee ní. Ama ní kōŋkōnee ni fātii gítii un sá upikpaal ki sá un cí ni-nammuee cee.

1 Piyeer 3

¹Nimbi binimpoobi mun, ní sintīmaan ni-ba taapu kí tī ni-calib, an nín dàá ná pu ni-calib kansikin biba yaa kaa fōō Unimbōti bōtee, bi yaa ká ni-bimbimōntiimee bí fōō kí kí án taa nīn gítí sá n̄i kinyōkō ní ní dū kí sōn-bi,

²ama án nīn sá n̄i ni-bimbim min ni cáá ki tó binibee pu.

³Unimpu yaa là kí nīn nānee, an kaa sá ú nīn dākafī tiwun nyaan̄ku n̄manin̄ma pu, an dākà yii diyikpiboobil n̄i sindaariya falfatib n̄i an léen̄kaati, n̄i tiwammōntiil diloondi.

⁴Ama u máan kí dākafī u-bimbim min u cááyee pu, an dākà yii u-pōbil poon í nīn nān, ú nīn mō, ki bí soooo. An nyaan̄kuee di kaa jōontí, mín di nān ki jítii tikōkō Unimbōti nimiin.

⁵Doooyee nimpoobi bin n̄n bí circir ki máká Unimbōti puee nín n̄n bōntí bi-ba puee dee, ní ki sintīn bi-ba taapu ki t̄i bi-calib.

⁶Ti-naanja Abraam nimpuu Saaraa nín n̄n bí puee dee, u n̄n s̄intiñ u-ba ní ki tī u-cal Abraam, ní ki yīn-u u-dindaan. Ni yaa n̄aan̄ tiŋan, kaa yant̄i tiba í fāan̄-nee, mimmee, ni kpánti Saaraa naantiibi dee.

⁷M̄in̄ mbaantiim ní nimbi bininjabee, ni mun í nīn n̄ub̄ ni-nimpoobi tiŋan, kí nīn nyí yii bi-pōŋŋu kaa bān̄ ni-yōŋu, kí nīn tó-bi, kun puee mman̄fafōkōn n̄un kaa kúntee mbaanti ní Unimbōti dàá dāá tī unin̄ja n̄i unimpu. Ni yaa bí mimmee, tiba kaa likintí ni-wimmeem.

⁸Nimbi bin kínee, ni-kōkō í nīn cáamaan nlandōkōbaanti kí nīn sūn̄ tōb saai kí nīn n̄eeñ tōb kii nnabiyaamuee, kí nīn n̄aam̄maan tōb tiŋan kí nīn sintīn̄ ni-ba taapu ki t̄i tōb.

⁹A-juti yaa ḡá-si min kaa ḡāḡee á taa téen-u, u yaa tí sī-saaa, á taa sī-u kí téen, ama mēè Unimbōti ḡ bliḡn udaan pu, kun puee Unimbōti pōon yii u dàá bliḡn ni-pu ní, an pu ní u yíḡn-ni.

¹⁰Kii Unimbōti takaldau poon nín lī puee, yii: “Un yaa là kí kàl kí jī mmōn u-wiini poonee, ú cúú u-limbil kí taa nín sōon tibōkpiti kí taa nín mōntí.

¹¹Ú fá tikpiti kí nīn ḡáán tin ḡāḡee, kí nīn nyāab ḡgbansōḡfi baabadal.

¹²Kun puee ti-Dindaan kpēè bin bí deedeeyee tiḡan ní ki fōōl bi-wimmeem, ní ki fātī u-kpaḡkpamboon ki tī bikpitiḡaliibi.”

¹³Ni yaa cáá difaḡḡil ki ḡáán tiḡanee, ḡma di dàá ḡá-ni tikpiti?

¹⁴Báá tiḡan tin ni ḡáḡee pu ní ni yaa bí jīn falaayee, ní taa yāntī án nīn wù-ni. Ní taa yāntī binib ḡ bíl ni-pōbiliḡ kí kōn-ni tifaandi.

¹⁵Ama, ní nīn tómaan ti-Dindaan Kriisitoo ni-pōbiliḡin, kí bóntí kí nīn cí baabadal un kamaa di yaa bālfī-ni ni-mákal din ni cáá Kriisitoonee taapuee ní ḡmā kí kí-u.

¹⁶Ama, ní kíí an nibee soooo kí nīn tómaan-bi kí taa yāntī bí ká ni-pu ibōkpiti kí sōon. Ní nīn ḡbīnti ki dākà ni-bimbimōntiim min ni ká Kriisitoonee, an nín dàá ḡá pu ubo yaa bàá làá bíl-nee icoo ḡ cúú udaanee.

¹⁷An ḡān ki tī-si á jī falaa tiḡan tin a ḡáḡee pu, ki jíḡn á jī falaa a-kpiti pu. Dyunti ḡubōee Unimbōti yāntī án bàḡ mīn.

¹⁸Di sá mīn ní Kriisitoo u-ba mun kpī binib kpiti pu. U kpī dibaba ja ní, binib kpiti pu, ún un bí deedeeyee kpī bin kaa bí deedeeyee pu. U ḡá mīn kí ḡmā kí cáá-ti Unimbōti cee ní. Bi kū-u ama ní Unimbōti Fām fātī ḡíḡnī-u dimaḡfalin.

¹⁹U kpīyee ní ki cūti ditaḡkpiilin ki sōon Unimbōti bōti ki tī bitaḡkpiibi bin bí sarkan niinee,

²⁰an dākà yii binib bin kōkō nīn bí Noowee yuntiḡee. Bi-kansikinee, binib binii jantaḡa di nīn kó buḡalimbun ki dēen nnyim pu ki ḡmāti. Ama bin kínee kpī kun puee bi kpēeUnimbōti mōtiiki fam ḡyunti ḡun Noowee nīn bí kpāá buḡalimbuee.

²¹Nnyim min nīn fī binib biniiyee náán nī min ni fūul ki kāntí difiil nan ní. Unimbōti nyim difaldee kaa sá kí lēētiwun pu jōkōnti, an sá kí mēè Unimbōti ú fíntí ti-pōbiliḡ ḡ nyā circir ní. Yeesu Kriisitoo fikititam pu ní Unimbōti nyim difaldi cáá mōn kí fī-ti.

²²U búnti yilpu ki kāl Unimbōti ḡaḡḡiḡḡu pú, kí jī dibeel itūun nī bin kōkō cáá ipōn ki bí yilpuee pu.

1 Piyeer 4

¹Ni nyí yii Kriisitoo kpī, mīn puee ni mun nīn bímaan kii ni kpīyee. Kun puee un kpīyee ún kaa ti ḡáán ikpiti.

²Kí yōon kōḡkōnee kí nīn cée, ní dū ni-yuntii in kíḡ ní dūú kāl duulnyanee kí dūú ḡá min Unimbōti lēe, kí taa ti ḡá min fáatī ni-wuntee.

- ³Doooooyee, ni n̄n dū nyunti tikpil ki ḡá kii bin kaa nyí Unimbōtee n̄n ḡáán puee, ni n̄n ḡáán tin k̄k̄o cāab̄n̄ n̄timbiilee, ní ki ḡáán tij̄k̄ondi, ki bí j̄iḡaalib poon baabadal, ki nyù idafi ki gb̄èè, ki j̄iḡ ki l̄akatí ni-ba pu, ki tòot̄i awaa, kun mun kaa ḡān̄ kpataaa Unimbōti nimiinee dee. K̄oḡk̄onnee an ḡm̄ānt̄i.
- ⁴An ḡá bin kaa nyí Unimbōtee maamaaci ni n̄i bi n̄n kaa ti kp̄áf̄i ki ḡáán tin cāab̄n̄ n̄timbiilee, ní bi s̄ī-ni.
- ⁵Ama bi dàá dāá yūl̄ kí s̄oñ bi-tuḡkpitiḡ gbanti pu Unimbōti un b̄ont̄i ki cí kí s̄oñ binifoobi n̄i bitaḡkpiibi bōtee nimiin.
- ⁶An pu ní tib̄m̄ont̄iil b̄ān̄ bitaḡkpiibi an n̄n dàá ḡá pu bi yaa s̄oñ bi-bōti kii binifoobee, bí n̄n̄ bí dimaḡfal̄in ḡf̄āmin Unimbōti nimiinee.
- ⁷Duulnya k̄unt̄itam t̄ob̄īn̄, ní ḡúb̄ ni-ba mm̄ont̄iim kí fint̄iḡmaan kí ḡm̄ā kí n̄n̄ mèè.
- ⁸Ama kí w̄at̄ēe, ní n̄n̄ néem̄maan t̄ob̄ tikpil, kun puee un cáá dineendi tikpilee b̄īnt̄i ikpiti tikpil pu ní.
- ⁹Ní n̄n̄ f̄oōl̄ ni-jutiibi ni-dumpui kí taa n̄n̄ gb̄ukuḡ.
- ¹⁰Kii Unimbōti n̄n̄ p̄ú-ni ḡḡmam̄ mi bí t̄ob̄in puee, n̄n̄ cáá t̄utuḡmaan t̄ob̄. Ni yaa b̄ī ḡáán mimmee binib dàá ká Unimbōti ḡanti k̄k̄o tin u là kí t̄ī-bee.
- ¹¹Un ní Unimbōti p̄ú ú n̄n̄ s̄oñ u-bōtee, ḡ s̄oñ-t̄i. Un ní u yaa tí p̄ú ḡḡmam̄ ú n̄n̄ t̄utuḡ u-jutiibee máan̄ kí dū ḡḡmam̄ min Unimbōti t̄ī-uee ní kí dūú t̄utuḡ binib, an n̄n̄ dàá ḡá pu tin k̄k̄o ni ḡáán̄ n̄i Yeesu Kriis̄itoo t̄utuntam puee, án n̄n̄ t̄ī Unimbōti tinyoolee; ùn̄ di pé̄ȳi tinyool n̄i mp̄on̄ kí n̄n̄ cá jaanjaan! Ameen.
- ¹²Nnabiyaamu, án taa ḡá-ni maamaaci ic̄oḡkikpaan in poon ni bí nee kii an sá-ni tib̄ocanee.
- ¹³An yaa sá yii ní j̄ī falaa un Kriis̄itoo j̄īnee ní n̄n̄ f̄aalmaan, an n̄n̄ dàá ḡá pu daliḡkin u dàá d̄ak̄à u-nyootee, yaadalee ní ni dāa k̄ānt̄i dip̄oḡpiḡkaandi.
- ¹⁴Ni n̄n̄ n̄óó Kriis̄itoooyee pu ní bi yaa s̄ī-nee, án n̄n̄ m̄ōñ-ni, kun puee Unimbōti F̄ām̄ min cáá tinyoolee bí ni-pu.
- ¹⁵Ni-kansikin ub̄o falaaú ḡ taa n̄n̄ sá yii u k̄ūū unil̄ àá u yūñ̄ tiba, àá u sá digan̄gandaan, àá u cáá u-ba ki t̄o biba b̄otin, an pu ní u b̄ī j̄īn̄ an falaaú.
- ¹⁶Ama an yaa sá yii a n̄n̄ n̄óó Kriis̄itoooyee pu ní a yaa b̄ī j̄īn̄ falaaayee, án taa n̄n̄ cáá-si icoo, á n̄n̄ j̄āam̄ Unimbōti yii binib b̄èè yii a sá Kriis̄itoo ȳou.
- ¹⁷Dyunti ḡun Unimbōti dàá s̄oñ b̄āa ḡma bōtee b̄āan̄ ní nee. U dàá péé péé kí s̄oñ bin sá u-yabee b̄oti, mimmee, u yaa ká timbi bin sá u-yabee pu tiba ki s̄oñ̄ee, mana ní bin ȳī kaa f̄ōō Unimbōti b̄m̄ont̄iiti ki kíiyee cee dāa n̄n̄ bí dee?
- ¹⁸Kii Unimbōti takaldau poon n̄n̄ l̄ī puee, yii: “An yaa p̄ōō ki t̄ī bin n̄óó Unimbōtee ḡ tin ḡm̄át̄ēe, mimmee bin kaa n̄óó Unimbōtee n̄i bikpitiḡaliibee b̄īn̄ cee dāa n̄n̄ bí mana dee?”

¹⁹Mín puee, bin bí ki ñáán Unimbɔti làtam ní ki bí falaa poonee ñ pɔɔn bi-ba kí mòtí nīn ñáán tiŋan kí dū bi-mákal kɔkɔ kí ñá bi-naanliu un ñáán tin u pɔɔneee ni.

1 Piyeer 5

¹Kɔŋkɔnnee m bí sòon nì Kriisitoo nikitil kpilib bin bí ni-kansikinee ní nee. Man mun sá Kriisitoo nikitil kpiliu ní m-ba, m ká Kriisitoo falaabi nì m-nimiliŋ, ní ki dàá dāá fɔɔ m-jandi tinyool tin dàá dāá nyēe poon.

²M bàlfī yīi ní kpàà Unimbɔti nikitil din u dūu ñúbiñ-nee, ní dū nlammoniim min fáatī Unimbɔtee kí kpàà-dì, án taa nīn sá nì kugaau, kí taa nīn tí sá yīi ni tūn ki nyàab animil, ama nīn tūmmaan nì ni-pɔbiliŋ kɔkɔ.

³Ní taa nīn wááb binib bin bi dū ki ñúbiñ-ni ní kpààyeee, ama nīn sámaan binib bin bimbim sá mmontiim bí nīn kpèè ki tááyeee.

⁴Ni yaa ñúb-bi mín, ali ki tin sāa daliŋkin ní Kriisitoo unaakpaakpil dàá bàñee, u dàá dāá tī-ni ni-paati tin sá tinyool ki dàá nīn bí jaanjaanee.

⁵Nimbi binaacimpɔmbi mun, ní sintīn ni-ba taapu kí tī bikpilib. Ni-kɔkɔ ñ sintīn ni-ba kí tīmaan tɔb kí nīn ñáán atuun ki tì tɔb, kun puee Unimbɔti takaldau poon lī yīi: “Unimbɔti kaa gèetīn bilambidambi, ama ní ki ñáán tiŋan ki tì bin sintīn bi-ba taapuee.”

⁶Mín puee, sintīmmaan ni-ba Unimbɔti ipɔn kɔkɔ daan taapu, an nīn dàá ñá pu ñyunti ñun Unimbɔti yóonee yaa láā bāañee, ú dàá yòon-ni yilpuee.

⁷Tùkùmaan-u tin kɔkɔ péepáb-nee kí dūmaan tikɔkɔ kí ñá u-ñaan, u dàá kpèè kí tī-ni.

⁸Ní kítí ni-ba kí nīn nyīn ni-ba, kun puee ni-nannanliu Sitaan bí ki yīn kii gbikinti nimiliŋ nīn mán pu u nyàab kun u yaa péekée ú cúú kí ñmóee ní.

⁹Mín puee, ní ñúb ni-ba ni-fookiiu poon, kí yí Sitaan. Kun puee ni nyí yīi ni-nabiyaamu mun yāl duulnya jaŋŋi kɔkɔnee bí ki jīn falaa gbanti ubaanti mín ní.

¹⁰Ni yaa láā dū ñyunti fīi ki jín falaayee, Unimbɔti un cee ní tiŋan kɔkɔ nyēēn, u yīn-ni Yeesu Kriisitoo puee, dàá dāá tī-ni u-nyooti tin dàá nīn bí kí nīn cá jaanjaanee. U dàá dāá kítí-ni u-ba, kí bāañ-ni inyaan kí tī-ni mɔn kí dū-ni kí yóon laakin tiba kpá kí cīŋki-nee.

¹¹Ún di sá ipɔn daan kí nīn péecāá cá jaanjaan! Ameen.

¹²Siilaasi ní m kàān anyɔɔbuŋkaaŋkaa nee ki tükū, ki yānti u ñmān-ni takalda nee, kun puee m nyí yīi u sá kinabiki kin yú deede nimbɔtisan poonee. M là kí tī-ni kunyannyaau kí mòtí tükū-ni nì ibaamɔn yīi Unimbɔti ŋanti tin ni fɔɔyee tì lafun sá mín ní, ní nīn ñúb-tì án nīn pɔɔ.

¹³Babilɔn nikitil din Unimbɔti lútì kii u nīn lútì ni mun puee, jáarín-ni. Maarki un kpánti kii m-jipɔonee mun jáarín-ni.

¹⁴Ní jāammaan tɔb kunabitiiu jaamii. Unimbɔti ń tī nimbi bin kɔkɔ sá Kriisitoo yabee ngbansɔŋfi.

2 Piyeer

2 Piyeer 1

¹Man Siimɔn Piyeer un sá Yeesu Kriisitoo kpambal ki sá u-tɔntɔnliu muee di ɣmàñ-ni takalda nee, nimbi bin fɔɔ Unimbɔti bɔti ki kí mbaantiim kii timbee. Yeesu Kriisitoo un sá Unimbɔti ki sá ti-Fiiliuee di ɣá mín ki tī-ti, kun puee u sá deedeedaan.

²Kii ni nín nyí Unimbɔti nì ti-Dindaan Yeesu Kriisitoo puee, ú ɣá-ni tiɣan kí tī-ni ɣgbansɔŋfi tikpil.

³Yeesu Kriisitoo pɔŋɣu tī-ti ɣɣmam min ti ɣùh kí nīn bí ki nákañ Unimbɔtee, ki yānti ti bée un yíin-ti tí dāañ kí fɔɔ u-nyooti nì u-ɣantee.

⁴Mín mbaantiim ní u tí pɔɔn-ti apoɔŋkpaan ɣin jítiñ tikɔkɔee, an nín dàá ɣá pu ni yaa fɔɔ ipoon gbantee, ní taa nīn cáá nnimitaataam tikpitiil pu kí wāŋkì, ama ní fɔɔ mbimbim min náañ nì Unimbɔti yamee.

⁵An puee, kii ni nín fɔɔ ki kíyee puee, ní pɔɔmmaan ni-ba kí nyàab mbimbimɔntiim kí kùti fookii pu, ni yaa ká mbimbimɔntiimee, ní nyàab dinyil kí kùti,

⁶kí pɔɔmmaan kí ɣúb ni-ba kí kùti dinyil pu. Ni yaa ɣún ki ɣúb ni-bee, ní nyàab kimɔtii, kimɔtii boonee ní nyàab kí nīn tó Unimbɔti mmɔntiim.

⁷Ni yaa tó Unimbɔti mmɔntiiminee, ní nīn néeñ ni-nabiyaamu mun nóó Kriisitooyee kɔkɔ, boonee ní kí nīn néeñ báà ɣma.

⁸Mbimbimɔntiim min ni máañ kí nīn cááyee dee. Ni yaa cáá-mì ní mi wīkí ni-ni tikpilee, an di dàá yāntī ní nīn béetí ti-Dindaan Yeesu Kriisitoo mmɔntiim kí nīn cá, ní kí nīn bí kii isufi in lòon asubimɔntee.

⁹Ama un kaa cáá an lakasimɔntiibee kaa ɣùh kí wāl kí bà ndan Unimbɔti saŋɣu poon, ní ki pūti kpááá súnti yii Unimbɔti nīn fínti u-pɔbilin kpitii kɔkɔ.

¹⁰Kɔŋkɔnnee nnabiyaamu, ni nyí yii Unimbɔti lútì-ni ki yíin-ni ní nīn sá u-yab ní. Ni yaa pɔɔntí ki gbínti nóó nsan gbantee, ni kpá kí wāŋkì jaanjaan.

¹¹Ní Unimbɔti n dāá pɔ-ni nsan ní kó ti-Dindaan Yeesu Kriisitoo un sá ti-Fiiliuee beel ñin kaa cáá dikuntilee ni sɔkɔmii. Ún di dàá nīn sá ubɔti kí nīn cá jaanjaan.

¹²M nín là yii ní ká tin m sòɔñee pu ní m gbínti ki téetí-ni múmul, nì min kɔkɔ ni nīn péēnyí-ti ki yú ibaamɔn bɔti tin ni fɔɔ ki kíyee poon ki ɣúb an píkée.

¹³Ama m là yii m nín dáá bí dimaŋfal poon pu nee, m nīn péēcó an bɔti pu ki téetí-ni múmul.

¹⁴Kun puee ti-Dindaan Yeesu Kriisitoo tükū-mi yii an kaa làá ti yúntí m dàá kpú.

¹⁵An puee m dàá pɔɔn m-pɔŋɣu nyɔkɔm kí dākà-ni nsambiyaamu mun ní ni dàá ñi kí nīn téetí an bɔti pu baabadal m-kúm boonee.

¹⁶Di sá yii ti-Dindaan Yeesu Kriisitoo dāantam nì u-pɔŋɔ bɔti tin ti sòŋ ki tükū-nee kaa sá mmaam min binib nyí bi-landəkɔin ki sòŋee, timbi ti-ba di baasii ká-u nì ti-nimiliŋ u nín sá ukpaan miŋyee.

¹⁷Timbi nimilin ní u-Baa Unimbɔti tī-u jilma nì tinyool; Unimbɔti un sá ukpaan tinyooldaanee bí yii: “Un bí nee di sá m-Jipɔɔn un m néesee, m-pɔbil sòm u-pu.”

¹⁸Timbi nì u di nìn bí circir jool pu ní Unimbɔti sòŋní mín yilpu.

¹⁹An puee, ti mōtī baasii fōō ki kī Unimbɔti bɔnaatiliibi nín sòŋ tiŋyee. Ní gīn ni-landəkɔi tibɔti gbanti pu, kun puee tì bí kii fitila nín yú dibɔmbɔndin ki wāl pu ali ŋwiín n̄ dāá nyānní puee ní, ní Kriisitoo un sá kii utaafaŋmalbijee n̄ dāá ŋmíntí ni-pɔbiliŋ.

²⁰Kí wàatēe, tin m là ní béeyee sèe: Uɔ kaa ŋūn kī dū ūn u-ba ciŋŋu kī béé tibɔti tin Unimbɔti bɔnaatiliibi ŋmān ki ŋá takaldanee.

²¹Kun puee tin kəkɔ Unimbɔti bɔnaatiliibi lēe, tiba nì tiba kaa nyānní bi-làtamin, ama an sá Unimbɔti Fām di kpɔti-bi, ní bi fōō Unimbɔti paanŋu ki sòŋ u-bɔti.

2 Piyeer 2

¹Iyunti in jítèe poonee, bin nìn móntí yii bi sá Unimbɔti bɔnaatiliibee nìn kó Unimbɔti nikitil kansikin, mín mbaantiim ní bin dākà tinyimɔmbɔtee mun dàá tí kó ni mun kansikin. Bín dàá cáan tinyimɔmbɔti tin dàá nāan binibee ní kī dākà, ní kī dū bi-kpiliu un fī-bee kī fá kī yantī Unimbɔti tafadaaldi n̄ jētí bi-pu bí kpú kī céetí dicilpu.

²Binib tikpil dàá dāá nóó bi-bimbikpitim gbanti saŋŋu, bi-yanŋam puee binib dàá dāá n̄n kpākantí mbaamɔn saŋŋu bɔti.

³Bin dākà tinyimɔmbɔtee là kī kīl-ni kī fōō ni-nimiliŋ ní. Ama dooooyee ní un dàá sòŋ bi-bɔtee bónti ki cí kī tō u-tundi, un dàá céetí-bee kaa dō ki gèen.

⁴Di sá yii Unimbɔti kaa nìn tāan itūun in nìn ŋá ikpatee ki cúú-i ki tó ditafadaaldi paanŋun, bi bóob-i nì ikusaka i kā dibɔmbɔndin ki cí daliŋkin Unimbɔti dàá sòŋ i-bɔtee.

⁵Unimbɔti kaa nìn tāan duulnyakpiki ama u nìn cānti nnyingbeen dómín ki kúnti binikpitib kəkɔ, ní ki fī binib biluli ki kúti Noowee un nìn sòŋ Unimbɔti bɔti tin bí deedeeyee ki tükù binibee.

⁶Unimbɔti nìn dáal ntimu mun bi yī Soodɔm nì Goomɔoree yab tafaliŋ ki yānti ŋmi dómín ki wūn-bi búkúbuku. U ŋá mín kī dākà u nín dàá dāá dáal binikpitib tafaliŋ puee ní.

⁷Ŋyunti gbantee, Unimbɔti nìn fī Lɔɔti baba ní kun puee u nìn bí deede, ní binikpitibee bimbim nì bi-digaŋgamiu nìn kōntí Lɔɔti inimmɔn.

⁸Di sá yii Lɔɔti nìn kòd bi-kansikin, ki gbìl ní ki kāntí baabadal ikpiti in bi ŋáanee. U nín nìn sá unimɔnti puee ní an kōntí-u kunimbaau, ki páb-u tikpil.

- ⁹Mìn puee ti-Dindaan nyí u nín dì pu ki nyāntí bin yú nì u deedeē diniminaamandi poonee, ní ki nyí u nín dàá yóón binikpitib laakin kí dāá dáál bi-tafaliṅ ibosoon dalee.
- ¹⁰Bin tafaliṅ Unimbōti dàá dāá dáál tikpilee di sá bin dū bi-ba ki tī bikodeekpitib ki kpèé Unimbōti pəṅṅu famee. An dākà yii bin bōti m bàà sòōn nì ni yii bi dākà tinyimōmbōtee, baa tó bàà ubo nì ubo ní bi-pōbiliṅ nyìm, baa tó itūun in bí yilpuee gba ama bi sī-i ní.
- ¹¹Itūun di cáá mpəṅ ki jítiṅ bin dākà tinyimōmbōtee kpataaa, ama iaa bí sòōn tibokpiti bi-pu ti-Dindaan nimiin.
- ¹²Binib gbanti ḡáán kii kumooon peeli in péēsá bí nīn cútí-i ki kùee ní, bi sī tin baa nyée. Bi dàá dāá péēnāān kí céetí-bi ní.
- ¹³Bi nín yānti binib jīn falaa miṅyee, an falaaú ní Unimbōti dàá dāá gíiṅ kí téēn-bi. Bín pəṅṅokil di sá bí nīn ḡáán tin kəkə sá ntimbiilee ḡwiin pu. Naa ká yii binib gbanti yaa dómíiṅ nì nì bi n̄ jī tijinee bi kōntí-ni tijokəndi nì icoooo? Ní an mōn-bi bi nín kíií binib puee.
- ¹⁴Ní bi-nimiliṅ mán bí ḡá tijokəndi, baa ḡi nì ikpiti diṅal, ní ki pīil ki sātī binib bin pòfi nnimbōtisan poonee, bi-landəkəṅu di péēsá yii bí ká animil. Bi sá mbusudambi ní.
- ¹⁵Bi fá nsammōnti ní ki gáatì ki nóó Boosəər jipəṅ Balaam nín n̄n là animil ki dī nsəṅkpiti ḡuṅyee.
- ¹⁶Ama Unimbōti n̄n wòōn-u u nín kaa tó-uee pu, di sá u n̄n yānti kimaṅ sòōn kii unilee ní ki pīn digbaantundi din Balaam bàà n̄n là kí tōee saṅṅu.
- ¹⁷Binib gbanti bí kii ibūn in kaa cáá nnyimee, ní ki bí kii atagban ḡin kaa cáá ntaanyim kubuṅu cáá-ḡi ki yiiṅee. Mpaan ḡun Unimbōti bōnti ki yóōn-bee nyòd ní, ki sá dibombōndi.
- ¹⁸An nibeē dākà bi-ba ní ki sòōn anyəṅbuṅkpaan ki ḡmàtín binib ní ki sātī bin pócōn bi-ba ki nyán ikpiti saṅṅu poonee ki yānti bi fātī ki gítí ikpiti saṅṅu poon.
- ¹⁹Bi pòontí binib yii bi yaa ḡáán min bín sòōnee ní bi kánti dibatəl, ama ní bín bi-ba sá ikpiti yumbui. Bi sūnti yii unil sá kun kpòotí-uee yumbuu ní.
- ²⁰Bin di béē ti-Dindaan Yeesu Kriisitoo ti-Fiiliu, ki nyán duulnya lakasikpitib poon, ní ki dāa fātii gítī yānti bi-lakasikpitibee cúú-bee, tin poon bi dàá kóee dāa jítiṅ tin poon bi n̄n bí dooooyee kpataaa.
- ²¹Bidambi yaa kaa bàà béēmaan mbaaməṅ saṅṅu an bàà só nì bí béé-ḡu, boonee kí dū-ḡu kí fá kaa ti tó maramōntiibi bin Unimbōti n̄n tī-bi bi ḡúbee.
- ²²Tin bāān-bi nee dākà yii diləṅkpandi nee sá mbaaməṅ dee, yii: “Kibəkə wūliṅki ki fātii gíiṅ ki ḡmó” ní “Afa un bi fūlee fātii líti tikpatin ki dō ki bintí.”

2 Piyeer 3

- ¹M-nabineenkaamu, takaldaliliiti ní m ñmà-ni nee. Bi-liitil gbanti poonee m là kí téetí-tiboti tin bi nìn dākā-nee ní ñmā kí dākafi ti-pu mmontiim.
- ²M là ní béé tiboti tin Unimboti circir bōnaatiliibi nìn lī dooooyee, nì tin ti-Dindaan un sá ti-Fiiliuee dūu ñubiñ u-kpambaliñ dākā-nee.
- ³Ama ní nīn nyí ki yóon̄ yii kí wàatī duulnya ñ kúntée, binib biba dàá nyā kí nīn ñáan̄ min fáatì-bee, ki dàá dāá nīn bèeĪ-ni,
- ⁴ní ki dāa li-ni yii: “Kee, Yeesu Kriisitoo p̄ōn̄-ni yii u gítínaa? Kin, doooo nee, u bí la ní kaa bàñ? Doooo bitĩkpikib ali nìn dīn̄, waa gítín̄, doooo duulnya nín náanee, tin péebée, tĩn̄ di gbintì ki dáá bí nee.”
- ⁵Binib bin sòon̄ mimmee, bi nyí, ama ní ki yíi, kaa f̄ōō min Unimboti lēe. Unimboti nìn sòon̄ u-nyok̄on̄ ní kutagb̄on̄u nì kitiñ nyáñ. Nì nnyim ní u dūu náan̄ kitiñ, ní ki gāntì kitiñ nì nnyim.
- ⁶Nì nnyim mbaantiimee ní u yāntì nnyingbeen dómín̄ ki kúntì dooooyee duulnyau.
- ⁷Unimboti di tí lī yii yilpu nì taapu un bí nee dō ki cí ññmi ñ dāá wò daliñkin u dàá dāá sòon̄ binikpitib b̄oti kí kúntí-bee.
- ⁸Ama, m-nabineenkaamu, tiboti tiba di bí tin pu naa máan̄ kí súntée. Tĩn̄ di sá yii: Ti-Dindaan ceeyee, ñwiin ñub̄o sá kii abin kutukuee ní, ní abin kutuku sá u-cee kii ñwiin ñub̄oee.
- ⁹An kaa sá yii ti-Dindaan sòm̄ kaa là kí ñá kii u nín nìn p̄ōn̄ puee, kii biba nín dākafi puee. Ama u bíi j̄ñ̄ ni-pu kim̄otii ki là yii báa ñma ñ kpántí u-bimbim, báa ub̄o ñ taa wāñkì ní.
- ¹⁰Ama nì mín̄ k̄ok̄oee, ti-Dindaan dāantam dàá dāá túun̄-ti ní kii unaayuu nín tūuntí binib puee. Kutagb̄on̄u dāa ḡa kuwookpaan̄ñu kub̄o ní kí wāñkì filamm̄, ní tiwan tin bí yilpu kutagb̄on̄u puee ñ wò búkúbuku, ní taapu doo wanti k̄ok̄o ñ wāñkì.
- ¹¹Kii tiwan k̄ok̄o nín dàá dāá kúntí miñyee puee, ni máan̄ kí béé ni nín dàá b̄ontí ni-ba pu kí nīn cáá mbimbim̄ontiim kí mòtí nīn tó Unimboti mmontiimee,
- ¹²kí nīn cí ñwiin ñun̄ Unimboti dàá dāá dāañee, ñwiin gbanti ní ññmi dàá dāá wò kutagb̄on̄u liblib ní tin k̄ok̄o bí yilpuee ñ dùntī. An puee p̄ómmaan̄ ni-ba an nín dàá ñá pu ñwiinee ñ bàñ malaayee.
- ¹³Kun puee Unimboti p̄ōn̄ yii u dàá f̄atí náan̄-ti kutagb̄omp̄on̄u nì kitimp̄on̄. Duulnya gbantinee bin baba ñáan̄ Unimboti lamme di dāa k̄in̄ ki bí. Duulnya un ti k̄a ki cée dee.
- ¹⁴Mín̄ puee m-nabineenkaamu, ñyunti ñun̄ ni dáá k̄a ki cí duulnya gbanti ñ bànee, ní p̄ómmaan̄ nì ni-p̄on̄ñu nyok̄om̄ kí nīn bímaan̄ circir, Unimboti ñ taa ká ni-pu tiba, nimbi nì u kansikinee ñgbans̄ñfi ñ nīn bí.
- ¹⁵Ní nīn nyí yii ní ñmā kí ká difiilee pu ní ti-Dindaan bíi j̄ñ̄ kim̄otii kaa láá bāan̄ nìn dīn̄. Mín̄ ní Unimboti tī ti-nabiki P̄ool̄ nciin̄ ú mun ñmāñ-ni an b̄oti gbanti.

16U-takaldab bin kəkɔ u ɣmàñee, mìn ní u sòòñ an bɔti pu. U nín ɣmàñ tiɣyee, ajan aba p̄ōō bí gbīl taapu malaa, ní binib bin nyil kaa náañee nì bin kaa bèè Unimbɔti bɔti ki kó poonee, kpántí tibɔti gbanti taapu mbamin kii bi nín péētí kpántí Unimbɔti takaldau poon ajan aba puee, an nibee bí ki nyàab̄ mbusu ní ki tòó bi-ba pu.

17Ama nimbee, m-nabineeŋkaamu, kɔŋkɔnnee ti kpáafi-ni, ní n̄n nyímmaan ni-ba an nín dàá ɣá pu ní taa gáatí kí nóó binikpitib bin bí diyintil poonee kí fá difiil paŋŋu ɣun poon ni yúee.

18Ama ní n̄n gbíntì ki nìkì ki béetí ti-Dindaan Yeesu Kriisitoo un sá ti-Fiiliuee ki cá, nì u-ɣanti tin u ɣáañ-tee poon. Tí t̄imaan-u tinyool kɔŋkɔnnee kí n̄n cáā cá jaanjaan! Ameen.

1 Jaan

1 Jaan 1

¹Ti ηmān takalda nee kí tükù-ni dimañfal bōti. Dimañfal gbantee nìn péēbí doooo ηkilkaamin ní. Ti gbīl ò nín nìn sòōn puee, ki wál-dì nì ti-nimiliη, ki máań-dì nì ti-ηalii mun.

²Dimañfal gbanti nyán mpaampiin pu, ní ti ká-dì. An pu ní ti sòōn ki tükù-ni dimañfal òn kaa cáá dikuntilee bōti. Dì nìn bí ti-Baa Unimbōti cee ní u nyánti-dì ki òkà-ti.

³Mìn puee tin tin ti kée nì tin ti gbīlee ní ti cáā bí tükù ni mun, an nín dàá ηá pu ti nì ni kòkò í kpánti ubaantee. Kun puee timbi nì ti-Baa Unimbōti nì u-Jipōon Yeesu Kriisitoo ηá ubaanti.

⁴Ti ηmà takalda nee an nín dàá ηá pu ti-pōbiliη í mòtí pīlee.

⁵Dinyōbundi òn ti gbīl Yeesu cee ki cáā tükù-nee ò sá yii Unimbōti sá ηwalfi, òbōmbōndi kpá u-ni báà fiii.

⁶Mìn puee, ti yaa bí yii ti nì u ηá ubaanti ní ki gbínti còōm òbōmbōndinee, ti mòntí, taa ò ibaaōn.

⁷Ama ti yaa ò ηwalfi saηηu kii Unimbōti u-ba nín sá ηwalfi puee, niinee ní ti nì ti-nabiyaamu ηáań ubaanti, ní u-Jipōon Yeesu fatikuu fínti ti-pōbiliη circir ki lèkē ti-kpitii kòkò.

⁸Ti yaa bí yii taa cáá ikpatee, mimmee taa cáá ibaaōn ti-ni, ti mòtí bí wáηkí dee.

⁹Ti yaa bíti ti-kpitii pu, Unimbōti sá òeēdeēdaan ki cáá ibaaōn ki dàá ò ti-kpitii kí pō-ti, kí fínti tin kòkòwoooo bí ti-pōbiliηin kaa ηānee, tí nīn bí circir.

¹⁰Ama ti yaa bí yii taa ηá ikpatee, mimmee ti yii Unimbōti unyimōndaan dee. An òkà yii u-nyōbundi kaa bí ti-pōbiliηin.

1 Jaan 2

¹M-biyaamu, m ηmà-ni tin bí nee an nín dàá ηá pu ní taa ηá ikpatee. Ama ubo yaa jéeti ikpitinee, ti cáá un mòtí ti-puee ti-Baa Unimbōti cee, ò òn di sá Yeesu Kriisitoo ibaaōndaan.

²U ò u-ba ki ηá saraa ti-kpitii pu, ama an kaa sá timbi kpitii ηmaniηma pu, an sá ki kpáań binib kòkòwoooo kpitii pu ní.

³Ti yaa kpáafí Unimbōti marabee, niinee ní ti béetí yii ti nyí-u.

⁴Un yaa bí yii: “M nyí Unimbōti,” ama ní kaa ηúb u-marabee, sá unyimōndaan, ibaaōn kaa bí òdaan ni.

⁵Ama sii un ò yaa kpáafí Unimbōti bōtee, mimmee sii ò néēn Unimbōti tiηman. An pu ní a béetí yii a bí Unimbōtin.

- ⁶Sii un di yaa lī yii a bí Unimbətinee, a máań kí nīn còom̄ kii Yeesu u-ba nín nìn còom̄ puee.
- ⁷M-nabineeŋkaamu, an kaa sá marapɔɔn ubɔ ní m gítī bí ɣmà-ni, an sá marakpiki un ni nìn péenyí doooo ɣkilkaaminee. An marakpikiuee di sá Unimbəti bəti tin ni nìn péēgbīlee.
- ⁸Ni mīn kəkɔee, u sá marapɔɔn ní m bí ɣmà-ni. Ibaamɔn in bí mara un nyánní Yeesunee bí ni mun ni, kun puee dibɔmbɔndi bí jītí ní ɣwalfimɔnti dómīn ki ɣmínti ti-pu.
- ⁹Sii un di yaa bí yii a còom̄ ɣwalfin ní ki gbíntii ná a-nabikee, a dáá gbíntii bí dibɔmbɔndin.
- ¹⁰Ama sii un di yaa néen a-nabikee còom̄ ɣwalfin dee, a kpá kí yántī ubɔ ń lítí.
- ¹¹Sii un di yaa ná a-nabikee, mimmee a bí dibɔmbɔndin ki còom̄, kaa nyí laakin pú a cée, kun puee dibɔmbɔndi yánti a jòb̄.
- ¹²M-biyaamu, m ɣmà-ni tin bí nee kun puee Yeesu yindi pu ní ni ká ni-kpitii pɔtam.
- ¹³Bibaatiibi, m ɣmà-ni tin bí nee kun puee ni nyí ti-Dindaan un nìn péebí doooo ɣkilkaaminee. Binaacimpɔmbi, m ɣmà-ni tin bí nee kun puee ni jáń ki jín nì Sitaan.
- ¹⁴Mbiyaamu, m ɣmàñ-ni tin bí nee kun puee ni nyí ti-Baa Unimbəti. Bibaatiibi, m ɣmàñ-ni tin bí nee kun puee ni nyí ti-Dindaan un nìn bí doooo ɣkilkaaminee. Binaacimpɔmbi, m ɣmàñ-ni tin bí nee kun puee Unimbəti bəti bí ni-ni, ni pɔɔ ki ɣún ki jáń ki jín nì Sitaan.
- ¹⁵Ní taa nīn néen duulnya nì tin u cááyee. Sii un di yaa néen duulnyee, aa ɣūn kí nīn néen Unimbəti.
- ¹⁶Kun puee tin kəkɔ bí duulnyan, ki sá a-bimbikpitim nín là miɣyee, nì nnimitaataam, nì á nīn néen timɔn ki dākà tigaajatee, tīn kəkɔee kaa nyēen ti-Baa Unimbəti cee, an nyēen duulnyan ní.
- ¹⁷Ní duulnya nì u-nimitaataam kəkɔ jītí, ama un di yaa ɣáań min ní Unimbəti lèe, udaan dàá dāá nīn bí ní jaanjaan.
- ¹⁸M-biyaamu, ɣyuntijoolkaa sèé. Kii ni nín gbīl yii Kriisitoo nannanliu dòónee, kɔŋkɔnnee Kriisitoo nannanliibi tikpil pūtī kpááā bāań; mīn pu ní ti bée yii ɣyuntijoolkaa sèé nee.
- ¹⁹Ti-kansikin ní binannanliibi gbanti nyáń, ama baa nìn sá ti-yab, kun puee bi yaa bàà nìn sá ti-yabee, ti-kəkɔ bàà bímaan mbaantiim ní. An nín ɣá pu nee di dākà tiŋan yii ti nì bin nìn bée bi-kəkɔ kaa nìn sá ti-yab.
- ²⁰Ama nimbee, ti-Dindaan circirdaan sītī ni-pu Circir Fām, an di yì-tì ní ni-kəkɔ nyí ibaamɔn.
- ²¹Mīn puee, m yaa ɣmàñ-ni tin bí neeyee, kaa sá yii naa nyí ibaamɔn, ni nyí-i, ki bée yii ibaamɔn poonee baa kántí nnyimɔn báà ɣubɔ.

²²Dma di sá unyimondaan an yaa kaa sá un nèè yii Yeesu kaa sá Kriisitooyee? Udaan di sá Kriisitoo nannanliu kaa là Ubaati, kaa là u-Jipoon mun.

²³Un di yaa kaa là Unimböti Jipoon Yeesuee, kaa fõõ u-Baa mun dee, ama un di yaa li binib nimiin yii Yeesu sá Ubaati Jipoonnee fõõ Ubaati u-ba mun dee.

²⁴Mín puee, tin tin ní ni nín péēgbīl doooo ŋkilkaaminee, ní kpāafimaan-tì ni-pòbiliŋin. Sii un yaa kpáafi tin ní a péēgbīl doooo ŋkilkaaminee, mimmee sii ŋá ubaanti nì ti-Baa Unimböti nì u-Jipoon dee.

²⁵Dipoondi din Yeesu põon-tee di sá dimañfal din kaa cáá dikuntilee.

²⁶M ŋmān tin bí nee kí sòon nì ni bin là kí ŋmàtìn-nee pu.

²⁷Ama nimbee, Yeesu sītì ni-pu u-Fām. An puee, an kaa ti bàlfi ubo í dākà-ni. Kun puee u-Fāmee di dākà-ni tikokò, ní tin ní u dākèe sá ibaamøn, nnyimøn kpá poon. Mín puee, ní kpāafimaan u-Fām nín dākà-ni puee, ni nì Yeesu í nīn sá ubaanti.

²⁸M-biyaamu, ní nīn bí Yeesu cee, an nín dàá ŋá pu ŋyunti ŋun u yaa láā páañnee tí dāá nīn cáá kunyannyaau kí yūl u-nimiin kí taa nīn cáá icoo daliŋkin u dàá bànee.

²⁹Mín puee, ni yaa nyí yii u sá deedeedaanee, béémaan yii un sá kamaa yaa nós deedeeyee, Unimböti di fātii māl udaan mpøm.

1 Jaan 3

¹Ní kpèèmaan ti-Baa Unimböti nín cáá ti-pu dineeŋkpaandi diŋyee! Di sá yii u yì-ti u-biyaamu. Mín ní tiŋman ti lafun sá u-biyaamu. Kun pu duulnya kaa nyí-tee di sá waa bée ti-Dindaan.

²M-nabineeŋkaamu, kí yòon dín kí nīn cée, ti kpántì Unimböti biyaamu. Ti nín dàá dāá nīn bí miŋyee kaa láá nyán mpaampiin pu, ama ti nyí yii ŋyunti ŋun ti-Dindaan yaa láā páañnee ti dàá nīn bí kii u nín bí puee ní, kun puee ti dàá dāá ká-u min ní u baasii bée.

³Sii un di yaa cáá dimákal gbanti Yeesunee bóntí a-pòbil circir, kii a-Dindaan u-ba nín bí pu circiree.

⁴Un yaa ŋá ikpatee yīntì marab dee, kun puee ikpiti di sá marab yìntitam.

⁵Ni nyí yii Kriisitoo dómiín kí lēēbinib kpiti ní, ní ùn u-ba kaa cáá ikpiti.

⁶Sii un nì Kriisitoo yaa ŋá ubaantee kaa ti ŋáań ikpiti, ama sii un di yaa ŋáań ikpatee kaa ká-uaaa kaa nyí-u mun.

⁷M-biyaamu, ní taa yántì ubo í ŋmàtìn-ni ní wāŋkì; un yaa ŋáań min bí deedeeyee sá deedeedaan, kii ti-Dindaan u-ba nín bí deede puee,

⁸ama un yaa ŋáań ikpatee sá Sitaan yõu, kun puee Sitaan péēsá ikpitidaan ní, doooo ŋkilkaamin. An pu ní Unimböti Jipoon dómiín ki kpītì Sitaan tuuŋŋi.

- ⁹Sii un Unimbɔti yaa fātii māl̄ mpɔmee kaa ti ɲáán ikpiti, kun puee a náán nì a-Baa un māl̄-see, aa ɲūn kí nīn ɲáán ikpiti, kun puee Unimbɔti di fātii māl̄-si mpɔm.
- ¹⁰Kun gánti Unimbɔti biyaamu nì Sitaan yɔmuae di sá, sii un yaa kaa nɔ́ deedeeyee nì sii un yaa kaa là a-nabikee kaa sá Unimbɔti yɔu.
- ¹¹Dinyɔɔbundi din ni nìn gbīl̄ doooo ɲkilkaaminee tükū-ti yii tí nīn nées tɔb,
- ¹²kí taa nīn bí kii Kayeen nín nìn bí puee. Ún̄ nìn sá Sitaan niliu ní, ní ki kūu u-naal. Ba pu ní u nìn kūu u-naal mín? Kun pu u nìn kūu-uee di sá Kayeen tuuɲi sá akpiti, ní u-naal tuuɲi bí deede.
- ¹³Nnabiyaamu, duulnya yaa ná-ni, an taa bàkatīn̄-ni.
- ¹⁴Ti nyí yii ti nyán ɲkúmin ki pɔotì dimaɲfalin kun puee ti nées ti-nabiyaamu; un yaa kaa nées u-nabikee dáá gbíntii bí ɲkúmin.
- ¹⁵Un yaa ná u-nabikee sá unikpɔl ní, ni nyí yii unikpɔl báà ubɔ kaa cáá dimaɲfal din kaa cáá dikuntilee u-ni.
- ¹⁶Kun di yì-tì ti bée dineendi nín sá kuɲyee di sá Yeesu nín dū u-maɲfal ki tī ti-puee. Mín mun mbaantiim ní ti mun máan kí dū ti-maɲfal kí tī ti-nabiyaamu pu.
- ¹⁷Uɔ yaa sá ugaaja, ní ki ká u-nabiki bí falaan, ní u ɲmí, kaa tī-u tibee, mimmee ba di dākà yii Unimbɔti neendi bí udaan ni?
- ¹⁸M-biyaamu, tí taa nīn l̄ nì ti-nyɔmmun fam yii ti nées tɔb, ama tí yánti ti-tuuɲi n̄ dākà ibaamɔn yii ti lafun cáá dineendi.
- ¹⁹Mín ní ti dùú bée yii ti sá ibaamɔn nib, ní ki kánti dipɔɔsɔɲkil Unimbɔti nimiin.
- ²⁰Báà ti-pɔbiliɲ yaa máfi yii ti sá binikpitibee, Unimbɔti jítiñ ti-pɔbiliɲ ki nyí tikɔkɔ mun.
- ²¹M-nabineeɲkaamu, sii un pɔbil yaa kaa tí máfi yii a ɲá tibee, mimmee a cáá dimákal Unimbɔti nimiin dee,
- ²²báà tin sá kamaa ní a yaa mēē-uee u dàá tī-si kudɔɲu, kun puee a kpáafi u-marab ki ɲáán min fáati-uee.
- ²³Mara un u tī-tee di sá tí fōō u-Jipɔon Yeesu Kriisitoo kí kíí, kí nīn nées tɔb, kii Yeesu u-ba nín bí yii tí nīn nées tɔb puee.
- ²⁴Sii un di yaa kpáafi u-marab gbantee bí Unimbɔti cee, Unimbɔti mun bí a-cee. Kun pu ní a nyí yii u bí a-ceeyee di sá u-Fām min u tī-see pu.

1 Jaan 4

- ¹M-nabineeɲkaamu, ní taa nīn máká bin kɔkɔ bí yii Unimbɔti Fām di yánti bi sòonee pu, ama ní cɔɲkí kí dáán kí kpèè yii an sá Unimbɔti Fāmaan arasini uɔ di yánti bi sòon ní. Kun puee bin móntí yii bi sá Unimbɔti bɔnaatiliibee gbóotì duulnyan tikpil.

- ²Kun di dàa yàntì ní béé un Unimbɔti Fām kpòotēe di sá un di yaa lì nì ibaamɔn yii Yeesu Kriisitoo kpántì unil ki dómín duulnyanee, mimmee Unimbɔti Fām di yāntì udaan sòòñ.
- ³Un yaa yî ki bí yii Yeesu kaa kpántì unil ki dómín duulnyanee, an kaa sá Unimbɔti Fām di yāntì udaan sòòñ, an sá Kriisitoo nannanliu fām. Ni nèn péē gbîl̄ yii unannanli gbanti dàa dāāñ, ama u pūti kpáāā bāāñ ki bí duulnyan.
- ⁴M-biyaamu, nimbi sá Unimbɔti yab ní, an pu ní ni jáñ ki jín bin móntí yii bi sá Unimbɔti bɔnaatiliibee. Kun puee Unimbɔti Fām min bí ni-nee pōō ki jítiñ Sitaan un bí duulnyanee.
- ⁵Binyimɔndambi gbanti, bín sá duulnya yab ní. Bi sòòñ tin duulnya nyée ní, mìn pu ní an mōñ duulnya yab pílfiñ-bi.
- ⁶Ama timbi sá Unimbɔti yab ní. Un yaa nyí Unimbɔtee di pílfiñ-ti, un kaa là kí pílfiñ-tee kaa sá Unimbɔti yɔu. An di yì-tì ní ti ñūñ kí gántì Unimbɔti Fām min sá ibaamɔnee nì Sitaan yam min móntée.
- ⁷M-nabineenkaamu, tí nīn nēēñ tɔb, kun puee dineendi nyēēñ Unimbɔti cee ní. Mimmee, sii un yaa cáá dineendee di sá un Unimbɔti fātii màl̄ mpɔmee, ki nyí Unimbɔti mun.
- ⁸Sii un yaa kaa cáá dineendee kaa nyí Unimbɔti, kun puee Unimbɔti di sá dineendi.
- ⁹Kun yāntì ti ká dineendi din u cáá ti-puee di sá u dū u-Jipɔmbaabil ki túnní duulnyan, tí ñmā kí ká dimañfal u-pu.
- ¹⁰Kaa sá timbi di péé ki nēēñ Unimbɔti, an sá Unimbɔti di péé ki nēēñ timbi, ní ki dū u-Jipɔɔn ki túnní ú kpú tí ká ti-kpitii pōtam, mìn di dākà dineendi.
- ¹¹M-nabineenkaamu, Unimbɔti yaa nēēñ-ti mìn bulfee, ti mun máāñ kí nīn nēēñ tɔb.
- ¹²Uɔ kaa péēká Unimbɔti dalba, ama ti yaa nēēñ tɔbee, Unimbɔti bí ti-ni, ní u-neendee bí ti-ni tiñman.
- ¹³Kun di yì-tì ti bēè yii ti bí Unimbɔtin, ú mun bí ti-nee, di sá u-Fām min u tī-tee pu,
- ¹⁴ní ti ká ki bēè, ki kín ki tükù binib yii ti-Baa Unimbɔti dū u-Jipɔɔn ki túnní ú dāāñ kí nīn sá duulnya Fiiliu.
- ¹⁵Sii un di yaa lì nì ibaamɔn yii Yeesu sá Unimbɔti Jipɔɔnee, Unimbɔti bí a-ni ní si mun bí Unimbɔtin.
- ¹⁶Timbi bēè dineendi din Unimbɔti cáá ti-puee ní ki fōō-dì ki kíf. Di sá yii Unimbɔti di sá dineendi; un yaa cáá dineendee, udaan bí Unimbɔtin, ní Unimbɔti mun bí udaan ni.
- ¹⁷Kun di dākà yii a nēēñ-u tiñmanee di sá, daliñkin Yeesu dàa dāā sòòñ binib bɔtee, sii dāa cáá dimákal u-nimiin ní, kun puee a-bimbim min a bí duulnya nee nee nì u-yam náāñ.

¹⁸Sii un cáá dineendee kaa fàŋkí, kun puee dineembaamondi jì tifaandi ní. Ditafadaaldi di cāabín tifaandi, mín puee, sii un cáá tifaandi a-nee kaa cáá dineembaamondi dee.

¹⁹Kun pu timbi néeñ-uee di sá ùn di péé timbi dineendi.

²⁰Ubo yaa bí yii: u néeñ Unimbōti, ní ki yaa ná u-nabikee, udaan sá unyimondaan. A yaa kaa néeñ a-nabiki kin a wālee, a dàá ḡá mana ní kí nīn néeñ Unimbōti un saa wālee?

²¹Mara un Yeesu tī-tee sèé yii, sii un yaa néeñ Unimbōtee máaḡ kí nīn néeñ a-nabiki mun.

1 Jaan 5

¹Un sá kamaa yaa fōō ki kíí yii Yeesu sá Kriisitooyee Unimbōti di fātii māl udaan mpom. Un di yaa tí néeñ Ubaatee néeñ u-biyaamu mun ní.

²Min ní ti béetí yii ti néeñ Unimbōti biyaamuee di sá ti yaa néeñ Unimbōti ki kpáafí u-marabee.

³Tí nīn néeñ Unimbōtee taapu di sá yii tí nīn kpáafí u-marab. U-marab gbanti mun kaa pōō,

⁴kun puee un sá kamaa ní Unimbōti fātii māl mpomee ḡūn kí já kí jīn duulnya. Kun pu ní a ḡūn kí já kí jī duulnyee di sá fookii un a cáá Yeesu puee.

⁵Dma di ḡūn kí já kí jī duulnya an yaa kaa sá sii un yaa fōō ki kíí yii Yeesu sá Unimbōti Jipōonee?

⁶An sá ùn Yeesu Kriisitoo di dómiñ duulnyan nì nnyim nì fatiku. An kaa sá nì nnyim ḡmaniḡma, ama an sá nì nnyim nì fatiku ní. Ní Unimbōti Fām mun lèekī seera yii an sá mín, kun puee mi sá mbaamōn ní.

⁷Biseeraleeliibi sá bita ní:

⁸Dfām, nnyim nì fatiku; ní bitaatilee kpáfí ki lèekī seerabaanti.

⁹Ti yaa fòol binib seerau ki kíikí, an máaḡ tí fōō Unimbōti seerau kí kíí, kun puee Unimbōti seerau pōō ki jítiñ unil yau.

¹⁰Un yaa fōō Unimbōti Jipōon ki kííyee cáá seera gbanti u-pobilin. Un yaa kaa fōō seera un Unimbōti lēē u-Jipōon puee ki kííyee, udaan kaa fōō Unimbōti ki kíí ki yī-u unyimondaan.

¹¹Unimbōti nín lī puee sèé yii, u tī-ti dimaḡfal din kaa cáá dikuntilee. Dimaḡfal gbanti bí u-Jipōon cee ní.

¹²Un yaa fōō u-Jipōonee cáá dimaḡfal, un yaa kaa fōō u-Jipōonee kaa cáá dimaḡfal.

¹³Nimbi bin fōō Unimbōti Jipōon ki kííyee m ḡmāñ-ni tin bí nee ní béé yii ni cáá dimaḡfal din kaa cáá dikuntilee.

- 14**Ti cáá dipɔbil kí cù u-cee, di sá yii ti yaa mēē-u tiba ní an yaa sá min ní u lèe, u dàá p̄lfiñ-ti.
- 15**Míñ puee, ti yaa nyí yii u p̄lfiñ-tee, tin kəkɔwoooo ti yaa mēē-uee, tí béé yii ti f̄s̄ kudɔɔ.
- 16**Uɔ yaa ká u-nabiki bī ɣáán ikpiti in kaa càn-u ɣkúminee, udaan ń mēè, Unimbɔti dàá tī u-nabiki gbanti dimaɣfal. Bin pu m sòònee di sá bin ɣáán ikpiti in kaa càn-bi ɣkúminee; kun puee ikpiti iba càn unil ɣkúmin, kaa sá un ɣá ikpiti gbantee pu ní m bí yii ní mēè.
- 17**Tin kəkɔ kaa bí deedeeyee sá ikpiti ní, ama ní ikpiti iba bí kaa cāabìñ ɣkúm.
- 18**Ti nyí yii un sá kamaa Unimbɔti fātii màl̄ mpɔmee kaa ɣáán ikpiti, kun puee Unimbɔti Jipɔɔn mótí u-pu, Sitaan kaa ɣūn kí ɣá-u tiba.
- 19**Ti nyí yii ti sá Unimbɔti yab, ní Sitaan tókó duulnya kəkɔ pu.
- 20**Ti tí nyí yii Unimbɔti Jipɔɔn dómiñ ki tī-ti iciin tí ɣmā kí béé ibaamɔn Nimbɔtiu, ní timbi n̄ Unimbɔti ibaamɔndaanee n̄ Yeesu Kriisitoo u-Jipɔɔn mun ɣá ubaanti. Ún di sá Unimbɔti ibaamɔn, ki sá dimaɣfal din kaa cáá dikuntilee.
- 21**M-biyaamu, ní n̄n nyí n̄ ni-ba kí taa nókó duulnya nimbɔtii.

2 Jaan

2 Jaan 1

- ¹An sá man ukpil di jáam̄ sii ti-na un Unimbɔti lútèè nì a-biyaamu. Ibaamɔn, m nées̄n ni-kɔkɔ. An kaa sá man baba di nées̄n-ni, an sá ki kpáañ bin kɔkɔ béē ibaamɔnee,
- ²kun puee ibaamɔn bí ti-ni ki dàá n̄n péēbí kí n̄n cá jaanjaan.
- ³Ti-Baa Unimbɔti nì Yeesu Kriisitoo, Ubaati Jipɔɔn n̄ n̄á-ti tiŋan, kí sɔ ti-saai, kí t̄i-ti ŋgbansɔŋfi, tí n̄n cáá ibaamɔn kí n̄n nées̄n tɔb.
- ⁴An móokìn-mi tikpil m n̄n ká a-biyaamu mubɔ nɔ́o ibaamɔnee, kii ti-Baa Unimbɔti n̄n t̄i-ti mara uŋyee.
- ⁵Kɔŋkɔnnee, ti-na, m gbàam̄-si, tí n̄n nées̄nmaan tɔb. Dinyɔɔbundi gbanti kaa sá marapɔɔn, an sá mara un ti n̄n péēfɔ́ɔ doooo ŋkilkaaminee ní.
- ⁶Dineendi taapu di sá tí nɔ́o Unimbɔti marab. Kii ni n̄n gb̄l̄ doooo ŋkilkaamin puee, mara gbanti di sá tí n̄n cáá dineendi.
- ⁷Kun puee biŋmatinliibi gbóotì duulnyan ki ȳn̄, kaa fɔ́ɔ ki kí yii Yeesu Kriisitoo kpántì unil ki dómiñ duulnyan. Un nées̄ mimmee di sá uŋmatinli ki sá Kriisitoo nannanliu.
- ⁸Mín̄ puee, ní n̄n nyí n̄n ni-ba kí taa fá ti-tuunŋi paatii, an n̄n dàá n̄n pu ní dāá ŋmā kí fɔ́ɔ ni-paatii kɔkɔee.
- ⁹Un di yaa lákatì, kaa là kí n̄n n̄n Kriisitoo bɔtee, kaa nyí Unimbɔti; ama un yaa n̄n tibɔti gbantee ún̄ di nyí ti-Baa Unimbɔti n̄n u-Jipɔɔn.
- ¹⁰Mín̄ puee, un yaa dómiñ kaa cáañ-ni tibɔti gbantee, ní taa fɔ́ɔ-u ni-dumpu kí taa jām̄-u gba,
- ¹¹kun puee, un yaa jáam̄-uee mun ŋmāl̄ atunŋkpiti ŋin udaan n̄n nées̄n ni dee.
- ¹²Tibɔti tikpil bàà bí n̄n sòon̄ n̄n ni, ama maa là kí dūú ŋmā takalda poon, kun puee m là kí dāañ ni-cee niin kí sòon̄ n̄n ni ní, án m̄ot̄i m̄ɔkìn̄ man n̄n ni.
- ¹³A-nabiki unimpu un Unimbɔti lútèè biyaamu mun jáam̄-si.

3 Jaan

3 Jaan 1

- ¹An sá man ukpil di ñmà takalda nee kí jām m-nabineenkaaki Gaayusi, un m nées nì ibaamonee.
- ²M-nabineenkaaki, m mée yii tikokò ñ còom-si tiñan á nñ cáá ñgbampòn kii a-nimbòtinootam nín cáá ñfām puee.
- ³An móokìn-mi tikpil nnabiyaamu nín bāañ ki tükū-mi a nín ñúb ibaamòn an píkí puee kii a nín péécòom ibaamòn poon puee.
- ⁴Tiba kaa ti bí ki mōñ-mi kí jītìn m yaa gbīl yii m-biyaamu bí ki còom ibaamòn saññu poonee an nín móokìn-mi miñyee.
- ⁵⁻⁶Kinabineenkaai, a nín ñáañ atummonti ñin ki tìl nnabiyaamu ki kpáañ bin sá-si binicambee gbee, bi bāañee, bi máafì a-neendi gbanti pu Kriisitoo nikitil kòkò nimiin. Mimmee, m mée-si, á tūtuñ-bi bi-saññu gbanti poon min dàá fáatìn Unimbotee,
- ⁷kun puee Yeesu tundi pu ní bi còom nsan, kaa fōō tiba bin kaa nyí Unimbotee cee.
- ⁸An puee, bi yaa bāañ ti-ceeyee, ti máañ kí tūtuñ binib gbanti. Mimmee, ti mun kúti bi-pu ki cáá ibaamòn tundi ki cáñ nyòkòpu dee.
- ⁹M nìn ñmāñ takalda ki tī Kriisitoo nikitil ki sòon nì bi kibogñ, ama Diyootreefi là kí nñ sá bi-kpiliu ní kaa là kí pīlfi tin man sòonee.
- ¹⁰U gífí inyimòn nì tibòkpitiil ki tūntí ti-pu. Mìn kòkò kaa yá ki kó-u, kun puee u yítí kaa fòol nnabiyaamu mun jítí u-ceeyee mun, ní bin yaa bàà là kí fōō-bee, u piintí-bi nsan ki là kí nyāntí-bi Kriisitoo nikitil kansikin. Mìn puee, m yaa láā bāañee, m dàá dàá kàañ tin kòkòwoooo u ñáañee binib nimiin.
- ¹¹M-nabineenkaaki, á taa nñ ñeèn nì binib bin ñáañ tikpitilee, ama nñ ñeèn nì bin ñáañ tiñanee. Un ñáañ tiñanee di sá Unimbòti niliu, un ñáañ tikpitilee kaa nyí Unimbòti.
- ¹²Ama Deemeetriyusi ní báà ñma pàkà, ní ibaamòn bòti tin tin u bí ki sòonee mun pàkà-u, ní ti mun pàkà-u; sii a-ba nyí yii tin ti yaa lēe sá ibaamòn ní.
- ¹³M bàà cáá tibòti tikpil kí sòon nì si, ama maa là kí dū ntakaldañmamòon kí ñmà.
- ¹⁴Kun puee m là kí dāañ a-cee iwiin ili nee poon, niin ní ti dāa ñūn kí kāl kí sòon tikokò.
- ¹⁵Unimbòti ñ tī-si ñgbansəñfi. A-bòobi jáam-si. Á jām ti-bòobi kòkò kí tī-mi.

Juudi

Juudi 1

¹Man Juudi, Jaaki naal un sá Yeesu Kriisitoo tontɔnliuee di ηmàñ takalda nee ki t̄i nimbi bin ti-Baa Unimbɔti yíín ki néeñ-ni ki dū-ni ki kpáafi ki yóon̄ Yeesu Kriisitooyee.

²Unimbɔti n̄ n̄n sūn̄ ni-saai baabadal, kí n̄n t̄i-ni ηgbansɔŋfi tiŋan, kí n̄n néeñ-ni tikpil.

³M-nabineeŋkaamu, m n̄n baasii mò kí ηmàñ-ni difiil din ti-kɔkɔ ká nee ɔti, m dāa lafun kpēēyee, an péē sá yii m̄ ηmàñ-ni kí t̄iñ-ni kunyannyaau ní ηmā kí n̄n jáa ibaamɔn in Unimbɔti dūu t̄i u-yab iaa bí kí kpántée pu.

⁴Di sá yii binib biba bin kaa tó Unimbɔtee ηá soooo ki kóon̄ ni-kansikin ki kpánti tiŋan tin Unimbɔti ηá-tee ɔti, ki ηáañ min kaa kítèe, ki yíi, kaa là Yeesu Kriisitoo un baba sá ti-kpiliu ki sá ti-Dindaanee. Ama dooooyee ní ditafadaaldi din dō ki cí bidambee péēηmàñ Unimbɔti takaldaun.

⁵M nyí yii ni péēnyí tiboti nee ki yóon̄ dooooyee, ama m là kí gífi téti-ni ti-pu. Kee ni nyí ti-Dindaan nín n̄n f̄i Israyeel yab ki nyánti Eejipitee, boonee u f̄ati kúnti bin kaa là kí f̄ō kí kííyeyaa!

⁶Tétiimaan yii itūun in kaa n̄n là kí n̄n bí mpaan ηun pu Unimbɔti yóon̄-iee ama ki dūu fá ki pót̄i i-lankee, Unimbɔti bóob̄-i n̄ ikusaka kí n̄n cá jaanjaan, ní ki dū-i ki tó dibɔmbɔŋkpaandin í n̄n kā niin ki cí ibɔsooŋkpaan dal,

⁷kí tétiimaan ntimu mun bi yî Soodɔm n̄ Goomɔɔr n̄ ntimbilimu mun n̄n bí ki p̄l̄n̄-muee ɔti. Bí mun n̄n tí ηáañ kii itūunee nín n̄n ηá puee ní, ki mun n̄n dū bi-ba ki t̄i dijɔkɔntundi n̄ atun̄kpiti ηin unil kaa máañ kí ηée. An puee ní Unimbɔti n̄n yānti ηηmi ηun kaa kúyeee dóm̄n̄ ki wūñ-bi, ki dáal bi-tafal, án n̄n sá kudaan̄ηu kí dūu dākà báa ηma.

⁸Binib bin kóon̄ ni-kansikinee m̄n̄ ní bí mun tí ηáañ ki bí yii bi wāl, ní an cànti bi cáa bi-ba ki kōnti tijɔkɔndin, ní ki kpèe Unimbɔti p̄ŋηu fam, ki s̄i itūun tinyooldambi bin bí yilpuee.

⁹Ama, ηyunti ηun itūun kpiliu un bi yíi Mikayeelee n̄ Sitaan n̄n b̄i jáa ki kpákà Mooisi wunti puee, ntūunee kaa n̄n kpáaā dākafi kí s̄i Sitaan gba, see ηu nín péēt̄ukū-u yii: “Ti-Dindaan di dàá dáal a-tafalee.”

¹⁰Ama ní b̄n̄ s̄i tin baa nyée, ní tin bi nyí kii kumoon̄ peeli nyítamee di kúnti-bi.

¹¹Mbusu dō ki cí-bi, kun puee bi táa Kayeen san̄ηu, ní ki dū bi-ba ki t̄i isan̄kpiti ki k̄ánti animil kii Balaam nín n̄n ηá puee, ki kúu kii Kɔree yab nín n̄n yî kaa tó Unimbɔti ki kp̄i puee.

¹²Ni nì bi yaa kpáfi ki jīn kunabitiiu jikaatee, bi-bimbim bíí-ni ní, bi jīn tikpil, an kaa cáá-bi icoo, ki sūn bi-ba pu ŋma. Bi bí kii atagban ŋin kubuŋu cáā yīn, ntaanyim kpá poonee, ní ki bí kii isufi in kaa péèlòon kpataaayee, ki kpí an kòkò pu, ki kpíkìtì.

¹³Bi bí kii tiŋku nín wòon pu ki yíkí tinyiŋban ki pùkufi puee, ní ki nyāntiŋ bi-tuŋŋi ŋin cáá icooyee; ki tí bí kii iŋmalbijaa in nyēēki pùntē. Unimbōti yóon-bi mpaan ŋun sá dibombōŋkpaŋkpaandee, niin ní bi dàá nīn bí baabadal.

¹⁴Bīn pu ní Eenōki un sá Adam naantitōntōkol ululuútee nīn sòon dooooyee ki yóon, yii: “Ní pīlfi, ti-Dindaan dòon nì u-circir tūuni kutukub kutukub,

¹⁵kí sòon báa ŋma bōti, ní kí kpò bin kòkò kaa tó-uee bōti, bi-tuŋkpitiŋ ŋin bi ŋáanee kòkò nì bi nín yī Unimbōti kaa fōō-uee, nì bi nín kaa tó-u ki sòon-u tibofan tiŋyee kòkò pu.”

¹⁶Binib gbantee, baabadalee, an kaa péēmōn bīn ŋma ní, ní bi yáliŋkí ní ki ŋáan tikpitiŋ tin fáati-bee, ní ki sòon tilambibōti, ki cáá nyōmalmal ki ŋmātīn binib ki jīn bi-pu.

¹⁷Ama m-nabineeŋkaamu, nimbi n̄ tēetí ti-Dindaan Yeesu Kriisitoo kpambaliŋ nín nīn sòon-ni tibōti tin ki sīn dooooyee pu.

¹⁸Bi nīn tükū-ni yii, iwinjoolkaayee, binib dàá dāá nīn bèēl-ni, ní ki ŋáan tikpitiŋ tin fáati-bee.

¹⁹Bīn di cāabiŋ digāntil binib kansikin, bi nín là miŋyee di kpòotī-bi, an kaa sá Unimbōti Fām.

²⁰Ama nimbee, m-nabineeŋkaamu, nīn mòtī cámaan nyòkòpu ni-fookiiu un bí circiree poon, ni-wimmeem n̄ nīn cáá Unimbōti Fām pōŋŋu,

²¹ní nīn péēgbintì ki bí Unimbōti un nēēn-nee ŋaan, kí nīn cí ti-Dindaan Yeesu Kriisitoo usaasolee n̄ dāá tī-ti mmaŋfafòkōn ŋun kaa cáá dikuntilee.

²²Sōmaan bin dākafī ki gùkufēe saai,

²³kí dáaliŋ-bi kí nyāntiŋ ŋŋmi poon kí fī-bi. Ní sō bin kínee mun saai, kí nīn nyīn ni-ba bí taa dū bi-kpitiŋ kí tīntī-ni. An puee, ni-ŋalii n̄ taa gbēēbi-bòkutiŋ ŋin bi pēēki ŋáan bi-jòkōntuuŋŋee kpaŋkpan.

²⁴Tí nyōŋkì Unimbōti un di ŋūn kí ŋúb-ni ní taa lítée, ki ŋūn kí cáá-ni kí cūnnì u-cee tinyoolin nì dipòpindi, bí taa ká ni-pu tibe.

²⁵Tí nyōŋkì Unimbōtibaanti un dī ti-Dindaan Yeesu Kriisitoo pu ki fī-tee, ún di yì tinyool, tikpiti, mpōn, nì ŋŋmam doooo ŋkilkaamin nì kōŋkōnnee kí nīn péēcā cá jaanjaan! Ameen.

Dileedakal

Dileedakal 1

- ¹Yeesu Kriisitoo nín lēētiboti tin ki dākā Jaanyee sèé. Unimboti di bí yii ú lēētín bí ki dáá ná kəŋkəneeyee kí dākà u-təntənlíibi, ní Kriisitoo túnní u-tūuŋŋu dómíín ki tükū u-təntənlíu Jaan tiboti tin u lēeki dākā-uee kəkə taapu.
- ²Jaan di ŋmān Unimboti nín sòon puee nì ibaamən in Yeesu Kriisitoo lēeki dākā-uee, nì tin kəkə u kée.
- ³Unimboti n̄ yàntī án n̄n mōn un di kàan tiboti tin Unimboti tīn an kā takalda nee poonee, kí n̄n mōn un di pílfi-ti ki náan tì nín lī puee. Kun puee an nín lī yii tin kəkə dáá dáá jītee, ŋyunti tóobiín án ná mín.
- ⁴⁻⁵An sá man Jaan di ŋmān takalda nee ki tī Kriisitoo nikitij aluli ŋin bí Asii tiŋkinee. Unimboti un bí, ki n̄n péebí dooooyee ki dáá dáá dáanee n̄ ná-ni tiŋan kí tī-ni ŋgbansəŋfi n̄ ŋfām miluli min bí u-beejal nimiinee, n̄ Yeesu Kriisitoo un sòon ibaamən, ki sá Ujipəŋkpil, ki sá upeepeekaa un Unimboti fikiti ditaŋkpiilinee, ki sá duulnya bətiibi kpiliuee pu. Ún di néen-ti ní ki nyánti u-fatikuu ki kpíi ki fī-ti ti-kpitii poon.
- ⁶Ún di kóon-ti ki kpáfi u-beelin ní ki dū-ti ki ná u-Baa Unimboti saraŋaliibi, ún Yeesu Kriisitoo di yì tinyool n̄ mpən kí n̄n péecáá cá jaanjaan! Ameen.
- ⁷Kpèemaan, u dáá dáá dáan atagban mánti ki tú-u, báa ŋma dáá dáá ká-u, ki kpáan bin n̄n sāa ki cíl u-takakalee, mín ní duulnya timbuŋŋi kəkə dáá sō kí yāliŋki u-dāantam gbanti pu. Tiŋman an dáá ná mín! Ameen.
- ⁸Ti-Dindaan Unimboti ipən kəkə daan, un bí, ki n̄n péebí dooooyee ki dáá dáanee bí yii: “Man di sá Alfa n̄ Oomeega, upeepeekaa n̄ ujoolkaa.”
- ⁹An sá man Jaan ni-nabiki, ni n̄n un kpáfi ki jīn Yeesu pu falaa n̄ kimətii u-beel puee. M n̄n bí Patimoosi tiŋki kin diməol mánti ki túee ni ní. Kun pu bi n̄n cáá-mi niinee di sá m sòon Unimboti bəti ki lēeki Yeesu pu seera.
- ¹⁰An n̄n sá Kəsil dal, ní Unimboti Fām dómíín m-ni, niinee ní m gbīl m-boon nneen ŋubə sòon ki pōō kpāŋkpam kii dikantánde,
- ¹¹yii: “Á ŋmà tin a wāl nee kí ná takaldan kí tī Kriisitoo nikitij aluli ŋin yijŋi m dáá yíin nee: Eefeesi nikitil, Simiirna nikitil, Peergaam nikitil, Tiyatiir nikitil, Saardi nikitil, Filadeelfii nikitil n̄ Lawoodisee nikitil.”
- ¹²M fāti kí kpèe yii ŋma di sòon m-boonee, m kpēeyee ki ká tiwan tin pu bi təkəntí fitilabee biluli yú ki sá sindaariya.
- ¹³Ní m ká ubə náan n̄n kinibiki ki yú tiwan tin pu bi təkəntí fitilab an sá sindaariyee kansikin, ki pēē dibəkutifəkəl diba ní ki cúú sindaariya dambalau u-bindi.
- ¹⁴Ní u-yikpiti pīn kánkaŋ kii gulfee, ní u-nimiliŋ ŋmóò ləkálaka kii ŋŋmee.

¹⁵Ní u-taaji jìl pàlpal kii tasa ní bi fíntèe, ní u-neen ali kii mbuŋkpaan nín wòòn puee ní.

¹⁶Ní u ɲúb u-ɲaŋgiilin iŋmalbijaa iluli, ní kijiki kin jītí ajan liitilee nyēēu-nyòkòn, ní u-nimiin jìl kii ɲwiín yaa biiti ki píl ɲu nín jìliŋkī puee.

¹⁷M nín ká mimmee ní m lítì ki kíh ki dō u-taaji taapu kii m kpíyee, ní u dū u-ɲaŋgiil ki páan m-pu ní ki bí-mi yii: “Taa fàŋki! Man di sá upeepeekaa ní ki sá uluŋkikaa.

¹⁸Man di sá un bí dimaŋfalinee; m nìn kpíi, ama kòŋkònee m kíh ki bí dimaŋfalin kí nīn cá jaanjaan; man di ɲúb ɲkúm nì ditaŋkpiil pòŋɲu.

¹⁹An puee ɲmà tin a ká nee, nì tin bí ki jītí nee nì tin bí boon ki dòónee.

²⁰Iŋmalbijaa iluli in a ká m ɲúb m-ɲaŋgiilinee, nì sindaariya wanti tin pu bi tōkòntí fitilab biluli bin a ká kaa nyí an nín sá puee, taapu sèe: iŋmalbijaa ilulee di sá Kriisitoo nikitij alulee tūuni, ní tiwan tin pu bi tōkòntí fitilabee bilulee sá Kriisitoo nikitij alulee.”

Dileedakal 2

¹“Á ɲmà takalda kí tī m-nikitil din bí Eefeese tūuŋɲu yii: Un ɲúb iŋmalbijaa iluli u-ɲaŋgiilin ki còom tiwan tiluli tin pu bi tōkòntí fitilab an sá sindaariyee kansikinee di lī yii:

²M nyí a-tuuŋɲi ɲin a ɲée kòkò pu, m nyí falaa un jín-see, ki nyí a-póòntam. M nyí a-pu yii aa là binikpitib bōti, a còŋkì ki bée yii bin bí yii bi sá Yeesu kpambaliŋee baa sá, bi sá binyimòndambi ní.

³A cáá dipòondi, a jín falaa m-pu kaa yōtì a-wunti.

⁴Ama tiba kíh-si aa ɲá, an di sá a nín nìn néeh-mi ɲkilkaamin puee, a dūu fá, aa ti néeh-mi mín.

⁵An puee á téetì laakin ní a dū dineendi gbanti ki fée kí kpántì a-bimbim, kí fātī nīn tūh atummònti ɲin a nìn tūhee. A yaa kaa ɲá mín m dàá yòòñ a-fitilau nì tiwan tin pu u tókóee, asee a yaa kpántì a-ba baba.

⁶Ama nì mín kòkòee a cáá tiba, di sá a ná atuun ɲin Nikoolaati yab ɲáanee, kii man mun nín ná-ɲi puee.

⁷“Un yaa cáá ditafalee n pīlfi Unimbōti Fām nín bī sòòn nì Kriisitoo nikitij puee. “Un yaa ján ki jínee, m dàá tī-u dimaŋfal subu bun yú Unimbōti kpaabunee bil ú ɲmó.”

⁸“Á ɲmà takalda kí tī m-nikitil din bí Simiirnee tūuŋɲu yii: Un sá upeepeekaa ki sá uluŋkikaayee, man un nìn kpíi ki fātīi fikitèe di lī yii:

⁹M nyí a-falaau nì a-sool, ama nì mín kòkòee a sá ugaaja ní, m nyí bin kúŋfí a-boon ki yī bi-ba yii Juuda yab kin kaa sée. An nibee sá Sitaan nikitil ní.

10Á taa fàŋkì falaa un dō ki cí-si a dàá jēe pu, di sá Sitaan dàá cōŋkì-ni kí yàntī bí cūti ni-kansikin biba kí tō sarka, ni dàá dāá jī falaa iwiin saalaa. Nīn yú deedee ali a-kúm dal, m dàá dāá tī-si mmaŋfafōkōn án nīn sá-si a-jajil paati.

11“Un yaa cáá ditafalee n pīlfi Unimbōti Fām nín sòòn nì Kriisitoo nikitij puee. “Un yaa ján ki jínee, ŋkúnlilitiim kaa dāa gítī gbèetī udaan pu.”

12“Dmà kí tī m-nikitil din bí Peergaamee tūuŋŋu yii: Un ŋúb kijiki kin jītí ajan liitilee bí yii:

13M nyí yii kitiŋ kin poon Sitaan jín dibeelee ní a kóò. Ama ní a ŋúb m-bōti deedee kaa páatì a-fookiiu m-pu, ki gbíntì ki ŋúb an píkí ki kpáaŋ ŋyunti ŋun bi nèn kūū m-tontommōntiu Antipa ni-tiŋkin kin sá Sitaan kōŋkooŋŋuee.

14Ama nì mín kōkōee m dàá wòòn-si tiba pu, di sá binib biba bí a-cee ki ŋáaŋ kii Balaam nín nèn sáŋkì Balaki ú ŋmàtiŋ Israyeel biyaamu bí ŋmó tiwaatootinan kí ŋá tilaakpaal kí lítí ikpitinee.

15Mín ní si mun a-ba cáá binib bin ŋáaŋ atuŋkpiti kii Nikoolaati yabee.

16An puee á kpántí a-bimbim, a yaa yíi m dàá dāaŋ kí dū m-nyōbundi din sá kijikee kí já nì an nibee kōŋkōnee.

17“Un yaa cáá ditafalee n pīlfi Unimbōti Fām nín bíi sòòn nì Kriisitoo nikitij puee. “Un yaa ján ki jínee m dàá tī-u Unimbōti jinti tin bí dibalinee, nì ditaŋkrapindi din pu bi ŋmāŋ diyimpōndi diba din báà ubō kaa nyée see un fōō ditaŋkpalee.”

18“Dmà takalda kí tī m-nikitil din bí Tiyatiiree tūuŋŋu yii: Unimbōti Jipōon un nimiliŋ ŋmóò lākālaka kii ŋŋmee, u-taŋŋi jìl pālpal kii tasa ní bi fīntèe di lī yii:

19M nyí tin kōkō a ŋáaŋee, m ká dineendi din a cááyee, nì a-fookiiu, nì a nín tūn atuun ŋin ki tútuŋ binibee nì dipōondi din a cááyee, m ká yii atummōnti ŋin a bíi ŋáaŋ kōŋkōnee jítiŋ apeepeekaa.

20Ama nì mín kōkōee m dàá wòòn-si tiba pu, di sá a yānti unimpu Jeesebeel un yíi u-ba yii u sá Unimbōti bōnaatiliuee cáá u-dàkatam ki kííl m-tontōnliibi yii bi yaa ŋáaŋ tilaakpaal an kaa cáá tiba, ki yānti bi ŋmóò tiwaatootinan.

21M pú-u ŋyunti ú bàà kpántí u-ba kí fá u-bimbikpitim ní u yíi.

22An puee m dàá yānti ú lítí iween pu kí jī falaa kí kpáaŋ u nì bin pēēkinyōkō ki ŋáaŋ ikpíte, asee bi yaa kpánti bi-ba ki fá bi-bimbikpitim baba.

23M dàá fáá kí kpò u-yab bin nōó-uee ní m-nikitij kōkō nì bée yii man di sá un nyí binib landōkōi nì bi-lātamee. M dàá dāá pà báà ŋma tuuŋŋi paati ní.

24“Ama nimbi bin kíŋ Tiyatiir nikitil kansikin kaa bí bi-tuŋkpitiŋ gbanti poon, kaa bífi kun bíŋ yíi yii Sitaan bōti tin bí dibalin ki nyóòyee, nimbee, maa péē cáá tiba kí lì ni-pu.

25Ama tin baba m dàá lèe di sá ní nīn ŋúb tin ni cááyee gbīm gbim ali m dāá gítíiŋ.

²⁶Un di yaa ján ki jín ki gbíntì ki nìkì ki ñáán min fáatì-mee ki tin kátì-kuee, m dàá yàntì ú jī dibeel atimbun pu.

²⁷Mpɔn ɲun m dàá tī udaan ú dūú kpàà-bee dāa pōō kii tikútee ní, u dāa ɲūn kí dūú wī binib sɔkɔmii kii titan boolee.

²⁸Mín ní mama m-ba fōō mpɔn gbanti m-Baa cee. Ní m dàá tī un ján ki jínee utaafaanmalbija.

²⁹“Un yaa cáá ditafalee n̄ pīlfi Unimbɔti Fām nín sòòn n̄ Kriisitoo nikitij puee.”

Dileedakal 3

¹“Dmà takalda kí tī m-nikitil din bí Saardee tūuɲu yii: Un cáá Unimbɔti Fām miluli n̄ inmalbijaa ilulee di bí-u yii: M nyí a-tuuɲi, ki nyí yii a-yindi yíkì yilpu, bi nyí a-pu yii a sá dinikitil din cáá dimañfalee, ama ní a kpíi.

²Fintī kí tíkiín a-fookiiu un bī kúuyee ú ká mpɔn, kun puee maa ká a-tummɔntij aba m-Nimbɔtiu cee.

³Á téetí bi nín n̄n dākā-si Unimbɔti ɔti a fōō-tì ki kíi puee, kí n̄n gbíntì ki ɲúb-tì mín gbīm gbim kí fá ikpiti. A yaa yíi, m dàá dāañ ɲyunti ɲun saa nyí yii m dàá dāañee ní kí tūuñ-si kii unaayuu nín tūuntí unil puee.

⁴Ama n̄n mín kɔkɔee, biba bí Saardi nikitil kansikin kaa ɲá ikpiti bi-bɔkutij pīn̄, binib gbanti dāa pēē abɔkutipiin kánkaɲ ní man n̄n bi n̄ n̄n táá ki còom̄, kun puee bi máañ mín.

⁵Mín ní un yaa ján ki jínee dāa pèentí abɔkutipiin kánkaɲ, maa làá dàá gítì kpītì udaan yindi dimañfal takaldau poon, ama m dàá dāá l̄ m-Baa n̄n u-tūuni kɔkɔ n̄m̄iin yii man di yì-u.

⁶“Un yaa cáá ditafalee n̄ pīlfi Unimbɔti Fām nín bí ki sòòn n̄ Kriisitoo nikitij puee.”

⁷“Dmà takalda kí tī m-nikitil din bí Filadeelfiiyee tūuɲu yii: Un sá circir ki sá ubaamōnee, un di ɲúb Dafiidi saafiiu ki yaa pīti, ubɔ kpá kí dūú pīn̄, ki yaa tí dūu pīn̄, ubɔ kpá kí pītēe,

⁸di bí-u yii: M nyí atuun ɲin kɔkɔ a ɲée. M pīti kipunyɔkɔ ki wāañ a-nimiin, ubɔ kaa ɲūn kí dūú pīn̄. Kun puee m nyí a-pɔɲu kaa náañ, ama a ɲún ki ɲúb m-bɔti, kaa dū-mi kí fá.

⁹Á kpèè tin m dàá ɲá kí tī-see: Binib bin kpáfi kí sá Sitaan yab kí mɔntí yii bi sá Juuda yab kin kaa sée, m dàá dū-bi kí ɲá a-ɲaan, m dàá yàntì bí dāá gbāañ a-taanji taapu ní kí bée yii m n̄eñ-si.

¹⁰Kun puee a nín pɔɔn̄ ki ɲúb m-bɔtee, man mun dàá ɲúb-si ɲyunti ɲun diniminaamandi dàá dāá jēetí duulnya nib kɔkɔ pu kí cōɲkì-bee.

¹¹M dōon̄ kɔɲkɔnnee, á ɲúb tin a ɲúbee gbīm gbim ubɔ n̄ taa fōō a-cee tipaal tin bi t̄i bin ján ki jínee.

¹²Un yaa ján ki jínee, m dàá dū-u kí kpántí m-Nimbōtiu diiku jaantalkuu ní ú báán kí nīn kí n̄ ki bí niin kí taa ti nyā, ní m̄ dàá dū m-Nimbōtiu yindi n̄ m-Nimbōtiu tɪŋki, Jeerusaleempɔɔn un nyánní yilpu m-Nimbōtiu ceeyee yindi n̄ man yimpɔndi kí ɲmà udaan pu.

¹³“Un yaa cáá ditafalee ń pīlfi Unimbōti Fām nín bí ki sòòh n̄ Kriisitoo nikitij puee.”

¹⁴“Dmà takalda kí tī m-nikitil din bí Lawoodiseeyee tūuŋu yii: Un bi yī Ameen u sá un lèekī seera deedee n̄ ibaamɔn, ki sá Unimbōti wannaaŋkaati kɔkɔ nyeelee,

¹⁵di bí-u yii: M nyí atuun ɲin a ɲee kɔkɔ. Aa sòmāaan, kaa tùm mun; a yaa là kí nīn sòmāaan, á nīn sòm; a yaa là kí nīn tí tùmāaan, á nīn tùm.

¹⁶Kii a nín bí gbimmm kaa sòmāaan kaa tùm muae, m dàá wùlɪŋkì-si kí fá.

¹⁷Di sá a lì yii sii sá ugaaja ní, a-gaajati tin a ká nee puee, aa ti là tiba n̄ tiba, kun pu a lì mimmee di sá aa nyí yii a sá ufalaadaan, ki sá unandaan, ki sá usoodaan, ki sá ujɔfu, ki sá ucancaŋbeefu.

¹⁸An puee m sáŋkí-si yii á dāān m-cee kí dā sindaariya un bi dū ɲɲmi ki cɔŋkì ki ká yii u sá umɔntee, ní kí nín ɲmā kí kpántí ugaaja; kí dā m-cee abɔkutipiin kí pèeñ kí bìiñ a-cooi pu, kí dā nnyɔkɔ m-cee kí jɔɔ a-nimiliŋ kí wāl.

¹⁹Man dátí bin m néee tafaliŋ ní ki sáŋkí-bi, an puee á ká kunyannyaau kí fá ikpiti.

²⁰Á pīlfi, m yú kipunyɔkɔ pu ki ɲáán gaafalaa; un yaa gbīl m-nyɔkɔ pu ní ki pīti-mee, m dàá kó udaan cee ní man n̄ u ń kpāfi kí jī.

²¹Un yaa ján ki jínee, m dàá yàntí ú dāān kí kāl kí kól-mi m-beelin, kii ma mun nín ján ki jín pu ki dómiñ ki kāl m-Baa beelin ki kól-u puee.

²²“Un yaa cáá ditafalee ń pīlfi Unimbōti Fām nín bí ki sòòh n̄ Kriisitoo nikitij puee.”

Dileedakal 4

¹U lī mín ki dóoyee, boonee m kpēkutagbɔŋu puee, kipunyɔkɔ kiba cúū pīti, ní nneen ɲun m bàà péé péé ki gbīl ɲu pɔɔ kpāŋkpam kii dikantándeé bí-mi yii: “Jɔm̄n̄ doo m̄ dākà-si tin bí ki dòon boonee.”

²Kpalaa niinee ní Unimbōti Fām yɔon-mi ki jóm̄ yilpu ní m ká dibeejal ní ubɔ ká dibeejalee pu.

³Udaan nimiin jīl ki ɲmòò làkálaka kii ataŋkpamonti ɲin bi yī jaspee n̄ ɲin bi yī sarduaneé, ní dikuntinyindi m̄anti ki tú dibeejalee ní ki jīl pàlpal kii ditaŋkpal din bi yī eemeeroodee.

⁴Ní abeejal mmuŋku n̄ anaa aba mun m̄anti ki tú dibeejalee, ní bikpilib bin ká an beejaliŋ gbanti puee pē tiwampin ní ki ciki sindaariya beefuulimmu.

⁵Dibeejalee ni ní utaa nín ɲmòò pu làkálakee n̄ ataadun n̄ dibintiŋkpaandi nyēeñ ní iŋminaapool iluli tūu ki yú dibeejalee nimiin ki tùm kpāŋkpam, an di sá Unimbōti Fām milulee.

⁶Tiŋku ubo dō dibeejalee nimiin ki wāl kílkil kii digitil nín wāl puee, kii atanjkee ŋin bi yî kristalee nín jíl puee. Dibeejalee jannaatiliŋ puee, tiwan tinaa tin cáá kufoouee yú kansikin ki mǎnti ki tú, ní ti-boon nì ti-nimiinee kòkò sá animil ŋma.

⁷Upeepēkaayee náán nì gbikinti, ní uliliitee náán nì unaja, ní utataatee nimiin nì unil yōŋu náán, ní unanaatee náán nì ukaalun yaa bí ŋààn u nín bí puee.

⁸Tiwan tinaa tin cáá kufoouee gbanti kòkò cáá ifeen iluu iluu ní, ní ti-wunti pu kòkò cáá animil ki kpáàn ti-poon. Ní bi lì ŋwiín pu nì kunyeeu kaa gbèentí yii: “Circir, circir, ti-Dindaan Unimbōti di sá circir, ùn ipōn kòkò daan, un nìn bí, ki gbínti ki bí, ki dàá dāāñee.”

⁹Dyunti ŋun ní tiwan tinaa tin cáá kufoouee yaa bí ki tì jilma nì tinyool ki pàkà un kǎ dibeejal pu ki dàá nīn bí kǐ nīn cá jaanjaanee,

¹⁰ní bikpilib mmuŋku nì binaayee líti un kǎ dibeejal pu ki dàá nīn bí jaanjaanee taapu ní kǐ nyōŋki-u, ní ki cíkití bi-fuulimmu ki lúkufí u-beejal taapu ní ki gǎ ilan ki pàkà-u,

¹¹yii: “Sii ti-Dindaan ti-Nimbōtiu, a máàn jilma nì tinyool nì mpōn, kun puee sii di náán tikòkò nì tikòkò, sii di là ní ki tī tikòkò dimaŋfal tí nīn bí.”

Dileedakal 5

¹Ní m ká un kǎ dibeejal puee ŋúb takalda ubo u-ŋaŋgiilin, an ŋmān poon nì boon ní bi dū tiwampiŋkaal tiluli ki bóob takaldee.

²Ní ntūun ŋun cáá mpōnee bí báakí mpōn yii: “Ōma di cáá mpōn kǐ búti tiwampiŋkaal nee kǐ kpátí takalda nee dee?”

³Báà ubo nìn kpá yilpuōō, ki kpá taapuōō, ki kpá ditaŋkpiilin kǐ ŋmā kǐ kpátí takaldee kǐ kǎàn poon.

⁴Niinee ní m bí sūn tikpil, kun puee ubo kaa nìn bí laaaba ki ŋūn kǐ kpátí takaldee kǐ kǎàn tin bí poonee.

⁵Ní bikpilib mmuŋku nì binaayee kansikin ubo bí-mi yii: “Taa ti sō. Kpèè! Juuda naakookun gbikintiu un sá ubōti Dafiidi naantiiuee ján ki jín. Ùn di dàá ŋmā kǐ búti tiwampiŋkaal tiluli tin bi dū ki bóob takaldee kǐ kpátí-u kǐ kǎàn.”

⁶Ní m kpēyee, dipibil di yú bikpilibee nimiin, dibeejal nì tiwan tinaa tin cáá kufoouee kansikinee, ki bí kii bi nìn kū-dee, ní dī cáá iyin iluli, animil aluli, animil alulee di sá Unimbōti Fām miluli min u tú duulnya kòkōnee.

⁷Dipibilee di dómín ki fǒō un kǎ dibeejal puee ŋaŋgiiliŋun takalda.

⁸U fǒō takaldee ki dóoyee ní tiwan tinaa tin cáá kufoouee nì bikpilib mmuŋku nì binaayee dómín ki líti u-nimiin, báà ŋma ŋúb kubeeu nì sindaariya sambiyaamu, ní talaalu gbí poon, talaaluae di sá binimbōtinooliibi wimmeem.

⁹Ní bi bí ki gà nlampɔɔn ki nyɔŋkí-u yii: “A máan kí fɔ̄ɔ takaldee kí búti tiwampiɔŋkaal tin bi dūu bóóbee. Kun puee bi kūū-si ní a-fatikuu dá anibul kɔkɔ nì isoon kɔkɔ nib, nì atimbun kɔkɔ nib nì ntimu kɔkɔ nib ki tī Unimbɔti,

¹⁰ki dū-bi ki n̄a dibeel poon nib, bí n̄n sá ti-Nimbɔtiu saraaŋaliibi kí jī dibeel duulnya poon.”

¹¹M bí ki kpèéyee, ní ki gbīl itūun kucikukpaan̄ŋu kutukub kutukub wooku mānti ki tú dibeejalee nì tiwan tin cáá kufoouee nì bikpilibee.

¹²Ní bi gà ilan m̄ɔn yii: “Dipibil din bi kūūyee máan bí tī-dì m̄ɔn nì tigaajati nì iciin nì jilma nì tinyool nì ipaka.”

¹³Niinee ní m gbīl tiwannáaŋkaal tin kɔkɔ bí yilpuee nì tin kɔkɔ bí taapuee nì tin gítí bí kitiŋ taapu taapuee nì tin bí tiŋkunee, tiwannáaŋkaal kɔkɔ bí ki gà ilan yii: “Un kā dibeejal puee nì dipibilee di máan inyɔŋki, ipaka, tinyool, nì m̄ɔn kí n̄n péécáá cá jaanjaan.”

¹⁴Ní tiwan tinaa tin cáá kufoouee kíi yii: “Ameen!” Ní bikpilibee líti bi-nimiin ki nyɔŋkí-bi.

Dileedakal 6

¹M yú ki kpèéyee, ní dipibil cúu tiwampiɔŋkaal tiluli tin bóób takaldee kubɔ ki búti, ní m gbīl tiwan tinaa tin cáá kufoouee kansikin kubɔ téen̄ m̄ɔn m̄ɔn kii ntaateenteenee yii: “Dāañ!”

²M kpèéyee, ki ká utampiin, un kā-uee n̄úb butɔbu, ní bi cíkiñ-u kibeefuulii, ní u búnti nì dijajil poon kí já kí jīn.

³Ní dipibilee búti tiwampiɔŋkaal kuliliitiiu, ní m gbīl kuwaŋu kun cáá kufoouee kuliliitiiu téen̄ yii: “Dāañ!”

⁴Niinee ní utaamu ubɔ mun nyánní ki sá uman ní bi pú un kā u-puee m̄ɔn ú lēŋgbansɔŋfi kitiŋ pu binib n̄ n̄n kù tɔb, ní bi dū kijikpaan̄ŋi ki tī-u.

⁵Ní dipibilee búti tiwampiɔŋkaal kutataatiiu, ní m gbīl kuwaŋu kun cáá kufoouee kutataatiiu téen̄ yii: “Dāañ!” M kpèéyee, ki ká utambɔn, un kā-uee n̄úb saniya u-ŋaan.

⁶Ní m gbīl nneen n̄ubɔ sòon̄ tiwan tinaa tin cáá kufoouee kansikin yii: “Dū saniya kí n̄màntī italandi disambil n̄wiin n̄ubɔ tundi paati, kí n̄màntī idi asambil ata n̄wiin n̄ubɔ tundi paati. Ama á taa gbēēŋkpam nì ndaam^{fc} pu.”

⁷Ní dipibilee tí búti tiwampiɔŋkaal kunanaatiiu ní m gbīl kuwaŋu kun cáá kufoouee kunanaatiiu téen̄ yii: “Dāañ!”

⁸M kpèéyee, ki ká utaamu un pīn̄ fūuuyee, ní bi yī un kā utaamu gbanti puee yii Đkúm, ní Ditaŋkpiil n̄ó-u, ní bi tī-bi m̄ɔn yii bí kpò kitiŋ pu nib kɔkɔ yaa yākatī minaayee dijandi diba nì njimu, nì n̄kum, nì bilbil kúm, ní ticuncuti tin bí kitiŋ puee n̄ cūti binib.

⁹Ní u cúú tiwampiiŋkaal kuŋmooŋmootiiu ki búti. M kpēēyee, ki ká nsaraafan ceeyee bin bin nìn sòòn Unimbòti bòti ki lèekī seerab bi kūū-bee nammu,

¹⁰ní bi bí ki tátí mpòn yii: “Ti-Dindaan un sá circir ki sá mbaamòndaanee, a dàá cīítí kí tin sāā nyunti ŋulõŋu ní kí sòòn duulnya yab bin kūū-tee bòti kí dáál bi-tafal ní?”

¹¹Niinee ní bi cáán abòkutipiin ki pēēn bi-kòkò ní ki bí-bi yii bí dá láá kàl kí ñuŋfi fiii, bi yaa láā kūū bi-tòntònjutiibi nì bi-nabiyaamu mun kíñ duulnyanee bí mun dómiñ ki kúti bi-puee.

¹²Ní dipibilee tí cúú tiwampiiŋkaal kululuutiiu ki búti, ní kitiŋ cīŋkì tikpil, ní ŋwiin fṣṣ ki bōntì kii satabonee, ní uŋmal mántì cínciŋ kii fatikuee,

¹³ní iŋmalbijaa tifi yilpu ki lítí alii kubuŋkpaanŋu nín tifi asubigaan ki lúkufi puee.

¹⁴Ní kutagbõŋu wáŋkì alii kukampeeu ní bi kpáb ki yḏõnee, ní ajoon nì ntimu mun nnyim māntì ki túee kpīkitì.

¹⁵Ní duulnya bōtiibi, biyidambi, bisoojakpilib, bigaajab, ipòndambi, iyumbu nì bin tó bi-bee, báà ŋma sán ki bāal afaŋgin ni nì titaŋkpanaakòtin ajoon pu,

¹⁶ní binibee li ajoon nì ataŋkpee yii: “Lítímaan kí biiñ ti-pu, un ká dibeejal puee n taa ká-ti, dipibil mun ŋuul n taa bān-ti.

¹⁷Kun puee ŋwiin ŋun sá diŋuukpaandi wiinŋuee bāán. Ōma di sá-u kí yūl?”

Dileedakal 7

¹Mín boonee ní m ká itūun inaa yú duulnya jaŋŋi naatil kòkò pu, ní ki ŋúb duulnya buŋku naatil, an nín dàá ḡá pu kubuŋu n taa jīti tiŋku puḵḵ, kí taa jīti kitiŋ puḵḵ, kí taa jīti busubu báà bubò puee.

²M gītī kpēēyee, ki ká ntūun ŋubò nyánní ŋwiin nín nyēēn puee ki ŋúb Unimbòti un bí dimaŋfalinee daaŋku, ní ki téēn ki tükū itūun inaa in fṣṣ mpòn kí dáá bīl kitiŋ nì tiŋkuee yii:

³“Ní taa láá ḡá kitiŋ nì tiŋku nì isufi tiba kí nīn cí nyunti ŋun ti yaa láā dū tidaandi ki nákañ ti-Nimbòtiu tontòntiibi yigbeenji pu ki dóḏyee.”

⁴Ní m gbīl bi lī bin bi nákañ Unimbòti daaŋku bi-yigbeenji puee wíiŋŋu nyòkòm, yii bi sá binib kutukub dilaataal nì imuŋku ili nì binaa^{fd} ní, Israyeel nibul kòkò poon ní bi nákañ Unimbòti daaŋku bi-yigbeenji pu.

⁵Bi dáán Juuda nibul kutukub saalaa nì bili, ki dáán Rubeen nibul kutukub saalaa nì bili, ki dáán Gaadi nibul kutukub saalaa nì bili,

⁶ki dáán Aseer nibul kutukub saalaa nì bili, ki dáán Neeftalii nibul kutukub saalaa nì bili, ki dáán Manasee nibul kutukub saalaa nì bili,

⁷ki dáán Siimeeyon nibul kutukub saalaa nì bili, ki dáán Leefii nibul kutukub saalaa nì bili, ki dáán Isaakar nibul kutukub saalaa nì bili,

⁸ki dáan Sabulon nibul kutukub saalaa nì bili, ki dáan Jooseefi nibul kutukub saalaa nì bili, ki dáan Beenjameen nibul kutukub saalaa nì bili.

⁹Miñ boonee, m kpēēyee, ní ki ká nnibiim tikpil tikpil, ubo kaa n̄ñ kí kàaṅ-mì, an n̄n sá anibul kòkò n̄ atimbun kòkò nib n̄ n̄timu kòkò nib n̄ isoon kòkò nib. Bi n̄n yú dibeejal n̄ dipibil n̄imiin ki pēē abokutipiin káŋkaŋ ki n̄úb tikpakpati bi-ŋaanin.

¹⁰Ní bi tátí mp̄on yii: “Difiil nyēēn ti-Nimbōtiu un k̄a dibeejal puee n̄ dipibil cee ní.”

¹¹Ní itūun in mānti ki tú dibeejalee, n̄ bikpilibee n̄ tiwan tinaa tin cáá kufoouee, líti dicincibil dibeejal taapu ní ki bí nyóŋkí Unimbōti,

¹²ní ki lì yii: “Ameen! Ti-Nimbōtiu di yì inyōŋki, jilma, iciin, ijaam, tinyool n̄ mp̄on kí n̄n péēcāá cá jaanjaan! Ameen.”

¹³Ní bikpilibee kansikin ubo bālfī-mi yii: “Binib bin pēēabokutipiin nee sá ba yab ní? Bi nyánní la ní?”

¹⁴Ní m kí-u yii: “M-Dindaan, sii di nyí-bi.” Ní u fātì ki bí-mi yii: “Bin nyánní falaakpaŋkpaan poonee dee. B̄n̄ di finti bi-bokutiŋ ki dū-ŋi ki n̄á dipibil fatikuun ŋi p̄il káŋkaŋ.

¹⁵An pu ní bi yú Kunimbōtidiin Unimbōti beejal n̄imiin ki jáam-u ŋw̄iñ pu n̄ kunyeeu, ní un k̄a dibeejal puee dàá n̄n bí bi-cee kí mōtì bi-pu.

¹⁶Ɔkùm kaa dāa gítí cútí-bi, n̄nyinnyoo kaa dāa gítí cútí-bi, diwiŋkaŋkambil kaa dāa w̄u-bi, ní kutuntuŋu kub̄o kaa dāa bí niin.

¹⁷Kun puee dipibil din yú dibeejal kansikinee di dāa sá bi-kpaaliu, ní kí cáá-bi n̄nyim min t̄i dimaŋfalee laŋki, ní Unimbōti n̄ p̄tí bi-nyinnyim kòkò.”

Dileedakal 8

¹Dipibil búti tiwampiŋkaal kululuútiuee, ní yilpu ŋm̄l̄ fōŋfōŋ díkidiki kii kukúluu dijandi pu.

²Ní m ká itūun iluli in yú Unimbōti n̄imiinee, ní bi t̄i-i akantán aluli.

³Ní ntūun ŋub̄o mun dóm̄in ki yúl nsaraafan cee ki n̄úb sindaariya sambiki kin poon bi n̄áaṅ talaalu ki t̄ut̄ēe. Ní bi t̄i-ŋu talaalu tikpil yii n̄ú tū̄ kí kpáaṅ Unimbōti nib wimmeem kí n̄á saraa kí t̄i Unimbōti, sindaariya saraafaŋŋu ŋun yú dibeejal n̄imiinee pu.

⁴Ní talaalu un ntūunee tū̄yee nyiim yíkí ŋu-ŋaan ki jóm̄ Unimbōti cee ki kpáaṅ Unimbōti nib wimmeem.

⁵Ní ntūunee ȳōṅ kisambiki kin poon bi n̄áaṅ talaalu ki t̄ut̄ēe ní ki p̄t̄i ŋŋmi nsaraafan pu ki gb̄ēēn ki-poon, ní ki dūu lúkuñ duulnyan. Niinee ní m gb̄il̄ dibintiŋkpaandi n̄ ataadun pu, ki ká an bí ŋm̄ò kii utaayee ní kitiŋ c̄iŋk̄i.

⁶Ní itūun iluli in n̄úb akantánee b̄ont̄i kí búñ i-kantáŋŋi

⁷Ntūun mpeepeekaa búń ɲu-kantáńdi ní ataanyĩnkumbil nì ɲɲmi ɲmāl fatiku ki nyáńńi yilpu ki líti kitiɲ, ní kitiɲ nín dō ki wīkí puee yaa yākatì mitee kikatii lēēki wùń, ní isufi nì timool nín dō ki wīkí puee yaa yākatì mitee an lēēkikatii ki wùń.

⁸Ní ntūun nliliiti búń ɲu-kantáńdi, ní an bí kii dijookpaandi di fōō ɲɲmee, ní bi dūu lúkuń tiɲkun, ní tiɲku nín dō ki wīkí puee yaa yākatì mitee dikatil kpántì fatiku.

⁹Ní tiwan tin cáá kufoou ki bí tiɲkune nì ti-nyókómee yaa yākatì mitee, kikatii lēēki kpî poon, ní meelab nì bi-nyókóm bin bí tiɲkune yaa yākatì mitee dikatil lēēpoon ki nāań.

¹⁰Ní ntūun ntataatee búń ɲu-kantáńdi, ní uɲmalbija ubo nyáńńi yilpu ki wù kii ɲɲminaapoolee ki dómiń ki líti amoo nì inyimbul yaa yākatì mitee dijandi diba pu.

¹¹(Bi yíi uɲmalbijee yii, Ntuntun.) Inyĩfi jandi din pu uɲmalbijee lítèe túɲki ní binib tikpil nyūń-mì ní ki kpíi kun puee mi nín túɲki.

¹²Ní ntūun nnanaatee búń ɲu-kantáńdi, ní ɲwiín yaa yākatì mitee dikatil fōō ki bōntì, ní uɲmal yaa yākatì mitee dikatil fōō ki bōntì, ní iɲmalbijaa yaa yākatì mitee dikatil fōō ki bōntì, ní dibombondi jéeti kitiɲ pu ɲwiin yaa yākatì mitee dikatil pu, ní uɲmal nì iɲmalbijaa kaa ti ɲmíntí kunyeeu yaa yākatì mitee dijandi diba pu.

¹³M bí ki kpèéyee, ní ki gbīl ukaalun ubo nín ɲàań yilpu yilpu ki táti mpon yii: “Mbusu, mbusu, mbusu gítí dō ki cí kitiɲ pu nib ɲyunti ɲun itūun ita in kínee yaa láa búń i-kantáɲjee.”

Dileedakal 9

¹Ní ntūun ɲɲmoonɲmootee búń ɲu-kantáńdi, ní m ká uɲmalbija ubo nyáńńi yilpu ki líti kitiɲ ní bi dū mbookpaan saafiiu ki tī-u.

²Ní u cúú mbookpaanee ki pīiti, ní ɲɲminyim nyēeń poon tikpil tikpil ali kii kipaai kikpaɲkpaɲɲinee, ní ki dūu bīń ɲwiín pu ki kpáań kubuɲu mun pu.

³Ní inakitoon nyáńńi ɲɲminyimee poon ki kpátii gbí kitiɲ pu, ní Unimboti tī-i mpon í nīn júntí binib án nīn wálfi kii inoomee;

⁴ní ki tükū-i yii í taa jú kumoou, kí taa jú nsuwaamu kí taa jú isukpaan, ama í nīn júntí binib bin kaa cáá Unimboti daaɲku bi-yigbeeɲi puee;

⁵ní ki bí-i yii í taa nīn júntí ki kù binib, ama í nīn júntí-bi bi yáɲkí ali iɲmal iɲmoo. I-looti weeni sá kii unoom yaa jú unil an nín wù u yáɲkí puee ní.

⁶Iwiin gbantee, binib dāa nyàab ɲkúm n dāá kpò-bi, baa làa dāá ká-mì, ɲkúm ní bi dāa néeń ama ní ɲkúm dāá dāá sān kí wàatī-bi.

⁷Inakitoonee bimbim náań nì kii itaamu in bi bōntì i cá kujaauee ní, ní i cáá tiba i-yiliɲ pu an náań nì sindaariya beefuuliiki, ní i-nimiin náań nì binib nimiin,

⁸ní i-yikpiti fòkò kii binimpoobi yikpatee ní i-nyĩɲi náań nì gbikinti nyĩɲi.

⁹Ní i cáá ajanjabokuti i-biṅṅi pu an náán nì tikúti. I yaa ṅàànee, i-feeni bintindi bí kii itaamu kupaaun nín dátí torkub ki sán ki jáà kujaaun puee bintindi ní.

¹⁰I-juuṅi nì i-looti bí kii inoomee ní i cáā júntí binib kí tin cáá sāa iṅmal iṅmoo.

¹¹I-bōtiu di sá ntūun ṅun kā kubookpaanṅun bi yî-ṅu Eebru soonin yîi Abadon, ní Greekib yî-ṅu bi-soonin yîi Apooliyon. (An taapu di sá yîi: un nàantée.)

¹²Mbusupeepeekaa dómiín ki ṅá ki jítì, an kíṅ mbusub bili mun n̄ dāān kí ṅá.

¹³Ní ntūun nluluuti búṅ ṅu-kantáandi, ní m gbīl̄ nneen ṅubō nyánní iyin inaa in n̄n cō sindaariya saraafanṅu ṅun yú Unimbōti nimiinee ni.

¹⁴Ní nneenee lī ntūun nluluuti ṅun ṅúb dikantáandee yîi: “Cùú gbìntī itūun inaa in bi bóob̄ i kā dimōol din bi yî Eefratee kí líí.”

¹⁵Ní bi gíiṅ itūun inaa in bóntì ki cí i-kúlku, nì i-wiṅṅu, nì i-ṅmaliu, nì i-bindi din bi dàá líí-i í lēēduulnya poon binib yaa yākatì mitee diba pu kí kpòee ki líi ṅyunti ṅun bi yóònee deedee.

¹⁶Ní m gbīl̄ bi lī yîi i-soojab bin kā itaamu puee sá miliyombi kulaafaau ní.

¹⁷M nín ká i-soojab bin kā itaamu puee nín bí puee sèé: bi-janjabokutiṅ mán kii ṅṅmee, ní iba yaṅ jìl̄ kii atankpamonti ṅin bi yîi iyasintee, ní iba yaṅ bòn̄ kii kunaaluṅuee, ní iba yaṅ bí kii kpalkuee. Itaamu yiliṅ bí kii gbikinti yilee, ní ṅṅmi n̄ nnyiim n̄ farwata nyēēi-nyōmmun.

¹⁸Ṍṅmi n̄ nnyiim n̄ farwata un nyēēi-nyōmmunee di sá ditafadaaldi din bi dūu kūū duulnya nib yaa yākatì mitee dijandi dibee.

¹⁹Di sá itaamuee pōṅṅu kā i-nyōmmun n̄ i-juuṅin ní, ní i-juuṅi náán n̄ ikoobu, ní i cáá ayil, an ní i cáā ṅáán̄ binib asaluu.

²⁰Binib bin kíṅ, ditafadaaldee kaa kūū-bee, baa dū bín̄ bi-ba nín ṅá tiṅyee ki fá, bi gbíntì ki jáám̄ arasiniibi n̄ awaa ṅin bi dū sindaariya n̄ animil kúti n̄ tasa kúti ki móyee, n̄ atankpree n̄ isufi, tin kaa wāl̄, kaa gbīl̄, kaa ṅūn̄ kí còòmee.

²¹Baa dū bi-nikpaakoṅṅu, n̄ bi-nyōjil, n̄ bi-laakpaati n̄ bi-naayufii ki fá.

Dileedakal 10

¹Boonee ní m ká ntūun ṅubō ṅun cáá mpōnee nyánní yilpu ki kpákatiín, ní ditagbandi bī ṅu-pu ní dikuntinyindi māntì ki tú ṅu-yil, ní ṅu-nimiin jiliṅkī kii ṅwiínee, ní ṅu-taṅi bí kii ṅṅmipiinee;

²ní ṅu ṅúb kitakaldabiki kiba, k̄i kpátì ki kā ṅu-ṅaan, ní ki dū u-ṅanṅiitaal ki tókōn̄ tiṅku pu, ní ki dū u-ṅanṅantaal ki tókōn̄ kitiṅ pu.

³Ní ṅu tééṅ mpōn̄ ali kii gbikinti di súṅ ní, niinee ní itaatantati iluli bī tátì.

⁴Ṍyunti ṅun m bàà là kí ṅmà itaatantatee nín sòōn̄ puee ní m gbīl̄ nneen ṅubō sòōn̄n̄ yilpu yîi: “Á dū itaatantati ilulee bōti kí dūú kpāafi, á taa dūú ṅmà.”

⁵Ní ntūun ɲun m bàà ká ɲu-taal diba tókó tiŋku pu din kínee kitiŋ puee, yḏoñ ɲu-ɲaŋgiil ki túl kutaa,

⁶ní ki pūtì un bí kí nīn cá jaanjaan ki náań yilpu ni tin kəkó bí yilpuee, ki náań kitiŋ ni tin kəkó bí kitiŋ puee, ki náań tiŋku ni tin kəkó bí tiŋkune, yii: “Unimbṓti kaa làá ti yóoń ɲyunti ɲubṓ!”

⁷Dyunti ɲun ní ntūun nluluútee dàá dāá búń dikantánde, ɲyunti gbantee ní tin nīn bí dibalin Unimbṓti yāntì u-təntənlīibi bin sá u-bənaatiliibee sòońee dàá ɲá.

⁸Ní nneen ɲun bàà nyánní yilpu ki sòoń ni mee gítī bí-mi yii: “Cù ntūun ɲun yú ɲu-taal diba tókó tiŋku pu, din kínee tókó kitiŋ puee cee kí fḏḏ kitakaldabiki kin kpátì ki ká ɲu-ɲaane.”

⁹Ní m cūti ntūunee cee ki mēē-ɲu ɲú dū kitakaldabikee kí tī-mi. Ní ɲu bí-mi yii: “Fḏḏ kí dūú ɲmó, kí dàá nīn mṓ a-nyəkən kii tisiilee ní, ama ní kí tin nín tū a-poon.”

¹⁰Ní m fḏḏ kitakaldabikee ntūun cee ki dūú ɲmó. M nín bí ɲmóðyee, an mṓ m-nyəkən kii tisiilee ní, ama m nín dūú nálee ní an túŋki m-poon.

¹¹Ní ɲu bí-mi yii: “An sá á gítī sòoń tin bí ki dòońee kí tükù binib tikpil, ni atimbun ni isoon kəkó nib ni bibṓtiibi ní.”

Dileedakal 11

¹Ní bi dū ɲkpaŋkpaan ɲubṓ ki tī-mi, ɲu náań ni ndo ɲun bidimaliibi cáā ɲmàntī ki māā adiin an tēēnee, ní ki bí-mi yii: “Yíkí ɲmàntī Kunimbṓtidii ni nsaraafan, kí kàań bin kəkó bí ku-poon ki jáań Unimbṓtee.”

²Ní ki bí-mi yii: “Yàntī, taa ɲmàntī Kunimbṓtidii cindi din bí mməŋki puee, kun puee bi dū niin ki tī atimbun ɲin kaa nyí Unimbṓtee, bíń di dàá tāā circir tiŋki pùb kí tin sāā abin ata ni dijandi.

³M-seeradambi bin m dàá dāá tōńee dāa pēē kutukub ní ki sòoń m-bṓti kí tin sāā abin ata ni dijandi.”

⁴M-seeraleeliibi gbantee di sá ɔliifi sufii ili ni fitilab bili bin yú ti-Dindaan un yì kitiŋee nimiinee.

⁵Uṓ yaa là kí bīl-bee, ɲɲmi ɲubṓ dàá nyānní bi-nyəmmun ní kí wò bi-nannanliibi, un nyàab kí bīl-bee nín dàá dāá kpú miŋyee dee.

⁶Bi cáá mṓn kí pīn kutagbəŋu iwiin in bi dàá dūú sòoń Unimbṓti bṓtee utaa n taa jḏḏ kitiŋ pu, ki cáá mṓn kí yàntī nnyim n kpántí fatiku, ki tí cáá mṓn kí yàntī animinaaman nín bí tṓbin puee n jēetí kitiŋ pu ɲyunti ɲun kamaa bi yaa lèe.

⁷Bi yaa láā sòoń Unimbṓti bṓti ki dóyee, upeel un bí mbookpaanee dàá dāá nyānní kí jáń-bi ní kí pṓkiń-bi ní kí kpò-bi.

⁸U yaa kūū-bee, anikpilee dàá gbíntí ki dō kitiŋkpaanŋi gbanti danŋi pu, kitiŋkpaanŋee ní bi dū ki nántiñ Soodom nì Eejipiti. Kitiŋ gbanti kibaantii poon ní bi kpáá bi-Dindaan ndɔpuntikaa pu.

⁹Anikiti, anibul, isoon kɔkɔ nib nì atimbun dàá dāā dāān kí kpèè anikpil gbanti kí tin sāa iwiin ita nì dijandi, baa làá dāá pō nsan bí síb-bi.

¹⁰Bi-kúm gbanti puee, an dāa sá duulnya yab kɔkɔ jiŋaal ní, ní bí fāal ní ki pūñ tɔb tiwan. Kun pu an dāa mōñ-bi mimmee di sá Unimbɔti bɔnaatiliibi bili gbantee nìn kón-bi diniminaamandin.

¹¹Ama iwiin ita nì dijandee boonee, Unimbɔti yānti ŋfām dómíñ ki kó bi-ni, ní bi fíkítì, ní tifaandi cúú bin yú ki kpèè-bee.

¹²Bi yáatii yúlèe ní ki gbíl nneen ŋubɔ sòoñní yilpu mpɔn yii: “Jōmírmaan doo!” Bi-nannanliibi yú ki kpèè-bi mín ní bi yíkii nín jóm yilpu ki tin kó atagban ni.

¹³Dicilpu niinee, kitiŋ cīŋkí ŋkpitim pu, bi yaa yākatì kitiŋ gbanti diiŋŋi saalaa puee, diba pu lēēki lítì ní binib kutukub biluli kpíi. Ní tifaandi kó bin kíñ kaa kpúyee, ní bi bí ki nyóŋkí Unimbɔti un yì yilpuee.

¹⁴Mbusuliliiti jítì, utataati di dàá bàñ kɔŋkɔnnee.

¹⁵Ntūun nluluútee búñ ŋu-kantánde, ní ineen kupaau sòoñní yilpu mpɔn yii: “Duulnya beel kpánti ti-Dindaan nì u-Kriisitoou beel ní kɔŋkɔnnee, ùñ di dàá nīn péēkā di-pu kí nīn cá jaanjaan.”

¹⁶Ní bikpilib mmuŋku nì binaa bin kā bi-beejaliŋ pu Unimbɔti ceeyee lítì dicincibil u-nimiin ki bí ki nyóŋkí-u,

¹⁷yii: “Ti-Dindaan Unimbɔti ipɔn kɔkɔ daan, sii un nìn bí ki gbínti ki bée, ti jáam-si a nín dàkā a-pɔŋkpaanŋu ki jín dibeelee pu.

¹⁸Atimbun nìn gíí a-pu diŋuul, ama ŋyunti bāān á dàkà-ŋi a-ŋuul nín sá puee, kí sòoñ bitaŋkpiibi bɔti. Ŋyunti bāān dee á pà a-tɔntɔnliibi bin sá a-bɔnaatiliibee paati, nì bin kɔkɔ sá a-yab ki fāŋkí-see, bikpaambi nì ŋwaamu. Ŋyunti bāān dee á kúntí bin bí ki nāantí duulnyee.”

¹⁹Ní bi cúú yilpu Nimbɔtidiiku ki pīitì ní bi ká dipoondi dakaau yú Kunimbɔtidiin. Niinee ní an bī ŋmóò ki tátí kii utaayee, ní m gbíl dibintiŋkpaandi pu, ní kitiŋ cīŋkí ŋkpitim pu, ní ataanyiŋkumbil lítì.

Dileedakal 12

¹Boonee ní maamaacikpaŋkpaan ubɔ nyán ki páan kutagbɔŋu pu: unimpu ubɔ pēēŋwiín ní ki tókó uŋmal pu ní ki cíkí kibeefuulii iŋmalbijaa saalaa nì ili náká ki-pu.

²Unimpuee dàá màal ní ki yáliŋkí imatiŋween ki gbáà ibiil.

³Ní maamaaci ubɔ gítí nyán ki páan kutagbɔŋu pu: an sá kupeewambiiu kubɔ, ku sá kumaŋu ki cáá ayil aluli nì iyin saalaa, ní kibeefuulii cíkí diyil sá kamaa pu.

- ⁴U-juul ní u dūu fùkū ñmalbijaa yaa yākatì mitee diba pu ki lúkufín kitiŋ pu, ní ki kíñ ki yú ki kól unimpu un daá màálee, u yaa màálee ú cúú kibikee kí ñmó.
- ⁵Ní unimpuee dūu màl kibininjabiki, kíñ di daá nīn cáá mpōn kii tikútee kí dūú kpōtī atimbun kōkō, ní bi yōñ u-bikee malaa ki jóm Unimbōti cee, u-beejal laŋki.
- ⁶Ní unaati sán ki búntì kupōoun laakin binib kpée. Niin ní Unimbōti bóntì ki yōñ-u ú cúú kàl bí nīn kpīntí-u kí tin sāā abin ata nì dijandi.
- ⁷Niinee ní kujaau fōō kutagbōŋu pu, Unimbōti tūuni kpiliu Mikayeel nì u-yab bí ki jáà nì kupeewambiiuee nì u-yab,
- ⁸ní Mikayeel nì u yab ján ki jíñ, ní ki jīñ-bi bí taa ti kàl kutagbōŋun.
- ⁹Ní bi téén kupeewambiiuee, ukookpiki un bi yī Sitaan u kíil duulnya kōkōee nì u-tūuni ki tón duulnyan.
- ¹⁰Ní m gbīl nneen ñubō téén mpōn yilpu yii: “Kōŋkōnee Unimbōti fiil bāān dee! Min bí nee ní ti-Nimbōtiu nyántì u-beel pōŋu ki dākā! Kōŋkōnee u-Kriisitoou dākā mpōn ŋun u cááyee, kun puee ukunfil un yú Unimbōti nimiin ki kúnfi ti-nabiyaamu boon ŋwīñ pu nì kunyeeuee, bi téé-u ki nyántì.
- ¹¹Dipibil fatikuu nì Unimbōti bōti tin ti-nabiyaamu sōōnee pu ní bi ján ki jíñ nì u, baa fāŋkì ki dū bi-ba kí tī ŋkúm.
- ¹²An puee án nīn mōñ yilpu yab, án nīn mōñ nimbi bin kòò kutagbōŋu puee, ama an sá mbusu ní ki tī-ni tiŋku nì kitiŋ pu yab, kun puee nì diŋuukpaandì ní Sitaan dūu kpákatiñ ni-cee, ki nyí mun yii ŋyunti fiii di kíñ-u.”
- ¹³Kupeewambiiuee nín ká yii bi téén-ku ki lúkuñ taapuee, ní ku nín jì unimpu un nìn màl kibininjabikee boon.
- ¹⁴Ní bi tī unimpuee ifeen ili kii ukaalun feeniee, ú ñàān kí nīn cá kupōoun laakin bi bóntì ki yōñ-u ú cúú kàl bí kpīñ-u abin ata nì dijandee, ukoobu n̄ taa ñmā kí ká-u.
- ¹⁵Ukoobuee sán ki jì-uee ní ki wūliŋkì nnyim ki tó unimpuee boon pú án kpántì ñimōol kí yōñ-u.
- ¹⁶Ama ní kitiŋ fī unimpuee, kitiŋ wāān ki dū nnyim min min kupeewambiiuee bàà wūliŋkì ki tón u-boon án bàà yōñ-uee ki nál.
- ¹⁷Niinee ní kupeewambiiuee fōō unimpuee pu diŋuul ní ki cūti ki bí jàà nì unimpuee biyaamu mun kíñee, bin kōkō tó Unimbōti marab ki ñúb Yeesu bōti deedeeyee.
- ¹⁸Ní kupeewambiiuee kíñ ki yú tiŋku gbandi.

Dileedakal 13

- ¹M kpēēyee, ní ki ká upeel ubō nyánní tiŋkun, ki cáá ayil aluli nì iyin saalaa ní ki cíkí u-yiŋŋu kamaa pu kibeefuulii, ní diyil sá kamaa puee disiibil náká ki sī Unimbōti.

- ²Upeel un m kée náán nì ugbii ní, ní u-taanj náán nì digbingbil, ní u-nyòkò náán nì gbikinti nyòkò; ní kupeewambiiuee dū ku-pòni kòkò nì ku-beel ki tī-u.
- ³U-yiliṅee diba nìn fṣṣ tiweendi ki cá ṅkúm, ama iweenee dāa dódò, ní an móòkiṅ duulnya yab kòkò ní bi nòó upeelee.
- ⁴Ní binib kòkò bí ki nyóṅkí kupeewambiiuee ku nín dū ku-pòni kòkò nì ku-beel ki dūu tī upeel un nyánní tiṅkune pu, ní bi bí ki nyóṅkí upeelee ki lì yii: “Ọma di ṅūn kí dū u-ba kí ṅmàntīn upeel nee? Ọma di ṅūn kí já nì u?”
- ⁵Ní bi pú upeelee kinyòkò ú nīn sòòn tibòfan ki bííl Unimbòti, ní ki tī-u mpòn ú nīn ṅáán mín kí tin sāā abin ata nì dijandi.
- ⁶Ní u lafun kíí ki bí sòòn tibòfan ki bííl Unimbòti yindi, nì u-kòṅkoonṅu nì bin kòkò kòò yilpuee.
- ⁷Ní bi pú upeelee nsan ú já nì Unimbòti yab kí pṣòkiṅ-bi, ní ki tī-u anibul kòkò nì aniwul kòkò, nì isoon kòkò nib nì atimbun kòkò pu mpòn.
- ⁸Kitiṅ pu nib bin yiṅṅi kaa ṅmān doooo duulnya kíltam dimaṅfal takaldau un dipibil dīn kpíyee yèe poonee, an nibee kòkò dāa jáám upeelee ní.
- ⁹“Un yaa cáá ditafalee n̄ pīlfi tiṅan.
- ¹⁰Un Unimbòti lī yii bi dàá cúú kuyunṅee, see bí cúú-u kuyunṅu, un Unimbòti lī yii bi dàá kpò-u nì kijikee, see bí kpò udaan nì kijiki. An sá Unimbòti yab n̄ dàkà bi-póòtam nì bi-fookiiu un bi cáá Unimbòti puee ní.”
- ¹¹Boonee ní m ká upeel ubò mun pún ki nyán kitiṅ ki cáá iyin ili an bí kii dipibil yiniee, ní ki sòòn kii kupeewambiiuee.
- ¹²Upeel upeepeekaayee nimiin ní u ṅáán maamaacib nì mpòn ṅun u fṣṣ u-ceeyee, ní ki yàntī binib bin kòkò bí kitiṅ puee jáám upeel upeepeekaa un nìn fṣṣ ṅkúm weeni ki dāa pòòkèe.
- ¹³Upeel uliliitee nìn ṅáán maamaacikpaambi, ki yàntī ṅmī nyēēn yilpu ki lítí kitiṅ binib kòkò nimiin.
- ¹⁴Mpòn ṅun bi nìn tī-u u cáā ṅáán maamaacib upeel upeepeekaa nimiinee ní u nìn cáā kííl binib ní ki páb binib bí náán upeel un bi nìn gāā kijiki ki gíiṅ ṅkúm watil pú waa kpíyee naṅku kí yóòṅ.
- ¹⁵Ní u fṣṣ mpòn kí ṅmā kí tī upeelee naṅku kun bi mánee kufoou, an nín dàá ṅá pu kú ṅmā kí nīn sòònee, ní bin yaa kaa gbāān ki jáām-kuee ú kpò bidambi.
- ¹⁶Mbiyaamu, bikpaambi, bigaajab, bisoodambi, bin tó bi-bee, nì iyumbu, u cānti bi nákaṅ bi-kòkò ṅaṅgiilii nì bi-yigbeeṅi pu tidaandi.
- ¹⁷Ubo kaa ṅūn kí dā tiba, kaa tí ṅūn kí nyāfi tiba, upeelee yindi nì u-yindi nòmbau yaa kaa náká udaan pu.

¹⁸An sá mpóon ní, un cáá iciinee n̄ tükù taapu. Kun puee tita n̄ imuṅku ita n̄ biluuyee dākà unil ubo yindi ní.

Dileedakal 14

¹Niinee ní m ká dipibil yú Siiyōn jool pu, u n̄ binib kutukub dilaataal n̄ imuṅku ili n̄ binaa bin yigbeenji pu bi ḡmān̄ u n̄ u-Baa yiṅṅee.

²M gbīl̄ nneen ḡubo nyánní yilpu ali kii mbuṅkpaan nyim n̄n̄ s̄it̄i puee, ní ki gít̄i bí kii utaa n̄n̄ tát̄i pu mpōn mpōnee, ní nneen ḡun pu m gbīlee bí kii bibeebōoliibi di bōs̄ bi-bati ki gā ilanee.

³Binib gbantee n̄n̄ yú dibeejal n̄ tiwan tinaa tin cáá kufoouee n̄ bikpilibee nimiin ki gā ilampōon, ubo kaa ḡūn̄ kí b̄f̄i-i, asee binib kutukub dilaataal n̄ imuṅku ili n̄ binaa bin bi dá ki nyánt̄in̄ duulnyanee baba di ḡūn̄ kí gā an lani.

⁴An nibee kaa d̄ōn̄ n̄ binimpoobi, baa ḡá tijokōndi, bi d̄i dipibil boon ki cá laakin di yaa céé. Unimbōti dá-bi ki nyánt̄i binib kansikin bí n̄n̄ sá bin bi dáá péé péé kí dūú t̄i Unimbōti n̄ dipibilee.

⁵Baa gbīl̄ an nibee mónt̄i nnyimōn dalba ki ká, baa kánt̄i ikpiti iba bi-pu kí l̄i.

⁶Boonee ní m ká ntūun ḡubo ḡaān̄ kutagbōṅu pu yilpu yilpu ki cáá tibōmōnt̄iil tin kaa cáá dikuntilee ki tükù binib bin kōd̄ duulnyanee, atimbun kōkō nib n̄ anibul kōkō n̄ isoon kōkō nib n̄ aniwul kōkō.

⁷Du n̄n̄ tát̄i mpōn yii: “Fàḡk̄imaan Unimbōti kí t̄i-u tinyool, kun puee ḡyunti bāān̄ ú sōōn̄ nnibiyaamu bōti. Nyōḡk̄imaan Unimbōti un náān̄ yilpu n̄ taapuee, n̄ tiṅku n̄ inyimbul kōkōee.”

⁸Ní ntūun nliliiti páānní ní ki l̄i yii: “Babilōḡk̄paan líti! Kitiṅk̄paanḡi líti! U nyūnt̄i atimbun kōkō u-daam min sá u-laakpaati tin u ḡaān̄ an lákatèe!”

⁹Ní ntūun ntataati páānní ki l̄i mpōn yii: “Un di yaa gbāān̄ ki jáām̄ upeelee n̄ u-naṅku, ní ki yānt̄i bi dáān̄ u-yigbeel n̄ u-ḡalee,

¹⁰Unimbōti dáá dāā nyūnt̄i udaan ndaam min sá u-ḡuulee. U dáá dāā f̄ōs̄ bidambi pu diṅuukpaandi d̄in̄ kaa cáá jutee kí dū-bi kí t̄ō farwata ḡmiṅun bí j̄i falaakpaan, u-tūuni circirdambi n̄ dipibil nimiin.

¹¹Dḡmi ḡun poon bi dáá n̄n̄ bí ki j̄in̄ falaayee dáá n̄n̄ péēdükù ní kaa cáá dikuntil, baa dāā cáá diṅuḡfil ḡwiin̄ pu n̄ kunyeeu, b̄in̄ bin kōkō gbāān̄ ki jáām̄ upeel n̄ u-naṅkuee, n̄ bin yānt̄i bi dū upeelee yindi ki dáān̄-bee.”

¹²Dyunti nee di máān̄ binimbōtinooliibi bin ḡúb̄ Unimbōti marab tiṅan ki máká Yeesu puee n̄ pōōn̄ bi-ba, kí n̄n̄ cáá kimōtii.

¹³Ní m gbīl̄ nneen ḡubo sōōnní yilpu yii: “Dm̄a yii: Án̄ n̄n̄ mōn̄ bin n̄óó ti-Dindaan ki kúú kōḡkōnneeyee.” Unimbōti Fām̄ l̄i yii: “An sá mbaamōn, bi dáá cūú kāl̄ kí ḡuḡfi kun puee atunnyaan ḡin̄ bi túnee d̄i-bi.”

¹⁴M kpēēyee, ní ki ká ditagbampindi diba, ní ubo kā di-pu ki náán nì unil, ní ki cíkí sindaariya beefuuliiki ki ñúb ugoti un jítée u-ñaan.

¹⁵Ní ntūun ñubọ nyánní Kunimbótidiin ki téén mpɔn ki tükū un kā ditagbampindi puee yii: “Dū a-gotiu ee kí nīn cēētijikaal, kun puee kudiceeu ñmānti. Duulnya bīn ki ñmānti bí cā.”

¹⁶Niinee ní un kā ditagbandi puee dū u-gotiu ki bó duulnyan ní ki cáń duulnya.

¹⁷Ní ntūun ñubọ mun gítí nyánní yilpu Nimbótidiikun ki mun ñúb ugoti un jítée.

¹⁸Ní ntūun ñubọ gítí tí nyánní nsaraafan ni, ñún di ñúb ññmi pɔññu, ki téén mpɔn ki tükū ñun ñúb ugoti an jítée yii: “Dū a-gotiu un jítée kí bō fiinyi sufii in sí kitiñ puee sakañi poon kí kitiñ kun puee abil bīn.”

¹⁹Ní ntūunee dū ñu-gotiu ki bó fiinyi sufii ní ki kitiñ duulnya fiinyi biliñ ki gbéèñ mbookpaan ñun-ni bi ñmāam ki lèekī ndaamee, an dākà yii bi cáā kón Unimbóti ñuulin dee.

²⁰Ní bi ñmāam fiinyi biliñee mbookpaanee ni kitiñ kpaanceetiñu nnyim n nyā, kun nyánee di sá fatiku, ki pùub ki tin sāā atañkpee alaataa ata. Ní fatikuee nín dō ki jóm puee tin sāā itaamu nyɔkpaañi.

Dileedakal 15

¹Ní m gítí ká maamaacikpaan ubo yilpu an sá bitii: m ká itūun iluli ñúb falaabi biluli. Bīn di sá bifalaajoolkaabi bin Unimbóti dàá dūú tō binib pu ní u-ñuul n nín sòñkèe.

²Ní m ká tiba an náán nì tiñku ní ki wāl kílkil kii digitilee ní ki ñmāñ nì ññmi, ní m ká bin ján ki jín upeelee nì u-nañku nì nomba un sá u-yindee yú tiñku un wāl kílkil kii digitilee cee ki ñúb tibati tin Unimbóti tī-bee,

³ní ki bí ki gā Mooisi Unimbóti tontɔnliu nì dipibil lani yii: “Ti-Dindaan Unimbóti ipɔn kɔkɔ daan, a-tuunñi wīkí ki sá amɔnti, sii di sá atimbun bɔtiu. A nín lēensambiyaamu muñyee bí deede ní ki sá mbaamɔn.

⁴Ti-Dindaan, ñma di kaa làá fàñkì-si? Ìma di dàá yíí, kaa làá tī-si tinyool? Kun puee sii baba di sá circirdaan, atimbun kɔkɔ dàá dāāñ ní kí gbàāñ a-nimiin kí nyɔñkì-si, kun puee báá ñma ká a-tuunñi, ñi bí deede.”

⁵Mín boonee m ká Kunimbótidiin kun bí yilpuee cúū pītì, ní Unimbóti tantiu un dākà u-bítamee yú poon,

⁶ní itūun iluli in ñúb falaabi bilulee nyánní Kunimbótidiyee poon ki pēētiwampin káñkañ ki jìl, ní ki dū sindaariya dambalau ki cúú i-biññi.

⁷Tiwan tinaa tin cáá kufoouee kubọ tī itūun ilulee sindaariya sambiyaamu mululi, Unimbóti un bí jaanjaanee ñuul gbí poon.

⁸Niinee ní Unimbóti nyooti nì u-pɔññu yānti nnyim yíkí ki gbí Kunimbótidiin, ní ubo kaa ti ñún kí kó niin, see falaabi bin bi tī itūun ilulee nín dāa jítée.

Dileedakal 16

- ¹Ní m gbìl̄ nneen ɣubɔ nyánní Kunimbɔtidiin ki sòon mpon ki tükù itūun ilulee yii: “Nín cámaan kí kpáatí Unimbɔti ɣuul din bí nsambiyaamu mululinee kí sītīmaan duulnyan.”
- ²Ní ntūun mpeepeekaa kpáatì diɣuul din gbí ɣu-sambikinee ki sītì duulnyan, ní ibunsoon dómín ki jéetì bin kɔkɔ cáá upeelee daaŋku ki jáam̄ u-naŋkuee pu.
- ³Ní ntūun nliliiti kpáatì diɣuul din gbí ɣu-sambikinee ki sītì tiŋkun, ní tiŋku nyim kpántì fatiku ali kii unil un bi kūūyee fatikuuee, ní tin kɔkɔ bí tiŋkun ki cáá kufoouee kpî.
- ⁴Ní ntūun ntataati kpáatì diɣuul din gbí ɣu-sambikinee ki sītì amɔɔ poon nì ikpin poon, ní inyiŋfi kpántì fatiku.
- ⁵Niinee m gbìl̄ ntūun ɣun yì inyiŋfi pɔŋɣuee bí yii: “A sá deedeedaan ní a nín ɣá min nee pu, sii un bí ki nìn péébí dooooyee, a sá circirdaan ní.
- ⁶Di sá bi nìn kūū a-nib nì a-bɔnaatiliibi bi-fatikuu nyán ki fá, mín pu ní a yántì inyiŋfi kpántì fatiku bí nyò, bi nín máaŋ puee ní a ɣá-bi nee!”
- ⁷Ní m gbìl̄ nneen ɣubɔ nyánní nsaraafan ni yii: “Tiŋman, ti-Dindaan Unimbɔti ipon kɔkɔ daan, a nín sòon̄ binib ɔti miŋyee sá mbaamɔn ní ki sá deede.”
- ⁸Ní ntūun nnanaati kpáatì diɣuul din ká ɣu-sambikinee ki sītì ɣwiín pu yii ɣwiín ń píł binib tikpil.
- ⁹Ní kutuntuŋu píł binib tikpil ní bi bí ki bííl̄ Unimbɔti un cáá mpon falaabi gbanti puee yindi, ki yî kaa fá bi-kpitii kí tī Unimbɔti tinyool.
- ¹⁰Ní ntūun ɣɣmoohmooti kpáatì diɣuul din gbí ɣu-sambikinee ki sītì upeelee beejal pu, ní u-beelin nib jéetì dibɔmbɔndin, ní tifaandi yántì binib júntí bi-limbiliŋ kun puee iween nìn gbìl̄-bi.
- ¹¹Bi-bunsooni nì bi-falaau un bi bí ki jīnee pu ní bi bí ki bííl̄ Unimbɔti un yì yilpuee. Ama bi yî, kaa fá bi-tuŋkpitiŋ.
- ¹²Ní ntūun nluluuti kpáatì diɣuul din ká ɣu-sambikinee ki sītì Eefrati mɔkpaandin, ní dimɔol fɔotì ki kūn̄ ki kpántì nsan bibotiibi bin nyēēn ɣwiín nín nyēēn puee kíñ ki dì.
- ¹³Ní m ká arasiniibi bita, bi náaŋ nì kpaadalib ki nyánní kupeewambiiuee nì upeel un kínee nì u-bɔnaatiliu unyimɔndaan nyɔkɔn.
- ¹⁴Arasiniibi bitee ɣáaŋ maamaacib, ní ki cūtì ki ká duulnya kɔkɔ ɔtiibi ki kpáfi-bi bí dāá já nì Unimbɔti ipon kɔkɔ daan u-wiŋkpaanɣu dal.
- ¹⁵“Ní píłfi, m dàá dāaŋ kii unaayuu yamee ní! Án nīn mōn̄ sii un kaa gēēn ki ká ki cí a-bɔkutilee, siiyee, kaa dāa nyēēdicanɣbeel bí ká a-cooi.”
- ¹⁶Ní arasiniibee kóon̄ bibotiibi ki cáá kpáfi laakin Eebru yab yî yii Amageedɔnyee.

¹⁷Ní ntūun nluluúti kpáati diŋuul din kā ŋu-sambikinee ki yàl kutaa pu, ní m gbīl nneen ŋubɔ nyánní Kunimbɔtidiin dibeejal cee mpɔn yii: “An ŋá ki dódò!”

¹⁸Niinee an bīi ŋmòd nyàlnyal ki tátí kii utaayee, ní m gbīl dibintiŋkpaandi pu ní kitiŋ cīŋkí ŋkpitim pu. Doooo binib nín kā duulnya poonee, kitiŋ kaa láá cīŋkí mín bi ká.

¹⁹Ní kitiŋkpaanŋi líti ki nābiti agin ata, ní atimbun tiŋkpaammu kòkò wīl. Niinee Unimbɔti téetì Babilɔn kitiŋkpaanŋi pu, ní ki dū u-ŋuul din pɔɔ kpāŋkpamee ki nyūnti-kí kii ndaamee.

²⁰Ní ntimu mun bí amɔɔ kansikinee nì ajoin wāŋkí.

²¹Ní ataanyiŋkumbil ŋin nyim kii kiiloobi imuŋku ilee líti ki tàbiti binib, ní binib bí ki sī Unimbɔti ditafadaaldi gbanti pu, kun puee ditafadaaldee nìn pɔɔ ki lákatì.

Dileedakal 17

¹Boonee ní itūun iluli in kpáati diŋuul ki sīti duulnya puee ŋubɔ sūtín m-cee ní ki bí-mi yii: “Dāān tí cù m dākà-si bi nín dàá dáál ulaakpaakpaan un kā ikpin puee tafal miŋyee.

²Kitiŋ pu bɔtiibi dɔɔn nì u, ní kitiŋ pu nib mōnni-u ní u-laakpaati gbí-bi kii ndaamee.”

³Ní Unimbɔti Fām dómín m-ni ní ntūun yɔɔn-mi ti búnti kupɔɔun, ní m tin ká unimpu ubɔ kā upeel pu. Upeelee sá uman, ní u-wunti kòkò náká asiibil ki sī Unimbɔti, ki cáá ayil aluli nì iyin saalaa.

⁴Unimpu gbanti pēēdibɔkutinyaandi diba di mán, ní u-falfatib nì u-bɔmbiliŋ nì u-beedimbiliŋ sá sindaariya nì atanŋkpee ŋin pɔɔ kudaau ki jìlee, ní ki ŋúb sindaariya sambiki ikpiti nì tilaakpaal tin u ŋáánee jòkònti gbí poon.

⁵Ní dimaamaacyindi diba ŋmān ki náká u-yigbeel pu yii: “Babilɔn kitiŋkpaanŋi, tilaakpaaldambi nì bitiywiiliibi na.”

⁶Ní m ká yii unimpuee nyūn Unimbɔti nib nì bin nóó Yeesu deedee bi kūū-bee fatikuu ki gbí. M nín ká mimmee ní m bākati seeee.

⁷Ní Unimbɔti tūuŋu bālfí-mi yii: “Ba ŋá ní a bākati? M dàá tükù-si unimpuee nín sá kuŋyee, nì upeel un pu u kā u cáá ayil aluli nì iyin saalaayee taapu.

⁸Upeel un a ká nee nìn bí dooooyee, ama kɔŋkɔnnee waa ti bí. U dàá nyānní mbookpaan ŋun ni u nìn bée ní kí nīn cá laakin bi dàá nāān-uee. An dàá dáá ŋá bin doooo duulnya kíltam baa ŋmān bi-yiŋi dimaŋfal takaldaunee maamaaci, bi yaa láā fātii gítí ká upeel gbantee. Di sá upeelee nìn péēbí dooooyee ní ki dāa wāŋkí, ní ki dāa gítí fātii nyánní.

⁹“Tibɔti nee pu ní unil máān kí dākà u-landòkɔŋu nì u-ciŋŋu. Upeelee yiliŋ alulee di sá ajoin aluli ŋin pu unimpuee kēe, ní ki sá bibɔtiibi biluli mun.

¹⁰Bibɔtiibi bilulee kansikin biŋmoo líti, ubɔ kā dibeejal pu, ní un kínee kaa láá bāān, ama ú mun yaa láā bāān waa láá kāl kí yúntí.

¹¹Upeel un nìn bí ní kaa ti bée u-ba kùtì ki sá ubòtininiiti, ú mun sá bibòtiibi bilulee kansikin ubò ní. Úh̄n ní bi dàá nàān.

¹²“Iyin saalaa in a kée di sá bibòtiibi saalaa bin kaa láá kāl̄ dibeel puee, ama bi dàá tī̄-bi mp̄on bi nì upeelee n̄ jī dibeel kukuluu kubò poon.

¹³Bibòtiibee kòkò dāa pē̄kinyòkò ní kí dū bi-p̄oni kí kūtì upeelee.

¹⁴Ní bí ján̄ dipibil, ní dipibil n̄ dāá p̄òkìh̄-bi u nì bin kòkò sá u-yab u lútì-bi bi yú deedeeyee, kun puee ùh̄n di sá bidindambi kòkò Dindaan, nì bibòtiibi kòkò Bòtiu.”

¹⁵Ní ntūunee gítī bí-mi yii: “Inyinj̄fi in pu a ká kilaakpaayee kēe di sá atimbun nibiim nì isoon kamaa nib.

¹⁶Iyin saalaa in a kée nì upeelee dàá n̄n ná kilaakpaayee ní. Bi dàá dāá gbākāl̄ tiwan tin kòkò k̄a ki-wunti puee ní kí kín̄ dicancangbeel, ní kí dāá ñmó ki-nanti ní kí dū-kì kí wò ñ̄mi.

¹⁷Di sá Unimbòti di dū min u lèe ki ñá bi-p̄obiliñ̄in bí ñá ubaanti kí dū bi-p̄oni kí kūtì upeelee pu, kí n̄n cí ñyunti ñun Unimbòti dàá dāá ñá min u nìn lī yii u dàá ñée.

¹⁸“Unimpu un a kée di sá kitiñkpaañ̄i kin tókó duulnya bòtiibi puee.”

Dileedakal 18

¹Boonee ní m ká ntūun ñubò nyánní yilpu ki cáá mp̄onkpaan ní ñu nín jìl̄ puee ñmínti duulnya kòkò.

²Ní ntūunee téen̄ mp̄on yii: “Kì lítì, Babilòn tiñkpaañ̄kee lítì ki kpánti k̄onk̄onnee arasiniibi k̄onk̄ooñ̄u, arasiniibi nín bí t̄obin puee ballañ̄ki, nì inoon in kòkò kaa sàafi kpataaayee ballañ̄ki;

³kun puee kì nyūnti atimbun kòkò ki-daam min sá ki-jòkòmbiikuee, duulnya bòtiibi kòkò d̄soh̄n nì kì ki kpánti bijòkòndambi, ní duulnya bantiliibi k̄uliñ̄kì ki-wannyaanti tikpil tikpil.”

⁴Ní m gítī gbīl̄ nneen ñubò nyánní yilpu ki lī yii: “M-samaau, nyāmaan kitiñ̄ nee poon, an nín dàá ñá pu ní taa ñá ki-kpitii, kí dāá f̄ōō ki-tafadaaldi din bi bónti ki yóoh̄n-kèe.

⁵Kun puee kitiñ̄ gbanti yab kpitii kpúkú ní ki tin s̄ā kutagb̄oñ̄u, Unimbòti kaa súnti ki-tuñkpitij̄ gbanti pu.

⁶Dámaan-kì kii kì nín ñá-ni puee, téemmaan-kì ikpiti in ki ñá-nee mili, kì nín dáal̄ ni-tafal miñyee, nimbi n̄ dáal̄-kì mín̄ mili pu.

⁷Kì nín cáá tiwannaandi ki ḡa ki-bindi miñyee, ní yánti falaa nì diniminaamandi n̄ kó-kì mín̄, kun puee kì sòoh̄n ki pò ki-ba yii kín̄ sá unimpubòti ní, kaa sá ukpiipu, diniminaamandi kpá kí kó kín̄ dalba dalba.

⁸An pu ní ditafadaaldi din d̄ō ki cí-kèe kòkò dàá bàh̄ ki-pu ñwimbaanti, ñkúm, diniminaamandi, ñkùm; ní ñ̄mi n̄ dāá p̄únti-kì kí wò, kun puee ti-Dindaan Unimbòti un dáal̄ ki-tafalee sá mp̄ondaan ní.”

⁹Niin ní duulnya bōtiibi bin nì u kpáfi ki nǎ tijokondi ki yākatì ki-wannyaantee, dàá sō kí yálinǵi bi yaa láá ká ŋŋmi ŋun bī wù kitiŋ gbantee ŋminyim yíkì jòoooyee.

¹⁰Diniminaamandi din poon kitiŋee dàá dǎá kóee dàá cúú-bi tifaandi, ní bi dǎa yú kudandaŋu ki lì yii: “Ba busuu di jéeti Babilon kitiŋkpaanŋi kin cáá mponee pu nan dee? Kukúbambaantiiu poon bi kpááa péē dáal sii tafal sòkomiin?”

¹¹Ní duulnya bantiliibi sūn ki yálinǵi ki-pu kun puee baa làá ti ká ubo n̄ dā bi-nyampuwanti;

¹²bi-nyampuwanti tin sá sindaariyab nì animil kúti, nì ataŋkpee ŋin pōō kudaauuee, nì idinfi, nì iŋaamonti, nì iŋaabon, nì iman, nì in bí kii sirci ki pōō kudaauuee, nì ido in cáá kudapoou tikpilee kòkò, nì tin kòkò bi cáá akuntinyin ki nǎaŋee, nì bi nín cáá ido ki kpítí tiwammontiil tin an pōō kudaauuee, nì tasa kúti nì tikúti wanti nì ataŋkpee ŋin jìlee,

¹³nì talaalub nín bí tōbin puee nì tifaal tin sófèe nì ŋkpaŋmitikaam, nì tikalinǵpin tin bi tūtū an sófèe, nì idafi, nì ikpafi, nì ŋkponoyim, nì blee bilin nì inaa nì ipii, nì itaamu, nì torkub, nì iyumbu, ki tin kpáaŋ binib nammu.

¹⁴Ní binyampoobe kìn ki lì yii: “Tiwan tin pu a-nimiliŋ máŋee kaa ti dàbin-si, a-gaajati nì a-wannyaanti tin jìl pàlpalee wǎŋki a-ŋaan, a péēgítí kpá kí ká-tì jaanjaan!”

¹⁵Binyampoobi bin di bānti kitiŋ gbanti poon ki ká animilee, dàá dǎá fǎŋki falaa un kitiŋee bī jñee, an pu ní bi dǎa yú kudandaŋu ki sūn ki yálinǵi,

¹⁶ní ki lì yii: “Mbusu, mbusu kó kitiŋkpaanŋi, kìn kin n̄n pēēiŋaamonti, ibon nì iman bōkutinyaanŋee, ki túuŋ sindaariya falfatib nì abeedimbil nì idinfi an pōō kudaau ki jìlee,

¹⁷kukúbambaantiiu ja poon ní bi dūu kúnti ki-gaajati kòkò!” Bimeelaŋaalkpilib kòkò nì bin kǎ meelabinee nì bimeelaŋaalliibi nì bin kòkò tūn ditundi tiŋkune yún kudandaŋu

¹⁸ki wǎl kitiŋee nín fōō ŋŋmi min ŋminyim yíkì jòoooyee, ní bi gbáa ibiil yii: “Kitiŋ kiba kpá bí dūú ŋmàntīn Babilon tiŋki”;

¹⁹ní ki jáfí n̄tam ki sītī bi-yiliŋ pu ki sūn ki yálinǵi ní ki lì yii: “Mbusu ulou di nín kó kitiŋkpaanŋi mín nan dee? Ki-gaajati pu ní meelabdambi kpánti bigaajab. Ní kukúbambaantiiu ja poon ní bi kpááa kúnti sii nì a-wanti kòkò?”

²⁰Nimbi bin kóò yilpu ki sá Unimbōti yab nì Unimbōti bōnaatiliibi nì Yeesu kpambaliŋee, n̄n fāalmaan tin bāaŋ kitiŋkpaanŋi gbantee pu, kun puee ikpiti in kì nǎ-nee pu ní Unimbōti dáal ki-tafal kí pò-ni.

²¹Niinee ní ntūun mpōndaan ŋubo yōon ditaŋkpal diba di gbifi kii kunaauuee ki tó tiŋkun, ní ki bí yii: “Mín ní bi dàá dǎá téé Babilon kitiŋkpaanŋi kilkil kí tō taapu, ubo kaa dǎa gítí líkití ki-pu jaanjaan.

²²Baa làá ti gbìl kitiŋ gbanti poon bi bòó kubeeu, kaa làá gbìl bi bún diwul áa dikantánda, kaa làá ti gbìl bigbingbiilliibi baa ubo pu, kaa làá ti wāl utontonli báa unyee kitiŋ gbanti poon, kaa làá ti gbìl bi nà kunaau.

²³Fitila walŋu kaa làá ti ŋmíntí kitiŋ gbanti pu, baa làá ti gbìl dinimpucaal puɔɔ, kaa làá ti gbìl dicamondi pu. Kun puee bibantiliibi sá bikpikpaambi ní kitiŋ gbanti poon, ní ki cáá bi-boti ki kíil binib kəkə.”

²⁴Kitiŋ gbanti fɔɔ ditafadaaldi kun puee bi kū Unimboti yab nì u-bonaatiliibi nì bin kəkə bi kū kitiŋ puee.

Dileedakal 19

¹Boonee ní m gbìl yilpu an bí kii kunipaau neenee, ki lī mpɔn yii: “Aleeluuya! Ti-Nimbōtiu di yì difiil nì tinyool nì mpɔn.

²U-bosoontam sá mbaamɔn ní ki bí deede. Di sá yii u sòñ ki kū kinimpulaakpaai bōti kì nín dū tilaakpaal ki tìntì kitiŋ pu kəkə nib ki yāntì bi kpántì bikpitibee, ní ki dáal ki-tafal ki tòn-kì ipɔntoon kì nín kū u-tontonliibi puee.”

³Ní ki gítì bí yii: “Aleeluuya! Kun puee kitiŋ gbanti dàá nīn péewù ŋŋmi ní ki-ŋminyim á nīn yíkí mīn kí nīn cá jaanjaan.”

⁴Ní bikpilib mmuŋku nì binaayee, nì tiwan tinaa tin cáá kufoouee, líti Unimbōti un kā dibeejal puee nimiin ní ki bí yii: “Ameen! Aleeluuya!”

⁵Ní nneen ŋubo nyánní dibeejal cee yii: “Nimbi bin kəkə sá Unimbōti tontonliibee, nyɔŋkìmaan-u! Bikpaambi nì mbiyaamu, bin kəkə fāŋkí-uee, nyɔŋkìmaan-u!”

⁶Ní m gbìl an bí kii binib kupaau di sòñee, ní ki bí kii dimɔl nyim nín sītì nsitimmin puee, ní ki gítì bí kii utaa nín tátì mpɔn puee, ní ki lì yii: “Aleeluuya! Ti-Dindaan Unimbōti ipɔn kəkə daan, di sá uboti ki kā dibeel pu.

⁷Tí nīn fāalmaan án nīn mōñ-ti tí nīn nyóŋkí Unimbōti, kun puee dipibil nimpucaatam bāa, u-bɔɔn bóntì ki dód.

⁸Unimbōti tī-u dibokutipindi káŋkaŋ din jìlee ú pèñ.” (Dibokutipindee di sá deede tuuŋŋi ŋin binimbōtinooliibi ŋée.)

⁹Ní Unimbōti tūuŋŋu bí yii m ŋmà yii: “Unimbōti á yāntì án nīn mōñ nimbi bin bi yíin ní dáá jī dipibil nimpucaatam jintee!” Ní ki gítì kútì yii: “Unimbōti u-ba di lī mīn.”

¹⁰U lī mimmee ní m gbāań kí jāań-u, ní u bí-mi yii: “Taa ŋée! Man mun péesá utontonli kii si mun nì a-nabiyaamu mun bí ki sòñ Yeesu bōti tin u nyántì ki dākā-nee ní. Unimbōti ní a máań kí jāań.” Kun puee Unimbōti Fām nín yāntì Unimbōti bonaatiliibi sòñ tnyee sòñ Yeesu pu ní.

¹¹Niinee ní m ká yilpu pīitì, ní utampiin ubo nyánní, ní unil ubo kā u-pu, bi yī udaan yii Deede nì Mbaamɔn, u sòñ tiboti deede ki jáa kujaau nì deede.

¹²U-nimiliŋ ɣmóò làkàlaka kii ɣɣmee, ní u cíkí mbeefuulimu tikpil u-yil pu, diyindi diba náká u-pu, bàà ubɔ kaa nyí-dì, see ùn baba.

¹³Ní u-bɔkutil din u pēēyee táká fatiku, ní bi yìl-u yii: “Unimbɔti nyɔɔbundi.”

¹⁴Ní yilpu soojab nós-u ki k̄a itampiin pu ki pēē abɔkutimonti apiin káŋkaŋ.

¹⁵U-nyɔkɔnee kijanjajiki k̄a ki jītí, an ní u dàá dū kí ján atimbun, mpɔn ɣun u dàá dāá n̄n cáā kpòotī-bee dāa pōō kii tikútee ní, ní Unimbɔti ipɔn kɔkɔ daan nín díkí bi-pu diŋuul diŋyee puee, u dàá dāa nà-bi dúsídusi kii bi nín nà asubil pu ki ɣáań ndaamee ní.

¹⁶Bi ɣmān diyindi diba u-bɔkutil n̄ u-tapandi pu yii: “Bibɔtiibi kɔkɔ Bɔtiu, bidindambi kɔkɔ Dindaanu.”

¹⁷Ní m ká Unimbɔti tūuŋɣu ɣubɔ yú ɣwiiń poon, ní ɣu tééń mpɔn ki tükū inoon in kɔkɔ ɣáań kutaa puee yii: “Dāá kpāfimaan kí jī Unimbɔti jiŋaalkpaanu!”

¹⁸Ní dāań kí jī bibɔtiibi n̄ bisoojakpilib n̄ bipɔndambi wunnanti n̄ itaamu n̄ bin k̄a-iee wunnanti, n̄ binib kɔkɔ wunnanti, bin yì bi-bee n̄ iyumbu, n̄ binikpaambi n̄ biwaabi.”

¹⁹Niinee ní m ká upeelee n̄ duulnya bɔtiibi n̄ bi-soojab kpáfi kí ján un k̄a utaamu puee n̄ u-soojab.

²⁰Ní un k̄a utaamu puee n̄ u-soojab cúú upeelee n̄ u-nyimɔmbɔnaatiliu un n̄n ɣáań maamaacib upeelee nimiin ki kíil binib bin kɔkɔ bi n̄n dāań upeelee daaŋku bi gbāantí ki jáań upeelee naŋkuee. Ní bi dū bi-liitil n̄ bi-nimiliŋ ki tó farwata ɣmibookun.

²¹Ní kijanjajiki kin nyēēun k̄a utampiinee nyɔkɔnee kūū bin kínee kɔkɔ, ní inoon dómíń ki jíń bi-nanti ki bál.

Dileedakal 20

¹Boonee ní m ká ntūun ɣubɔ nyánní yilpu ki ɣúbiń mbookpaan saafiiu n̄ ikusaka iba i nyìń na!

²Ní ntūunee cúú kupeewambiiu ukookpikēe, an dākà yii Sitaan, ki dū ikusakee ki bóob-u ú n̄n bí míń kí n̄n cí abin kutuku,

³ní ki téé-u ki tó mbookpaanee ni ní ki p̄iń ki kpāl ki ɣééń, an nín dàá ɣá pu ú taa ti kíil atimbun nib kí tin cáá s̄ā abin kutukuee. Boonee bi dàá fātí ɣiń-u kí líi ɣyunti ɣubɔ poon fiii.

⁴Ní m ká abeejal aba, ní bi tī bin k̄a ɣi-puee mpɔn bí n̄n sá bibɔsoonliibi, ní m gítí ká bin n̄n sòon Unimbɔti bɔti ki lèekī Yeesu pu seera bi kūū-bee nammu, n̄ bin kaa n̄n gbāań ki jáań upeelee n̄ u-naŋkuee, kaa yānti bi dāań bi-yigbeen̄i n̄ bi-ɣaliiyee, bi-kɔkɔ fātii fikiti bi n̄ Kriisitoo kāl dibeel abin kutuku.

⁵Bitan̄kpiibi bin kínee kaa làá fikiti, see abin kutukuee yaa láā jíti, difikitipeekaal bɔti dee.

⁶Bin yaa láā bí difikitipeekaal poonee bí mm̄on ni n̄i circir poon. Ðkúnlilitiim kaa dāa gítí cáá b̄in pu mp̄on. B̄in di dāa sá Unimb̄oti n̄i Kriisitoo saraṅaliibi, ní bi n̄i Kriisitoo n̄i k̄al̄ u-beelin abin kutuku.

⁷Abin kutukuee yaa láā jítèe, bi dàá dāá gíin Sitaan kí líí, ú nyā sarkan.

⁸U yaa nyánee, u dàá dāá n̄in ȳiin ki m̄ontí duulnya jannaatiliṅ timbuliṅ, an dākà yii Ḡoogi n̄i Maḡoogi, kí kp̄afi-bi bí b̄ontí kujaau. Bi dàá dāá n̄in w̄ikí tikpil kii tiṅku caṅin bulee ní.

⁹Bi dàá dāá kp̄atí kí gbí kitiṅ k̄ok̄o, ní kí dāá léeh̄ Unimb̄oti niwul n̄i kitiṅ kin u néeece pu, ama ṅṅmi ṅub̄o dàá nyānní yilpu kí dāá w̄o bi-k̄ok̄o.

¹⁰Ní bí dāá téé Sitaan un kíil̄-bee kí t̄o farwata n̄i ṅṅmi bookun laakin upeelee n̄i u-nyim̄omb̄onaatiliu bée, niin ní bi dàá n̄in bí falaa poon ki yáliṅk̄in bi-ba ṅwiin pu n̄i kunyeeu kí n̄in péēcāá cá jaanjaan.

¹¹Boonee ní m ká dibeejapindi diba, ní kitiṅ n̄i kutagb̄oṅu s̄an̄ un kā dibeejapindi gbanti puee nimiin, baa tí ká-bi.

¹²Ní m ká bitaṅkpiibi, bikpaambi n̄i biwaabi yú dibeejalee nimiin, ní bi cúú takaldab ki kp̄atí, ní ki gítí cúú takalda ub̄o mun ki kp̄atí, ùn̄ di sá dimaṅfal takaldau. Ní bi s̄oñ bitaṅkpiibi b̄oti ki táá n̄i bi n̄in ṅá atuun ṅin bi ṅm̄an̄ ki ṅá takalda poonee.

¹³Ní tiṅku ḡiinn̄i binib bin u n̄in ȳoñee, ní ṅkúm n̄i ditaṅkpiil̄ ḡiinn̄i bitaṅkpiibi bin k̄ok̄o bi ṅúbee, ní bi s̄oñ b̄áa ṅma b̄oti tin u ṅée.

¹⁴Ní bi téé ṅkúm n̄i ditaṅkpiil̄ ki t̄o ṅṅmi bookun, ṅṅmi booku gbanti di sá ṅkúnlilitiimee.

¹⁵Un kamaa yindi ní baa ká dimaṅfal takaldau poonee, bi dù-u kí t̄o ṅṅmi bookun ní.

Dileedakal 21

¹Boonee ní m ká kutagb̄omp̄oṅu n̄i kitimp̄oṅ. Kutagb̄oṅkpiikuu n̄i kitiṅkpiikii w̄an̄k̄i ní tiṅku kaa ti bí.

²Ní m ká circir tiṅki Jeerusaleemp̄oṅ nyānní Unimb̄oti cee yilpu ki kp̄akatiṅ ki ṅāñ kii unimpucaan di f̄ul̄ nnyim ki cí u-calee.

³Ní m gb̄il̄ nneen ṅub̄o nyānní dibeejal cee ki téeh̄ mp̄on yii: “K̄oṅk̄onnee Unimb̄oti ṅá u-k̄oṅk̄oṅṅu binib cee, u n̄i bi di dàá n̄in k̄in̄ ki k̄òò, ní bí n̄in sá u-niwul, ní ùn̄ n̄in sá bi-Nimb̄otiu un dàá n̄in bí bi-ceeyee.

⁴Ùn̄ di dàá dāá p̄ití bi-nyinnyim k̄ok̄o, ṅkúm dāa gítí kp̄á, diniminaamandi n̄i ibiil̄ n̄i iyaliṅki dāa gítí kp̄á, kun puee duulnyakpiki kp̄aan̄ t̄in̄ k̄ok̄o ki jítì.”

⁵Ní un kā dibeejal puee bí yii: “Kp̄èemaan, m f̄at̄ii ṅá tiwan k̄ok̄o mp̄om,” ní ki bí-mi yii: “Á ṅm̄a-t̄i kun puee m-b̄oti sá mbaam̄on ní ki máan̄ bí f̄õ-t̄i.”

⁶Ní u gítí bí-mi yii: “An kòkò bóntì ki dódò! Man di sá Alfa nì Oomeega, ukilkaa nì ukuntikaa. Un ní nnyinnyoo yaa cááyee n̄ dāān m-cee m dàā tī-u dimañfal nyimbuliḡu faalaa.

⁷Un yaa ján ki jínee ní m dàā tī tiwammōntiil gbanti ní ki dāa sá u-Nimbōtiu, ní ùn dāa sá man biki.

⁸Ama an yaa kíh̄ bifaantidambee n̄ bin kaa yú n̄ Unimbōti deedeeyee, n̄ bijòkòndambee, n̄ binikpòliibee, n̄ bin ḡáán tilaakpaalee, n̄ bikpaḡkpantiibee n̄ biwaatootiliibee n̄ binyimòndambee kòkòee bíh̄ lan̄ki di sá farwata ḡmibookun, niin di sá ḡkúnlilitiimee.”

⁹Ní itūun iluli ijoolkaa in bàà ḡúb nsambiyaamu falaabi gbí poonee kansikin ḡubo dómíh̄ ki bí-mi yii: “Dāān m̄ dākà-si unimpucaan, dipibil nimpuu.”

¹⁰Ní Unimbōti Fām dómíh̄ m-ni, ní ntūun yōòh̄-mi ki jóm̄ dijoofòkòl diba pu, ní ki dākā-mi Jeerusaleem circir tiḡki kin nyánní Unimbōti cee ki sìntínee

¹¹ní ki jilíh̄ Unimbōti nyaan̄ku; kitiḡee jíl̄ kii atan̄kpanyaane ní, kii atan̄kpee ḡin jòm̄ pólpol ki wāl̄ kílkilee.

¹²Ní digundi din bi mán̄ ki māntì ki tú kitiḡee gbífi ki fòkò mun, ní ki cáá mpunyòmu saalaa n̄ muli, ní itūun saalaa n̄ ili yú mpunyòmu pu ki cí, ní bi ḡmān̄ Israyeel biyaamu naakòti saalaa n̄ tilee yiḡḡi ki nákañ mpunyòmuee pu.

¹³Ní mpunyòmu muta túl̄ ḡwíh̄n̄ nín nyēeh̄ puee, ní muta túl̄ ḡwíh̄n̄ nín jēetí puee, ní muta túl̄ ḡgan pú, ní muta túl̄ ḡgiil pú.

¹⁴Atan̄kpee saalaa n̄ ali pu ní bi n̄n̄ mán̄ kitiḡee gundi ki tókòh̄, ní ki ḡmān̄ dipibil kpambaliḡ saalaa n̄ alee yiḡḡi atan̄kpeeyee pu.

¹⁵Ní ntūun ḡun yú ki sòòh̄ n̄ mee ḡúb tiwan̄ḡmantikaal, sindaariya kpaḡkpaan̄ḡu, kí ḡmāntì kitiḡee n̄ ki-punyòm̄mu n̄ ki-guḡḡi.

¹⁶Kitiḡee fòkòḡḡu n̄ ki-waan̄ḡu ḡmà ní. Ntūunee dū sindaariya kpaḡkpaan̄ḡuee ki ḡmāntì kitiḡee fòkòḡḡu, ní ki ká atan̄kpee kutukub bili n̄ kulaafaau, m̄h̄n̄ ní ki-waan̄ḡu, ki-fòkòḡḡu n̄ ki nín fòkò ki jóm̄ puee mun n̄n̄ sá.

¹⁷Ní ḡu ḡmāntì digundi mun ní ki ká di-gbifíḡḡu meetab imuḡku ita n̄ biḡmoo, kii binib nín péēḡmāntì puee ní ḡu ḡmāntì.

¹⁸Atan̄kpee ḡin jòm̄ pólpol̄ee ní bi dū ki mán̄ digundi, ní kitiḡ ki-ba kòkò sá sindaariyamōnti ki wāl̄ kílkil kii digitilee.

¹⁹Atan̄kpee ḡin bi dūu kíí taapu ki nín mán̄ digundee ki tókòh̄ee puee bi dū atan̄kpanyaan̄ ḡin bí tóbinee ní ki nákañ. Bi n̄n̄ dū atan̄kpee saalaa n̄ ali ní ki kíí taapu. Ntantukupeekaa taḡkpeeḡi ní bi yíi yii jaaspi, ní ki yíi dililitiil̄ yii safiir, ní ki yíi ditataatiil̄ yii kalseeduaana, ní ki yíi dinanaatiil̄ yii eemeeroodi,

²⁰ní ki yíi diḡmoon̄mootiil̄ yii sarduaan, ní ki yíi diluluutiil̄ yii kòrnalin, ní ki yíi diluluútiil̄ yii krisooliiti, ní ki yíi dininiitiil̄ yii beeril, ní ki yíi diwawaatiil̄ yii toopasi,

ní ki yî disaalaatiil yii krisooprasi, ní saalaa nì dibee ní bi yî yii iyasinti, ní ki yî dijoolkaalee ameeetiisti.

²¹Ní mpunyɔmu saalaa nì mulee sá atanjpanyaan ní, kipunyɔko kamaa nì ditanjpaperiŋkaal dimɔndi. Ní kitiŋ ki-ba danji sá sindaariyamɔnti ki wál kílkiil kii digitilee.

²²Ama maa ká Kunimbɔtidii kitiŋ gbanti poon, kun puee ti-Dindaan Unimbɔti ipɔn kɔko daan nì dipibil di sá Kunimbɔtidii.

²³Kitiŋ gbanti kaa nyàab ŋwiín nì uŋmal n̄ ŋmíntí-kì i-walfiŋu, Unimbɔti nín ŋān ki jìl puee di sá-kì ŋwalfi, ní dipibil sá ki-fitilau.

²⁴Atimbun kɔko dāa còom̄ ki-walfiŋun ní, ní duulnya bɔtiibi n̄ dāa cáan bi-gaajati niin.

²⁵Mpunyɔmu dāa péē wāa ní ŋwiín pu, baa pìintí, kun puee kunyeeu dāa kpá niin.

²⁶Bi dāa cāabiñ atimbun jilmau nì ŋi-nyooti niin.

²⁷Ikpiti iba kaa dāa kòò niin, nì bitijwiiliibi nì binyimɔndambi, see bin baba yiŋŋi bi ŋmān dipibil takaldau un sá dimaŋfal takaldauee nee.

Dileedakal 22

¹Ní ntūun dākā-mi mbun ŋun pùub nnyim min tìi dimaŋfalee, nnyim gbanti wál ní kílkiil ní ki jìl pàlpal, ní ki nyēēñ Unimbɔti nì dipibil beejal laŋki,

²ní ki pùub kitiŋ kansikin didandi pu. Ní dimaŋfal subu yú abunŋban liitil pu ki lòon dibindi poonee saalaa nì mili, an dākà yii uŋmal kamaa poonee bu lòon diba, bu-faati di cāantí atimbun weeni.

³Mbusu dāa gítí kpá. Unimbɔti nì dipibil beel dàa dāa n̄n bí kitiŋ poon ní, ní u-tɔntɔnliibi n̄ n̄n nyóŋkí-u.

⁴Bi dàa dāa wál u-nimiin, ní bi dāa ŋmà u-yindi bi-yigbeenji pu.

⁵Kunyeeu kaa dāa gítí bí, ubɔ kaa dāa gítí nyàab fitila kí tūū án n̄n wál-u, kaa dāa gítí nyàab ŋwiín n̄ nyā bí n̄n wál, kun puee ti-Dindaan Unimbɔti di dāa sá-bi ŋwalfi, ní bí dāa n̄n bí ki jìh̄n dibeel kí n̄n péēcāa cá jaanjaan.

⁶Ní ntūunee bí-mi yii: “Tibɔti nee sá ibaamɔn ní, ki máan bí fɔ̄-tì. Ní ti-Dindaan Unimbɔti un tìi u-Fām u-bɔnaatiliibee túnní u-tūuŋŋu n̄ dāa dākà u-tɔntɔnliibi tin dàa bān kɔŋkɔnneeyee.”

⁷Ní Yeesu bí yii: “Pílfi! M dàa dāan̄ kɔŋkɔnnee. Un ŋúb tibɔti tin m sòon̄ bi ŋmān an kā takalda nee poonee bí mmɔn ni.”

⁸Man Jaan di gbìl an bɔtee kɔko ki wál-tì mun. M nín gbìl ki wál-tì mimmee ní m líti dicincibil ntūun ŋun dākā-mi tibɔti gbanti kɔko taapuee nimiin kí jāam̄-ŋu.

- ⁹Ní ɣu bí-mi yii: “Taa ɣée, kun puee man mun sá utontɔnli kii sisee ní, kii a-nabiyaamu mun nàatī Unimbɔti bɔtee, nì bin kɔkɔ tó tibɔti tin bi ɣmàñ takalda nee poonee ní. Unimbɔti ní an sá á jàam̄.”
- ¹⁰Ní u bí-mi yii: “Á taa bál tibɔti tin bi nyánti ki dākā-si tì kā takalda nee poonee, kun puee ɣyunti ɣun an bɔtee kɔkɔ dàá bàñee tóobiñ.
- ¹¹Unikpiti ń m̀tī nīn ɣáań u-kpitii, ujɔkɔndaan ń m̀tī nīn ɣáań u-jɔkɔnti, deedeedaan ń m̀tī nīn ɣáań deedee tuuɣi, ní circirdaan ń m̀tī nīn bí circir.”
- ¹²Ní Yeesu bí-mi yii: “Pĩfi! M dàá dāań kɔɣkɔnnee kí nīn ɣúbiñ tipaal, kí pà báa ɣma u-tundi nín sá puee.
- ¹³Man di sá Alfa nì Oomeega, an dākà yii upeepeekaa nì ujoolkaa, ukilkaa nì ukuntikaa.”
- ¹⁴Bin fínti bi-bɔkutiɣ ɣaa cáá tijɔkɔndi, ki máań kí ɣmó dimaɣfal subil, ki dàá dī mpunyɔmu kí kó kitiɣinee bí mmɔn ni.
- ¹⁵Ní bijɔkɔndambi nì bikpaɣkpantiibi nì bin ɣáań tilaakpaalee nì binikpɔliibi nì biwaatootiliibi nì binyimɔndambee dāa yú kitiɣ kpaanceetiɣu.
- ¹⁶“Man Yeesu di túnni m-tūuɣu ɣú sòòñ an bɔti m-nikitiɣ kansikin kí tükù-ni. M sá Dafiidi naakookun ní, ki sá utaafaanmalbija un jìlee.”
- ¹⁷Unimbɔti Fām nì Unimpucaan bí yii: “Dāań!” Bin mun gbīl an bɔtee ń lì yii: “Dāań!” Un nnyinnyoo yaa cááyee ń dāań kí fǔǔ nnyim min tìi dimaɣfalee faalaa.
- ¹⁸Man Jaan di kpáafí bin kɔkɔ gbīl tibɔti tin Unimbɔti sòòñ an kā takalda nee poonee yii: Un yaa gbéèñ tibɔti nee poon tibee, Unimbɔti dàá dāá gbéèñ udaan ditafadaaldi dīn u ɣmàñ ki ɣá takalda nee poonee.
- ¹⁹Un yaa tí bātì tibɔti gbanti poon tìba ki féé, Unimbɔti dàá dāá fǔǔ u-jandi dīn u cáá disubil dīn tìi dimaɣfalee poonee, ú taa kó circir tiɣki kin bɔti bi ɣmàñ takalda nee poonee.
- ²⁰Ún Yeesu un bí ki sòòñ nì ti an bɔtee di lī yii: “Iiin! M dàá dāań kɔɣkɔnnee.” Án lafun ɣá mín! Dāań, ti-Dindaan Yeesu!
- ²¹Ti-Dindaan Yeesu ɣanti ń nīn bí ni-pu.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil